


# Xtiidx Dios



New Testament in Zapotec, Santo Domingo Albarradas  
(MX:zas:Zapotec, Santo Domingo Albarradas)

## Xtiidx Dios

New Testament in Zapotec, Santo Domingo Albarradas (MX:zas:Zapotec, Santo Domingo Albarradas)  
copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

### Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2019 from source files dated 1 Dec 2018  
fb4ebcb8-e1f4-5bfc-b08c-f590e137d86d

## Contents

San Matew . . . . .	1
San Marcw . . . . .	47
San Lujc . . . . .	77
San Juan . . . . .	125
Hch . . . . .	160
Ro . . . . .	203
1 Co . . . . .	222
2 Co . . . . .	240
Gl . . . . .	252
Ef . . . . .	258
Flp . . . . .	264
Col . . . . .	268
1 Ts . . . . .	272
2 Ts . . . . .	276
1 Ti . . . . .	278
2 Ti . . . . .	284
Guil'ch par Tito . . . . .	288
Flm . . . . .	291
Heb . . . . .	292
Stg . . . . .	306
1 Pe . . . . .	311
2 Pe . . . . .	316
1 Jn . . . . .	319
2 Jn . . . . .	324
3 Jn . . . . .	325
Jud . . . . .	326
Ap . . . . .	328

## Xtiidxza'c Jesucrist ni bacaa San Matew

### *Xdiaagulal Jesucrist*

*(Lc. 3:23-38)*

<sup>1</sup> Guie zëed laj ree bën naj xdiaagulal Jesucrist, bën zëed ree loj xdiaa rey Davi në loj xdiaa Abraham.

<sup>2</sup> Abraham brier laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman. <sup>3</sup> Dxel Judá cwa'man Tamar, abi' guyu xi'n reeman brier laj reeman Fares con Zara. Fares gojc xdad Esrom, Esrom gojc xdad Aram. <sup>4</sup> Aram gojc xdad Aminadab, Aminadab gojc xdad Naasón, Naasón gojc xdad Salmón. <sup>5</sup> Salmón gojc xdad Booz, guiáad xniaa Booz brier laj Rahab. Booz cwa'man Rut, abi' xi'n reeman brier laj Obed. Obed gojc xdad Isaí, <sup>6</sup> Isaí gojc xdad rey Davi. Dxel rey Davi con bën goc lacheel Urías guyu xi'n reeman brier lajman Salomón.

<sup>7</sup> Dxel Salomón gojc xdad Roboam, Roboam gojc xdad Abías, Abías gojc xdad Asa. <sup>8</sup> Asa gojc xdad Josafat, Josafat gojc xdad Joram, Joram gojc xdad Uzías. <sup>9</sup> Uzías gojc xdad Jotam, Jotam gojc xdad Acáz, Acáz gojc xdad Ezequías. <sup>10</sup> Ezequías gojc xdad Mainán, Mainán gojc xdad Amón, Amón gojc xdad Josías. <sup>11</sup> Dxel Josías gojc xdad Jeconías con ree bijchaman, tiamp ni guzu ree bën Israel Babilonia zi'c bën yu' ladxguiib.

<sup>12</sup> Chi ma barii reeman Babilonia lod guzu reeman zi'c bën yu' ladxguiib, gojl Salatiel, xdadaman gojc Jeconías. Dxel Salatiel gojc xdad Zorobabel. <sup>13</sup> Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, <sup>14</sup> Azor gojc xdad Sadoc, Sadoc gojc xdad Aquim. Aquim gojc xdad Eliud, <sup>15</sup> Eliud gojc xdad Eleazar. Eleazar gojc xdad Matán, Matán gojc xdad Jacob. <sup>16</sup> Jacob gojc xdad Xiëb lacheel Li. Dxel Li gojc xniaa Jesús, bën la gajc Cristo.

<sup>17</sup> Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bën Israel Babilonia zi'c bën yu' ladxguiib, abi' zachidaj generacion guyu diizd tiamp ni barii ree bën Israel Babilonia xt chi bidxin dxej gojl Jesucrist loj guidxliuj.

### *Gojl Jesucrist*

*(Lc. 2:1-7)*

<sup>18</sup> Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios. <sup>19</sup> Abi' Xiëb guial najman benza'c, ad guyëntaman nusa'nxtuman Li. Beenman xgab niro'nladxaman laaman ralanzi. <sup>20</sup> Per la'tgaj cayünman xgab zian, balüüloj tijb xianjl Dios lojman loj baccal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëedix.

<sup>21</sup> Tijb xindoniguiaaw gac xi'n Li, yagu'l lajx “Jesús”, din por laax gra ree xbejnx gac perdon xtol.

<sup>22</sup> Gra ree ni guie gojc persi guzobj xtiidx Dios zi'c gunee bën badëë xtiidxaman loj ree bejn, chi rëbaman:

<sup>23</sup> Tijb biinxdüb chu' xi'n,

abi' chi galix grii lajx Emanuel,

rën guiëban: Dios za'në dunuj ree.

<sup>24</sup> Chi baban Xiëb, dxel beenman zi'c gunabee xianjl Dios laaman, cwa'man Li, <sup>25</sup> per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

<sup>1</sup>Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree b́en rajc, Jerusalén, laa reeman naj magos, za reeman niz oriente. <sup>2</sup>Abi' gunabdiidx reeman, rēb reeman:

—¿Con xrey ree b́en Israel, b́en ma gojl? Din dunujn diizd duladxan baguiaan xbajlaman xanyabaa, zeel zio'pan din yazuxiban lojman.

<sup>3</sup>Chi biguien rey Herodes zian, dád gyunawēegaman, nēgajc gra ree b́en Jerusalén gyunawēēg. <sup>4</sup>Zeel gurejdx Herodes gra ree bixhioz rniabee ree bixhioz, nē ree mextr rajc ley, persi gunabdiidxaman loj reeman banguin naj gal Cristo. <sup>5</sup>Dxel rēb reeman:

—Belén naj galaman, tijb guiedx naaz Judea, din ze bacaa b́en badēē xtiidx Dios loj ree bejn:

<sup>6</sup>Lūj Belén, tijb guiedx naaz Judea,  
majsi guiedx dobēz najl loj gra ree guiedxro' naaz Judea.  
Per lasajquil din luguiedx Belén guin grii tijb b́en nabee  
guiniaj tēēman da b́en Israel reen.

<sup>7</sup>Dxel ralanzi gurejdx rey Herodes b́en rajc guin ree, persi gunabdiidxaman goc balūūloj bajl xanyabaa guin loj reeman. <sup>8</sup>Abi' guxhaalaman laa reeman Belén, rēbaman loj reeman:

—Gol wej, gol bignabdiidxchaaw graczi xcwent xindobēz guin. Abi' chi yadxeljidi laax, laa gol bagojn gajc naj, din nē naj chigzuxib lojx.

<sup>9</sup>Chi gulox rēb Herodes loj reeman zian, dxel zē reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobēz guin guzudxen. <sup>10</sup>Chi baguiaa reeman bajl guin, dád babaa reeman. <sup>11</sup>Abi' chi guyu reeman lēnū guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, nē yaal, nētēē mirra par xindo guin. <sup>12</sup>Chi ma guidxin dxej yaza reeman, dxel bagojn Dios laa reeman loj bacaal chitēē yayejc reeman niz lod za' Herodes, zianan zeel bayejc reeman niz lood ren.

#### *Zē reeman Egipto*

<sup>13</sup>Chi ma zia ree b́en rajc guin ladx reeman, dxel balūūloj tijb xianjl Dios loj Xiēb loj bacaal, rēbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lējt, din zaguiil Herodes laax din gugūjtaman laax.

<sup>14</sup>Dxel bixche Xiēb, cwa'man xindobēz guin con xniaax, abi' guxhin guin brii reeman zē reeman niz Egipto. <sup>15</sup>Ni guzu reeman xt gūjt rey Herodes. Zian guzobj xtiidx Dios ni gunee b́en badēē xtiidxaman loj ree bejn, chi rēbaman: “Babedx da xi'nan Egipto.”

#### *Gunabee Herodes guiēt ree xindobēz*

<sup>16</sup>Chi gogbee Herodes guial basquiee ree b́en rajc guin laaman, dád bidxe'chaman. Dxel gunabeeman guiēt gra ree xindoniguaaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén nē gra ree guiedx riga' niz ni, guial yu'guijcaman ni rēb ree b́en rajc guin guial ma gojc tio'p ijz ni baguiaa reeman bajl guin.

<sup>17</sup>Zian gojc cumplid ni bacaa Jeremías, b́en badēē xtiidx Dios loj ree bejn, chi rēbaman:

<sup>18</sup>Biguien cha' tijb bejn guiedx Ramá,

yu' guialroon nē guialrbixdiaj,

Raquelan cayoon por ree xi'nman,

abi' ad rilet' chu gusquiejn laaman guial gūjt ree xi'nman.

<sup>19</sup>Per chi gūit Herodes, dxel balūūloj tijb xianjl Dios loj Xiēb loj bacaal lod zobj reeman, Egipto, abi' rēbaman lojman:

<sup>20</sup>—Bixche, cwa' xindobēz guin con xniaax. Gol baguiaj niz Israel, din ma gūjt ree b́en guyēn nugūjt laax.

<sup>21</sup>Dxel bixche Xiēb cwa'man xindobēz guin con xniaax, bayejc reeman niz Israel. <sup>22</sup>Per chi gogbee Xiēb guial Arquelao, xi'n Herodes, naj b́en canabee niz Judea, bidxebaman naguiaj reeman niz ni. Dxel bagojn Dios laaman loj bacaal din che reeman niz Galilea,

dxel zë reeman. <sup>23</sup> Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree bën badëë xtiidx Dios loj ree bejn, guial grii laj Jesús bën Nazaret.

### 3

*Diidx gunee Waj bën baroobnijs bejn ree*

*(Mr. 1:1-8; Lc. 3:1-9, 15-17; Jn.1 :19-28)*

<sup>1</sup> Lën ree dxej ni bidxin Waj, bën baroobnijs bejn ree, loj yujbidx niz Judea catie'chaman xtiidx Dios. <sup>2</sup> Rëbaman:

—Gol bayüjn xgab por xtolidi din ma zidyob xguialrniabee Dios.

<sup>3</sup> Xcwent Waj guinan bacaa Isaías, bën badëë xtiidx Dios loj ree bejn, chi rëbaman: Rguien cha' tijb bën rbidxa' niz loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejz nali.”

<sup>4</sup> Con guidxlad camell gojcnë xab Waj, abi' lënman bixii tijb guid. Gudaw tëëman bi'tsu con dxijn yu' dajn. <sup>5</sup> Dxel bën Jerusalén ree në los demazri ree bën Judea nëtëë gra ree bën zobj gadëd ro' guiiw Jordán, brii reeman bicaagdiajg reeman ni rniee Waj. <sup>6</sup> Dxel guxhoobdol reeman, abi' baroobnijs Waj laa reeman loj guiiw Jordán guin.

<sup>7</sup> Per chi baguiaa Waj zien ree bënfarisew në ree bénsaducew bidxin din tiobnijs reeman, rëbaman loj reeman:

—¡Xi'n xindxab! ¿Chu bagojn lëjt din laadi loj castiro' ni zëëd? <sup>8</sup> Gol gubajn zagdxe din guiguien guial waliquidi ma bayüjndi xgab por xtolidi, <sup>9</sup> abi' ad bal rlies xvalorgajquidi, rëbidi: “Dunujn zio'p loj xdiaa Abraham”, din naj rni lëjt xt guiaj guie ree zile' yayüjn Dios xdiaa Abraham. <sup>10</sup> Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can. <sup>11</sup> Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bën zidnal naj, laaman guroobnijs lëjt con xSprijt Dios con në bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan. <sup>12</sup> Abi' zi'c raya trigo zian güünnëman bejn. Din bën zinal ree xnejz Dios chinëman laa reeman lod rniabeeman, guiáad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

*Gurobnijs Jesús*

*(Mr. 1:9-11; Lc. 3:21-22)*

<sup>13</sup> Lën ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. <sup>14</sup> Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

<sup>15</sup> Dxel rëb Jesús lojman:

—Yo guna gac zian, din mazri zagdxe yaguieen gra zi'c rniabee Dios.

Dxel cwëjb Waj baroobnijsaman laaman. <sup>16</sup> Chi gulox guroobnijsaman, naabzi bariiman loj nijs guin, dxejczy bixal xanyabaa, abi' baguiaaman zidguiajt xSprijt Dios zi'c tijb palom xt guijcaman. <sup>17</sup> Dxel biguien cha' tijb bejn xanyabaa, rëbaman:

—Bën guie naj da Xi'nan, bën rën da'tan bën rabaanë' tëën.

### 4

*Gojc Jesús prueb*

*(Mr. 1:12-13; Lc. 4:1-13)*

<sup>1</sup> Dxel binë xSprijt Dios Jesús niz loj yujbidx, din güün xindxab laaman prueb.

<sup>2</sup> Ni guzuman tiuu dxej tiuu guiaal sin guialraw, dxel gulaanman. <sup>3</sup> Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guiadxtil.

<sup>4</sup> Per badxi' Jesús san rëbaman:

—Loj xtiidx Dios rëb: “Ad ganaxtizi guidxtil guiban bejn, nëgajc gra diidx rnïee Dios.”

<sup>5</sup> Dxel binë xindxab guin laaman Jerusalén, abi' gulë'pix laaman guijc yadooro' zojb luguedxzii, <sup>6</sup> abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:  
Dios guixhiaal ree xianjlaman din guinia reeman lüj.

Guiniaaz reeman lüj con yaa reeman  
chitëë ladx ni'czi tijb guiaj guia'l.

<sup>7</sup> Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

<sup>8</sup> Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree guialnaza'c yu' loj reen. <sup>9</sup> Abi' rebix lojman:

—Naj gune gra ree ni guie lojl, bal guzuxibil lon guiniajchi' tëël naj.

<sup>10</sup> Badxi' Jesúsán, rëbaman:

—Biquied, xindxab, din loj gajc xtiidx Dios rëb: “Gunajchi' xDadil Dios, tijbzi lojman been sirv.”

<sup>11</sup> Dxel biquied xindxab guin lojman, abi' bi't tio'p choon ree xianjl Dios persi been reeman laaman sirv.

*Rzuloj Jesús rtie'chaman xtiidx Dios niz Galilea*

*(Mr. 1:14-15; Lc. 4:14-15)*

<sup>12</sup> Chi gogbee Jesús guial yu' Waj ladxguiib, bayejcaman Galilea. <sup>13</sup> Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabulón në Neftalí. <sup>14</sup> Zian gojc persi gojc cumplid ni bacaa Isafas, bën badëë xtiidx Dios loj ree bejn, chi rëbaman:

<sup>15</sup> Bén Zabulón con ree bën Neftalí,

në ree bën zojb gajxh ro' nijsdoo, nëtëë ree bën zojb xijch guiiw Jordán  
con gra ree bën zojb niz Galilea,

lod zojb ree bën ad najt bën Israel,

<sup>16</sup> gra reeman gubajn loj xcay.

Yan ma brii tijb biani par laa reeman,

abi' biani guin guxhal xquiarguejn ree bën ad nabant xnejz loj Dios.

<sup>17</sup> Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëëd gajxh xguialrniabee Dios.

*Rbejdx Jesús tajp ree bën gac xbejnman*

*(Mr. 1:16-20; Lc. 5:1-11)*

<sup>18</sup> La'tgaj caza Jesús gajxh ro' nijsdoo Galilea, baguiaaman Simón bën la gajc Bëd con bijchaman Andrejs. Cuzaal reeman guijxh loj nijs din guiniaaz reeman bëjl. Guial laan naj xchiin reeman. <sup>19</sup> Dxel rëb Jesús loj reeman:

—Gol tanal naj, din gulün lëjt xhienaag güündi din guto'pidi bejn par Dios luar guiniaazidi bëjl.

<sup>20</sup> Loj hor guin gajc basa'n xguijxh reeman abi' zinal reeman laaman.

<sup>21</sup> Guzaman zatibda'n dxel baguiaaman zatío'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjnchaaw xguijxh reeman. Dxel gurejdx Jesús laa reeman, <sup>22</sup> abi' basa'n reeman barcw guin con xdad reeman, dxel laa zinal gajc reeman laaman.

*Rülüü Jesús zien ree bejn*

*(Lc. 6:17-19)*

<sup>23</sup> Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman xhienaag naj xguialrniabee Dios, abi' bayüjnman bën rdoob ree në gra ree bën rajc xhietëëz guialguijdxan. <sup>24</sup> Guidibczi niz Siria bire'ch xtiidx Jesús, abi' bidnë reeman bën cusagdiaj ree gadxagayaa ni mal në graloj ree guialguijdx, bën yu' ree xindxab luxdoo, në ree bën

rějtya', nětëe ree bén ad rilet suli, abi' bayüjn Jesús laa reeman. <sup>25</sup> Dád zien ree bejn binal laaman, bén Galilea ree, bén zëed ree Decápolis, bén Jerusalén ree, bén zëed ree niz Judea nē ree bén zëed stiblad ro' guiiw Jordán.

## 5

*Ni balüü Jesús tijb guijc guia'*

<sup>1</sup> Chi baguiaa Jesús bén guixiuj ree, wē'paman tijb guijc guia' abi' gurejman, dxel gubig ree xbejnman lojman. <sup>2</sup> Abi' guzuloj culüüman laa reeman, rēbaman:

*Xiquilbaa ree bejn*

(Lc. 6:20-23)

<sup>3</sup> —Xiquilbaa ree bén ragbee guial ryaadx gagnē Dios laa reeman, din por zian yayal reeman lod rniabeeman.

<sup>4</sup> 'Xiquilbaa ree bén yu'naya, din Dios yagu' luxdoo reeman zagdxē.

<sup>5</sup> 'Xiquilbaa ree bén naj bén chaawladx, din laa reeman tia' guidxliuj ni rēb Dios gudēedaman loj reeman.

<sup>6</sup> 'Xiquilbaa ree bén rzajc zic chi rliaan bejn o chi re'caman nijs zian rēn da't reeman güün reeman zic rniabee Dios, din Dios gagnē laa reeman din güün reeman zic ruladxaman.

<sup>7</sup> 'Xiquilbaa ree bén raya lasa', din zian yaya Dios laa reeman.

<sup>8</sup> 'Xiquilbaa ree bén naya loj Dios, din laa reeman guguaa laaman.

<sup>9</sup> 'Xiquilbaa ree bén rüjn naguiejn cwedxenē lasa', din laa reeman grii laj xi'n Dios.

<sup>10</sup> 'Xiquilbaa ree bén cadēd loj guialzi por graloz ni rujnnē bejn laa reeman guial cayüjn reeman zic rniabee Dios, din laa reeman yayal lod rniabeeman.

<sup>11</sup> 'Xiquilbaadi, chi rüjnnē reeman lējt xhiernarajc nē chi rnieeguijdx reeman lējt nētēe chi rudxiib reeman guijquidi graczi, guial najdi da bejnan. <sup>12</sup> Gol badxe' luxdoodi nix, gol babaa tēe din narooob naj ni guneē Dios lojdi xanyabaa. Abi' lējt ragbee guial ziangajc basagzi reeman bén badēe ree xtiidx Dios loj ree bejn gocli chi gadidi gui't loj guidxliuj.

*Lējt naj zic zēd nē zic bajl*

(Mr. 9:50; Lc. 14:34-35)

<sup>13</sup> 'Lējt naj zic zēd loj guidxliuj guie. Per bal id naxijran, ¿xhieza naag yayajcan naxij zatijb? Achetri dxiin güünan, gaz guire'chan abi' chē'p ree bejn guijcan.

<sup>14</sup> 'Lējt naj zic tijb biani loj guidxliuj guie, naj tēedi zic tijb guiedx ni riga' tijb guijc guia' abi' ad zajct guiguie'chan. <sup>15</sup> Ad ritiaguij tēet tijb guij par guida'cwan lēn tijb yagaln, ritiaguijn persi rzojban ya din gusnin loj gra ree bén yu' lēnü. <sup>16</sup> Ziangajc lējt, gol gojc zic biani loj ree bejn, din chi guguaa reeman ni zagdxē cayüjndi guza't reeman xDadidi Dios zagdxē bén yu' xanyabaa.

*Rülüü Jesús xcwent ley*

<sup>17</sup> 'Ad naladxidi zialan par günan ley tiblād, ley ni badēe Dios loj Moisejs o ni balüü ree bén badēe xtiidx Dios loj ree bejn, zialan par günanan cumplid. <sup>18</sup> Din naj rni lojdi, la'tgaj yu' xanyabaa nē guidxliuj, ad ziquiedt tijb punt o tijb lejtr loj ley xt chi gac gra ni naj gac. <sup>19</sup> Zianan zeel bén ad ruzoobt tijb mandamient ni zëed loj ley guin majsi nidobēz naj mandamient guin, bal rülüü tēeman bejn ree güün reeman zian, laaman lasajc ta'nzi lod rniabee Dios. Per bén ruzoob gra ree mandamient ni zëed loj ley guin, rülüü tēeman bejn ree guzoob reeman laan, laaman naj mazri bén lasajc lod rniabee Dios. <sup>20</sup> Zeel naj rni lojdi, bal id zabajndi mazri zagdxē guial loj ree mextr rajc ley nē ree bénfarisew, ad zayaltidi lod rniabee Dios.

*Rülüü Jesús xcwent guialrdxe'ch lasa'*

(Lc. 12:57-59)

<sup>21</sup> 'Lējt ragbee guial rēb Dios loj ree xbéngulalidi: “Ad gugüjtil bejn, din bén gugüjt bejn yayalaman casti.” <sup>22</sup> Per naj rni lojdi, chutēez bén rdxe'chnē lasa', yayalaman casti, nē



bén rniee diidxguijdx lasa' xt loj guxtis zajc cheman, guiáad bén rëb loj lasa' achet sirv lüj, laaman yayal loj bajl yu' gabijl.

<sup>23</sup> Zeel bal zinël gon lën yadoo abi' yagaj rusaaladxil guial yu' bén rdxe'chil, <sup>24</sup> basa'nsii xgonl yagaj, yalojxgaj babenë bén rdxe'chil zagdx, dxel ma zile' yajejquil din gusa'n xgonl.

<sup>25</sup> Bal chu bén rudëed lüj loj guxtis, baya'nnëman diidx zagdx la'tgaj yu' tiamp, chitëe yayüman lüj loj guxtis, abi' guxtis guin nabee chu'l ladxguiib. <sup>26</sup> Naj rni lüj, ad zariitil ladxguiib guin xtczi quixil gra ni na guxtis guin.

#### *Rülüü Jesús xcwent guialrzunë lacheel ben ren*

<sup>27</sup> Lëjt ragbee guial loj ley rëb: “Ad sunël lacheel ben ren.” <sup>28</sup> Per naj rni lëjt, chutëez bén rüjn xgabmal chi ruguiaaman tijb béngunaa, con laan ma beenman dol lën luxdooman por béngunaa guin.

<sup>29</sup> Bal laagajc guiaaloj ladbeel rüjn din güünl dol, mazri zagdx naj gulëen bazaalan zijt. Din mazri zagdx naj nit tiblax guiaalojl luar che guidibil gabijl. <sup>30</sup> Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdx naj nit tiblax yaal luar che guidibil gabijl.

#### *Rülüü Jesús xcwent guial rala' lasa' bejn*

(Mt. 19:9; Mr. 10:11-12; Lc. 16:18)

<sup>31</sup> Ma bacaagdiajg tëedi: “Chutëez bén rala' lacheel, rayal gudëedaman gui'ch lojman guial ma bala' lasa' reeman.” <sup>32</sup> Per naj rni lëjt: Xinguaaw rala' xbéngunaa, abi' ad za'nët béngunaa guin xin ren, laagajc laax cayüjn din sunë xbéngunaax xin ren. Abi' xin tia' béngunaa guin dolan cayüjnx.

#### *Ad rayalt guza't xlia' bejn Dios*

<sup>33</sup> Rëb tëe Dios loj ree xbéngulalidi: “Ad guza't xlia'di Dios, rayal güüнди cumplid ni rëbidi gudëedidi lojman.” <sup>34</sup> Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lëjt din ni zojb Dios, <sup>35</sup> ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. <sup>36</sup> Ad guza't tëe guijquidi par chililadx reeman lëjt, din ni'qui tijb guidxguijquidi ad zajct güüнди ni ya's o ni naquich ya. <sup>37</sup> Zagdxeli con gol güjdx “an” o “a'n”, din los demazri ree ni guinieedi loj xindxab zan.

#### *Ad yadxi'di ni mal por ni mal*

(Lc. 6:29-30)

<sup>38</sup> Lëjt ragbee guial loj ley rëb: “Bén cwëe guiaalojl, gulëe gajc guiaalojman. Guiáad bén cwëe layil, gulëe gajc layaman.” <sup>39</sup> Per naj rni lëjt: Ad yadxi'di ni mal por ni mal, bal chu chëez xhajn ladbeedi, gol badëe stibladan chëezaman. <sup>40</sup> Bal chu bén tilë lüj din cwëexuuman xmanguil, badëe në xchamarril tia'man. <sup>41</sup> Abi' bal rüjn reeman lüj naguiejn güül tijb yuu din sanëlan tib kilometro, guzanën tio'p kilometro. <sup>42</sup> Chutëez bén rniab xhienin lojl, badëedan, bal chu tëe rgui'n xhienin lojl ad bal cwexuul gudëedilan.

#### *Guyën bén rdxe'ch lüj*

(Lc. 6:27-28, 32-36)

<sup>43</sup> Ragbee tëedi rëb ree bejn: “Guyën bén rën lüj, bidxe'ch tëe bén rdxe'ch lüj.” <sup>44</sup> Per naj rni lojdi: Gol guyën bén rdxe'ch lëjt, gol gurejdx tëe Dios por ree bén rzunal lëjt, din güün reeman lëjt ni mal. <sup>45</sup> Din zian gaquidi xi'n xDadidi Dios bén yu' xanyabaa, din laaman ruslejn xgubijdxaman par ree benza'c në par ree benmal, ruscal tëëman guia par ree bén naban zi'c rayal në par ree bén ad nabant zi'c rayal. <sup>46</sup> Din bal rëndi ganaxzi bén rën lëjt, ¿xhieza tia'di loj Dios zian? Din xt bëndol ree rüjn zian. <sup>47</sup> Abi' bal ganaxzi bén rëndi rugajpdiozidi, ¿xhieza ni zagdx cayüjndi? Din xt bén ad nünbeet ree Dios rüjn zian. <sup>48</sup> Zeel gol gojc benza'c, zi'c naj xDadidi Dios bén yu' xanyabaa.

## 6

*Xhienaag gagnë lasa' bejn*

<sup>1</sup> 'Ad güüнди ni zagdxе niz loj ree bejn naabzi par yadxaloj reeman lëjt. Din bal güüнди zian, xDadidi Dios бэн yu' xanyabaa achet gunеeman lojdi. <sup>2</sup> Zeel chi güünl yudar бэн ryaadx xhienin, ad guitie'chil diidx par gagbee bejn xhie cayüjnl zi'c rüjn ree бэн rusquiee, lën ree yadoo në ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman. <sup>3</sup> Zeel chi güünl yudar бэн ryaadx xhienin, ni'czi loj xmiwda'til ad gül diidx ni cayüjnl. <sup>4</sup> Mazri zagdxе lüjzi gagbee ni cayüjnl, abi' xDadil Dios laaman cuguiaa ni cayüjn lüjzi, laaman gunee ni rayalil.

*Xcwent xhienaag cwedx guiniab bejn Dios*

(Lc. 11:2-4)

<sup>5</sup> 'Chi cwedx guiniabidi Dios, ad güüнди zi'c rüjn ree бэн rusquiee, бэн ruladx ree rzuli par cwedx guiniab reeman Dios lën ree yadoo në ree xquin nejz, din yadxaloj bejn laa reeman. Din naj rni lojdi, laazan naj ni rayal reeman. <sup>6</sup> Per lüj chi cwedx guiniabil Dios, bayu lënu lidxil, basiaaw ro' port, dxel gurejdx gunab Dios бэн za'në lüj. Abi' laaman cuguiaa ni cayüjn lüjzi, laaman gunee ni rayalil.

<sup>7</sup> 'Chi rbejdx rniabidi Dios, ad radxi'di diidx guin guië'tzi guië't naabzi par gacxhie xtiidxidi, zi'c rüjn ree бэн ad nünbeet Dios. Din laa reeman naladx guial zien ni rniee reeman mazri guidxga' Dios laa reeman. <sup>8</sup> Ad güüнди zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. <sup>9</sup> Zeel chi cwedx guiniabidi Dios, gol güjdx:

Dad, lüj yu' xanyabaa,  
rayal yaya'p da'tan lajl respejt.

<sup>10</sup> Gac zi'c rniabeel.  
Gac zi'c rënl loj guidxliuj zi'c rajc xanyabaa.

<sup>11</sup> Banee ni yadaawan guixie guixie.

<sup>12</sup> Been dunujn perdon gra ree ni mal ma baguieenan  
zi'c raguieenan perdon бэн rüjn ree dunujn ni mal.

<sup>13</sup> Ad guslaal dunujn yaguieenan dol,  
babëe dunujn loj gra ni mal.

<sup>14</sup> 'Din bal güüнди perdon бэн rüjn lëjt ni mal, ziangajc xDadidi Dios бэн yu' xanyabaa züjn gajcaman perdon xtolidi. <sup>15</sup> Per bal id züjndi perdon бэн rüjn ree lëjt ni mal, ziangajc xDadidi Dios ad züjntaman lëjt perdon.

*Xcwent guialrba'n*

<sup>16</sup> 'Chi rba'ndi ad güün lojdi naya, zi'c rüjn ree бэн rusquiee din guguiaa bejn guial naba'n reeman. Naj rni lojdi, guial laazan naj ni rayal reeman. <sup>17</sup> Per lüj, chi rba'nl, gudiib lojl gudüjn tëe guijquil <sup>18</sup> chitëe gagbee ree bejn guial naba'nl. Tijbzi xDadil Dios бэн za'në lüj naj бэн gagbee laan, abi' laaman gunee lüj ni rayal tia'l.

*Guialnaza'c yu' xanyabaa*

(Lc. 12:33-34)

<sup>19</sup> 'Ad guto'pидi guialnaza'c loj guidxliuj guie lod zajc tiabe reen o xhin reen o chu' xingubaan cwan laa reen. <sup>20</sup> Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tëet xingubaan cwan laa reen. <sup>21</sup> Lod gapil guialnaza'c guin yagaj su luxdool.

*Guiaaloj bejn naj zi'c biani*

(Lc. 11:34-36)

<sup>22</sup> 'Guiaaloj bejn naj zi'c tijb biani par xcuerpaman. Zeel bal cayüjnl ni zagdxе, guidib xcuerpil rajp biani. <sup>23</sup> Per bal cayüjnl ni mal, guidib xcuerpil naj zi'c lod nacay, zi'c naj lod nacaybuu.

*Dios ya o milia*  
(Lc. 16:13)

<sup>24</sup> 'Ad zile't chu güün sirv loj tio'p patron, din zadxe'chaman tijbaman abi' guiënman stijbaman, o gacaman benza'c con tijbaman abi' ad zëntaman stijbaman. Zeel ad zile't güüнди sirv loj Dios në loj milia.

*Achetczi rayal chu' bejn xgab*  
(Lc. 12:22-31)

<sup>25</sup> 'Naj rni lëjt: Ad chu'di xgab por ni gawidi në por ni guië'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. <sup>26</sup> Gol baguiaa ree be rzuj xanyabaa, ad rxübint reeb, ad rato'p tëët reeb guialnaza'c, ad naj tëët lod cu'chaaw reeb guialnaza'c guin. Per xDadidi Dios bën yu' xanyabaa rudëed ni raw reeb. Abi' mazri lasajquidi guial loj reeb. <sup>27</sup> Abi' tëë, ¿wen guial ru da'tidi xgab ma güün lëjt mazri ziool ya?

<sup>28</sup> ¿Chexquiza zeel dád rudi xgab por xabidi? Gol baguiaa xhienaag rni's ree guiaa dajn. Achet dxiin rüjn reen ad rguib tëët reen, <sup>29</sup> per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. <sup>30</sup> Abi' bal gui'xh dajn ruzujchaaw Dios yan, majsi guixiezi che'can. Diidxgui lëjt bën ad rliladxza'ct ree laaman, nid zuneeman ni gacwidi ya. <sup>31</sup> Zeel ad rudi xgab xhie gawidi, o xhie guië'di, o xhie gacwidi. <sup>32</sup> Din bën ad nünbeet ree Dios rüjn zian, laa reeman ru xgab por gra ree ni guin. Per lëjt yu' xDadidi xanyabaa, abi' laaman ragbeechaaw xhienin ryaadxidi. <sup>33</sup> Per yalojxgaj gol baguiil güüнди zi'c rniabee Dios, gol been tëë zi'c rënman, dxel laaman gunee gra ree ni ryaadxidi. <sup>34</sup> Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

## 7

*Xcwent guialrula'ch*  
(Lc. 6:37-38, 41-42)

<sup>1</sup> 'Ad gula'chidi bejn chitëë saquidi zian. <sup>2</sup> Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman lëjt. <sup>3</sup> Ad gula'chidi bën ren por falt dobëz ni rajpaman, zagdxeli gol guyu xgab por falt narooob ni rajpidi. <sup>4</sup> Abi' bal mazri falt narooob rajpidi, ¿xoza guiëbidi loj stijb bejn: “Ad laat naj ni rüjnl”? <sup>5</sup> ¡Bën rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stijb bejn: “Ad laat naj ni rüjnl.”

<sup>6</sup> 'Ad güüнди naguiejn güüncwent ree bën ad rënt güüncwent xtiidx Dios, chitëë xhie güünnë reeman lëjt. Din bal güüнди zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

*Ni guiniabidi zaca'dan*  
(Lc. 11:9-13; 6:31)

<sup>7</sup> 'Naj rni lëjt: Gol gunab loj Dios, abi' laaman gunee ni rniabidi. Gol baguiilaman, zadxejlidi laaman. Gol gurejdx gunabaman, züjncwentaman lëjt. <sup>8</sup> Din bën rniab, zaca'man. Abi' bën rguuil, zadxejlaman, guiáad bën rbejdx rniab laaman, züjncwentaman laaman.

<sup>9</sup> 'Lëjt najdi dad, ¿wen zudëedi tijb guiay loj xi'ndi ya chi guiniabix guiadxtil?, <sup>10</sup> ¿o zudëedi tijb bëel ya chi guiniabix bëjl? <sup>11</sup> Nacli lëjt najdi bëndol rajc rudëedi ni rën xi'ndi. ¡Diidxgui xDadidi bën yu' xanyabaa, nid zudëedaman ni zagdx loj ree bën rniab laan ya!

<sup>12</sup> 'Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëë xtiidxaman loj ree bejn.

*Port nadëë*  
(Lc. 13:24)

<sup>13</sup> 'Gol been naguiejn din chu'di niz ro' port nadëë. Din port gulajg në nejj gulajg, laa reen naj ni zinë bejn loj nejj mal, abi' zien bejn zë loj nejj guin. <sup>14</sup> Per port nadëë guin në

nejz nadëe guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejz guin.

*Por ni rüjndi zayünbee ree bejn lëjt*

*(Lc. 6:43-44)*

<sup>15</sup> 'Gol gojp cudad con ree bën rusquiee rëb rudëed reeman xtiidx Dios. Din rulüü dád bën chaawladx reen, per rüjnzi reeman par gusquiee reeman bejn. <sup>16</sup> Per zayünbeedi laa reeman por ni rüjn reeman, din ad rtiat uv loj yaquiëjch ad rtia tëët higo loj gui'xh guiëjch. <sup>17</sup> Zeel gra yag zagdxe rtia ni zagdxe lojn. Guiáad gra yag guijdx rtia ni guijdx lojn. <sup>18</sup> Ad rtiat ni guijdx loj yag zagdxe, ad rtia tëët ni zagdxe loj yag guijdx. <sup>19</sup> Gra yag ad rtiat ni zagdxe, rirugan dxel re'can. <sup>20</sup> Ziangajc lëjt zayünbeedi laa reeman por ni rüjn reeman.

*Ad grat bejn chu' lod rniabee Dios*

*(Lc. 13:25-27)*

<sup>21</sup> 'Ad grat ree bën na lon: "Dad, Dad," chu' lod rniabee Dios, ganaxzi ree bën rüjn zi'c rën da Dadan, bën yu' xanyabaa. <sup>22</sup> Dxejzii, zien ree bën na lon: "Dad, Dad, por lüj batie'chan xtiidxil, abi' guial baza'tan lajl balëen xindxab ree luxdoo ree bejn, baguieen tëen zien ree milagr guial baza'tan lajl." <sup>23</sup> Dxel guiën loj reeman: "Ad benbeetcan lëjt, gol gubi'ca lon bëndol."

*Tio'p loj cimiant*

*(Lc. 6:47-49; Mr. 1:22)*

<sup>24</sup> 'Chutëez bën rucaagdiajg da diidxan abi' rüjnman ni rën, laaman naj zi'c tijb bën nasin gules xcimiant lidx loj guiaj. <sup>25</sup> Abi' gol guia, dxel biguiajt nijs ro' gubi' tëë bidoxh, gulaj reen lad yu guin, per ad gulenxantan guial naj xcimiantan loj guiaj. <sup>26</sup> Per bën riguiëjn da diidxan abi' ad rüjntaman ni rën, laaman naj zi'c tijb bën ad nasint bazoob lidx loj üx. <sup>27</sup> Abi' chi gol guia biguiajt nijs narooob, gubi' tëë bidoxh. Abi' gulaj reen lad yu guin zianz gulenxanan, ni'qui tilda'nan ad baya'nt.

<sup>28</sup> Chi gulox guneenë Jesús bën guin ree, graczi reeman badxa da't loj zi'c balüüman laa reeman, <sup>29</sup> guial rulüüman laa reeman zi'c bën rajp guialrniabee, ad zi'c rulüüt ree mextr rajc ley.

## 8

*Rayüjn Jesús tijb bën rajc guialguijdx la lepra*

*(Mr. 1:40-45; Lc. 5:12-16)*

<sup>1</sup> Chi baza Jesús ruguia' guin, dád zien bejn nal laaman. <sup>2</sup> Dxel gubig tijb bejn lojman rajcaman guialguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

<sup>3</sup> Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied guialguijdx guin abi' bayaman. <sup>4</sup> Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

*Bayajc xmojs tijb bën suldad rniabee ree suldad*

*(Lc. 7:1-10)*

<sup>5</sup> Chi guyu Jesús luguiedx Capernaum, tijb suldad Rom rniabee ree suldad bibig lojman, guzajcaman laaman liaadx, <sup>6</sup> rëbaman:

—Dad, laa da mojsan naga' lidxan ragxuux. Ad rile't chixchex, dád cusagzi guialguijdx guin laax.

<sup>7</sup> Dxel rëb Jesús lojman:

—Gan din yayünan laax.

<sup>8</sup> Badxi' bèn rniabee ree suldad guinan, rëbaman:

—Dad, ad rayaltan chu'l lidxan, per gunee diizd guie din yayajc da mojsan. <sup>9</sup> Din zi'c naj yu' ree bèn rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx, chi rën loj stijbix: “Guda,” ri'tix. Abi' chi rë loj da mojsan: “Been ni guin”, rüjnxan.

<sup>10</sup> Chi biguiejn Jesús zian, dád badxalojman abi' rëbaman loj ree bèn zinal laaman:

—Naj rni lojdi, ni'qui Israel ad wadxaaglojtan tijb bèn rliladx Dios zi'c rliladx bèn guin Dios. <sup>11</sup> Naj rni lëjt, dád zien ree bèn gralad yayal gawnë Abraham, në Isaac, në Jacob lod rniabee Dios. <sup>12</sup> Guiáad ree bèn rayal niu lod rniabee Dios, laa reeman yayal lod nacay da't lod goon reeman lod gaw tëë lay reeman.

<sup>13</sup> Dxel rëb Jesús loj suldad rniabee guin:

—Baguiaj lidxil, gac tëë zi'c ma bililadxil.

Abi' loj hor guin gajc bayajc xmojs bèn guin.

*Rayüjn Jesús xnasuegr Bëd*

(Mr. 1:29-31; Lc. 4:38-39)

<sup>14</sup> Chi we Jesús lidx Bëd, baguiaaman xnasuegr Bëd naga'man yu'man xliaa. <sup>15</sup> Dxel gunaazaman yaaman, abi' bariiman xliaa guin, dxel bixcheman guzuloy cyaanman laa reeman.

*Rayüjn Jesús zien ree bënragxuu*

(Mr. 1:32-34; Lc. 4:40-41)

<sup>16</sup> Chi ma caxhin, binë ree bejn zien ree bèn yu' xindxab luxdoo loj Jesús. Abi' con tijb diidx ni guneeman babëëman xindxab guin luxdoo reeman, bayüjn tëëman gra ree bënragxuu. <sup>17</sup> Zian gojc persi gojc cumplid ni rëb Isaías, bèn badëë xtiidx Dios loj ree bejn, chi rëbaman: “Laaman zignë dux guialguijdx ree, laa tëëman zignë dux guialzi ree.”

*Bën rën chinal Jesús*

(Lc. 9:57-62)

<sup>18</sup> Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj. <sup>19</sup> Dxel gubig tijb mextr rajc ley loj Jesús, rëbaman:

—Mextr, rënan guidnaalan lüj bantëëz guin chel.

<sup>20</sup> Abi' rëb Jesús lojman:

—Bëz ree yu' xbiliaa reeb, abi' ree biguijn yu' xguixbitia's reeb. Per Bën guxhaal Dios ni'qui lod quixh guijcaman ad yu't.

<sup>21</sup> Dxel rëb stijb ree bèn zinal laaman:

—Dad, baslaa naj gabenë' da dadan xt chi guiëtaman.

<sup>22</sup> Per rëb Jesús lojman:

—Tanal naj, basa'nman con ree bèn ad rënt guidnal naj, laa reeman guquie'ch laaman chi guiëtaman.

*Racwëëz Jesús bidoxh*

(Mr. 4:35-41; Lc. 8:22-25)

<sup>23</sup> Guyu Jesús loj barcw con ree xbejnman, <sup>24</sup> abi' la'tgaj zë reeman loj nijs guin dxejlczi gubi' tijb bidoxh, ma cazëëbczi barcw guin xan nijs. Per Jesús naga'yëjsaman. <sup>25</sup> Dxel bicwëen ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

<sup>26</sup> Badxi'man laan rëbaman:

—¿Chexc zeel dád rdxebidi? ¿Chexc zeel ad rliladxza'ctidi naj?

Dxel bixcheman abi' gunabeeman bacwëëz bi guin në nijs guin. Loj hor ziigajc babedxe reen. <sup>27</sup> Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu bèn guin, zeel xt bi në nijs ruzoob xtiidxaman?

*Tio'p ree bèn yu' xindxab luxdoo*

(Mr. 5:1-20; Lc. 8:26-39)

<sup>28</sup> Chi bidxin Jesús stiblad ro' nijs guin, loj xguidxliuj ree bén Gadara, dxel tio'p ree xinguaaw yu' xindxab luxdoo brii reex lad ree baa abi' wej reex loj Jesús. Dád nadoxh reex, zeel ad rilet' chu téd lunejz guin. <sup>29</sup> Chi baguiaa reex Jesús, gurixdiaj reex rëb reex:

—¿Xhie rënl con dunujn, Jesús, Xi'n Dios? ¿Zëédil guie ya din gusagzil dunujn chi gadli dxej guidxin?

<sup>30</sup> Per gajxh yagaj za' zien ree cüch, cayaw reeb, <sup>31</sup> abi' guzajc ree xindxab guin liaadx loj Jesús, rëb reex:

—Bal yabëél dunujn, banee mod yadxu'n lën ree cüch guin.

<sup>32</sup> Dxel rëb Jesús:

—Gol wej.

Dxel barii ree xindxab guin luxdoo ree bén guin bayu reex lën ree cüch guin. Abi' gra reeb guzuloj cuxüün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

<sup>33</sup> Abi' ree bén cayajp cüch guin ree, baxüün reeman. Dxel chi badxin reeman luguiedx guin, be reeman diidx gra ni goc në gra ni guzac ree bén yu' ree xindxab guin luxdoo.

<sup>34</sup> Dxel gra ree bén guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

## 9

### *Bayüjn Jesús bén nëjt xcuerp*

(Mr. 2:1-12; Lc. 5:17-26)

<sup>1</sup> Dxel bayu Jesús loj tijb barcw, badëdaman stiblad ro' nijs guin abi' badxin ladxaman.

<sup>2</sup> Yagaj binë ree bejn tijb xin nëjt xcuerp, naga'x loj da. Chi baguiaa Jesús guial rliladx reeman laaman, rëbaman loj xin ragxuu guin:

—Bagu' luxdool zagdxe, xi'n. Ma benan perdon xtolil.

<sup>3</sup> Dxel tio'p choon ree mextr rajc ley been reeman xgab: “Diosan rüjnx tiblax guial rnieex zian.” <sup>4</sup> Per guial gogbee gajc Jesús xhie xgaben cayüjn reeman, dxel rëbaman loj reeman:

—¿Chexc zeel rüjndi xgabmal? <sup>5</sup> ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”? <sup>6</sup> Per yan, gulün lëjt guial naj, Bén guxhaal Dios ra'pan guialrniabee loj guidxliuj guie par gūnan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

<sup>7</sup> Laa bixchegajquix zia lidxix. <sup>8</sup> Chi baguiaa ree bén guin zian, bidxeb reeman, abi' baza't reeman Dios zagdxe por guialrniabee ni badëëman loj ree bejn.

### *Rbejdx Jesús Matew*

(Mr. 2:13-17; Lc. 5:27-32)

<sup>9</sup> Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

<sup>10</sup> Tijb dxej chi cayaw Jesús lidx Matew con zien ree bén ruquijx impuest në ree bén zëëb xtiidx ad nabant xnejz, gra reeman zojbnë Jesús xan mex con ree xbejnman. <sup>11</sup> Chi baguiaa ree bénfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bén ruquijx ree impuest në ree béndol?

<sup>12</sup> Chi biguiejn Jesús ni rëb reeman, dxel rëbaman:

—Bënnadaan ree ad ryaadxt reeman doctor, bénragxuu ree laa reeman ryaadx doctor.

<sup>13</sup> Gol chej, gol basiid xhie rën guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree béndol, din yayüjn reeman xgab por xtol reeman.

### *Rniabdiidx reeman loj Jesús xcwent guialrba'n*

(Mr. 2:18-22; Lc. 5:33-39)

<sup>14</sup> Dxel ree xbejn Waj, b́en baroobnijs bejn ree, bibig reeman loj Jesús, zianz gunabdiidx reeman lojman, rēb reeman:

—¿Chexc zeel dunujn con ree b́enfarisew d́ad zienvolt raba'nan, guiáad ree xbejnl ad rba'nt reeman?

<sup>15</sup> Badxi' Jesúsán rēbaman:

—Lod yu' guialruxhliaa, ¿wen runaya ree biooz ya chi za'nē xin cuXHliaa guin laa reeman? Per guidxin dxej chiquiedix, dxel guiba'n reeman.

<sup>16</sup> 'Achut rata' lajd cúb loj lajd yojx din zaxü'n lajd cúb guin, abi' mazri quixya'n lajd yojx guin. <sup>17</sup> Ad rgu' tēēt reeman vin cúb lēn anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cúb lēn anfr cúb, din ni'qui tijb reen ad zaxint.

*Bayajc xi'n Jairo nē b́engunaa bagaal xab Jesús*

*(Mr. 5:21-43; Lc. 8:40-56)*

<sup>18</sup> La'tgaj canee Jesús zian, bidxin tijb b́en rniabee lēn xyadoo ree b́en Israel, abi' bazuxibaman loj Jesús, rēbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

<sup>19</sup> Dxel zinē Jesús laaman con ree xbejn Jesús. <sup>20</sup> Abi' tijb b́engunaa ragxuu ma gojc chiptio'p ijz ad rbēzt ryajbaman rejn, gubigaman niz xijch Jesús abi' bagaalaman guia' xabaman, <sup>21</sup> guial gunaladxaman: “Bal gugaalaman majsi xabzaman, zayajcaman.” <sup>22</sup> Per badxi' loj Jesús, abi' baguiaadxijchaman b́engunaa guin, dxel rēbaman lojman:

—Zagdxé bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc b́en guin.

<sup>23</sup> Chi bidxin Jesús lidx b́en rniabee guin, baguiaaman ma riga' ree xinrucwejdx din chiquie'ch reex xi'nman, abi' ree bejn roon rbixdiaj reeman guijquim. <sup>24</sup> Dxel rēb Jesús loj reeman:

—Gol barii guie, din ad güjtt bindo guin, naga'yējszim.

Abi' baxijdxnē reeman laaman. <sup>25</sup> Chi ma barii reeman, zianz guyuman. Gunaazaman yaa bindo guin dxel bixchem. <sup>26</sup> Abi' guidib niz yagaj bire'ch diidx ni goc.

*Rayüjn Jesús tio'p b́enlutia'p*

<sup>27</sup> Chi baza Jesús yagaj, binal tio'p b́enlutia'p laaman, rbixdiaj reeman, rēb reeman:

—Jesús, xdiaa Davi, baya dunujn!

<sup>28</sup> Chi badxin Jesús lod zojbaman, dxel bibig ree b́en guin lojman, abi' gunabdiidxaman loj reeman, rēbaman:

—¿Rliladxidi ya guial zile' yayünan lējt?

Badxi' reeman laan rēb reeman:

—Raliduladxan, Dad.

<sup>29</sup> Dxel bagaal Jesús guiaaloj reeman, rēbaman:

—Gac zi'c rliladxidi.

<sup>30</sup> Abi' bayajc guiaaloj reeman, dxel rēb Jesús loj reeman:

—Ad bal chu loj guiēbidi guial bayajc guiaalojdi.

<sup>31</sup> Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

*Rayüjn Jesús tijb bengop*

<sup>32</sup> Chi baza ree b́en bayüjn Jesús guiaaloj, dxel bidxinnē ree bejn tijb bengop, yu' xindxab luxdooan. <sup>33</sup> Abi' guloxzi babēē Jesús xindxab guin luxdoo bengop guin, laa guzuloj gajc caneeman. Abi' d́ad badxaloj ree bejn, rēb reeman:

—Ad goct waguiaa ree lasa' milagr guie niz Israel.

<sup>34</sup> Per ree b́enfarisew rēb reeman:

—B́en guin rabēē xindxab luxdoo ree bejn por xguialrniabee gajc xindxab rniabee ree xindxab.

*Raya Jesús bejn ree*

<sup>35</sup> Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tēëman graloj guialrdoob në graloj guialguijdx ni rajc ree bejn. <sup>36</sup> Chi baguiaa Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt. <sup>37</sup> Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bën gulüü laa reeman yu'. <sup>38</sup> Zeel gol gunab loj Dios din guixhiaalaman mazri ree bën gulüü laa reeman.

## 10

### *Gulej Jesús chiptio'p ree apóstoles*

(Mr. 3:13-19; Lc. 6:12-16)

<sup>1</sup> Gurejdx Jesús chiptio'p ree xbejnman, abi' badëëman guialrniabee loj reeman din yabëë reeman xindxab luxdoo ree bejn din yayüjn tēë reeman bejn ree graloj guialrdoob në graloj guialguijdx.

<sup>2</sup> Bën guie ree naj guidxiptio'p ree xi apóstoles Jesús: Simón bën gulëëljajman Béd, con bijchaman Andrejs, në Jacob con Waj, bën naj ree xi'n Zebedeo. <sup>3</sup> Në Felip, Tol, Tumajs con Matew bën baquijx impuest, nētëë Jacob xi'n Alfeo con Lebeo bën la gajc Tadeo <sup>4</sup> në Simón bën bi'ch loj ree bën Cananistas con Judas Iscariote bën yayü Jesús.

### *Rxhial Jesús gra ree xbejnman chiglüü reeman xtiidx Dios*

(Mr. 6:7-13; Lc. 9:1-6)

<sup>5</sup> Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zojb ree bën ad najt bën Israel, ni'qui ree guiedx riga' niz Samaria, <sup>6</sup> gol chejli niz lod zojb ree bën Israel bën ad zinalt ree xnejz Dios. <sup>7</sup> Gol güjdx loj reeman guial ma zëëd gajxh xguialrniabee Dios. <sup>8</sup> Gol bayüjn bënragxuu ree, gol basban bën ma güjt ree, gol bayüjn bën rajc ree guialguijdx la lepra, gol babëë tēë xindxab luxdoo ree bejn. Zi'cgajc cwa' lagajdi guialrniabee, ziangajc yayüjndi bejn lagajzi.

<sup>9</sup> Ad chinëdi or, ni'qui plajt, ni'qui cobr, <sup>10</sup> ni'qui guijxh. Ad bal chinë stib nejj xabidi, ni'qui stib nejj xgurëchidi, ni'qui yagriadxidi, din bën rüjn dxiin rayal gudëëd ree bejn ni gawaman.

<sup>11</sup> Chi guidxindi tijb guiedx o tijb ciuda, gol gule'c ruson chu bën naj benza'c yaya'ndi lidx, yagaj gol baya'n xt chi yazadi luguiedx guin. <sup>12</sup> Abi' chi chu'di lënu guin, gol güjdx loj ree bën zojb yagaj: “Yabe'cdxe Dios luxdoodi.” <sup>13</sup> Bal rayal reeman guialnaza'c guin, zaya'n nan con laa reeman guiáad bal id rayal reeman laan zayejcan con lëjt. <sup>14</sup> Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxijp guxyuj guia'di zi'c tijb sen guial ad bazoobt reeman xtiidxidi. <sup>15</sup> Naj rni lëjt guial dxej ni yadëëd ree bejn cwent loj Dios, mazri casti narooob yayal reeman guial loj ree bën Sodoma në Gomorra.

### *Guialzi ni zëëd*

<sup>16</sup> Rëb tēë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëël, gol gojc tēë nadoo zi'c palom. <sup>17</sup> Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo. <sup>18</sup> Abi' xt chinë reeman lëjt loj ree gobernador në loj ree rey guial rliladxidi naj, zian güdi da diidxan loj reeman në loj ree bën ad zinalt xnejz Dios. <sup>19</sup> Per chi chinë reeman lëjt loj guxtis, ad chu'di xgab xhie guinieedi xhie tēë naag guinieedan, din chi guidxin hor guinieedi, Dios yazaladx lëjt diidx ni guinieedi. <sup>20</sup> Din ad lëjtgan guiniee, xSprijt xDadidi Diosan guiniee por lëjt.

<sup>21</sup> Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman. <sup>22</sup> Gra bënguidxliuj guidxe'ch lëjt guial najdi da bejnan, per bën sudxi'ch loj guial rliladxaman naj xt dxej chigra guibanman, laaman yayal xanyabaa. <sup>23</sup> Chi sunal reeman lëjt tijb luguiedx par güün reeman lëjt xhienin, gol



chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

<sup>24</sup> 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. <sup>25</sup> Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëälaj ree bejn naj Beelzebú, diidxgui lëjt najdi da bejnan.

*Chu rayal guidxeb bejn*

(Lc. 12:2-9)

<sup>26</sup> 'Ad guidxebidi bejn ree, din achet ni ralan yu' ni ad zaguiet, ni'qui tijb ni naguie'ch ad yu't ni ad zagbeet bejn. <sup>27</sup> Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. <sup>28</sup> Ad rdxebidi bén rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

<sup>29</sup> 'Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios. <sup>30</sup> Guiáad lëjt xt guidxguijquidi graczan nayab loj Dios. <sup>31</sup> Zeel ad rdxebidi din mazri lasajquidi guial loj zien da't ree biguijndoo.

*Bén rëb loj ree bejn guial najman xbejn Jesucrist*

(Lc. 12:8-9)

<sup>32</sup> 'Bén guiëb niz loj ree bejn guial da bejnanan, ziangajc naj guië loj da Dadan Dios bén yu' xanyabaa guial da bejnanan. <sup>33</sup> Per bén guiëb niz loj ree bejn guial ad da bejntanan, ziangajc guië loj da Dadan Dios bén yu' xanyabaa guial ad da bejntanan.

*Por Jesús rlia' lasa' ree bejn*

(Lc. 12:51-53; 14:26-27)

<sup>34</sup> Rëb tëë Jesús:

—Ad zialtan par yabecdxcen luxdoo bejn, zialan din guial chililadx reeman naj chu' wadijl. <sup>35</sup> Din guial chililadx bejn naj, zadxe'ch xinguiäaw xdadix, guiáad biingunaa zadxe'ch xniaam, abi' biinwalidx zadxe'ch xnasuegrim. <sup>36</sup> Abi' laagajc bén zojb ree lënüliidxidi guidxe'ch lëjt.

<sup>37</sup> 'Bén rën xdad o xniaa mazczi guial lon, ad zajct gacaman da bejnan. Ziangajc bén rën xi'ngaan o xi'ndxa'p mazczi guial lon, ad zajct gacaman da bejnan. <sup>38</sup> Bén rën guidnal naj, abi' ad rëntaman sagdiajman por naj, ad zile't gacaman da bejnan. <sup>39</sup> Bén rniajchi' guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblyaa con Dios.

*Ni tia' ree bejn*

(Mr. 9:41)

<sup>40</sup> 'Bén ridxga' lëjt, najn ridxga'man, guiáad bén ridxga' naj, bén guxhaal najn ridxga'man. <sup>41</sup> Bén ridxga' tijb bén rudëë xtiidx Dios loj ree bejn, guial zëédaman por Dios, zaca'man lasa' ni rayal tia' bén guin loj Dios. Ziangajc bén ridxga' tijb bén naban zi'c rën Dios, zaca'man lasa' ni rayal tia' bén guin loj Dios. <sup>42</sup> Abi' chutëëz bén gudëëd majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëëd Dios tia' reeman.

## 11

*Bigneenë ree xbejn Waj Jesús*

(Lc. 7:18-35)

<sup>1</sup> Chi gulox rëb Jesús loj guidxiptio'p ree xbejnman con ree nin chiguiéen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

<sup>2</sup> Abi' Waj, la'tgaj yu'man ladxguiib, cwa'man ruson gra ree ni cayüjn Jesús. Dxel guxhaal tio'p choon ree xbejnman, <sup>3</sup> bignabdiidx reeman lojman, rëb reeman:

—¿Lüj naj Cristo ya bén naj gui't, o yalëjzan ben ren ya?

<sup>4</sup> Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajguidi. <sup>5</sup> Gol güjdx lojman guial ma ruguiaa ree bénlutia'p, ma rajc rza ree bencoj, ma bayajc tée ree bèn rajc guialgüjdx la lepra, ma rigüiejn ree bèn nacwa't guíaad ree bengüt ma baban reeman, abi' ree bènprob ma caguiejn reeman xtiidx Dios. <sup>6</sup> Xiquilbaa ree bèn ad zucwëézt chililadx naj.

<sup>7</sup> Chi baza ree bèn guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bèn biquiaadi loj yujbidx? ¿Naladxidi ya najman zi'c tijb biqui ni runiib bi? <sup>8</sup> ¿O xhienaag naj bèn biquiaadi? ¿Najman tijb bèn najcw lajd zagdxé ya? Lëjt ragbee guial bèn rajcw ree lajd zagdxé lèn palas zojb reeman. <sup>9</sup> ¿Chuza biquiaadi? ¿Tijb bèn rudëé xtiidx Dios loj ree bejn ya? Per naj rni lojdi guial biquiaadi tijb bèn mazri zojbloj guial loj bèn rudëéd xtiidx Dios loj ree bejn. <sup>10</sup> Wajn din laaman naj ben ruza't loj xtiidx Dios lod rëb:

Naj rxhial tijb bèn ned lojl,  
ben güünchaaw xnejzil.

<sup>11</sup> Naj rni lëjt, loj graczi ree bénguidxliuj, ad wayut bèn mazri zojbloj guial loj Waj. Per majsi zian, bèn ad zojblojt loj xguialrniabee Dios, laaman mazri zojbloj guial loj Waj.

<sup>12</sup> 'Diizd chi bi't Waj xt yan, zien bejn rüjn da't naguiejn chu' lod rniabee Dios. Abi' ree bèn rüjn da't naguiejn laa reeman chu' lod rniabeeman. <sup>13</sup> Diizd ley badëé Dios loj Moisejs con loj ree bèn badëé xtiidx Dios loj ree bejn, xt Waj, laa reeman gunee xcwent xguialrniabee Dios. <sup>14</sup> Abi' bal chililadxidi ni ganin lëjt, naj rni guial Wajn naj Elías bèn badëé xtiidx Dios loj ree bejn. <sup>15</sup> Bèn rën ree gucaagdiajg, gol bacaagdiajg.

<sup>16</sup> '¿Xhienaag ganin lëjt naj ree bèn riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: <sup>17</sup> "Bacwejdxa bidxa, per ad baya'tidi, badoolan ni naya ree per ad biintidi." <sup>18</sup> Din bi't Waj bèn baroobnijs bejn ree, ad rawtaman ad rë' tëétaman vin, abi' rëbidi xindxab yu' luxdooman. <sup>19</sup> Yan, bi't Bén guxhaal Dios, rawaman rë' tëéman vin abi' rëbidi nalaman ruladx tëéman guié'man, ruchajg tëéman bëndol ree con ree bèn ruquijx impuest. Per ree bèn ma ca' xguialrniabee Dios, por laa reeman rguien guial gra ni rüjn Dios naj zagdxé.

*Bèn ad bazoobt ree xtiidx Dios  
(Lc. 10:13-15)*

<sup>20</sup> Dxel guzuloj Jesús cadilëman bèn zojb ree guiedx lod beenman mazri zien ree milagr. Din bèn guin ree ad bayüjnt reeman xgab por xtol reeman, abi' rëbaman loj reeman:

<sup>21</sup> —¿Probza lëjt bèn Corazín! ¿Probza lëjt bèn Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tée cobdëj guijc reeman zi'c tijb sen guial ma bayüjn reeman xgab por xtol reeman. <sup>22</sup> Per rnin lëjt guial dxej yadëéd ree bejn cwent loj Dios, mazri casti narooob yayalidi guial loj ree bèn Tiro në ree bèn Sidón. <sup>23</sup> Guíaad lëjt bèn Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin. <sup>24</sup> Per rnin lojdi guial dxej yadëéd ree bejn cwent loj Dios, mazri casti narooob yayalidi guial loj ree bèn Sodoma.

*Gol guda lon din yaziiladxidi  
(Lc. 10:21-22)*

<sup>25</sup> Lèn ree dxejzii rëb Jesús:

—Dad, ruzatan lüj zagdxé, din ni baquie'chil loj ree bèn rajc në loj ree bèn rignia', laan ma balüül loj ree bèn ad rajct. <sup>26</sup> Zian gojc Dad, din zian guyënl.

<sup>27</sup> 'Da Dadan banee gra lon. Abi' achut nünbee Jesucrist xi'n Dios, tijbzi Dios, achu tëét nünbee Dios, tijbzi Jesucrist xi'nman, con ree bèn rënman güünbee Dios. <sup>28</sup> Gradi, bèn ma badxag rüjn xhienin din yaya'ndi zagdxé loj Dios, ma badxag tëédi nüü xtolidi. Gol guda lon, naj gune guialraziiladx lojdi. <sup>29</sup> Gol bazoob da diidxan, gol basiid tée gaquidi

benza'c nē bēn chaawladx zi'c naj, din yabedxe luxdoodi loj Dios. <sup>30</sup> Din ad nawēēgt guial guzoobidi da diidxan, ad nawēēg tēēt guial gūūndi zi'c rēnan.

## 12

*Rgui'ch ree xbejn Jesús trigo dxej raziiladx ree bēn Israel*

*(Mr. 2:23-28; Lc. 6:1-5)*

<sup>1</sup> Tijb dxej raziiladx ree bejn, chi cadēd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. <sup>2</sup> Abi' chi baguiaa ree bēnfarisew ni cayūjn reeman, rēb reeman loj Jesús:

—Baguiaa ree xbejnl nial cayūjn reeman ni ad rayalt gūūn reeman dxej raziiladx ree bejn.

<sup>3</sup> Dxel rēb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

<sup>4</sup> Guyu Davi lēn xyadoo Dios abi' cwa'man guiadxtil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa reen. <sup>5</sup> ¿O gadidi gool loj xley Moisejs ya guial achet dol rūjn ree bixhioz chi rūjn reeman dxiin lēn yadoo majsi ad raziiladxt reeman dxej raziiladx ree bejn? <sup>6</sup> Abi' naj rni lējt guial naj, bēn za'nē lējt mazri lasajcan guial loj yadoo. <sup>7</sup> Bal rignia'di xhie rēn guiēb loj xtiidx Dios lod rēb: “Ni rēnan naj guial yaya lasa'di, ad guial gunetidi gon lon.” Bal rignia'di diidx guin ree ad zudxiibtidi guijc ree bēn ad rajpt dol. <sup>8</sup> Abi' Bēn guxhaal Dios rajpaman guialrniabee dxej raziiladx ree bejn.

*Rayajc tijb bēn nējt tiblax yaa*

*(Mr. 3:1-6; Lc. 6:6-11)*

<sup>9</sup> Chi gudēd gojc zian, dxel baza Jesús abi' guyuman lēn tijb yadoo naj niz yagaj. <sup>10</sup> Lēn yadoo guin za' tijb bēn nējt tiblax yaa. Abi' guial ree bēnfarisew raguiil reeman mod xhie gudxiib reeman guijc Jesús, dxel gunabdiidx reeman lojman, rēb reeman:

—¿Zile' yayūjn bejn tijb bēnragxuu dxej raziiladx bejn ya?

<sup>11</sup> Badxi' Jesús reebaman:

—Bal tijb lējt rajp tijb xiil, abi' yabib lēn bala' dxej raziiladx bejn. ¿Nid zabēēdi laab dxej guin ya? <sup>12</sup> ¿Wen id mazri lasajc tijb bejn guial loj tijb xiil ya? Zeel achet gūūnan zajc gūūn bejn ni naj zagdxe dxej raziiladx bejn.

<sup>13</sup> Dxel rēb Jesús loj bēnragxuu yaa guin:

—Basli yaal.

Abi' basli yaa bēn guin, loj hor ziigajc bayajc yaaman zi'c naj stibladan. <sup>14</sup> Per chi barii ree bēnfarisew guin lēn yadoo guin, guzuloj cayū reeman diidx xhienaag gūūn reeman din gugūjt reeman Jesús.

*Bēn gule Dios*

<sup>15</sup> Chi gogbee Jesús zian, laa zia gajcaman, abi' zien ree bejn binal laaman. Dxel bayūjnman gra ree bēnragxuu, <sup>16</sup> abi' gunabeeman laa reeman chitēē guitie'ch reeman diidx chu bayūjn laa reeman. <sup>17</sup> Zian guzojb xtiidx Isaías, bēn badēē xtiidx Dios loj ree bejn, chi rēbaman:

<sup>18</sup> Gol baguiaa, bēn guie naj bēn gulen

din gūūnman naj sirv,

laaman naj bēn rēn da'tan,

rabaanē' tēēn laaman.

Gudē da Sprijtan lojman

abi' guiēbaman loj ree bēnguidxliuj

xhienaag naj da guialrniabeen.

<sup>19</sup> Achut tilnēman,

ad zabixdiaj tēētaman

achut tēēt guien cha'man niz lunejz.

<sup>20</sup> Ad zudëedtaman casti bén ad za'dxi'cht ree loj da nejzan, në ree bén ad ridxga'za'ct naj, xt chi ma beenman gan gac guialguxtis.

<sup>21</sup> Abi' xt ree bén ad najt bén Israel cwëz reeman yabëëman laa reeman loj dol.

*Rëb ree bejn ca' Jesús xguialrniabee Beelzebú*

(Mr. 3:19-30; Lc. 11:14-23; 12:10)

<sup>22</sup> Binë ree bejn tijb xinguaaw lod za' Jesús, yu' xindxab luxdoox, natia'p lojx naj tëëx gop. Dxel bayüjn Jesús laax abi' guzuloj rnieex ruguiaa tëëx. <sup>23</sup> Graczi ree bejn dád badxaloy reeman, abi' rëb reeman:

—¿Id bén guinan zëed loj xdiaa Davi ya?

<sup>24</sup> Chi biguejn ree bénfarisew zian, dxel rëb reeman:

—Bén guin rabëë xindxab luxdoo ree bejn por xguialrniabee Beelzebú xin rniabee ree xindxab.

<sup>25</sup> Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman. <sup>26</sup> Ziangajc bal xindxab su contr laagajquix, nayob nitix. <sup>27</sup> Lëjt na guial naj rabë xindxab luxdoo ree bejn por xguialrniabee Beelzebú, per bal zianan, ¿chuza rudëë guialrniabee loj xbejndi din yabëë reeman xindxab? Zeel laagajc reeman rulüü guial ad laat rnieedi. <sup>28</sup> Per naj, bal por xSprijt Dios rabën xindxab luxdoo ree bejn, rën guiëban guial ma za'në xguialrniabee Dios lëjt.

<sup>29</sup> 'Din ¿xhieza naag chu' tijb bejn lidx tijb bén gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

<sup>30</sup> 'Bén ad za't con naj, za'man contr naj. Guiáad bén ad ruto'pt bejn par naj, rtie'chaman laa reeman.

<sup>31</sup> 'Zeel rnin lëjt: Züjn Dios perdon xhietëëz dolan, në ree diidxguijdx ni rnieetzi ree bejn, per ad züjntaman perdon bén rnieeguijdx ree xSprijt Dios. <sup>32</sup> Chutëëz bén guinieeguijdx Bén guxhaal Dios, zajcaman perdon, per bén guinieeguijdx xSprijt Dios ad zajctaman perdon yan, ni'qui chi yaguialan.

*Nünbee bejn tijb yag por ni rtia lojn*

(Lc. 6:43-45)

<sup>33</sup> 'Lëjt ragbee, bal tijb bejn ruzuj tijb yag zagdx, rtia ni zagdx lojn, per bal guzujman tijb yag guijdx, rtia ni guijdx lojn. Din tijb gaj yag nünbee bejnan por ni rtia lojn.

<sup>34</sup> ¿Xi'n xindxab! ¿Xoza guinieedi diidx zagdx ree awa benmal lëjt? Din ni yu' luxdoo bejn laan rnieeman. <sup>35</sup> Benza'c rnieeman diidxa'c, din laan yu' luxdoo. Guiáad benmal rnieeman diidxmal din laan yu' luxdoo. <sup>36</sup> Per naj rni lëjt guial dxej ni güün xguialguxtis Dios, gra ree bejn yadëed cwent lojman por gra ree diidxguijdx ni rniee reeman. <sup>37</sup> Din por xtiidx gajc bejn guiguien bal rayalaman xcasti Dios o ad rayaltaman laan ya.

*Rniab ree bénfarisew tijb milagr*

(Mr. 8:12; Lc. 11:29-32)

<sup>38</sup> Yu' ree bénfarisew con ree mextr ni rajc ley, rëb loj Jesús:

—Mextr, rayënan yaguiaan güünl tijb milagr.

<sup>39</sup> Badxi' Jesúsán rëbaman:

—Lëjt benmal, bén ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac Jonás bén badëë xtiidx Dios loj ree bejn. <sup>40</sup> Din zi'c guyu Jonás lën bëjl narooob choon dxej choon guiaal, ziangajc Bén guxhaal Dios, choon dxej choon guiaal chu'man lën baa. <sup>41</sup> Abi' chi yadëed ree bejn cwent loj Dios, bén guban ree Nínive zaban reeman abi' guiëb reeman guial ree bén riga' yan, yayal reeman xcasti Dios. Din bén Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, bén za'në lëjt mazri lasajcaman guial loj Jonás. <sup>42</sup> Ziangajc bén goc

reina niz sur, zabanman chi yadëed ree bejn cwent loj Dios, dxei guiëbaman guial ree bën riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, bën za'në lëjt mazri lasajcan guial loj Salomón.

*Xindxab ni rayejc*

(Lc. 11:24-26)

<sup>43</sup> 'Chi rarii tijb xindxab luxdoo tijb bejn, abi' rzax niz loj yujbidx rguuilix lod yaziiladxix. Abi' chi ad rdxejlt lod yaziiladxix, dxei rüjnx xgab naladxix: <sup>44</sup> “Zagdxeli yaye'can lod guzaan.” Abi' chi rayejquix ruguiaax luxdoo bën guin najn zi'c tijb lënu lod achut zobj, lod bilioob lod najcchaaw tëë. <sup>45</sup> Dxei rica'x za gajdx xindxab naj ree mazri xinmal guial lojx. Abi' ru gra reex luxdoo bën guin. Dxei mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

*Xniaa Jesús con ree bijchaman*

(Mr. 3:31-35; Lc. 8:19-21)

<sup>46</sup> Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. <sup>47</sup> Abi' yu' tijb bën rëb lojman:

—Laa xniaal con ree bijchil za' lule' guin, rën reeman guinieenë reeman lüj.

<sup>48</sup> Per Jesús badxi'man xtiidx bën guin rëbaman:

—¿Chu naj da nan chu tëë ree nin naj da bichan?

<sup>49</sup> Dxei con yaaman balüü ree xbejnman rëbaman:

—Bën guie ree naj da nan në ree da bichan. <sup>50</sup> Din chutëez bën rüjn zi'c rën da Dadan bën yu' xanyabaa, laaman naj da bichan, da zanan, në da nan.

13

*Xcwent bën rtie'ch bin*

(Mr. 4:1-9; Lc. 8:4-8)

<sup>1</sup> Dxejzii brieri Jesús yu lod zobjaman, bisobaman ro' nijs Galilea. <sup>2</sup> Abi' guial dád zien ree bejn bido'p yagaj, beenan naguiejn wë'p Jesús loj tijb barcw dxei gurejman lojn, guiáad ree bën guin za' reeman ro' nijs guin. <sup>3</sup> Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. <sup>4</sup> Chi catie'chaman bin guin, ta'n nan biajb loj nejz, abi' bi't ree biguijn gudaw reeb laan. <sup>5</sup> Sta'n nan biajb loj ree guiaj lod ad riga't zien yuj, cari gulejnan guial ad zient yuj riga'. <sup>6</sup> Per chi brieri gubijdx, baze'can laan, abi' guial ad yu't liujn gubidxan. <sup>7</sup> Dxei sta'n nan biajb loj ree yaquiejch, chi guni's ree yaquiejch guin banidloj reen laan. <sup>8</sup> Per sta'n nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tëën cwa gajlbichii. <sup>9</sup> Bën rën gucaagdiajg, gol bacaagdiajg.

*Chexc zeel rülüü Jesús con ni naj ree zi'c cwent*

(Mr. 4:10-12; Lc. 8:9-10)

<sup>10</sup> Dxei gubig ree xbejn Jesús lojman rëb reeman:

—¿Chexquiza zeel rülüül bejn ree con ganax zi'c cwent ree?

<sup>11</sup> Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman, per bën guin ree ad basa'nt Dios laa reeman chignia' reeman laan. <sup>12</sup> Din Bën ma rignia', gusnuu chignia'man mazri, abi' zignia' da'taman. Per bën ad rignia'za'ct ad rüjn tëëtaman naguiejn chignia'man mazri, xt ta'n ni rignia'man zayanladxaman. <sup>13</sup> Zeel rniën'n laa reeman con ganaxzi zi'c cwent ree. Din majsi rani loj reeman per rüjn reeman zi'c bën ad ruguiaat, abi' majsi rigueijn reeman per rüjn reeman zi'c bën ad rigueijnt, bën ad rignia' tëët. <sup>14</sup> Zian rzojb xtiidx Isafas, bën badëë xtiidx Dios loj ree bejn, chi rëbaman:

Majsi rigueijn reeman, per achetczi chignia' reeman.

Abi' majsi rani loj reeman, per ad ruguiaat reeman.

<sup>15</sup> Din ma been luxdoo reeman gojl,

nayaaw guidiajg reeman,  
nayaaw tëë guiaaloj reeman.  
Chitëë guguaa reeman,  
guiguiejn reeman,  
chignia' tëë reeman.

Din ad rënt reeman gui't reeman lon din gūnan laa reeman perdon.

<sup>16</sup> Per xiquilbaadi cuguaadi caguiejn tëëdi. <sup>17</sup> Din naj rni lojdi guial dád zien ree b́en badëe xtiidx Dios loj ree bejn, nē ree b́en guban zi'c rayal, guyën reeman nuguaa reeman ni cuguaadi per ad baguaat reeman laan. Guyën reeman nigujiejn reeman ni caguiejndi per ad bigujiejnt reeman laan.

*Rusignia' Jesús xcwent b́en rtie'ch bin*

(Mr. 4:13-20; Lc. 8:11-15)

<sup>18</sup> Yan gol bacaagdiajg xhie rën guiëb ni rnin lojdi xcwent b́en bigtie'ch bin. <sup>19</sup> B́en rigujiejn xtiidx Dios abi' ad rignia'taman laan, laaman naj zi'c bin biajb loj nejz, guial laa ri't gajc xinxab rquiedix ni bacaagdiajgaman. <sup>20</sup> Guiaad bin biajb loj ree guiaj naj zi'c b́en rigujiejn xtiidx Dios, abi' dád nix ru luxdooman rigujiejnman laan, <sup>21</sup> per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdxe'ch ree bejn laaman por xtiidx Dios, laa rusa'n gajcaman ni rliladxaman. <sup>22</sup> Abi' bin biajb loj ree yaquiejch naj zi'c b́en rigujiejn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëz rucaagdiajgaman xtiidx Dios achet sirv been ni bacaagdiajgaman. <sup>23</sup> Per bin biajb loj yuj za'c naj zi'c b́en rigujiejn xtiidx Dios abi' rignia'man laan rüjn tëëman zi'c rën Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

*Trigo con gui'xhguijdx*

<sup>24</sup> Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c tijb b́en badxe' ganax bin zagdxe loj xguiniaa. <sup>25</sup> Per la'tgaj naga'yëjs gra reeman, bidxin b́en rdxe'ch laaman guxübinman gui'xhguijdx ree loj trigo guin dxel ziaman. <sup>26</sup> Abi' chi gulen trigo guin brii tëë dojn lojn nē ree gui'xh guin ma yu' lojn. <sup>27</sup> Dxel bicojn ree xmojs b́en naj xguiniaa laan laaman, rëb reeman: “Dad ¿nid ganax bin zagdxe badxe' loj xguiniaal ya? yan, ¿banza guza gui'xh yu' lojn?” <sup>28</sup> Badxi'man laan rëbaman: “Wed tijb b́en rdxe'ch naj bidgadxe' laan.” Dxel gunabdiix ree mojs guin lojman rëb reeman: “¿Xhie nal zudojxhan gui'xh guin ree ya?” <sup>29</sup> Dxel rëbaman loj reeman: “Yajqui, chitëë guial gaxhidi gui'xh guin gaxhidi nē trigo guin. <sup>30</sup> Zagdxeli gol basa'nan dín ni'snën trigo guin xt chi ma gojcan. Abi' chi guidxin dxej yado'p trigo guin guiën loj ree b́en guto'p laan dín yalojxgaj gui'xh guin yato'p reeman dín guixhii reeman lënan zianz che'can. Dxelri yato'p reeman trigo guin dín cu'chaaw reeman laa reen lod ruchaaw reen.”

*Xcwent xhaj moxtajs*

(Mr. 4:30-32; Lc. 13:18-19)

<sup>31</sup> Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaaman. <sup>32</sup> Abi' bin guin naj mazri ni wit loj gra ree bin, per chi rni'san laan rajc mazri ni naroo loj gra ree cwaan. Abi' guial naroo da't rajcan, xt rüjn xguixbitia's ree biguijn xidxan.

*Xcwent levadur*

(Lc. 13:20-21)

<sup>33</sup> Be tëë Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb b́engunaa choon midid harin, abi' laan rusaaguij gra cob guin.

*Chexc zeel ruliüü Jesús con ni naj ree zi'c cwent*

(Mr. 4:33-34)

<sup>34</sup> Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent. <sup>35</sup> Zian gojc persi guzobj xtiidx bén badëë xtiidx Dios loj ree bejn, chi rëbaman: Con ganaxzi ni naj ree zi'c cwent gulün bejn ree, guiën loj reeman ni gad reeman gagbee diizd chi gocchaaw guidxliuj.

*Rusignia' Jesús xcwent gui'xhguijdx*

<sup>36</sup> Chi ma bazaadiidxnë Jesús benzien guin ree, dxel bayuman lënü con ree xbejnman, abi' gunabdiidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

<sup>37</sup> Badxi' Jesúsán rëbaman:

—Bén rudxe' bin zagdxe guin naj Bén guxhaal Dios, <sup>38</sup> abi' guiniaa guin naj guidxliuj. Guiáad bin zagdxe guin naj ree bén naj par loj xgualrniabee Dios. Abi' ree gui'xh guin naj bén naj ree par xindxab. <sup>39</sup> Guiáad bén rdxe'ch, bén guxübin trigo guin naj xindxab. Abi' guial rado'p guialnaza'c guin rën guiëb chi nit guidxliuj, guiáad ree bén yato'p guialnaza'c guin naj ree xianjl Dios. <sup>40</sup> Zian zi'c rado'p ree gui'xhguijdx guin par che'c reen, zian gac chi nit guidxliuj. <sup>41</sup> Bén guxhaal Dios guixhiaal ree xianjlaman din yabëë reeman bén rayal ree yarii loj xgualrniabeeman, bén ruzaalguiiw bejn ree din güün reeman dol në gra ree bén cayüjn dol. <sup>42</sup> Abi' guzaal reeman laa reeman loj bajl lod goon reeman xt gaw lay reeman. <sup>43</sup> Dxel bén naban ree zi'c rën Dios, guidiin reeman bacha' loj xgualrniabee xDad reeman Dios, zi'c rdiin gubijdx bacha'. Bén rën gucaagdiajg, gol bacaagdiajg.

*Xcwent ni lasajc*

<sup>44</sup> 'Xgualrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëëman laan. Abi' dád rabaaman ruto' gra ni rajpaman persi rsiiman guidxliuj guin.

*Xcwent perl*

<sup>45</sup> 'Rni tëën lëjt: Xgualrniabee Dios naj zi'c tijb bén rguuil perl zagdxe din siiman laan. <sup>46</sup> Chi rdxejlaman tijb perl lasajc, ruto' gra ni rajpaman abi' rsiiman laan.

*Xcwent guijxh rniaaz bëjl*

<sup>47</sup> 'Abi' tëë xgualrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. <sup>48</sup> Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman. <sup>49</sup> Zian gac dxej nit guidxliuj, gui't ree xianjl Dios yabe reeman benmal loj ree benza'c. <sup>50</sup> Abi' guzaal reeman benmal guin ree loj bajl lod goon reeman abi' xt gaw lay reeman.

*Bén rbe nicüb në ni yojx*

<sup>51</sup> Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nan, Dad.

<sup>52</sup> Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xgualrniabee Dios, laa reeman naj zi'c tijb bén rbe nicüb në ni yojx loj gra ni rajpaman.

*Badxin Jesús Nazaret*

(Mr. 6:1-6; Lc. 4:16-30)

<sup>53</sup> Chi gulox gunee Jesús loj reeman zian, zianz bazaman. <sup>54</sup> Dxel badxin ladxaman, ni guzuloj culüüman bejn ree lën xyadoo reeman. Abi' dád badxaloj ree bén guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rüjnman milagr ree? <sup>55</sup> ¿Nid laaman naj xi'n carpinter ya, abi' xniaaman naj Li, guiáad ree bijchaman naj

Jacob, Xiëb, Simón, në Judas? <sup>56</sup> ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

<sup>57</sup> Abi' ad bidxga't reeman Jesús. Per rëbaman loj reeman:

—Bantëez guin rajp ree bejn respejt tijb bén rudëe xtiidx Dios loj ree bejn, per ladxaman achut rajp laaman respejt ni'qui lidxaman.

<sup>58</sup> Abi' ad zient milagr beenman yagaj guial ad bililadxt reeman laaman.

## 14

*Güjt Waj Bén baroobnijs bejn ree*

(Mr. 6:14-29; Lc. 9:7-9)

<sup>1</sup> Tiampzii Herodes bén canabee niz Galilea, biguiejnman ni cayüjn Jesús. <sup>2</sup> Abi' rëbaman loj ree xbejnman:

—Waj bén baroobnijs bejn ree, laaman baban zatijb, zeel rajpaman guialrniabee rüjnman milagr ree.

<sup>3</sup> Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bén la Felip, <sup>4</sup> guial rëb Waj guin loj Herodes:

—Ad laat guial zojbnël laagajc lacheel bijchil.

<sup>5</sup> Guyën Herodes nugüjtaman Waj, per bidxebaman xhie nüjn ree bejn laaman guial graczi reeman rëb Waj naj tijb bén rudëed xtiidx Dios loj ree bejn. <sup>6</sup> Per chi baza' Herodes ijz, brieri xi'n Herodías baya'm loj ree xbioozaman. Abi' dád bayuladx Herodes zi'c baya'm, <sup>7</sup> dxel rëb Herodes gudëedaman xhietëez ni guiniabim. <sup>8</sup> Abi' xniaam rëb lojm xhie guiniabim, dxel rëbim loj Herodes:

—Banee guijc Waj bén ruroobnijs bejn ree, baneen loj tijb pliajt.

<sup>9</sup> Dád guyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëed reeman ni gunabim. <sup>10</sup> Dxel gunabeeman gütü' reeman guijc Waj lën ladxguiib guin, <sup>11</sup> abi' bidxinnë reeman laan loj tijb pliajt badëed reeman laan lojm, dxel bayümin loj xniaam.

<sup>12</sup> Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

*Ruyaan Jesús gaay mil bejn*

(Mr. 6:30-44; Lc. 9:10-17; Jn. 6 :1-14)

<sup>13</sup> Chi gogbee Jesús zian, guyuman loj tijb barcw zëman niz lod achutczü zojb din su laazaman. Chi gogbee ree bejn, dxel brieri ladx reeman zë guia'zi reeman lod guidxinman.

<sup>14</sup> Chi barii Jesús loj barcw guin baguiaaman bén guixiuj ree riga' yagaj, bayaman laa reeman abi' bayüjnman bënragxuu zinë reeman. <sup>15</sup> Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Güjdx loj ree bén guin ma gojl yaguiaj reeman, din che reeman guiedx lod sii ni gaw reeman.

<sup>16</sup> Per badxi' Jesúsán rëbaman:

—Ad rüjnt naguiejn yaguiaj reeman, lëjt gol badëe ni gaw reeman.

<sup>17</sup> Badxi' reeman laan rëb reeman:

—Per gaayzi guiadxtil naca'n con zatio'p bëjl.

<sup>18</sup> Dxel rëb Jesús loj reeman:

—Gol tanë reen guie.

<sup>19</sup> Dxel gunabeeman gurej gra ree bén guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badëeman quixtëe loj Dios, abi' gula'man guiadxtil guin badëeman laan loj ree xbejnman persi gudi's reeman laan loj gra ree bén guin. <sup>20</sup> Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. <sup>21</sup> Bén gudaw guin ree naj reeman cost gaay mil xinguaaaw garenqui ree béngunaa con ree xindoo.



*Riza Jesús loj nijs**(Mr. 6:45-52; Jn.6 :16-21)*

<sup>22</sup> Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx nëman benzien guin ree. <sup>23</sup> Chi ma gulox bazaadiidx nëman laa reeman, dxel zè xtijbaman guijc tijb guia' din cwedx guiniabaman Dios. Chi gure guiaal xtijbzaman za' guijc guia' guin. <sup>24</sup> Guiáad barcw guin zijt ma zën loj nijs, dád rliaro' xtüjp nijs guin laan guial rliaj bi niz loj barcw guin. <sup>25</sup> Chi ma cayreguiaal, zibig Jesús loj ree xbejnman rzaman loj nijs guin. <sup>26</sup> Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

<sup>27</sup> Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

<sup>28</sup> Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

<sup>29</sup> Abi' rëb Jesús lojman:

—Guda.

Dxel baguiaajt Bëd loj barcw guin, rzaman loj nijs guin zëman loj Jesús. <sup>30</sup> Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—¡Gognë naj, Dad!

<sup>31</sup> Loj hor ziigajc basli yaa Jesús gunaazaman yaa Bëd, rëbaman lojman:

—¿Chexc zeel ad riladxza'ctil, chexc zeel yu' nawëëguil?

<sup>32</sup> Abi' chi bayë'p reeman loj barcw guin, laa bacwëëz gajc bi guin. <sup>33</sup> Guiáad ree bën yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

*Rayüjn Jesús bënragxuu ree Genesaret**(Mr. 6:53-56)*

<sup>34</sup> Chi gudëd reeman loj nijs guin dxel bidxin reeman xyuj ree bën Genesaret. <sup>35</sup> Abi' ree bën niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman, <sup>36</sup> guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bën bagaal xabaman bayajc.

## 15

*Ni rüjn persi rajc bejn bëndol**(Mr. 7:1-23)*

<sup>1</sup> Bénfarisew ree con ree mextr rajc ley, bën za ree Jerusalén, gubig reeman loj Jesús abi' gunabdiidx reeman lojman, rëb reeman

<sup>2</sup> —¿Chexc zeel ad zinalt ree xbejnl costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

<sup>3</sup> Dxel rëb Jesús loj reeman:

—Laadx lëjt, ¿chexc zeel rüjndi xtiidx Dios tibladi persi zinal xcostumbridi? <sup>4</sup> Din Dios rëb: “Gojp respejt xDadil con xniaal”, abi’ “Bën rniee diidxguijdx loj xdadaman o xniaaman ya, rayal guiëtaman.” <sup>5</sup> Per lëjt rëb zile' guiëb bejn loj xdadaman o xniaaman: “Ad zile't günan lüj yudar, din gra ni ra'pan naj par Dios.” <sup>6</sup> Rëbidi guial bën guiniee zian, ad zile't güün yudar xdadaman con xniaaman, abi' zian rbëëladxidi xtiidx Dios persi zinal xcostumbridi. <sup>7</sup> ¡Bën rusquiee! ¡Rüjnzidi guial nabandi xnejz! Waliqui ni gunee Isaías, bën badëë xtiidx Dios loj ree bejn, chi rëbaman:

<sup>8</sup> Bén guie ree rëbzi reeman rnijachi' reeman naj, per ad rënt reeman naj con guidib luxdoo reeman.

<sup>9</sup> Xlia'czi rnijachi' reeman naj, abi' rulüü reeman bejn ree ganaxzi ni rbëëguij ree bénguidxliuj.

<sup>10</sup> Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tēē ni ganin lojdi. <sup>11</sup> Ad ni rawt bejn rüjn laaman béndol, ni ririi ro'man laan rüjn laaman béndol.

<sup>12</sup> Dxel gubig ree xbejn Jesús lojman, rēb reeman:

—¿Gogbeel ya bidxe'ch ree bēnfarisew chi biguiejn reeman ni guneel?

<sup>13</sup> Badxi' Jesús laan rēbaman:

—Gra ni ad zēēdt por da Dadan Dios bēn yu' xanyabaa, yu' dxej nitan. <sup>14</sup> Zeel gol basa'n reeman din laa reeman naj zi'c tijb bēnlutia'p ruluü stijb bēnlutia'p ban niz cheman. Abi' bal tijb bēnlutia'p gulüü stijb bēnlutia'p guin, zayajb grop reeman ro' bala'.

<sup>15</sup> Dxel rēb Bēd loj Jesús:

—¿Basignia' dunujn xhie rēn guiēb ni guneel?

<sup>16</sup> Badxi' Jesús an rēbaman:

—¿Wen, ni'qui lējt ad rignia'tan ya? <sup>17</sup> ¿Id rignia'di ya guial gra ni raw bejn rej lēnman abi' rariin? <sup>18</sup> Per diidx ririi ro' bejn, luxdooman zan, abi' laan rüjn laaman béndol. <sup>19</sup> Din luxdoo bejn za graloj ree xgabmal, guialrugüjt bejn, guial rüjn nidxuudx, guialrzunē lacheel ben ren, guialrban, guialrusquiee nē guialrniee diidxguijdx loj lasa'. <sup>20</sup> Gra ree ni guie naj ni rüjn bejn béndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman béndol.

### *Tijb bēngunaa Canaán bililadx Jesús*

(Mr. 7:24-30)

<sup>21</sup> Chi baza Jesús yagaj zēman niz Tiro nē niz Sidón. <sup>22</sup> Abi' yagaj zojb tijb bēngunaa za niz Canaán, briiman, rbixdiajman rēbaman loj Jesús:

—¿Dad, xdiaa Davi, baya naj! Da xi'ndxa'pan yu' bendxab luxdoo, dád rusagziman laam.

<sup>23</sup> Abi' Jesús ad badxi'taman xtiidx bēngunaa guin. Dxel gubig ree xbejnman lojman, rēb reeman:

—Bidxga' bēngunaa guin, din yaguijman, din rbixdiajman nalaman dunuj ree.

<sup>24</sup> Dxel rēb Jesús:

—Dios guxhaal naj din günan yudar ganaxzi ree bēn Israel zē loj nejz mal.

<sup>25</sup> Per bēngunaa guin bigzuxibaman loj Jesús, rēbaman:

—¿Dad, gognē naj!

<sup>26</sup> Badxi' Jesús an, rēbaman:

—Ad zagdxet naj chiquied bejn guiadxtil loj xi'nman din gudēēdaman laan loj ree bē'cw.

<sup>27</sup> Badxi' bēngunaa guinan, rēbaman:

—Waliquil, Dad, per nē ree bē'cw ruto'p guiadxtil laay ni ryajb xan xmex bēn naj xbē'cw laa reeb.

<sup>28</sup> Dxel rēb Jesús lojman:

—¿Na, waliquil rliladxil con guidib luxdool! Gac zi'c rēnl.

Loj hor guin gajc bayajc xi'n bēn guin.

### *Rayüjn Jesús zien ree bēnragxuu*

<sup>29</sup> Baza Jesús yagaj, bidxinman ro' nijs Galilea, dxel wē'paman guijc tijb guia' abi' gurejman yagaj. <sup>30</sup> Dád zien bejn bido'p lod za'man. Binē reeman bencoj ree, nē ree bēnlutia'p, nē ree bēn ad rüjnt xu'c dxiin, con ree bengop nē zien ree bēnragxuu ren ree, badxig reeman laa reeman loj Jesús, abi' bayüjnman laa reeman. <sup>31</sup> Dád badxa loj ree bejn chi baguiaa reeman ma rniee ree bengop, ma bayajc xu'c ree bēn ad rüjnt dxiin xu'c, guiaad ree bencoj ma rza reeman abi' ree bēnlutia'p ruguiaa reeman. Zianz guzuloj cuza't reeman zagdxe xDios ree bēn Israel.

### *Ruyaana Jesús tajp mil bejn*

(Mr. 8:1-10)

<sup>32</sup> Abi' gurejdx Jesús bēn naj ree xbejnman, rēbaman loj reeman:

—Rayan bén guin ree, din ma gojc choon dxej za' reeman con naj, abi' achet ni gaw reeman. Ad rëntan yagu'nejzan laa reeman sin guialraw ad nial yadaj reeman niz lunejz.

<sup>33</sup> Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutczí bejn zojb?

<sup>34</sup> Gunabdiidx Jesús loj reeman, rëbaman:

—¿Bël guiadxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

<sup>35</sup> Dxel gunabee Jesús gurej gra ree bén guin luyuj. <sup>36</sup> Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin.

<sup>37</sup> Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n. <sup>38</sup> Bén gudaw ree naj reeman tajp mil xinguaaw, garenqui ree béngunaa con ree xindoo. <sup>39</sup> Dxel bazaadiidxnë Jesús laa reeman, abi' guyuman loj barcw ziaman niz Magadán.

## 16

### *Rniab reeman güün Jesús tijb milagr*

(Mr. 8:11-13; Lc. 12:54-56)

<sup>1</sup> Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman. <sup>2</sup> Per badxi' Jesús laan rëbaman:

—Wadxe ree chi ruguiaadi naxnia xanyabaa, rëbidi: “Zagdxé gac guixie din naxnia xanyabaa.” <sup>3</sup> Guiáad rsil chi naxnia xanyabaa yu' tëë zaj, rëbidi: “Ad laat gac yandxej.” ¿Bén rusquieel, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguaadi yan? <sup>4</sup> Bén mal, ad riladxtidi abi' rniabidi günan tijb milagr, per achet guguiaadi, tijbzi zi'c guzac Jonás.

Dxel basa'n Jesús laa reeman, ziataman.

### *Xlevadur ree bénfarisew*

(Mr. 8:14-21)

<sup>5</sup> Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil. <sup>6</sup> Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

<sup>7</sup> Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

<sup>8</sup> Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nnijt riladxidi naj. <sup>9</sup> ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi? <sup>10</sup> ¿Nid zaladx tëëdi ya chi gudi'san gajdx guiadxtil loj tajp mil bejn, abi' zabël dxüman bato'pidi? <sup>11</sup> ¿Chexc zeel ad rignia'tidi guial ad guiadxtiltan cuzatan lojdi, chi rnin lojdi gapidi cudad con xlevadur ree bénfarisew në ree bénsadusew?

<sup>12</sup> Dxel bignia' ree xbejnman guial ad xlevadurt guiadxtilan cuza'taman loj reeman, rëbaman zian din gap reeman cudad con ni rulüü ree bénfarisew në ree bénsaducew.

### *Rëb Bëd guial Jesús naj Cristo*

(Mr. 8:27-30; Lc. 9:18-21)

<sup>13</sup> Chi bidxin Jesús niz Cesarea de Filipino, gunabdiidxaman loj ree xbejnman, rëbaman:

—¿Chu rëb ree bejn, naj Bén guxhaal Dios?

<sup>14</sup> Badxi' reeman laan, rëb reeman:

—Yu' reeman rëb guial Wajn, bën baroobnijs bejn ree. Yu'za reeman rëb guial Elíasan, bën badëë xtiidx Dios loj ree bejn, yu' tää reeman rëb guial Jeremíasan, bën badëëd xtiidx Dios loj ree bejn o stijb ben ren ya, bën badëëd xtiidx Dios loj ree bejn.

<sup>15</sup> Dxel rëbaman loj reeman:

—Laadx lëjt, ¿xhie nadi, chu naj?

<sup>16</sup> Badxi' Simón Bëdan, rëbaman:

—Lüjn naj Cristo. Lüjn naj Xi'n Dios naban.

<sup>17</sup> Dxel rëb Jesús lojman:

—Xiquilbaal, Simón, xi'n Jonás, din ad bénguidxliujt guna lojl ni guinieel, da Dadan bën yu' xanyabaa laaman naj bën guna lojl. <sup>18</sup> Abi' naj rni lojl, Bëd, (rën guiëban “guiaj”) lüj naj zi'c tijb guiaj ni gacnë lidxan, din por lüj grii ree bën gac da bejnan abi' ni'qui gualgüjt ad zunijtt laa reeman. <sup>19</sup> Naj gune lüj gualrniabee ni za xanyabaa, abi' gra ni tiëbil gac loj guidxliuj guie ma naj gacan xanyabaa, guiáad ni ad zatiëjbttil gac loj guidxliuj guie ad najt gacan xanyabaa.

<sup>20</sup> Dxel gunabee Jesús loj gra ree xbejnman guial achu loj guiëb reeman guial laaman naj Cristo.

### *Rugojn Jesús guiëtaman*

(Mr. 8:31-9:1; Lc. 9:22-27)

<sup>21</sup> Diizd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz në ree mextr rajc ley, laa reeman naj bën gusagzi laaman, gugüjt reeman laaman, per ni yayon dxej yabanman. <sup>22</sup> Dxel gulëëcaan Bëd laaman, rëbaman lojman:

—¿Dios ad zabëëladxt lüj, Dad! ¿Laaman ad zatiëjbt saquil zian!

<sup>23</sup> Per badxi' loj Jesús, rëbaman:

—¿Basa'n naj, xindxab!, ad rüjn nawëëguil lon. Din ad por Diost zëed ree xgab ni rüjnl, xixgab bénguidxliujn rüjnl.

<sup>24</sup> Dxel rëb Jesús loj ree xbejnman:

—Bal yu' bën rën gac da bejnan ad zajct güünman zi'c naj xixgabaman, siibnejzaman gualzi ni tëdzaman abi' guidnalaman naj. <sup>25</sup> Din bën mazri rën xgualnaban ni rajpaman loj guidxliuj guie zadxin dxej gunijtaman laan. Per bën guiët por naj, zajpaman gualnaban tiblyaa con Dios. <sup>26</sup> Xhieci gan gap bejn gra ni yu' loj guidxliuj, abi' nitaman loj Dios. Din ad zile't sii bejn xgualnabanman xanyabaa. <sup>27</sup> Abi' Bën guxhaal Dios, gui'taman con xgualrniabee xDadaman Dios në ree xianjl Dios din gudëëman ni rayal tijbgaj bejn, bal gonin been bejn. <sup>28</sup> Diidxiczi rnin lojdi guial yu' ree bën riga' guie ad zëjtt reeman chi gad reeman guguaa Bën guxhaal Dios, gui'taman con xgualrniabeeman din nabeeman.

## 17

### *Bidxaa Jesús loj choon ree xbejnman*

(Mr. 9:2-13; Lc. 9:28-36)

<sup>1</sup> Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guijc tijb guia' ya. <sup>2</sup> Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiáad xabaman bayajcan naquich, balaa tëën bacha' zi'c guij. <sup>3</sup> Abi' loj hor guin baguaa reeman Moisejs con Elías cayünë reeman Jesús diidx. <sup>4</sup> Dxel rëb Bëd loj Jesús:

—Dad, ¿zagdxe naj nadxu' ree guie! Bal rënl, günan choon ranch, tijban par lüj, tijban par Moisejs, stijban par Elías.

<sup>5</sup> La'tgaj canee Bëd zian, biguiajt tijb zaj xt guijc reeman ridiinan bacha', loj zaj guin brii cha' bejn rëbaman:

—Bën guie naj da Xi'nan, bën rën da'tan, bën rabaanë' tëën, gol bacaagdiajg xtiidxaman.

<sup>6</sup> Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. <sup>7</sup> Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

<sup>8</sup> Abi' chi gules loj reeman achutri baguiaa reeman, tijbzi Jesús za' yagaj.

<sup>9</sup> La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

<sup>10</sup> Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaloj Elías gui't?

<sup>11</sup> Badxi' Jesús, rëbaman:

—Walican guial yaloj Elías gui't, laaman guzuxnejz gra. <sup>12</sup> Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

<sup>13</sup> Dxel gogbee ree xbejnman guial Wajn bén baroobnijs bejn ree cuza'taman.

### *Rayüjn Jesús tijb xin rëjtya'*

(Mr. 9:14-29; Lc. 9:37-43)

<sup>14</sup> Chi badxin Jesús con guiyon ree xbejnman, lod cabëz ree ben zien laaman bibig tijb xinguaaw lojman, bazuxibix lojman rëbix:

<sup>15</sup> —Dad, baya da xi'nan, din dád rzagdiajx rëjtya'x. Bëlczi volt riyajbix lojguij o lojnijs ya. <sup>16</sup> Bidnë'n laax loj ree xbejn, per ad rajct rayüjn reeman laax.

<sup>17</sup> Badxi' Jesús, rëbaman:

—¿Benguijdx, bén ad riladxt! ¿Xt goc gazunë'n lëjt? ¿Xt goc gadaan lëjt? Gol tanë xinzii guie.

<sup>18</sup> Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

<sup>19</sup> Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

<sup>20</sup> Dxel rëb Jesús loj reeman:

—Guial ta'nzi riladxidi. Naj rni lojdi bal naj xguialriladxidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetczi gac nawëëg par lëjt. <sup>21</sup> Per par yarii lasa' ree xindxab guie ryaadx chu cwedx guiniab Dios guiba'n tëë.

### *Rugojn Jesús zatijb guial guiëtaman*

(Mr. 9:30-32; Lc. 9:43-45)

<sup>22</sup> La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn, <sup>23</sup> abi' gugüjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

### *Ni rajx par yadoo*

<sup>24</sup> Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

<sup>25</sup> Badxi' Bëdan, rëbaman:

—Riguijxcaman laan.

Dxel chi bayu Bëd lënu lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

<sup>26</sup> Badxi' Bëd laan rëbaman:

—Benzit ree.

Dxel rëb Jesús:

—Abi' ree bén ladx reeman ad rguijxt reeman laan. <sup>27</sup> Per chitëë guidxe'ch reeman, wej ro' nijs, bazaal xiansuelil, dxel bëjl yaloj ni guiniaazil babëëb. Ro' bëjl guin guidxelil tijb cintabl, con laan bitijx dux impuest.

## 18

*¿Chu mazri zojbloj?*

*(Mr. 9:33-37; Lc. 9:46-48)*

<sup>1</sup> Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zojbloj lod rniabee Dios?

<sup>2</sup> Dxel gurejdx Jesús tijb xindoo, bazujman laax galay reeman, <sup>3</sup> abi' rëbaman:

—Diidxiczi rnin lojdi bal id zayüjndi xgab por xtolidi, bal id zajc tēēdi zi'c tijb xindoo, ad zutidi lod rniabee Dios. <sup>4</sup> Bén güün naya loj Dios, gac tēēman zi'c xindo guie, laaman gac bén mazri zojbloj lod rniabee Dios. <sup>5</sup> Abi' bén yaca' tijb xindoo, por naj, najn raca'man.

*Bén rüjn persi ryajb ree bejn loj dol*

*(Mr. 9:42-48; Lc. 17:1-2)*

<sup>6</sup> Bal chu gusajb tijb bén qui riladxri naj loj dol, zagdxeli guixhii reeman tijb guiajro' yējnman guzaal reeman laaman xt xan nijs. <sup>7</sup> ¿Probza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¿probza bén gusajb bejn ree loj dol!

<sup>8</sup> Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu'l xanyabaa con tiblodzi yaal o con tiblodzi guia'l, luar chu'l con groplad yaal o groplad guia'l loj bajl ni ad yu't dxej yayü'. <sup>9</sup> Abi' bal laagajc guiaalojl rusajb lüj loj dol, gulēen bazaalan zijt, zagdxeli chu'l con tiblodzi guiaalojl xanyabaa, luar chu'l con gropladan loj bajl yu' gabijl.

*Xcwent xiil gunit*

*(Lc. 15:3-7)*

<sup>10</sup> Ad guiniajgaadi loj ree bén qui riladxri naj. Din diidxiczi rnin lējt guial xanyabaa yu' ree anjl rniaj laa reeman zianczi za' reeman loj da Dadan Dios bén yu' xanyabaa.

<sup>11</sup> Guiaad Bén guxhaal Dios zēēdaman par ree bén ad zinalt xnejz Dios din laa reeman loj dol.

<sup>12</sup> ¿Xhie naladxidi? Bal tijb bejn rajp tibgayuu xiil, abi' rizēēb tijbib, ¿nid zusa'nman zatajpagjlchiinbitapib dajn ya din chigdiilaman be bizēēb guin? <sup>13</sup> Abi' bal yadxejlaman laab, diidxiczi rnin mazri yabaanēman laab guial loj tajpagjlchiinbitap be ad bizēēb guint. <sup>14</sup> Ziangajc dux Dad ree Dios bén yu' xanyabaa ad rēntaman nit ni'czi tijb ree bén qui riladxri laaman.

*Xhienaag yaquieen perdon du lasa' ree*

*(Lc. 17:3)*

<sup>15</sup> Bal xhie tijb ni mal güün lasa'l lüj, guneenēman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenēl laaman zagdxex. <sup>16</sup> Bal id ridxga'man lüj, binē zatijb o zatio'p bejn, din chigneenēdi laaman din con xtiidx tio'p o choon bejn guiguien guial ma bigneenēl laaman. <sup>17</sup> Dxel bal ni'qui xtiidx reeman ad ridxga'taman, bagojn ree bén zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb bén ad riladxt Dios o zi'c tijb bén ruquijx impuest par Rom.

<sup>18</sup> Diidxiczi rnin, gra ni ad zatiējbtidi gac loj guidxliuj guie ad rajctan xanyabaa, guiaad ni tiēbidi gac loj guidxliuj guie mal rajcan xanyabaa.

<sup>19</sup> Rni tēēn lējt: Bal yaya'n tio'pidi diidx loj guidxliuj guie, par guiniabidi xhienin loj da Dadan bén yu' xanyabaa, laaman gune laan. <sup>20</sup> Din lod rado'p tio'p o choon bejn por naj, laa naj za' galay reeman.

<sup>21</sup> Dxel gubig Bēd gunabdiidxaman loj Jesús, rëbaman:

—Dad, ¿bēl volt rayal günan perdon lasa'n, bal güünman naj xhienin? ¿Xt gajdx volt ya?

<sup>22</sup> Badxi' Jesúsán rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

*Xcwent bén ad rüjnt perdon lasa'*

<sup>23</sup> Xguialrniabee Dios naj zi'c tijb rey ni been xgab guial ma gojl yaguijx ree xmojsaman lojman. <sup>24</sup> Chi guzulojman caybëëman cwent guin, bidxin tijb xmojsaman lojman bén ral zro' da't. <sup>25</sup> Abi' guial achet rajp bén guin din yaguijxaman ni ralaman, gunabee rey guin to'man loj ree bejn në lacheelaman con ree xi'nman nëtëë gra ni rajpaman din chile' yaguijxaman di'n guin. <sup>26</sup> Dxel bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.” <sup>27</sup> Zianz baya rey guin laaman, beenman laaman perdon gra ni ralaman, abi' baslaaman laaman ziaman. <sup>28</sup> Per chi barii mojs guin yagaj, badxajgaman tijb bén rüjnnëman dxiin, ralaman ta'nzi milia lojman. Dxel gunaazaman laaman guzuloj caguiajman yëjnman, rëbaman: “¡Baguijx ni ralil lon!” <sup>29</sup> Dxel bazuxib bén guin lojman beenman naya rëbaman: “Gojp naj pacens zaguixcan graczi ni ralan lojl.” <sup>30</sup> Per ad guyënt bén guin, badxe'man laaman ladxguiib xt lodzi yaguijxaman di'n guin. <sup>31</sup> Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc. <sup>32</sup> Dxel gurejdx rey guin mojs guin, zianz rëbaman lojman: “¡Mojs guiidx! Benan perdon gra ni ralil lon guial beenl naya. <sup>33</sup> ¿Nid nëgajc lüj rayal naya xcompniaril ya, zi'cgajc bayan lüj?” <sup>34</sup> Abi' guial tant balen rey guin, gunabeeman badxe' reeman laaman ladxguiib xt lodzi baguijx gra ni ralaman.

<sup>35</sup> Basnuu Jesús rëbaman:

—Ziangajc güünnë da Dadan lëjt, bén yu' xanyabaa, bal id züjn perdon lasa'di con guidib luxdoodi ni rüjnnë reeman lëjt.

## 19

*Rulüü Jesús xcwent guial rala' lasa'*

(Mr. 10:1-12; Lc. 16:18)

<sup>1</sup> Chi gulox gunee Jesús zian, bazaman niz Galilea, zëman niz Judea, niz stiblad ro' guiw Jordán. <sup>2</sup> Zien ree bejn binal laaman, yagaj bayüjnman Bénragxuu ree.

<sup>3</sup> Abi' tio'p choon ree Bénfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—¿Zile' yala' bejn lacheelaman por xhiedxitzinin ya?

<sup>4</sup> Badxi' Jesúsán rëbaman:

—¿Nid wayoolidi loj xtiidx Dios ya, guial diidz guia'xchej Dios “been xinguaaaw në béngunaa”? <sup>5</sup> Rëb tëëman: “Zeel xinguaaaw gusa'n xdad xniaax din guibannë lacheelix, dxel grop reex ma gac zi'c tijbzi bejn.” <sup>6</sup> Zianan zeel ad najtri reex tio'p, ma naj reex tijbzi. Zeel bénguidxliuj ad rayalt yala'man lasa' ni ma bachajg Dios.

<sup>7</sup> Dxel rëb ree Bénfarisew guin loj Jesús:

—¿Chexquiza zeel rëb Moisejs guial zile' yala' lacheel bejn, con gudëëdaman gui'ch guial ma bala' lasa' reeman?

<sup>8</sup> Badxi' Jesúsán, rëbaman:

—Cwëjb Moisejs gojc zian guial ad rëntidi guzoobidi diidx, per ad ziant gojc diidz guia'xchej. <sup>9</sup> Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bén qui bala'ri lasa' guin dolan cayüjnx.

<sup>10</sup> Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

<sup>11</sup> Badxi' Jesúsán rëbaman:

—Ad grat bejn zile' chignia' ni canin, bén ca'zi ree quiarguejnx par chignia' reeman laan. <sup>12</sup> Yu' bejn diidz rajlaman ad zëëdtaman loj guidxliuj par guxhliaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli guitie'ch reeman xtiidx Dios luar guxhliaa reeman. Bén rën chignia', gol bignia'.

*Rüjnle' Jesús xindoo ree*  
(Mr. 10:13-16; Lc. 18:15-17)

<sup>13</sup> Binë ree bejn xindoo ree lod za' Jesús, din guixhioob yaaman guiyc reex cwedx guiniab tēēman Dios por laa reex, per ree xbejnman guzuloj cadilē reeman bēn zinē ree laa reex. <sup>14</sup> Dxel rēb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bēn naj zi'c laa reex.

<sup>15</sup> Abi' guxhoob yaa Jesús guiyc ree xindo guin, dxel ziaman.

*Tijb xinrijcw*  
(Mr. 10:17-31; Lc. 18:18-30)

<sup>16</sup> Bidxin tijb xin guin loj Jesús, abi' gunabdiidix lojman, rēbix:

—Mextr, ¿xhie ni zagdxē gūnan din ga'pan guialnaban tiblyayaa con Dios?

<sup>17</sup> Dxel rēb Jesús lojx:

—¿Chexc zeel rniabdiidxil lon conin naj ni zagdxē? Achut naj benza'c, tijbzi Dios. Per bal rēnl gapil guialnaban tiblyayaa con Dios, been zi'c rēb ree mandamient.

<sup>18</sup> Dxel gunabdiidix loj Jesús rēbix:

—¿Con ree mandamientan?

Badxi' Jesúsán, rēbaman:

—Ad gugūjtil bejn, ad sunēl lacheel ben ren, ad cwanl, ad cwēēl xtiidix bejn, <sup>19</sup> gojp respejt xdad xniaal, guyēn tēē ree lasa'l zi'c rēn lūj gajc.

<sup>20</sup> Dxel rēbix:

—Gra ree ni guin cayūnan diidz najn xindoo, ¿xhieri ryaadx gūnan yan?

<sup>21</sup> Badxi' Jesúsán, rēbaman:

—Bal rēnl gaquil benza'c loj Dios, bigto' gra ni rajpil dxel gudēēl milia guin loj ree bēnprob. Zian gapil guialnaza'c xanyabaa. Zianz guidnalil naj.

<sup>22</sup> Chi biguiejn xin guin zian, dād guyu nayax ziax, guial dād xinrijcwan.

<sup>23</sup> Dxel rēb Jesús loj ree xbejnman:

—Diidxiczi rnin lojdi: Dād nawēēg chu' benrijcw lod rniabee Dios. <sup>24</sup> Naj rni lējt. Adli nawēēgt tēd tijb camell xan gagux, guial chu' tijb benrijcw lod rniabee Dios.

<sup>25</sup> Chi biguiejn ree xbejn Jesús zian, dād badxaloj reeman, abi' rēb reeman:

—¿Chuza zajc gac perdon loj Dios?

<sup>26</sup> Dxel baguiaa Jesús loj reeman, rēbaman:

—Nawēēg gac zian par bēnguidxliuj, per par Dios achet ni nawēēg yu'.

<sup>27</sup> Abi' rēb Bēd lojman:

—Ma basa'nan graczi ni raya'pan, persi zudnaalan lūj. Abi' ¿xhieza yayalan?

<sup>28</sup> Badxi' Jesúsán, rēbaman:

—Diidxiczi rnin lojdi chi guidxin dxej yacūb gra, guidxin tēē dxej cwe Bēn guxhaal Dios luar lod nabeeman, nē lējt, guial zidnalidi naj, cwedi loj chiptio'p ree luar lod nabeedi, din gūūn xguialguxtisidi loj guidxiptio'p ree xdiaa Israel. <sup>29</sup> Abi' gra ree bēn basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tēē reeman guialnaban tiblyayaa con Dios. <sup>30</sup> Per zien ree bēn naj bēn yaloj, gac reeman bēn bigra, abi' zienza ree bēn naj bēn bigra, gac reeman bēn yaloj.

## 20

*Xcwent ree bēn rüjn dxiin*

<sup>1</sup> Rēb tēē Jesús:

—Xguialrniabee Dios naj zi'c tijb bēn rajp tijb guiniaaro', rsildoo briiman zitiilaman mojs gūūn dxiin loj xguiniaaman. <sup>2</sup> Baya'nnēman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. <sup>3</sup> Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. <sup>4</sup> Zianz rēbaman loj reeman: “Gol biguieen dxiin loj da guiniaan, naj gaguix



lëjt zi'c rayal.” Dxel zë reeman. <sup>5</sup> Cost garol dxej briiman stijb, abi' briei gajman cost raca choon wadxe ziangajc rëbaman loj ree bën riga' yagaj, bën achet xchiin. <sup>6</sup> Cost raca gaay wadxe wejman galay luguiedx guin stijb, abi' bidxaaglojman ben ren ree, bën achet ree xchiin, gunabdiidxaman loj reeman, rëbaman: “¿Chexc zeel za'di guin gudëdchej ad cayüjntidi dxiin?” <sup>7</sup> Badxi' reeman laan rëb reeman: “Achut wanee dxiin yaguieenan.” Dxel rëbaman loj reeman: “Në lëjt gol biguieen dxiin loj da guiniaan naj gaguix lëjt zi'c rayal.” <sup>8</sup> Chi ma gurej guiaal, rëb bën naj xguiniaan loj bën naaz dxiin guin: “Gurejdx ree mojs guin din quixil laa reeman, per yalojxgaj gudijx ree bën bigra guyu, zianz quixil bën guyu ree yaloj.” <sup>9</sup> Chi bidxin ree bën guyu loj dxiin guin raca gaay wadxe, gojx tijbgaj reeman xieen tibdxej. <sup>10</sup> Dxel chi bidxin ree bën guyu loj dxiin diidz rsil, gunaladx reeman niajx reeman mazri, per nëgajc reeman gojx xieen tibdxej. <sup>11</sup> Abi' chi cayajx reeman, guzuloj cadxe'ch reeman bën naj xguiniaa laan, <sup>12</sup> rëb reeman lojman: “Bën bigra guyu ree, been reeman dxiin tib horzi abi' zi'cgajc caguixil dunujn gudijxil laa reeman, abi' dunujn badaanan baguieenan dxiin dëchej loj guialnalaa.” <sup>13</sup> Per rëb bën guin loj tijb reeman: “Achet ni mal cayünan lüj. ¿Nid baya'n diidz ya plac gunen tia'll tibdxej? <sup>14</sup> Cwa' ni bayalil baguiaj. Din naj rënan gaguixan bën bigratë guyu zi'c gudixan lüj, <sup>15</sup> zajc günnë' da milian ni rëntzan. ¿O nadëdlojl ya guial najn benza'c?” <sup>16</sup> Zianan zeel bën naj ree bën bigra gac reeman bën yaloj, guiaad ree bën yaloj gac reeman bën bigra.

*Bayon volt bagojn Jesús guial guiëtaman*

*(Mr. 10:32-34; Lc. 18:31-34)*

<sup>17</sup> Chi zë Jesús Jerusalén, gurejdx guidxiptio'p ree xbejnman tibladd, rëbaman loj reeman:

<sup>18</sup> —Ganin lëjt, ziyo' ree Jerusalén, lod yayü reeman Bën guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabee guiëtaman, <sup>19</sup> yayü reeman laaman loj ree benzit, din guze' reeman laaman quin tää reeman laaman, abi' gucaa reeman laaman loj crüjz, per yayon dxej yabanman.

*Ni gunab xniaa Jacob con Waj*

*(Mr. 10:35-45)*

<sup>20</sup> Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman. <sup>21</sup> Gunabdiidz Jesús lojman, rëbaman:

—¿Xhie rënl?

Badxi' bën guinan, rëbaman:

—Rënan nabeel cwe tijb da xi'nman xladbeel, stijbim xladruvejsil, chi ma canabeel.

<sup>22</sup> Dxel rëb Jesús:

—Ad ragbeetidi ni rniabidi. ¿Wen zajc tädidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

<sup>23</sup> Abi' rëbaman:

—Diidxliczi rnin zajc tädidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn par ree bën bacaabee da Dadan.

<sup>24</sup> Chi biguiejn zachii ree xbejn Jesús zian dád balen reeman grop bijch reeman. <sup>25</sup> Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiaad ree bën zobjloj rüjnnë reeman bejn ree zi'ctzi rën reeman por guialrniabee ni rajp reeman. <sup>26</sup> Per con lëjt ad rayalt gac zian. Bal chu rën gac bën rniabee lojdi, rayal güünman sirv lojdi. <sup>27</sup> Ziangajc bën rën gac bën zobjloj lojdi, rayal güünman sirv lojdi zi'c bën nado'. <sup>28</sup> Zi'c Bën guxhaal Dios ad bi'ttaman par güün reeman sirv lojman, bi'ttaman par güünman sirv gudëë tää xguialnabanman din laa zien bejn loj dol.

*Rayüjn Jesús tio'p ree bénlutia'p*

*(Mr. 10:46-52; Lc. 18:35-43)*

<sup>29</sup> Chi bazaman luguiedx Jericó con ree xbejnman, dád zien ree bejn binal laaman.  
<sup>30</sup> Dxel tio'p ree bénlutia'p zojb cwë' nejb chi biguiejn reeman cadëd Jesús niz yagaj, gurixdiaj reeman rëb reeman:

—;Dad, xdiaa Davi, baya dunujn!

<sup>31</sup> Abi' rdilë ree ben guin laa reeman din yacwëéz ro' reeman, per mazri ribixdiaj reeman rëb reeman:

—;Dad, xdiaa Davi, baya dunujn!

<sup>32</sup> Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—;Xhie rëndi gūnan por lëjt?

<sup>33</sup> Badxi' reeman laan, rëb reeman:

—Dad, rayënan yaxal du lojn.

<sup>34</sup> Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

## 21

### *Ru Jesús Jerusalén*

(Mr 11:1-11; Lc. 19:28-40; Jn.12 :12-19)

<sup>1</sup> Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, <sup>2</sup> rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiee reeb gol tanë reeb guie. <sup>3</sup> Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

<sup>4</sup> Zian gojc persi gojc cumplid ni guneë bën badëë xtiidx Dios loj ree bejn, chi rëbaman:

<sup>5</sup> Gol güjdx loj ree bën Sión:

“Gol baguiaa laa xreydi zëëd lojdi, ad zëëdtaman nabë, dxiibaman tijb bur, tijb burdoo xi'n tijb be rüü.”

<sup>6</sup> Dxel wej ree xbejn Jesús abi' been reeman zi'c rëbaman loj reeman, <sup>7</sup> binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin.

<sup>8</sup> Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman. <sup>9</sup> Abi' zi'c ree bën ned zi'c ree bën zidnal laaman, rbixdiaj reeman, rëb reeman:

—;Benza'c bendxoon naj xdiaa rey Davi! ;Nüjnle' Dios bën guxhaalaman! ;Benza'c bendxoon naj Dios bën yu' xanyabaa!

<sup>10</sup> Chi guyu Jesús luguiedx Jerusalén, gra ree bën luguiedx guin badxaloj, abi' riniabdiidx loj lasa' reeman, rëb reeman:

—;Chu bën guin?

<sup>11</sup> Dxel rëb ree benzien guin:

—Laaman naj Jesús, bën rudëë xtiidx Dios loj ree bejn, bën Nazaret guiedx riga' niz Galilea.

### *Rabëë Jesús bën ruto' ree lën yadoo Jerusalén*

(Mr. 11:15-19; Lc. 19:45-48; Jn.2 :13-22)

<sup>12</sup> Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii. Barexguiataman xmex ree bën cuchaa milia në xmex ree bën cuto' palom. <sup>13</sup> Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

<sup>14</sup> Dxel bénlutia'p ree con ree bencoj bibig reeman loj Jesús lën yadoo guin abi' bayüjnman laa reeman. <sup>15</sup> Per chi baguiaa ree bixhioz rniabee ree bixhioz con ree mextr rajc ley milagr cayüjn Jesús, biguiejn tëë reeman rëb ree xindoo lën yadoo guin: “Benza'c bendxoon naj xdiaa rey Davi”, dxel dád bidxe'ch reeman. <sup>16</sup> Abi' rëb reeman loj Jesús:

—¿Rguiejnl ni canee ree xindo guin ya?

Badxi' Jesúsán, rëbaman:

—Rguiejncan. Per ¿gadidi gool loj xtiidx Dios ya? Lod rëb:

Lüj badëed ni gool ree xindoo në ree xindobëz sta rë' dud,  
din guilies reex xvaloril.

<sup>17</sup> Dxel basa'n Jesús laa reeman, zëman Betania ni baya'nman guxhin guin.

*Tijb yag higo ni gubidx*

(Mr. 11:12-14, 20-26)

<sup>18</sup> Chi bareguiaal rsil la'tgaj zë Jesús Jerusalén stijb, guzuloj gulaanman. <sup>19</sup> Abi' baguiaaman zojb tijb yag higo cwë' nejz, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—¿Ad yu'tri dxej tial higo!

Loj hor guin gajc gubidx yag guin. <sup>20</sup> Chi baguiaa ree xbejnman zian, dád badxaløj reeman abi' gunabdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

<sup>21</sup> Badxi' Jesúsán, rëbaman:

—Naj rni lojdi, bal rliladxidi Dios abi' ad zunawëgtidi, ad ni bentzan con yag higo guin zajc güüindi, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian. <sup>22</sup> Gra ni guiniabidi loj Dios, bal rliladxidi laaman, zuneeman laan.

*Xgualrniabee Jesús*

(Mr. 11:27-33; Lc. 20:1-8)

<sup>23</sup> Chi guyu Jesús lën yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee gualrniabee lojl?

<sup>24</sup> Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee gualrniabee günan ni guin ree. <sup>25</sup> ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuløj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?” <sup>26</sup> Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn din gra reeman rliladx gual Waj naj bën badëed xtiidx Dios loj ree bejn.

<sup>27</sup> Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee gualrniabee günan ni guin ree.

*Tijb bën guyu tio'p xi'n*

<sup>28</sup> Basnuu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxej biguieen dxiin loj guiniaa yu' uv.” <sup>29</sup> Badxi'xan, rëbix: “Ad zatan.” Per dxelri bayüjnx xgab zianz wejx. <sup>30</sup> Abi' rëbaman loj stijb xi'nman din chex, badxi'xan, rëbix: “Yo dad, gazacan.” Per ad wejtix. <sup>31</sup> Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yaløj guin.

Dxel rëb Jesús loj reeman:

—Diidxliczi rnin, bën ruquijx ree impuest con ree béngunaa naban nadxuudx, yaløj laa reeman chu' lod rniabee Dios gual lojdi. <sup>32</sup> Din bi't Waj, bën baroobnijs bejn ree par gulüüman lëjt xhienaag guibandi, per ad bililadxtidi xtiidxaman. Guiáad ree bën ruquijx impuest con ree béngunaa naban nadxuudx, bililadx reeman xtiidxaman. Per lëjt majsi baguiaadi gra ree ni guin, ad bayüjntidi xgab por xtolidi din nililadxidi laaman.

*Xcwent ree mojs guijdx*  
(Mr. 12:1-12; Lc. 20:9-19)

<sup>33</sup> Rëb tëë Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

'Zianz badëëdaman laan garol loj ree bën güün dxiin lojn, zëtaman zijt. <sup>34</sup> Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman. <sup>35</sup> Per ree bën rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguaiaj reeman. <sup>36</sup> Dxel bën naj xguiniaan guxhaalaman mazri ree mojs guial loj ree bën we yaloj, per ziangajc beennë ree bën guin laa reeman.

<sup>37</sup> Ni bigra, guxhaal xi'nman guial gunaladxaman: “Zajpqui reeman da xi'nan respejt.”

<sup>38</sup> Per chi baguiaa ree bën guin xi'nman, rëb loj lasa' reeman: “Xin guinan naj xin tia' guidxliuj guin, yagüjt reex din gacan du xieen ree.” <sup>39</sup> Abi' gunaaz reeman laax, babëë reeman laax loj guiniaa guin dxel bagüjt reeman laax.

<sup>40</sup> Dxel gunabdiidx Jesús loj ree bën caneenëman, rëbaman:

—Chi yadxin bën naj xguidxliuj laan, ¿xhie naladxidi güünnëman bën guin ree?

<sup>41</sup> Abi' rëb reeman loj Jesús:

—Ad zayataman gugüjtaman bën guin ree, dxel gudëëman guidxliuj guin garol loj ree ben ren, bën yayü ni rayalaman chi guidxin dxej yaru' ree uv guin.

<sup>42</sup> Dxel rëb Jesús loj reeman:

—¿Id wayolczidi loj xtiidx Dios ya? Lod rëb:

Guiaj ni gulëëgo'n ree bën rüjn yu.

Laan goc ni mazri been sirv gojcnë yu guin.

Laan naj ni been Dios,

abi' dád radxa du loj ree.

<sup>43</sup> Zeel rnin lojdi, zariicadi loj xguialrniabee Dios abi' ben ren ree yayu xluaridi, bën wali ree güün zi'c rënman. <sup>44</sup> Abi' chutëëz bën yab guijc guiaj guin, zarooxaman, guiáad bal yab guiaj guin guijcaman zanidlojman.

<sup>45</sup> Chi biguiejn ree bixhioz rniabee ree bixhioz con ree bënfarisew guin ni cayü Jesús zi'c cwent, dxel gogbee reeman guial laa reeman cuza'taman. <sup>46</sup> Abi' guyën reeman niniaaz reeman laaman, per bidxeb reeman bejn ree guial rliladx reeman laaman naj bën rudëëd xtiidx Dios loj ree bejn.

## 22

*Xcwent guialruxhliaa*

<sup>1</sup> Basnuu Jesús beman zi'c cwent loj reeman rëbaman:

<sup>2</sup> —Xguialrniabee Dios naj zi'c tijb rey bën been lanijro' chi baxhliaa xi'nman. <sup>3</sup> Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman. <sup>4</sup> Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin.” <sup>5</sup> Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, <sup>6</sup> yu' tëë reeman gunaaz mojs guin ree gudijn reeman laa reeman abi' bagüjt reeman laa reeman. <sup>7</sup> Chi gogbee rey guin zian, dád bidxe'chaman. Guxhaalaman bën naj ree xsuldadaman persi bagüjt reeman bën guin ree baze'c tëë reeman lidx reeman. <sup>8</sup> Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree bën gunen ad najt guial ni't reeman. <sup>9</sup> Yan, gol wej lod radxaag lasa' ree nejz, gol güjdx loj ree bën guidxaalojtzidi din gui't reeman loj guialruxhliaa guin.” <sup>10</sup> Abi' brii ree mojs guin wej reeman lunejz guin ree, bato'p reeman gra ree bën bidxaalojtzidi reeman, zi'c ree benmal zi'c ree benza'c, zian gudxa ree biooz lidx rey guin.

<sup>11</sup> 'Per chi guyu rey guin din guguaaman biooz guin ree, baguaaman tijb bèn ad najcwt xab ni rayal gacwaman loj guialruxhliaa guin. <sup>12</sup> Abi' rëb rey guin lojman: "Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?" Dxel achet badxejl niëjb bèn guin. <sup>13</sup> Zianz rëb rey guin loj ree bèn cagui's guialraw: "Gol guxhii guia'x në yaax, gol bazaal tëëx xchu lod nacay da't lod goonx gaw tëë layix." <sup>14</sup> Din zien ree bejn rdxejl, per ad grataman chu'.

*¿Rayal gax impuest ya?*  
(Mr. 12:13-17; Lc. 20:19-26)

<sup>15</sup> Dxel baza ree bënfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman. <sup>16</sup> Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniee diidxli, abi' walil rulüül guial xhienaag rën Dios guiban bejn, ad ridxga' tëëttil chu naj bejn. Din lojl tiblojzi naj bejn. <sup>17</sup> Guna du lojn: ¿Zagdxen ya yadijxan impuest loj César o ad zagdxetan ya?

<sup>18</sup> Per gogbee gajc Jesús xgabmal ni cayüjn reeman, abi' rëbaman loj reeman:

—Bèn rusquiee, ¿chexc zeel raguuilidi mod xhienaag gutidia'di naj? <sup>19</sup> Gol balüü tijb cintabl lon ni rguixnëdi impuest.

Dxel badëed reeman tijban lojman, <sup>20</sup> abi' gunabdiidx Jesús loj reeman, rëbaman:

—¿Chu loj ca lojn chu tëë laj ca lojn?

<sup>21</sup> Badxi' reeman laan, rëb reeman:

—Laj César në lojman.

Dxel rëbaman:

—Gol badëed loj César ni naj xieen César, guiáad loj Dios gol badëed ni naj xieen Dios.

<sup>22</sup> Chi biguiejn reeman zian, dád badxaloj reeman, dxel basa'n reeman laaman, zianz zia reeman.

*Gunabdiidx reeman xcwent guial yaban ree bengüt*  
(Mr. 12:18-27; Lc. 20:27-40)

<sup>23</sup> Dxejzii gajc tio'p choon ree bénsadusew wej reeman bignaj reeman Jesús, bën-sadusew guin ree ad rliladxt reeman guial yaban ree bengüt, zeel rëb reeman loj Jesús:

<sup>24</sup> —Mextr, Moisejs rëb guial bal guiët tijb xinguaaw abi' achut xi'n reex guyu con lacheelix, bijch xingüt guin guxhliaanë béngunaa bizëjb guin din chu' xi'n reex luar bijchix. <sup>25</sup> Du lojn guyu tijb famil lod gojc reex gajdx bijch. Baxhliaa xin yaloj guin, per güjtix abi' guial ad guyut xi'nx, dxel bijch barojpax baxhliaanë béngunaa guin. <sup>26</sup> Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian. <sup>27</sup> Chi bara reex güjt dxel güjt béngunaa guin. <sup>28</sup> Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhliaanë laaman?

<sup>29</sup> Badxi' Jesúsán, rëbaman:

—¿Ragdxadi guial ad nünbeetidi xtiidx Dios ad nünbee tëëtidi xhienaag naj xguial-rniabeeman! <sup>30</sup> Din chi yaban ree bengüt, ad zuxhliatri reeman ad zudëed tëëtri xi'n reeman guxhliaa, ma gac reeman zi'c ree anjl yu' xanyabaa. <sup>31</sup> Abi' xcwent ni yaban ree bengüt, ¿gadidi gool ya lod ca guial Dios gajc rëb: <sup>32</sup> "Naj naj xDios Abraham, xDios Isaac në xDios Jacob"? Abi' Dios ad najtaman xDios ree bengüt, najman xDios ree bèn naban.

<sup>33</sup> Chi biguiejn ree bejn zian, dád badxaloj reeman zi'c rulüüman laa reeman.

*Mandamient mazri zojbloj*  
(Mr. 12:28-34)

<sup>34</sup> Chi gogbee ree bënfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman. <sup>35</sup> Abi' tijb ree bënfarisew guin, bèn naj mextr rajc ley, gunabdiidxaman loj Jesús din guidoon xhie guiëbaman, rëbaman:

<sup>36</sup> —Mextr, ¿con mandamientan mazri zojbloj loj gra ree mandamient ni zëed loj ley?

<sup>37</sup> Badxi' Jesúsán, rëbaman:

—“Guyën xDadil Dios guidiblagaa guidib guijc guidib ladxil.”<sup>38</sup> Laan naj mandamient mazri zojbloj. <sup>39</sup> Ziangajc naj mandamient rarojp ni rëb: “Guyën ree bejn zi'c rën lüj gajc.”<sup>40</sup> Con grop ree mandamient guie, ma cayüjn bejn cumplid gra ley bacaa Moisejs në ree ni bacaa ree bën badëë xtiidx Dios loj ree bejn.

*Chu loj xdiaa za Cristo*

(Mr. 12:35-37; Lc. 20:41-44)

<sup>41</sup> La'tgaj nadxag lasa' ree bënfarisew guin, gunabdiidx Jesús loj reeman, rëbaman:

<sup>42</sup> —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

<sup>43</sup> Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

<sup>44</sup> Dios rëb loj bën rniabee naj:

“Gurej da ladbeen, xt gabecan  
xin rdxe'ch ree lüj guia'l.”

<sup>45</sup> Yan, bal xi'n Davi naj Cristo, ¿chexquiza zeel rëb Davi lojman Dad?

<sup>46</sup> Achutczi gojc nadxi' xtiidx Jesús, ni'czi tijb diidx. Abi' diizd dxejzii achutczi bayax niniabdiidx xhienin lojman.

## 23

*Ni rüjn ree mextr rajc ley në ree bënfarisew*

(Mr. 12:38-40; Lc. 11:37-54; 20:45-47)

<sup>1</sup> Rëb Jesús loj ree bejn në loj ree xbejnman:

<sup>2</sup> —Mextr rajc ree ley con ree bënfarisew rulüü reeman xhie rën guiëb ni ca loj xley Moisejs. <sup>3</sup> Zeel gol bazoob xtiidx reeman, gol been tëë gra ni na reeman lojdi, per ad güüнди zi'c rüjn reeman, din laa reeman ni ren na reeman abi' ni ren rüjn reeman.

<sup>4</sup> Rniabee reeman güün bejn ni nawëëg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman.

<sup>5</sup> Gra ni rüjn reeman, rüjn reeman laan din yadxaloy bejn laa reeman. Ruladx reeman guixhii lucwaj reeman në xu'c reeman tijb cint ni ca xtiidx Dios loj, ruladx tëë reeman gacw reeman lajd zagdx. <sup>6</sup> Ruladx reeman cwe reeman lod rayal rbej ree bën zojbloj, loj tijb guialraw, abi' ziangajc rüjn reeman lën ree yadoo. <sup>7</sup> Ruladx tëë reeman gugajpdioz bejn laa reeman zagdx niz lunejz guiëb tëë reeman loj reeman mextr.

<sup>8</sup> 'Per lëjt ad sëëbladxiidi guiniee bejn lëjt mextr, din tijbzi naj gradi, tijbzi mextr rajpidi abi' laaman naj Cristo. <sup>9</sup> Ni'qui tijb loj bënguidxliuj, bën ad najt xdadidi, ad guiëbidi dad, din tijbzi xdadidi yu', laaman yu' xanyabaa. <sup>10</sup> Ad güün tëëdi naguiejn yayagbee ree bejn lëjt zi'c bën rniabee, din tijbzi bën rniabee yu', laaman naj Cristo. <sup>11</sup> Bën mazri zojbloj lojdi, laaman rayal güün sirv lojdi. <sup>12</sup> Din bën rlies xvalor gajc achet lasajcaman. Guiáad bën rüjn naya, zajs xvaloraman.

<sup>13</sup> '¿Probza lëjt mextr rajc ley në lëjt bënfarisew, bën rusquiee!, ad rtiëjbtidi gagbee ree bejn xhienaag din gac reeman xbejn Dios, ni'quiza lëjt ad rüjntidi naguiejn gaquidi xbejn Dios, abi' rudxoondi gac xbejn Dios bën rën ree gac xbejnman.

<sup>14</sup> '¿Probza lëjt mextr rajc ley në lëjt bënfarisew, bën rusquiee!, din raca'di lidx ree bëngunaa bizëjb, abi' din guiëb bejn guial benza'c lëjt dád xchej rbejdx rniabidi Dios. Zeel mazri castiro' yayalidi.

<sup>15</sup> '¿Probza lëjt mextr rajc ley në lëjt bënfarisew, bën rusquiee!, zizadi guidibdoo rguiilidi bën gac ree xbejndi, abi' chi ma beendi gan tijbaman al mazri xi'n xindxab rüjndi laaman guial lojdi.

<sup>16</sup> '¿Probza lëjt, bën lutia'pl!, rëbidi: “Achet güünan bal id züjn bejn ni gunee man, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxel ma rüjn naguiejn güünman ni gunee man.”<sup>17</sup> ¿Natontidi, wed natia'p lojdi! ¿Conin mazri

lasajc: Or guin ya o yadoo beenle' or guin? <sup>18</sup> Rëb tēdi: “Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman.” <sup>19</sup> ¡Bénlutia'p! ¿Conin mazri lasajc par lējt: Gon guin ya o altar beenle' gon guin? <sup>20</sup> Bén ruza't altar guin ad altar guintzan ruza'taman, nēgajc gra ni dxiib lojn ruza'taman. <sup>21</sup> Guiáad bén ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin. <sup>22</sup> Abi' bén ruza't xanyabaa, Diosan ruza'taman nē lod zojbaman.

<sup>23</sup> ¡Probza lējt mextr rajc ley nē lējt bénfarisew, bén rusquieel, rbēecadi bidxtil, anís nētēē comin ni rayal gudēēdi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch tēētidi loj xnejz Dios. Laa reen rayal güündi, per ad cwēēladxidi gudēēdi ni rayal loj Dios. <sup>24</sup> ¡Bénlutia'p, rajpidi cudad chitēē guiēbidi tijb bizēdlajs, abi' rguiejbidi tijb camell!

<sup>25</sup> ¡Probza lējt mextr rajc ley nē lējt bénfarisew, bén rusquieel, rusiadi xijch ree vajs nē xijch ree pliajt naj nadxuudx, guiáad luxdoodi guidxa ni dxuudx, nē guialgubaan nētēē guialrdxe'ch lasa'. <sup>26</sup> ¡Bénfarisew lutia'p: Yaloxgaj gol basia, zian guiguien waliquidi nayadi loj Dios!

<sup>27</sup> ¡Probza lējt mextr rajc ley nē lējt bénfarisew, bén rusquieel, najdi zi'c baa nayē' culor naquich, guijcan rguien nix da't, per lēnan guidxa ree xdxijt bengüt nē graloj ree ni dxuudx. <sup>28</sup> Zian najdi, niz loj ree bejn, rulüüdi benza'c, per luxdoodi guidxa guialrusquieel nē guialnaladx.

<sup>29</sup> ¡Probza lējt mextr rajc ley nē lējt bénfarisew, bén rusquieel, rüjndi xbaa ree bén badēē xtiidx Dios loj ree bejn, abi' rüjnchaawidi xbaa ree bén goc benza'c, <sup>30</sup> dxel rēbidi: “Bal nabajnan xtiamp ree dux bēngulalan, ad nēt dunujn nagüjt bén badēē ree xtiidx Dios loj ree bejn.” <sup>31</sup> Abi' con ni guin ree, rayünbeegajquidi guial loj xdiaa bén bagüjt ree bén badēē xtiidx Dios loj ree bejn zēēdidi. <sup>32</sup> ¡Gol balooxa ni guzuloj been xbēngulalidi!

<sup>33</sup> ¡Béndol, xi'n xindxab! ¿Xhienaag laadi loj castiro' ni yu' gabijl? <sup>34</sup> Zeel gaxhalan lojdi bén gudēē ree xtiidx Dios, bén rajc ree nē ree mextr. Per yu' reeman gugüjtidi, yu' reeman gucaadi loj crüjz, yu' tēē reeman quindi lēn ree xyadoodi abi' sunalidi laa reeman guiedx por guiedx din güündi laa reeman xhienin. <sup>35</sup> Zianan zeel guijquidi yab xtól gra ree bén bagüjt bén goc ree benza'c diizd Abel bén guban xnejz loj Dios xt Zacarías xi'n Berequías, bén bagüjt reeman lule' yadooro' Jerusalén. <sup>36</sup> Diidxliczi rnin lējt, xcasti gra ree ni guin yab guijc ree bén riga' loj guidxliuj yan.

### *Roon Jesús por Jerusalén*

*(Lc. 13:34-35)*

<sup>37</sup> Rëb tēē Jesús:

—¡Bén Jerusalén, bén Jerusalén, rugüjtidi bén rudēē ree xtiidx Dios loj ree bejn abi' rucaaguiajdi bén rxhiaal Dios lojdi! ¡Bēlczi volt guyēnan nuchagan lasa'di, zi'c rüjn tijb guid ruchajg lasa' ree xi'nb lēn xhiilib, per ad gutiējbtidi! <sup>38</sup> Zianan zeel yaya'n ladxidi zi'c tijb guiedx lod achut zojb. <sup>39</sup> Abi' rnin lējt diizd yan ad zuguaatrudi naj, xt chi guidxin dxej guiēbidi: “¡Nüjnle' Dios bén guxhaalaman!”

## 24

### *Rëb Jesús guial yaze'n yadooro'*

*(Mr. 13:1-2; Lc. 21:5-6)*

<sup>1</sup> Chi barii Jesús lēn yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. <sup>2</sup> Abi' rēb Jesús loj reeman:

—Diidxliczi rnin, gra ni cuguiaadi yu' dxej ni'qui tijb guiaj guin ad zaya'nt guijc stijban, gran yaze'n.

### *Ni gac chi gad guidxliuj nit*

*(Mr. 13:3-23; Lc. 21:7-24; 17:22-24)*

<sup>3</sup> La'tgaj zojb Jesús guijc guia' la Olivos, gubig ree xbejnman lojman, rēb reeman:

—Rayënan nal goc gac zian. ¿Xhie ree sen gac chi ma zidyob gui'til stijb, në chi ma zidyob nit guidxliuj?

<sup>4</sup> Dxel rëb Jesús loj reeman:

—Gol gojp cudad achu gusquiee lëjt. <sup>5</sup> Din zien ree bejn gui't guiëb reeman guial por naj zëed reeman, guiëb tëë reeman: “Naj naj Cristo”, abi' zien bejn gusquiee reeman. <sup>6</sup> Per lëjt chi guiguiejndi cayajc wadijl o zëëb diidx guial gac wadijl, ad guidxebidi din zian naj gac. Per ad wadxint dxej nit guidxliuj. <sup>7</sup> Din til nacion con stijb nacion, në bën rajp guialrniabee con stijb bën rajp guialrniabee. Abi' gui't xudoxh në gubijn niz ni niz guie. <sup>8</sup> Gra ree nine ree gac chi ma suloj guialzi guin.

<sup>9</sup> 'Dxel yayü ree bejn lëjt loj ree bën gusagzi lëjt, gugüjt reeman lëjt, abi' gra ree bénguidxliuj guidxe'ch lëjt guial najdi da bejnan. <sup>10</sup> Chi gac zian zien ree bejn gusa'n guialrliladx reeman naj, guidxe'ch lasa' reeman abi' yayü lasa' reeman loj ree bën ralen laa reeman. <sup>11</sup> Gui't tëë zien ree bën gusquiee, guiëb reeman guial rudëed reeman xtiidx Dios, abi' zien bejn gusquiee reeman. <sup>12</sup> Abi' guial dád zien ni mal gac, zien da't bën ad zëntri ree lasa'. <sup>13</sup> Per bën sudxi'ch loj guialrliladxaman naj, xt dxej chigra guibanman, laaman yayal xanyabaa. <sup>14</sup> Abi' xtiidx Dios ni canin lëjt yan guire'chan guidibczi guidxliuj din gagbee gra bejnan, dxelri nit guidxliuj.

<sup>15</sup> 'Zianan zeel chi guguaadi zobj tijb ni dxuudx, ni ad rüjnt sirv lën yadooro' Jerusalén, zi'c gunee Daniel bën badëë xtiidx Dios loj ree bejn (bën gool gui'ch guie ree, gol bignia'), <sup>16</sup> guial bën zobj ree Judea rayal guxüün reeman che reeman dajn. <sup>17</sup> Guiáad ree bën yë'p guijc yulidx dxejzii, ad yayu lënülix reeman par tia' xhie xieen reeman. <sup>18</sup> Abi' ree bën za' dajn, ad yayejc reeman chigxii xab reeman. <sup>19</sup> ¡Probza ree béngunaa nüü xi'n o bën ca' ree xindobëz lën ree dxejzii! <sup>20</sup> Gol gurejdx gunab Dios chitëë gac zian tiamp nayaag o dxej raziiladx ree bejn ya. <sup>21</sup> Din nadxel dád guialziro' chu', zi'c ad wayajctczi diidx guia'xchej chi gad guidxliuj gacchaaw ad yu' tëët dxej gac zian. <sup>22</sup> Abi' bal id Dios gucwëëz guialzi chu' lën ree dxej guin, ni'qui tijb bejn ad zalaat, per gucwëëzaman laa reen por ree bën guleman.

<sup>23</sup> 'Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi. <sup>24</sup> Din zi't zien ree bën gusquiee na guial laa reeman naj bën guxhaal Dios o na reeman guial laa reeman naj bën rudëed xtiidx Dios. Abi' züjn reeman milagr ree në graløj ni yadxaløj bejn din gusquiee reeman laa reeman, abi' bal zile'n xt në ree bën gulej Dios gusquiee reeman. <sup>25</sup> Ma rni xgajn lojdi ni gac. <sup>26</sup> Zeel bal chu na lojdi: “Gol baguiaa laa Cristo za' niz loj yujbidx”, ad bal chedi o na reeman lojdi: “Laa Cristo yu' lënü ni”, ad bal chililadxidi. <sup>27</sup> Din zi'c chi rë'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bén guxhaal Dios stijb. <sup>28</sup> Bén rliladx ree naj gui't reeman lon, zi'c chi rado'p ree golbich lod naga' tijb begüt.

### *Gui't Bén guxhaal Dios stijb*

(Mr. 13:24-37; Lc. 21:25-33; 17:26-30, 34-36)

<sup>29</sup> 'Chi ma gudëd ree dxej ni gac ree guialzi guin, guicajy loj gubijdx, ad zusnit bëëw, guiyajb ree bajl xanyabaa abi' gra ree ni yu' xanyabaa guiniib. <sup>30</sup> Dxel guiguien tijb sen xanyabaa guial ma gui't Bén guxhaal Dios. Abi' gra ree bénguidxliuj goon da't chi guguaa reeman Bén guxhaal Dios, rdiinman bacha' zëëdaman loj zaj con xguialrniabeeman. <sup>31</sup> Dxel guixhiaal ree xianjlaman, abi' rejs da't gucwejdx reeman trompejt, din yadxajc lasa' ree bën guleman, bën za' ree gralad guidiblagaa guidxliuj.

<sup>32</sup> 'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëed tiamp nalaa. <sup>33</sup> Ziangajc chi guguaadi ma cayajc ree ni guin, gagbeedi guial ma zidyob gac zi'c rnin lëjt. <sup>34</sup> Diidxliczi rnin lëjt guial gra ree ni guin gac chi gad ree bën naban yan guiët. <sup>35</sup> Guidxliuj në xanyabaa zanjttan.

<sup>36</sup> 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.



<sup>37</sup> 'Zi'c goc gulal chi guban Noé, zian gac chi yaguaaad Bén guxhaal Dios. <sup>38</sup> Din chi gad Dios guixhiaal guiadoxh loj guidxliuj, bejn ree, raw reeman, rë' reeman, ruxhliaa reeman, rudëë tëë xi'n reeman ruxhliaa, xt chi bidxin dxej guyu Noé lën barcwro' ni beenman. <sup>39</sup> Abi' ad bidxgatczi reeman, dxejlczi gol guiadoxh abi' zinë nijs laa reeman, ziangajc gac chi yaguaaad Bén guxhaal Dios. <sup>40</sup> Dxej guin, lod za' tio'p ree xinguaaw dajn, tijbix yaza, stijbix yaya'n. <sup>41</sup> Guiáad lod cayojt tio'p ree béngunaa, tijbaman yaza, stijbaman yaya'n. <sup>42</sup> 'Zeel gol guzujsin din ad ragbeetidi xhie dxej yaguaaad xDadidi. <sup>43</sup> Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwax, zabejnaaman abi' ad zatiëjbtaman chu' xingubaan guin lidxaman. <sup>44</sup> Zianan zeel gol guzujsin, din ad ragbeetidi dxejlczi yaguaaad Bén guxhaal Dios.

### *Mojs za'c në mojs gujdx*

(Lc. 12:41-48)

<sup>45</sup> '¿Chu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor? <sup>46</sup> Xiquilbaa mojs cayüjn dxiin zi'c rayal chi yadxin xpatronx. <sup>47</sup> Din diidxliczi rnin lëjt, patron guin zusa'n gra xieenman loj mojs guin. <sup>48</sup> Per bal naj mojs guin mojs dxuudx, naladxix: “Zaglaari da patronan.” <sup>49</sup> Zianz suloj gusagzix los demazri ree mojs guin, suloj gawix, guië'në tëëx xingu' ree. <sup>50</sup> Abi' yadxin xpatronx tijb dxej ni ad ragbeetix ad rbëz tëëtix laaman. <sup>51</sup> Dxel dád castiro' gudëëd patron guin laax, guixhiaal tëëman laax lod rayal ree bén rusquiee, lod goonx gaw tëë layix.

## 25

### *Xcwent chii biinxdüb*

<sup>1</sup> Basnuu Jesús rëbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin. <sup>2</sup> Gaay reem been xgab xhie güün reem, per za gaay reem ad beent xgab. <sup>3</sup> Biin ad beent ree xgab guin binë xguij reem per ad binët reem mazri sejt ni che'cnë ree guij guin. <sup>4</sup> Guiáad ree biin been xgab guin xhie güün reem, binë reem za tib lumejtgaj sejt con xguij reem. <sup>5</sup> Abi' guial goglaa badxin xinruxhliaa guin, bi't bacaal loj gra reem, abi' goodyëjs reem. <sup>6</sup> Cost garol guiaal, biguien cha' tijb bejn rëbaman: “¡Laa xinruxhliaa guin ma ziaad, gol tagchaaglojx!” <sup>7</sup> Dxel bixche gra ree biinxdüb guin, abi' beenchaaw xguij reem. <sup>8</sup> Abi' gaay ree biin ad beent xgab guin xhie güün reem, rëb reem loj za gaay biin been xgab guin: “Gol baneesii tibda'n xsejtidi, din dux guijn ma cayü' reen.” <sup>9</sup> Per badxi' reemin rëb reem: “Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc.” <sup>10</sup> Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin guyunë reem laax loj guialruxhliaa guin dxel bida'cw ro' port. <sup>11</sup> Dxel chi badxin za gaay biin bisii ree sejt guin, rëb reem: “¡Dad, dad, guxhal din yadxu'n!” <sup>12</sup> Per badxi'xan rëbix: “Diidxliczi rnin, ad nünbeetan lëjt.”

<sup>13</sup> Dxel basnuu Jesús rëbaman:

—Zeel gol guzusin din ad ragbeetidi goc yaguaaad Bén guxhaal Dios.

### *Xcwent bén badëëd milia*

<sup>14</sup> Dxel rëb tëë Jesús:

—Xguialrniabee Dios naj zi'c tijb Bén ma grii cheman zijt, abi' gurejdx ree xmojsaman, basa'n xmiliaman loj reeman. <sup>15</sup> 'Loj tijbaman badëëman gaay mil cintabl, loj zatijbaman badëëman zatio'p milan, guiáad loj zatijbaman badëëman za timilan. Loj tijbgaj reeman badëëdaman ni naladxaman zajc güünnë reeman dxiin, dxel briitaman zëman zijt. <sup>16</sup> Abi' mojs cwa' gaay mil cintabl guin beennëman laan dxiin abi' beenman gan za ziant gajcan. <sup>17</sup> Ziangajc been mojs cwa' tio'p milan, beenman gan za tio'p mil gajcan. <sup>18</sup> Per mojs cwa' timil cintabl guin bitëënman luyuj persi baquie'chaman cintabl guin ni badëëd xpatronman.

<sup>19</sup> 'Gojc xchej da't dxel badxin patron guin abi' babëëman cwent con la reeman. <sup>20</sup> Yaløj bidxin mojs cwa' gaay mil cintabl guin abi' bayüman zagaay milan, rëbaman: “Dad, lüj

banee gaay milan lon, yan, laa za gaay milan guie ni benan gan.” <sup>21</sup> Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj.” <sup>22</sup> Zianz bidxin mojs cwa' zatio'p mil cintabl guin rëbaman: “Dad, lüj banee tio'p milan lon, yan, laa zatio'p milan guie ni benan gan.” <sup>23</sup> Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj.”

<sup>24</sup> 'Per chi bidxin mojs cwa' timil cintabl guin, rëb loj xpatronman: “Dad, naj ragbee guial ad rayatil bejn, rabëël guialnaza'c lod ad rgu'til bin, rato'p tëël guialnaza'c lod ad rtie'chtil bin. <sup>25</sup> Zeel bidxeban abi' biquiechan xmilial lën liuj, yan, laa xmilial guie.” <sup>26</sup> Badxi' patron guinan, rëbaman: “Mojs mal, mojs ploj, bal ragbeel rabën guialnaza'c lod ad rgu'tan bin, ratop tëën guialnaza'c lod ad rtiechtan bin. <sup>27</sup> Adil nilu' da milian lën bancw, din chi naguialan naca'n'an con xi'n'an ni beenan gan.” <sup>28</sup> Dxel rëb patron guin loj ree bën za' yagaj: “Gol biquied timil cintabl guin lojx, gol badëëdan loj xin rajp chii milan. <sup>29</sup> Din bën rajp zaca'man mazri, abi' gapaman zro' da't, per bën rajp ta'nzi, xt ni rajpaman chiquied lojman. <sup>30</sup> Abi' mojs ad rünjt sirv guin gol bazaalix xchuni lod nacay, lod goonx, lod gaw tëë layix.”

### *Xguialguxtis Jesús*

<sup>31</sup> 'Chi gui't Bén guxhaal Dios, gui'taman con xguialrniabeeman, në con gra ree xianjlaman din cweman lod nabeeman. <sup>32</sup> Dxel gra ree bénguidxliuj yado'p lojman, abi' cweman laa reeman zi'c rüjn tijb bën rajp xiil chi rabëëcaman xiil ree loj ree dxib. <sup>33</sup> Abi' guzujman bën naj ree xbejnman xladbeeman, guiáad ree bën ad najt xbejnman guzujman xladruvejsaman. <sup>34</sup> Dxel guiëb rey guin loj ree bën za' xladbeeman: “Gol guda bën ma nünle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj. <sup>35</sup> Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'n'an. <sup>36</sup> Chi byaadx da xaban, lëjt banee ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj.” <sup>37</sup> Dxel guiëb ree bën za' ladbee guin: “Dad, ¿goc baguiaan lüj rliaanl, abi' baneen ni gudawil?, ¿o goc baguiaan lüj we'quil nijs, abi' baneen nijs gu'l? <sup>38</sup> ¿Goc baguiaan lüj zizal zi'c tijb benzit, abi' baneen lod baya'nl, o goc biyaadx xabil, abi' baneen ni gotil? <sup>39</sup> ¿Abi' goc baguiaan lüj ragxuul, o guyul ladxguiib, abi' budganajn lüj?” <sup>40</sup> Dxel guiëb rey guin loj reeman: “Diidxliczi rnin lojdi, gra yudar beendi da bejn reen majsi ad najt reeman bën lasajc, najn beendi yudar.”

<sup>41</sup> 'Dxel guiëbaman loj ree bën za' xladruvejsaman: “Gol biquied lon, benmal gol chej loj bajl ni ad yu't dxej yayü' ni ma naj par xindxab në ree xbejnx. <sup>42</sup> Din chi gulaanan, ad baneetidi ni niawan, chi we'can nijs, ad baneetidi ni nië'n. <sup>43</sup> Chi bizaan zi'c benzit, ad baneetidi lod naya'n'an, chi biyaadx da xaban, ad baneetidi ni nia'cwan. Abi' chi gogxuun në chi guyu'n ladxguiib, ad bidganajtidi naj.” <sup>44</sup> Dxel guiëb reeman lojman: “Dad, ¿goc baguiaan lüj rliaanl o re'quil nijs, o zizal zi'c tijb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxga'tan lüj?” <sup>45</sup> Abi' yadxi'man laan guiëbaman: “Diidxliczi rnin lëjt, gra ni ad beentidi din nünjdi yudar da bejn reen majsi ad najt reeman bën lasajc, najn ad beentidi yudar.” <sup>46</sup> Laa reeman yayal loj casti tiblayaa, guiáad ree bën been zi'c rayal, laa reeman rayal guialnaban tiblayaa con Dios.

## 26

### *Baya'n reeman diidx xhienaag guiniaaz reeman Jesús*

(Mr. 14:1-2; Lc. 22:1-2; Jn.11 :45-53)

<sup>1</sup> Chi gulox gunee Jesús diidx guin ree, dxel rëb loj ree xbejnman:

<sup>2</sup> —Lëjt ragbee guial ryaadx zatio'p dxejzi guial guidxin lanij pascw, abi' Bén guxhaal Dios yayü ree bejn laaman din tiaman loj crüzj.

<sup>3</sup> Lën ree dxejzii badxaag lasa' ree bixhioz rniabee ree bixhioz, con xguxtis ree bën Israel, lidx Caifás quijb bixhioz zobjloj. <sup>4</sup> Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjt reeman laaman. <sup>5</sup> Per rëb reeman: —Ad zaguieent ree zian loj lanij guin chitëë gac naquie' luguiedx guin.

*Ruroob tijb béngunaa perfum guijc Jesús*

*(Mr. 14:3-9; Jn.12 :1-8)*

<sup>6</sup> Chi za' Jesús luguiedx Betania lidx Simón, bën rniee reeman Leproso, <sup>7</sup> bidxin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zobj Jesús xan mex, baroobaman perfum guin guijc Jesús. <sup>8</sup> Chi baguiaa ree xbejn Jesús ni been béngunaa guin, dád bidxe'ch reeman, abi' rëb reeman:

—¿Chexc zeel bixie' perfum guin? <sup>9</sup> Zile' nido'n zro' da't din nüjnan yudar bënprob ree.

<sup>10</sup> Chi biguiejn Jesús ni canee reeman, rëbaman loj reeman:

—¿Chexc zeel rdxe'chidi béngunaa guin? Zagdxé naj ni beenman naj. <sup>11</sup> Din bënprob guin ree zianczi za'në reeman lëjt, sa'n naj ad ziantczi gazunë'n lëjt. <sup>12</sup> Abi' ni baroobaman perfum guin guican, rën guiëban guial ma beenchaaw xgajman naj par chi guiguie'chan. <sup>13</sup> Diidxliczi rnin, bantëëz guin guire'ch xtiidxza'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

*Rayü Judas Jesús*

*(Mr. 14:10-11; Lc. 22:3-6)*

<sup>14</sup> Loj guidxiptio'p ree xbejn Jesús, bën la Judas Iscariote, bigneenëman bixhioz rniabee ree bixhioz, <sup>15</sup> rëbaman loj reeman:

—¿Plac guneedi din yanen Jesús lojdi?

Abi' badëëd reeman gajlbichii milia plajt lojman. <sup>16</sup> Diizd dxejzii guzulojman raguila-man mod xhienaag yayüman Jesús.

*Gudawnë ree xbejn Jesús xche*

*(Mr. 14:12-25; Lc. 22:7-23; Jn.13 :21-30; 1Co.11 :23-26)*

<sup>17</sup> Dxej ni guzuloj lanij ni raw ree bejn guidxtil ni ad yu't levadur, gubig ree xbejn Jesús lojman, rëb reeman:

—¿Ban guin rën'l yaguieenchaawan ni yadaaw ree guxhin lanij pascw?

<sup>18</sup> Badxi' Jesúsán rëbaman:

—Gol chej Jerusalén lidx bën guin, gol biguiedx lojman: “Na Mextr: Ma bidxin xihoraman abi' rënman tëdaman pascw lidxil con ree xbejnman.”

<sup>19</sup> Dxel been ree xbejnman zi'c rëbaman, been tëë reeman ni gaw reeman guxhin lanij pascw.

<sup>20</sup> Chi gure guiaal, zobj Jesús xan mex con guidxiptio'p ree xbejnman. <sup>21</sup> Abi' la'tgaj cayaw reeman, rëbaman loj reeman:

—Diidxliczi rnin, tijb gajc lëjt yayü naj.

<sup>22</sup> Abi' dád guyunaya reeman, zianz guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

<sup>23</sup> Badxi' Jesúsán, rëbaman:

—Bën cayaw loj pliajt ni cayaw gajcan, laaman yayü naj. <sup>24</sup> Walican, Bën guxhaal Dios naj guial sacaman zi'c rëb loj xtiidx Dios. Per ¡proba bën yayü laaman!, zagdxeli naj par laaman ad niutaman loj guidxliuj.

<sup>25</sup> Dxel Judas bën yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

<sup>26</sup> La'tgaj cayaw reeman, cwa' Jesús guidxtil, badëëdaman quixtëë loj Dios. Dxel gula'man guidxtil guin gudi'saman laan loj ree xbejnman, rëbgajman:

—Gol gudaw guidxtil guie, laan naj da cuerpan.

<sup>27</sup> Dxel cwa'man tib cojp vin, chi gulox badëédaman quixtëe loj Dios, badëédaman cojp guin loj reeman, rëbgajman:

—Gol gu' gradi loj cojp guie. <sup>28</sup> Din laan naj da rejnan ni gaxhie'n chi guiëtan por zien ree bénguidxliuj. Din por da guialgüjtan guixal tijb nejz cüb xhienaag gap ree bejn perdon loj Dios por xtol reeman. <sup>29</sup> Abi' diidxiczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

*Rëb Jesús guial guiëb Bëd ad nünbeetaman laaman*

(Mr. 14:26-31; Lc. 22:31-34; Jn.13 :36-38)

<sup>30</sup> Chi gulox biil reeman tijb cant par Dios, dxel zë reeman guijc guia' Olivos. <sup>31</sup> Abi' rëb Jesús loj reeman:

—Gradi zabëeladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxel guire'ch ree xiil guin.” <sup>32</sup> Per chi yabanan, yaloj naj ganeed ga gajn Galilea dxelri gui'tidi.

<sup>33</sup> Dxel rëb Bëd lojman:

—Majsi gra reeman cwëeladx lüj per naj ad yu't dxej gabëladxan lüj.

<sup>34</sup> Per rëb Jesús lojman:

—Diidxiczi rnin lojl, yan guxhin gajc chi gad guid cwidxa', mal rëbil choon volt guial ad nünbeetil naj.

<sup>35</sup> Abi' rëb Bëd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

*Gurejdx gunab Jesús Dios lod la Getsemaní*

(Mr. 14:32-42; Lc. 22:39-46)

<sup>36</sup> Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabedx ganaaban Dios.

<sup>37</sup> Dxel zinëman Bëd con grop ree xi'n Zebedeo, zianz guzuloj cayunayaman abi' ad nixtri yu' luxdooman. <sup>38</sup> Zianz rëbaman loj reeman:

—Dád yu'naya luxdoon, rülüü ma gugüjt guialyu'naya guin naj. Gol baya'n guie ad gaayëjsidi.

<sup>39</sup> Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëel naj loj guialzi ni gadëedan, per ad gac zi'c rënan, gac zi'c rënl.

<sup>40</sup> Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbaaalidi ya, din sunëdi naj? <sup>41</sup> Gol batie'ch xbaaalidi gol gurejdx gunab tëe Dios, chitëe güün xindxab lëjt gan, din rënquidi güüendi zi'c rayal, per xcuerpidi ad rtiëjbtan.

<sup>42</sup> Ni barojp volt wejman gurejdx gunabaman Dios, rëbaman:

—Dad, bal id zile' téd guialzi ni naj gadëedan, bal rüjn naguiejn gadëedanan gacri zi'c rënl.

<sup>43</sup> Chi badxinman lod za' ree xbejnman stijb, laa reeman naayëjs guial dád guidxa bacaal loj reeman. <sup>44</sup> Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. <sup>45</sup> Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëedi? Guiáad Bén guxhaal Dios ma bidxin hor yayü reeman laaman loj ree bëndol. <sup>46</sup> Gol bixche, yo' ree, gol baguiaa laa bën yayü naj ma zëed gajxh.

*Gunaaz reeman Jesús*

(Mr. 14:43-50; Lc. 22:47-53; Jn.18 :2-11)

<sup>47</sup> Sta caneenë Jesús bën naj ree xbejnman, chi bidxin Judas bën naj gajc tijb xbejn Jesús. Bidxinnëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree bën Israel laa reeman. <sup>48</sup> Abi' Judas bën bayü laaman mal

rëbxgajman loj ree bën guin: “Bén gawan xid xhajg, laaman raguiilidi, gol gunaazaman.”

<sup>49</sup> Chi bidxin Judas bibigaman loj Jesús, dxel rëbaman:

—¡Xchan, Mextr!

Laa gudaw gajcaman xid xhajgaman.

<sup>50</sup> Abi' rëb Jesús lojman:

—Judas, been ni zidguieenl.

Dxel gubig ree bën guin, gunaaz reeman Jesús persi zinë reeman laaman.

<sup>51</sup> Per tijb ree bën za'në Jesús yagaj, gulëë xiespadaman dxel gutü'man guidiajg xmojs quijb bixhioz zobjloj. <sup>52</sup> Dxel rëb Jesús lojman:

—Bagu'chaaw xiespadil xluaran. Din bën rdil con espad, con espad rëjtaman. <sup>53</sup> ¿Wen, id ragbeel ya guial zajc gabedx ganaab da Dadan, abi' laa guixhiaal gajcaman por mil ree xianjlaman din gagnë reeman naj? <sup>54</sup> Per ¿xozza gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

<sup>55</sup> Loj hor guin gajc rëb Jesús loj ree benzien guin:

—¿Chexc zeel zëédidi con espad në con yag din guiniaazidi naj zi'c tijb xingubaan? Guixie guixie guzunë'n lëjt lën yadooro' Jerusalén balün lëjt xtiidx Dios, abi' ad gunaaztidi naj. <sup>56</sup> Per gra ree ni guie cayajc din gac cumplid ni bacaa ree bën badëë xtiidx Dios loj ree bejn.

Loj hor guin gajc baxüün ree xbejn Jesús, guro'nladx reeman laaman.

### *Za' Jesús loj ree guxtis Israel*

(Mr. 14:53-65; Lc. 22:54-55, 63-71; Jn.18 :12-14, 19-24)

<sup>57</sup> Bén gunaaz ree Jesús binë reeman laaman lidx Caifás, quijb bixhioz zobjloj, yagaj badxaag lasa' ree mextr rajc ley con ree xguxtis ree bën Israel. <sup>58</sup> Abi' Bëd zijt zijt nalaman Jesús, xt lule' lidx bixhioz guin. Dxel guyuman abi' gurejnëman bën rajp ree lidx bixhioz guin, din guguaaman xhie güünnë ree bën guin Jesús.

<sup>59</sup> Guiáad ree bixhioz rniabee ree bixhioz con gra ree guxtis guin raguiil reeman xhie gusquiee reeman din gutedia' reeman Jesús din nabee reeman guiëtaman. <sup>60</sup> Per ad radxejlt xhienaag gutedia' reeman laaman majsi zien ree bën basquiee. Dxel bibig zatio'p reeman, <sup>61</sup> rëb reeman:

—Bén guie rëb: “Zile' yase'n nan xyadoo Dios abi' loj choon dxejzi yayünanan.”

<sup>62</sup> Dxel guzuli quijb bixhioz zobjloj guin, rëbaman loj Jesús:

—¿Nid zadxi'lan ya? ¿Waliqui ni canee ree bën guin contr lüj ya?

<sup>63</sup> Per achet rëb Jesús. Dxel rëb bixhioz guin lojman:

—Por Dios bën naban, rniabeen lüj guna diidxli. Guna bal lüjn naj Cristo, Xi'n Dios.

<sup>64</sup> Badxi' Jesús rëbaman:

—Waliquil. Rni tëën lëjt, zuguaadi Bén guxhaal Dios zobjbaman xladbee Dios bën rajp guialrniabee abi' zuguaa tëëdi gui'taman loj zaj xanyabaa.

<sup>65</sup> Chi biguiejn bixhioz guin zian, gudixya' xabaman, rëbaman:

—Diosan canee guijdx bën guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rnieeguijdxaman Dios. <sup>66</sup> Yan, ¿xhie nadi?

Badxi' ree bën guinan rëb reeman:

—Rayal guiëtix.

<sup>67</sup> Dxel bacojp xhiejn reeman lojman, gudijn reeman laaman, yu' tëë reeman wëëz ro'man, <sup>68</sup> rëb reeman lojman:

—Bal lüjn naj Cristo, guneeya' chu gudin lüj.

### *Rëb Bëd ad nünbeetaman Jesús*

(Mr. 14:66-72; Lc. 22:56-62; Jn.18 :15-18, 25-27)

<sup>69</sup> La'tgaj zobj Bëd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, bën Galilea.

<sup>70</sup> Per Bëd gurexuman, rëbaman niz loj gra reeman:

—Ad ragbeetan xhienin rnieel.

<sup>71</sup> Chi zëman niz ro' port baguiaa stijb biin rüjn dxiin yagaj laaman, abi' rëbim loj ree bën riga' yagaj:

—Në bën guin nal Jesús bën Nazaret.

<sup>72</sup> Per Bëd gurexuuman stijb, xt baza'taman Dios, rëbaman:

—Ad nünbeetan bën guin.

<sup>73</sup> Dxel ad gojct xchej, gubig ree bën riga' yagaj loj Bëd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rnieel.

<sup>74</sup> Per Bëd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bën guin.

Hor guin gajc guridxa' tijb guid. <sup>75</sup> Abi' basaaladxaman guial rëb Jesús lojman: “Chi gad guid cwidxa', mal rëbil choon volt ad nünbeetil naj.” Dxel barii Bëd yagaj abi' dád naya biinman.

## 27

### *Binë reeman Jesús loj Pilato*

(Mr. 15:1; Lc. 23:1-2; Jn.18 :28-32)

<sup>1</sup> Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús. <sup>2</sup> Dxel guxhii reeman laaman abi' binë reeman laaman loj gobernador Pilato.

### *Güjt Judas*

<sup>3</sup> Dxel Judas, bën bayü Jesús, chi baguiaaman guial ma naj guiët Jesús, gyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, <sup>4</sup> rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhieczi yaguieenan, ¡lüj gunaj!

<sup>5</sup> Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

<sup>6</sup> Dxel bato'p ree bixhioz rniabee guin milia guin, abi' rëb reeman:

—Ad rayalt yadx'e ree milia guin lën lod ru gon, din con laan bio' bën guiët.

<sup>7</sup> Dxel be reeman diidx, abi' con milia guin guzii reeman xguidxliuj bën rüjn trast bajn ree, din gacan lod guiguie'ch ree benzit. <sup>8</sup> Zeel xt yan la guidxliuj guin Yuj Rejn. <sup>9</sup> Zian gojct cumplid ni gunee Jeremías, bën badëe xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bën Israel lasajcaman, <sup>10</sup> abi' con milia guin guzii reeman xguidxliuj bën rüjn trast bajn ree, zi'c gunabee Dios naj.”

### *Rniabdiidx Pilato loj Jesús*

(Mr. 15:2-5; Lc. 23:3-5; Jn.18 :33-38)

<sup>11</sup> Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bën Israel ya?

Badxi' Jesús, rëbaman:

—Najcan.

<sup>12</sup> Abi' chi cutedia' ree bixhioz rniabee ree bixhioz con ree guxtis Israel laaman, achetczi radxi'man. <sup>13</sup> Dxel rëb Pilato lojman:

—¿Nid riguejnl gra ni canee reeman contr lüj ya?

<sup>14</sup> Per Jesús ni'qui tijb diidx ad badxi'taman, zeel dád badxa loj gobernador guin.

### *Gunabee reeman guiët Jesús*

(Mr. 15:6-20; Lc. 23:13-25; Jn.18 :38-19:16)

<sup>15</sup> Lën ree dxej lanij, ruslaa gobernador Pilato tijb bën yu' ladxguiib bën guiëb ree bénguiedx guin laa, zi'c naj xcostumbr reeman. <sup>16</sup> Lën ree dxejzii yu' Barrabás ladxguiib,

tijb b n n nbee ree bejn niz ni niz guie. <sup>17</sup> Abi' chi badxaag lasa' gra ree bejn, gunabdiidx Pilato loj reeman, r baman:

—  Chu r ndi guslaan?  Barrab s ya, o Jes s, b n r b ree bejn naj Cristo?

<sup>18</sup> R baman zian guial gogbeeman ganaxzi guialnad dlojn zeel bay  reeman Jes s.

<sup>19</sup> La'tgaj zobj Pilato lod r jnman guialguxtis, bidxin xruson lacheelaman, r baman lojman: “Adxhie g  nn l b n guin achet dol rajpaman, din d d nadxuudx gune'xchalan laaman nuche.”

<sup>20</sup> Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrab s, gui ad Jes s gui etaman. <sup>21</sup> Gunabdiidx Pilato loj reeman stijb, r baman:

—  Chu loj grop reeman r ndi guslaan?

Badxi' reeman laan r b reeman:

— Barrab s.

<sup>22</sup> Abi' r b Pilato loj reeman:

—  Xhieza g nn 'n Jes s, b n r b ree bejn naj Cristo?

Badxi' gra reeman laan r b reeman:

—  Bacaaman loj cr jz!

<sup>23</sup> Abi' r b Pilato loj reeman:

—  Xhieza ni mal beenman?

Per laa reeman mazri rejs rbixdiaj reeman, r b reeman:

—  Bacaaman loj cr jz!

<sup>24</sup> Chi baguiaa Pilato guial achet rile' g  nman, al mazri naquie' cay jn ree b n guin, dxel cwa'man nijs abi' banaaman delant loj gra reeman, r baman:

— Achet dol ra'pan guial gui t b n guie, xcwentidan.

<sup>25</sup> Badxi' gra ree b n guinan r b reeman:

—  Du guiican, n  guijc du xi'nan cwiban guial gui taman!

<sup>26</sup> Dxel baslaa Pilato Barrab s, zianz gunabeeman gudijn reeman Jes s abi' bay man laaman din gucaa reeman laaman loj cr jz.

<sup>27</sup> Zianz xsuldad ree gobernador guin bin  reeman Jes s l n palas lod bado'p gra ree suldad, gad d lod za'man. <sup>28</sup> Dxel gul  reeman xabaman bascajcw reeman laaman tijb lajd xnia. <sup>29</sup> Abi' beenchaaw reeman tijb coron gui jch badxe' reeman laan guiicaman, zianz baga's reeman tijb yag ladxaaman ladbee. Dxel bazuxib reeman lojman, ruze' reeman laaman, r b reeman:

—  Guibanri xrey ree b n Israel!

<sup>30</sup> Abi' rucojp xhiejn reeman lojman, laagajc t   yag ni ca'man rugaz reeman guiicaman. <sup>31</sup> Chi gulox baze' reeman laaman, dxel bab  reeman lajd xnia guin ladaman, bascajcw reeman xabaman, zianz zin  reeman laaman din gucaa reeman laaman loj cr jz.

*Cwa Jes s loj cr jz*

*(Mr. 15:21-32; Lc. 23:26-43; Jn.19 :17-27)*

<sup>32</sup> Chi zin  reeman Jes s, badxaagloj reeman tijb b n Cirene, laman Sim n, abi' been reeman laaman naguiejn byaaman xcr jz Jes s.

<sup>33</sup> Chi bidxin reeman tijb luar la G lgota (r n gui ban Xluar Calaver), <sup>34</sup> ni bad   reeman vin, no'chan nijs nala da't gui ' Jes s. Per chi beenman laan prueb, ad cw jbtaman ni 'man laan.

<sup>35</sup> Chi gulox bacaa reeman laaman loj cr jz, dxel gudxijt reeman suert guiic xabaman din yala' reeman laan. <sup>36</sup> Dxel gurej reeman yagaj din gap reeman laaman. <sup>37</sup> Abi' guiic cr jz guin bacaa reeman lejtr ni r b, chexc zeel cwaman loj cr jz. R b lejtr guin: “BEN GUIE NAJ JES S XREY REE BEN ISRAEL.”

<sup>38</sup> N  tio'p xin gubaan bacaa reeman loj cr jz, tijbix xladbee Jes s stijbix xladruvejsaman. <sup>39</sup> Abi' ree b n rd d, rnieeguijdx reeman Jes s, runij guiic reeman, <sup>40</sup> r bgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüjz guin.

<sup>41</sup> Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

<sup>42</sup> —Baslaax ben ren ree, abi' ad rajct ruslaa laagajquix. Bal wali najx xrey ree bén Israel, yaguiajtix loj crüjz guin, din yaliladx reex. <sup>43</sup> Rililadxix Dios. ¡Yan, guslaaza Dios laax, bal wali rënman laax, din rëbix: “Xi'n Dios najx”!

<sup>44</sup> Abi' nëgajc ree xingubaan ca cwë'man ruze' laaman.

### *Güjt Jesús*

(Mr. 15:33-41; Lc. 23:44-49; Jn.19 :28-30)

<sup>45</sup> Dxel diizd garol dxej bicajy loj guidib guidxliuj, xt raca choon wadxe. <sup>46</sup> Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëëladxil naj?

<sup>47</sup> Yu' ree bén za' yagaj, chi biguiejn reeman, rëb reeman:

—Laaman cabejdx Elías, bén badëë xtiidx Dios loj ree bejn.

<sup>48</sup> Laa baxüün gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús din guië'man laan. <sup>49</sup> Per rëb los demazri reeman:

—Basa'nx, din yaguaa ree don zidgaslaa Elías laax ya.

<sup>50</sup> Zianz gurixdiaj Jesús rejs da't stijb, dxel güjtaman. <sup>51</sup> Loj hor zii goxya' lajd nal lën yadooro' Jerusalén gojcan tio'p lala', diizd guijc guin xt guia' guin goxya'. Abi' guxu, gula' tëë ree guiajro'. <sup>52</sup> Guiáad ree baa bixal reen, abi' zien ree bejn bén naj xbejn Dios, bén ma güjt ree baban. <sup>53</sup> Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

<sup>54</sup> Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bén guin.

<sup>55</sup> Zien ree béngunaa guzanal Jesús diizd Galilea, bén been tëë ree laaman yudar, za' reeman zijt ruguiaa reeman ni cayajc. <sup>56</sup> Loj reeman no'ch María Magdalena, në Li xniaa Santiaaw con Xiëb nëtëë xniaa ree xi'ngaan Zebedeo.

### *Biguie'ch Jesús*

(Mr. 15:42-47; Lc. 23:50-56; Jn.19 :38-42)

<sup>57</sup> Chi gure guiaal, bidxin tijb benrijcw laman Xiëb, bén Arimatea, në laaman binal Jesús. <sup>58</sup> Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman. <sup>59</sup> Abi' cwa'man cuerp guin batüübaman tijb lajd naya. <sup>60</sup> Dxel biquie'chaman laaman lën tijb baa cüb ni gudëënman par laagajcaman lën tijb guiaj. Zianz basiaawaman ro' baa guin con tijb guiajro', ziataman. <sup>61</sup> Abi' zobj María Magdalena con stijb bén la gajc Li, ro' baa guin.

### *Rajp ree suldad ro' xbaa Jesús*

<sup>62</sup> Chi bareguiaal, dxej raziiladx ree bejn, wej ree bixhioz rniabee ree bixhioz në ree bénfarisew, bigneenë reeman Pilato, <sup>63</sup> rëb reeman lojman:

—Dad, rasaaduladxan, chi ziz naban bén rusquiee ni, rëbaman guial chi gac choon dxej yabanman. <sup>64</sup> Zeel gunabee guiyawdxi'ch ro' baa guin xt chi gac choon dxej, chitëë gui't ree xbejnman guxhin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

<sup>65</sup> Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdxi'ch ro' baa guin zi'c rëndi.

<sup>66</sup> Abi' zë reeman, dxel basiaawdxi'ch reeman ro' baa guin. Zianz basa'n reeman suldad guin ree cayajp reeman laan.



## 28

*Raban Jesús**(Mr. 16:1-8; Lc. 24:1-12; Jn.20 :1-10)*

<sup>1</sup> Chi gudëd dxej raziiladx ree bejn, bareguiaal chidumingw, María Magdalena con stijb bën la gajc Li biquiaa reeman ro' baa guin. <sup>2</sup> Dxel bi't tijb xudoxh, guial biguiajt tijb xianjl Dios diizd xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. <sup>3</sup> Dád rliajman bacha' zi'c chi rë'p nijs, guiaad xabaman naquichbëjn. <sup>4</sup> Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. <sup>5</sup> Dxel rëb anjl guin loj ree béngunaa guin:

—Ad rdxebidi, ragbeen cayguilidi Jesús bën cwa loj crüjz. <sup>6</sup> Per achutri laaman guie, ma babanman zi'c naman. Gol guida nial din guguaadi lod gudixh reeman laaman. <sup>7</sup> Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

<sup>8</sup> Dxel cari da't baza reeman ro' baa guin rdxeb reeman rabaa tää reeman, ruxüün reeman zia reeman zicojn reeman xbejn Jesús. <sup>9</sup> La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudiidx reeman guia'man, <sup>10</sup> abi' rëbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

*Ni rëb ree suldad*

<sup>11</sup> La'tgaj zia ree béngunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc. <sup>12</sup> Dxel wej ree bixhioz rniabee guin bigneenë reeman guxtis Israel ree persi baya'n reeman diidx xhie güün reeman. Abi' dad zro' milia badëäd reeman loj ree suldad guin, <sup>13</sup> rëb reeman:

—Con gol güjdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” <sup>14</sup> Abi' bal gagbee gobernador, dunujn yaneenë' laaman chitëë xhie güünnëman lëjt.

<sup>15</sup> Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bën Israel xt yan.

*Rxhial Jesús bën naj ree apóstoles**(Mr. 16:14-18; Lc. 24:36-49; Jn.20 :19-23)*

<sup>16</sup> Guidxiptib ree xi apóstoles Jesús, wej reeman Galilea, guijc tijb guia' lod rëb Jesús che reeman. <sup>17</sup> Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. <sup>18</sup> Dxel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj. <sup>19</sup> Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, <sup>20</sup> gol balüü tää reeman din guzoob reeman diidx gra ni ma rnin lëjt. Abi' naj gazunë' lëjt gradxajczi xt chi nit guidxliuj. Amén.

## Xtiidxza'c Jesucrist ni bacaa San Marcw

*Rzuloj Waj rulüüman xtiidxza'c Jesucrist*

(Mt. 3:1-12; Lc. 3:1-9, 15-17; Jn.1 :19-28)

<sup>1</sup> Ze guzuloj xtiidxza'c Jesucrist, Xi'n Dios.

<sup>2</sup> Guyu tijb bén badëë xtiidx Dios loj ree bejn brii lajman Isaías, bacaaman xtiidx Dios, rëbaman:

Naj rxhial tijb bén ned lojl,

bén güünchaaw xnejzil.

<sup>3</sup> Rguien cha' tijb bén rbidxa' loj yujbidx, rëbaman:

“Gol beenchaaw xnejz dux Dad ree, gol guxhal tijb nejz nali.”

<sup>4</sup> Zian bi't Waj bén baroobnijs bejn ree, guzuman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman. <sup>5</sup> Gra ree bén zojb niz Judea, në ree bén Jerusalén brii reeman zicaagdiajg reeman ni rniee Waj, abi' rxhioobdol reeman. Zianz ruoobnijs Waj laa reeman loj guiiw Jordán.

<sup>6</sup> Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn. <sup>7</sup> Chi guneenëman bejn ree, rëbaman:

—Xichan zëëd tijb bén mazri zojbloj guial lon, ni'qui xgurëchaman ad zajct gaxhiecan guial mazri zojblojman guial lon. <sup>8</sup> Naj curoobnijs lëjt con nijs, per laaman guroobnijs lëjt con xSprijt Dios.

*Rirobnijs Jesús*

(Mt. 3:13-17; Lc. 3:21-22)

<sup>9</sup> Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiiw Jordán. <sup>10</sup> Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman. <sup>11</sup> Dxel biguien cha' bejn xanyabaa, rëbaman:

—Lüj naj da Xi'nan, rënan lüj rabaanë' tëën lüj.

*Been xinxab Jesús prueb*

(Mt. 4:1-11; Lc. 4:1-13)

<sup>12</sup> Dxel binë xSprijt Dios Jesús loj yujbidx. <sup>13</sup> Ni guzuman tiuu dxej tiuu guiaal, loj ree bedoxh. Abi' been xinxab laaman prueb chitëë nuzoobaman xtiidx Dios, guiáad ree xianjl Dios gunaj laaman.

*Rzuloj Jesús rulüüman bejn ree niz Galilea*

(Mt. 4:12-17; Lc. 4:14-15)

<sup>14</sup> Chi mal guyu Waj ladxguiib, wej Jesús niz Galilea bigneeman xtiidxza'c Dios, <sup>15</sup> rëbaman:

—Ma bidxin dxej zëëd xgualrniabee Dios gajxh, zeel gol bayüjn xgab por xtolidi, gol bililadx tëë xtiidxza'caman.

*Rbejdx Jesús tajp ree bén gac xbejnman*

(Mt. 4:18-22; Lc.5:1-11)

<sup>16</sup> La'tgaj caza Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl. <sup>17</sup> Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

<sup>18</sup> Loj hor guin gajc basa'n guijxh rniaaznë reeman bëjl persi zinal reeman Jesús.

<sup>19</sup> Guzaman zatibda'n, dxel baguiaaman Jacob con Waj bén naj ree xi'n Zebedeo, yu' reeman loj barcw rayüjnchaaw xguijxh reeman. <sup>20</sup> Dxel gurejdx Jesús laa reeman, abi'

basa'n reeman Zebedeo loj barcw guin, b́n naj xdad reeman con ree xmojsaman, guiáad laa reeman zinal reeman Jesús.

*Rabëë Jesús xindxab luxdoo tijb bejn*

(Lc. 4:31-37)

<sup>21</sup> Chi bidxin Jesús luguiedx Capernaum. Abi' dxej raziiladx ree bejn guyuman lén xyadoo ree b́n Israel culüüman laa reeman. <sup>22</sup> Dád radxa loj reeman zi'c rnieenëman laa reeman guial rulüüman laa reeman zi'c tijb b́n rniabee, ad rulüütaman zi'c rulüü ree mextr rajc ley. <sup>23</sup> Lén yadoo guin yu' tijb xin yu' xindxab luxdoo, dxejczy guridxa'x rëbix:

<sup>24</sup> —¿Xhie rënl con dunujn, Jesús b́n Nazaret? ¿Zëedil ya zidganijtil dunujn? Nünbeen lüj, ragbeen guial naya nalil najl xi'n Dios.

<sup>25</sup> Dxel gudilë Jesús xindxab guin, rëbaman:

—¿Bacwëéz ro'l, bariii luxdoo xin guin!

<sup>26</sup> Abi' been xindxab guin xin guin zi'c b́n rëjtya', zianz gurixdiajx rejs, bariix luxdoo xin guin. <sup>27</sup> Graczi ree b́n riga' dád badxaloj reeman, riniabdiidx loj lasa' reeman rëb reeman:

—¿Xhie ree nicüban rulüü b́n guin? ¿Con guialrniabee ni rajpaman xt ree xindxab ruzoob xtiidxaman!

<sup>28</sup> Tibrajtzi bire'ch xtiidx Jesús guidib niz Galilea.

*Rayüjn Jesús xnasuegr Béd*

(Mt. 8:14-15; Lc. 4:38-39)

<sup>29</sup> Bariiz reeman lén yadoo guin, binë Jesús Jacob con Waj lidx Simón con Andrejs. <sup>30</sup> Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman. <sup>31</sup> Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuloj cudëédaman ni gaw reeman.

*Rayüjn Jesús zien ree b́nragxuu*

(Mt. 8:16-17; Lc. 4:40-41)

<sup>32</sup> Chi ma gurej guiaal, binë reeman b́nragxuu ree lod za' Jesús, në ree b́n yu' xindxab luxdoo. <sup>33</sup> Graczi ree b́n luguiedx guin bido'p ruyu lod za' Jesús. <sup>34</sup> Bayüjn Jesús zien ree b́n rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtaman mod guiniee ree xindxab guin guial nünbee reex laaman.

*Rulüü Jesús xtiidx Dios niz Galilea*

(Lc. 4: 42-44)

<sup>35</sup> Bixche Jesús rsildoo, chi ziiz nacay, briiman luguiedx guin wejman tijb luar lod achutzzi bejn zobj, persi gurejdx gunabaman Dios. <sup>36</sup> Abi' Simón con ree xcompniaraman bigdiil reeman laaman. <sup>37</sup> Chi badxejl reeman laaman, rëb reeman lojman:

—Gra ree bejn cayguiil lüj.

<sup>38</sup> Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

<sup>39</sup> Abi' balüü Jesús xtiidx Dios lén ree xyadoo ree b́n Israel guidib niz Galilea babëë tëëman xindxab luxdoo ree bejn.

*Rayüjn Jesús tijb b́n rajc guialguijdx la lepra*

(Mt. 8:1-4; Lc. 5:12-16)

<sup>40</sup> Tijb b́n rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

<sup>41</sup> Baya Jesús laaman, baqui'man laaman, rëbgajman:

—Rënan, bayajc.

<sup>42</sup> Chi gunee Jesús zian, hor guin gajc bayajc b́n guin abi' baya xcuerpaman. <sup>43</sup> Dxel bagu'nejz Jesús laaman, rëbaman lojman:

<sup>44</sup> —Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

<sup>45</sup> Per bén guin chi ziaman guzuloj catie'chaman diidx loj gra bejn xhienaag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zojb. Per gra lad rza ree bejn rej reeman lod za'man.

## 2

### *Rayüjn Jesús xin nëjt xcuerp*

(Mt. 9:1-8; Lc. 5:17-26)

<sup>1</sup> Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj, <sup>2</sup> tibrajtzi bido'p zien da't reeman lod za'man, xt ni'quid rdaant ro' port chu' reeman, guiáad laaman culüüman laa reeman xtiidx Dios. <sup>3</sup> Dxel bidxin tajp ree bejn yagaj lejn reeman tijb xin nëjt xcuerp. <sup>4</sup> Per ad gojct niunë reeman laax lod za' Jesús guial bén guixiuj guidxa. Abi' guxhal reeman guijc yu lod za'man persi gulet reeman xinragxuu guin guidib ni naga'x loj xt lod za' Jesús. <sup>5</sup> Chi baguiaa Jesús guial rililadx reeman laaman, rëbaman loj xinragxuu guin:

—Xi'n, ma benan xtolil perdon.

<sup>6</sup> Per yagaj zojb tio'p choon ree mextr rajc ley, been reeman xgab naladx reeman: <sup>7</sup> “¿Chexc zeel rníee xin guin zian? ¿Chexc zeel rüjnx mazri xin zojbloj guial loj Dios? Achutczí rajc rüjn perdon dol tijbzi Dios.” <sup>8</sup> Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? <sup>9</sup> ¿Conin ad nawëëgt gac, guial guiën loj bënragxuu guin ya: “Ma benan xtolil perdon”, o guiën ya: “Bixche, gules ni go'til loj, baguiaj”? <sup>10</sup> Per yan gulün lëjt guial Bén guxhaal Dios rajpaman guialrniabee loj guidxliuj guie din güünman dol ree perdon. Dxel rëbaman loj xinragxuu guin:

<sup>11</sup> —Lüj rnin, bixche, baca' ni go'til loj baguiaj lidxil.

<sup>12</sup> Loj hor guin gajc bayajc xin guin, bixchex baca' ni go'tix loj, bariix lënu guin guidib loj gra ree bén riga' yagaj. Abi' gra reeman badxaløj, ruza't reeman Dios zagdxe, rëb reeman:

—Ni'qui tijb ad waguiaat ree zi'c naj ni cayguiaa ree yan.

### *Rbejdx Jesús Leví*

(Mt. 9:9-13; Lc. 5:27-32)

<sup>13</sup> Dxel wej Jesús ro'nijsdoo Galilea zatijb. Dád zien ree bejn rdxin lod za'man persi rulüüman laa reeman xtiidx Dios. <sup>14</sup> Chi cadëdaman, baguiaaman Leví xi'ngaan Alfeo, zojbaman lod ruquijxaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

<sup>15</sup> Dxel chi cayaw Jesús lidx Leví con zien ree bén ruquijx impuest në ree bén ad nabant zi'c rën Dios, gra reeman zojbnë Jesús xan mex con ree xbejnman, guial zinal zien ree bejn laaman. <sup>16</sup> Chi baguiaa ree bënfarisew con ree mextr rajc ley guial cayawnë Jesús bén guin ree, rëb reeman loj ree xbejnman:

—¿Chexc zeel rawnë xmextridi bén ruquijx ree impuest në ree bëndol?

<sup>17</sup> Chi biguiejn Jesús ni rëb reeman, zeel rëbaman:

—Bënnadaan ree ad riaadxt reeman doctor, bënragxuu ree, laa reeman riaadx doctor. Ad zialtan par ree benza'c, zialan par ree bëndol din yayüjn reeman xgab por xtol reeman.

### *Rniabdiidx reeman loj Jesús xcwent guialrba'n*

(Mt. 9:14-17; Lc. 5:33-39)

<sup>18</sup> Lën ree dxej zii guba'n ree xbejn Waj Bén ruuroobnijs bejn ree, në ree bënfarisew. Abi' yu' ree bén gunabdiidx loj Jesús, rëb reeman:

—¿Chexc zeel ad rba'nt ree xbejn zi'c rba'n ree xbejn Waj con ree bënfarisew?

<sup>19</sup> Badxi' Jesús laan rëbaman:

—Wen, ¿zajc guiba'n ree biooz za' loj guialruxhliaa ya la'tgaj za'në xin cuxhliaa guin laa reeman? La'tgaj za'nëx laa reeman ad zajct guiba'n reeman. <sup>20</sup> Per guidxin dxej chiquiedix loj reeman, abi' chi guidxin dxej guin dxel guiba'n reeman.

<sup>21</sup> 'Achut bén rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin. <sup>22</sup> Ad rgu' tëët bejn vin cüb lën anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

*Rgui'ch ree xbejn Jesús trigo dxej raziiladx ree bén Israel*

*(Mt. 12:1-8; Lc. 6:1-5)*

<sup>23</sup> Tijb dxej raziiladx ree bén Israel, cadëd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadëd reeman. <sup>24</sup> Dxel rëb ree bénfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

<sup>25</sup> Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

<sup>26</sup> Tiamp ni goc Abiatar bixhioz rniabee gra ree bixhioz, guyu Davi lën xyadooro' Dios, gudawnë ree xcompniaraman guiadxtil ma nagle' abi' bixhiosi ree rayal gaw laa reen.

<sup>27</sup> Rëb tëë Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn.

<sup>28</sup> Abi' naj, guial najn Bén guxhaal Dios, ra'pan guialrniabee dxej raziiladx ree bejn.

### 3

*Rayajc tijb xin naxü'n tiblax yaa*

*(Mt. 12:9-14; Lc. 6:6-11)*

<sup>1</sup> Tijb dxej guyu Jesús lën tijb yadoo. Lën yadoo guin za' tijb xin naxü'n tiblax yaa. <sup>2</sup> Abi' ree bén yu' lën yadoo guin rula'ch reeman Jesús din guidoon zayüjnman laax dxej raziiladx reeman ya, din gac gutedia' reeman Jesús. <sup>3</sup> Dxel rëb Jesús loj xin naxü'n yaa guin:

—Bisu, guzuj galay guin.

<sup>4</sup> Abi' rëbaman loj ree bén guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman. <sup>5</sup> Dxel rdxe'ch Jesús ruguiaaman loj gra reeman, dád guyunaya luxdooman guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan. <sup>6</sup> Chi baza ree bénfarisew guin, zianz baya'n reeman diidx con ree xbejn Herodes din gugüjt reeman Jesús.

*Zien ree bejn riga' ro'nijsdoo*

<sup>7</sup> Per Jesús zë gajcaman ro'nijsdoo Galilea con ree xbejnman. Zien da't ree bén Galilea con ree bén Judea binal laaman, <sup>8</sup> në ree bén Jerusalén con ree bén Idumea, në ree bén zojb zatiblad ro' guiwro' Jordán, në ree bén Tiro con ree bén zojb niz Sidón. Dád zien ree bejn wej lod za' Jesús guial gogbee reeman ni rüjnman. <sup>9</sup> Zeel rëbaman loj ree xbejnman din guzujsin reeman tijb barcw par laaman chitëë gutëë ree bén guin laaman. <sup>10</sup> Guial ma bayüjnman zien ree bejn, zeel rbig gra ree bénragxuu lojman din guqui' reeman laaman. <sup>11</sup> Guiáad ree bén yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rëb reeman:

—¿Lüj naj Xi'n Dios!

<sup>12</sup> Per gunabeeman xindxab guin ree chitëë guiëb reex chu laaman.

*Rbe Jesús chiptio'p ree apóstoles*

*(Mt. 10:1-4; Lc. 6:12-16)*

<sup>13</sup> Dxel wë'p Jesús tijb ruguia', abi' gurejdxaman gra ree bën guleman. Zianz wej reeman, <sup>14</sup> loj gra reeman gulejman chiptio'p reeman din su reeman con laaman zianczi guixhiaal tēēman laa reeman chigtie'ch reeman xtiidx Dios. <sup>15</sup> Abi' badēēman guialrniabee din yayüjn reeman bēnragxuu ree yabēē tēē reeman xindxab luxdoo ree bejn. <sup>16</sup> Bēn guie ree naj guidxiptio'p ree bēn gule Jesús: Simón bēn gulēēlajman Bēd, <sup>17</sup> Jacob con Waj, bēn naj ree xi'n Zebedeo, gunee Jesús laa reeman Boanerges (rēn guieban, xi'n guziaaw); <sup>18</sup> nē Andrejs, Felip, Tol, Matew, Tumajs con Jacob xi'n Alfeo, nē Tadeo, nētēē Simón bēn bi'ch loj ree bēn Cananistas, <sup>19</sup> con Judas Iscariote bēn bayü Jesús.

*Rēb ree bejn ca' Jesús xguialrniabee Beelzebú*

(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnēman laa reeman lod zojbaman. <sup>20</sup> Dád zien ree bejn bido'p yagaj stijb, xt ni'quid bile't niajw Jesús con ree xbejnman. <sup>21</sup> Chi gogbee ree xfamil Jesús, dxel bidxin reeman din yaca' reeman laaman guial rēb reeman guijcaman rajc.

<sup>22</sup> Abi' ree mextr rajc ley bēn zēēd ree Jerusalén rēb reeman:

—Bēn guin rabēē xindxab luxdoo ree bejn por xguialrniabee Beelzebú, xin rniabee ree xindxab.

<sup>23</sup> Dxel gurejdx Jesús laa reeman, rēbaman:

—¿Xhienaag yabēē satanás lasa' xindxab gajquix? <sup>24</sup> Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman, <sup>25</sup> ziangajc tijb famil, bal rdilnē lasa' reeman, nayob la' lasa' reeman. <sup>26</sup> Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

<sup>27</sup> 'Abi' achut zajc chu' lidx tijb bēngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

<sup>28</sup> 'Naj rni lojdi guial yu' perdon par gra dol ni rüjn bejn, yu' tēē perdon par gra diidxguijdx ni rniee bejn chutēēz. <sup>29</sup> Per bēn guinieeguijdx xSprijt Dios, ad yu't dxej gacaman perdon, ma banijtaman loj Dios.

<sup>30</sup> Rēb Jesús zian guial rēb reeman yu' xsprijt xindxab luxdooman.

*Xniaa Jesús con ree bijchaman*

(Mt. 12:46-50; Lc. 8:19-21)

<sup>31</sup> Hor guin bidxin xniaa Jesús con ree bijchaman yu' lod za'man, per ad bile't niu reeman zeel guxhaal reeman bēn chignee laaman. <sup>32</sup> Dxel ree bēn zojbnē laaman yagaj bagojn reeman laaman, rēb reeman:

—Laa xniaal con ree bijchil za' lule' guin cayguuil reeman lüj.

<sup>33</sup> Badxi' Jesús xtiidx reeman rēbaman:

—¿Chunin naj da nan con ree da bichan?

<sup>34</sup> Dxel baguiaaman bēn zojb ree gadēd lod zojbaman, rēbaman:

—Bēn guie ree naj da nan con ree da bichan, <sup>35</sup> din graczi ree bēn rüjn ni rēn Dios, laa reeman naj da bichan, da zanan nē da nan.

4

*Xcwent bēn rtie'ch bin*

(Mt. 13:1-9; Lc. 8:4-8)

<sup>1</sup> Zatiyb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wë'paman loj tijb barcw yu' lojnijs guin, abi' gurejman lojn guiáad ree bēn guin riga' reeman ro' nijs guin. <sup>2</sup> Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rēbaman:

<sup>3</sup> —Gol bacaagdiajg ni ganin lojdi: Tijb bejn briiman bigtie'chaman bin loj xguiniaaman. <sup>4</sup> Chi catie'chaman laan, ta'nān biajb lunejz abi' bidxin ree biguijn gudaw reeb laan. <sup>5</sup> Zata'nān biajb loj ree guiaj lod ad riga't zien yuj, abi' cari gulejnan guial ad zient yuj riga'. <sup>6</sup> Per chi gunan gubijdx, bigoolan abi' guial ad zro't liujn yu', gubidxan. <sup>7</sup> Zata'nān

biajb loj ree yaquiějch. Abi' chi guni'san, banidloj yaquiějch guin laan, abi' ad cwat ladan.  
<sup>8</sup> Per zata'nan biajb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tää ni cwa tibgayuu.

<sup>9</sup> Rëb tää Jesús loj reeman:

—Bén rën gucaagdiajg, gol bacaagdiajg.

*Chexc zeel ruliüü Jesús con cwent ree*

(Mt. 13:10-17; Lc. 8:9-10)

<sup>10</sup> Chi ma basa'nnë Jesús zata'nz ree bejn con guidxiptio'p ree xbejnman, dxel gunabdiidx reeman xhie rën guiëb cwent guin. <sup>11</sup> Badxi'man laan rëbaman:

—Dios ma basa'n lëjt din chignia'di xhienaag naj xguialrniabeeman ni goc naguie'ch par lëjt, sa'n ree bén ad rliladxt xguialrniabeeman, con ganaxzi ree cwent naj guial gulün laa reeman. <sup>12</sup> Din majsi rani loj reeman, per ad zuguaat reeman, majsi rigueijn reeman, per ad zignia't reeman chitëe yayejc reeman loj Dios abi' güünman perdon xtol reeman.

*Rusignia' Jesús xcwent bén rtie'ch bin*

(Mt. 13:18-23; Lc. 8:11-15)

<sup>13</sup> Abi' rëb Jesús loj reeman:

—¿Nid rignia'di ya xhie rën guiëb cwent guin? ¿Xhieza naag chignia'di gra ni ganin lojdi? <sup>14</sup> Bén gutie'ch bin guin, laaman naj zi'c bén rtie'ch xtiidx Dios. <sup>15</sup> Bin biajb lunejz, naj zi'c ree bén rigueijn xtiidx Dios, per rdxin gajc xindxab rquiedix laan luxdoo reeman. <sup>16</sup> Yu' ree bén naj zi'c bin biajb loj ree guiaj. Rigueijn reeman xtiidx Dios abi' dád nix ru luxdoo reeman rigueijn reeman laan. <sup>17</sup> Per guial naj reeman zi'c tijb cwaan ni ad yu't zro' liuj, chi rzagdiaj reeman o chi rzunal ree bejn laa reeman din güün reeman laa reeman ni mal por xtiidx Dios, laa rusa'n gajc reeman ni rliladx reeman. <sup>18</sup> Yu' tää ree bén naj zi'c bin ni biajb loj yaquiějch. Rigueijn reeman xtiidx Dios, <sup>19</sup> per ru reeman xgab por ree ni riga' loj guidxliuj guie. Rusquiee guialnaza'c laa reeman rën reeman gap reeman graloj. Abi' guial yu' xgab guin guijc reeman, zianz rucwëez rucaagdiajg reeman xtiidx Dios, abi' achet sirv rüjn ni rucaagdiajg reeman. <sup>20</sup> Per yu' ree bén naj zi'c bin biajb loj yuj zagdx, ridxga' reeman laan con guidib luxdoo reeman. Rüjn reeman zi'c rën Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

*Achet ni naguie'ch yu'*

(Lc. 8:16-18)

<sup>21</sup> Abi' rëb Jesús loj reeman:

—Achut bén ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib. <sup>22</sup> Din achet ni naguie'ch yu' ni ad zaguiet ad yu' tää ni ralan ni ad zagbeet bejn. <sup>23</sup> Bén rën gucaagdiajg, gol bacaagdiajg.

<sup>24</sup> Rëb tää Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustëdguienman lëjt. <sup>25</sup> Din bén ma rignia' xtiidx Dios, chignia'man mazri. Per bén ad rignia't, xt ta'n ni rignia'man ad zignia'traman.

*Xcwent guial rni's bin*

<sup>26</sup> Rëb tää Jesús loj reeman:

—Xguialrniabee Dios naj zi'c rzajc bén rxübin loj xguiniaaman. <sup>27</sup> Din majsi naga'yëjsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. <sup>28</sup> Din yuj guin gajc rusni's laan, yaloj rliejnan najn tijb gui'xhdoo, dxel ririin dojn, zianz rtia ladan. <sup>29</sup> Chi ma gojc reen dxel raru' reen guial ma bidxin tiamp yado'p reen.

*Xcwent xhaj moxtajs*

(Mt. 13:31-32; Lc. 13:18-19)

<sup>30</sup> Rëb tää Jesús:

—¿Xhienaag ganin naj xguialrniabee Dios, o xhienaag gún diidx lojdi din chignia'di xhienaag naj xguialrniabeeman? <sup>31</sup> Rnin lojdi guial xguialrniabee Dios naj zi'c naj xhaj moxtajs. Chi rxübin reeman laan. Laan naj ni mazri ni dobëz loj gra ree bin yu' loj guidxliuj. <sup>32</sup> Per chi ma guxübin reeman laan, rni'san rajcan mazri naroo loj gra ree cwaan, xt rajc rüjn xguixbitia's ree biguijn xidxan.

*Balüü Jesús con ganax cwent*

(Mt. 13:34-35)

<sup>33</sup> Balüü Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman. <sup>34</sup> Ad rulüütaman laa reeman zezi, bal id zulüüman con cwent. Per chi ma za'man con ree xbejnman dxel rusignia'man laa reeman zagdxë xhie rën guiëb ree ni rëbaman.

*Racwëz Jesús bidoxh*

(Mt. 8:23-27; Lc. 8:22-25)

<sup>35</sup> Dxej zii, chi gure guiaal, rëb Jesús loj ree xbejnman:

—Yo' ree zatiblad ro' nijs guin.

<sup>36</sup> Dxel basa'n reeman bën riga' ree yagaj, wë'p reeman loj barcw ni yu' Jesús zinë reeman laaman con ree barcw ren. <sup>37</sup> Dxel brie bidoxh loj nijs guin, xt guzuloj cadxa nijs loj barcw guin. <sup>38</sup> Per Jesús naga'yëjsaman loj barcw guin tijb luar naj xijchan, nucuugaman tijb almoad. Dxel bacwëen reeman laaman rëb reeman:

—¿Mextr! ¿Nid yu'l xgab ya? ¿Ma cayzëëb ree xan nijs!

<sup>39</sup> Abi' bixche Jesús, bacwëezaman bidoxh guin rëb tëëman loj nijs guin:

—¿Bacwëz, bayajcdxel!

Dxel bayajcdxe bi guin con nijs guin. <sup>40</sup> Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

<sup>41</sup> Per laa reeman dád bidxeb reeman abi' rniabdiidx loj lasa' reeman:

—¿Chu bën guin zeel xt bi con nijs ruzoob xtiidxaman?

## 5

*Rayüjn Jesús tijb xin yu' xindxab luxdoo*

(Mt. 8:28-34; Lc. 8:26-39)

<sup>1</sup> Chi badxin Jesús con ree xbejnman zatiblad ro' nijsdoo guin, xdajn ree bën Gadara, <sup>2</sup> baguiajtzii Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa, <sup>3</sup> guial nabanx ni. Achutczii rajc rixhii laax ni'qui con caden. <sup>4</sup> Zien volt ma guxhii reeman yaax në guia'x con caden, per rüjngajquix gan rurooxix laan. Achut rüjn laax gan. <sup>5</sup> Dxejz guiaal rizax niz dajn con lad ree baa, rbixdiajx rguilguijdx laagajquix con guiaj. <sup>6</sup> Zijtri baguiaax Jesús, baxüünx bigchaaglojx laaman abi' bazuxibix lojman.

<sup>7</sup> Zianz guneex rejs rëbix:

—¿Xhie rënl con naj Jesús, Xi'n Dios yu' xanyabaa? Rniaaban lojl ad gusagzil naj.

<sup>8</sup> Rëbix zian, guial cayëb Jesús lojx:

—¿Xindxab, barii luxdoo xin guin!

<sup>9</sup> Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

<sup>10</sup> Abi' rëbix lojman chitëë guixhiaalaman xindxab guin ree lood ren.

<sup>11</sup> Abi' gajxh yagaj riga' zien ree cüch cayaw reeb. <sup>12</sup> Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

<sup>13</sup> Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb. <sup>14</sup> Guiáad ree bën cayajp laa reeb, baxüün reeman



bicojn reeman luguiedx në ree dajn abi' zien ree bejn wej biquiaa ni goc. <sup>15</sup> Chi bidxin reeman lod za' Jesús, baguiaa reeman xin barii xindxab guin ree luxdoo, zobjix najcw xabix, ma badëdguienx. Abi' bidxeb reeman. <sup>16</sup> Guiáad ree bën baguiaa gra ni goc con xin guin, në con ree cüch guin, be reeman diidx loj ree bën bidxin. <sup>17</sup> Dxel guzuloj rëb reeman loj Jesús din yazaman niz ladx reeman.

<sup>18</sup> Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman. <sup>19</sup> Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

<sup>20</sup> Dxel ziax, guzuloj rëbix loj ree bën zobj niz Decápolis gra ni been Dios por laax, abi' graczi reeman badxaløj.

*Rayajc xi'n Jairo në béngunaa bagaal xab Jesús*

*(Mt. 9:18-26; Lc. 8:40-56)*

<sup>21</sup> Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman. <sup>22</sup> Dxel bidxin tijb bën rniabee lën tijb xyadoo ree bën Israel, laman Jairo. Chi baguiaaman Jesús, bazuxibaman lojman, <sup>23</sup> abi' guzajcaman laaman liaadx, rëbaman:

—Ma cayëjt da xi'nan. Yo'sii din gudxiib yaal guijquim din yayajquim din guibanm.

<sup>24</sup> Zinët Jesús bën guin, dád zien bejn zinal laaman xt rixa't reeman laaman. <sup>25</sup> Loj graczi reeman no'ch tijb béngunaa, ma gojc chiptio'p ijz ragxuuman ryajbaman rejn.

<sup>26</sup> Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman. <sup>27</sup> Chi biguiejnman gra ni rüjn Jesús, gudëdaman lad ree bën guin, gubigaman niz xijchaman dxel bagaalaman xabaman.

<sup>28</sup> Guial gunaladxaman: “Gugalzan xabaman, ma bayajc gajcan.” <sup>29</sup> Loj hor zii gajc gulëjz białbaman rejn, abi' gogbeeman ma bayajcaman. <sup>30</sup> Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bën guin dxel gunabdiidxaman, rëbaman:

—¿Chu baqui' da xaban?

<sup>31</sup> Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil. <sup>32</sup> Per Jesús ruguiaaman gra lad din guguiaaman chu baqui' laaman.

<sup>33</sup> Abi' guidib rnij béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman. <sup>34</sup> Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdxe. Ma bayajquil guialguijdx ni goquil.

<sup>35</sup> Sta canee Jesús zian, chi bidxin ree bën guza lidx Jairo, rëb reeman loj Jairo:

—Ma güjt xi'nl. Ad ruslenril mextr guin mazri.

<sup>36</sup> Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

<sup>37</sup> Ad cwëjbt Jesús ninal gra ree bën riga' laaman, Bëdzi, con Jacob, con Waj bijch Jacob.

<sup>38</sup> Chi bidxin reeman lidxaman, baguiaa Jesús cayajc naquie' guial roon rbixdiaj reeman.

<sup>39</sup> Dxel guyuman lënü abi' rëbaman loj reeman:

—¿Chexc zeel roon rbixdiajdi? Ad güjttim, naga'yëjsim.

<sup>40</sup> Per baze' reeman laaman. Dxel gunabeeman barii gra reeman, zianz binëman xdadim con xniaam con ree bën zinëman, lod naga' bindo guin. <sup>41</sup> Dxel gunaazaman yaam rëbaman:

—Talita, cumi —Rën guiëban: Lüj rnin, bindoo, bixche.

<sup>42</sup> Loj hor ziigajc bixchem guzuløj cazam. Yu'm chiptio'p ijz. Abi' dád badxa loj ree bën riga'. <sup>43</sup> Per gunabee Jesús laa reeman chitëë chu loj guiëb reeman ni goc, gunabee tëëman gudëd reeman ni gawim.

## 6

*Radxin Jesús Nazaret**(Mt. 13:53-58; Lc. 4:16-30)*

<sup>1</sup> Baza Jesús yagaj, badxin ladxaman con ree xbejnman. <sup>2</sup> Chi bidxin dxej raziiladx ree bejn, guzuloj culüüman bejn ree lën yadoo. Abi' gra ree bén cucaagdiajg dád badxa loj reeman ni rnieeman, abi' rëb reeman:

—¿Ban basiid bén guin gra ni rnieeman? ¿Ban gulëëman guialrignia' guin abi' chu badëë guialrniabee zeel rüjnman milagr guin ree?

<sup>3</sup> ¿Nid laaman naj bén carpinter ya, xi'n Li abi' ree bijchaman naj Jacob, Xiëb, Judas, në Simón? Guiáad ree bizanman zobj luguiedx guie.

Abi' ad bidxga't reeman Jesús. <sup>4</sup> Per rëbaman loj reeman:

—Guidibczi rajp reeman respejt tijb bén rudëë xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

<sup>5</sup> Ad bile't nüjn Jesús zien ree milagr yagaj. Bëlzi ree bénragxuu bayüjnman, badxiib yaaman guijc reeman. <sup>6</sup> Dád badxalojman guial ad bililadxt reeman laaman. Dxel zëman guiedx naj ree gajxh, ziglüüman bejn ree.

*Rxhial Jesús guidixptio'p ree xbejnman chiglüü reeman xtiidx Dios**(Mt. 10:5-15; Lc. 9:1-6)*

<sup>7</sup> Dxel gurejdx Jesús guidixptio'p ree xbejnman, abi' guxhaalaman tio'p gaj reeman. Badëëman guialrniabee loj reeman din yabëë reeman xindxab ree luxdoo ree bejn. <sup>8</sup> Dxel gunabeeman din achetczi chinë reeman par runejz, ni'qui guijxh, ni'qui guialraw, ni'qui milia, tijbzi yagriadx reeman, <sup>9</sup> con xgurëch reeman, con tijbzi lajd najcw reeman. <sup>10</sup> Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin. <sup>11</sup> Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxijp guxyuj guia'di zi'c sen guial ad rënt reeman guzoob reeman diidx. Din naj rni lojdi, guial dxej ni yadëëd ree bejn cwent loj Dios mazri casti narooob yayal reeman guial loj ree bén Sodoma në Gomorra.

<sup>12</sup> Zianz brii reeman ziguedx reeman loj ree bejn guial rayal yayüjn reeman xgab por xtol reeman. <sup>13</sup> Abi' rabëë reeman zien ree xindxab luxdoo ree bejn, zien tëë ree bénragxuu gudëëb reeman sejt, abi' bayüjn reeman laa reeman.

*Güjt Waj bén baroobnijs bejn ree**(Mt. 14:1-12; Lc. 9:7-9)*

<sup>14</sup> Chi biguiejn rey Herodes ni rüjn Jesús guial ruza't ree bejn laaman guidibczi, rëb reeman:

—Waj, bén baroobnijs bejn ree ma baban, zeel rajpaman guialrniabee rüjnman milagr ree.

<sup>15</sup> Per yu' reeman rëb:

—Elíasan, bén rudëë xtiidx Dios loj ree bejn.

Yu'za reeman rëb:

—Tijb bén rudëë xtiidx Dios loj ree bejnan lasa' ree bén gocli.

<sup>16</sup> Chi biguiejn Herodes rëb reeman zian, rëbaman:

—Wajn, xin gunabeen biru' yëjn, laaxan ma baban yan.

<sup>17</sup> Rëb Herodes guin zian din laagajcaman gunabee gunaaz reeman Waj, abi' badxe'-man laaman ladxguuib por Herodías. Herodías naj xbéngunaa Felip bijch Herodes. Per Herodes cwa'man Herodías. <sup>18</sup> Abi' guial rëb Waj loj Herodes:

—Ad laat tia' xbéngunaa bijchil.

<sup>19</sup> Zeel bidxe'ch Herodías Waj, guyënman nugüjtaman laaman. Per ad rile'tan, <sup>20</sup> din rdxeb Herodes guial ragbeeman rüjn Waj ni rën Dios, rüjn tëëman zi'c rayal, zeel ad cwëjbtaman xhie nüjnnë Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdiajgaman ni rnieeman.

<sup>21</sup> Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bén rniabee ree në par ree bén rniabee ree suldad nētēē ree bén zojbloj niz Galilea. <sup>22</sup> Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rēb rey guin lojm:

—Gunab ni rëntzil, naj gune laan.

<sup>23</sup> Xt badēē xtiidxaman gudēēman ni guiniabtzim, majsi garol ni rajpaman. <sup>24</sup> Dxel bariim bignabdiidx loj xniaam, rēbim:

—¿Xhie ganaaban?

Badxi'man laan rēbaman:

—Gunab guijc Waj bén ruuroobnijs bejn ree.

<sup>25</sup> Laa bayugajquim lod za' rey Herodes, rēbim lojman:

—Yan gajc rēnan guneel guijc Waj, bén ruuroobnijs bejn ree, guneelan loj tijb pliajt.

<sup>26</sup> Dád guyu naya Herodes, per mal badēēd xtiidxaman guidib loj ree bén riga', zeel ad bile't nibexuuman nudēēman ni gunabim. <sup>27</sup> Dxel gunabee Herodes tijb suldad din chica'x guijc Waj. <sup>28</sup> Zianz wej suldad guin lēn ladxguiib guin, gutü'x guijc Waj badxe'xan loj pliajt binēxan lojm. Dxel bayü loj xniaamin.

<sup>29</sup> Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

*Ruyaana Jesús gaay mil bejn*

*(Mt. 14:13-21; Lc. 9:10-17; Jn.6 :1-14)*

<sup>30</sup> Chi bayejc ree xi apóstoles Jesús, be reeman diidx lojman gra ni been reeman në ni balüü reeman. <sup>31</sup> Dxel rēb Jesús loj reeman:

—Gol guda, yo' dunujz ree niz lod achut bejn zojb din yaziiladx ree ta'n.

Rēbaman zian guial dád zien ree bén zia zien tēē ree bén zēēd, xt ni'qui guial gaw reeman ad rile'tan.

<sup>32</sup> Dxel Jesús con ree bén naj ree apóstoles zē reeman loj barcw tijb luar lod achut zojb.

<sup>33</sup> Per dád zien ree bejn baguiaa guial zē reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalojl laa reeman bidxin lod zē Jesús con ree xbejnman.

<sup>34</sup> Chi baguiajt Jesús loj barcw guin, baguiaaman bén guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman. <sup>35</sup> Chi ma gudxe, gubig ree xbejnman, rēb reeman lojman:

—Ma gudxe yan, abi' achut bejn zojb niz guie. <sup>36</sup> Güjdx loj ree bén guin din che reeman ranch ree në ree guiedx ni riga' gajxh chisii xhienin gaw reeman.

<sup>37</sup> Per rēb Jesús loj reeman:

—Lējt gol badēēd ni gaw reeman.

Dxel rēb reeman lojman:

—Per zro' da't milia ryaadx din yo' ni gaw ree bén guin, zi'ct ni rüjn bejn gan loj tio'p gayuu dxej.

<sup>38</sup> Abi' rēb Jesús loj reeman:

—¿Bēl guiadxtil ca'di? Gol baguiaa don.

Chi baguiaa reeman, dxel rēb reeman:

—Gaay guiadxtil con zatio'p bëjl.

<sup>39</sup> Dxel gunabeeman din cwe tibcwaagaj reeman loj guixya'. <sup>40</sup> Zianz gurej reeman zian, yu' lod gure tibgayuu reeman, yu' lod gure tü'pchii reeman. <sup>41</sup> Abi' cwa' Jesús guigaay guiadxtil guin con grop bëjl guin. Dxel gules lojman xanyabaa, badēēman quixtēē loj Dios, gula'man guiadxtil guin badēēman loj ree xbejnman persi gudi's reeman laan loj ree bén riga', gudi's tēēman grop bëjl guin loj gra reeman. <sup>42</sup> Graczi reeman gudaw xt bigdxinladx reeman, <sup>43</sup> abi' staczi bacha reeman chiptio'p dxüm guiadxtil laay con bëjl ni baya'n. <sup>44</sup> Loj ree bén gudaw no'ch cost gaay mil xinguaaw.

*Rza Jesús loj nijs**(Mt. 14:22-27; Jn. 6:16-21)*

<sup>45</sup> Dxel gunabee Jesús guyu ree xbejnman loj barcw din tédgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree. <sup>46</sup> Chi gulox bazaadiidxnëman laa reeman, wejman guijc tijb guia', persi gurejdx gunabaman Dios. <sup>47</sup> Chi ma cabej guiaal, ma yu' barcw guin galay nijs guiáad Jesús baya'n xtijbzaman guijc guia' guin. <sup>48</sup> Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bën tédnejz. <sup>49</sup> Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman. <sup>50</sup> Dád cadxeb reeman por ni cuguaa reeman. Per guneenë Jesús laa reeman rëbaman:

—¡Gol bagu' luxdoodi, ad bal rdxebidi, najn!

<sup>51</sup> Dxel guyuman loj barcw guin, zianz gulëjz bi guin. Guiáad laa reeman dád badxa loj reeman, <sup>52</sup> din nayaaw xquiarguejn reeman, abi' ad bignia't reeman milagr ni beenman con guidxtil guin ree.

*Rayüjn Jesús bënragxuu ree Genesaret**(Mt. 14:34-36)*

<sup>53</sup> Chi ma gudëd reeman lojnijs guin bidxin reeman xdajn ree bën Genesaret, yagaj guxhii reeman barcw guin ro' nijs. <sup>54</sup> Naabzi baguiajt reeman loj barcw guin, laa bayünbee gajc ree bejn Jesús. <sup>55</sup> Abi' gutie'ch reeman diidx guidib niz yagaj. Dxel guzuloj zinë ree bejn bënragxuu ree lod riguiejntzi reeman za' Jesús. <sup>56</sup> Bantëëz zëman, majsi guiedx narooob o guiedx dobëz o ranch ree, rguijxh reeman bënragxuu guin ree niz lod tédaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bën bagaal xabaman bayajc.

## 7

*Ni rüjn persi rüjn bejn dol**(Mt. 15:1-20)*

<sup>1</sup> Tijb dxej, tio'p choon ree bënfarisew con ree mextr rajc ley, bën guza ree Jerusalén, bibig reeman loj Jesús. <sup>2</sup> Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman. <sup>3</sup> (Din bënfarisew në gra ree bën Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin. <sup>4</sup> Në chi raza reeman luguia', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quiib reeman re, con vajs, con ree trast guiib, në xloon reeman riguiib reeman.) <sup>5</sup> Zeel bënfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnl zi'c naj xcostumbr dux béngulal ree? ¿Chexc zeel raw reeman zianzi?

<sup>6</sup> Dxel rëb Jesús loj reeman:

—¡Bën rusquieel, waliqui ni guneë Isafas por lëjt, bën badëë xtiidx Dios loj ree bejn, chi bacaaman:

Bën guie ree, rëbzi reeman guial rën da't reeman naj, per ad rënt reeman naj con guidib luxdoo reeman.

<sup>7</sup> Xlia'czi rën da't reeman naj,

abi' rulüü reeman bejn ree ganaxzi ni rbëëguijdx ree bénguidxliuj.

<sup>8</sup> Yan, rusa'ndi xtiidx Dios tibladi persi zinalidi xcostumbr ree bénguidxliuj.

<sup>9</sup> Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tibladi. <sup>10</sup> Rëb Moisejs: “Gojp respejt xdadil con xnial”, abi’ “Bën guzaal diidxmal guijc xdad o xnial, rayal guiëtaman.” <sup>11</sup> Per lëjt rëbidi guial zile' guiëb bejn loj xDadaman o xnial: “Ad zajct günan lüj yudar, din gra ni ra'pan naj Corbán” (Corbán rën guiëb gran naj par Dios).

<sup>12</sup> Rëbidi, bén guiëb zian, ad zile'tri güün xdad xniaaman yudar. <sup>13</sup> Abi' rbëeladxidi xtiidx Dios persi zinal xcostumbridi ni rulüü lasa'di, në zien ree ni ren rüjndi lasa' ree ni guin.

<sup>14</sup> Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tää ni ganin: <sup>15</sup> Ad ni rawt bejn rüjn persi rüjnman dol. Ni ririi ro'man në ni rüjnman, laan rüjn persi rüjnman dol. <sup>16</sup> ¡Bén rën gucaagdiajg, gol bacaagdiajg!

<sup>17</sup> Chi baza Jesús lod za' ree bén guin bayuman lënü, dxel gunabdiidx ree xbejnman xhie rën guiëb ni rëbaman. <sup>18</sup> Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol, <sup>19</sup> din ni raw bejn ad rejtan luxdooman, rejn lënman, abi' rariin?

Zian basignia'man guial ad rüjnt bejn dol por ni rawzaman. <sup>20</sup> Rëbaman:

—Ni ririi ro' bejn në ni rüjnman, laan rüjn persi rüjnman dol. <sup>21</sup> Din guijc bejn zëäd graloj xgab mal, guial rüjn ni dxuudx, guialgubaan, guialrugüjt lasa', <sup>22</sup> guial rzunë béngunaa ren o xinguaaw ren, guialrzëëbladx xieen ben ren, guial rüjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrüjn benro', në guial rüjn ni ad rayalt. <sup>23</sup> Graczi ree ni guin zëäd guijc bejn, abi' laan rüjn persi rüjnman dol.

### *Rayajc xi'n tijb bén Sirofenicia*

(Mt. 15:21-28)

<sup>24</sup> Chi baza Jesús niz yagaj, zëman niz Tiro në Sidón. Dxel guyuman tijb lënü guial ad guyëntaman niagbee ree bejn, per ad gojct nuquie'ch lojman. <sup>25</sup> Din gogbee gajc xniaa tijb bindoo yu' xindxab luxdoo. Abi' wej xniaam lod za' Jesús zianz bazuxibaman lojman. <sup>26</sup> Ad najtaman bén Israel, najman bén Sirofenicia. Dxel guzajcaman liaadx loj Jesús din yabëëman xindxab guin luxdoo bindoo guin. <sup>27</sup> Per rëb Jesús lojman:

—Badëëdxgaj mod gaw yaloj ree xindoo, din ad rayalt chiquied bejn guiadxtil loj xi'nman din gudëëman laan gaw ree bë'cw.

<sup>28</sup> Badxi' bén guinan rëbaman:

—Waliquil, Dad, per në ree bë'cw raw xguiadxtil laay reem ni ryajb xan mex.

<sup>29</sup> Dxel rëb Jesús:

—Laaqui guneel. Ma zajc yaguiajl, ma barii xindxab guin luxdoo xi'nl.

<sup>30</sup> Chi badxin lidx bén guin, baguaaaman laa bindo guin naga' loj loon, ma barii xindxab guin luxdoo.

### *Bayajc tijb bén nacwa't ad rniee täätaman zagdxe*

<sup>31</sup> Baza Jesús niz Tiro, gudëdaman niz Sidón, në loj ree guiedx riga' Decápolis abi' bidxinman ro'nijsdoo Galilea. <sup>32</sup> Ni bidxinnë reeman tijb xinguaaw nacwa'tix ad rajc tää rnieex zagdxe. Abi' rëb reeman loj Jesús din gudxiib yaaman guijquix. <sup>33</sup> Zianz binë Jesús laax tiblax, badxe' xbacwënman lën guidiajguix, abi' con xhiejnman bagaalaman lüdxix. <sup>34</sup> Dxel gules lojman xanyabaa, banajladxaman, rëbaman:

—¡Efata! —rën guiëban: ¡Baxal!

<sup>35</sup> Loj hor zii gajc baxal ree guidiajg xin guin, baban lüdxix dxel guzuloj caneex zagdxe.

<sup>36</sup> Dxel gunabee Jesús laa reeman chitëë chu loj guiëb reeman ni goc. Per guial rëbaman zian, mazri rü reeman laan loj ree bejn. <sup>37</sup> Dád badxa loj reeman rëb reeman:

—Xi zagdxe naj gra ree ni rüjnman, xt rüjnman persi riguejn ree bén nacwa't, abi' ree bengop rniee reeman.

## 8

### *Ruyaan Jesús tajp mil bejn*

(Mt. 15:32-39)

<sup>1</sup> Tijb dxej bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

<sup>2</sup> —Rayan bén guin ree din ma gojc choon dxej nadxu'nè! reeman guie, abi' ad ca't ni gaw reeman. <sup>3</sup> Abi' bal yaxhalan laa reeman lidx reeman sin guialraw, dool yadaj reeman lunejz, din yu' reeman zëed zijt.

<sup>4</sup> Dxel rëb ree xbejnman:

—Per, ¿ban guin yuca'n ni gaw ree bén guin, achutczi bejn zojb niz guie?

<sup>5</sup> Dxel gunabdiidxaman loj reeman rëbaman:

—¿Bël guiadxtil ca'di?

Abi' rëb reeman:

—Gajdxan.

<sup>6</sup> Dxel gunabeeman gurej ree bén guin luyuj. Zianz cwa'man guigajdx guiadxtil guin, badëëman quixtëë loj Dios, abi' gula'man laa reen badëëd loj ree xbejnman persi gudi's reeman laa reen loj gra ree bén guin. <sup>7</sup> Négajc tio'p choon ree bëjldoo ca' reeman, abi' badëëman quixtëë loj Dios dxel gunabeeman gudi's reeman në laa reeb loj ree bén guin. <sup>8</sup> Graczi reeman gudaw xt bigdxinladx reeman, abi' staczi bacha reeman gajdx dxüm guiadxtil laay në bëjl ni baya'n. <sup>9</sup> Bén gudaw ree naj reeman cost tajp mil. Chi gulox gudaw reeman, dxel bazaadiidxnë Jesús laa reeman. <sup>10</sup> Zianz guyuman loj barcw con ree xbejnman zë reeman niz Dalmanuta.

*Rniab ree bénfarisew tijb milagr loj Jesús*  
(Mt. 16:1-4; Lc. 12:54-56)

<sup>11</sup> Dxel bidxin ree bénfarisew, guzuloj cadildiidxnë reeman Jesús, abi' par güün reeman laaman prueb, gunab reeman güünman tijb milagr zi'c tijb sen guial por Dios zëedaman.

<sup>12</sup> Dxel banajladx Jesús, rëbaman:

—¿Chexc zeel rëndi günan tijb milagr? Diidxli ganin, achetczi milagr günan guguaadi.

<sup>13</sup> Dxel basa'nman laa reeman, bayuman loj barcw zatijb, zignë ree xbejnman stiblad ro' nijs guin.

*Xlevadur ree bénfarisew*  
(Mt. 16: 5-12)

<sup>14</sup> Bayanladx ree xbejn Jesús ninë reeman guialraw, tijbzi guiadxtil ca' reeman loj barcw guin. <sup>15</sup> Abi' chi rëbaman loj reeman:

—Gol gojp cudad con xlevadur ree bénfarisew në xlevadur Herodes.

<sup>16</sup> Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

<sup>17</sup> Abi' gogbee Jesús ni canee reeman, zianz rëbaman:

—¿Chexc zeel rëbidi guial ad ca'tidi guiadxtil? ¿Staczi ad rignia'tidi ya? ¿Sta nayaaw xquiarguejndi ya? <sup>18</sup> Yu' guiaalojdi per rulüü ad ruguiaatidi, yu' guidiajguidi per rulüü ad riguejntidi. ¿Nid rusaaladxidi ya? <sup>19</sup> Chi gudi'san gaay guiadxtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

<sup>20</sup> Dxel rëbaman:

—Laadx chi gudi'san gajdx guiadxtil loj tajp mil bejn, ¿bël dxüm guidxa baca'di?

Badxi' reeman laan rëb reeman:

—Gajdxan.

<sup>21</sup> Dxel rëbaman:

—¿Staczi ad waygnia'tidi ya?

*Rayüjn Jesús tijb bén ad ranit loj*

<sup>22</sup> Chi bidxin Jesús guiedx Betsaida con ree xbejnman. Binë ree bejn tijb bén ad ranit loj, rëb reeman loj Jesús din gugaalaman guiaalojman. <sup>23</sup> Dxel gunaaz Jesús yaa-man gulëëman laaman luguiedx guin, abi' gudëëb xhiejnman guiaalojman, baqui'man guiaalojman. Zianz gunabdiidxaman rëbaman:

—¿Rajc ruguiaal ta'n ya?

<sup>24</sup> Dxel guzuloj cuguaaman, abi' rëbaman:

—Ruguian bejn ree, per rulüü naj reeman zi'c yag ni caza.

<sup>25</sup> Dxel bagaal Jesús guiaalojman stijb, abi' rëbaman lojman din guguaadxiçhamaan, dxel guzuloj cuguaaman zagdxë, naynidxuj ma ruguiaaman gra. <sup>26</sup> Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhienaag bayajc lojl.

*Rëb Bëd guial Jesús naj Cristo*

(Mt. 16:13-20; Lc. 9:18-21)

<sup>27</sup> Bazanë ree xbejn Jesús niz Galilea, wej reeman guiedx riga' ree Cesarea de Filipino. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

<sup>28</sup> Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Elías, yu' tëë reeman rëb lüj naj tijb ree bën badëëd xtiidx Dios loj ree bejn gocli.

<sup>29</sup> Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

<sup>30</sup> Per rëb Jesús loj reeman achu loj guiëb reeman zian.

*Rugojn Jesús guiëtaman*

(Mt. 16:21-28; Lc. 9:22-27)

<sup>31</sup> Guzuloj Jesús rëb loj ree xbejnman:

—Rayal sagdiaj da't Bën guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

<sup>32</sup> Zagdxë basignia'man laa reeman. Dxel gulëëcaan Bëd laaman, rëbaman lojman chitëë rëbraman zian. <sup>33</sup> Per badxi' lojman baguiaa ree xbejnman, dxel gudilëman Bëd rëbaman:

—¿Bisüd lon, Satanás!, din ad por Diost zëëd ree xgab ni rüjnl, rüjnl zi'c naj xixgab bénguidxliuj.

<sup>34</sup> Dxel gurejdx ree xbejn Jesús con ree bën riga' yagaj, abi' rëbaman loj reeman:

—Bal chu rën gac da bejnan, ad rayalt güünman zi'c naj xixgabaman. Siibnejzaman guialzi ni tëdzaman abi' guidnalaman naj. <sup>35</sup> Din bën mazri rën guialnaban ni rajpaman loj guidxliuj guie, zadxin dxej gusëëbaman laan, per bën guiët por naj në por da diidxan, zajpaman guialnaban tiblayaa con Dios. <sup>36</sup> ¿Xhie gan güün bejn gapaman gra ni yu' loj guidxliuj bal canijtaman loj Dios? <sup>37</sup> Din ad zile't sii bejn xguialnabanman xanyabaa.

<sup>38</sup> Din bën yatunë naj në da diidxan niz loj ree bëndol bën ad zinalt ree xnejz Dios, bën riga' ree yan, ziangajc naj, najn Bën guxhaal Dios, yatunë'n laaman chi guialan con xguialrniabee da Dadan con ree xianjlaman.

## 9

<sup>1</sup> Rëb tëë Jesús loj reeman:

—Diidxliczi ganin, yu' ree bën za' guie, ad zëjtt xt guguaa reeman gui't xguialrniabee Dios.

*Bidxaa Jesús loj choon ree xbejnman*

(Mt. 17:1-13; Lc. 9:28-36)

<sup>2</sup> Chi goc xho'p dxej, wej Jesús tijb ruguia'ya, binëman Bëd, Jacob con Waj. Yagaj bidxaa Jesús niz loj reeman. <sup>3</sup> Balaa xabaman bacha', gojcan naquichbëj, achutczi rguuib lajd zian loj guidxliuj guie. <sup>4</sup> Dxel baguiaa reeman Elías në Moisejs cayünë reeman Jesús diidx.

<sup>5</sup> Abi' rëb Bëd lojman:

—Mextr, ¿zagdxen nadxu'n guie! Yagueenan choon ranch, tijban par lüj, tijban par Moisejs, zatijban par Elías.

<sup>6</sup> Per ad ragbeet Béd xhienin caneeman guial dád bidxeb reeman. <sup>7</sup> Loj hor guin biguiajt tijb zaj beenan bala guijc reeman, abi' loj zaj guin biguien cha' bejn rëbaman:

—Bén guie naj da Xi'nan, bén rën da'tan, gol bazoob xtiidxaman.

<sup>8</sup> Abi' chi baguiaa reeman gadëd lod za' reeman achutri za'në Jesús, tijbzi laaman za' yagaj. <sup>9</sup> La'tgaj cayguiajt reeman ruguia' guin, rëb Jesús loj reeman chitëe chu loj guiëb reeman ni baguiaa reeman, xt yaban Bén guxhaal Dios. <sup>10</sup> Abi' laaz reeman ragbee ni baguiaa reeman, rniabdiidx tëe loj lasa' reeman xhie rën guiëb guial yabanman loj ree bengüt. <sup>11</sup> Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaloj Elías gui't?

<sup>12</sup> Badxi'man laan rëbaman:

—Walican yaloj Elías gui't, laaman guzuxnejz gra. Per, ¿chexc zeel ca loj xtiidx Dios guial Bén guxhaal Dios sagdiaj da'taman ad zën tëët reeman laaman? <sup>13</sup> Naj rni lojdi guial mal bi't Elías, abi' beennë reeman laaman ni guyëntzi reeman zi'c ca loj xtiidx Dios ni rayal sacaman.

*Rayüjn Jesús tijb xin yu' xindxab luxdoo*

*(Mt. 17:14-21; Lc. 9:37-43)*

<sup>14</sup> Chi badxin Jesús lod za' sta'n ree xbejnman, baguiaaman dád zien bejn riga', në ree mextr rajc ley za' yagaj cadildiidx reeman con ree xbejnman. <sup>15</sup> Chi baguiaa reeman zëed Jesús, dád badxa loj reeman abi' baxüün reeman bicajpdioz reeman laaman. <sup>16</sup> Dxel gunabdiidxaman loj reeman rëbaman:

—¿Chexc zeel cadildiidxidi?

<sup>17</sup> Abi' rëb tijb bén za' yagaj:

—Mextr, zidnë' da xi'nan lojl guial yu' xindxab luxdoo abi' nusa'nx laax gop.

<sup>18</sup> Bantëez guin za'x, chi ru xindxab guin luxdoo rureeyujx laax, abi' rbëëx bichijn ro'x, raw tëe ree layix, dxel ratiaguix. Ma gunaaban loj ree xbejnl din nabëe reeman xindxab guin, per ad gojct reeman.

<sup>19</sup> Zeel rëb Jesús:

—¿Bén ad rliladxt! ¿Xt goc gazunë'n lëjt gadaan tëen lëjt? Gol tanë xinzii guie.

<sup>20</sup> Dxel binë reeman laax lojman. Per chi baguiaa xindxab guin laaman, laa bagüjtya'-gajquix xin guin, bareeyujx laax abi' rbixtüjpix ririi tëe bichijn ro'x. <sup>21</sup> Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diizd xindobëzix. <sup>22</sup> Dád zien volt ruzaalix laax loj guij në loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

<sup>23</sup> Dxel rëb Jesús lojman:

—¿Chexc zeel nal, “bal zajcan”? Graczan zajc bal chu rliladx naj.

<sup>24</sup> Dxel gurixdiaj xdadix rëbaman:

—¿Rliladxan lüj, gognë naj din chililadxan mazri!

<sup>25</sup> Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tëe, rniabeen lüj din yariil luxdoo xin guin. Ad bal yayejcril luxdoo zatijb.

<sup>26</sup> Dxel gurixdiaj xindxab guin, abi' bagüjtya'x laax zatijb abi' bariix luxdoo, basa'nx laax zi'c xingüt zeel rëb ree bejn guial ma güjtix. <sup>27</sup> Per gunaaz Jesús yaax gulesaman laax, dxel guzulix.

<sup>28</sup> Dxel bayu Jesús lënü con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëen xindxab guin luxdoo xin guin?

<sup>29</sup> Badxi' Jesúsán rëbaman:

—Par yarii lasa' ree xindxab guin, rayal cwedx guiniabidi Dios guiba'n tëedi.



*Rugojn Jesús zatijb guial guiëtaman**(Mt. 17:22-23; Lc. 9:43-45)*

<sup>30</sup> Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj, <sup>31</sup> guial culüü ree xbejnman, rëbaman:

—Yayü reeman Bén guxhaal Dios loj ree bén gugüjt laaman, per ni gac choon dxej yabanman.

<sup>32</sup> Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

*¿Chu mazri zojbloj?**(Mt. 18:1-5; Lc. 9:46-48)*

<sup>33</sup> Dxel badxin Jesús Capernaum con ree xbejnman, abi' badxin reeman yu lod zojb reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

<sup>34</sup> Per achet rëb reeman guial cadildiidx reeman lunejz chu reeman mazri zojbloj.

<sup>35</sup> Dxel gurej Jesús, gurejdxaman guidxiptio'p reeman, rëbaman:

—Bal chu bén rën gac mazri bén zojbloj lojdi, rayal güün laagajcaman zi'c tijb bén ad zojblojt güün tëëman sirv loj gradi.

<sup>36</sup> Dxel cwa'man tijb xindoo, bazujman laax galay reeman, zianz gudiidxaman laax, rëbaman:

<sup>37</sup> —Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man.

*Bén ad za't contr dunuj ree za'man con dunuj ree**(Lc. 9:49-50; Mt.10:42)*

<sup>38</sup> Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

<sup>39</sup> Badxi' Jesúsán rëbaman:

—Ad rudxoondi, din bén rüjn milagr por da guialrniabeen, ad zile't guinieeguidxaman naj. <sup>40</sup> Bén ad za't contr dunuj ree, za'man con dunuj ree. <sup>41</sup> Chutëëz bén guneë majsi tibxijgzi nijs lojdi guial najdi xbejn Cristo, diidxli rnin guial ziangajc yu' ni gudëëd Dios lojman.

*Bén ruzaalguiiw bejn din güünman dol**(Mt. 18:6-9; Lc. 17:1-2)*

<sup>42</sup> 'Chutëëz bén guzaalguiiw tijb bén qui rliladxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo.

<sup>43</sup> Bal laagajc yaal rusajb lüj loj dol, zagdxeli gutü'n. Mazri zagdxé chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü', <sup>44</sup> lod ad rëjtt ree bizog lod ad rayü' tëët bajl. <sup>45</sup> Abi' bal laagajc guia'l rusajb lüj loj dol, zagdxeli gutü'n. Mazri zagdxé chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü', <sup>46</sup> lod ad rëjtt ree bizog lod ad rayü' tëët bajl. <sup>47</sup> Bal laagajc guiaalolj rusajb lüj loj dol, zagdxeli gulëën. Mazri zagdxé chu' con tiblodzi guiaalolj xanyabaa guial che con groplad guiaalolj gabijl lod yu' bajl ni ad yu't dxej yayü', <sup>48</sup> lod ad rëjtt ree bizog lod ad rayü' tëët bajl.

<sup>49</sup> 'Zi'c ru zëd guijc guialraw, ziangajc ree bén rliladx naj sagdiaj reeman din gac reeman naya.

<sup>50</sup> 'Ni zagdxé naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëë saquidi zi'c zëd ni ad rüjnt sirv, gol gubajnnë tëë lasa'di zagdxé.

*Rülüü Jesús xcwent guial rala' lasa'**(Mt. 19:1-12; Lc. 16:18)*

<sup>1</sup> Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbraman. <sup>2</sup> Yu' ree bénfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—¿Zajc yala' xinguaaw lacheelix ya?

<sup>3</sup> Badxi'man laan rëbaman:

—¿Xhie gunabee Moisejs güüнди?

<sup>4</sup> Abi' rëb reeman:

—Cwëjb Moisejs yala' xinguaaw lacheelix, per gudëédix gui'ch tia'man guial ma bala' reex.

<sup>5</sup> Dxel rëb Jesús:

—Rëb Moisejs gac zian guial nadidi. <sup>6</sup> Per guia'xchej chi gule'cchaaw Dios guidxliuj, “beenman xinguaaw con béngunaa”. <sup>7</sup> “Zeel xinguaaw gusa'n xdad xniaax din guibannë lacheelix, <sup>8</sup> dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi. <sup>9</sup> Zeel, bénguidxliuj ad rayalt yala'man lasa' ni ma bachajg Dios.

<sup>10</sup> Chi bayu reeman lënü, gunabdiidx ree xbejnman lojman zatijb, xcwent ni guneeman. <sup>11</sup> Abi' rëbaman loj reeman:

—Xin rala' lacheel, abi' rtia'x ben ren dolan cayüjnx, <sup>12</sup> ziangajc bal tijb béngunaa yala' lacheelaman abi' tia' xin ren laaman, dolan cayüjnman.

*Rüjnle' Jesús xindoo ree*

*(Mt. 19:13-15; Lc. 18:15-17)*

<sup>13</sup> Binë ree bejn xindoo ree lod za' Jesús din gudxiib yaaman guiyc reex. Per ree xbejnman guzuloj cadilë reeman bén binë ree laa reex. <sup>14</sup> Chi baguiaa Jesús zian, balenman zeel rëbaman:

—Gol badëéd mod gui't reex lon, ad bal rudxoondi. Din lod rniabee Dios naj par ree bén naj zi'c laa reex. <sup>15</sup> Diidxliczi rnin, bén ad rliladxt xguialrniabee Dios zi'c tijb xindoo, ad zile't chu'man lod rniabee Dios.

<sup>16</sup> Dxel gudiidx Jesús laa reex, badxiib yaaman guiyc reex, beenle'man laa reex.

*Xcwent tijb xinrijcw*

*(Mt. 19:16-30; Lc. 18:18-30)*

<sup>17</sup> Chi ma gusnuu xnejz Jesús, ruxüün tijb xinguaaw bidxinx abi' bazuxibix lojman, dxel gunabdiidxix rëbix:

—Mextr za'c, ¿xhie rayal günan din ga'pan guialnaban tiblayaa con Dios?

<sup>18</sup> Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios. <sup>19</sup> Lüj rajc ree mandamient, “Ad gugüjtil bejn, ad sunël béngunaa ren, ad cwanl, ad cwëäl xtiidx bejn ad gusquiee tëel, gojp respejt xdad xniaal.”

<sup>20</sup> Dxel rëbix loj Jesús:

—Mextr, gra ree ni guin cayünan diidz xindoon.

<sup>21</sup> Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëéd milia guin loj ree bénprob, zian gapil guialnaza'c xanyabaa dxel guidnalil naj majsi xhietëéz saquil.

<sup>22</sup> Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

<sup>23</sup> Dxel baguiaa Jesús loj gra reeman, abi' rëbaman loj ree xbejnman:

—¿Dád nawëég naj chu' benrijcw loj xguialrniabee Dios!

<sup>24</sup> Dád badxa loj ree xbejnman ni rëbaman. Per rëbaman loj reeman zatijb:

—Xi'n, ¡bén yu'guijc mazri ni rajpaman, dád nawëég naj chu'man loj xguialrniabee Dios! <sup>25</sup> Adli nawëégt téd tijb camell xan gagux guial chu' tijb benrijcw loj xguialrniabee Dios.

<sup>26</sup> Chi biguien reeman diidx guin ree, mazri badxa loj reeman, dxel rniabdiidx loj lasa' reeman, rëb reeman:

—¿Chu zajc laa loj xcasti Dios?

<sup>27</sup> Baguiaa Jesús loj reeman, abi' rëbaman:

—Par bejn nawëëgan, per par Dios ad nawëëgtan din par Dios graczan zile' gac.

<sup>28</sup> Dxel guzuloj rëb Bëd loj Jesús:

—Dunujn basa'nan graczi ni raya'pan persi zudnaalan lüj.

<sup>29</sup> Badxi' Jesúsán rëbaman:

—Diidxiczi ganin lëjt, chutëëz bën rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj në por xtiidxza'c Dios, <sup>30</sup> loj guidxliuj guie tia'man tibgayuu volt mazri guial loj ni basa'nman, bal najn lidxaman, bijchaman, bizanman, xniaaman, xi'nman, në xguidxliujman, majsi guidib wazagdiaj, abi' guidxin dxej gapaman guialnaban tiblyaa con Dios. <sup>31</sup> Per dád zien ree bën naj bën yaloj yan, gac reeman bën bigra, guiáad ree bën naj bën bigra yan, gac reeman bën yaloj.

*Rugojn Jesús zatijb guial guiëtaman*

(Mt. 20:17-19; Lc. 18:31-34)

<sup>32</sup> Chi zë reeman Jerusalén, ned Jesús loj ree xbejnman, abi' dád radxaloj reeman guial zëman Jerusalén, guiáad ree bën nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacaman:

<sup>33</sup> —Rëbaman loj reeman: Lëjt ragbee guial ziyó' ree Jerusalén, abi' naj najn Bén guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtan, yayü tëë reeman naj loj ree bën ad najt bën Israel.

<sup>34</sup> Guze' reeman naj, gucojpx xhiejn reeman lon, quin reeman gugüjt tëë reeman naj, per yayon dxej yabanan.

*Ni gunab ree Jacob con Waj*

(Mt. 20:20-28)

<sup>35</sup> Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

<sup>36</sup> Abi' gunabdiidxaman rëbaman:

—¿Xhie rëndi günan?

<sup>37</sup> Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu' xladbeel, zatijb dunujn yadxu' xladruvejsil.

<sup>38</sup> Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaagdiajn ya? ¿Zajc guiëtidi zi'c guiëtan ya?

<sup>39</sup> Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët tëëdi zi'c naj, <sup>40</sup> per guial cwedi da ladbeen o da ladruvejsan, ad najt rayal gune laan, din ma najn par ree bën rayal laan.

<sup>41</sup> Chi biguien zachii xbejn Jesús ni rëb reeman, dád balen reeman Jacob con Waj, <sup>42</sup> per gurejdx Jesús laa reeman rëbaman:

—Lëjt ragbee guial ree bën rniabee loj guidxliuj guie, rniabee reeman bejn ree zi'ctzi rën reeman, guiáad ree bën zojbloj rüjnnë reeman bejn ree zi'ctzi rën reeman por guialrniabee ni rajp reeman. <sup>43</sup> Per con lëjt ad rayalt gac zian. Din bal chu rën gac bën rniabee lojdi, rayal güünman sirv lojdi, <sup>44</sup> guiáad bën rën gac bën zojbloj, rayal güünman sirv loj gradi zi'c bën nado'. <sup>45</sup> Din ni'qui naj najn Bén guxhaal Dios, ad zialtan loj guidxliuj par güün ree bejn sirv lon, zialan din günan laa reeman sirv, abi' con da guialnabanan gaguixan por xtol zien ree bénguidxliuj.

*Rayajc guialoj tijb xin ad ranit loj la Bartimeo*

(Mt. 20:29-34; Lc. 18:35-43)

<sup>46</sup> Bidxin reeman guiedx Jericó, abi' chi ma cayrii Jesús luguiedx guin, con ree xbejnman në ree benzien. Tijb xin ad ranit loj lax Bartimeo, xi'n bën la Timeo, zojbix cwë'

nejz rniabix carda. <sup>47</sup> Chi biguiejnx cadöd Jesús bén Nazaret niz yagaj, guzuloj cabidxa'x rëbix:

—¡Jesús, xdiaa Davi, baya naj!

<sup>48</sup> Dád zien ree bejn ridilë laax din yacwëöz ro'x. Per mazri rejs rbidxa'x rëbix:

—¡Xdiaa Davi, baya naj!

<sup>49</sup> Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

<sup>50</sup> Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús. <sup>51</sup> Gunabdiidx Jesús lojx rëbaman:

—¿Xhie rënl gūnan por lüj?

Badxi'xan rëbix:

—Mextr, rënan yani lon.

<sup>52</sup> Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

## 11

### *Ru Jesús Jerusalén*

(Mt. 21:1-11; Lc. 19:28-40; Jn.12 :12-19)

<sup>1</sup> Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman, <sup>2</sup> rëbaman:

—Gol chej guiedxdo riga' delant guin. Chi guidxindi guidaaglojdi tijb burquie'n, caduub achut wabib laab. Gol guxhiequib gol tanëb. <sup>3</sup> Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

<sup>4</sup> Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiec reeman laab.

<sup>5</sup> Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

<sup>6</sup> Badxi' reeman laan zi'c rëb Jesús, abi' cwëjb ree bén guin zinë reeman laab. <sup>7</sup> Bidxinnë reeman laab lojman, badxiib xab reeman xijchib, persi gudxibaman laab. <sup>8</sup> Zien ree bejn riguijxh xab niz lod rdëdaman, yu' tëë reeman rutüüg zijn persi rguijxh reeman laan niz lod rdëdaman.

<sup>9</sup> Abi' zi'c ree bén ned, në ree bén nal rbixdiaj reeman, rëb reeman:

—¡Gagnëman dunuj ree yan! ¡Nagle' bén zëed por Dios! <sup>10</sup> ¡Nagle' bén zëed nabee zi'c dux béngulal ree rey Davi! ¡Quixtëë dux Dad ree Dios Bén yu' xanyabaa!

<sup>11</sup> Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxiptio'p ree xbejnman Betania guial ma gudxe.

### *Bazaal Jesús diidx guijc yag higo*

(Mt. 21:18-19)

<sup>12</sup> Chi bareguiaal, barii reeman Betania. Dxel guzuloj calaan Jesús. <sup>13</sup> Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xtiamptanan. <sup>14</sup> Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!

Abi' biguiejn ree xbejnman ni rëbaman.

### *Rabëë Jesús bén ruto' ree ro' yadooro' Jerusalén*

(Mt. 21:12-17; Lc. 19:45-48; Jn. 2:13-22)

<sup>15</sup> Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëëman bén cuto' ree në ree bén cazii. Barexguiataman xmex ree bén ruchaa

milia con xyagxhil ree b n ruto' ree palom, <sup>16</sup> ad rti jbtaman xhie chu'n  ree bejn ro' yadoo guin. <sup>17</sup> Abi' guzuloj cul  man laa reeman, r baman:

—Loj xtiidx Dios r b: “Lidxan grii laj yu lod rbejdx rniab bejn Dios.” Per l jt n jndan zi'c lidx ree xingubaan.

<sup>18</sup> Bixhioz rniabee ree bixhioz con ree mextr rajc ley, chi biguejn reeman ni r b Jes s, guzuloj raguuil reeman mod xhienaag gug jt reeman Jes s, guial rdxeb reeman laaman din gra bejn radxaloj ni rul  man. <sup>19</sup> Chi ma caxhin, bazan  ree xbejn Jes s Jerusal n.

### *Tijb yag higo ni gubidx*

(Mt. 21:20-22)

<sup>20</sup> Chi bareguiaal rsildoo, bad d reeman niz lod zojb yag higo guin, abi' baguiaa reeman ma gubidx diizd liujn. <sup>21</sup> Dxel basaaladx B d ni r b Jes s, abi' r baman lojman:

—Mextr,  baguiaa yag higo ni bazaalil diidx guijc ma gubidxan!

<sup>22</sup> Badxi' Jes san r baman:

—Gol bililadx Dios. <sup>23</sup> Din diidxliczi ganin, bal chu gui b loj guia' guin: “Bis d guie biajb loj nijsdoo”, bal id yu' naw g luxdooan, bal rliladxaman, gac ni guneeman. Zian gacan. <sup>24</sup> Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan. <sup>25</sup> Gui ad chi ribejdx rniabidi Dios, bal yu' b n rdxe'chidi, gol beenman perdon din ziangajc xDadidi b n yu' xanyabaa g  nman perdon xtolidi. <sup>26</sup> Din bal id z jndi perdon, ziangajc xDadidi B n yu' xanyabaa ad z jntaman perdon xtolidi.

### *Xguialrniabee Jes s*

(Mt. 21:23-27; Lc. 20:1-8)

<sup>27</sup> Chi badxin reeman Jerusal n. Chi caza Jes s niz l n yadooro' Jerusal n guin, dxel gubig bixhioz rniabee ree bixhioz con ree mextr rajc ley con ree xguxtis ree b n Israel, <sup>28</sup> gunabdiidx reeman loj Jes s, r b reeman:

— Xhie guialrniabee rajpil zeel r jnl ni guin ree?  Chu banee guialrniabee lojl g  nl zian?

<sup>29</sup> Badxi' Jes san r baman:

—Ziangajc naj yu' ni ganabdiidxan lojdi, bal yadxi'dan dxel ganin chu banee guialrniabee g nan ni guin ree. <sup>30</sup>  Chu guxhaal Waj bidgaroobnijsaman bejn ree?  Dios ya o b nguidxliuj? Gol badxi'n.

<sup>31</sup> Dxel guzuloj r b loj lasa' reeman:

—Bal yaguie'ch ree, Dios guxhaal laaman, zanaman: “ Chexquiza zeel ad bililadxtidi laaman?” <sup>32</sup> Ad zajc t  t yaguie'ch ree, b nguidxliuj guxhaal laaman.

R b reeman zian guial rdxeb reeman bejn ree, din graczi reeman rliladx guial gojc Waj tijb b n bad   xtiidx Dios loj ree bejn, b n wali gunee xtiidx Dios. <sup>33</sup> Abi' badxi' reeman laan r b reeman:

—Ad rayagbeetan.

Zeel r b Jes s loj reeman:

—Ni'qui naj ad zanitan lojdi chu banee guialrniabee g nan ni guin ree.

## 12

### *Xcwent ree mojs guijdx*

(Mt. 21:33-46; Lc. 20:9-19)

<sup>1</sup> Dxel guzuloj caneen  Jes s laa reeman con ganax ree cwent, r baman:

—Tijb bejn gux binman uv loj xguiniaaman, dxel beenman gurajl gad d ro'n, beenchaaw t  man tijb luar lod grii xnijs uv guin, abi' beenman tijb yu ya da't lod guiya'p guiniaa guin.

'Zianz bad  man laan garol loj ree b n g  n laan dxiin, briitaman z man zijt. <sup>2</sup> Chi bidxin dxej yala' reeman uv guin, guxhaal tijb xmojsaman din chigxiiman ni rayalaman.

<sup>3</sup> Per ree b n r jn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi. <sup>4</sup> Dxel guxhaal b n naj xguidxliuj laan zatijb xmojsaman, per ziangajc, bacaaguiaj reeman laaman, gula' reeman guijcaman abi' guneeguijdx

reeman laaman. <sup>5</sup> Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tää reeman bagüjt reeman.

<sup>6</sup> 'Dxel bén naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: "Zajp reeman da xi'n nan respejt."

<sup>7</sup> Per ree bén guin, rëb loj lasa' reeman: "Xin guin naj xin yaya'nnë guidxliuj guin, yagüjt reex din gacan du xieen ree." <sup>8</sup> Dxel gunaaz reeman laax, bagüjt reeman laax abi' babëë reeman laax loj guidxliuj guin.

<sup>9</sup> Dxel gunabdiidx Jesús loj ree bén caneenëman, rëbaman:

—Yan, ¿xhie nalaxidi güün bén naj xguidxliuj laan? Zi'taman din gugüjtaman bén guin ree, dxel gudëëman guidxliuj guin loj ree ben ren.

<sup>10</sup> ¿Nid wayoolidi loj xtiidx Dios ya?, lod rëb:

Guiaj ni gulëëgo'n ree bén rüjn yu,  
laan goc ni mazri been sirv gojcnë yu guin.

<sup>11</sup> Zian been dux Dad ree Dios, zeel radxaduloj ree.

<sup>12</sup> Chi biguiejn ree bén rniabee guin ni gunee Jesús, guyën reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

#### *Xcwent Impuest*

(Mt. 22:15-22; Lc. 20:20-26)

<sup>13</sup> Guxhaal reeman tio'p choon ree bénfarisew në tio'p choon ree xbejn Herodes lod za' Jesús, din yaguiil reeman mod guiniee Jesús diidx ni gudxiib reeman guijc din gac cwe'c reeman xguialquiaman. <sup>14</sup> Abi' rëb reeman:

—Mextr, dunujn rayagbee guial lüj rníee diidxli ad ridxga' täätil chu naj bejn. Din par lüj tiblojzi naj bejn, abi' walil rulüül guial xhienaag rën Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

<sup>15</sup> Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

<sup>16</sup> Dxel badëëd reeman cintabl guin lojman, abi' rëbaman:

—¿Chu loj ca lojn, chu tää laj ca lojn?

Badxi' reeman laan rëb reeman:

—Loj César ca lojn në lajman.

<sup>17</sup> Dxel rëb Jesús loj reeman:

—Gol badëëcliza loj César ni naj xieen César, guiáad loj Dios gol badëëd ni naj xieen Dios.

Dád badxa loj reeman ni rëbaman.

#### *Xcwent guial yaban ree bengüt*

(Mt. 22:23-33; Lc. 20:27-40)

<sup>18</sup> Tio'p choon ree bénsaducew bignaj Jesús, laa reeman ad riladxt guial yaban ree bengüt. Zeel gunabdiidx reeman loj Jesús rëb reeman:

<sup>19</sup> —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xin güt guin guxhliianë béngunaa bizëjb guin din chu' xi'n reex zi'c gulüü xi'n xingüt guinan. <sup>20</sup> Guyu tijb famil lod goc reex gajdx bijch. Baxhliiaa xin yaloj guin, per güjtix abi' ad guyut xi'n reex con lacheelix. <sup>21</sup> Dxel bijch barojpix baxhliianë béngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin, <sup>22</sup> abi' zianz baxhliianëman guigajdx reex, zianz bara reex güjt achut xi'n reex guyu con laaman. Ni bigra tää në béngunaa guin güjt. <sup>23</sup> Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhliianë laaman?

<sup>24</sup> Badxi' Jesús reeman:

—Ad laat naj xgab rüjndi guial ad nünbeetidi xtiidx Dios ad ragbee täätil xhienaag naj xguialrniabeeman. <sup>25</sup> Din chi yaban ree bengüt, ad zuxhliatri reeman, ad zudëë täätri xi'n reeman guxhliiaa, ma gac reeman zi'c ree anjl yu' xanyabaa. <sup>26</sup> Abi' xcwent ni yaban

ree bengüt, ¿nid wayoolidi loj xlibr Moisejs ya, lod rëb guial baguiaaman yag ni cayë'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.” <sup>27</sup> Din Dios ad najtaman xDios ree bengüt, najman xDios ree bën naban. Zeel ad laat naj xgab rüjndi.

*Mandamient mazri zobjloj*

(Mt. 22:34-40)

<sup>28</sup> Chi biguiejn tijb mextr rajc ley badxi' Jesús xtiidx reeman zagdxe guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zobjloj loj gra ree mandamient?

<sup>29</sup> Badxi'man laan rëbaman:

—Mandamient mazri zobjloj rëban: “Gol bacaagdiajg, bën Israel, dux Dad ree Dios, tijbzi laaman naj Dios. <sup>30</sup> Guyën xDadil Dios guidiblagaa guidib guiyc guidib ladxil.” Laan naj mandamient mazri zobjloj. <sup>31</sup> Mandamient rarojp, rëban: “Guyën ree ben ren zi'c rën lüj gajc.” Achet mandamient mazri zobjloj guial loj grop ree mandamient guie.

<sup>32</sup> Dxel rëb mextr guin loj Jesús:

—Zagdxequi guneel, Mextr. Waliquil tijbzi Dios yu', achutri ben ren yu'. <sup>33</sup> Abi' guidib guiyc guidib ladx bejn guiënman laaman guidiblagaa, guiën tëëman ben ren ree zi'c rën laagajcaman. Laan naj ni mazri zobjloj guial loj gra gon ni rudëed bejn loj Dios.

<sup>34</sup> Chi biguien Jesús badxi' mextr guinan zagdxe, rëbaman:

—Ad zijtt za'l par chu'l loj xguialrniabee Dios.

Dxel achutri bayax xhie niniabdiidx lojman.

*Chu loj xdiaa za Cristo*

(Mt. 22:41-46; Lc. 20:41-44)

<sup>35</sup> Chi culüü Jesús bejn ree lën yadooro' Jerusalén, gunabdiidxaman loj reeman rëbaman:

—¿Chexc zeel rëb ree mextr rajc ley guial za Cristo loj xdiaa rey Davi? <sup>36</sup> Awa Davi guin gajc gunee por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxe'ch ree lüj guia'l.”

<sup>37</sup> Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaagdiajg reeman xtiidxaman.

*Ni rüjn ree mextr rajc ley*

(Mt. 23:1-36; Lc. 11:37-54; 20: 45-47)

<sup>38</sup> Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdxe, ruladx tëë reeman gugajpdioz ree bejn laa reeman con respejt niz lunejz.

<sup>39</sup> Abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman. <sup>40</sup> Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

*Gon badëed tijb béngunaa bizëjb*

(Lc. 21:1-4)

<sup>41</sup> Tijb dxej zobj Jesús lën yadooro' Jerusalén niz lod za' alcancia ni ru gon, abi' ruguiaaman rgu' ree bejn milia lën alcancia guin, në zien ree benrijcw rgu' zro' milia.

<sup>42</sup> Dxel bidxin tijb béngunaa bizëjb prob, badxe'man tio'p zintablido ni lasajc ta'nzi.

<sup>43</sup> Abi' gurejdx Jesús bën naj ree xbejnman, rëbaman:

—Diidxli rnin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin. <sup>44</sup> Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

## 13

*Rëb Jesús guial yaze'n yadooro' Jerusalén**(Mt. 24:1-2; Lc. 21:5-6)*<sup>1</sup> Chi barii Jesús lën yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tëë naj ree yu guin!

<sup>2</sup> Badxi' Jesúsán rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

*Ni gac chi gad guidxliuj nit**(Mt. 24:3-28; Lc. 21:7-24; 17:22-24)*<sup>3</sup> Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Bëd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:<sup>4</sup> —Guna, ¿goc gac zian? ¿Xhie sen gac chi ma zidyob gac zian?<sup>5</sup> Badxi' Jesús laan rëbaman:—Gol gojp cudad chitëë chu gusquiee lëjt. <sup>6</sup> Din zien ree bën gui't guiëb reeman guial por naj zëëd reeman, guiëb tëë reeman: “Naj naj Cristo”, abi' gusquiee reeman zien bejn.<sup>7</sup> Per lëjt chi guiguiejndi cayajc wadjil o zëëb diidx gac wadjil, ad guidxebidi; din najczi gac zian, per ad por laatan ma bidxin dxej nit guidxliuj. <sup>8</sup> Din til nacion con stijb nacion, til tëë bën rajp guialrniabee con stijb bën rajp guialrniabee, gui't tëë ree xudoxh në gubijn niz ni niz guie. Zian gac chi ma suloj ree guialzi ni naj gac.<sup>9</sup> Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman. <sup>10</sup> Per yalojxgaj rüjn naguiejn guire'ch xtiidxza'c Dios loj gra ree nacion, dxelri nit guidxliuj. <sup>11</sup> Chi chinë reeman lëjt loj ree guxtis, ad bal chu'di xgab, ad bal güün tëëdi xgab xhie guiëbidi loj reeman. Gol gunee diidx gunee Dios lëjt loj hor guin. Din ad lëjtтан guiniee, xSprijt Diosan guiniee. <sup>12</sup> Abi' guidxin dxej yayü bejn laagajc bijchaman din guiëtix, ziangajc ree bën naj dad yayü laagajc xi'n reeman, abi' ree bejn yayü xdad xniaa reeman par guiët reeman. <sup>13</sup> Gra bénguidxliuj guidxe'ch lëjt guial najdi da bejnan, per bën sudxi'ch loj ni rliladxaman naj xt dxej chigra guibanman, laaman yayal xanyabaa.<sup>14</sup> 'Chi guguiaadi zojb tijb ni dxuudx lën yadooro' Jerusalén, zi'c bacaa Daniel, bën badëë xtiidx Dios loj ree bejn diidz gulal (bën gool ree gui'ch guie, gol bignia'n), guial bën zojb ree niz Judea chigxüün reeman niz dajn. <sup>15</sup> Guiáad bën yë'p guijc yu lidx dxejzii, ad yayu lënu lidxaman tia' xhie xieenman. <sup>16</sup> Guiáad bën za' dajn, ad yajejc lidxaman chigxii xabaman. <sup>17</sup> jProbza ree béngunaa nüü xi'n o bën ca' ree xindobëz lën ree dxej zii! <sup>18</sup> Gol gurejdx gunab Dios chitëë yayal gac zian tiamp nayaag, <sup>19</sup> din dád guialziro' chu' dxejzii ree, zi'c ad wayajctczi diidz chi beenchaaw Dios guidxliuj, ad yu' tëëtri dxej gac zian. <sup>20</sup> Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bën rënman, bën gulejman par laaman.<sup>21</sup> 'Bal chu na lojdi: “Gol baguiaa, laa Cristo za' guie”, o “laaman za' ni”, ad bal chililadxidi. <sup>22</sup> Din gui't zien ree bejn, na reeman guial laa reeman naj Cristo o na reeman laa reeman naj bën rudëë xtiidx Dios loj ree bejn, abi' güün reeman milagr ree në ree graloy ni yadxaloy ree bejn, din gusquiee reeman laa reeman, abi' bal zile'n xt zajc në ree bën gulej Dios gusquiee reeman. <sup>23</sup> Zeel gol gojp cudad, ma bagojnxgajn lëjt gra ni gac.*Gui't Bén guxhaal Dios zatijb**(Mt. 24:29-35, 42-44; Lc. 21:25-36)*<sup>24</sup> 'Per lën ree dxej ni ma gudëd gra ree guialzi guin, zacajy loj gubijdx abi' ad zusnitri bëëw, <sup>25</sup> zayajb ree bajl yu' xanyabaa guiáad gra ree ni yu' xanyabaa guiniib reen. <sup>26</sup> Dxel guguiaa ree bejn Bén guxhaal Dios rdiinman bacha' zëëdaman loj zaj con xguialrniabee



naroobaman. <sup>27</sup> Abi' guixhiaal ree xianjlaman guidiblagaa guidxliuj din guchajg reeman lasa' ree bën ma naj par Dios.

<sup>28</sup> 'Gol badxe'guijc ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa. <sup>29</sup> Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin. <sup>30</sup> Diidxli rnin lëjt guial gra ree ni guin gac chi gad ree bën naban lën ree dxej guie guiët. <sup>31</sup> Guidxliuj në xanyabaa zanjit reen, per da diidxan ad zadëdt gacan cumplid.

<sup>32</sup> 'Per achut ragbee xhie dxejn xhie tëë horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

<sup>33</sup> 'Zeel gol gojp cudad, gol guzujsin tëë, gol gurejdx gunab Dios din ad ragbeetidi goc gac zian. <sup>34</sup> Ni guin ree naj zi'c chi ririi tijb bejn rejman zijt. Abi' chi gadaman grii rudëëman dxiin loj tijbgaj ree xmojsaman, rniabee tëëman susin bën rajp ro' port. <sup>35</sup> Yan ziangajc lëjt gol guzujsin, din ad ragbeetidi goc o xhie horan guialan bal chi ma ribej guial ya, o garol guial, o chi ma rbidxa' guid, o rsildoo. <sup>36</sup> Zeel gol guzusin din bal dxejczy guialan ad guidxaaglojn lëjt ad cayüjntidi zi'c rayal. <sup>37</sup> Abi' ni canin lojdi, loj gradi caninan: Gol guzujsin.

## 14

*Baya'n reeman diidx xhienaag guiniaaz Jesús*  
(Mt. 26:1-5; Lc. 22:1-2; Jn.11 :45-53)

<sup>1</sup> Zatio'p dxej riaadx gal lanij pascw, lanij raw ree bejn guiadxtil ni ad yu't lewadur. Abi' ree bixhioz rniabee ree bixhioz con ree mexr rajc ley, raguuil reeman mod xhienaag gusquiee reeman Jesús, din guiniaaz reeman laaman gugüjt reeman laaman. <sup>2</sup> Per rëb reeman:

—Ad zaguieent ree zian loj ree dxej lanij guin, chitëë gac naquie'.

*Baroob tijb béngunaa perfum guijc Jesús*  
(Mt. 26:6-13; Jn.12 :1-8)

<sup>3</sup> Dxel chi za' Jesús luguiedx Betania lidx Simón, bën gunee reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojcchaawnën ganax nardo, zianz guxhalaman ro' lumejt guin persi baroobaman perfum guin guijc Jesús. <sup>4</sup> Abi' yu' ree bën za' yagaj bidxe'ch, rëb loj lasa' reeman:

—¿Chexc zeel guxhie'man perfum guin? <sup>5</sup> Awa zajc nido'n choon gayuu denario din nüjnan yudar bënprob ree.

Abi' caneeguijdx reeman béngunaa guin.

<sup>6</sup> Per rëb Jesús loj reeman:

—Gol basa'nman. ¿Chexc zeel ruslendi laaman? Zagdxe naj ni beenman con naj.

<sup>7</sup> Zianczi sunëdi bënprob ree, abi' zajc güüнди laa reeman yudar chi guiëndi, sa'n naj ad ziantczy sunëdi naj. <sup>8</sup> Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan. <sup>9</sup> Diidxliczi rnin lëjt, guial guidib loj guidxliuj bantëëz guin guiniee reeman xtiidxza'c Dios, zü ree bejn diidx ni been béngunaa guin con naj din gusaaladx reeman laaman.

*Baguuil Judas mod xhienaag yayüman Jesús*  
(Mt. 26:14-16; Lc. 22:3-6)

<sup>10</sup> Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman. <sup>11</sup> Chi bigueijn ree bixhioz guin zian, dád babaa reeman. Abi' rëb reeman gudëëd reeman milia lojman. Dxel guzuloj raguuilaman mod xhienaag yayüman Jesús.

*Gudawnë ree xbejn Jesús xche*  
(Mt. 26:17-29; Lc. 22:7-23; Jn.13 :21-30; 1Co.11 :23-26)

<sup>12</sup> Dxej ni guzuloj lanij raw ree b́en Israel guidxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

<sup>13</sup> Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaadi tijb xinguaaw ca' re yu' nijs. Gol chinalix. <sup>14</sup> Abi' lod yayux, gol güjdx loj b́en naj lidxan: “Na mextr: ¿Ban lënú gawnë ree xbejnman yan guxhin pascw?” <sup>15</sup> Dxel guluüman lëjt tijb lënú naroo ni rarojp cwaa, ma najcchaaw lënú guin. Yagaj gol been ni yadaaw ree xche.

<sup>16</sup> Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

<sup>17</sup> Chi gure guiaal, bidxin Jesús con guidxiptio'p ree xbejnman. <sup>18</sup> Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, b́en cayawnë naj, laaman yayü naj.

<sup>19</sup> Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

<sup>20</sup> Badxi'man laan rëbaman:

—Loj guidxiptio'pidi, tijb lëjtan, b́en cugajdx xguidxtil loj gajc pliajt lod cugajdx da guidxtilan, laaman. <sup>21</sup> Walican guial B́en guxhaal Dios naj sacraman zi'c ca loj xtiidx Dios. Per, ¡prob b́en yayü laaman! Zagdxeli naj par laaman ad niutaman loj guidxliuj

<sup>22</sup> La'tgaj cayaw reeman, cwa' Jesús guidxtil abi' badëëman quixtëë loj Dios, dxel gula'man laan badëëman loj reeman, rëbaman:

—Gol gudaw guidxtil guie, laan naj da cuerpan.

<sup>23</sup> Dxel cwa'man tijb cojp yu' vin, chi gulox badëëman quixtëë loj Dios, badëëman cojp guin loj reeman, abi' gra reeman gu' vin yu' lojn. <sup>24</sup> Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejz cüb xhienaag gap ree bejn perdon loj Dios. <sup>25</sup> Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

*Rëb Jesús guial guiëb Béd ad nünbeetaman laaman*

*(Mt. 26:30-35; Lc. 22:31-34; Jn.13 :36-38)*

<sup>26</sup> Chi gulox biil reeman tijb cant par Dios. Dxel zë reeman ruguia' Olivos. <sup>27</sup> Dxel rëb Jesús loj reeman:

—Graczi ti'nladx naj yan guxhin, zi'c ca loj xtiidx Dios lod rëb: “Gugüjtan b́en rajp ree xiil, abi' guire'ch reeb.” <sup>28</sup> Per chi yabanan, yaloj naj ganeed lojdi gan Galilea.

<sup>29</sup> Dxel rëb Béd lojman:

—Majsi gra reeman tio'nladx lüj, per naj ad zaro'nladxtan lüj.

<sup>30</sup> Badxi' Jesús rëbaman:

—Najn rni lüj Béd, yan guxhin gajc chi gad güd cwidxa' tio'p volt, choon volt mal rëbil guial ad nünbeetil naj.

<sup>31</sup> Per naguiejn rüjn Béd rëbaman:

—Majsi guiëtnë'n lüj, per ad zëtan guial ad nünbeetan lüj.

Abi' graczi reeman rëb zian.

*Rbejdx rniab Jesús Dios lod la Getsemani*

*(Mt. 26:36-46; Lc. 22:39-46)*

<sup>32</sup> Chi bidxin reeman tijb luar la Getsemani, dxel rëb Jesús loj ree xbejnman:

—Gol gurejsii guie, la'tgaj gabledx ganaaban Dios.

<sup>33</sup> Abi' binëman Béd, Jacob con Waj, dxel guzuloj guyunayaman abi' ad nixtri yu' luxdooman. <sup>34</sup> Zianz rëbaman loj reeman:

—Yu' naya da't luxdon, ruluü ma gugüjtan naj. Gol baya'n guie ad gaayëjsidi.

<sup>35</sup> Abi' guzaman zata'n, zianz gurerulojman, gunabaman loj Dios, bal zile' téd ni naj sagdiajman. <sup>36</sup> Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdiajn. Per ad gac zi'c rënan, rayal gac zi'c rënl.

<sup>37</sup> Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya? <sup>38</sup> Gol gurenaa, gol gurejdx gunab Dios chitëë güün xindxab lëjt gan. Din rëndi güüendi zi'c rayal, per xcuerpidi ad rtiëjbtan.

<sup>39</sup> Dxel zëman zatijb persi gurejdx gunabaman Dios con diidx guin gajc ree. <sup>40</sup> Chi badxinman lod riga' reeman, laagajc reeman naga'yëjs zatijb, guial yu' da't bacaal loj reeman, abi' ni'quid radxejlt xhie guiëb reeman lojman. <sup>41</sup> Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbaaalidi din naj, najn Bén guxhaal Dios ma bidxin hor yayü reeman naj loj ree bëndol. <sup>42</sup> Gol bixche, yo' ree, laa bén yayü naj ma zëëd gajxh.

#### *Gunaaz reeman Jesús*

(Mt. 26:47-56; Lc. 22:47-53; Jn.18 :2-11)

<sup>43</sup> Sta caneenë Jesús laa reeman chi bidxin Judas, bén goc tijb ree xbejnman. Bidxinnëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel. <sup>44</sup> Abi' Judas bén bayü laaman ma bagojnxgajman bén guin ree rëbaman:

—Bén gawan xid, laaman naj Bén raguilidi, gol gunaazaman gol chinëman, gol gojpaman ad guslaadi laaman.

<sup>45</sup> Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. <sup>46</sup> Zianz gunaaz ree Bén guin laaman din chinë reeman laaman. <sup>47</sup> Per tijb Bén za' yagaj gulëë xiespadaman, gutü'man guidiajg xmojs bixhioz rniabee gra ree bixhioz. <sup>48</sup> Dxel rëb Jesús loj ree Bén guin:

—¿Chexc zeel zëëdidi con espad con yag din chinëdi naj zi'c tijb xingubaan? <sup>49</sup> Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

<sup>50</sup> Dxel graczi ree xbejn Jesús baxüün, guro'nldax reeman laaman.

#### *Tijb xin binal Jesús*

<sup>51</sup> Per guyu tijb xinguiag binalix Jesús, nadüübix tijbzi lajd. Abi' chi gunaaz ree Bén guin laax, <sup>52</sup> baslaagajquix lajd guin, zigxüünt ziladix.

#### *Za' Jesús loj ree guxtis*

(Mt. 26:57-68; Lc. 22:54-55, 63-71; Jn.18 :12-14, 19-24)

<sup>53</sup> Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley. <sup>54</sup> Abi' zijt zijt binal Bëd Jesús xt rule' lidx bixhioz guin, dxel gurejman rudëj con ree Bén rajp rulidx bixhioz guin,

<sup>55</sup> Abi' ree bixhioz rniabee ree bixhioz con gra ree guxtis, baguüil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman, <sup>56</sup> majsi zien reeman rudxiib diidx rusquiee guijcaman, per garent garen rëb tijb gaj reeman. <sup>57</sup> Dxel guzuli tio'p choon reeman gunee reeman diidx rusquiee ree contr laaman, rëb reeman:

<sup>58</sup> —Dunujn baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sin xyudar ree bejn.”

<sup>59</sup> Per ni'qui zian ad guneet reeman tibloj, garent garen gunee reeman.

<sup>60</sup> Dxel bixhioz rniabee gra ree bixhioz guzuliman galay ree b́en riga' yagaj, abi' gunabdiidxaman loj Jesús, ŕebaman:

—¿Nid xhie diidx yadxi'l ya? ¿Wali ni canee reeman contr lúj ya?

<sup>61</sup> Per achetczi ŕeb Jesús, ad badxi'taman diidx, dxel gunabdiidx bixhioz rniabee guin lojman zatijb, ŕebaman:

—¿Lúj naj Cristo ya, Xi'n Dios B́en nagle'?

<sup>62</sup> Badxi' Jesúsán ŕebaman:

—Walican, najcan. Abi' ĺejt zuguaadi naj najn B́en guxhaal Dios zooban xladbee Dios B́en ca' gra guialrniabee guguaaa t́eedi naj guialan loj zaj xanyabaa.

<sup>63</sup> Chi bigueijn bixhioz guin zian, gudixya' xabaman, dxel ŕebaman:

—Ad ŕijntri naguiejn yadiil ree testiw. <sup>64</sup> Ĺejt ma bigueijn caneeguijdx Dios. Yan, ¿xhie nadi?

Abi' graczi reeman ŕeb, guiétaman.

<sup>65</sup> Yu' reeman rucojp xhiejn lojman, ruta'cw t́ee reeman lojman, dxel riguin reeman laaman, ŕeb reeman:

—¿Guneeya' chu gudin lúj!

Guiáad ree b́en rajp yagaj ẃeéz reeman lojman.

#### *Ŕeb B́ed ad núnbeetaman Jesús*

(Mt. 26:69-75; Lc. 22:56-62; Jn.18 :15-18, 25-29)

<sup>66</sup> Chi za' B́ed rule' guin, dxel bidxin tijb b́engunaa ŕijn dxiin lidx bixhioz rniabee guin.

<sup>67</sup> Chi baguaaaman zojb B́ed ruděj guin cucha'man, baguaaaman lojman, dxel ŕebaman:

—Né lúj za'né Jesús b́en Nazaret.

<sup>68</sup> Per gurexuu B́ed ŕebaman:

—Ad núnbeetan laaman, ad ragbeetan xhienin rnieel.

Chi bariiman ro' port guin, dxel guridxa' guid. <sup>69</sup> Dxel baguaaa b́engunaa guin B́ed zatijb, zianz guzuloj ŕebaman loj ree b́en riga' yagaj:

—Né b́en guin naj xbejn Jesús.

<sup>70</sup> Per gurexuu B́ed zatijb. Gojc xchejdoo ŕeb ree b́en riga' yagaj loj B́ed:

—Walican né lúj naj xbejnx din xin Galilea lúj, abi' zi'cgajc rniee reeman rnieel.

<sup>71</sup> Per guzudxi'ch B́ed con ni ŕebaman, zianz ŕebaman:

—Gudéed Dios naj casti bal rusquieen, ad núnbeetan b́en nadi.

<sup>72</sup> Loj hor zii gajc barojp volt guridxa' guid. Dxel basaaladx B́ed guial ŕeb Jesús lojman: “Chi gad guid cwidxa' tio'p volt, mal gojc choon volt ŕebil ad núnbeetil naj.” Chi basaaladxaman zian, dxel guzuloj cayoonman.

## 15

#### *Biné reeman Jesús loj Pilato*

(Mt. 27:1-2, 11-14; Lc. 23:1-5; Jn.18 :28-38)

<sup>1</sup> Chi bareguaaal rsildoo, badxajg lasa' ree bixhioz rniabee ree bixhioz con ree guxtis Israel né ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús biné reeman laaman loj Pilato. <sup>2</sup> Abi' gunabdiidx Pilato loj Jesús ŕebaman:

—¿Lújn naj xrey ree b́en Israel ya?

Badxi' Jesús laan ŕebaman:

—Najcan.

<sup>3</sup> Abi' ree bixhioz rniabee ree bixhioz zien ni rudxiib reeman guijcaman, <sup>4</sup> zeel gunabdiidx Pilato lojman zatijb, ŕebaman:

—¿Nid xhie diidx yadxi'l ya? Baguaaa dád zien ni rudxiib reeman guijquil.

<sup>5</sup> Per achetczi badxi' Jesús, zeel dád badxa loj Pilato

#### *Gunabee reeman guiét Jesús*

(Mt. 27:15-31; Lc. 23:13-25; Jn.18 :38-19:16)

<sup>6</sup> Loj ree dxej lanij pascw, ruslaa Pilato tijb bën yu' ladxguiib, bën rëb ree bën guiedx guin guslaaman. <sup>7</sup> Lën ree dxej zii yu' bën la Barrabás ladxguiib con ree ben ren, bën bagüjt ree bejn loj tijb wadjil ni been reeman contr gobiarn. <sup>8</sup> Dxel chi bido'p ree bejn, rëb reeman loj Pilato din güünman zi'c naj costumbr, <sup>9</sup> Abi' rëb Pilato loj reeman:

—¿Rëndi ya guslaan xreydi?

<sup>10</sup> Rëbaman zian guial ragbeeman bayü ree bixhioz guin laaman por guial rdëdlojzi reeman laaman. <sup>11</sup> Per ree bixhioz rniabee guin badxe' reeman bejn ree diidx din guiëb reeman loj Pilato guslaaman Barrabás. <sup>12</sup> Abi' gunabdiidx Pilato loj reeman rëbaman:

—¿Xhie rëndi günnë'n bën nadi naj xreydi?

<sup>13</sup> Dxel gurixdiaj reeman rëb reeman:

—¡Bacaax loj crüjz!

<sup>14</sup> Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¡Bacaax loj crüjz!

<sup>15</sup> Abi' guial rën Pilato yaya'nman zagdxe loj reeman, zeel baslaaman Barrabás, gunabeeman a Jesús, dxel bayüman laaman loj reeman din tiaman loj crüjz.

<sup>16</sup> Abi' binë ree xin suldad guin Jesús xlule' palas, yagaj badxaag lasa' gra reex. <sup>17</sup> Abi' bascajcw reex laaman tijb lajd murad, dxel been reex tijb coron guiëjch badxe' reex guijcaman. <sup>18</sup> Dxel guzuloj rbixdiaj reex rëb reex:

—¡Guibanri xrey ree bën Israel!

<sup>19</sup> Zianz rugaz reex var guijcaman, rulaa xhiejn reex lojman, abi' ruzuxib reex lojman.

<sup>20</sup> Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

*Bacaa reeman Jesús loj crüjz*

(Mt. 27:32-44; Lc. 23:26-43; Jn.19 :17-27)

<sup>21</sup> Chi zinë reex Jesús, badxaagloj reeman tijb bën Cirene, laman Simón, xdad Lejandr con Rufo, ziaadaman bazaman dajn. Abi' been ree suldad guin naguiejn biaaman xcrüjz Jesús.

<sup>22</sup> Abi' binë reex Jesús luar la Gólgota, rën guiëban Calaver. <sup>23</sup> Yagaj badëëd reex vin no'ch ni la mirra lojman din guië'man laan, per ad gu'taman laan. <sup>24</sup> Chi ma bacaa reex laaman loj crüjz, dxel gudxijt reex suert guijc xabaman din guidoon xhie yayal tijbgaj reex

<sup>25</sup> Raca gaa rsil bacaa reex laaman loj crüjz. <sup>26</sup> Guijc crüjz guin bacaa reex lejtr ni rëb chexc zeel bacaa reex laaman loj crüjz, rëban: “Xrey ree bën Israel.” <sup>27</sup> Chi bacaa reex laaman loj crüjz, në zatío'p ree xin gubaan bacaa reex loj crüjz, tijbix cwa xladbeeman, zatijbix cwa xladruvejsaman. <sup>28</sup> Zian gojc cumplid ni ca loj xtiidx Dios, lod rëb: “Nayabaman loj ree benmal.”

<sup>29</sup> Abi' ree bën ridëd yagaj ruze' reeman laaman runij guijc reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, <sup>30</sup> yan baslaa lüj gajc baguiajt tëë loj crüjz zii.

<sup>31</sup> Ziangajc ruze' ree bixhioz rniabee laaman con ree mextr rajc ley, rëb reeman:

—Gognëx ben ren ree, guiáad laax ad rajct ruslaa laagajquix. <sup>32</sup> Yaguiajtix loj crüjz guin, bal laax naj Cristo, xrey ree bën Israel, din yaguaa ree, dxel yaliduladx ree.

Xt në ree xingubaan canëman loj crüjz guneeguijdx laaman.

*Güjt Jesús*

(Mt. 27:45-56; Lc. 23:44-49; Jn.19 :28-30)

<sup>33</sup> Chi gol garol dxej, bicajy guidib guidxliuj xt raca choon wadx. <sup>34</sup> Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëëladxil naj? <sup>35</sup> Yu' ree bën za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bén badëë xtiidx Dios loj ree bejn.

<sup>36</sup> Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguaiaa ree don zi't Elías yalet laax loj crüjz guin ya.

<sup>37</sup> Per Jesús dád rejs gurixdiajman, dxel güjtaman. <sup>38</sup> Loj hor zii goxya' lajd nal lën yadooro' Jerusalén, gojcan tio'p lala', diizd guiyc guin xt guia' guin goxya'. <sup>39</sup> Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bén guin.

<sup>40</sup> Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bén naj benguiag loj Xiëb.

<sup>41</sup> Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

### *Biguie'ch Jesús*

*(Mt. 27:57-61; Lc. 23:50-56; Jn.19 :38-42)*

<sup>42</sup> Chi bidxin dxej rüjn ree bén Israel gra, chi guixiezi naj dxej raziiladx reeman, ma cabej guiaal, <sup>43</sup> bidxin Xiëb bén za guiedx Arimatea. Gojcaman tijb xguxtis ree bén Israel, abi' gojp ree bejn laaman respejt, në laaman rbëz xguialrniabee Dios, abi' guyuman valor wejman loj Pilato, persi banabaman xcuerp Jesús. <sup>44</sup> Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin. <sup>45</sup> Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin. <sup>46</sup> Guzii Xiëb tijb lajd, abi' chi baletaman xcuerp Jesús loj crüjz guin dxel batüübaman laaman lajd guin, biquie'chaman laaman lën tijb baa ni bidëën lën tijb guiaj, dxel basiaawaman ro' baa guin con tijb guiajro'. <sup>47</sup> María Magdalena con Li xniaa Xiëb, baguiaa reeman lod baquie'ch reeman Jesús.

## 16

### *Raban Jesús*

*(Mt. 28:1-10; Lc. 24:1-12; Jn.20 :1-10)*

<sup>1</sup> Chi gudëd dxej raziiladx ree bejn, María Magdalena, në Salomé, në Li xniaa Jacob, bisii reeman parfum din chitëëb reeman laan xcuerp Jesús. <sup>2</sup> Bareguiaal chidumingw, rsildoo barii reeman wej reeman ro' xbaa Jesús, naabzi rliejn gubijdx. <sup>3</sup> Chi zë reeman lunejz, rëb loj lasa' reeman:

—¿Chuza chisüd guiaj nayaaw ro' baa guin?

<sup>4</sup> Per chi bidxin reeman baguiaa reeman ma biniib guiaj za' ro' baa guin ad za'tri loj xluaran. <sup>5</sup> Chi guyu reeman lën baa guin, baguiaa reeman tijb xinguiag zobjix ladbee, najcwix lajd naquich yool, abi' bidxeb reeman. <sup>6</sup> Per rëbix loj reeman:

—Ad rdxebidi, raguiilidi Jesús bén Nazaret bén cwa loj crüjz. Per ma babanman, achutri laaman guie, gol baguiaa lod gudixh reeman laaman. <sup>7</sup> Yan, gol chej gol chiguiedx loj Bëd në loj los demazri ree xbejnman guial yaloj Jesús ned cheman Galilea dxel chedi, ni guguiaadi laaman zi'c ma naman lojdi.

<sup>8</sup> Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

### *Balüüloj Jesús loj María Magdalena*

*(Jn. 20:11-18)*

<sup>9</sup> Chi ma baban Jesús, chidumingw rsildoo, yaloj loj María Magdalena balüülojman, bén babëëman gajdx xindxab luxdoo. <sup>10</sup> María Magdalena guin bicojn ree xbejn Jesús, bén yu'naya ree roon tëë reeman por laaman. <sup>11</sup> Chi biguiejn reeman guial naban Jesús baguiaa tëë María Magdalena laaman, ad bililadxt reeman.

### *Balüüloj Jesús loj tio'p ree xbejnman*

*(Lc. 24:13-35)*

<sup>12</sup> Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn. <sup>13</sup> Dxel bén guin ree bicojn lasa' reeman, per ni'qui laa reeman ad bililadxt reeman.

*Rucaabee Jesús bén naj ree apóstoles*

*(Mt. 28:16-20; Lc. 24:36-49; Jn.20 :19-23)*

<sup>14</sup> Ni bigratë balüüloj Jesús loj za chiptib ree xbejnman, chi zobj reeman xan mex cayaw reeman, gudilëman laa reeman guial nad reeman, ad rliladxt reeman bén baguiaa ree laaman guial ma babanman. <sup>15</sup> Dxel rëbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn. <sup>16</sup> Bén chililadx tiobnijs tëë zajcaman perdon loj Dios. Per bén ad zaliladxt xtiidxza'c Dios, laaman yayal casti. <sup>17</sup> Sen guie ree gap ree bén chililadx naj: Por da guialrniabeen zabëë reeman xindxab luxdoo ree bejn, zanee tëë reeman diidx ren ree, <sup>18</sup> zanaaz reeman bëël ree, abi' majsi guië' reeman ni yu' venen guijc achet gac reeman, chi gudxiib yaa reeman guijc ree bénragxuu, zayajc reeman.

*Bayë'p Jesús xanyabaa*

*(Lc. 24:50-53)*

<sup>19</sup> Chi gulox guneenë Dad Jesús laa reeman, dxel bayë'paman xanyabaa, gurejman xladbee Dios. <sup>20</sup> Guiáad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognë laa reeman, been reeman milagr ree, persi gogbee ree bejn guial xtiidxqui Dios naj ni rniece reeman. Amén.

## Xtiidxza'c Jesucrist ni bacaa San Lujc

### *Rxhial Lujc gui'ch loj Teófilo*

<sup>1</sup> Zien ree b́en ma been naguiejn gucaa ni goc con dunuj ree, <sup>2</sup> zi'cgajczi balüü ree bejn dunuj ree, b́en baguiaa ree diidz guia'xchej ni been Jesús nê ni guzacaman, gutie'ch tēē reeman xtiidxaman. <sup>3</sup> Naj baguixnejzchaaw diidz guia'xchejn, dad Teófilo, zeel naladxan zagdxen gucanan xnejz par lüj, <sup>4</sup> din chignia'l zagdxé diidxli balüü reeman lüj.

### *Rugojn tijb anjl gal Waj*

<sup>5</sup> Tiamp gunabee rey Herodes guidib niz Judea, guyu tijb bixhioz brii laj Zacarías, bachajgaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón. <sup>6</sup> Grop reeman gubajn xnejz loj Dios bazoob tēē reeman diidz graczi ni rniabee Dios, abi' achut rile' guiēb guial rajp reeman dol. <sup>7</sup> Per achut xi'n reeman guyu guial ad gojct niu xi'n Elisabet, grop reeman ma naj bengol.

<sup>8</sup> Tijb dxej ni bayal ree bixhioz no'ch Zacarías loj, been reeman sirv loj Dios, <sup>9</sup> zi'c naj xcostumbr ree bixhioz guin, gudxijt reeman suert din guidoon chu yaya gudxe' goxyaal lēn yadooro' Jerusalén, abi' bayal Zacarías cu'man goxyaal guin. <sup>10</sup> La'tgaj cagu'man goxyaal guin, gra ree bejn riga' lule' cabejdx canab reeman Dios. <sup>11</sup> Dxel balüüloj tijb xianjl Dios loj Zacarías, za'liman xladbee altar lod cayu goxyaal guin. <sup>12</sup> Chi baguiaa Zacarías anjl guin, ad badxejlt xhie nünman, dád bidxebaman. <sup>13</sup> Per rēb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaa Elisabet, gaquix xinguaaw abi' yagu'l lajx Waj. <sup>14</sup> Yabaa da'til, nê zien ree bejn yabaa chi galix, <sup>15</sup> guial gaquix xin lasajc loj Dios. Ad zē'tix vin ni'qui ni gusüdx laax. Abi' diidz chi gadix gal mal za'nē xSprijt Dios laax. <sup>16</sup> Por laax zien ree b́en Israel yayejc loj xDad reeman Dios. <sup>17</sup> Laax ned lojman, chu' xSprijt Dios luxdoox gap tēēx guialrniabee zi'c Elías, b́en badēē xtiidx Dios loj ree bejn, yabe'cdxex b́en naj ree dad con xi'n reeman, gulüü tēēx b́en ad ruzoobt ree diidz din guzuxnejzix bejn ree guidxga' reeman laaman chi gui'taman.

<sup>18</sup> Dxel rēb Zacarías loj anjl guin:

—¿Xhienaag gagbeen guial gac cumplid ni nal? Din naj con da béngunaan ma nayajcan bengol.

<sup>19</sup> Badxi' anjl guinan rēbaman:

—Naj naj Gabriel, rünan sirv loj Dios, laaman guxhaal naj zidnē'n diidxza'c guie lojl. <sup>20</sup> Per yan guial ad bililadxtil da diidxan, yaya'n'l gop ad zajct guinieel xt guidxin dxej gal xindo guin.

<sup>21</sup> Guiáad ree ben riga' lule' guin cabēz reeman Zacarías yu' nawēēg reeman guial cayaglaaman lēn yadoo guin. <sup>22</sup> Chi bariiman ad rajctri rnieeman, gaz sen rünman guial ma baya'nman gop. Dxel gogbee reeman guial yu' xhie baguiaaman lēn yadoo guin.

<sup>23</sup> Zianz baza' ree dxej ni been Zacarías sirv lēn yadoo guin, dxel zia lidxaman. <sup>24</sup> Chi gudēd ree dxej guin, guyu xi'n xbéngunaa Elisabet. Gaay bēēw tib guyuzaman lēnü, rēbaman: <sup>25</sup> “Ze naj ni beennē Dios naj lēn ree dxej guie chitēē guze'ri ree bejn naj.”

### *Rugojn tijb anjl Li gal Jesús*

<sup>26</sup> Ni goc xho'p bēēw, guxhaal Dios anjl la Gabriel luguiedx Nazaret ni riga' niz Galilea, <sup>27</sup> din chignajman tijb biinxdüb lam Li. Ma naj tia' tijb xin la Xiēb laam, xin zēēd loj xdiaa rey Davi.

<sup>28</sup> Guyu anjl guin lod yu' Li abi' rēbaman:

—¡Xchan Li, Dios ma gulej lüj! Dios za'nē lüj, ma beenle' tēēman lüj loj gra ree béngunaa.

<sup>29</sup> Chi baguiaa Li anjl guin dád badxa lojm guial rēbaman zian, abi' gunabdiidxim xhie rēn guiēb ree diidz guin. <sup>30</sup> Dxel rēb anjl guin:



—Li, ad rdxe bil din lüj gule Dios beenle' tääman lüj. <sup>31</sup> Chu' xi'nl, abi' chi galaman yagu'l lajman JESÚS. <sup>32</sup> Laaman gac bén zobjloj, guinee ree bejn laaman Xi'n Dios bén yu' xanyabaa. Güün dux Dad ree Dios laaman rey zi'c goc xdiaagulalaman Davi, <sup>33</sup> din nabeeman bén Israel ree xt goctääz, abi' xguialrniabeeman ad yu't dxej loxan.

<sup>34</sup> Dxel rëb Li loj anjl guin:

—¿Xhienaag chu' da xi'n nan awa achut bénguiaaw nabannë'n?

<sup>35</sup> Badxi' anjl guinan rëbaman:

—Por xSprijt Dios chu' xi'nl, abi' xguialrniabee Dios bén yu' xanyabaa gusiaawan guijquil con xbalan. Zeel xi'nl bén gal, gacaman naya nali abi' guinee ree bejn laaman Xi'n Dios. <sup>36</sup> Ziangajc lasa'l Elisabet ma yu' xi'nman, majsi ma najman bengol, bén rëb ree bejn ad zajct chu' xi'n, per yan ma gojc xho'p bëew yu' xi'nman. <sup>37</sup> Din Dios graczi zajc güünman.

<sup>38</sup> Dxel rëb Li loj anjl guin:

—Dios naj bén rniabee naj, gacza zi'c rënman.

Ziat anjl guin.

### *Rignaj Li Elisabet*

<sup>39</sup> Lën ree dxej guin wej Li cari da't tijb guiedx ni riga' lad ree guia' niz Judea, <sup>40</sup> dxel guyum lënu lidx Zacarías, bagajpdiozim Elisabet. <sup>41</sup> Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa. <sup>42</sup> Abi' gunee Elisabet rejs, rëbaman:

—¿Dios ma beenle' lüj loj gra ree béngunaa, beenle' tääman bejndobëz yu' lën!  
<sup>43</sup> ¿Chuza najn zeel zidganaj xnгаа da Diosan naj, bén rniabee? <sup>44</sup> Din biguiejnzan cha'l bagajpdiozil naj, laa baniib gajc da bindoon lënan guial babaam. <sup>45</sup> Xiquilbaal guial bililadxil, din gac zi'c bagojn Dios lüj.

<sup>46</sup> Dxel rëb Li:

Ruzatan Dios zagdxe,

<sup>47</sup> rabaanë' tään laaman, guial ragnëman naj.

<sup>48</sup> Guial baguiaaman naj, majsi biin rüjnzi sirv lojman naj.

Abi' diizd yan xt goctääz guza't ree bejn naj, guiëb reeman xiquilbaam.

<sup>49</sup> Din Dios, bén rniabee, dád zro' naj ni ma beennëman naj.

Naya naliman.

<sup>50</sup> Ad rbëzt rayaman graczi ree bén ruzoob xtiidxaman.

<sup>51</sup> Zro' naj ni ma beenman con xguialrniabeeman.

Base'nman xixgab ree bén rüjn benro',

<sup>52</sup> biquiedaman guialrniabee loj ree bén rniabee, guiaad loj ree bén ad zobjlojt badëëman guialrniabee loj reeman.

<sup>53</sup> Badëëman guialnaza'c loj ree bén biaadx guialraw, guiaad ree benrijcw basa'nman laa reeman zezi.

<sup>54</sup> Gognëman bén Israel ree, xbejnman,

abi' ad bayanladxtaman nayaman laa reeman,

<sup>55</sup> zi'c rëbaman loj dux béngulal ree,

Abraham në loj ree xdiaaman.

<sup>56</sup> Abi' baya'nnë Li Elisabet cost choon bëew, dxel baguiaj lidxim.

### *Rajl Waj*

<sup>57</sup> Chi bidxin dxej gojl xi'n Elisabet najx xinguaaw. <sup>58</sup> Abi' gogbee ree lasa'man në ree bén zobj gajxh guial baya Dios laaman, dád babaa reeman bignaj reeman laaman. <sup>59</sup> Chi ma gojc xindobëz guin toxman, dxel binë reeman laax guyux sen ni ru ree bén Israel. Abi' guyën reeman nagu' reeman lajdoox Zacarías zi'c la xdadix, <sup>60</sup> per gunee xnгаа, rëbaman:

—Ad zayutan zian. Rayal gaquim Waj.

<sup>61</sup> Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

<sup>62</sup> Abi' con sen gunabdiidx reeman loj xdad xindobëz guin chu rënman grii lajx. <sup>63</sup> Zianz gunabaman tibia' tabl abi' bacaaman lojn: “Waj grii lajx.” Dád badxaløj gra ree bën guin. <sup>64</sup> Loj hor ziigajc gojc banee Zacarías, abi' guzuløj cuza'taman Dios zagdx. <sup>65</sup> Gra ree bën zøjbnëman gajxh dád badxa loj reeman, xt gra ree guiedx riga' lad ree guia' niz Judea gogbee reeman graczi ni goc. <sup>66</sup> Guiáad graczi ree bën gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

### *Ni gunee Zacarías*

<sup>67</sup> Zacarías, bën naj xdad xindo guin guyu xSprijt Dios luxdooman guidiblagaa, zianz guzuløj caneeman, rëbaman:

<sup>68</sup> Benza'c bendxoon naj Dios, dux Dad ree nayajc ree bën Israel, guial bi'taman bidganajman dunuj ree nayajc ree xbejnman, bidgalëë tëëman dunuj ree loj ni cayza'c ree.

<sup>69</sup> Guxhaalaman tijb bën rajp guialrniabee din yabëëman dunuj ree loj ni cayza'c ree, zëëdaman loj xdiaa rey Davi, bën naj xbejn Dios.

<sup>70</sup> Zi'c been Dios promejs diizd gocli, zian gunee ree bën badëë xtiidxaman loj ree bejn, bën guban ree zi'c rënman:

<sup>71</sup> guial yabëëman dunuj ree loj ree bën ralen dunuj ree, në loj gra ree bën yu'xyajn dunuj ree,

<sup>72</sup> yaya tëëman dux béngulal ree, abi' ad zayanladxtaman promejs ni beenman.

<sup>73</sup> Ni ne naj promejs ni beenman loj dux béngulal ree Abraham:

<sup>74</sup> guial yabëëman dunuj ree loj ree bën ralen dunuj ree, din chile' yaguieen ree sirv lojman sin guialrdxeb,

<sup>75</sup> yabajn ree yaguieen tëë ree zi'c rënman, guidib tiamp ni yabajn ree.

<sup>76</sup> Guiáad lüj xi'n, guiniee ree bejn lüj bën rudëë xtiidx Dios loj ree bejn, Dios yu' xanyabaa.

Din nedil chiguieenchaawil xnejz bën naj Dad,

<sup>77</sup> gulüü tëël xbejnman din gagbee reeman xhienaag gac xtol reeman perdon, laa tëë reeman loj casti.

<sup>78</sup> Guial raya da't dux Dad ree dunuj ree, zeel guxhaal xi'nman, bën naj zi'c xbacha' gubijdx din gusniman du loj ree,

<sup>79</sup> guixhial tëëman xquiarguiejn ree bën zë loj nejzmal, bën ad nabant ree xnejz zi'c rën Dios,

gulüü tëëman dunuj ree yadxoo ree loj xnejzaman din yabajn ree zagdx sin wadijl.

<sup>80</sup> Guiáad xindo guin guni'six guyu tëë xquiarguiejnx mazri por Dios. Guzujx loj yujbidx, xt bidxin dxej gunee xtiidx Dios loj ree bën Israel.

## 2

### *Rajl Jesús*

*(Mt. 1:18-25)*

<sup>1</sup> Lën ree dxejzii gunabee rey César Augusto guiyab gra ree bejn guidib lod rniabeeman.

<sup>2</sup> Laan naj ni yaløj biyab ree bejn chi goc Cirenio gobernador Siria. <sup>3</sup> Graczi ree bejn naj yaguiaj ladx ladx din guiyab reeman. <sup>4</sup> Zianan zeel brii Xiëb luguiedx Nazaret ni riga' niz Galilea, wejman Belén, ni riga' niz Judea, lod gol rey Davi din loj xdiaa rey Davi zëëd Xiëb.

<sup>5</sup> Wejman binëman Li, lacheelaman din guiyab reeman. Ma yu' xi'n Li. <sup>6</sup> Abi' la'tgaj za' reeman Belén, bidxin dxej gojl bejndobëz guin. <sup>7</sup> Yagaj gol xi'n yaløj Li, dxel batüübaman bejndobëz guin lajd, gudijxhaman laaman lod ru ni raw ree be, guial ad bidxejlt lënu naya'n reeman.

*Bidxin ree xianjl Dios lod za' ree bën rajp xiil*

<sup>8</sup> Gajxh Belén guin za' ree bén rajp xiil, abi' dajn guin gajc rdéd reeman guiaal rajp reeman laa reeb. <sup>9</sup> Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman. <sup>10</sup> Per rëb anjl guin loj reeman:

—Ad rdxebidi din zidnë'n diidxza'c lojdi, por laan yabaa gra ree bejn. <sup>11</sup> Yan, ladx rey Davi ma gojl bén yabëë lëjt loj ni cazajquidi, laaman naj Cristo, laaman naj Dad. <sup>12</sup> Abi' din yayünbeedi laaman; nadüübaman lajd, naga'man lod ru ni raw ree be.

<sup>13</sup> Dxejczy balüüloj zien da't ree anjl cwë' anjl yaloj guin, ruza't reeman Dios zagdxë, rëb reeman:

<sup>14</sup> ;Benza'c bendxoon naj Dios bén yu' xanyabaa, abi' loj guidxliuj yabe'cdxëman luxdoo bén rüjn ree zi'c rënman!

<sup>15</sup> Chi ma zia ree anjl guin xanyabaa, dxel rëb loj lasa' ree bén rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

<sup>16</sup> Dxel cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be. <sup>17</sup> Chi baguiaa reeman laaman, be reeman diidx ni rëb anjl guin loj reeman xcwent bejndobëz guin, <sup>18</sup> abi' graczi ree bén biguiejn dád badxa loj reeman ni rëb ree bén rajp ree xiil guin. <sup>19</sup> Per Li, rgu'chaaw luxdoo man gra ni rucaagdiajgaman, rüjn tëëman laan xgab. <sup>20</sup> Dxel zia ree bén rajp ree xiil guin, rabaa reeman rudëë tëë reeman quixtëë loj Dios por gra ni baguiaa reeman biguiejn tëë reeman, guial gojc zi'c rëb anjl guin loj reeman.

#### *Binë reeman Jesús lën yadooro' Jerusalén*

<sup>21</sup> Chi ma gojc toxman gojl bejndobëz guin, badxe' reeman laaman sen ni ru ree bén Israel, bagu' tëë reeman lajman Jesús zi'c rëb anjl guin loj Li chi gad Jesús gacxhie j lënman.

<sup>22</sup> Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén. <sup>23</sup> Been reeman zian din loj ley guin ca: “Gra ree xindoniguaaaw rajl yaloj ma naj reex par Dios.” <sup>24</sup> Abi' binë reeman gon par Dios zi'c rniabee ley: rayal chinë reeman tio'p gugdoo o tio'p palomdoo.

<sup>25</sup> Tiamp zii zojb bén la Simeón Jerusalén. Najman benza'c rën tëëman Dios, rbëzaman bén gagnë bén Israel ree za'në tëë xSprijt Dios laaman. <sup>26</sup> Abi' por Sprijt guin gogbeeman guial ad zëjttaman xt guguaaman Cristo, bén guixhiaalaman. <sup>27</sup> Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinnë reeman Jesús din güün reeman zi'c rniabee ley, <sup>28</sup> zianz gudiidx Simeón bejndobëz guin baza'taman Dios zagdxë, rëbaman:

<sup>29</sup> Dad, yanri ma babedxe luxdon.

Ma zajc guslaal naj guiëtan najn xmojsil, ma gojc zi'c nal.

<sup>30</sup> Din con quijb guiaal on ma baguian bén gagnë dunujn.

<sup>31</sup> Guial ma bazujl laaman loj gra ree bénguidxliuj.

<sup>32</sup> Laaman naj biani par ree bén ad najt bén Israel, naj tëëman bacha' par ree xbén Israelil.

<sup>33</sup> Guiáad Xiëb con xniaa Jesús dád badxa loj reeman ni biguiejn reeman rëb Simeón xcwent bejndobëz guin. <sup>34</sup> Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bén Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman. <sup>35</sup> Abi' zian gagbeeman xhiënaag naj xixgab tijbgaj bejn, guiáad lüj zi'c tijb espad chëëz luxdool chi gac ree ni guin.

<sup>36</sup> Yagaj gajc za' tijb béngunaa yo'xh laman Ana, rudëëman xtiidx Dios loj ree bejn, xdadaman brii laj Fanuel, xdiaagulalaman gojc Aser. Benguiagan chi cwa' xinguaaaw laaman, abi' gajdx ijsi gubajnnë lacheelaman. <sup>37</sup> Ma gojc tajpgajlbitap ijz baya'nman bizëjb. Zianczy yu'man lën yadooro', rba'nman rbejdx rniab tëëman Dios. <sup>38</sup> Loj hor ziigajc bibigaman lod za'në Xiëb Li con Jesús, guzuloj cudëëdaman quixtëë loj Dios cuza't tëëman bejndobëz guin loj gra ree bén cabëz guixhiaal Dios bén gagnë bén Jerusalén ree.

*Zia reeman Nazaret*

<sup>39</sup> Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea. <sup>40</sup> Cani's bejndobëz guin, cayuman gojl, cayajcaman nasin, cayüjnle' tää Dios laaman.

*Yu' Jesús lën yadooro' Jerusalén*

<sup>41</sup> Gazob ijz rej ree xdad Jesús Jerusalén lanij pascw. <sup>42</sup> Chi baza' Jesús chiptio'p ijz, binë ree xdadaman laaman lanij zii zi'c naj xcostumbr reeman. <sup>43</sup> Chi ma gudëd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén. <sup>44</sup> Gunaladx reeman ma no'chaman loj ree bën zia. Zian guza reeman tibdxej. Per chi baguiil reeman laaman loj lasa' reeman në loj ree bën nünbee reeman, <sup>45</sup> achut laaman naguiee. Dxel bayejc reeman zia reeman Jerusalén zatijb zigdiil reeman laaman.

<sup>46</sup> Xt ni gocri choon dxej badxejl reeman laaman lën yadooro' Jerusalén, zojbaman galay ree mextr rajc ley, cucaagdiajgaman canabdiidx tääman laa reeman. <sup>47</sup> Gra ree bën caguiejn ni rnieeman caydxaloj reeman guial rajcaman në ree diidx radxi'man. <sup>48</sup> Chi baguiaa ree xdadaman laaman, dád badxaloj reeman, dxel rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan lüj.

<sup>49</sup> Badxi' Jesús laan rëbaman:

—¿Chexc zeel raguuilidi naj? ¿Nid ragbeedi ya rayal günan xchiin da Dadan?

<sup>50</sup> Per ad bignia't reeman xhie rën guiëb ni rëbaman.

<sup>51</sup> Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooman. <sup>52</sup> Zi'cri cani's Jesús cayu tää mazri xquiarguejnman. Rabaanë Dios laaman rabaanë tää ree bejn laaman.

## 3

*Rzuloj Waj rülüüman xtiidx Dios*

(Mt. 3:1-12; Mr. 1:1-8; Jn.1:19-28)

<sup>1</sup> Chi goc chiin ijz rniabee rey Tiberio, abi' Poncio Pilato najman gobernador Judea, Herodes najman gobernador Galilea, bijchaman Felip najman gobernador Iturea në Traconite, guiáad Lisantias najman gobernador Abilinia. <sup>2</sup> Anás në Caifás naj reeman bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj yujbidx. <sup>3</sup> Dxel gudëd Waj graczi ree guiedx riga' ro' guiiw Jordán, rëbaman loj ree bejn din yayüjn reeman xgab por xtol reeman tiobnijs tää reeman, din güün Dios xtol reeman perdon. <sup>4</sup> Zian gojc cumplid ni bacaa Isafás bën badëë xtiidx Dios loj ree bejn, lod rëbaman:

Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree Dios,

gol guxhal tijb nejz nali.

<sup>5</sup> Gra ree la'ch yadxa reen guiáad ree guia' con

ree lom yayajc reen tibloj,

në ree nejz volt yayaali

yadxa tää ree lunejz ni ad najt tibloj.

<sup>6</sup> Gra ree bénguidxliuj guguaa bën

guixhiaal Dios gagnë dunuj ree.”

<sup>7</sup> Chi brii zien ree bejn din guroobnijs Waj laa reeman, rëbaman loj reeman:

—¿Xi'n xinxab lëjt! ¿Chu bagojn lëjt guial laadi loj castiro' ni zëëd? <sup>8</sup> Gol gubajn zagdxë din guiguien guial waliqui ma bayüjn di xgab por xtolidi, ad guiëb tää loj lasa'di: “Dunujn zio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham. <sup>9</sup> Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

<sup>10</sup> Dxel gunabdiidx reeman, rëb reeman:

—¿Xhie rayal yaguieenan?

<sup>11</sup> Badxi' Wajn rëbaman:

—Bén yu' tio'p xab, rayal gudëëman tijban loj bén achet rajp. Guiáad bén yu' ni raw, rayal gudëëman ta'n nan loj bén ryaadxan.

<sup>12</sup> Në tio'p choon ree bén ruquijx impuest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ¿xhie rayal yagueienan?

<sup>13</sup> Badxi' Wajn, rëbaman:

—Ad guquijxidi mazri guial loj ni rayal guquijxidi.

<sup>14</sup> Yu' tée ree suldad gunabdiidx lojman rëb reex:

—Laadxza dunujn, ¿xhie rayal yagueienan?

Badxi'man laan rëbaman:

—Ad cwëëxuudi xhie xieen bejn, guial guchejbidi laa reeman o gudxiibidi guijc reeman ni ad beent reeman, gol guziibnejz tée ni rajxidi.

<sup>15</sup> Guiáad ree bejn gagbeenezdoo reeman bal Wajn naj Cristo, <sup>16</sup> per rëbaman loj gra reeman:

—Naj curobnijs lëjt con nijs. Per zëed tijb bén guroobnijs lëjt con xSprijt Dios në bajl. Laaman rajp mazri gualrniabee guial lon, ni'qui xgurëchaman ad zajct gaxhiecan. <sup>17</sup> Abi' zi'c raya trigo zian güünnëman bejn. Din bén zinal ree xnejz Dios yayal reeman lod rniabeeman, guiáad ree bén ad zinalt xnejz Dios guixhiaalaman laa reeman loj bajl ni ad yu't dxej yayü'.

<sup>18</sup> Zian guneenë Waj laa reeman, në ree con diidx ren guneenëman laa reeman rulüüman laa reeman xtiidxza'c Dios. <sup>19</sup> Gudilë tëëman rey Herodes guial cwa'man Herodías xbéngunaa bijchaman Felip, në por graczi ni mal ni ma beenman. <sup>20</sup> Per luar nidxga' Herodes xtiidx Waj aal beenman zatijb ni mal: badxe'man Waj ladxguuib.

### *Rirobnijs Jesús*

(Mt. 3:13-17; Mr. 1:9-11)

<sup>21</sup> Chi curoobnijs Waj bejn ree nëgajc Jesús guroobnijs. Abi' la'tgaj cabejdx canabaman Dios, bixal xanyabaa <sup>22</sup> zianz biguiajt xSprijt Dios zi'c tijb palom xt guijcaman. Dxel biguien cha' tijb bejn xanyabaa, rëbaman:

—Lüj naj da xi'n nan, rënan lüj rabaanë' tëen lüj.

### *Bén goc ree xdiaagulal Jesús*

(Mt. 1:1-17)

<sup>23</sup> Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiëb najman, Xiëb guin gojc xi'n Elí. <sup>24</sup> Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb, <sup>25</sup> Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai, <sup>26</sup> Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb, Xiëb gojc xi'n Judá, <sup>27</sup> Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri, <sup>28</sup> Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er, <sup>29</sup> Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat, <sup>30</sup> Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim, <sup>31</sup> Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán, <sup>32</sup> Natán gojc xi'n Davi, Davi gojc xi'n Isaf, Isaf gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón, <sup>33</sup> Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá, <sup>34</sup> Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor, <sup>35</sup> Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala, <sup>36</sup> Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec, <sup>37</sup> Lamec gojc xi'n Matusalén, Matusalén gojc xi'n Enoc,

Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán, <sup>38</sup> Cainán gojc xi'n Enós, Enós gojc xi'n Set, Set gojc xi'n Adán, guiáad Adán gojc xi'n Dios.

## 4

*Been xindxab Jesús prueb**(Mt. 4:1-11; Mr. 1:12-13)*

<sup>1</sup> Yu' xSprijt Dios luxdoo Jesús guidiblagaa. Chi bazaman guiwro' Jordán dxel binë xSprijt Dios laaman lod naj yujbidx. <sup>2</sup> Ni guzuman tiuu dxej tiuu guiaal, abi' been xindxab laaman prueb. Achetczi gudawaman dxej zii ree, zianz gulaanman. <sup>3</sup> Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guiadxtil.

<sup>4</sup> Badxi' Jesús laan rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rníee Dios.”

<sup>5</sup> Dxel binë xindxab guin laaman tijb guijc guia' ya da't, lod balüüx laaman gra ree nacion riga' loj guidxliuj. <sup>6</sup> Abi' rëb xindxab guin lojman:

—Gunen graczi guialrniabee në guialnaza'c ni yu' loj ree nacion guie. Din naj ca' laa reen, zajc gudëdan laa reen loj chutëez bën rënan. <sup>7</sup> Bal guzuxibil lon abi' guiën da'til naj, graczan gac xieenl.

<sup>8</sup> Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëel laaman, abi' tijbzi laaman been sirv.”

<sup>9</sup> Dxel binë xindxab guin laaman Jerusalén, abi' gulë'pix laaman guijc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' diidz guie xt luyuj, <sup>10</sup> din loj xtiidx Dios rëb: Dios guixhiaal ree xianjlaman din guinia reeman lüj.

<sup>11</sup> Yales reeman lüj con yaa reeman, chitëë quiilguijdx guiaj guia'l.

<sup>12</sup> Badxi' Jesús laan rëbaman:

—Rëb tëë loj xtiidx Dios: “Ad güünl prueb xDadil Dios.”

<sup>13</sup> Chi ad badxejltri xhienaag güün xindxab guin Jesús prueb, dxel biquiedix tiblädëd.

*Rzuloj Jesús rulüüman bejn ree niz Galilea**(Mt. 4:12-17; Mr. 1:14-15)*

<sup>14</sup> Badxin Jesús niz Galilea, yu' xSprijt Dios luxdooan guidiblagaa, abi' guidibczi niz yagaj bire'ch xtiidxaman. <sup>15</sup> Rulüüman bejn ree lën ree yadoo guidib niz yagaj, abi' graczi reeman ruza't laaman zagdxe.

*Radxin Jesús Nazaret**(Mt. 13:53-58; Mr. 6:1-6)*

<sup>16</sup> Badxin Jesús Nazaret luguiedx lod guni'saman. Abi' dxej raziiladx ree bejn guyuman lën yadoo zi'c naj xcostumbraman. Dxel guzuliman persi biilaman xtiidx Dios. <sup>17</sup> Badëed reeman gui'ch ni bacaa Isafas bën badëë xtiidx Dios loj ree bejn. Chi bachijlaman loj gui'ch guin, badxejlaman lod rëb:

<sup>18</sup> XSprijt dux Dad ree Dios za'në naj,

din laaman ma beenle' naj din ganen xtiidxza'caman loj ree bënprob.

Guxhaalaman naj din gugojnan bejn ree xhienaag laa reeman loj ni rzajc reeman, yaxhal tëen loj ree bën lutia'p.

Gün tëen yudar bën rusagzi reeman,

<sup>19</sup> din gugojnan guial ma bidxin dxej za'cdxoon ni güünle' Dios bejn ree.

<sup>20</sup> Dxel batüüb Jesús gui'ch guin bayüman laan loj bën rüjn yudar lën yadoo guin, zianz gurejman. Graczi ree bën riga' yagaj ruguiaadxijch laaman. <sup>21</sup> Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

<sup>22</sup> Graczi reeman cuza't laaman zagdxe caydxa tää loj reeman diidxa'cdxoon ni caneeman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

<sup>23</sup> Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayüjn lüj gajc”, na täädi: “Ni ma baguiejnan beenl Capernaum nëgajc guie beenan najn ladxil.”

<sup>24</sup> Rëb tää Jesús:

—Diidxiczi rnin, ni'czi tijb bën rudëë xtiidx Dios loj ree bejn, ad rënt reeman laaman ladx gajcaman. <sup>25</sup> Gol basaaladx dád zien ree béngunaa bizëjb zojb Israel lën ree dxej guban Elías bën badëë xtiidx Dios loj ree bejn, chi ad golt guia choon ijz garol, abi' guyu gubijn guidibczi. <sup>26</sup> Per ad guxhaalt Dios Elías guin loj tijb ree bën bizëjb zojb Israel, guxhaalaman laaman loj tijb bën bizëjb zojb guiedx la Sarepta, gajxh Sidón. <sup>27</sup> Në lën ree dxej guban Eliseo bën badëë xtiidx Dios loj ree bejn, dád zien ree bejn rajc guialguijdx la lepra, per ni'czi tijb reeman ad bayüjntaman, tijbzi bën Siria bayüjnman laman Naamán.

<sup>28</sup> Chi biguiejn gra ree bën yu' lën yadoo guin ni rëb Jesús, dád balen reeman. <sup>29</sup> Bisu reeman babëë reeman Jesús luguiedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman. <sup>30</sup> Per gudëd Jesús galay reeman, ziataman.

#### *Rabëë Jesús xindxab luxdoo tijb bejn*

*(Mr. 1:21-28)*

<sup>31</sup> Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiadx reeman. <sup>32</sup> Abi' dád badxaloj reeman ni rulüüman guial rnieenëman laa reeman con guialrniabee.

<sup>33</sup> Lën yadoo guin yu' tijb xin yu' xindxab luxdoo, abi' guridxa' xindxab guin rëbix:

<sup>34</sup> —Basa'n dunujn, ¿xhie rën! con dunujn, Jesús bën Nazaret? ¿Zëëdil ya zidganijtíl dunujn? Nünbeen lüj, naya nalil najl xi'n Dios.

<sup>35</sup> Dxel gudilë Jesús xindxab guin, rëbaman lojx:

—¿Bacwëëz ro'l, barii luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoo achetczi goquix. <sup>36</sup> Graczi reeman badxaloj, rëb loj lasa' reeman:

—¿Xhie ree diidx guin rnieeman? ¿Con guialrniabee ni rajpaman, rniabeeman rarii ree xindxab luxdoo ree bejn!

<sup>37</sup> Abi' guidibczi niz yagaj bire'ch xtiidxaman.

#### *Rayüjn Jesús xnasuegr Bëd*

*(Mt. 8:14-15; Mr. 1:29-31)*

<sup>38</sup> Dxel barii Jesús lën yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman. <sup>39</sup> Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixchëman guzuloj cudëëman ni gaw reeman.

#### *Rayüjn Jesús zien ree bënragxuu*

*(Mt. 8:16-17; Mr. 1:32-34)*

<sup>40</sup> Chi ma wëëz gubijdx, graczi ree bën rajp bënragxuu bën rajc ree gadxagayaa guialguijdx binë reeman laa reeman loj Jesús, persi badxiib yaaman guijc tijb gaj reeman, bayüjnman laa reeman. <sup>41</sup> Në zien ree bënragxuu guin rarii xindxab luxdoo, rbidxa' reex rëb reex:

—¿Lüj naj Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman naj Cristo.

#### *Rülüü Jesús xtiidx Dios niz Galilea*

*(Mr. 1:35-39)*

<sup>42</sup> Chi bareguiaal, barii Jesús luguiedx guin zëman lod achut bejn zojb. Per raguiil ree bénguiedx guin laaman, bidxin reeman lod za'man abi' rëb reeman lojman din yaya'nnëman laa reeman. <sup>43</sup> Per rëbaman loj reeman:

—Në ree luguiedx ren rayal chinë'n xtiidxza'c Dios guial xhienaag naj xguialrniabee-man, din par zian guxhaalaman naj.

<sup>44</sup> Zian basnuu guneeman xtiidx Dios lën ree yadoo niz Galilea.

## 5

### *Rniaaz reeman zien bëjl*

(Mt. 4:18-22; Mr. 1:16-20)

<sup>1</sup> Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios. <sup>2</sup> Dxel baguiaa Jesús tio'p barcw ro' nijs guin; ni basa'n ree bën rniaaz bëjl la'tgaj caguiib xguijxh reeman ni rniaaznë reeman bëjl. <sup>3</sup> Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree. <sup>4</sup> Chi gulox guneenëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guiniaazidi bëjl.

<sup>5</sup> Badxi' Simón laan rëbaman:

—Mextr, gudëd guiaalczi baguieenan dxiin, achutczi bëjl wanaazan. Per bal lüj na, yazaalan guijxh guin ree.

<sup>6</sup> Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin. <sup>7</sup> Abi' been reeman sen loj ree xcompniar reeman bën yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman bëjl guin ree loj grop barcw guin xt ma nizëëb reen xan nijs. <sup>8</sup> Chi baguiaa Simón Bëd ni goc, bazuxibaman loj Jesús rëbaman:

—Biquied lod za'n, Dad, din béndol naj.

<sup>9</sup> Guial Simón con ree bën za'nëman badxa loj reeman guial dád zien bëjl gunaaz reeman. <sup>10</sup> Ziangajc badxaloz ree Jacob con Waj, bën naj ree xi'n Zebedeo, naj tëë reeman xcompniar Simón. Per rëb Jesús loj Simón:

—Ad rdxebil, din diizd yan guto'pil bejn ree par Dios luar guiniaazil bëjl.

<sup>11</sup> Dxel babëë reeman barcw guin ree loj nijs guin, basa'n reeman laa reen, zinalt reeman Jesús.

### *Rayüjn Jesús tijb bën rajc guialguijdx la lepra*

(Mt. 8:1-4; Mr. 1:40-45)

<sup>12</sup> Chi za' Jesús tijb luguiedx, bidxin tijb bën rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rëbaman:

—Dad, bal rënl, zajc yayüjnl naj.

<sup>13</sup> Zianz basli yaa Jesús baqui'man laaman, rëbaman:

—Rënan. Bayajc.

Loj hor ziigajc bayajc bën guin. <sup>14</sup> Dxel rëb Jesús lojman:

—Achuczzi loj guiëbil guial ma bayajquil. Lojzi bixhioz wej din guguiaaman lüj. Binë gon ni rayal chinël zi'c gunabee Moisejs din gagbee gra bejn guial ma bayajquil.

<sup>15</sup> Per guixie guixie mazri bire'ch xtiidx Jesús por gra ree ni zagdxe rüjnman. Abi' dád benzien rdo'p din gucaagdiajg reeman ni rnieeman yayüjn tëëman laa reeman guialguijdx ni rajc reeman. <sup>16</sup> Guiáad laaman rejman niz lod achut bejn zojb, persi rbejdx rniabaman Dios.

### *Rayüjn Jesús bën nëjt xcuerp*

(Mt. 9:1-8; Mr. 2:1-12)

<sup>17</sup> Tijb dxej culüü Jesús bejn ree, abi' zojb tio'p choon ree bënfarisew në ree mextr rajc ley, zëëd reeman guiedxdo ni riga' ree niz Galilea në niz Judea, në Jerusalén. Za'në xguialrniabee Dios laaman persi rayüjnman bënragxuu ree. <sup>18</sup> Dxel bidxin tio'p choon



ree bejn, bidxinnë reeman tijb xin nëjt xcuerp, naga'x loj da. Abi' guyën reeman niunë reeman laax lënü guin din niguijxh reeman laax lod za' Jesús. <sup>19</sup> Per ad badxejlt ban niz niunë reeman laax guial bën guixiuj riga' yagaj. Dxel wë'p reeman guijc yu guin, abi' biquied reeman tex dxiib guijcan, zianz gulet reeman xinragxuu guin guidib naga'x loj da guin, gudijxh reeman laax galay ree bën guin lod za' Jesús. <sup>20</sup> Chi baguiaa Jesús guial rililadx reeman laaman; rëbaman loj xinragxuu guin:

—Xi'n, ma benan xtolil perdon.

<sup>21</sup> Per ree mextr rajc ley con ree bënfarisew guzuloj cayüjn reeman xgab: “¿Chu xin guin zeel rüjnx mazri xin zojbloj guial loj Dios? Achutczí rajc rüjn perdon dol, tijbzi Dios.”

<sup>22</sup> Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? <sup>23</sup> ¿Conin ad nawëëgt gac, guial guiën ya: “Ma naj xtolil perdon”, o guiën: “Bixche guza tää”? <sup>24</sup> Per yan, gulün lëjt guial Bén guxhaal Dios rajpaman guialrniabee loj guidxliuj guie din güünman perdon dol ree.

Dxel rëb Jesús loj xinragxuu guin:

—¿Bixche, baca' ni go'til loj! Baguiaj lidxil.

<sup>25</sup> Loj hor guin gajc bixchex guidibloj gra ree bën riga' yagaj balesix ni go'tix loj, zianz zia lidxix ruza'tix Dios zagdx. <sup>26</sup> Graczi reeman badxaloz ruza't tää reeman Dios zagdx abi' dád bidxeb reeman, rëb reeman:

—¿Ni'qui tijb ad waguiaat ree zi'ct naj ni cayguiaa ree yan!

### *Rbejdx Jesús Leví*

(Mt. 9:9-13; Mr. 2:13-17)

<sup>27</sup> Chi gudëd gojc zian, baguiaa Jesús tijb bën ruquijx impuest, laman Leví, zojbaman lod ruquijxaman. Abi' rëbaman lojman:

—Tanal naj.

<sup>28</sup> Dxel bisu Leví, guro'nladxaman gran zinaltaman Jesús.

<sup>29</sup> Abi' been Leví lanijro' lidxaman par Jesús, në zien ree bën ruquijx impuest zojb nëtëë ree ben ren zojbnë reeman xan mex. <sup>30</sup> Per ree bënfarisew ree në ree mextr rajc ley, bën nuchajg gajc ree bënfarisew guin, guzuloj caneeguidx reeman xbejn ree Jesús, rëb reeman:

—¿Chexc zeel rë' rawnëdi bën ruquijx ree impuest në ree bëndol?

<sup>31</sup> Badxi' Jesús laan rëbaman:

—Bënnadaan ree ad riaadxt reeman doctor, bënragxuu ree laa reeman riaadx Doctor.

<sup>32</sup> Ad zialtan par ree benza'c, zialan par ree bëndol din yayüjn reeman xgab por xtol reeman.

### *Rniabdiidx reeman loj Jesús xcwent guialrba'n*

(Mt. 9:14-17; Mr. 2:18-22)

<sup>33</sup> Bënfarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bënfarisew dád zien volt rba'n reeman rbejdx rniab tää reeman Dios, guiáad ree xbejnl ganax rë' raw reeman.

<sup>34</sup> Badxi' Jesús laan rëbaman:

—¿Wen zajc güündi naguiejn ya guiba'n ree biooz za' loj guialruxhliaa, la'tgaj za'në xin cuxhliaa guin laa reeman? <sup>35</sup> Per guidxin dxej chiquiedix, dxel guiba'n reeman.

<sup>36</sup> Rëb tääman loj reeman:

—Achut bën rutüüg ta'n lajd cüb din yata'man laan loj lajd yojx. Bal güünman zian, zaguiya' lajd cüb guin lajdyojx guin, nëtëë yan ad zuguiaatan zagdx loj lajdyojx guin.

<sup>37</sup> Ad rgu' tää bejn vin cüb lën anfr yojx, din bal güünman zian, zaguiya' vin cüb guin anfr guin, abi' zi'c anfr guin zi'c vin guin zaxin reen. <sup>38</sup> Zeel vin cüb rayal chu'n lën anfr cüb din ni'qui tijb reen ad zaxint. <sup>39</sup> Abi' tijb bën ma gu' vin yu' gocli ad rë'taman vin cüb, din rëbaman: “Vin yu' gocli mazri ni zagdxen.”

## 6

*Rgui'ch ree xbejn Jesús trigo dxej raziiladx ree bén Israel**(Mt. 12:1-8; Mr. 2:23-28)*

<sup>1</sup> Tíjb dxej raziiladx ree bén Israel, la'tgaj cadéd Jesús con ree xbejnman loj tíjb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman. <sup>2</sup> Abi' yu' ree bénfarisew rëb loj reeman:

—¿Chexc zeel rüjndi ni ad rayalt güüнди dxej raziiladx ree bejn?

<sup>3</sup> Badxi' Jesús laan, rëbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

<sup>4</sup> Guyuman lën xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

<sup>5</sup> Rëb tëë Jesús loj reeman:

—Bén guxhaal Dios rajpaman guialrniabee dxej raziiladx ree bejn.

*Rayajc tíjb xin naxü'n tiblax yaa**(Mt. 12:9-14; Mr. 3:1-6)*

<sup>6</sup> Zatíjb dxej raziiladx reeman, guyu Jesús lën tíjb yadoo abi' guzuloj culüüman bejn ree. Yagaj za' tíjb xin naxü'n yaa ladbee. <sup>7</sup> Abi' ree mextr rajc ley në ree bénfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús. <sup>8</sup> Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin. <sup>9</sup> Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdxe ya o ni mal? ¿Guslaaman xguialnaban bejn ya o gugüjtaman laaman?

<sup>10</sup> Dxel baguiaa Jesús gra ree bén riga' yagaj, abi' rëbaman loj xin guin:

—Basli yaal.

Dxel beenx zi'c rëbaman, abi' bayajc yaax. <sup>11</sup> Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

*Rbe Jesús chiptio'p ree apóstoles**(Mt. 10:1-4; Mr. 3:13-19)*

<sup>12</sup> Lën ree dxej zii wej Jesús tíjb ruguia' persi gurejdx gunabaman Dios, abi' gudëd guiaalczi gurejdx gunabaman Dios yagaj. <sup>13</sup> Chi bareguiaal, gurejdxaman bén nal ree laaman, dxel gulejman chiptio'p reeman loj reeman, abi' guneeman laa reeman apóstoles. <sup>14</sup> La reeman: Simón, bén gulëëljaman Bëd, Andrejs bijch Simón, Jacob, Waj, Felip, Tol, <sup>15</sup> Matew, Tumajs, Jacob xi'n Alfeo, Simón, bén bi'ch loj ree bén cananistas, <sup>16</sup> Judas xi'n Jacob, në Judas Iscariote bén bayü Jesús.

*Rülüü Jesús zien ree bejn**(Mt. 4:23-25)*

<sup>17</sup> Baguiajt Jesús ruguia' guin con guidxiptio'p ree xbejnman, badxin reeman lod naj tíjb la'ch. Yagaj bado'p zien ree xbejnman në ree ben ren, bén zëëd ree niz Judea në Jerusalén në ree bén zëëd Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tëëman laa reeman guialguijdx ni rajc reeman. <sup>18</sup> Në ree bén yu' xindxab luxdoo bayajc. <sup>19</sup> Zeel graczi ree bejn rën guqui' laaman, guial rayüjnman laa reeman con xguialrniabeeman.

*Xiquilbaa ree bejn**(Mt. 5:1-12)*

<sup>20</sup> Dxel baguiaa Jesús loj ree xbejnman, abi' rëbaman:

—Xiquilbaadi bénprob, din lëjt rayal loj xguialrniabee Dios.

<sup>21</sup> 'Xiquilbaadi bén rliaan ree yan, din Dios gunee ni gawidi xt chigdxinlaxidi.

'Xiquilbaadi bén roon ree yan, din zadxin dxej guxijdxidi.

<sup>22</sup> 'Xiquilbaadi chi rdxe'ch bejn lëjt, chi rabëeca reeman lëjt, rnieeguidx tëë reeman lëjt, naladx reeman najdi bendxuudx guial rlladixidi Bén guxhaal Dios. <sup>23</sup> Gol babaa gol badxe' tëë luxdoodi zagdxe chi güünnë reeman lëjt zian, din zro' ni tia'di yu' xanyabaa, din ziangajc beennë xbéngulal reeman bén badëë ree xtiidx Dios loj ree bejn.

<sup>24</sup> 'Per probza lëjt benrijcw, din ma guyuxgaj luxdoodi nix.

<sup>25</sup> 'Probza lëjt bén raw xt rigdxinladx yan, din zadxin dxej guiliaandi.

'Probza lëjt bén ruxijdx yan, din zadxin dxej goondi guial chu'nayadi.

<sup>26</sup> 'Probza lëjt, bén ruladx ree guilies bejn xvalor, din zian beennë ree xbéngulal reeman bén goc ree bén rusquiee, rëb reeman rudëë reeman xtiidx Dios loj ree bejn.

### *Guyën bén rdxe'ch lüj*

(Mt. 5:38-48; 7:12)

<sup>27</sup> 'Per ganin lëjt bén rucaagdiajg ree da diidxan: Gol guyën bén ralen lëjt, gol gojc benza'c con ree bén yu'xyajn lëjt, <sup>28</sup> gol bazaal diidxza'c guijc ree bén ruzaal diidxmal guijquidi, gol gurejdx gunab Dios por ree bén rnieeguidx lëjt. <sup>29</sup> Bal chu chëëz tiblaxhajguil, badëëd zatibladan, bal chu cwëëxuu xchamarril, ad cwexuul chinëman në xmanguil. <sup>30</sup> Chutëëz bén rniab xhienin lojl, badëëdan. Bal chu rquied xhie xieenl, ad bal yanabilan. <sup>31</sup> Gol beennë ree bejn zi'c rëndi güünnë reeman lëjt.

<sup>32</sup> 'Bal rëndi ganaxzi bén rën lëjt, ¿xhieza ni zagdxen cayüjndi? Din xt bëndol ree rüjn zian, rën reeman bén rën laa reeman. <sup>33</sup> Abi' bal rüjndi wen ganaxzi bén rüjn lëjt wen, ¿xhieza ni zagdxen cayüjndi? Din xt bëndol ree rüjn zian. <sup>34</sup> Ziangajc bal rudëëdidi ni rguin ganaxzi bén naladixidi zajc yaguijx lojdi, ¿xhieza ni zagdxen cayüjndi? Din xt në ree bëndol rudëëd rguin ree bén naladx reeman zajc yaguijx loj reeman. <sup>35</sup> Per lëjt gol guyën bén ralen lëjt, gol been reeman wen. Gol badëëd qui'n reeman, ad cwëzidi xhie tia'di guijcan. Zian tia'di zro' guialnaza'c ni gunee Dios bén yu' xanyabaa, gac tëëdi xi'nman, din laaman naj benza'c con ree bén ad rudëët quixtëë lojman në con ree benmal. <sup>36</sup> Gol baya bejn zi'c raya dux Dad ree Dios bejn.

### *Xcwent guialrula'ch*

(Mt. 7:1-5)

<sup>37</sup> 'Ad gula'chidi, ad gudxiib tëëdi ni mal guijc ree bejn chitëë saquidi zian, gol been perdon din gaquidi perdon. <sup>38</sup> Gol badëëd ni riaadx ree bejn, Dios mazri zro' naj ni gunee man zi'c tijb bols guidxadi. Din zi'c rudëëdidi loj ree bejn, ziant gajc naj ni gunee Dios lojdi.

<sup>39</sup> Rëb Jesús loj reeman zatijb diidx:

—¿Wen zajc chinë bénlutia'p zatijb bénlutia'p ya? ¿Nid zayajb grop reeman ro' bala' ya? <sup>40</sup> Tijb bén cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

<sup>41</sup> 'Ad gula'chil ben ren por faldobëz ni rajpaman, zagdxeli guyu xgab por falt narooob ni rajpil. <sup>42</sup> Abi' bal mazri falt narooob rajpil, ¿xoza guiëbil loj zatijb bejn: “Ad laat naj ni rüjnl”? ¿Bén rusquiee! yalojxgaj been zi'c rayal, chi ma beenl zian dxel ma zile' guiëbil loj zatijb bejn: “Ad laat naj ni rüjnl”.

### *Por ni rtia loj yag rayünbee bejn xhie yagan*

(Mt. 7:17-20; 12:33-35)

<sup>43</sup> 'Ad yu't yag zagdxe rtia ni guijdx loj, ad yu' tëët yag guijdx rtia ni zagdxe loj. <sup>44</sup> Din tijbgaj yag rayünbee bejn xhie yagan por ni rtia lojn. Ad raru't higo loj yaquiejch, ad raru' tëët uv loj gui'xh. <sup>45</sup> Benza'c rnieeman diidxza'c din laan yu' luxdoooban, guiáad benmal rnieeman diidxmal din laan yu' luxdoooban. Din ni yu' luxdoooban bejn laan rnieeman.

### *Tio'ploj cimiant*

(Mt. 7:24-27)

<sup>46</sup> '¿Chexc zeel rnieedi naj, “Dad, Dad”, abi' adza rüjntidi ni rnin? <sup>47</sup> Ganin lojdi chu naj zi'c bén ri't lon, riguijman ni rën, abi' rüjnman laan: <sup>48</sup> laaman naj zi'c tijb bén

been yu, yaloj xgaj gudëenman naxhit xt chi bila loj guiaj, dxel gulesaman xcimiantan guijc guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guijc guiaj. <sup>49</sup> Per bën rigueijn da diidxan abi' ad rüjntaman laan, najman zi'c tijb bën been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblyaazi base'nan laan.

## 7

*Rayajc xmojs tijb suldad rom xin rniabee ree suldad**(Mt. 8:5-13)*

<sup>1</sup> Chi gulox guneenë Jesús bejn ree, dxel zëman Capernaum. <sup>2</sup> Yagaj zobj tijb suldad Rom xin rniabee ree suldad. Yu' tijb xmojsix xin rën da'tix, ragxuu mojs guin ma rulüücüzi guiëtix. <sup>3</sup> Chi bigueijn suldad rniabee guin ruza't ree bejn Jesús, guxhaalix tio'p choon ree bën rniabee Israel lojman din chisajc reeman liaadx yayüjnman xmojsix. <sup>4</sup> Abi' bidxin reeman loj Jesús guzajc reeman liaadx, rëb reeman:

—Gagnësiil suldad rniabee guin, <sup>5</sup> din rën x bën duladx ree, në yan por laax gojc dux yadoo ree.

<sup>6</sup> Dxel binë Jesús laa reeman. Per chi ma cadxin reeman gajxh lidxix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lënu lidxan, <sup>7</sup> zeel ad bayaxtan nial quijb naj nidgadilan lüj. Per con guneë diidz lod za'l din yayajc da mojsan. <sup>8</sup> Din zi'c naj yu' ree bën rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx. Chi rën loj zatijbix: “Guda”, ri'tix. Abi' chi rën loj da mojsan: Been ni guin, rüjngajquixan.

<sup>9</sup> Chi bigueijn Jesús zian, dád badxa lojman ni rëb suldad guin, abi' badxi' lojman loj gra ree bën zinal laaman, rëbaman:

—Diidxliczi rnin, ni'qui Israel ad wadxaaglojtan tijb bën rliladx da't Dios zi'c rliladx xin guin Dios.

<sup>10</sup> Chi badxin ree xin guxhaal suldad rniabee guin lidxix, baguiaa reex ma bayajc mojs guin.

*Rasban Jesús xi'n tijb béngunaa bizëjb*

<sup>11</sup> Chi gudëd gojc zian, wej Jesús tijb luguiedx la Naín binë ree xbejnman, në zien ree ben ren. <sup>12</sup> Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman bën bizëjb. Zien da't ree bénluguiedx guin zinal laaman. <sup>13</sup> Chi baguiaa Dad Jesús laaman, bayaman laaman, dxel rëbaman lojman:

—Ad roonl.

<sup>14</sup> Abi' bibig Jesús baqui'man xcaj xingüt guin, dxel guzudxe ree bën zinë laax. Zianz rëbaman lojx:

—Xi'n, naj rni lojl: ¡Bixche!

<sup>15</sup> Dxel gureli xin guin, guzuloj caneex, zianz bayü Jesús laax loj xniaax. <sup>16</sup> Chi baguiaa reeman zian, graczi reeman bidxeb guzuloj cuza't reeman Dios zagdxe, rëb reeman:

—Du loj ree ma gules Dios tijb bën zobjloj, bën rudëë xtiidx Dios loj ree bejn.

Rëb tëë reeman:

—Ma bi't Dios din gagnë ree xbejnman.

<sup>17</sup> Abi' guidib niz Judea në ree guiedx riga' niz yagaj gogbee ree bejn ni been Jesús.

*Bigneenë ree xbejn Waj Jesús**(Mt. 11:2-19)*

<sup>18</sup> Gogbee Waj gra ree ni cayüjn Jesús, guial bagojn ree xbejnman laaman. Abi' guneeman tio'p reeman, <sup>19</sup> dxel guxhaalaman laa reeman loj Jesús din chignabdiidx reeman bal laacaman naj Cristo bën naj diidx gui't, bën cabëz reeman, o cwëz reeman ben ren ya. <sup>20</sup> Abi' bibig reeman, guneenë reeman laaman, rëb reeman lojman:

—Waj bën ru-roobnijs bejn ree guxhaal dunujn lojl zudganabdiidxan bal lüjcan naj Cristo bën naj diidx gui't, bën caylëjzan o yalëjzan ben ren ya.

<sup>21</sup> Hor ziigajc bayüjn Jesús zien da't ree bénragxuu, në ree bén rdoob, nëtëë ree bén yu' xindxab luxdoo, baxhal tēëman loj ree bénlutia'p. <sup>22</sup> Dxel badxi' Jesús xtiidx ree bén guxhaal Waj, rëbaman:

—Gol chej, gol chiguiedx loj Waj ni cuguiaadi në ni caguiejndi. Gol güjdx lojman guial ma ruguiaa ree bénlutia'p, ma rajc rza ree bencoj, ma rayajc tēë ree bén goc guialguijdx la lepra, ma riguejn ree bén nacwa't, guiáad ree bengüt ma baban reeman, abi' ree bénprob ma caguiejn reeman xtiidxza'c Dios. <sup>23</sup> ;Xiquilbaa ree bén ad zucwëëzt chililadx naj!

<sup>24</sup> Chi baza ree bén guxhaal Waj, guzuloj Jesús caneeman xcwent Waj loj ree bejn, rëbaman:

—;Chu naladxidi naj Bén biquiaadi loj yujbidx? ;Naladxidi ya najman zi'c tijb biqui runiib bi? <sup>25</sup> ;O chu biquiaadi? ;Tijb Bén najcw lajd zagdxé ya? Lëjt ragbee guial Bén rajcw ree lajd zagdxé, në ree Bén naban zagdxé, lën palas zobj reeman. <sup>26</sup> ;Chu biquiaadi? ;Tijb Bén rudëë xtiidx Dios loj ree bejn ya? Per diidxliczi rnin lojdi, biquiaadi tijb Bén mazri zobjloj guial loj tijb Bén rudëë xtiidx Dios loj ree bejn. <sup>27</sup> Wajn naj Bén ruza't xtiidx Dios, lod rëb:

Naj rxhial tijb Bén ned lojl,  
Bén güünchaaw xnejzil.

<sup>28</sup> Rnin lëjt, loj graczi ree bénguidxliuj ad wayut Bén rudëë xtiidx Dios loj ree bejn, Bén mazri zobjloj guial loj Waj. Per majsi zian, Bén ad zobjlojt loj xguialrniabee Dios, laaman mazri zobjloj guial loj Waj.

<sup>29</sup> Gra ree bejn, në ree Bén ruquijx impuest Bén baroobnijs Waj, chi biguejn reeman ni rëb Jesús bignia' reeman guial rüjn Dios zi'c rayal. <sup>30</sup> Per ree Bénfarisew con ree mextr rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

<sup>31</sup> Rëb tēë Jesús:

—;Xhienaag ganin lëjt naj ree Bén riga' loj guidxliuj guie yan? ;Chu naj zi'c laa reeman? <sup>32</sup> Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdxan par nuya'di, per ad baya'tidi, badoolan ni naya ree, per ad biintidi.” <sup>33</sup> Din bi't Waj Bén baroobnijs bejn ree, ad rawtaman ad rë' tēëtaman vin, abi' rëbidi xindxab yu' luxdoo. <sup>34</sup> Yan bi't Bén guxhaal Dios, rawaman rë' tēëman vin, abi' rëbidi guial dád nalaman ruladxaman guië'man, ruchajg tēëman bëndol ree con ree Bén ruquijx impuest. <sup>35</sup> Per xguialrignia' Dios, rguienan por ree xbejnman.

#### *Rej Jesús lidx tijb Bénfarisew la Simón*

<sup>36</sup> Tijb Bénfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex. <sup>37</sup> Dxel tijb béngunaa dxuudx zobj gajc luguiedx guin. Chi gogbeeman cayaw Jesús lidx Bénfarisew guin, bidxinnëman tijb lumejt yu' perfum. <sup>38</sup> Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwiidxnë guidxguijcaman laan, cayawaman xid guia'man curoob tēëman laan perfum guin. <sup>39</sup> Chi baguiaa Bénfarisew guin zian, beenman xgab: “Balgui zian wali Bén guin najman Bén rudëë xtiidx Dios loj ree bejn, zagbeeman chunin cuqui' laaman xhie tēë naag naban béngunaa guin, najman bendxuudx.” <sup>40</sup> Dxel rëb Jesús loj Bénfarisew guin:

—Simón, yu' tijb ni ganin lüj.

Badxi' Bénfarisew guinan rëbaman:

—Gunan, mextr.

<sup>41</sup> Abi' rëb Jesús lojman:

—Tijb Bén rudëëd milia rgui'n ree bejn, ral tio'p ree bejn lojman. Tijbaman nuzëëb gaaygayuu denario, zatijbaman nuzëëb tü'pchiin. <sup>42</sup> Grop reeman ad beent gan naguijx lojman, per Bén badëëd milia guin rëbaman loj reeman guial ad zaguijxt reeman ni nuzëëb reeman. Yan guna, ;chu loj grop reeman mazt guiën laaman?

<sup>43</sup> Badxi' Simón laan, rëbaman:

—Par naj, Bén bazëëb mazri zro' guin.

Dxel rëb Jesús:

—Waliquil.

<sup>44</sup> Zianz baguiaa Jesús loj béngunaa guin, abi' rëbaman loj Simón:

—¿Ruguaaal béngunaa guie ya? Chi guyu'n lidxil ad baneetil nijs niëd guia'n. Guiáad laaman gudiibaman guia'n con nijs brii lojman, abi' bacwiidxaman laan con guidxguijcaman. <sup>45</sup> Ad gudawtil naj xid, guiáad laaman diidz chi guyu'n ad rbëzt rawaman xid guia'n. <sup>46</sup> Achet sejt badxe'l guican, per laaman ma badxe'man perfum guia'n. <sup>47</sup> Zeel rnin lüj, gra ree xtolaman ma gojc perdon guial rën da'taman naj. Per bën yu' ta'nz xtol abi' rajcaman perdon, ta'nz rënman naj.

<sup>48</sup> Dxel rëb Jesús loj béngunaa guin:

—Ma naj gra xtolil perdon.

<sup>49</sup> Guiáad ree bën zojbnëman yagaj guzuloj canabdiidx loj lasa' reeman, rëb reeman:

—¿Chu bën guin zeel xt në ree dol rüjnman perdon?

<sup>50</sup> Per rëb Jesús loj béngunaa guin:

—Ma najl perdon guial rliladxil naj, baguiaj zagdxe ad ruril xgab.

## 8

### *Béngunaa been ree Jesús yudar*

<sup>1</sup> Chi gudëd gojc zian, wej Jesús gra ree guiedx narooob në ree guiedx dobëz bicojnman biglüü tëëman xhienaag naj xguialrniabee Dios. Në guidxiptio'p ree apóstoles binëman, <sup>2</sup> nëtëë tio'p choon ree béngunaa, bën babëëman xindxab luxdoo, në ree bën bayüjnman guialguijdx ni rajc reeman. Loj reeman no'ch María Magdalena, bën babëë Jesús gajdx xindxab luxdoo. <sup>3</sup> Në Xuan, lacheel Cuza, Cuza guin goc bën nulen xchiin Herodes. Në Susan nëtëë zien ree béngunaa ren, been reeman yudar Jesús con ni rajp reeman.

### *Xcwent bën rtie'ch bin*

(Mt. 13:1-9; Mr. 4:1-9)

<sup>4</sup> Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

<sup>5</sup> —Tijb bejn zëman zigtie'chaman bin. Chi catie'chaman laan, ta'n nan biajb lunejz abi' balëë ree bejn guijcan gudaw tëë ree biguijn laan. <sup>6</sup> Zata'n nan biajb loj ree guiaj, chi gulejn reen gubidx reen guial ad yu' xcojpt loj ree guiaj guin. <sup>7</sup> Zata'n nan biajb loj ree yaquiejch. Abi' chi guni's reen tijbzi, banidloj yaquiejch guin laa reen. <sup>8</sup> Zata'n nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox gunee Jesús zian, dxel gunee man rejs rëbaman:

—Bën rën gucaagdiajg, gol bacaagdiajg.

### *Chexc zeel rulüü Jesús con cwent ree*

(Mt. 13:10-17; Mr. 4:10-12)

<sup>9</sup> Dxel gunabdiidx ree xbejn Jesús lojman, rëb reeman:

—¿Xhie rën guiëb cwent guin?

<sup>10</sup> Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman. Per loj gra reeman rünan zi'c cwent din majsi rani loj reeman, per ad zuguaat reeman, majsi riguijcn reeman, per ad zignia't reeman.

### *Rusignia' Jesús xcwent bën rtie'ch bin*

(Mt. 13:18-23; Mr. 4:13-20)

<sup>11</sup> 'Ni ne rën guiëb xcwent bën rtie'ch bin: Bin guin naj zi'c xtiidx Dios, <sup>12</sup> guiáad bin biajb runejz naj zi'c ree bën riguijcn xtiidx Dios; per rdxin gajc xindxab rquiedix laan luxdoo reeman chitëë chililadx reeman laan abi' gac reeman perdon. <sup>13</sup> Guiáad bin biajb loj ree guiaj, naj zi'c ree bën riguijcn xtiidx Dios, abi' dád nix ru luxdoo reeman riguijcn reeman laan, per guial naj reeman zi'c cwaan ni ad yu't liuj, rliladx reeman laan tiblädëd abi' chi rzagdiaj reeman laa rusa'n gajc reeman ni rliladx reeman. <sup>14</sup> Guiáadza bin biajb

loj ree yaquiëjch, naj zi'c ree bén riguiëjn xtiidx Dios; per ru reeman xgab por gra ree guialnaza'c riga' loj guidxliuj guie rüjn tëë reeman ni rëntzi reeman, abi' zianz rucwëëz rucaagdiajg reeman xtiidx Dios ad rüjn tëët reeman ni rënman. <sup>15</sup> Guiáad bin biajb loj yujza'c, laan naj zi'c ree bén rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tëë reeman loj xnejzaman, zianczi rüjn reeman ni rënman.

*Achet ni naguie'ch yu'*

(Mr. 4:21-25)

<sup>16</sup> 'Achut bén ruze'c tijb guij dxel ruta'cwaman laan, ad rudxe' tëëtaman laan xan lon, ruzujman laan ya din gusnin loj ree bén chu' lëñü. <sup>17</sup> Achet ni naguie'ch yu' ni ad zaguiënt ad yu' tëët ni ralan ni ad zagbeet bejn, zadxin dxej gagbee bejn laan.

<sup>18</sup> 'Zeel gol bacaagdiajg zagdxë, bén ma rignia' gusnuu chignia'man mazri, per bén ad rignia't, xt ta'n ni naladxaman rignia'man ad zignia'traman.

*Xniaa Jesús con ree bijchaman*

(Mt. 12:46-50; Mr. 3:31-35)

<sup>19</sup> Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'. <sup>20</sup> Abi' yu' bén bagojn Jesús rëbaman:

—Laa xniaal con ree bijchil za' lule' guin rën reeman guinieenë reeman lüj.

<sup>21</sup> Badxi' Jesús laan rëbaman:

—Bén rucaagdiajg ree xtiidx Dios rüjn tëë reeman zi'c rënman, laa reeman naj da nan laa tëë reeman naj da bichan.

*Racwëëz Jesús bidoxh*

(Mt. 8:23-27; Mr. 4:35-41)

<sup>22</sup> Tijb dxej guyu Jesús loj barcw con ree xbejnman, abi' rëbaman loj reeman:

—Yo' ree zatiblad ro' nijs guin.

Zianz zë reeman. <sup>23</sup> La'tgaj cadëd reeman loj nijs guin, goodyëjs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazëëbczi barcw guin xan nijs. <sup>24</sup> Dxel bacwëën reeman Jesús, rëb reeman:

—¡Mextr! ¡Mextr! ¡Ma cayzëëb ree xan nijs!

Abi' bixche Jesús gunabeeman bacwëëz bidoxh guin në xtüjp nijs guin, zianz gulëjz reen dxel bayajcdxe. <sup>25</sup> Abi' rëbaman loj reeman:

—¿Conza xguialrliladxidi?

Per laa reeman dád bidxeb reeman badxa tëë loj reeman, abi' canabdiidx loj lasa' reeman rëb reeman:

—¿Chu bén guin zeel rniabeeman bi në nijs, abi' ruzoob reen xtiidxaman?

*Rayüjn Jesús tijb xin yu' xinxab luxdoo*

(Mt. 8:28-34; Mr. 5:1-20)

<sup>26</sup> Dxel badxin Jesús con ree xbejnman xdajn ree bén Gadara, ni riga' zatiblad ro' nijs Galilea. <sup>27</sup> Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xinxab luxdoo. Ad rajcwt xabix, ad nabantix lëñü, ganaxzi ro' ree baa nabanx. <sup>28</sup> Chi baguiaax Jesús bazuxibix lojman, guneex rejs rëbix:

—¿Xhie rënl con naj, Jesús, Xi'n Dios yu' xanyabaa? Rniaaban lojl ad gusagzil naj.

<sup>29</sup> Rëbix zian guial ma canabee Jesús din yarii xinxab guin luxdoo. Ma gojc xchej naaz xinxab guin laax. Abi' ma guxhii ree bejn yaax në guia'x con caden chitëë ban chex, per rutüguia'gajquix caden guin abi' rulaagdxa xinxab guin laax niz lod achut bejn zojb.

<sup>30</sup> Gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan.

Rëbix zian guial zien da't ree xinxab yu' luxdoo. <sup>31</sup> Rëb ree xinxab guin loj Jesús chitëë guixhiaalaman laa reex gabijl. <sup>32</sup> Dajn guin riga' zien ree cüch cayaw reeb. Zeel

rëb ree xindxab guin lojman din gudëeman mod chu' reex lën ree cüch guin, dxel cwëjbaman. <sup>33</sup> Zianz barii reex luxdoox bayu reex lën ree cüch guin, abi' guzuloj cuxüün reeb zianz bitidia' reeb ro' bala' xt loj nijs, lod gu' reeb nijs abi' güjt reeb.

<sup>34</sup> Chi baguiaa ree bën cayajp ree cüch guin ni goc, baxüün reeman bicojn reeman bejn ree luguiedx në ree dajn. <sup>35</sup> Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xindxab guin ree luxdoo, zojbix guia'man ma najcw xabix, ma badëdguienx abi' bidxeb reeman. <sup>36</sup> Guiáad ree bën baguiaa ni goc, be reeman diidx loj reeman xhienaag bayajquix. <sup>37</sup> Graczi ree bën zojb Gadara gunab loj Jesús din yazaman yagaj guial dád rdxeb reeman. Dxel bayë'paman loj tijb barcw, ziataman. <sup>38</sup> Guiáad xin barii xindxab guin ree luxdoo rëbix lojman din chinalix laaman, per ad cwëjbtaman, rëbaman lojx:

<sup>39</sup> —Baguiaj lidxil, biguiedx graczi ni been Dios por lüj.

Dxel ziax luguiedx guin abi' bex diidx loj gra ree bejn ni been Jesús por laax.

*Rayajc xi'n Jairo në béngunaa bagaal xab Jesús*

(Mt. 9:18-26; Mr. 5:21-43)

<sup>40</sup> Chi badxin Jesús zatiblad ro' nijs guin, dád rabaa gra ree bën za' yagaj guial badxinman din mal cabëz reeman laaman. <sup>41</sup> Dxel bidxin bën la Jairo, laaman rniabee lën tijb xyadoo ree bën Israel. Bazuxibaman loj Jesús, rëbaman lojman din cheman lidxaman, <sup>42</sup> guial yu' tijb xi'nman biin chiptio'p ijz, ma guiëtczim. Chi zë Jesús dád zien ree bejn zinal laaman xt rixa't reeman laaman.

<sup>43</sup> Abi' tijb béngunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayüjn laaman. <sup>44</sup> Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

<sup>45</sup> Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:

—Mextr, graczi ree bejn xt rixa't reeman lüj cucadxaa tëë reeman lüj, abi' rniabdiidxil chu baqui' lüj.

<sup>46</sup> Per rëb Jesús zatijb:

—Yu' chu baqui' naj din gogbeen yu' tijb bën ma bayajc con da guialrniabeen.

<sup>47</sup> Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rëbaman lojman guidibloj ree bën guin chexc zeel baqui'man xabaman abi' loj hor guin gajc bayajcaman. <sup>48</sup> Dxel rëb Jesús lojman:

—Xi'n, ma bayajquil guial bililadxil naj, baguiaj zagdx.

<sup>49</sup> Sta caneenë Jesús béngunaa guin, chi bidxin tijb bën guza lidx Jairo, bën rniabee lën xyadoo ree bën Israel, rëbaman loj Jairo:

—Mal güjt xi'nl, ad ruslenril Mextr guin.

<sup>50</sup> Per chi biguejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

<sup>51</sup> Chi bidxin reeman lidxaman, ad cwëjbt Jesús niu ree ben ren, Bëdzi con Waj, con Jacob, con ree xdad xniaa bindo guin. <sup>52</sup> Graczi ree bën riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

<sup>53</sup> Graczi reeman baze' laaman guial ma ragbee reeman güjtim. <sup>54</sup> Dxel gunaaz Jesús yaam, guneeman rejs, rëbaman:

—Bindoo, bixche.

<sup>55</sup> Loj hor ziigajc babanm, bixchem. Dxel gunabee Jesús badëëd reeman ni gudawim.

<sup>56</sup> Dád badxa loj ree xdadim, per rëb Jesús loj reeman achu loj guiëb reeman ni goc.



## 9

*Rxhiaal Jesús guidxiptio'p ree xbejnman chigliüü reeman xtiidx Dios**(Mt. 10:5-15; Mr. 6:7-13)*

<sup>1</sup> Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tää reeman bénragxuu ree. <sup>2</sup> Guxhaalaman laa reeman chigliüü reeman xhienaag naj xguialrniabee Dios, yayüjn tää reeman bénragxuu ree. <sup>3</sup> Rëbaman:

—Ad chinëdi xhienin par runejz: ni'qui yagriadxidi, ni'qui guijxh, ni'qui guialraw, ni'qui milia, ni'qui stibnejz xabidi. <sup>4</sup> Chutëëz lidx guidxindi, tib gol baya'nzi xt chi yazadi luguiedx guin. <sup>5</sup> Bal yu' guiedx lod ad rënt reeman lëjt, gol baza yagaj, gol gudxijp guxyuj guia'di zi'c tijb sen guial ad rënt reeman guzoob reeman xtiidx Dios.

<sup>6</sup> Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tää reeman bénragxuu ree.

*Riguiejn Herodes ni cayüjn Jesús**(Mt. 14:1-12; Mr. 6:14-29)*

<sup>7</sup> Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj bén baroobnijs bejn ree ma baban, <sup>8</sup> yu' tää reeman rëb Elíasan bén badëë xtiidx Dios loj ree bejn ma balüüloj, yu'za reeman rëb, tijb ree bén badëë xtiidx Dios loj ree bejn gocli ma baban. <sup>9</sup> Per rëb Herodes:

—Naj gajc gunabee biru' yëjn Waj. ¿Chuza bénan rigujejn ruza't ree bejn xcwent ni cayüjnman?

Zianan zeel rüjn Herodes naguiejn guguaaman Jesús.

*Ruyaana Jesús gaay mil bejn**(Mt. 14:13-21; Mr. 6:30-44; Jn.6 :1-14)*

<sup>10</sup> Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczí bejn zojb, gajxh guiedx Betsaida. <sup>11</sup> Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tääman bénragxuu ree.

<sup>12</sup> Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bén guin din yaguiaj reeman chitiil lod yaya'n reeman luguiedx doo ree në ree ranch, chitiil tää ni gaw reeman din lod nadxu' ree achetczí yu'.

<sup>13</sup> Dxel rëbaman loj reeman:

—Lëjt gajc gol badëëd ni gaw reeman.

Abi' rëb reeman:

—Per gaayzi guidahtil naca'n con zatio'p bëjl, bajtëë bal yo'n yusiin ni gaw gra reeman.

<sup>14</sup> Abi' cost gaay mil ree xinguaaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

<sup>15</sup> Abi' bagojn reeman laa reeman persi gurej gra reeman zian. <sup>16</sup> Dxel cwa'man guigaay guidahtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree bén guin. <sup>17</sup> Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

*Rëb Bëd guial Jesús naj Cristo**(Mt. 16:13-19; Mr. 8:27-29)*

<sup>18</sup> Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

<sup>19</sup> Badxi' reeman laan rëb reeman:

—Yu' reeman rëb lüj naj Waj bén baroobnijs bejn ree, yu'za reeman rëb lüj naj Elías bén badëë xtiidx Dios loj ree bejn, yu' tää reeman rëb lüj naj tijb ree bén badëë xtiidx Dios loj ree bejn gocli, bén ma baban.

<sup>20</sup> Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

*Rugojn Jesús guiëtaman*

(Mt. 16:20-28; Mr. 8:30-9:1)

<sup>21</sup> Rëb Jesús loj reeman achuczi loj guiëb reeman zian, <sup>22</sup> rëb tëëman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

<sup>23</sup> Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman guialzi ni tëdzaman guixie guixie abi' guidnalaman naj. <sup>24</sup> Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj, zajpaman guialnaban tiblayaa con Dios. <sup>25</sup> ¿Xhie gan güün bejn gapaman gra ni yu' loj guidxliuj abi' nitaman loj Dios? <sup>26</sup> Bal chu ratu guza't naj në da diidxan, ziangajc naj najn Bén guxhaal Dios, yatunë'n laaman chi guialan con da guialrniabeen loj xbiani da Dadan nëtëë loj xbiani ree xianjlaman. <sup>27</sup> Per diidxliczi rnin lojdi, yu' ree bén za' guie ad zëjtt xt guguaa reeman xguialrniabee Dios.

*Bidxaa Jesús loj choon ree xbejnman*

(Mt. 17:1-8; Mr. 9:2-8)

<sup>28</sup> Chi gudëd cost xhujn dxej ni gunee Jesús diidx guin ree, wejman persi gurejdx gunabaman Dios tijb guijc guia', binëman Bëd con Waj con Jacob. <sup>29</sup> La'tgaj cabejdx canabaman Dios, bidxaa lojman guiáad xabaman gojcan naquichbëj bidiin tëën bacha'.

<sup>30</sup> Dxejczí gulentie tio'p ree bejn, caneenë reeman laaman. Tijbaman naj Moisejs zatijbaman naj Elías. <sup>31</sup> Yu' reeman galay biani cayü reeman diidx guial guiët Jesús Jerusalén. <sup>32</sup> Majsi yu' bacaal loj Bëd në loj ree xcompniaraman, batie'ch xbacaal reeman persi baguaa reeman xbiani Jesús con zatío'p ree bén za'nëman. <sup>33</sup> Chi ma baza ree bén caneenë Jesús, rëb Bëd lojman:

—Mextr, ¡zagdxen nadxu' ree guie! Zajc yaguieenan choon ranch, tijban par lüj, tijban par Moisejs zatijban par Elías.

Per ad ragbeet Bëd xhienin caneeman. <sup>34</sup> La'tgaj caneeman zian, biguiajt tijb zaj xt guijc reeman, chi ma yu' reeman lën zaj guin dád bidxeb reeman. <sup>35</sup> Dxel loj zaj guin biguien cha' bejn, rëbaman:

—Bén guie naj da Xi'nan bén rën da'tan. Gol bacaagdiajg xtiidxaman.

<sup>36</sup> Chi gulox biguien cha'man loj zaj guin, baguaa reeman xtijbzi Jesús za'man. Abi' ad gutie'cht reeman diidx. Lën ree dxej zii achutczi loj rëb reeman ni baguaa reeman.

*Rayüjn Jesús tijb xin yu' xindxab luxdoo*

(Mt. 17:14-21; Mr. 9:14-29)

<sup>37</sup> Bareguiaal, chi baguiajt reeman guijc guia' guin, dád benzien brier bigchaagloj Jesús.

<sup>38</sup> Abi' tijb bén no'ch loj reeman guridxa', rëbaman lojman:

—¡Mextr!, been wen baguaa da xi'nan din tijbzi laax ra'pan. <sup>39</sup> Tijb xindxab ru luxdoo abi' rucwixdiajx laax, rugüjtya'x laax rbëë tëëx bichijn ro'x. Dád rusagdiajx laax ad rëntix guslaax laax. <sup>40</sup> Ma gunaaban loj ree xbejn din nabëë reeman xindxab guin, per ad gojct reeman.

<sup>41</sup> Badxi' Jesús laan rëbaman:

—¡Benguijdx, bén ad riladxt! ¿Xt goc gazunë'n lëjt gadaan tëën lëjt? Tanë xi'nl guie.

<sup>42</sup> Chi cabig xin guin basajb xindxab guin laax luyuj, bagüjtya'x laax zatijb. Per gunabee Jesús barii xindxab guin, bayüjnman laax dxel bayüman laax loj xdadix.

<sup>43</sup> Graczi reeman badxaloj guialrniabee ni rajp Dios.

*Rugojn Jesús zatijb guial guiëtaman*  
(Mt. 17:22-23; Mr. 9:30-32)

La'tgaj caydxa loj reeman ni cayüjn Jesús, rëbaman loj ree xbejnman:

<sup>44</sup>—Gol bacaagdiajgchaaw ni ganin lëjt: yayü reeman Bén guxhaal Dios loj ree bejn.

<sup>45</sup> Per laa reeman ad bignia't reeman ni rnieeman guial ad badëëtaman mod nignia' reeman, abi' bidxeb reeman niniabdiidx reeman lojman xhie rën guiëb ni rëbaman.

*¿Chu mazri zojbloj?*

(Mt. 18:1-5; Mr. 9:33-37)

<sup>46</sup> Dxel guzuloj ree xbejnman rëb loj lasa' reeman chu loj gra reeman mazri zojbloj.

<sup>47</sup> Per gogbee Jesús xgab ni cayüjn reeman abi' cwa'man tijb xindoo, bazujman laax cwë'man, <sup>48</sup> dxel rëbaman loj reeman:

—Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man. Din bén rüjn sirv lojdi, laaman mazri zojbloj lojdi.

*Bén ad za't contr dunuj ree za'man con dunuj ree*  
(Mr. 9:38-40)

<sup>49</sup> Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

<sup>50</sup> Per rëb Jesús lojman:

—Ad rudxoondi, din bén ad za't contr dunuj ree, za'man con dunuj ree.

*Gudilë Jesús Jacob con Waj*

<sup>51</sup> Chi ma cadxin dxej yayë'p Jesús xanyabaa, dxel beenman xgab guial rüjn naguiejn cheman Jerusalén. <sup>52</sup> Guxhaalaman bén guned ree, wej reeman tijb guiedxdo nulen Samaria bitiil reeman lod yaya'n reeman. <sup>53</sup> Per ad cwëjbt ree bén Samaria guin nudëëd reeman lod naya'nman guial gogbee reeman cheman Jerusalén. <sup>54</sup> Chi baguiaa Waj con Jacob zian, rëb reeman lojman:

—Dad, ¿rënl ya yanabeen guiat bajl xanyabaa din gunijtan bén guin ree zi'c been Elías bén badëë xtiidx Dios loj ree bejn?

<sup>55</sup> Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëëd ni rnieedi? <sup>56</sup> Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

*Bén rën chinal Jesús*  
(Mt. 8:19-22)

<sup>57</sup> Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëëz guin chel.

<sup>58</sup> Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

<sup>59</sup> Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenë' da Dadan xt chi guiëtaman.

<sup>60</sup> Abi' rëb Jesús lojman:

—Basa'n xdadil con ree bén ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

<sup>61</sup> Dxel rëb zatijb bén guin:

—Dad, rënan guidnaalan lüj, per yalojxgaj banee mod chigzadiidxnë' ree da familan.

<sup>62</sup> Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'man yuj zagdxe. Ziangajc b́en ŕen guidnal naj, bal id zusa'nman graczi tibladd ad zile't chu'man loj xguialrniabee Dios.

## 10

### *Rxhial Jesús gayojnchii bejn*

<sup>1</sup> Chi gudéd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman.

<sup>2</sup> Rëbaman loj reeman:

—Diidxiczi, zien bejn ŕen gucaagdiajg xtiidx Dios, per ad zient b́en guliü laa reeman yu'. Zeel gol gurejdx gunab Dios din guixhaalaman mazri zien b́en guliü laa reeman.

<sup>3</sup> Gol chej, naj rxhial lëjt zi'c rej ree xiil galay ree cuyojt. <sup>4</sup> Ad chinëdi guijxh, ni'qui milia, ni'qui zatib nejz xgurëchidi, ad sudxedi guinieenëdi bejn ree runejz. <sup>5</sup> Bantëez lënu chu'di, yalojxgaj gol güjdx: “Dios yabe'cdxe luxdoodi.” <sup>6</sup> Abi' bal lënüzii yu' ree b́en rayal guialnaza'c guin, zaya'n nan yagaj. Guiáad bal id rayal reeman laan zayejcan con lëjt.

<sup>7</sup> Yagaj gol baya'n, gol gudaw, gol gu' ni gunee reeman. Din b́en rüjn dxiin rayal gaxaman. Yagajzi gol baya'n ad bal yaya'ndi lood ren. <sup>8</sup> Chi guidxindi tijb guiedx lod yaca' reeman lëjt, gol gudaw ni gunee reeman. <sup>9</sup> Gol bayüjn ree b́enragxuu yu' ree luguiedx guin, gol güjdx tää loj reeman: “Ma zëed xguialrniabee Dios gajxh par lëjt.” <sup>10</sup> Per bal guidxindi tijb guiedx lod ad rënt reeman yaca' reeman lëjt, gol brii lunejz, gol güjdx loj reeman: <sup>11</sup> “Xt xgoxyuj ladxidi ni cwa du guia'n, radxijpan zi'c tijb sen guial ad bidxga'tidi dux tiidxan. Per gol gogbee, guial ma zëed xguialrniabee Dios gajxh par lëjt.” <sup>12</sup> Naj rni lëjt guial dxej yadëed ree bejn cwent loj Dios, mazri casti narooob yayal reeman guial loj ree b́en gure guiedx Sodoma.

### *B́en ad bazoobt ree xtiidx Dios (Mt. 11:20-24)*

<sup>13</sup> Rëb tää Jesús:

—¡Probza lëjt b́en Corazín! ¡Probza lëjt b́en Betsaida! Din bal guiedx Tiro në guiedx Sidón niajc gra ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tää cobdëj guijc reeman zi'c tijb sen guial ma bayüjn reeman xgab por xtol reeman. <sup>14</sup> Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree b́en Tiro në ree b́en Sidón. <sup>15</sup> Guiáad lëjt, b́en Capernaum, ad naladxidi yayalidi xanyabaa, lëjt yayal gabijl.

<sup>16</sup> Dxel rëb Jesús loj ree xbejnman:

—Bén ridxga' lëjt, najn ridxga'man, per b́en ad ridxga't lëjt, najn ad ridxga'taman. Guiáad b́en ad ridxga't naj, b́en guxhaal najn ad ridxga'taman.

### *Badxin ree b́en gayojnchii guxhaal Jesús*

<sup>17</sup> Chi badxin ree b́en gayojnchii guxhaal Jesús, dád rabaá reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

<sup>18</sup> Abi' rëb Jesús loj reeman:

—Waliquidi, naj baguia, zi'czi rë'p nijs basëeb xguialrniabee xindxab. <sup>19</sup> Naj banee lëjt guialrniabee din gulëedi guijc ree bëel në guijc ree nixüb, në par güündi gan loj xguialrniabee xindxab sin guial güünx lëjt xhienin. <sup>20</sup> Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

### *Rabaá Jesús (Mt. 11:25-27; 13:16-17)*

<sup>21</sup> Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxe, Dad, lüj rniabee xanyabaa në loj guidxliuj, din ni baquie'chil loj ree b́en rajc në loj ree b́en rignia', laan ma balüül loj ree b́en ad rajcza'ct. Zian gojcan Dad, din zian guyënl.

<sup>22</sup> 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tēēt nünbee Dios, tijbzi Jesucrist xi'nman con ree bēn rēnman güünbee Dios.

<sup>23</sup> Dxel baguiaaman loj ree xbejnman, abi' rēbaman lojzi reeman:

—Xiquilbaa ree bēn guguaa ni cuguaaadi. <sup>24</sup> Din naj rni lojdi, zien ree bēn badēē xtiidx Dios loj ree bejn nē ree rey guyēn nuguaa ni cuguaaadi, per ad baguiaat reeman laan. Guyēn reeman nucaagdiajg reeman ni cucaagdiajguidi, per ad bacaagdiajgt reeman laan.

### *Xcwent tijb bēn Samaria*

<sup>25</sup> Tijb mextr rajc ley guzuliman guneenēman Jesús. Abi' din güünman laaman prueb, gunabdiidxaman lojman rēbaman:

—Mextr, ¿xhie rayal günan din ga'pan guialnaban tiblyaa con Dios?

<sup>26</sup> Badxi' Jesús laan rēbaman:

—¿Xhie ca loj ley badēē Dios loj Moisejs? ¿Xhienaag rignia'lan?

<sup>27</sup> Abi' rēb mextr guin:

—“Guyēn xDadil Dios guidib guiyc guidib ladxil guyēn tēē ben ren zi'c rēn lüj gajc.”

<sup>28</sup> Badxi' Jesús laan, rēbaman:

—Zagdxequi badxi'lan. Bal güünl zian zajpil guialnaban tiblyaa con Dios.

<sup>29</sup> Per guyēn mextr guin naya'nman zagdx, gunabdiidxaman loj Jesús, rēbaman:

—¿Chu bēnan guiēnan zi'c rēn naj gajc?

<sup>30</sup> Dxel be Jesús tijb cwent lojman, rēbaman:

—Tijb bēn Israel briiman Jerusalén zēman guiedx Jericó. Abi' gunaaz ree xingubaaan laaman, gudijn reex laaman gulan tēē reex gra ni ca'man xt nē xabaman, basa'n reex laaman ma güjtczaman. <sup>31</sup> Dxel gudēd tijb bixhioz niz yagaj, per chi baguiaaman bēn guin, zijt bicaaman volt, zētaman. <sup>32</sup> Nē tijb bēn Levita bēn rüjn yudar bixhioz ree, gudēd niz yagaj, chi baguiaaman bēn guin, zijt bicaaman volt, zētaman. <sup>33</sup> Per tijb bēn Samaria gudēd niz yagaj, chi baguiaaman bēn guin, bayaman laaman, <sup>34</sup> dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxiibaman laaman xburaman binēman laaman lēnü lod raya'n ree bejn. Yagaj gunajman laaman. <sup>35</sup> Chi bareguiaal, chi ma yaguij bēn Samaria guin, gulēēman milia xieen tio'p dxej dxiin badēēman laan loj bēn naj lidxan, rēbaman lojman: “Gunaj bēn guie, bal gunijtil mazri, naj yaguix laan chi yaye'can.”

<sup>36</sup> Dxel rēb Jesús loj mextr guin:

—Yan, loj guiyon ree bēn guin, ¿chu bēnan guyēn bēn gudin ree xingubaaan guin?

<sup>37</sup> Badxi' mextr guinan rēbaman:

—Bēn baya laaman.

Dxel rēb Jesús lojman:

—Baguij, been ziangajc con ben ren.

### *Rignaj Jesús Mart nē Li*

<sup>38</sup> Basnuu Jesús zēman abi' bidxinman tijb guiedxdoo, yagaj wejman lidx tijb biin la Mart. <sup>39</sup> Yu' tijb xbēlim lam Li. Gurej Li guin guia' Jesús cucaagdiajguim ni caneeman.

<sup>40</sup> Per Mart guin mazri ruquiejnnē gra xmandadim, abi' bibiguim loj Jesús rēbim:

—Dad, ¿nid rul xgab ya guial rusa'n da bēlan naj con gra mandad guin? Güjdx lojm din güünm naj yudar.

<sup>41</sup> Badxi' Jesús laan rēbaman:

—Mart, Mart, dád rul xgab guial yu' da't xmandadil. <sup>42</sup> Per tijbzi ni mazri zobjloj yu'. Li gulejm ni mazri zobjloj, abi' achut zajc chiquiedan lojm.

## 11

### *Rulüü Jesús xhienaag cwedx guiniab bejn Dios*

(Mt. 6:9-15; 7:7-11)

<sup>1</sup> Tijb dxej cabejdx canab Jesús Dios. Abi' chi gulox gurejdx gunabaman Dios, rēb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj bén baroobnijs bejn ree.

<sup>2</sup> Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,  
rayal yaya'p da'tan lajl respejt.

Gac zi'c rniabeel.

Gac zi'c rënl loj guidxliuj, zi'c rajc xanyabaa.

<sup>3</sup> Bazaladx ni yadaawan guixie guixie.

<sup>4</sup> Been dunujn perdon gra ree ni mal ma baguieenan, zi'c raguieenan perdon bén rüjn ree dunujn ni mal.

Ad tiëbil güün xinxab dunujn gan yaguieenan dol, babëë dunujn loj gra ni mal.

<sup>5</sup> Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidix, guiëbidi: “Miw, baneesii choon guidxtil gagui'nän, <sup>6</sup> din bi't tijb da miwan abi' achet ra'pan gudëdan lojx.” <sup>7</sup> Dxel nax diizd lënü guin: “Ad ruslenl naj. Ma nayaaw ro' da portan. Ma naga'yë'snë' ree da xi'nän. Ad zile't chixchejn gunen laa reen.” <sup>8</sup> Per rnin lëjt, majsi bal id zixchex din guneex ni ryaadxidi guial rajc xmiwidi laax. Per züjnx naguiejn chixchex din guneex ni ryaadxidi chitëë guslenridi laax. <sup>9</sup> Zeel rnin lëjt: Gol gunab loj Dios, laaman guneex ni rniabidi. Gol baguuilaman, zadxejlidi laaman. Gol gurejdx gunabaman, zidxga'man lëjt. <sup>10</sup> Din bén rniab, zaca'man. Abi' bén rguuil, zadxejlaman guiaad bén rbejdx rniab laaman zidxga'man laaman.

<sup>11</sup> ¿Lëjt najdi dad, wen zudëëdi tijb guiaj loj xi'ndi ya chi guiniabix guidahtil?, ¿o zudëëdi tijb bëel ya chi guiniabix bëjl? <sup>12</sup> ¿O zudëëdi nixüb ya chi guiniabix dxij? <sup>13</sup> Nacli lëjt najdi bëndol rajc rudëëdi ni zagdx loj xi'ndi. ¡Diidxgui xDadidi bén yu' xanyabaa, nid zudëë xSprijtaman loj ree bén rniab laaman ya!

*Rëb ree bejn ca' Jesús xguialrniabee Beelzebú*

*(Mt. 12:22-30; Mr. 3:19-27)*

<sup>14</sup> Caybëë Jesús tijb xinxab basa'n tijb bejn gop. Abi' chi barii xinxab guin guzuloj canee bén guin. Dxel dád badxaloj ree bejn. <sup>15</sup> Per yu' reeman rëb:

—Bén guin rabëë xinxab luxdoo ree bejn por xguialrniabee Beelzebú, xin rniabee ree xinxab.

<sup>16</sup> Yu'za reeman par güün reeman laaman prueb, rëb reeman lojman din güünman milagr zëed xanyabaa. <sup>17</sup> Per Jesús ragbee gajcaman xgab cayüjn reeman, abi' rëbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman. <sup>18</sup> Ziangajc bal Satanás xin rniabee ree xinxab su contr lasa' xinxab gajquix, nayob nit xguialrniabeex. Canin zian guial rëbidi por xguialrniabee Beelzebú rabën xinxab luxdoo ree bejn. <sup>19</sup> Per bal rabën xinxab luxdoo ree bejn por xguialrniabee Beelzebú, ¿chuza rudëëd guialrniabee loj ree xbejndi din yabëë reeman xinxab? Zeel laagajc reeman rulüü guial ad laat rnieedi. <sup>20</sup> Per por xguialrniabee Dios rabën xinxab luxdoo ree bejn, laan rën guiëb guial ma za'në xguialrniabee Dios lëjt.

<sup>21</sup> Bal tijb béngojl da't ca' xguilibaman, rajp lidxaman. Ad zajct cwan bejn ni rajpaman.

<sup>22</sup> Per bal guidxin bén mazri gojl guial lojman güünman laaman gan abi' chisüdaman guib ni ca'man tia' tëëman gra ni rajpaman.

<sup>23</sup> Bén ad za't con naj, za'man contr naj, guiaad bén ad ruto'pt bejn par naj rtie'chaman laa reeman.

*Xinxab rayejc*

*(Mt. 12:43-45)*

<sup>24</sup> Chi rarii tijb xinxab luxdoo tijb bejn, abi' rza xinxab guin niz loj yujbidx rguuilix lod yaziiladxix. Chi ad rdxejlt lod yaziiladxix, dxel rüjnx xgab naladxix: “Zagdxeli

yaye'can lod bariin.” <sup>25</sup> Abi' chi rayejquix ruguiaax luxdoo bén guin, najn zi'c tijb lèñü lod bilioob lod najcchaaw tëë. <sup>26</sup> Dxel rica'x zagajdx ree xindxab naj mazri xinmal guial lojx. Abi' ru gra reex luxdoo bén guin. Dxel piorli raya'nman guial zi'c gocaman yaloj.

*Xiquilbaa ree bén ruzoob xtiidx Dios*

<sup>27</sup> La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rëbaman:

—¡Xiquilbaa béngunaa bazuj lüj loj guidxliuj, bén baslaa tëë lüj!

<sup>28</sup> Per badxi' Jesús laan rëbaman:

—¡Mazri xiquilbaa ree bén rucaagdiajg xtiidx Dios ruzoob tëë reeman xtiidxaman!

*Rniab ree bejn güün Jesús tijb milagr*

*(Mt. 12:38-42; Mr. 8:12)*

<sup>29</sup> Zi'cri cado'p ree bejn lod za' Jesús, abi' guzuloj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguaiaa reeman, tijbzi zi'c guzac Jonás bén badëë xtiidx Dios loj ree bejn. <sup>30</sup> Zi'c goc Jonás tijb sen par ree bén gure guiedx Nínive, ziangajc Bén guxhaal Dios najman tijb sen par ree bén naban yan. <sup>31</sup> Abi' bén goc reina guiedx Sabá, zabanman chi yadëëd ree bejn cwent loj Dios dxel guiëbaman guial ree bén riga' yan, yayal reeman xcasti Dios. Din laaman dád zijt guzaman bicaagdiajgaman xguialrajc rey Salomón. Abi' yan, naj za'në'n lëjt, mazri lasajcan guial loj rey Salomón. <sup>32</sup> Ziangajc ree bén guban guiedx Nínive, zaban reeman chi yadëëd ree bejn cwent loj Dios abi' guiëb reeman guial ree bén riga' yan, yayal reeman xcasti Dios. Din bén Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

*Guiaaloj bejn naj zi'c biani*

*(Mt. 5:15; 6:22-23)*

<sup>33</sup> 'Achut rucaaguij tijb guij par sun lod naguie'ch, achu tëët ruta'cw laan lën tijb yagaln. Rayal sun lod guiguianan din gusnin loj bén chu' lëñü. <sup>34</sup> Guiaaloj bejn naj zi'c tijb biani par xcuerpaman. Bal por ni ruguiaal rüjnl ni zagdx, guidib xcuerpil naj biani. Per bal por ni ruguiaal rüjnl ni mal, guidib xcuerpil naj zi'c lod nacay. <sup>35</sup> Gojp cudad chitëë chinë guiaalojl lüj loj nejz mal luar loj nejz zagdx. <sup>36</sup> Abi' bal ni'qui tibda'n xcuerpil ad rüjnt ni mal, guidibczan gac nayni zi'c chi rusni guij con xbacha'n.

*Ni rüjn ree mextr rajc ley në ree bénfarisew*

*(Mt. 23:1-36; Mr. 12:38-40; Lc. 20:45-47)*

<sup>37</sup> Chi gulox guneeñ Jesús laa reeman, tijb bénfarisew rëb loj Jesús din chitaw Jesús lidxaman. Chi guyuman, zianz gurejman xan mex. <sup>38</sup> Abi' bénfarisew guin badxalojman chi baguaaaman ad banaat Jesús chi ma gawaman zi'c naj xcostumbr reeman. <sup>39</sup> Per rëbaman loj reeman:

—Najdi zi'c tijb vajs con pliajt ni naya xijch, rguiendi benza'c, per luxdoodi yu' da't guialgubaan në ni mal. <sup>40</sup> ¡Bennad! ¿Nid bén been gajc xcuerpidi been luxdoodi ya? <sup>41</sup> Zeel gol been yudar bén achet rajp din guiguian guial najquidi benza'c.

<sup>42</sup> '¡Probza lëjt bénfarisew! Rbëëcadi ni naj par Dios, rüjndi chii lala' ni rajpidi zi'c bidxtil në rud në graloj ni rxübindi abi' rudëëdi tijban loj Dios. Per ad rüjntidi zi'c rayal ad rën tëëtidi Dios. Gol bidxga' Dios ad gucwëëz tëë gudëëdi ni rudëëdi lojman.

<sup>43</sup> '¡Probza lëjt, bénfarisew! guial ruladxidi cwedi lod rbej ree bén zojbloj lën ree yadoo, ruladx tëëdi gugajpdioz ree bejn lëjt zagdx niz lunejz.

<sup>44</sup> '¡Probza lëjt, mextr rajc ley në lëjt bénfarisew, bén rusquiee!, din najdi zi'c baa ni ad rguient, abi' ad ragbeet ree bejn rë'p reeman guijcan.

<sup>45</sup> Dxel gunee tijb mextr rajc ley, rëbaman loj Jesús:

—Mextr, në dunujn caneeguijdxil guial rëbil zian.

<sup>46</sup> Badxi' Jesús laan rëbaman:

—jZiangajc lëjt mextr rajc ley, probza lëjt!, guial rniabeedi bejn ree güün reeman ni nawëëgda't abi' rniabeezidi güün bejn zian guiáad lëjt ni'qui ta'n ad rüjntidi laa reeman yudar din güün reeman zi'c rëndi.

<sup>47</sup> 'jProbza lëjt!, guial rüjnchaawidi xbaa ree bën badëë xtiidx Dios loj ree bejn, bën bagüjt gajc ree xbéngulalidi. <sup>48</sup> Zian ragbee ree bejn guial ruladxidi ni been ree xbéngulalidi. Laa reeman bagüjt ree bën badëë ree xtiidx Dios loj ree bejn, guiáad lëjt rayüjnchaawidi xbaa reeman.

<sup>49</sup> 'Zeel Dios guial ragbeeman gra ni gac, rëbaman: “Gaxhalan bën rudëë ree xtiidx Dios loj ree bejn, në ree apóstoles, yu' reeman gugüjtidi yu' tëë reeman sunalidi din güüندی laa reeman xhienin.” <sup>50</sup> Abi' bën naban ree yan, laa reeman yadëëd cwent loj Dios por rejn ni guxhie' ree bën badëë xtiidx Dios loj ree bejn, bën güt ree diidz chi go'tchaaw guidxliuj, <sup>51</sup> diidz xrejn Abel xt xrejn Zacarías bën bagüjt reeman ro' yadooro' Jerusalén. Zeel rnin lëjt guial ree bën naban yan, laa reeman quix por gra reeman.

<sup>52</sup> 'jProbza lëjt, mextr rajc ley!, guial ad rtiëjbtidi chu' ree bejn loj xnejz Dios, ni'quiza lëjt ad rüjnt naguiejn chu'di loj xnejz Dios abi' rudxoondi chu' ree bejn loj xnejzaman.

<sup>53</sup> Chi gunee Jesús zian, dád bidxe'ch ree bënfarisew guin në ree mextr rajc ley. Abi' guzuloj zien ree ni rniabdiidx reeman lojman, <sup>54</sup> din guidoon xhie guiëbaman din chile' gutedia' reeman laaman.

## 12

### *Xlevadur ree bënfarisew*

<sup>1</sup> La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaloj loj ree xbejnman:

—Gol gojp cudad con xlevadur ree bënfarisew, rën guiëban gapidi cudad con ni rusquiee reeman. <sup>2</sup> Din achet ni naguie'ch yu' ni ad zaguiënt, ad yu' tëët ni ralan ni ad zagbeet bejn. <sup>3</sup> Zeel gra diidx ni ma guneedi lod nacay, zaguiëjn ree bejn laan lod nayni. Guiáad ree diidx ni ma guneedi ralan lënu, yu' chi cwidxa' reeman guiniee reeman diidx guin ree diidz guijc ree yu.

### *Chu rayal guidxeb bejn*

(Mt. 10:28-31)

<sup>4</sup> 'Rnin lëjt, ad ridxebidi bën rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal reeman laan. <sup>5</sup> Ganin lëjt chu rayal guidxebidi: gol bidxeb Dios bën rajp guialrniabee guial chi ma biquiedaman xguialnabandi zajc guzaalaman lëjt gabijl. Zeel gol bidxebaman.

<sup>6</sup> Lëjt ragbee guial biguijndoo ree ad lasajct reeb wayëjx, per Dios ad rayanladxtaman ni'qui tijb reeb. <sup>7</sup> Guiáad lëjt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

### *Bën rëb loj ree bejn guial najman xbejn Jesucrist*

(Mt. 10:32-33; 12:32; 10:19-20)

<sup>8</sup> 'Rnin lëjt, chutëëz bën guiëb loj ree bejn guial najman da bejnan, ziangajc naj najn Bën guxhaal Dios guiën loj ree xianjl Dios guial da bejnan najman. <sup>9</sup> Per bën guiëb loj ree bejn guial ad najtaman da bejnan, ziangajc guiën loj ree xianjl Dios guial ad najtaman da bejnan.

<sup>10</sup> 'Chutëëz bën guinieeguijdx Bën guxhaal Dios zajcaman perdon, sa'n bën guinieeguijdx xSprijt Dios, ad zajctaman perdon.

<sup>11</sup> 'Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadxi'di xtiidx reeman. <sup>12</sup> Din chi guidxin hor ni guinieedi, xSprijt Dios gunee diidx guinieedi.

### *Xcwent tijb xinrijcw*

<sup>13</sup> Tijb bën no'ch loj ree benzien guin rëb loj Jesús:

—Mextr, güjdx loj da bichan din gunee ni rayalan.



<sup>14</sup> Per rëb Jesús lojx:

—¿Chu bazuj naj gūnan guialguxtis o gagui'san ni tia'di?

<sup>15</sup> Rëb tēēman loj reeman:

—Gol gojp cudad; ad sēēbladxidi gapidi ni rajp ree ben ren, din ad ni rajpt bejn runee guialnaban.

<sup>16</sup> Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax. <sup>17</sup> Dxel beenx xgab naladxix: “¿Xhienaag gūnan? Ad ra'ptan lod gagu'chaawan guialnaza'c guin ree.” <sup>18</sup> Abi' gunaladxix: “Ma ragbeen xhienaag gūnan. Guse'nān yu lod rgu'chaawan da guialnaza'can din gūnan mazri yu narooob ree lod gagu'chaawan laa reen, nē graczi ni ra'pan. <sup>19</sup> Dxel guiēn, dád zien guialnaza'c ra'pan par zien ijz, yaziiladxan, gawan, guiē'n yabaa tēēn.” <sup>20</sup> Per rëb Dios lojx: “Xin tont, yanguxhin gajc guiētil, laadx ni nagu'chaawil, ¿chu yaya'nnē laan?”

<sup>21</sup> Zian rzajc bēn rgu'chaaw ni za'c par laagajcaman, per loj Dios achet rajpaman.

### *Achetczi rayal chu' bejn xgab*

(Mt. 6:25-34)

<sup>22</sup> Dxel rëb Jesús loj ree xbejnman:

—Naj rni lējt: Ad chu'di xgab por ni gawidi par guibandi ni'qui por lajd ni gacwidi.

<sup>23</sup> Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman. <sup>24</sup> ¿Gol baguiaa balo ree! Ad rxübint reeb ad rato'p tēēt reeb guialnaza'c, ad rajp tēēt reeb lod yagu'chaaw reeb guialnaza'c guin, per Dios rudēēd ni raw reeb. ¿Abi' mazri lasajquidi guial loj reeb! <sup>25</sup> ¿Wen guial ru da'tidi xgab ma güün lējt gajc mazri ziool ya? <sup>26</sup> Abi' bal ni'qui zian ad zile't güündi, ¿xhieczy gan rudi xgab por ni ren ree?

<sup>27</sup> ¿Gol baguiaa xhienaag rini's ree guiaa dajn! Ad rüjnt reen dxiin ad rguib tēēt reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman. <sup>28</sup> Abi' bal gui'xh dajn ruzujchaaw Dios yan, majsi guixiezi che'can. ¿Diidxgui lējt, bēn ad rliladxza'ct ree laaman nid zuneeman ni gacwidi ya! <sup>29</sup> Zeel ad rudi xgab xhie gawidi o xhie guiē'di, ad bal tib yu'zidi laan xgab. <sup>30</sup> Din bēn ad nünbeet ree Dios rüjn zian. Laa reeman ru xgab por gra ree ni guin. Per lējt yu' xDadidi, laaman ragbeechaaw xhienin riaadxidi. <sup>31</sup> Per yalojxgaj gol baguiil güündi zi'c rniabee Dios, laaman gunee gra ni ryaadxidi.

### *Guialnaza'c yu' xanyabaa*

(Mt. 6:19-21)

<sup>32</sup> 'Lējt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenēdi laaman. <sup>33</sup> Gol bato' ni rajpidi din gudēēdan loj ree bēnprob. Gol been naguiejn güündi gan guialnaza'c ni ad rarar ni yu' xanyabaa, lod ad zut xingubaan cwan laa reen lod ad zacabe tēēt reen. <sup>34</sup> Din lod rajpidi guialnaza'c guin, yagaj za' xquiarguejndi.

### *Gol guzujsin*

<sup>35</sup> 'Gol guzujsin zi'c bēn ma najcw xab ca' tēē xguijman par griiman. <sup>36</sup> Gol been zi'c ree mojs cabēz yadxin xpatron reex, bēn zē loj guialruxhliaa, din diob guixhial reex ro' port yayuman chi gucaaman. <sup>37</sup> ¿Xiquilbaa ree mojs naga'naa cabēz xpatron reex! Naj rni lējt, laagajc patron guin cwe'c laa reex xan mex, dxel chicchaa xabaman din gudēēman ni gaw reex. <sup>38</sup> Xiquilbaa reex bal guidxaagloj xpatron reex laa reex naga'naa reex, majsi yadxinman garol guiaal o chi ma cayreguiaal ya. <sup>39</sup> Gol been xgab, bal tijb bejn ragbeeman xhie hor chu' xingubaan lidxaman cwanx, ad zatiējbtaman chu'x lidxaman. <sup>40</sup> Zianan zeel gol guzujsin din ad ragbeetidi dxejczy gui't Bēn guxhaal Dios.

### *Mojs za'c nē mojs guijdx*

(Mt. 24:45-51)

<sup>41</sup> Dxel gunabdiidx Bēd loj Jesús, rëbaman:

—Dad, ¿par dunujzan bel cwent guin ya o par gra ree bejn?

<sup>42</sup> Badxi' Jesús laan, rëbaman:

—¿Chu lëjt naj zi'c tijb mojs za'c, nazobdiidx, rusa'n xpatronx laax lidxaman persi rulenz gra ree mojs rudëë tëëx ni raw reex chi rajl hor? <sup>43</sup> Xiquilbaa mojs cayüjn dxiin zagdxë chi yadxin xpatronx. <sup>44</sup> Din diidxliczi rnin lëjt, zusa'n gra xieen patron guin loj mojs guin. <sup>45</sup> Per bal naladx mojs guin: “Zaglaari yaguaaad da patronan”, zianz sulojx gusagzix gra ree bën rüjn dxiin yagaj, zi'c béngunaa zi'c xinguaaw, dxel suloj gawix, guië'x südx tëëx, <sup>46</sup> abi' yadxin xpatronx tijb dxej ni ad rbëztix në tijb hor ni ad ragbeetix. Dxel dád casti narooob gudëëd patron guin laax, guixhiaalaman laax lod rayal ree bën ad ruzoobt diidx.

<sup>47</sup> 'Din tijb mojs ragbee ni rën xpatronx güünx, abi' ad za'tix porvinid ad ruzoob tëëtix diidx, dád casti narooob tëdix. <sup>48</sup> Per mojs ad ragbeet ni rën xpatronx güünx abi' güünx ni rayal casti, ta'nz tëdix casti. Din bën badëëd Dios quiarguejn, mazri zien ni rayal güünman por quiarguejn ni badëëd Dios lojman. Ziangajc bën badëëd Dios guialrniabee, mazri zien ni rayal güünman por guialrniabee ni badëëd Dios lojman.

*Por Jesús rlia' lasa' ree bejn*

*(Mt. 10:34-36)*

<sup>49</sup> 'Zialan loj guidxliuj zi'c tijb bën zidgacaaguij xhienin, abi' jma rën nejzdoon tiaguijn! <sup>50</sup> Gazaagdiajn guiët tëën, abi' jdád yu'nayan diizd yan xt chi gacan cumplid! <sup>51</sup> Ad nalaxidi zialan loj guidxliuj par yabecdxen luxdoo bejn, zialan din guial guililadx reeman naj chu' wadijl. <sup>52</sup> Din diizd yan, lod naj reeman gaay loj tijb famil, til choonman contr tio'paman, tio'paman contr choonaman. <sup>53</sup> Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

*Sen rguien xanyabaa*

*(Mt. 16:1-4; Mr. 8:11-13)*

<sup>54</sup> Rëb tëë Jesús loj ree benzien guin:

—Chi ruguiaadi ririi zaj niz lod rëëz gubijdx, rëbidi: zal guia, abi' rajc gajc zian. <sup>55</sup> Abi' chi ririi bi niz sur, rëbidi: gac nalaa, abi' rajc gajc zian. <sup>56</sup> jBën rusquiee! Ragbeedi xhie rën guiëb sen rguien xanyabaa në loj guidxliuj, ¿chexquiza zeel ad ragbeetidi xhie rën guiëb ni cayajc loj guidxliuj yan?

*Babëj zagdxë con bën rdxe'ch lüj*

*(Mt. 5:25-26)*

<sup>57</sup> '¿Chexc ad rüjnt lëjt gajc xgab conin naj ni zagdxë? <sup>58</sup> Bal chu bën rudëëd lüj loj guxtis, been naguiejn baya'nnëman diidx zagdxë la'tgaj yu' tiamp, chitëë yayüman lüj loj guxtis, abi' guxtis guin yayü lüj loj ree bën cu' lüj ladxguiib. <sup>59</sup> Naj rni lüj, ad zariitil ladxguiib guin xtczi quixil gra ni na guxtis guin.

## 13

*Gol bayüjn xgab por xtolidi*

<sup>1</sup> Lën gajc ree dxejzii wej tio'p choon ree bejn biguie reeman diidx loj Jesús guial bagüjt Pilato tio'p choon ree bën Galilea, abi' bago'chaman xrejñ reeman con xrejñ ree be bagüjt reeman par gudëëd reeman loj Dios zi'c gon. <sup>2</sup> Dxel rëb Jesús:

—Ad bal nalaxidi guzajc ree bën Galilea guin zian guial naj reeman mazri bëndol guial loj gra ree bën Galilea. <sup>3</sup> Din naj rni lëjt guial ad ziantan. Abi' bal id zayüjndi xgab por xtolidi ziangajc saquidi. <sup>4</sup> Ad bal nalaxidi bën chiinbichoon güt ree chi guxa't torre ni la Siloé laa reeman, naj reeman mazri bëndol guial loj gra ree bën zojb Jerusalén. <sup>5</sup> Naj rni lëjt guial ad ziantan. Abi' bal id zayüjndi xgab por xtolidi ziangajc saquidi.

*Xcwent yag higo ni ad rtiat*

<sup>6</sup> Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetczi bidxaaglojman. <sup>7</sup> Dxel rëbaman loj bën rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetczi rdxaglojn. Batüügan din nawëëgzi rüjnan loj guidxliuj guie.” <sup>8</sup> Per rëb bën rajp guidxliuj guin: “Dad, basa'nsiin zatib ijz, yabeciaan yuj xanan gagu' tëënan abon. <sup>9</sup> Rupent zian tian, per bal id zacan dxel tügan.”

*Bayüjn Jesús tijb béngunaa ca bëw xijch*

<sup>10</sup> Tijb dxej raziiladx ree bejn, culüü Jesús bejn ree lën tijb yadoo, <sup>11</sup> yagaj za' tijb béngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rilet'czi yaliman. <sup>12</sup> Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

<sup>13</sup> Dxel badxiib yaaman guijcaman; abi' loj hor guin gajc baliman, zianz guzuloj caza'taman Dios zagdx. <sup>14</sup> Per bën rniabee lën yadoo guin dád bidxe'chaman guial bayüjn Jesús bën guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

<sup>15</sup> Badxi! Dad Jesús laan rëbaman:

—Bën rusquiee, ¿nid rxhiec xgo'ndi o xburidi dxej raziiladx ree bejn ya par chiquië'di laa reeb nijs? <sup>16</sup> Béngunaa guie zëëdaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?

<sup>17</sup> Chi rëb Jesús zian, gra ree bën rdx'e'ch laaman baya'n xtu; per graczi ree bejn rabaa guial ruguiaa reeman gra ree ni zagdx ni rüjnman.

*Xcwent xhaj moxtajs*

(Mt. 13:31-32; Mr. 4:30-32)

<sup>18</sup> Rëb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman? <sup>19</sup> Laan naj zi'c xhaj moxtajs ni rxübin bejn loj xguiniaaman, rni'san xt rajcan yag narooob. Abi' guial narooob da't rajcan xt rüjn xguixbitia's ree biguijn xidxan.

*Xcwent levadur*

(Mt. 13:33)

<sup>20</sup> Rëb Jesús zatijb:

—¿Xhienaag ganin naj xguialrniabee Dios? <sup>21</sup> Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

*Port nadëë*

(Mt. 7:13-14, 21-23)

<sup>22</sup> Chi zë Jesús Jerusalén, rulüüman bejn ree luguedx narooob ree në ree luguedx dobëz niz lod rdëdaman. <sup>23</sup> Abi' tijb bejn gunabdiidx lojman rëbaman:

—Dad, ¿ta'nz ree bën gac perdon ya?

Badxi! Jesús laan rëbaman:

<sup>24</sup> —Gol been naguiejn din chu'di niz ro' port nadëë, din naj rni lëjt, zien ree bën rën chu', per ad zile't chu' reeman. <sup>25</sup> Din chi chisu bën naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.” <sup>26</sup> Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.” <sup>27</sup> Per naman lojdi: “Ma rnin, ad ragbeetan ban guzadi. Gol biquied lon bëndol.” <sup>28</sup> Ni goondi gaw tëë layidi chi guguaadi Abraham, Isaac, Jacob, në gra ree bën badëë xtiidx Dios loj ree bejn, za' reeman lod rniabee Dios, guiáad lëjt yariicadi. <sup>29</sup> Din gui't ree bën sa gra lad guidiblagaa guidxliuj

din cwe reeman gaw reeman lod rniabee Dios. <sup>30</sup> Abi' zien ree b́en bigra yan, laa reeman gac b́en yaloy nadxel. Guiáad ree b́en naj b́en yaloy yan, laa reeman gac b́en bigra.

*Roon Jesús por Jerusalén*

(Mt. 23:37-39)

<sup>31</sup> Hor guin gajc bidxin tio'p choon ree b́enfarisew, abi' rēb reeman loj Jesús:

—Baguiaj, baza niz guie, din rēn rey Herodes gugújtaman lüj.

<sup>32</sup> Badxi' Jesús laan rēbaman:

—Gol chej gol chiguiedx loj b́en rusquiee zii: “Yan, ně guixie yabēn xindxab yayün tēen b́enragxuu ree, abi' widx gulooxan.” <sup>33</sup> Per naj rayal gusnuu da nejzan yan ně guixie ně widx, din ad najt guial guiēt tijb b́en rudēē xtiidx Dios loj ree bejn luguiedx ren bal id najn Jerusalén.

<sup>34</sup> ‘jB́en Jerusalén, b́en Jerusalén, rugújtidi b́en rudēē ree xtiidx Dios loj ree bejn rucaaguaaj tēedi gra ree b́en rxhiaal Dios lojdi! jB́elczi volt guyēnan nuchagan lasa'di zi'c rüjn tijb guid ruchajg lasa' ree xi'nb lēn xhiilib, per ad cwējbtidi! <sup>35</sup> Zianan zeel yaya'n ladxidi zi'c tijb guiedx lod achut zobj. Abi' rnin lējt, diizd yan ad zuguaatrudi naj xt chi guidxin dxej guiēbidi: “jNüjnle' Dios b́en zēed por laaman!”

## 14

*Rayüjn Jesús tijb b́en rzaaguij*

<sup>1</sup> Tijb dxej raziiladx ree bejn wej Jesús bitawaman lidx tijb b́enfarisew rniabee. Yu' ree b́enfarisew guin cula'ch laaman xhie güünman, <sup>2</sup> guial za' tijb xinragxuu lojman rzaaguijx. <sup>3</sup> Dxel gunabdiidx Jesús loj ree mextr rajc ley ně loj ree b́enfarisew guin, rēbaman:

—jZajc yayüjn bejn b́enragxuu dxej raziiladx ree bejn ya o ad zajctan?

<sup>4</sup> Per laa reeman achetczi rēb reeman. Dxel gunaaz Jesús xinragxuu guin bayüjnman laax, abi' rēbaman lojx din yaguaajx. <sup>5</sup> Dxel rēbaman loj ree b́enfarisew guin:

—jBal tijb xburidi o tijb xgo'ndi yab lēn tijb bizē, nid zabēēdi laab ya, majsi naj dxej raziiladx bejn?

<sup>6</sup> Abi' achet gojc nadxi' reeman.

*B́en rej ree loj guialruxhliaa*

<sup>7</sup> Chi baguiaa Jesús rbe ree biooz luar lod rbej ree b́en mazri zobjloj, rēbaman loj reeman:

<sup>8</sup> —Bal chu guiniee lüj chel loj tijb guialruxhliaa, ad cwel luar rbej ree b́en mazri zobjloj. Din zajc guidxin zatijb biooz mazri zobjloj guial lojl, <sup>9</sup> abi' gui't b́en gunee gropidi naman lojl: “Badēēd lod zobjil cwe b́en guie.” Dxel rayal chel guidib ratul chisobil loj yagxhil bigra. <sup>10</sup> Zeel chi guiniee reeman lüj, zagdxeli bisob loj yagxhil bigra, din chi gui't b́en gunee lüj naman lojl: “Miw, badēd loj tijb luar mazri zobjloj.” Zian, gra ree b́en zobjnēl xan mex guza't lüj zagdxe. <sup>11</sup> Din b́en rlies xvalor gajc, yaya'nxtuman. Guiáad b́en rüjn naya zajs xvaloraman.

<sup>12</sup> Dxel rēb Jesús loj b́en gunee laaman:

—Bal goc cu'l guialraw, ad guiniee xmiwil, ni'qui lasa'l, ni'qui bijchil, ni'qui benrijcw zobjnēl gajxh. Din laa reeman yu' dxej guiniee reeman lüj, abi' zian yanee reeman ni gudaw reeman lidxil. <sup>13</sup> Zagdxeli naj, chi güünl tijb lanij, gunee b́enprob ree, ně ree b́en ad nadaant yaa, ně ree bencoj con ree b́enlutia'p. <sup>14</sup> Xiquilbaal bal güünl zian, din laa reeman ad zajct yanee ni badēēdil. Per chi guidxin dxej yaban ree b́en bazoob xtiidx Dios, Dios yaguijx laan lojl.

*Xcwent b́en been tijb lanij*

<sup>15</sup> Chi biguiejn tijb b́en zobjnē Jesús xan mex ni rēbaman, rēbaman loj Jesús:

—jXiquilbaa ree b́en yayal gaw lod rniabee Dios!

<sup>16</sup> Dxel rēb Jesús lojman:

—Tijb bejn badxe' guialraw par xche, abi' guneeman zien da't ree bejn. <sup>17</sup> Chi ma gojl hor gaw reeman xche, guxhaal xmojsaman din chex chiguiedxix loj ree biooz guin: “Gol guda din graczi ma najcchaaw.” <sup>18</sup> Per graczi reeman guzuloj caynab perdon. Bén yaloj guin, rëbaman: “Yan gajczi guzin tijb guidxliuj, rayal chiquianan; been wen güjdx lojman din güünman naj perdon.” <sup>19</sup> Zatiybaman rëb: “Guzin gaay nejz go'n, yan chiguienan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.” <sup>20</sup> Zatiybaman rëb: “Yan gajczi baxhlian zeel ad zile't guialan.” <sup>21</sup> Chi badxin mojs guin bagojn xpatronx gra ni rëb ree bén guin, dád balenman, dxel rëbaman lojx: “Baquiejn wej niz galay ni, në niz lad ree nejz, tanë gra ree bénprob në ree bén ad nadaant yaa, në ree bencoj con ree bénlutia'p.” <sup>22</sup> Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.” <sup>23</sup> Dxel rëbaman lojx: “Wej niz loj carreter në niz loj ree nejz la's, been naguiejn ben ren ree din gui't reeman din cha lëñü lidxan. <sup>24</sup> Din naj rni lojdi, ni'czi tijb ree bén gunen yaloj ad zajwt guialraw benchaawan par xche.”

*Ni rayal güün ree bén rën gac xbejn Jesús*

<sup>25</sup> Dád zien ree bejn zinal Jesús; abi' badxi' lojman loj reeman rëbaman:

<sup>26</sup> —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, në guial loj xi'ndi, o bijchidi o bizandi, rayal tää guiëndi naj mazri guial loj xguialnabandi, din bal id züjndi zian ad zajct gaquidi da bejnan. <sup>27</sup> Bén ad rënt sagdiaj guidnal tääman naj, ad zajct gacaman da bejnan.

<sup>28</sup> 'Bal chu rën güün tijb yu narooob, ¿nid yalojxgaj cweman ya din cwääman cwent zadaan xmiliaman ya din gulooxaman laan? <sup>29</sup> Din bal sulojman xcimiantan abi' ad zuloxtaman laan, graczi ree bén guguaa laan guze' laaman, <sup>30</sup> guiëb reeman: “Guzuloj cayüjn bén guin yu abi' ad gojct nulooxaman laan.”

<sup>31</sup> 'O bal tijb rey güün wadijl contr zatiyb rey, ¿nid yalojxgaj cweman ya güünman xgab züjn chii mil xsuldadaman gan loj stijb rey zidnë gajl mil suldad ya? <sup>32</sup> Per bal naladxaman ad züjntaman gan loj rey guin, la'tgaj sta za' rey guin zijt, guixhiaalaman bén chinë ree xrusonman din yaya'n reeman diidx ad zut wadijl. <sup>33</sup> Yan, ziangajc rnin lojdi, chutëöz lëjt bal id zusa'n gra ni rajpidi din guidnalidi naj, ad zajct gaquidi da bejnan.

*Bal id zajcri zëd naxij*

*(Mt. 5:13; Mr. 9:50)*

<sup>34</sup> Dxel rëb Jesús:

—Ni zagdxe naj zëd. Per bal id zajcran naxij, ¿xhieza naag yayajcan naxij zatiyb? <sup>35</sup> Ad rüjntan sirv par luyuj ni'qui par loj abon, rzëëbzán. ¿Bén rën ree gucaagdiajg, gol bacaagdiajg!

15

*Xcwent xiil gunit*

*(Mt. 18:10-14)*

<sup>1</sup> Gra ree bén ruquijx impuest në gra ree bëndol, bibig reeman lod za' Jesús din gucaagdiajg reeman ni rnieeman. <sup>2</sup> Guiáad ree bénfarisew con ree mextr rajc ley rnieeguijdx reeman laaman, rëb reeman:

—Ruchajg bén guin bëndol ree rawnë tääman laa reeman.

<sup>3</sup> Dxel rëb Jesús loj reeman:

<sup>4</sup> —Bal tijb bejn rajp tibgayuu xiil abi' rnijt tijbib, ¿nid rusa'nman zatajppajlchiin-bitapib dajn ya abi' rigdiilaman xiil gunit guin xt lodzi radxejlaman laab? <sup>5</sup> Abi' chi radxejlaman laab rabaaman, rudxiibaman laab dxidyëjnman. <sup>6</sup> Dxel chi radxin lidxaman, ruto'p ree xmiwaman në ree bén zojbnëman gajxh abi' rëbaman loj reeman: “Gol babaa zi'c rabaan, din ma badxejlan da xiilan be gunit.” <sup>7</sup> Yan, rnin lëjt, ziangajc rabaanë Dios tijb bén rayüjn xgab por xtol guial loj tajppajlchiinbitap benza'c ad ryaadxt yayüjn xgab por xtol.

*Xcwent milia ni bizëëb*

<sup>8</sup> 'O bal tijb béngunaa rajpaman chii milia plajt abi' rusëëbaman tijban, ¿nid ruze'caman guij ya ruloob tëëman lënu abi' raguuilaman laan zagdxe da't xt lodzi radxejlan? <sup>9</sup> Abi' chi radxejlaman laan, ruto'p ree xmiwaman në ree bën zojbnëman gajxh, abi' rëbaman loj reeman: “Gol babaa zi'c rabaan din ma badxejlan milia basëban.” <sup>10</sup> Yan, naj rni lojdi, ziangajc rabaa ree xianjl Dios por tijb bëndol rayüjn xgab por xtol.

*Xcwent bën rüjn perdon xi'n*

<sup>11</sup> Rëb tëë Jesús loj reeman:

—Tijb bejn yu' ti'p xi'nman. <sup>12</sup> Abi' xin naj mazri xinguiag, rëb loj xdadix: “Dad, banee ni rayal gaca'n.” Dxel badëëman ni rayal tijbgaj reex. <sup>13</sup> Ad gojct xchej ni cwa' reex ni rayal reex, xin naj xinguiag guin bato'gajquix graczi ni badëëd xdadix lojx, abi' con milia guin wejx zijt bignijt xlia'x graczi xmiliax guial beenx ni rëntzix. <sup>14</sup> Per chi ma banijtix gran, dxel guyu gubijn niz lod za'x abi' guzuloj biaadx ni gawix. <sup>15</sup> Dxel wejx bignabix dxiin loj tijb bën zojb yagaj, abi' guxhaalaman laax chigajpix cüch ree dajn. <sup>16</sup> Guial tant rliaanx xt guyënx niajwix ni raw ree cüch guin, per achut rudëë laan. <sup>17</sup> Dxel beenx xgab naladxix: “¿Zien ree xin rüjn dxiin lidx da Dadan xt sobr rüjn ni raw reex, guiáad naj guie ma guiëtan bëjz! <sup>18</sup> Yan, yazaan yaya' lidx da dadan din guiën lojman: Dad, ma benan dol loj Dios në lojl. <sup>19</sup> Ad rayaltri guinieel naj xi'n; been naj cwent zi'c tijb ree xmojsil.” <sup>20</sup> Dxel bayunejzix zia lidx xdadix.

'Per zijtri ziaadix chi baguiaa xdadix laax dxel bayaman laax, zianz ruxüünman bigchaaglojman laax, abi' gudiidxaman laax gudaw tëëman laax xid. <sup>21</sup> Dxel rëbix lojman: “Dad, ma benan dol loj Dios në lojl, ad rayaltri guinieel naj xi'n.” <sup>22</sup> Per rëb xdadix loj ree xmojsaman: “Gol baquiejn gol tanë lajd zagdxe, gol bascajcwixan, gol badxe' tijb guibnil yaax gol baslëë tëëx gurëch, <sup>23</sup> gol chica' go'n mazri nadaan, gol bagüjtib din yadaaw ree yaguieen ree lanij. <sup>24</sup> Din par naj ma güjt da xi'nan abi' yan ma babanx, gunijtix abi' ma badxejlax.” Dxel guzuloj cayüjn reeman lanij.

<sup>25</sup> 'La'tgaj xi'nman xingol guin cayüjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tëë reeman. <sup>26</sup> Dxel gurejdxix tijb xmojs xdadix, gunabdiidxix xhienin cayajc lidxix. <sup>27</sup> Badxi' mojs guinan rëbix: “Guial baguiaad bijchil zeel gunabee xdadil güjt tijb go'n mazri nadaan guial nadaanx baguiaadix.” <sup>28</sup> Per dád bidxe'ch xingol guin, abi' ad guyëntix nayux. Zeel wej xdadix biguiedxaman lojx din yayux. <sup>29</sup> Dxel rëb loj xdadix: “Lüj ragbee ma gojc xchej cayünan xchiinl, zianczi ruzoban xtiidxil; per ni'czi tijb ad waneetil tijb dxibdobëz din günnë' ree da miwan lanij. <sup>30</sup> Guiáad yan baguiaad xi'nl, xin ma bignijt xlia' xmilial con ree béngunaa dxuudx, abi' gunabeel güjt go'n mazri nadaan par laax.”

<sup>31</sup> 'Dxel badxi' xdadix laan rëbaman: “Xi'n, zianczi za'l con naj, graczi ni ra'pan naj xieenl. <sup>32</sup> Per yan rayal yaguieen ree lanij yabaa tëë ree, din bijchil xin ma güjt par naj, ma babanx, gunijtix abi' ma badxejlax.”

## 16

*Xcwent tijb mojs rniabee ree mojs*

<sup>1</sup> Rëb tëë Jesús loj ree xbejnman:

—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman. <sup>2</sup> Dxel gurejdxaman laax rëbaman lojx: “¿Xhie rën guiëb ni rigujëjnan cayüjnl? Banee cwent lon xcwent xchiinl, din achetri dxiin gunen lojl.” <sup>3</sup> Dxel guzuloj beenx xgab gunaladxix: “¿Xhienaag günan yan ma gusa'n da patronan naj sin dxiin? Ad yu'tan gojl günan dxiin dajn, ratu tëën ganaaban carda. <sup>4</sup> Ma ragbeen xhienaag günan din guiën ree bejn naj chi ad züntran dxiin.” <sup>5</sup> Dxel gurejdxix tijb gaj ree bën ral loj xpatronx, rëbix loj bën bidxin yaloj: “¿Plac ralil loj da patronan?” <sup>6</sup> Abi' rëbaman: “Ralan tibgayuu barril sejt lojman.” Dxel rëbix: “Cwa' gui'ch guie lod ca ni ralil lojman, been zatijban bacaa lojn ralil tü'pchiizan.” <sup>7</sup> Dxel

gunabdiidix loj zatijbaman rëbix: “Laadx lüj, ¿plac ralil?” Abi' rëbaman: “Tib gayuu ingujch trigo.” Zianz rëbix: “Cwa' gui'ch guie lod ca ni ralil lojman, been zatijban bacaa lojn ralil tajpgajlzan.” <sup>8</sup> Dád badxaloj patron guin guial nasin mojs mal guin por ni beenx. Din mazri nasin ree bën ad zinalt xnejz Dios con lasa' reeman guial loj ree bën zinal xnejz Dios.

<sup>9</sup> 'Rnin lojdi, gol beennë dxiin ni rajpidi loj guidxliuj guie par gagnëdi bejn din chu' xmiwidi, din chi yaran ma yu' bën yaca' lëjt lod gapidi guialnaban tiblyaa.

<sup>10</sup> 'Bal chu rüjn zi'c rayal con ta'n ni rudëed bejn lojman, züjnman zi'c rayal con zro'n. Ziangajc bën ad rüjnt zi'c rayal con ta'n ni rudëed bejn lojman, ad züjn gajctaman zi'c rayal con zro'n. <sup>11</sup> Yan, ziangajc bal id züjndi zi'c rayal con ni za'c yu' loj guidxliuj guie, ¿chu gap lëjt confianz con guialnaza'c yu' xanyabaa? <sup>12</sup> Bal id züjndi zi'c rayal con ni ad najt xieendi, ¿chu gunee lëjt ni rayalidi?

<sup>13</sup> 'Ni'qui tijb mojs ad zajct güünx sirv loj tio'p patron; din zadxe'chix tijbaman abi' zën x zatijbaman; o zajquix xinza'c con tijbaman abi' züjnx tibladd zatijbaman. Zeel ad zajct güündi sirv loj Dios, në loj milia.

<sup>14</sup> Abi' ree bënfarisew guial mazri rën reeman milia, chi biguiejn reeman ni rëb Jesús guzuloj cuze' reeman laaman. <sup>15</sup> Dxel rëb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

#### *Xley Moisejs con xguialrniabee Dios*

<sup>16</sup> 'Xley Moisejs në ni bacaa ree bën badëë xtiidx Dios loj ree bejn, naga'loj been reen dxiin xt chi bi't Waj bën baroobnijs bejn ree. Abi' diizd nadxel guzuloj rire'ch xtiidxza'c Dios xhienaag naj xguialrniabeeman, abi' zien ree bejn rüjn naguiejn chu' loj xguialrniabeeman.

<sup>17</sup> 'Adli nawëëgt nit xanyabaa në guidxliuj, guial yaya'n tijb diidx zëed loj ley guin guial ad zajctan cumplid.

#### *Rülüü Jesús xcwent guial rala' lasa'*

*(Mt. 19:1-12; Mr. 10:1-12)*

<sup>18</sup> 'Bal tijb xinguaaaw rala' lacheelix abi' rtia'x ben ren, dolan cayüjnx. Ziangajc xin rtia' tijb bëgunaa bala' lacheel, dolan cayüjnx.

#### *Xinrijcw con Lazr*

<sup>19</sup> Basnuu Jesús, rëbaman:

—Guyu tijb xinrijcw, guzujchaawix con ganaxczi lajd zagdx, abi' guixie guixieczi rüjnx lanijro'. <sup>20</sup> Guyu tëë tijb xinprob brii lajx Lazr, rbejx ro' xport xinrijcw guin abi' guidibлагаax ca guiadx. <sup>21</sup> Rën nejzdoo Lazr guin gawix ni riajb xan xmex xinrijcw guin. Abi' xt ree bë'cw rbig rlie' reeb loj ree guiadx ni cax.

<sup>22</sup> 'Chi bidxin dxej güjt Lazr dxel bignë ree xianjl Dios laax lod naj nix da't, lod za' Abraham. Në xin rijcw guin güjt, abi' biguie'chix. <sup>23</sup> Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwë' Abraham. <sup>24</sup> Dxel gurixdiajx rëbix: “Dad Abraham, baya naj, guxhaal Lazr din gugajdx lupunt xbacwën x din gui'tix yasiaalyujx lüdxan, din dád cazaagdiajn loj bajl guie.” <sup>25</sup> Per badxi' Abraham xtiidix rëbaman: “Xi'n, basaaladx guial dád nix guyu luxdool chi gubanl loj guidxliuj, guiáad Lazr dád naya gubajnx. Yan, rayalix lod yabaax guiáad lüj rayalil lod sagdiajl. <sup>26</sup> Nëtëë yan bën za' ree guie ad zajct téd reeman yagaj, ni'qui ree bën za' yagaj ad zajct téd reeman guie, din za' bala'ro' du galay ree.”

<sup>27</sup> 'Dxel rëb xinrijcw guin lojman: “Rniaaban lojl dad, been wen guxhaal Lazr lid x da dadan, <sup>28</sup> lod zojb gaay ree da bichan din chicojnx laa reex chitëë në laa reex gui't luar guie, lod yu' zro' casti.” <sup>29</sup> Per rëb Abraham lojx: “Ma rajp reex gui'ch ni bacaa Moisejs con ree bën badëë xtiidx Dios loj ree bejn, laan rayal guidxga' reex.” <sup>30</sup> Abi' rëb xinrijcw guin: “Walil, dad Abraham, per ad zaliladxt reex, sa'n bal yaban tijb bën ma güjt chigneenëman laa reex, zayüjn reex xgab por xtol reex.” <sup>31</sup> Per rëb Abraham lojx: “Bal

id ridxga' reex xtiidx Moisejs në xtiidx ree bën badëë xtiidx Dios loj ree bejn, ad zaliladxt reex majsi yaban tijb bën ma güjt.”

## 17

### *Bén ruzaalguiiw bejn din güünman dol*

(Mt. 18:6-7, 21-22; Mr. 9:42)

<sup>1</sup> Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per ¡probza naj bën ruzaalguiiw zatijb bejn guial güünman dol! <sup>2</sup> Par laaman zagdxeli naj guixhii reeman tijb guiaj mulin yëjnman din guzaal reeman laaman loj nijsdoo, luar guzaalguiiwaman tijb bën qui riladxri naj din güünman dol. <sup>3</sup> ¡Gol gojp cudad!

'Bal xhie tijb ni mal güün tijb lasa'l, guneenëman. Abi' bal bayünman xgab por ni beenman, beenman perdon. <sup>4</sup> Majsi gajdx volt loj tibdxej güünman xhienin contr lüj, abi' bal gui'taman lojl gajdx volt naman: “Been naj perdon ad züntran zian”, rayal güün laaman perdon.

### *Guialrniabee në guialrliladx*

<sup>5</sup> Dxel rëb ree xi apóstoles Jesús lojman:

—Banee dunujn mazri guialrliladx.

<sup>6</sup> Abi' rëb Jesús loj reeman:

—Bal naj xguialrliladxidi majsi zi'czi naj xhaj moxtajs, zile' guiëbidi loj yagro' guin: “Bia'xh guie, bisob loj nijsdoo”, zuzooban xtiidxidi.

### *Ni rayal güün tijb mojs*

<sup>7</sup> 'Bal tijb lëjt rajp tijb mojs, abi' chi yaguaad mojs guin bigla'x yuj o bigajpax begui'xh ree ya, ¿wen zëjbidi lojx ya: “Guyu, gurej din gawil”? <sup>8</sup> Ad zëjbtidi zian, guiëblidi: “Bachaa xabil, been ni gawan, guda'n. Chi lox gawan guië' tēen dxel ma zajc gawil guië' tēel.” <sup>9</sup> Abi' wed ni'qui quixtëë ad zudëetidi lojx din cayünzix ni rayal güünx. <sup>10</sup> Ziangajc lëjt chi loox güündi gra ni gunabee Dios dxel guiëbidi: “Nayajcan mojs ni ad rüjnt sirv, din baguieenzan ni rayal yaguieenan.”

### *Rayün Jesús chii ree bën rajc guialguijdx la lepra*

<sup>11</sup> Chi ma cadxin Jesús Jerusalén, gudëdaman guiedx riga' ree niz Samaria në niz Galilea. <sup>12</sup> Abi' chi cayuman tijb luguiedx dobëz, bigchaagloj chii ree bën rajc guialguijdx la lepra laaman. Per zijt guzuj reeman, <sup>13</sup> rbixdiaj reeman, rëb reeman:

—¡Jesús, Mextr, baya dunujn!

<sup>14</sup> Chi baguiaa Jesús laa reeman, rëbaman loj reeman:

—Gol chej loj ree bixhioz din guguaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman. <sup>15</sup> Dxel tijbaman chi gogbeeman ma bayajcaman, bayejcaman, rbixdiajman rudëëman quixtëë loj Dios. <sup>16</sup> Abi' bazuxibaman loj Jesús, basajb lojman xt luyuj persi badëëman quixtëë lojman. Abi' najman bën Samaria. <sup>17</sup> Dxel rëb Jesús:

—¿Nid chii naj ree bën bayajc ya? ¿Con zagaa reeman? <sup>18</sup> ¿Tijbzi benzit guie bayejc ya rudëëman quixtëë loj Dios?

<sup>19</sup> Dxel rëbaman loj bën guin:

—Bisu. Baguiaj, ma bayajquil guial bililadxil naj.

### *Xhienaag gui't xguialrniabee Dios*

(Mt. 24:23-28, 36-41)

<sup>20</sup> Gunabdiidx ree bënfarisew loj Jesús goc gui't xguialrniabee Dios, abi' rëbaman:

—Xguialrniabee Dios ad najtan ni guguaa bejn. <sup>21</sup> Abi' achut guiëb: “Laan za' guie”, o “Laan za' ni” ya, din xguialrniabee Dios mal za'n galaydi.

<sup>22</sup> Dxel rëbaman loj ree xbejnman:



—Zadxin dxej guiëndi guguiaadi Bén guxhaal Dios majsi tibdxejzi, per ad zuguiaatidi laaman. <sup>23</sup> Abi' yu' reeman na lëjt: “Laaman za' guie”, o “Laaman za' ni” ya, ad bal chinalidi laa reeman. <sup>24</sup> Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj. <sup>25</sup> Per yalojxgaj sagdiajman abi' ad zënt ree bén riga' yan laaman. <sup>26</sup> Zi'c goc gulal chi guban Noé, zian gac chi gui't Bén guxhaal Dios. <sup>27</sup> Din nadxel gudaw ree bejn, gu' reeman, baxhliaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman. <sup>28</sup> Ziangajc gojc chi guban bén brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree. <sup>29</sup> Per chi brii Lot luguiedx Sodoma, guzuloj biyajb guij xanyabaa në azufre, abi' güjt gra reeman. <sup>30</sup> Ziangajc gac dxej ni gui't Bén guxhaal Dios.

<sup>31</sup> 'Dxej ni gac zian, bén yë'p guijc yu ad zaguiajttaman chiglëë ni nagu'man lënu. Abi' bén za' dajn, ad zayejct lidxaman. <sup>32</sup> Gol basaaladx ni guzac lacheel bén brii laj Lot. <sup>33</sup> Bén mazri rën guialnaban rajpaman loj guidxliuj guie, zadxin dxej gunijttaman laan, per bén guiët por naj, zajpaman guialnaban tiblayaa con Dios.

<sup>34</sup> 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n. <sup>35</sup> Guiáad lod cayojt tio'p ree béngunaa, tijbaman sa zatijbaman yaya'n. <sup>36</sup> Abi' lod za' tio'p ree xinguiáaw dajn, tijbix sa zatijbix yaya'n.

<sup>37</sup> Chi biguiejn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

## 18

### *Xcwent tijb béngunaa bizëjb në tijb juejs*

<sup>1</sup> Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtci reeman. <sup>2</sup> Abi' rëbaman loj reeman:

—Guyu tijb guiedx lod guyu tijb juejs, ad rdxebtaman Dios ad ridxga' tëëtaman bejn ree. <sup>3</sup> Luguiedx ziigajc zojb tijb béngunaa bizëjb, rniabaman loj juejs guin din güünman guialguxtis gagnëman laaman loj bén rdxe'ch laaman. <sup>4</sup> Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad rdxebtan Dios ad ridxga' tëëtan bejn ree, <sup>5</sup> per béngunaa guie ad rucwëëzt ruslenman naj. Zagdxeli naj günan laaman yudar chitëë ri'traman naga gad da pacensan chigra.”

<sup>6</sup> Dxel rëb Jesús loj reeman:

—Zian gunee juejs mal guin. <sup>7</sup> Diidxgui Dios, ¿nid zagnëman bén guleman ya bén rbejdx rniab ree laaman dxej guiaal? ¿Wen zaglaa gagnëman laa reeman ya? <sup>8</sup> Naj rni lëjt guial ad zaglaat gagnëman laa reeman. Per chi gui't Bén guxhaal Dios, ¿chuj ni zadxaaglojraman bén riladx Dios loj guidxliuj ya?

### *Xcwent bénfarisew con bén ruquijx impuest*

<sup>9</sup> Be Jesús zatijb cwent par ree bén naladx tijbzi laa reeman naj benza'c guial loj ree ben ren, rëbaman:

<sup>10</sup> —Tio'p ree xinguiáaw wej lën yadooro' Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest. <sup>11</sup> Xin farisew guin, za'lix cabejdx canabix Dios, rëbix: “Quixtëë runen lojl, Dad, guial ad najtan zi'c ree ben ren, naj reeman béngubaan, benmal, bén za'në béngunaa ren, ni'qui zi'c naj Bén ruquijx impuest guin. <sup>12</sup> Rba'nan tio'p volt lën xuman, abi' gra ni rünan gan rünanan chii lala' persi runen tijban lojl.” <sup>13</sup> Per xin ruquijx impuest guin, zijt za'x abi' ni'quid rayaxtix guilies lojx, rga'p luxdoox rëbgajx: “¿Dios, baya naj najn tijb xindol!” <sup>14</sup> Naj rni lëjt guial xin ruquijx impuest guin ma been Dios laax perdon chi bayejc lidxix, per xin farisew guin ad beentaman laax perdon. Din Bén rlies xvalor gajc achet lasajcaman loj Dios, guiáad Bén rüjn naya laaman mazri lasajc loj Dios.

*Rüjnle' Jesús xindoo ree*  
(Mt. 19:13-15; Mr. 10:13-16)

<sup>15</sup> Binë ree bejn xindoo ree lod za' Jesús din gudxiib yaaman guiic reex, per chi baguiaa ree xbejnman guzuloj cadilë reeman Bén zinë ree laa reex. <sup>16</sup> Per gurejdx Jesús laa reeman, rëbaman loj reeman:

—Gol badëë mod gui't reex lon, ad bal rudxoondi, din lod rniabee Dios naj par ree Bén naj zi'c laa reex. <sup>17</sup> Din naj rni lëjt, Bén ad rliadxt xguialrniabee Dios zi'c tijb xindoo, ad zile't chu'man loj xguialrniabee Dios.

*Xcwent tijb xin rijcw*  
(Mt. 19:16-30; Mr. 10:17-31)

<sup>18</sup> Tijb xin rniabee, gunabdiidx loj Jesús rëbix:

—Mextrza'c, ¿xhie rayal günan din ga'pan guialnaban tiblyaa con Dios?

<sup>19</sup> Badxi' Jesús laan, rëbaman:

—¿Chexc zeel nal lon benza'c? Achut naj benza'c, tijbzi Dios. <sup>20</sup> Lüj rajc ree mandamient: “Ad sunël béngunaa ren, ad gugüjtil bejn, ad cwanl, ad cwëël xtiidx bejn, gojp respejt xdad xniaal.”

<sup>21</sup> Dxel rëbix loj Jesús:

—Gra ree ni guin cayünan diizd xindoon.

<sup>22</sup> Chi biguiejn Jesús zian, rëbaman:

—Yu' zatijb ni ryaadx güünl: bigto' gra ni rajpil dxel gudëël milia guin loj ree Bénprob. Zian gapil guialnaza'c xanyabaa, dxel gui'til guidnalil naj.

<sup>23</sup> Chi biguiejn xin guin zian, dád guyunayax guial dád xinrijcwan. <sup>24</sup> Chi baguiaa Jesús guial dád yu'nayax, rëbaman:

—¿Dád nawëëg naj chu' benrijcw loj xguialrniabee Dios! <sup>25</sup> Adli nawëëgt téd tijb camell xan gagux, guial chu' tijb Bén rijcw loj xguialrniabee Dios.

<sup>26</sup> Abi' ree Bén biguiejn ni rëb Jesús, rëb reeman:

—¿Chu za zajc laa loj xcasti Dios?

<sup>27</sup> Dxel rëbaman loj reeman:

—Yu' ni ad zajct güün bénguidxliuj, per Dios graczan zajc güünman.

<sup>28</sup> Dxel rëb Bëd lojman:

—Dad, ma basa'nan graczi ni raya'pan persi zudnaalan lüj.

<sup>29</sup> Zianz rëb Jesús:

—Diidxliczi rnin lojdi, chutëëz Bén rusa'n lidx, lacheel, bijch, o xdad, o xniaa, o xi'n guial rüjnman zi'c rniabee Dios, <sup>30</sup> mazri zien ni tia'man loj guidxliuj guie. Abi' zajpaman guialnaban tiblyaa con Dios.

*Rugojn Jesús zatijb guial guiëtaman*  
(Mt. 20:17-19; Mr. 10:32-34)

<sup>31</sup> Gurejdx Jesús guidxiptio'p ree xbejnman tiblax, abi' rëbaman loj reeman:

—Yan, ziyo' ree Jerusalén lod gac zi'c bacaa ree Bén badëë xtiidx Dios loj ree bejn xcwent Bén guxhaal Dios. <sup>32</sup> Yayü reeman laaman loj ree benzit, guze' reeman laaman, guiniee reeman laaman ni rëntzi reeman, abi' gucojp xhiejn reeman lojman. <sup>33</sup> Quin reeman laaman dxel gugüjt reeman laaman, per ni yayon dxej yabanman.

<sup>34</sup> Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nignia' reeman xhie rën guiëb ni guneeaman.

*Rayajc guiaaloj tijb bénlutia'p*  
(Mt. 20:29-34; Mr. 10:46-52)

<sup>35</sup> Chi ma cadxin Jesús gajxh guiedx Jericó, tijb bénlutia'p, zojbaman cwë' nejn rniabaman carda. <sup>36</sup> Chi gogbeeman cadëd zien ree bejn, gunabdiidxaman xhie cayajc.

<sup>37</sup> Abi' rëb reeman lojman guial Jesús Bén Nazaret cadëd niz yagaj. <sup>38</sup> Dxel gurixdiajman rëbaman:

—¿Jesús, xdiaa Davi, baya naj!

<sup>39</sup> Bén ned ree rdilë reeman laaman din gucwëéz ro'man, per mazri rbixdiajman, rëbaman:

—jXdiaa Davi, baya naj!

<sup>40</sup> Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

<sup>41</sup> —jXhie rënl gūnan por lūj?

Badxi'man laan rëbaman:

—Dad, rënan yani lon.

<sup>42</sup> Dxel rëb Jesús lojman:

—jMa zile' guguaa! Ma bayajquil guial bililadxil naj.

<sup>43</sup> Hor guin gajc bani loj bén guin, abi' binalaman Jesús rudëëman quixtëë loj Dios. Në gra ree bén baguiaa ni goc rudëë quixtëë loj Dios.

## 19

### *Wej Jesús lidx Zaqueo*

<sup>1</sup> Guyu Jesús luguiedx Jericó abi' guzuloj cadëdaman luguiedx guin. <sup>2</sup> Yagaj zojb tijb benrijcw laman Zaqueo. Laaman rniabee ree bén ruquijx impuest. <sup>3</sup> Rën Zaqueo guin güünbeeman Jesús, per ad rilet' guguaaman laaman guial dád zien ree bejn abi' laaman najman bendop. <sup>4</sup> Zeel ruxüünman gunedaman, abi' din chile' guguaaman Jesús, wë'paman loj tijb yagro' zojb gajxh lod tëd Jesús. <sup>5</sup> Chi gudëd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

<sup>6</sup> Dxel cari da't baguiajt Zaqueo, abi' dád rabaaman zignëman Jesús. <sup>7</sup> Chi baguiaa ree bejn zian, gra reeman guzuloj caneeguidx Jesús rëb reeman zigya'nman lidx tijb bëndol.

<sup>8</sup> Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bënprob. Abi' bal yu' bén baquijxan mazri guial loj ni naj quixaman, yayünan tajp volt mazri guial loj ni gulaanan.

<sup>9</sup> Dxel rëb Jesús lojman:

—Yandxej ma been Dios perdon gra ree bén zojb lidx Zaqueo guial rliladxaman Dios zi'cgajc Abraham. <sup>10</sup> Din Bén guxhaal Dios zëëdaman zidgadiilaman bén ad zët ree loj xnejz Dios din laa reeman loj xcasti Dios.

### *Xcwent milia*

<sup>11</sup> Bén cucaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xguialrniabee Dios. <sup>12</sup> Dxel rëbaman loj reeman:

—Guyu tijb bejn, zëëdaman loj tijb famil zojbloj. Zëman zijt lod tia'man guialrniabee din gacaman rey dxel yajecaman nabee ladxaman. <sup>13</sup> Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: “Gol beennë milia guin dxiin xt chi guidxin dxej yaguialan.” <sup>14</sup> Per ree bén ladxaman guial rdxe'ch reeman laaman, guxhaal reeman tibcwaa ree bén zinal laaman persi biguiedx reeman guial ad rënt reeman gac bén guin xrey reeman. <sup>15</sup> Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan. <sup>16</sup> Mojs bidxin yaløj rëbix: “Dad, milia ni baneel ma beenan gan chii volt mazri.” <sup>17</sup> Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lūj nabeel chii guiedx.” <sup>18</sup> Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.” <sup>19</sup> Ziangajc rëb rey guin loj mojs guin: “Lūj nabee gaay guiedx.” <sup>20</sup> Dxel bidxin zatijb mojs guin abi' rëbix: “Dad, laa xmilial guie, badxe'chaawanen lën tijb baydoo, <sup>21</sup> din bidxeban lūj guial ad rayatil bejn. Raca'l ni ad najt xieenl abi' rato'pil guialnaza'c lod ad guxübintil.” <sup>22</sup> Dxel rëb rey guin: “Mojs guijdx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen guialnaza'c lod ad guxübintan. <sup>23</sup> jChexc ad badëëtil da

milian nigui'n bejn din chi naguialan naca'nan con guidib xi'nan?" <sup>24</sup> Dxel rëb rey guin loj ree bën za' yagaj: "Gol baca' milia zii lojx, gol badëëdan loj xin ca' mazran." <sup>25</sup> Abi' rëb reeman loj rey guin: "Dad, per ma ca'x zro'n." <sup>26</sup> Badxi'man laan rëbaman: "Bën rajp zro', zaca'man mazri, per bën rajp ta'nzi, xt ta'n ni rajpaman chiquied lojman. <sup>27</sup> Abi' ree bën rdxe'ch naj bën ad guyënt ree niajcan rey, gol tanë reeman guie, gol bagüjt reeman lon."

*Ru Jesús Jerusalén*

(Mt. 21:1-11; Mr. 11:1-11; Jn.12 :12-19)

<sup>28</sup> Chi gulox rëb Jesús zian, dxel basnuu zëman Jerusalén. <sup>29</sup> Chi bidxinman gajxh guiedx Betfagé con Betania, në gajxh guia' la Olivos, dxel guxhaal tio'p ree xbejnman, <sup>30</sup> rëbaman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tanëb. <sup>31</sup> Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

<sup>32</sup> Wej ree bën guxhaalaman bidxaagloj gajc reeman zi'cgajczi rëb Jesús loj reeman.

<sup>33</sup> Abi' chi caxhieci reeman bur guin, gunabdiidx ree bën naj xbur laab, rëb reeman:

—¿Chexc zeel caxhiequidi bur guin?

<sup>34</sup> Badxi' reeman laan, rëb reeman:

—Din Dad Jesús cayaadx laab.

<sup>35</sup> Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab. <sup>36</sup> Abi' ree bejn rguijxh xab reeman lunejz lod zë Jesús. <sup>37</sup> Chi ma zë reeman gajxh laguiajt ni naj guia' la Olivos, gra ree bën zinal Jesús guzuloj rbixdiaj reeman guial dád rabaa reeman abi' ruza't reeman Dios zagdx por gra ree milagr ni ma baguiaa reeman. <sup>38</sup> Rëb reeman:

—¿Nüjnle' Dios bën zëëd por laaman! ¡Yu' guialrabaa xanyabaa! ¡Benza'c bendxoon naj Dios bën yu' xanyabaa!

<sup>39</sup> Dxel ree bënfarisew no'ch loj ree bën zinal laaman, rëb reeman lojman:

—Mextr, gudilë ree bën guin chitëë rniee reeman zian.

<sup>40</sup> Per badxi'man laan rëbaman:

—Naj rni lëjt, bal yacwëëz ro' reeman, guiaj ree cwixdiaj zian.

<sup>41</sup> Chi bidxinman gajxh Jerusalén, dxel baguiaaman guiedx guin, zianz biinman por laan. <sup>42</sup> Rëbaman:

—¿Bën Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan. <sup>43</sup> Din guidxin dxej ni güün ree bën rdxe'ch lëjt tijb ze' gadëd ladxidi, abi' gra lad gusiaaw reeman lëjt, <sup>44</sup> gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidganaj Dios lëjt.

*Rabëë Jesús bën ruto' ree ro' yadooro' Jerusalén*

(Mt. 21:12-17; Mr. 11:15-19; Jn.2 :13-22)

<sup>45</sup> Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii, <sup>46</sup> rëbaman loj reeman:

—Loj xtiidx Dios rëb: "Lidxan naj yu lod rbejdx rniab bejn Dios." Per lëjt nüjndan zi'c lidx ree xingubaan.

<sup>47</sup> Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguiil reeman mod din gugüjt reeman laaman. <sup>48</sup> Per ad radxejlt xhienaag güün reeman, din graczi ree bejn rucaagdiajg chaaw ni rulüüman laa reeman.

*Xguialrniabee Jesús*

(Mt. 21:23-27; Mr. 11:27-33)

<sup>1</sup> Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel, <sup>2</sup> abi' rëb reeman lojman:

—Guna, ¿chu na güünl ni guin ree? ¿Chu banee guialrniabee lojl?

<sup>3</sup> Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n: <sup>4</sup> ¿chu guxhaal Waj bidgaroobnijsaman bejn ree, Dios ya o bénguidxliuj?

<sup>5</sup> Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiza zeel ad bililadxtidi laaman?” <sup>6</sup> Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman rililadx guial Waj gojc bén badëë xtiidx Dios loj ree bejn.

<sup>7</sup> Abi' badxi' reeman laan rëb reeman guial ad ragbeet reeman chu guxhaal Waj bidgaroobnijsaman bejn ree. <sup>8</sup> Dxel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

*Xcwent ree mojs guijdx*

(Mt. 21:33-44; Mr. 12:1-11)

<sup>9</sup> Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bén güün dxiin lojn, zëtaman zijt. <sup>10</sup> Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bén rüjn dxiin loj guiniaa guin gudijn reeman mojs guin abi' badxi' reeman laax zezi. <sup>11</sup> Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi. <sup>12</sup> Zianz guxhaalaman zatijbix, per gudiilguijdx reeman laax abi' babëë reeman laax loj guiniaa guin.

<sup>13</sup> Dxel rëb bén naj xguidxliuj laan: “¿Xhienaag günan yan? Gaxhal da xi'nan xin rën da'tan, wed zajp reeman laax respejt.” <sup>14</sup> Per chi baguiaa ree bén guin laax, rëb loj lasa' reeman: “Xin guinan naj xin yaya'nnë guidxliuj guin. Yagüjt reex din gacan du xieen ree.” <sup>15</sup> Dxel babëë reeman laax loj guidxliuj guin, bagüjt reeman laax.

Zianz gunabdiidx Jesús loj ree bén caneenëman, rëbaman:

—Yan, ¿xhie nalaxidi güünnë bén naj xguidxliuj laan bén guin ree? <sup>16</sup> Naj rni lojdi guial zi'taman din gugüjtaman bén guin ree dxel gudëëman guidxliuj guin loj ree ben ren.

Chi biguiejn reeman zian dxel rëb reeman:

—¿Gagnë Dios ad zajct zian!

<sup>17</sup> Per Jesús baguiaaman loj reeman, abi' rëbaman:

—Bal id zajc zian ¿xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree bén rüjn yu, laan naj ni mazri been sirv gojcnë yu guin.

<sup>18</sup> Chutëëz bén yab guijc guiaj guin, gacaman zi'c tijb ni riroox, guiáad bal yab guiaj guin guijcaman, gacaman zi'c tijb ni ryüüdëj.

*Xcwent impuest*

(Mt. 21:45-46; 22:15-22; Mr. 12:12-17)

<sup>19</sup> Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree. <sup>20</sup> Abi' guxhaal reeman bén zigla'ch ree laaman din güünzi reeman guial gulüü naj reeman benza'c, din yaguil reeman mod guiniee Jesús diidx ni gudxiib reeman guijc, din chile' yayü reeman laaman loj gobernador Rom. <sup>21</sup> Dxel gunabdiidx reeman lojman, rëb reeman:

—Mextr, dunujn rayagbee guial rnieel rulüü tëël zi'c rayal, din par lüj tiblojzi naj bejn, abi' walil rulüül guial xhienaag rën Dios guiban bejn. <sup>22</sup> ¿Zagdxen ya radijxan impuest loj rey César, o ad zagdxetan?

<sup>23</sup> Per gogbee gajc Jesús xgab mal ni cayüjn reeman abi' rëbaman loj reeman:

<sup>24</sup> —Gol balüü tijb cintabl lon. ¿Chu loj ca lojn chu tää laj ca lojn?

Badxi' reeman laan, rëb reeman:

—Loj rey César ca lojn në lajman.

<sup>25</sup> Dxel rëbaman loj reeman:

—Gol badëcliza loj rey César ni naj xieen César, guiáad loj Dios gol badëë ni naj xieen Dios.

<sup>26</sup> Abi' gra ni guneeaman niz loj ree bejn, achetri badxejl nudxiib reeman guijc din niniáaz reeman laaman. Badxali loj reeman ni guneeaman abi' achetri rëb reeman.

*Xcwent guial yaban ree bengüt*

(Mt. 22:23-33; Mr. 12:18-27)

<sup>27</sup> Tio'p choon ree bénsaducew bignaj Jesús, bénsadusew guin ree ad riladxt reeman guial yaban ree bengüt, zeel rëb reeman loj Jesús:

<sup>28</sup> —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xingüt guin guxhliianë béngunaa bizëjb guin din chu' xi'n reex zi'c gulüü xi'n xin güt guinan. <sup>29</sup> Guyu tijb famil lod goc reex gajdx bijch. Baxhliiaa xin yaloj guin, per güjtix abi' ad guyut xi'n reex con lacheelix. <sup>30</sup> Dxel bijch barojpax baxhliianë béngunaa guin, per güjtgajquix ad guyu gajct xi'n reex. <sup>31</sup> Zianz baxhliianë xin bayon guin béngunaa bizëjb guin, zianz baxhliianëman guigajdx reex abi' gra reex güjt achut xi'n reex guyu con laaman. <sup>32</sup> Ni bigratë në béngunaa guin güjt. <sup>33</sup> Yan, chi yaban ree bengüt, ¿chu loj guigajdx reex gac xbéngunaa laaman guial gra reex baxhliianë laaman?

<sup>34</sup> Dxel rëb Jesús loj reeman:

—Loj guidxliuj guie ruxhliiaa ree bejn abi' rudëëd xi'n reeman ruxhliiaa. <sup>35</sup> Per ree ben yaban zatijb, ben rayal ree gap guialnaban tiblyaa con Dios, ad zuxhliiaatri reeman ad zudëë täätri xi'n reeman guxhliiaa, <sup>36</sup> din ad zëjttri reeman, gac reeman zi'c ree xianjl Dios. Gac tää reeman xi'n Dios guial ma baban reeman. <sup>37</sup> Abi' xcwent ni yaban ree bengüt, xt Moisejs rëb zian tiblajt loj xtiidx Dios lod rëbaman guial baguiaaman yag ni caye'c. Yagaj rëb Dios lojman guial Dios naj xDios Abraham, xDios Isaac, në xDios Jacob. <sup>38</sup> Din Dios ad najtaman xDios ree bengüt, najman xDios ree ben naban, din par laaman gra ree bejn naban.

<sup>39</sup> Dxel yu' ree mextr rajc ley, rëb lojman:

—Mextr, zagdxequi guneel.

<sup>40</sup> Abi' achetri bayax reeman niniabdiidx reeman lojman.

*Chu loj xdiaa zëëd Cristo*

(Mt. 22:41-46; Mr. 12:35-37)

<sup>41</sup> Rëb Jesús loj ree bejn:

—¿Chexc zeel rëb ree bejn guial zëëd Cristo loj xdiaa rey Davi? <sup>42</sup> Awa Davi guin gajc gunee loj libr Salmos, rëbaman:

Dios rëb loj dux Dad ree:

“Gurej da ladbeen,

<sup>43</sup> xt gabecan xin rdxe'ch ree lüj guia'l.”

<sup>44</sup> Yan, bal xi'n Davi naj Cristo. ¿Chexquiza zeel rëb Davi guin lojman Dad?

*Ni rüjn ree mextr rajc ley*

(Mt. 23:1-36; Mr. 12:38-40; Lc. 11:37-54)

<sup>45</sup> La'tgaj cucaagdiajg gra ree bejn ni rëb Jesús, rëb loj ree xbejnman:

<sup>46</sup> —Gol gojp cudad con ree mextr rajc ley. Din ruladx reeman sa reeman gacw reeman lajd zagdxe ruladx tää reeman gugajpdioz ree bejn laa reeman con respejt niz lunejz, abi' lën ree yadoo ruladx reeman cwe reeman lod rbej ree ben zojbloj, ziangajc rüjn reeman lod ritaw reeman. <sup>47</sup> Raca' tää reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yal reeman.

## 21

*Gon badëed tijb béngunaa bizëjb**(Mr. 12:41-44)*

<sup>1</sup> Chi culüü Jesús bejn ree lën yadooro' Jerusalén, dxel gules lojman baguiaaman cagu' ree benrijcw gon lën alcancia. <sup>2</sup> Baguiaa tēēman tijb béngunaa bizëjb prob, cagu'man tio'p cintabldoo lën alcancia guin. <sup>3</sup> Dxel rëb Jesús loj ree xbejnman:

—Diidxli rnin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin. <sup>4</sup> Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

*Rëb Jesús guial yaze'n yadooro' Jerusalén**(Mt. 24:1-2; Mr. 13:1-2)*

<sup>5</sup> Tio'p choon ree xbejn Jesús cayü reeman diidx xcwent ree guiaj zagdxë najcchaawnë yadooro' Jerusalén, nē ree ni lasajc ni rudëed ree bejn par suchaaw yadoo guin. Dxel rëb Jesús loj reeman:

<sup>6</sup> —Gra ni cuguaadi yan, zadxin dxej ni'qui tijb guiaj ad zaya'nt guijc stijban, gran yaze'n.

*Ni gac chi gad guidxliuj nit**(Mt. 24:3-28; Mr. 13:3-23)*

<sup>7</sup> Dxel gunabdiidx reeman lojman rëb reeman:

—Mextr, ¿goc gac zian? ¿Xhie ree sen gac chi ma zidyob gac zian?

<sup>8</sup> Zianz rëb Jesús loj reeman:

—Gol gojp cudad achu gusquiee lëjt. Din zien ree bën gui't guiëb reeman guial por naj zëed reeman guiëb tēē reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman. <sup>9</sup> Abi' chi guiguiejndi cayajc wadijl o chas ree bejn contr xguxts reeman, ad guidxebidi din yaløj gac zian. Per ad por laatan ma bidxin dxej nit guidxliuj.

<sup>10</sup> Rëb tēē Jesús loj reeman:

—Til nacion con stijb nacion, til tēē bën rajp guialrniabee con stijb bën rajp guialrniabee, <sup>11</sup> gui't tēē xudoxh, nē gubijn, nē guialguijdxdoxh niz ni niz guie abi' xanyabaa guiguien ree ni nadxeb.

<sup>12</sup> 'Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguib chinë tēē reeman lëjt loj ree rey nē loj ree gobernador guial najdi da bejnan. <sup>13</sup> Zian gac din chile' güdi da diidxan loj reeman. <sup>14</sup> Ad aal chu'di xgab xhie guiëbidi loj reeman. <sup>15</sup> Din naj gune diidx ni guinieedi gune tēēn quiarguejn. Abi' ni'qui tijb bën rdxe'ch lëjt ad züjnt gan loj xtiidxidi ad zanee tēēt reeman contr lëjt. <sup>16</sup> Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman. <sup>17</sup> Gra bénguidxliuj guidxe'ch lëjt guial najdi da bejnan. <sup>18</sup> Per ni'qui tijb guidxguijquidi ad zanijt por zian. <sup>19</sup> Abi' bal sudxi'chidi loj xnejz Dios, zajpidi guialnaban tiblayaa con Dios.

<sup>20</sup> 'Chi guguiaadi nayaw ree suldad Jerusalén, ma qui nit guiedx guin. <sup>21</sup> Dxejzii ree, bën za' ree niz Judea, gol bigxüün niz dajn ree, abi' ree bën za' guiedx Jerusalén gol brii luguiedx guin, guiáad ree bën za' dajn ad bal yayudi luguiedx guin. <sup>22</sup> Din dxej guin ree gudëed Dios bejn ree casti din gac cumplid zi'c ca loj xtiidxaman. <sup>23</sup> ¡Probza ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti naroo yal ree bénluguiedx guin. <sup>24</sup> Yu' ree bën guiët loj wadijl yu' tēē reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaløj dxej ni tiëb Dios nabee reeman yagaj.

*Gui't Bén guxhaal Dios zatijb**(Mt. 24:29-35, 42-44; Mr. 13:24-37)*

<sup>25</sup> 'Dxel gac sen loj gubijdx, con loj bëëw, con loj ree bajl xanyabaa. Abi' loj guidxliuj gagdxa ree bejn guidxeb tēē reeman guial gac naquie' loj nijsdoo gac tēē naquie' por

xtüjp nijs. <sup>26</sup> Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiáad ree ni rguien xanyabaa guiniib reen. <sup>27</sup> Abi' guguaaa reeman Bén guxhaal Dios, rdiinman bacha' zëédaman loj zaj con xguialrniabeeman. <sup>28</sup> Chi suloj gac ree ni guin, gol bagu' luxdoodi zagdxé gol gules tée lojdi din ma zidyob dxej ni laadi loj casti.

<sup>29</sup> Rëb tée Jesús loj reeman:

—Gol baguaaa yag higo o xhietëez zatijb yagan. <sup>30</sup> Chi ma caydxib ree xbalagan, lëjt ragbee guial ma zëéd tiamp nalaa. <sup>31</sup> Ziangajc chi guguaadi ma cayajc ree ni guin, zagbeedi guial ma zëéd xguialrniabee Dios gajxh.

<sup>32</sup> 'Diidxli rnin lojdi guial gra ree ni guin gac chi gad gra ree bén naban yan guiët. <sup>33</sup> Guidxliuj në xanyabaa zanijt reen, per da diidxan ad zadëdt gacan cumplid.

<sup>34</sup> 'Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi guialan zatijb, ad gac dxej guin par lëjt <sup>35</sup> zi'c tijb tramp. Din zian gac dxej guin par gra ree bénguidxliuj. <sup>36</sup> Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tée sudi loj Bén guxhaal Dios.

<sup>37</sup> Radxe rülüü Jesús bejn ree lën yadooro' Jerusalén guiáad guxhin raya'nman ruguia' la Olivos. <sup>38</sup> Abi' rsildoo rej gra ree bejn lën yadoo guin ricaagdiajg reeman ni rnieeman.

## 22

*Baya'n reeman diidx xhienaag guiniaaz reeman Jesús*

(Mt. 26:1-5, 14-16; Mr. 14:1-2, 10-11; Jn.11 :45-53)

<sup>1</sup> Chi ma zidyob lanij pascw, chi raw reeman guiadxtil ni ad yu't levadur. <sup>2</sup> Bixhioz rniabee ree bixhioz con ree mextr rajc ley, raguiil reeman mod xhienaag gugüjt reeman Jesús guial rdxeb reeman bejn ree.

<sup>3</sup> Dxel guyu xindxab luxdoo tijb ree xi apóstoles Jesús, bén la Judas Iscariote. <sup>4</sup> Judas guin bigneenë bixhioz rniabee ree bixhioz con ree bén rniabee bén rajp ree yadooro' Jerusalén, abi' benëman laa reeman diidx xhienaag yayüman Jesús loj reeman. <sup>5</sup> Dád babaa reeman abi' rëb reeman guial gudëéd reeman milia lojman. <sup>6</sup> Zianz cwëjbaman, dxel guzuloj raguiilaman mod xhienaag yayüman Jesús, guial ad zagbeet ree bejn.

*Gudawnë ree xbejn Jesús xche*

(Mt. 26:17-29; Mr. 14:12-25; Jn.13 :21-30; 1Co.11 :23-26)

<sup>7</sup> Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tée reeman tijb xiil, <sup>8</sup> dxel guxhaal Jesús Bëd con Waj, rëbaman loj reeman:

—Gol biguieen ni yadaaw ree guxhin pascw.

<sup>9</sup> Abi' gunabdiidx reeman lojman rëb reeman:

—¿Ban guin rënl yuguieenan laan?

<sup>10</sup> Zianz rëb Jesús loj reeman:

—Chi chu'di luguiedx guin, guguaadi tijb xinguaaaw ca'x tijb re yu' nijs. Gol chinalix xt lod yayux, <sup>11</sup> gol güjdx loj bén naj lidxan: “Na mextr: ¿Con lënü gawnë ree xbejnman guxhin pascw?” <sup>12</sup> Dxel gulüüman lëjt tijb lënü ni rarojp pijs, ma najcchaaw lënü guin. Yagaj gol been ni yadaaw ree xche.

<sup>13</sup> Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman guialraw guin ni gaw reeman guxhin pascw.

<sup>14</sup> Chi bidxin hor, Jesús con ree bén naj apóstoles gurej reeman xan mex. <sup>15</sup> Dxel rëbaman loj reeman:

—¿Diidz gocli rënan gawnë'n lëjt pascw guie, chi gad dxej guidxin gazaagdiajn abi' guiëtan! <sup>16</sup> Din naj rni lëjt guial ad yu'tri dxej gawnë'n lëjt, xt chi ma canabee Dios guidiblagaa.

<sup>17</sup> Dxel cwa'man tijb cojp yu' vin, chi gulox badëëman quixtëe loj Dios, rëbaman loj reeman:



—Gol cwa' vin guie, gol gudi'san loj gradi. <sup>18</sup> Din diidxli rnin lëjt, ad yu'tri dxej guië'n vin xt chi ma canabee Dios guidiblagaa.

<sup>19</sup> Dxel cwa'man guiadxtil badëëman quixtëë loj Dios, zianz gula'man laan, gudi'saman laan loj reeman, rëbgajman:

—Guiadxtil guie naj da cuerpan ni ma bayün din guiëtan por lëjt. Chi güüнди zian, gol been zian guial rusaaladxidi naj.

<sup>20</sup> Abi' ziangajc beenman con cojp ni yu' vin guin, chi gulox gudawaman xche, rëbaman:

—Vin guie naj da rejnan ni gaxhie'n chi guiëtan din guixal tijb nejz cüb xhienaag gap ree bejn perdon loj Dios.

<sup>21</sup> Per yan bën yayü naj, laa yaaman xoob loj mex lod xoob gajc yan. <sup>22</sup> Per Bén guxhaal Dios, naj sagdiajman abi' guiëtan. Per jprobza bën yayü laaman!

<sup>23</sup> Dxel guzuloj rniabdiidx loj lasa' reeman chu reeman yayü laaman.

### *Chu mazri zobjloj*

<sup>24</sup> Dxel guzuloj reeman cadildiidx reeman chu loj gra reeman naj mazri bën zobjloj.

<sup>25</sup> Per rëb Jesús loj reeman:

—Bën naj ree rey loj guidxliuj guie rniabee reeman bën ladx reeman zi'ctzi rën reeman, abi' ree bën rniabee, rëb reeman guial rüjn reeman ni zagdxe. <sup>26</sup> Per lëjt ad rayalt güüнди zian, bën mazri zobjloj lojdi rayal güün laagajcaman zi'c tijb bën ad zobjlojt. Guiáad bën rniabee lojdi rayal güün laagajcaman zi'c tijb mojs. <sup>27</sup> ¿Chu naj mazri bën zobjloj loj guidxliuj guie? ¿Bën rbej xan mex par gaw ya o bën rbe'c guialraw? ¿Nid bën rbej xan mex guin naj mazri bën zobjloj ya? Guiáad naj za'n lojdi zi'c tijb bën rbe'c guialraw.

<sup>28</sup> Lëjtci za'në naj loj ree dxej cazaagdiajn. <sup>29</sup> Zeel gunen guialrniabee lojdi zi'c banee da Dadanan lon, <sup>30</sup> abi' gawidi loj da mexan lod ganabeen cwe tëëdi loj ree yagxhil lod güüнди guialguxtis loj gra ree bën za loj guidxiptio'p xdiaa Israel.

### *Rëb Jesús guial guiëb Bëd ad nünbeetaman laaman*

(Mt. 26:31-35; Mr. 14:27-31; Jn.13 :36-38)

<sup>31</sup> Rëb tëë Jesús:

—Simón, Simón, ma gunab xindxab lëjt din güünx lëjt prueb zi'c rbijb bejn trigo.

<sup>32</sup> Per naj ma guredx gunaaban Dios por lüj chitëë cwëz chililadxil naj. Guiáad lüj chi yazudxi'chil loj ni rliladxil naj zatijb, gognë ree lasa'l din sudxi'ch reeman loj ni rliladxil reeman naj. <sup>33</sup> Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguiib o xt guiëtnë'n lüj.

<sup>34</sup> Abi' rëb Jesús:

—Naj rni lüj Bëd, yan guxhin gajc chi gad guid cwidxa', choon volt mal rëbil ad nünbeetil naj.

### *Zidyob dxej sagdiaj Jesús*

<sup>35</sup> Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, në sin gurëch, ¿yu' ni biaadxidi ya?

Badxi' reeman laan rëb reeman:

—Achet.

<sup>36</sup> Dxel rëbaman loj reeman:

—Sa'n yan bën rajp milia në bols, gol cwa'n. Guiáad bën ad rajpt espad, gol bato' xabidi din siidi tijban. <sup>37</sup> Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

<sup>38</sup> Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

*Rbejdx rniab Jesús Dios lod la Getsemani'**(Mt. 26:36-46; Mr. 14:32-42)*

<sup>39</sup> Dxel brier Jesús zi'c naj xcostumbraman zëman ruguia' Olivos, abi' binal ree xbejnman laaman. <sup>40</sup> Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

<sup>41</sup> Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios, <sup>42</sup> rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rënl.

<sup>43</sup> Dxel balüüloj tijb anjl guza xanyabaa lojman persi badëëman laaman gojl. <sup>44</sup> Abi' chi cazagdiaj da'taman, mazri con gan cabejdx canabaman Dios ryajb tëë ree xnijs ragneeyaman luyuj zi'c rejn.

<sup>45</sup> Chi bisuman lod cabejdx canabaman Dios, bignaj ree xbejnman abi' chi badxinman cwë' reeman laa reeman naga'yëjs, guial yu'naya reeman. <sup>46</sup> Zianz rëbaman loj reeman:

—¿Chexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

*Gunaaz reeman Jesús**(Mt. 26:47-56; Mr. 14:43-50; Jn.18 :2-11)*

<sup>47</sup> Sta caneenë Jesús bën naj ree xbejnman chi bidxin ree benzien. Në bën brier laj Judas, bën goc tijb ree xbejn Jesús, nedaman loj ree bën guin abi' bibigaman loj Jesús gudawaman laaman xid. <sup>48</sup> Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

<sup>49</sup> Chi baguiaa ree bën za'në Jesús ni cayajc, rëb reeman lojman:

—Dad, ¿zalëë dux espadan ya?

<sup>50</sup> Abi' tijb xbejnman gudiilguijdxaman xmojs bixhioz rniabee gra ree bixhioz, gutü'-man guidiajg ladbeeman. <sup>51</sup> Per rëb Jesús loj reeman:

—Guzujr ree bënan. Ma gojczì.

Dxel baqui' Jesús guidiajg mojs guin abi' bayüjnman laan. <sup>52</sup> Zianz rëb Jesús loj ree bixhioz rniabee ree bixhioz, con ree bën rniabee ree bën rajp yadooro' Jerusalén con gxuxtis ree bën Israel, bën bidxin ree par chinë laaman:

—¿Chexc zeel zëëdidi con espad con yag din chinëdi naj zi'c tijb xingubaa? <sup>53</sup> Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

*Rëb Bëd ad nünbeetaman Jesús**(Mt. 26:57-58, 69-75; Mr. 14:53-54, 66-72; Jn.18 :12-18, 25-27)*

<sup>54</sup> Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt. <sup>55</sup> Yagaj gule'c ree bën guin guij galay lule', abi' gurej reeman rudëj guin. Në Bëd gurejnë laa reeman. <sup>56</sup> Per tijb béngunaa rüjn dxiin yagaj, chi baguiaaman Bëd zojbaman rudëj guin, baguiaaman lojman, abi' rëbaman:

—Në bën guin za'në Jesús.

<sup>57</sup> Per gurexuu Bëd, abi' rëbaman loj bën guin:

—Ad nünbeetan laax.

<sup>58</sup> Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

<sup>59</sup> Gudëd cost tib hor, dxel rëb zatijb bejn:

—Nëczi bën guie za'në laaman din nëman naj bën Galilea.

<sup>60</sup> Zianz rëb Bëd:

—Ad ragbeetan xhienin rnieel.

Hor ni canee gajc Bëd zian guridxa' tijb guid. <sup>61</sup> Dxel badxi' loj Jesús baguiaaman loj Bëd, abi' basaaladx Bëd guial rëb Jesús lojman: “Yan guxhin gajc chi gad guid cwidxa', choon volt mal rëbil ad nünbeetil naj.” <sup>62</sup> Dxel barii Bëd yagaj, abi' dád naya biinman.

*Baze' reeman Jesús gudijn tëë reeman laaman*

(Mt. 26:67-68; Mr. 14:65)

<sup>63</sup> Bén cayajp ree Jesús, baze' reeman laaman gudijn tëë reeman laaman. <sup>64</sup> Guxhii reeman lojman abi' gudijn reeman laaman, dxel rëb reeman lojman:

—¿Guneeya' chu gudin lüj!

<sup>65</sup> Abi' zien ree diidxguijdx rëb reeman lojman.

*Za' Jesús loj ree guxtis Israel*

(Mt. 26:59-66; Mr. 14:55-64; Jn.18 :19-24)

<sup>66</sup> Chi bareguiaal, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

<sup>67</sup> —Guna du lojn, ¿lüj naj Cristo ya?

Badxi'man laan rëbaman:

—Bal ganinan ad zaliladxtidi. <sup>68</sup> Abi' bal xhie ganabdiidxan lojdi, ad zadxi'tidan. <sup>69</sup> Per diidz yan, Bén guxhaal Dios cweman xladbee Dios, bén ca' gra guialrniabee.

<sup>70</sup> Dxel rëb gra reeman lojman:

—¿Lüjn naj Xi'n Dios ya?

Badxi'man laan, rëbaman:

—Waliquidi najcan.

<sup>71</sup> Zianz rëb reeman:

—¿Xhie mazri rüjn naguiejn yadiil ree testiw? Dunuj gajc ree ma baguiejn ni nax con quijb xtiidix.

## 23

*Binë reeman Jesús loj Pilato*

(Mt. 27:1-2, 11-14; Mr. 15:1-5; Jn.18 :28-38)

<sup>1</sup> Dxel wajs gra reeman binë reeman Jesús loj Pilato. <sup>2</sup> Yagaj guzuloj cutedia' reeman Jesús lojman, rëb reeman:

—Badxaaglojn xin guie cusquieex Bén du ladx ree, rëbix guial ad rayalt yadijx ree impuest loj rey César, rëb tëëx guial laax naj Cristo, naj tëëx rey.

<sup>3</sup> Dxel gunabdiidx Pilato lojman rëbaman:

—¿Lüjn naj xrey ree Bén Israel ya?

Badxi' Jesús laan, rëbaman:

—Waliquil, najcan.

<sup>4</sup> Dxel rëb Pilato loj ree bixhioz rniabee ree bixhioz në loj gra ree Bén riga' yagaj:

—Achet xfalt xin guie radxejlan.

<sup>5</sup> Per laa reeman naguiejnczi rüjn reeman, rëb reeman:

—Cusquieex bejn ree guidib niz Judea con ree ni rulüüx laa reeman. Guzulojx niz Galilea abi' yan cayüjnx zian niz guie.

*Binë reeman Jesús loj Herodes*

<sup>6</sup> Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús. <sup>7</sup> Abi' chi rëb reeman guial najman Bén Galilea, guxhaalaman laaman loj Herodes Bén rniabee Galilea, guial lën ree dxej guin në Herodes za' Jerusalén. <sup>8</sup> Chi baguiaa Herodes Jesús dád babaaman guial diidz gocli rënman guguaaman laaman guial bacaagdiajgaman ruza't ree bejn laaman, abi' rbëzaman guguaaman güünman tijb milagr. <sup>9</sup> Zien ree ni gunabdiidxaman lojman, per Jesús achetci badxi'man. <sup>10</sup> Në ree bixhioz rniabee ree bixhioz za' yagaj con ree mextr rajc ley, ad rucwëëzt rutedia' reeman laaman. <sup>11</sup> Dxel Herodes con ree xsuldadaman xhiernarajc beennë reeman laaman, baze' reeman laaman, bascajcw reeman laaman lajd zagdex lasa' ni rajcw ree rey. Zianz baxhaal Herodes guin laaman loj Pilato zatijb. <sup>12</sup> Abi' dxejzii bazuloj baneenë Herodes Pilato zagdex, din gocli rdxe'ch lasa' reeman.

*Gunabee reeman guiët Jesús**(Mt. 27:15-26; Mr. 15:6-15; Jn.18 :39-19 :16)*

<sup>13</sup> Dxel bachajg Pilato lasa' ree bixhioz rniabee ree bixhioz con ree guxtis, con ree bén luguiedx guin, <sup>14</sup> abi' rëbaman loj reeman:

—Bidnëdi xin guie nadi cusquieex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi. <sup>15</sup> Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiëtix. <sup>16</sup> Yan, gudëdan laax casti dxel guslaan laax.

<sup>17</sup> Lën ree dxej lanij guin ruslaa Pilato tijb Bén yu' ladxguiib zi'c goc xcostumbr reeman. <sup>18</sup> Per graczi reeman guzuloj rbixdiaj, rëb reeman:

—¡Bagüjt xin guin! ¡Baslaa Barrabás!

<sup>19</sup> Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, në guial bagüjtaman bejn. <sup>20</sup> Guneenë Pilato laa reeman zatijb guial guyënman nuslaaman Jesús, <sup>21</sup> per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

<sup>22</sup> Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

<sup>23</sup> Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rën reeman. <sup>24</sup> Dxel cwëjb Pilato beenman zi'c rën reeman. <sup>25</sup> Abi' baslaaman Barrabás Bén guyu ladxguiib por wadijl në guial bagüjtaman bejn, guiáad Jesús bayüman laaman loj reeman persi beennë reeman laaman zi'ctzi rën reeman.

*Bacaa reeman Jesús loj crüjz**(Mt. 27:32-44; Mr. 15:21-32; Jn.19 :17-27)*

<sup>26</sup> Chi zinë reeman Jesús din gucaa reeman laaman loj crüjz, gunaaz reeman tijb Bén za Cirene laaman Simón. Ziaadaman bazaman dajn, gunabee reeman laaman güüman xcrüjz Jesús din chinalaman laaman.

<sup>27</sup> Zien da't bejn zinal laaman, abi' zien ree béngunaa roon rbixdiaj guial raya reeman laaman. <sup>28</sup> Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc në por xi'ndi. <sup>29</sup> Din zadxin dxej guiëbidi: “Xiquilbaa ree béngunaa ad rajct ru xi'n, në ree béngunaa ad gojlt xi'n con ree béngunaa ad ca't bindobëz.” <sup>30</sup> Dxel suloj guiëb ree bejn loj ree guia': “Gol guxa't du guijcan”, guiáad loj ree lom guiëb reeman: “Gol baquie'ch dunujn.” <sup>31</sup> Yan, nacli naj rüjnnë reeman zian, diidxgui lëjt, wed xhieczinin güünnë reeman lëjt.

<sup>32</sup> Abi' në tio'p ree xingubaan zinë reeman din tia reex loj crüjz con Jesús. <sup>33</sup> Chi bidxin reeman lod la Calaver, bacaa reeman Jesús loj crüjz, con grop ree xingubaan guin: tijbix cwa ladbee zatijbix cwa ladruvejs. <sup>34</sup> Abi' chi cucaa reeman Jesús loj crüjz, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guijc xabaman din yala' reex laan. <sup>35</sup> Zien ree bejn riga' yagaj cuguaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laagajquix bal walix laax naj Cristo.

<sup>36</sup> Në ree xin suldad ruze' laaman, rbig reex rudëed reex vinagr guië'man, <sup>37</sup> rëb reex lojman:

—Bal lüj naj xrey ree Bén Israel, baslaa lüj gajc.

<sup>38</sup> Abi' guijc crüjz guin bacaa reex lëjtr con diidx grieg, diidx latin, në diidx hebreo, rëban: “Bén guie naj xrey ree Bén Israel.”

<sup>39</sup> Tijb xingubaan ni ca loj crüjz guin guneex diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tëë dunujn.

<sup>40</sup> Per zatijbix gudilë xcompniarix, rëbix lojx:

—¿Staczi ad rdxebtil Dios ya majsi lasa'gajc casti guin cadëdil? <sup>41</sup> Dunuj rayalczi cayzaagdiaj din zian caydijx ni baguieen. Per bën guie achetczi ni mal wayüjnman.

<sup>42</sup> Dxel rëbix loj Jesús:

—Basaaladx naj chi ma canabeel.

<sup>43</sup> Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

### *Güjt Jesús*

(Mt. 27:45-56; Mr. 15:33-41; Jn.19 :28-30)

<sup>44</sup> Chi gol garol dxej, bicajy guidibczi guidxliuj xt raca choon wadxe. <sup>45</sup> Bicajy logbijdx guiaad lajd nal lën yadooro' Jerusalén goxya'n, gojcan tio'p lala'. <sup>46</sup> Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

<sup>47</sup> Chi baguiaa suldad rniabee ree suldad ni goc, baza'tix Dios zagdxe, rëbix:

—Walican achet xtol bën guin yu'.

<sup>48</sup> Chi baguiaa gra ree bën za' yagaj ni goc, dád guyunaya reeman zia reeman riga'pgaj luxdoo reeman. <sup>49</sup> Per gra ree bën nünbee Jesús, con ree béngunaa nal laaman diizd Galilea, zijt guzuj reeman baguiaa reeman gra ree ni goc.

### *Biguie'ch Jesús*

(Mt. 27:57-61; Mr. 15:42-47; Jn.19 :38-42)

<sup>50</sup> Guyu tijb bejn, brii lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tëëman tijb xguxtis ree bën Israel. <sup>51</sup> Nëëman rbëz nabee Dios, abi' ad nëtaman bachajg xixgab ree bën bagüjt Jesús. <sup>52</sup> Wejman loj Pilato bignabaman xcuerp Jesús. <sup>53</sup> Chi gulox baletaman xcuerp Jesús loj crüjz guin, cwa'man laaman batüübaman tijb lajd, dxel biquie'chaman laaman lën tijb baa ni bidëën lën guiaj lod achutczu waguie'ch. <sup>54</sup> Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

<sup>55</sup> Abi' ree béngunaa zidnë Jesús diizd Galilea, në reeman binal abi' baguiaa reeman xbaa Jesús baguiaa tëë reeman xhienaag gudijxh reeman xcuerpaman. <sup>56</sup> Chi bayejc reeman, zianz beenchaaw reeman perfum në zaj ni rliaa nejxh ni guidëëbaman. Dxel baziiladx reeman dxej raziiladx ree bejn zi'c rniabee ley.

## 24

### *Raban Jesús*

(Mt. 28:1-10; Mr. 16:1-8; Jn.20 :1-10)

<sup>1</sup> Chi dumingw rsildoo, wej ree béngunaa guin ro' xbaa Jesús binë reeman perfum ni beenchaaw reeman. <sup>2</sup> Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran. <sup>3</sup> Abi' guyu reeman, per ad bidxaaglojtri reeman xcuerp Dad Jesús. <sup>4</sup> La'tzi cadxeb reeman ni'quid radxejlt xhie güün reeman, dxejczu baguiaa reeman tio'p ree bejn za'li reeman gajxh lod za' reeman, najcw reeman lajd bacha'. <sup>5</sup> Abi' guial tant bidxeb reeman, basajb loj reeman xt luyuj, dxel rëb ree bën guin loj reeman;

—¿Chexc zeel raguuilidi tijb bën naban loj ree bengüt? <sup>6</sup> Achutri laaman guie din ma babanman. Gol basaaladx ni naman lojdi chi guzuman niz Galilea. <sup>7</sup> Naman lojdi guial yayü reeman Bën guxhaal Dios loj ree bëndol din gucaa reeman laaman loj crüjz, abi' ni yayan dxej yabanman.

<sup>8</sup> Dxel basaaladx reeman diidx ni rëb Jesús loj reeman, <sup>9</sup> abi' chi baza reeman ro' baa guin, bicojn reeman guidxiptib ree xi apóstoles Jesús në los demazri ree xcompniar reeman gra ni baguiaa reeman. <sup>10</sup> María Magdalena, con Xuan, con Li xniaa Jacob con ree béngunaa ren, laa reeman bignë ruson guin loj ree xi apóstoles Jesús. <sup>11</sup> Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

<sup>12</sup> Per Béd baxüünman biquiaaman lën baa guin, abi' chi baguiaaman lën baa guin, lajd ni bidüübzi Jesús baguiaaman, zianz ziaman dád radxalojman por ni goc.

*Balüüloj Jesús loj tio'p ree xbejnman*

(Mr. 16:12-13)

<sup>13</sup> Dxej guin gajc, tio'p ree xbejn Jesús zë tijb guiedx la Emaús, raya'nan zi'ct chiptib kilometro par Jerusalén. <sup>14</sup> Chi zë reeman lunejz cayü reeman diidx xcwent gra ree ni goc. <sup>15</sup> La'tgaj cayü reeman diidx, gubig Jesús cwë' reeman abi' guzuloj cazanëman laa reeman. <sup>16</sup> Per majsi cuguiaa reeman laaman, yu' ni badxoon nayünbee reeman laaman.

<sup>17</sup> Dxel gunabdiidx Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

<sup>18</sup> Badxi' tijb bën la Cleofas laan, rëbaman:

—Gra ree bejn ragbee ni goc Jerusalén lën ree dxej guie. ¿Wen tijbzi lüj naj bën guzu Jerusalén ad gogbeetil ni goc ya?

<sup>19</sup> Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús bën Nazaret, laaman goc tijb bën badëë xtiidx Dios loj ree bejn, bën gop guialrniabee zi'c ni beenman në ree diidx ni guneman niz loj Dios në niz loj ree bejn. <sup>20</sup> Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüjz. <sup>21</sup> Par dunujn laaman naj bën yabëë ree bën Israel loj ree bën rom, per yan gojc choon dxej ni goc ree ni guin. <sup>22</sup> Majsi tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin, <sup>23</sup> abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús. <sup>24</sup> Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

<sup>25</sup> Dxel rëb Jesús loj reeman:

—¿Xi nawëëg naj chignia'di abi' xi raglaa par chililadxidi gra ni gunee ree bën badëë xtiidx Dios loj ree bejn! <sup>26</sup> ¿Wen id naj ya guial sagdiaj Cristo, dxelri yayë'paman xanyabaa?

<sup>27</sup> Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libr ni bacaa ree bën badëë xtiidx Dios loj ree bejn.

<sup>28</sup> Chi bidxin reeman guiedx lod zë reeman, been Jesús zi'c bën che mazri zijt. <sup>29</sup> Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman. <sup>30</sup> Abi' chi zojbnëman laa reeman xan mex, cwa'man guidxtil abi' chi gulox badëëman quixtëë loj Dios, gula'man laan persi badëëman laan loj reeman. <sup>31</sup> Hor guin gajc guzajc reeman zi'c bën baxal guiaaloj, abi' bayünbee reeman laaman. Per laa gunidloj gajcaman, <sup>32</sup> zianz rëb loj lasa' reeman:

—¿Ze'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

<sup>33</sup> Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman. <sup>34</sup> Rëb reeman loj grop ree bën guin:

—Walican ma baban Dad Jesús, ma balüülojman loj Simón.

<sup>35</sup> Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guidxtil.

*Balüüloj Jesús loj ree xbejnman*

(Mt. 28:16-20; Mr. 16:14-18; Jn.20 :19-23)

<sup>36</sup> Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

<sup>37</sup> Dád badxaløj reeman abi' bidxeb reeman guial gunaladx reeman anman cuguiaa reeman. <sup>38</sup> Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi? <sup>39</sup> Gol baguiaa yan në guia'n. Naj gajcan, gol baqui' naj gol baguiaa tëë naj, din tijb anm ad yu'taman dxijt ad ca tëëtaman bëël zi'c ruguiaadi naj.

<sup>40</sup> Chi rëbaman zian, balüü yaaman në guia'man. <sup>41</sup> Per laa reeman staczi ad rliladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

<sup>42</sup> Dxel badëë reeman tibia' bëjl biguie', <sup>43</sup> abi' cwa'man laab gudawaman niz loj reeman. <sup>44</sup> Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj libr salmos.

<sup>45</sup> Dxel guxhalaman xquiarguejn reeman persi bignia' reeman ni ca loj xtiidx Dios, <sup>46</sup> abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman.

<sup>47</sup> Abi' diizd Jerusalén suløj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tëë reeman naj. <sup>48</sup> Lëjt naj testiw xcwent gra ree ni guin. <sup>49</sup> Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

*Bayë'p Jesús xanyabaa*

*(Mr. 16:19-20)*

<sup>50</sup> Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman. <sup>51</sup> Abi' la'tgaj cayüjnle'man laa reeman, wajsaman ziaman xanyabaa. <sup>52</sup> Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman. <sup>53</sup> Abi' guixie guixie yu' reeman lën yadooro' Jerusalén ruza't reeman Dios zagdxe rudëëd tëë reeman quixtëë lojman.

## Xtiidxza'c Jesucrist ni bacaa San Juan

### *Bi't Xi'n Dios loj guidxliuj*

<sup>1</sup> Diisd guia'xchej chi gad guidxliuj gacchaaw, mal yu' b́en naj xtiidx Dios. Laaman za'ně Dios abi' laagajcaman naj Dios. <sup>2</sup> Laaman mal za'ně Dios diisd guia'xchej. <sup>3</sup> Laaman been graczi ni yu'. Achetczi ni yu' ni ajc bal id laaman. <sup>4</sup> Laaman rajp guialnaban, guiáad guialnaban guin naj bajl par gra bénguidxliuj. <sup>5</sup> Bajl guin rusni b́en nacay xquiargueijn, abi' ad rajct rutěe guialnacay guin loj bajl guin.

<sup>6</sup> Guyu tijb b́en brii laj Waj, Dios guxhaal laaman, <sup>7</sup> bidgaguieman diidx xcwent b́en naj xbajl Dios, din gac chililadx gra ree bejn laaman. <sup>8</sup> Per ad Wajt goc bajl guin, bi'tzaman bidgaguieman diidx xcwent bajl guin. <sup>9</sup> Din b́en naj quijb bajl guin, laaman rusni xquiargueijn gra bénguidxliuj, abi' ma bi'taman loj guidxliuj.

<sup>10</sup> Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman. <sup>11</sup> Bi'taman loj ree b́en Israel, abi' majsi gojcaman b́en Israel, per ad bidxga't reeman laaman. <sup>12</sup> Per, gra ree b́en bidxga' laaman bililadx těe reeman laaman, beenman laa reeman xi'n Dios. <sup>13</sup> Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rěn bejn chu' xi'nman, por guial rliladx reeman ma naj reeman xi'n Dios.

<sup>14</sup> Jesús, b́en naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyenman bejn ree gune těeman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. <sup>15</sup> Chi be Waj xtiidxaman loj ree bejn, guneeman rejs, rěbaman:

—Jesús guie naj b́en ruzatan, chi rnin guial b́en zěed xichan mazri lasajcaman guial lon, din diisd gocli mal yu'man guial lon.

<sup>16</sup> Dád rěnman dunuj ree, gra dxejczy raca' dugra ree xguialnaza'caman. <sup>17</sup> Por Moisejs banee Dios xleyaman duloj ree, per por Jesucrist bayagbee ree xhienaag rěn Dios dunuj ree xhie těe naag naj xtiidxliman. <sup>18</sup> Ad yu't dxej waguiaa bejn Dios. B́en naj tijbzi xi'nman. B́en nabanně laaman balüü duloj ree xhienaag naj Dios.

### *Waj b́en baroobnijs rěbaman chu naj Jesús*

*(Mt. 3:11-12; Mr. 1:7-8; Lc. 3:15-17)*

<sup>19</sup> Diisd Jerusalén guxhaal ree xguxtis ree b́en Israel bixhioz ree con ree b́en naj ree levitas persi bignabdiidx reeman loj Waj chu najman.

<sup>20</sup> Dxel be Waj diidxli loj reeman, rěbaman:

—Ad najtan naj Cristo.

<sup>21</sup> Abi' gunabdiidx reeman lojman stijb rěb reeman:

—¿Chuza najl? ¿Lüjn naj Elías ya, b́en baděe xtiidx Dios loj ree bejn?

Badxi' Wajn rěbaman:

—Ad najtan.

Dxel gunabdiidx reeman stijb rěb reeman:

—O, ¿lüjn naj b́en naj diidx gui't ya, b́en guděe xtiidx Dios loj ree bejn?

Badxi'man laan rěbaman:

—Ad najtan.

<sup>22</sup> Abi' rěb reeman:

—¿Chuza najl? Din rayal yugně'n ruson loj ree b́en guxhaal dunujn. Guna chu najl.

<sup>23</sup> Dxel rěb Waj loj reeman:

—Naj naj tijb b́en rbidxa' loj yujbidx: “Gol guxhal tijb nejz nali par b́en ca' guialrniabee” —zi'c rěb Isaías b́en baděe xtiidx Dios loj ree bejn.

<sup>24</sup> Abi' ree b́en guxhaal ree b́enfarisew din guinieeně reeman Waj, <sup>25</sup> gunabdiidx reeman lojman, rěb reeman:



—Bal id lüjn naj Cristo, ni'qui Elías, ni'qui bén naj diidx gui't, bén gudëë xtiidx Dios loj ree bejn, ¿chexquiza zeel ruuroobnijsil bejn?

<sup>26</sup> Badxi' Waj laan rëbaman:

—Naj ruurobnijs con nijs, per lojdi no'ch tijb bén ad wayünbeetidi. <sup>27</sup> Laaman naj bén zëëd xichan, ni'qui xgurëchaman ad rayalt gaxhiecan guial najman bén mazri lasajc guial lon.

<sup>28</sup> Gra niguie gojc lod la Betábara, ni naj stiblad ro' guiiw Jordán, lod baroobnijs Waj bejn ree.

### *Jesús naj Xi'n Dios*

<sup>29</sup> Chi bareguiaal, baguiaa Waj zibig Jesús lod za'man, dxel rëbaman:

—Gol baguiaa, bén guin naj bén bacaabee Dios din guiëtaman zi'c xiildoo por xtol ree bénguidxliuj. <sup>30</sup> Laaman bazatan lojdi chi rnin: “Xichan zidnal bén mazri lasajc guial lon, din laaman mal yu' diizd gocli guial lon.” <sup>31</sup> Ni'qui naj ad gogbeetan guial laaman naj bén gui't, per naj zialan din guurobnijsan bejn ree con nijs din chile' güünbee ree bén Israel laaman.

<sup>32</sup> Rëb tëë Waj loj reeman:

—Naj baguia biguiajt xSprijt Dios diizd xanyabaa zi'c tijb palom xt guijcaman. <sup>33</sup> Majsí ad nünbeetan laaman, per bén guxhaal naj barobnijsan con nijs, laaman na lon: “Chi guguiaal guiat xSprijt Dios xt guijc tijb bejn, laaman naj bén runee xSprijt Dios.” <sup>34</sup> Naj ma baguia laaman, abi' ragbeechaawan guial laaman naj Xi'n Dios.

### *Bén binal ree Jesús yaloj*

<sup>35</sup> Chi bareguiaal, za' Waj yagaj stijb, za'në tio'p ree xbejnman. <sup>36</sup> Abi' chi baguiaaman cadëd Jesús, dxel rëbaman loj reeman:

—Gol baguiaa, bén guinan naj zi'c xi xiildoo Dios din guiëtaman por xtol bénguidxliuj.

<sup>37</sup> Chi biguiejn reeman rëb Waj zian, dxel binal reeman Jesús. <sup>38</sup> Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguilidi?

Badxi' reeman laan rëb reeman:

—Mextr, ¿ban zojbil?

<sup>39</sup> Dxel rëb Jesús loj reeman:

—Gol guda din guguiadi.

Dxel wej reeman biquiaa reeman lod zojbaman, abi' baya'nnë reeman laaman dxej guin, guial ma gojl cost raca tajp wadxé.

<sup>40</sup> Tijb ree xbejn Waj bén binal Jesús, bén bacaagdiajg ni rëb Waj, laaman brii laj Andrejs, bijch Simón Bëd. <sup>41</sup> Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bén naj Mesías —rën guiëban Cristo.

<sup>42</sup> Dxel binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rën guiëban Bëd.

### *Gurejdx Jesús Felip në Natanael*

<sup>43</sup> Chi bareguiaal been Jesús xgab cheman niz Galilea, abi' badxaagaman Felip, zianz rëbaman:

—Tanal naj.

<sup>44</sup> Ladx Felip guin naj guiedx Betsaida, ni gajc naj ladx Andrejs con Bëd. <sup>45</sup> Dxel bigdiil Felip Natanael, abi' rëbaman lojman:

—Ma badxaaglojn bén ruza't Moisejs loj xlibr xleyaman, bén ruza't ree bén badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bén Nazaret.

<sup>46</sup> Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguiaa.

<sup>47</sup> Chi baguiaa Jesús zëed Natanael, rëbaman:

—Guie zëed tijb bén naj quijb bén Israel, abi' ad rusquieetaman.

<sup>48</sup> Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

<sup>49</sup> Zianz rëb Natanael lojman:

—Mextr, lüj naj Xi'n Dios, lüj naj rey Israel.

<sup>50</sup> Badxi' Jesús laan rëbaman:

—¿Rliladxil naj ya guialzi rnin baguian lüj xan yag higo? Per mazri naj ree ni guguaial guial loj ni ma baguiaal.

<sup>51</sup> Rëb tëëman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguiajt tëë reeman xt guijc Bén guxhaal Dios loj guidxliuj.

## 2

### *Wej Jesús loj tijb guialruxhliaa*

<sup>1</sup> Ni goc choon dxej guyu tijb guialruxhliaa luguiedx Caná, ni riga' niz Galilea. Dxel në xniaa Jesús za' yagaj, <sup>2</sup> abi' në Jesús con ree xbejnman gunee reeman persi wej reeman loj lanij guin. <sup>3</sup> Chi babidx vin, dxel rëb xniaa Jesús lojman:

—Achetri vin rajp reeman.

<sup>4</sup> Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

<sup>5</sup> Per xniaaman rëb gajcaman loj ree bén cayüjn mandad yagaj:

—Gol been gra ni naman.

<sup>6</sup> Yagaj za' xho'p ree guiajs guiaj, ni ru nijs ni rüjnnë ree bén Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. <sup>7</sup> Abi' rëb Jesús loj ree bén rüjn mandad guin:

—Gol bacha ree guiajs guie nijs.

Dxel bachadi reeman laa reen, <sup>8</sup> abi' rëbaman loj reeman:

—Yan gol gulëë ta'nan, gol bigdëen loj bén canabee loj lanij guie.

Dxel bigdëë reeman laan lojman, <sup>9</sup> abi' bén canabee loj lanij guin beenman prueb nijs bayajc vin guin, sin guial niagbeeman ban guzan, bén cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliaa guin, <sup>10</sup> rëbaman lojx:

—Graczi bejn rgui's yaløj vin zagdxe, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

<sup>11</sup> Ni guin naj milagr yaløj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

<sup>12</sup> Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

### *Babëë Jesús bén ruto' ree ro' yadooro'*

(Mt. 21:12-13; Mr. 11:15-18; Lc. 19:45-46)

<sup>13</sup> Chi ma zidyob pascw xlanij ree bén Israel, wej Jesús Jerusalén. <sup>14</sup> Abi' ro' yadooro' bidxaaglojman bén cuto' ree go'n, con ree xiil con ree palom, në ree bén zojb xan mex ruchaa reeman xmilia ree bén ziaad lood ren. <sup>15</sup> Chi baguiaa Jesús zian, dxel beenchaawaman tijb duu persi babëëman gra reeman, con gra ree xgo'n reeman në ree xiil. Gutie'chaman xmilia ree bén ruchaa milia guin barexguiat tëëman xmex reeman.

<sup>16</sup> Dxel rëbaman loj ree bén cuto' palom:

—¿Gol babëë reeb guie! ¿Ad rüjnnëdi lidx da Dadan zi'c luguaia'!

<sup>17</sup> Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

<sup>18</sup> Zianz rëb ree bén Israel lojman:

—¿Xhie milagr gulüül du lojn din yayagbeen guial rajpil guialrniabee güünl zian?

<sup>19</sup> Badxi! Jesús laan rëbaman:

—Gol base'n yadoo guie, naj yayün laan loj choon dxejzi.

<sup>20</sup> Dxel rëb ree bën Israel guin lojman:

—Tiuubixho'p ijz goglaa reeman been reeman yadoo guie, ¿guiáad lüj ya yayüjnlan choon dxejzi?

<sup>21</sup> Per Jesús xcuerp gajcaman ruza'taman chi ruza'taman yadoo guin. <sup>22</sup> Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tää reeman ni ca loj xtiidx Dios.

### *Jesús nünbee xixgab gra bejn*

<sup>23</sup> Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. <sup>24</sup> Per laaman ad rëbtaman loj reeman chu najman, din laaman nünbeechaaw xhienaag naj xixgab reeman. <sup>25</sup> Ad biaadxtaman chu niëjb lojman xhienaag naj bejn, din laaman ragbeechaaw xhienaag naj xixgab tijbgaj bejn.

## 3

### *Bigneenë Nicodemo Jesús*

<sup>1</sup> Guyu tijb bënfarisew brii lajman Nicodemo, gojcaman tijb guxtis loj ree bën Israel.

<sup>2</sup> Abi' wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din gulüül dunujn, din achutczi zajc güün lasa' ree milagr ni rüjnl bal id za'në Dios laaman.

<sup>3</sup> Dxel rëb Jesús:

—Diidxliczi rnin lüj, bën ad zajlt stijb, ad zajct guguaaaman xguialrniabee Dios.

<sup>4</sup> Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xniaaman ya abi' galaman stijb?

<sup>5</sup> Badxi! Jesús laan rëbaman:

—Diidxliczi rnin, bën ad rirobnijst ad nabannë täätaman xSprijt Dios ad zile't yayuman loj xguialrniabee Dios. <sup>6</sup> Bën naban zi'c naj xixgabaman, lojzi guidxliuj guie rajpaman guialnaban, per bën nabannë xSprijt Dios, por Sprijt guin rajpaman stijb guialnaban. <sup>7</sup> Ad bal radxa lojl guial rnin: “Rüjn naguiejn gal bejn stijb.” <sup>8</sup> Din zi'c rbi' bi gralad abi' majs riguejnl chi rbi'n, per ni'quid ragbeetil ban zäädan o ban zën. Ziangajc naj xSprijt Dios con gra ree bën nabannë laaman.

<sup>9</sup> Dxel rëb Nicodemo lojman:

—¿Xhienaag rajc zian?

<sup>10</sup> Badxi! Jesús laan rëbaman:

—¿Lüj, naj mextr loj ree bën Israel, ad rignia'til gra ree ni guin ya? <sup>11</sup> Diidxliczi rnin lojl, raneen ni rayagbeen ni baguiaa tääen, per lëjt ad rliladxtidi ni ranan. <sup>12</sup> Bal id rliladxidi chi rnin xcwent ree ni loj guidxliuj guie, ¿xhienaag chililadxidi bal ganin xcwent ree ni xanyabaa?

<sup>13</sup> 'Achut wayej xanyabaa, tijbzi bën biguiat diizd xanyabaa, Bën guxhaal Dios loj guidxliuj. <sup>14</sup> Abi' zi'c bacaa Moisejs bëël guiib loj yag niz loj yujbidx, ziangajc Bën guxhaal Dios loj guidxliuj, gucaa reeman laaman loj crüjz, <sup>15</sup> din gra bën chililadx laaman ad zanijt reeman loj Dios, gap reeman guialnaban tiblayaa con laaman.

### *Rën Dios bejn*

<sup>16</sup> 'Guial tant rën Dios bénguidxliuj, majsij tijbzi xi'nman, per guxhaalaman laaman loj guidxliuj, din graczi bën chililadx laaman ad zanijt reeman loj Dios, gap reeman guialnaban tiblayaa con laaman. <sup>17</sup> Din Dios ad guxhaalt xi'nman loj guidxliuj din gudäädaman bejn casti, guxhaalaman laaman din gap ree bejn perdon loj Dios.

<sup>18</sup> 'Bën rliladx Xi'n Dios ad rayaltaman xcasti Dios. Per bën ad rliladxt, laaman ma rayal casti guial ad rliladxtaman Xi'n Dios, bën naj tijbzi xi'nman. <sup>19</sup> Bën ad rliladxt ree rayal

reeman casti, din yan ni bi't b́en naj x bajl Dios, mazri bayuladx reeman nejz mal, guial ŕijn reeman ganax ni mal. <sup>20</sup> Graczi ree b́en ŕijn ni mal ad ruladxtczi reeman bajl guin, ad rbigt reeman lojn, chit́e guiguien ni mal caýijn reeman. <sup>21</sup> Per ree b́en naban zi'c rayal loj Dios, laa reeman rbig loj x bajlaman din guiguien guial graczi ni caýijn reeman naj ni ŕen Dios.

#### *Waj b́en baroobnijs ruza'taman Jeśus stijb*

<sup>22</sup> Chi gudéd gojc zian, Jeśus con ree xbejnman wej reeman niz Judea, lod guzunéman laa reeman tio'p choon dxej, ni baroobnijs reeman bejn ree. <sup>23</sup> Négajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijs reeman. <sup>24</sup> Laan goc chi gad Waj chu' ladxguiib.

<sup>25</sup> Per b́elzi ree xbejn Waj, con za tio'p choon gajc ree b́en Israel guzuloj cadildiidx reeman por xcostumbr reeman guial xhienaag gac reeman naya. <sup>26</sup> Dxel biguiedx reeman loj Waj:

—Mextr, b́en guzunél stiblad ro' guiiw Jordán, b́en bel xtiidx du lojn, né laaman curoobnijs bejn ree abi' gra reeman zinal laaman.

<sup>27</sup> Badxi' Waj laan ŕebaman:

—Achut zajc gap guialrniabee bal id Dios gudé laan. <sup>28</sup> Léjt ragbee guial biguiejndi ŕen guial ad najtan naj Cristo, naj guneed lojman zidgagojnan por laaman. <sup>29</sup> Dunuj ree rayagbee guial loj guialruxhliaa, xin za'né biingunaa guin, laaxan cuxhliaa, guiáad xmiwix xin za' con laax rabaané da'tix laax chi riguiejnx rnieex. Ziangajc naj dád rabaané'n laaman. <sup>30</sup> Abi' laaman gusnuu gacaman mazri b́en zobjloj, guiáad naj gusnuu gacan b́en ad lasajc guial lojman.

#### *B́en źeéd xanyabaa*

<sup>31</sup> 'Din b́en źeéd diizd xanyabaa, laaman naj b́en rniabee loj gra. Per b́enguidxliuj, b́enguidxliujzi najman abi' ganax ni yu' loj guidxliuj ruza'taman. Per B́en źeéd diizd xanyabaa laaman rniabee gra, <sup>32</sup> abi' ŕuman ni ma baguiaaman ni ma biguiejn t́eéman, per achut rliladx ni rnieeman. <sup>33</sup> Bal yu' b́en rliladx xtiidxaman, zian rguien guial ni diidxli naj xtiidx Dios. <sup>34</sup> Abi' b́en źeéd por Dios, laaman ŕu xtiidx Dios guial guidiblagaa badééd Dios xSprijtaman lojman. <sup>35</sup> Dios ŕen Xi'nman abi' basa'nman gra lojman. <sup>36</sup> Abi' chutééz b́en rliladx Xi'nman, laaman rajp guialnaban tiblyaa loj Dios. Per b́en ad rtiéjbt chililadx, ad rajptaman guialnaban guin, laaman rayal xcasti Dios.

## 4

#### *Jeśus con b́engunaa Samaria*

<sup>1</sup> Gogbee ree b́enfarisew guial mazri zien bejn ma zinal Dad Jeśus mazri zien t́eé bejn ruroobnijsaman guial loj Waj, <sup>2</sup> majsi diidxliczi ad Jeśustan ruroobnijs bejn ree, b́en naj ree xbejnman ruroobnijs. <sup>3</sup> Chi gogbeeman zian dxel briiman niz Judea źeman niz Galilea stijb.

<sup>4</sup> Per chi źeman niz Galilea been naguiejn gudédaman niz Samaria. <sup>5</sup> Abi' bidxinman tijb guiedx la Sicar, ni nulen Samaria, gajxh lod naga' yuj ni badéé Jacob loj xi'nman Xiéb. <sup>6</sup> Yagaj naj tijb bizéduu rniee reeman laan xbizé Jacob. Abi' guial ma badxag Jeśus cazaman, dxel gurejman ro' bizé guin. Ma zidyob garol dxej. <sup>7-8</sup> Guiáad ree xbejnman źe reeman luguiedx guin zisii ni gaw reeman. Hor guin bidxin tijb b́engunaa Samaria ro' bizé guin din tia'man nijs, dxel ŕeb Jeśus lojman:

—Bazaladx ta'n xnijsil guié'n.

<sup>9</sup> Per guial ad rnieenét lasa' ree b́en Israel zagdx con ree b́en Samaria, badxi' b́engunaa guinan ŕebaman:

—¿Chexquiza zeel rniabil nijs lon najl b́en Israel awa b́en Samaria naj?

(Din b́en Israel ree ad rnieenét reeman b́en Samaria ree zagdx.) <sup>10</sup> Badxi' Jeśus laan ŕebaman:

—Bal zian ragbeel ni rën Dios guneeman lüj, chutëë bénan canab nijs lojl, zanabil nijs lon abi' naj zunen nijs runee guialnaban.

<sup>11</sup> Dxel rëb béngunaa guin loj Jesús:

—Dad, ni'quid ca'til ni cwëënël nijs, abi' bizë guin dád naxhitan. ¿Ban chica'l nijs runee guialnaban? <sup>12</sup> Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

<sup>13</sup> Badxi' Jesús laan rëbaman:

—Graczi ree bén rë' nijs guie re'c reeman nijs stijb. <sup>14</sup> Per bén guië' nijs gudëdan, ad yu'tri dxej che'caman nijs. Din nijs gudëdan gacan luxdooman zi'c lod ad rbëzt rajch nijs, abi' nijs guin gudëë guialnaban tiblyaaa.

<sup>15</sup> Dxel rëb béngunaa guin lojman:

—Dad, banee nijs guin lon, chitëë che'cran nijs ad zial tëëtran guidca'n nijs guie.

<sup>16</sup> Rëb Jesús lojman:

—Bignee lacheelil, dxel yaguaadil guie.

<sup>17</sup> Badxi' béngunaa guinan rëbaman:

—Achut da bénguaawan yu'.

Dxel rëb Jesús:

—Waliquil achut lacheelil yu', <sup>18</sup> din ma gojc gaay xinguaaaw rtia' lüj, abi' yan xin zojbnël ad lacheeltilan. Zeel waliqui ni nal.

<sup>19</sup> Chi biguiejnman ni rëb Jesús, dxel rëbaman:

—Dad, ma ragbeen guial lüj naj bén rudëë xtiidx Dios loj ree bejn. <sup>20</sup> Dux béngulalan gunajchi' reeman Dios ruguia' guie, per lëjt najdi bén Israel rëbidi guial Jerusalén naj lod guiniajchi' bejn laaman.

<sup>21</sup> Badxi' Jesús san rëbaman:

—Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tëëtridi Jerusalén. <sup>22</sup> Lëjt ni'quid ragbeetidi chunin rniajchi'di, per dunujn rayagbeen chunin ranajchi'n, din loj ree bén Israel grii bén güün bejn ree perdon. <sup>23</sup> Abi' ma bidxin dxej ni gra ree bén diidxli rniajchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree bén rniajchi' laaman. <sup>24</sup> Dios naj Sprijt, abi' bén rniajchi' ree laaman rayal guiniajchi' reeman laaman con guidib luxdooman reeman por xSprijtaman.

<sup>25</sup> Dxel rëb béngunaa guin lojman:

—Naj ragbee gui't bén naj Mesías, bén la gajc, Cristo. Abi' chi gui'taman, laaman gusignia' dunuj ree gran.

<sup>26</sup> Abi' rëb Jesús:

—Najn naj bén zii, laaman caneenë lüj.

<sup>27</sup> Loj hor guin badxin ree xbejn Jesús, abi' dád badxaloj reeman guial cayünëman tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman. <sup>28</sup> Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

<sup>29</sup> —Gol taquiaa tijb bén ma na graczi ni ma benan. ¿Nid laaman naj Cristo ya?

<sup>30</sup> Dxel brii reeman luguiedx guin zë reeman lod za' Jesús. <sup>31</sup> Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

<sup>32</sup> Per rëbaman loj reeman:

—Laa da guialrawan yu', ni ad nünbeetidi.

<sup>33</sup> Dxel guzuloj canabdiidx loj lasa' reeman rëb reeman:

—¿Ni yu' chu bidnë ni gudawaman ya'n?

<sup>34</sup> Dxel rëb Jesús loj reeman:

—Da guialrawan naj günan zi'c rën Dios, bén guxhaal naj abi' guloox günan ni naman.

<sup>35</sup> Lëjt rëb: “Ryaadx zatajp bëëw din gac ni yu' loj guiniaa.” Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen. <sup>36</sup> Abi' bén rato'p loj

guiniaa guin, rtia'man ni rayalaman por dxiin ni rüjnman. Guiáad ni rato'paman naj par lod yu' guialnaban tiblayaa. Dxel zi'c bën rxübin zi'c bën rato'p, rabaa reeman tiblojzi. <sup>37</sup> Waliqni ni rëb ree bejn: “Ben ren rxübin, ben ren rato'p guialnaza'c.” <sup>38</sup> Naj guxhal lëjt din chigto'pidi guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

<sup>39</sup> Zien ree bën Samaria bililadx Jesús guial be béngunaa guin diidx loj reeman rëbaman: “Ma gunaman graczi ni benan.” <sup>40</sup> Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej. <sup>41</sup> Abi' mazri zien reeman bililadx laaman chi biguiejn reeman ni rnieeman, <sup>42</sup> dxel rëb reeman loj béngunaa guin:

—Bajy yan ad por ni natzil raliduladxan laaman, nëgajc dunujn ma baguiejn ni rnieeman, abi' rayagbeen walican laaman naj Cristo, bën yabëë bénguidxliuj loj dol.

### *Bayüjn Jesús xi'n xbejn tijb rey*

<sup>43</sup> Chi goc tio'p dxej guin, baza Jesús niz Samaria abi' zëman niz Galilea, <sup>44</sup> majsi laagajcaman rëb guial ni'qui tijb bën rudëë xtiidx Dios loj ree bejn ad rajpt reeman laaman respejt ladx gajcaman. <sup>45</sup> Per chi badxinman niz Galilea, bën niz ni ree baca' reeman laaman zagdx. Din në laa reeman wej lanij pascw Jerusalén, abi' baguiaa reeman gra ni beenman ni. <sup>46</sup> Chi za'man niz ni wejman Caná stijb, lod bayüjnman nijs vin. Abi' luguiedx Capernaum guyu tijb xbejn rey ragxuu xi'nman. <sup>47</sup> Chi gogbee bën guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayüjnman xi'nman guial zamer guiëtix. <sup>48</sup> Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

<sup>49</sup> Per rëb bën guin:

—Dad, yo' yan gajc, naga gad da xi'nan guiët.

<sup>50</sup> Dxel rëb Jesús lojman:

—Baguij lidxil, ma bayajc xi'nl.

Bililadx bën guin ni rëb Jesús, abi' zia lidxaman. <sup>51</sup> La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

<sup>52</sup> Dxel gunabdiidxaman loj reeman, rëbaman:

—¿Xhie hor guzuloj banaa da xi'nan?

Abi' rëb reeman lojman:

—Nieey cost raca tijb wadxe bariix xliaa.

<sup>53</sup> Dxel basaaladx bën guin guial hor ziin rëb Jesús lojman: “Ma bayajc xi'nl.” Abi' laaman në gra bën zojb lidxaman bililadx reeman Jesús. <sup>54</sup> Ni ne naj milagr baroyp ni been Jesús niz Galilea chi bazaman niz Judea.

## 5

### *Bayüjn Jesús tijb bën ad rajct rza*

<sup>1</sup> Chi gudëd gojc zian, guyu tijb xlanij ree bën Israel, abi' wej Jesús Jerusalén. <sup>2</sup> Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. <sup>3</sup> Yagaj riga' zien ree bënragxuu, zi'c ree bénlutia'p, në ree bencoj con ree bën ad rajctczi rza, cabëz reeman guiniib nijs yu' lën tanc guin. <sup>4</sup> Din gocli goc rguiajt tijb xianjl Dios runiibaman nijs guin, abi' bën ru lojnijs guin yaloj chi caniiiban, rayajcaman xhietëez guialguijdxan rajcaman. <sup>5</sup> Dxel loj ree bën guin no'ch tijb bejn, ma gojc zi'ctiubichoon ijz ragxuuman. <sup>6</sup> Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rëbaman:

—¿Rënl ya yayajquil?

<sup>7</sup> Badxi' bënragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

<sup>8</sup> Dxel rëb Jesús lojman:

—Bixche, baca' ni naal loj, baguiaj.

<sup>9</sup> Loj hor guin gajc bayajc bén guin, baca' ni naaman loj abi' guzuloj cazaman. Per guial dxej zii naj dxej raziiladx ree bén Israel, <sup>10</sup> zianz bén Israel zinal ree ley rëb reeman loj bén bayajc guin:

—Yandxej naj dxej raziiladx bejn, ad zajct yaca' ni go'til loj.

<sup>11</sup> Badxi' bén guinan rëbaman:

—Bén bayüjn naj naman: “Baca' ni naal loj, baguiaj.”

<sup>12</sup> Dxel gunabdiidx reeman lojman rëb reeman:

—¿Chu na lojl: “Baca' ni naal loj, baguiaj”?

<sup>13</sup> Per bén guin ad ragbeetaman chunin bayüjn laaman guial bi'ch Jesús loj ree benzien riga' yagaj. <sup>14</sup> Chi badxaag Jesús laaman lën yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëë gaquil mazri guial loj ni goquil.

<sup>15</sup> Dxel zia bén guin abi' biguiedxaman loj ree bén Israel guial Jesús naj bén bayüjn laaman. <sup>16</sup> Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. <sup>17</sup> Per rëb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

<sup>18</sup> Zianan zeel mazri rejs guzuj reeman din gugüjt reeman laaman, ad guialzi rüjnntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

#### *Xgualrniabee Xi'n Dios*

<sup>19</sup> Rëb Jesús loj reeman:

—Diidxliczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. <sup>20</sup> Din Dios rën xi'nman abi' rulüüman laaman gra ree ni rüjnman. Abi' mazri naj ni gulüü loj xi'nman ni yadxa da't lojdi. <sup>21</sup> Din zi'c rasban Dios bengüt ree rudëë tëëman guialnaban loj reeman, ziangajc rudëë xi'nman guialnaban loj ree bén nünman xgab. <sup>22</sup> Abi' ad Diost rüjn guialguxtis, bazuj xi'nman din güünman guialguxtis, <sup>23</sup> din gap gra ree bejn xi'nman respejt zi'cgajc rajp reeman laaman respejt. Bén ad rajpt Xi'n Dios respejt, ad rajp gajctaman respejt xDadaman Dios, bén guxhaal laaman.

<sup>24</sup> 'Diidxliczi rnin: Bén ruzoob da diidxan rililadx tëëman Dios, bén guxhaal naj, laaman ma rajp guialnaban tiblyaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman. <sup>25</sup> Diidxliczi rnin ma bidxin hor, abi' yandxej gajcan, bén naj ree zi'c bengüt loj Dios gucaagdiajg reeman cha' xi'nman. Abi' ree bén guzoob xtiidxaman zajp reeman guialnaban tiblyaa con Dios. <sup>26</sup> Din zi'c rajp Dios guialnaban, lasa'gajc guialnaban guin ma badëë loj xi'nman, <sup>27</sup> abi' badëëman guialrniabee lojman din güünman guialguxtis, din laaman naj Bén guxhaal Dios loj guidxliuj. <sup>28</sup> Ad bal radxa lojdi ni rnin, din zadxin dxej guien gra ree bengüt cha' Xi'n Dios, <sup>29</sup> abi' yarii reeman lën baa. Dxel bén been ree ni ruladx Dios, yaban reeman, din gap reeman guialnaban tiblyaa con laaman. Guiáad ree bén been ni mal, yaban reeman din yayal reeman casti ni rayal reeman.

#### *Ni rulüü guialrniabee rajp Jesús*

<sup>30</sup> 'Achet zajc güünan por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaban, rünanan zi'c rën da Dadan bén guxhaal naj. <sup>31</sup> Bal gü da diidx gajcan, achet lasajcan. <sup>32</sup> Per yu' ben ren rü da diidxan, abi' ragbeechaawan guial diidxlin. <sup>33</sup> Lëjt guxhaal bén bignabdiidx ree loj Waj, abi' laaman ganax ni diidxli gunaman. <sup>34</sup> Majs ad ryaadxt yadxi'n ni gunee ree bejn por naj, per canin lojdi ni guna Waj din chililadxidi gap tëëdi perdon. <sup>35</sup> Waj goc zi'cgajczi tijb bajl ni re'c abi' rusnin, guiáad lëjt dád babaadi bidxga'di tijb tiamp ni balüüman lëjt. <sup>36</sup> Per naj mazri naj ni gulün lëjt guial loj ni balüü Waj lëjt por naj. Din ni na da Dadan Dios güünan, laanan cayünan yan din guiguien guial diidxli laaman guxhaal naj. <sup>37</sup> Në da Dadan

bén guxhaal naj, laagajcaman be da diidxan, majsi ad waguiejntidi cha'man ad waguiaa tēetidi laaman. <sup>38</sup> Ad yu'guijc tēetidi xtiidxaman zeel ad rliadxtidi bén guxhaalaman. <sup>39</sup> Lējt con cudad da't roolidi loj xtiidx Dios, guial ragbeedi con laan gapidi guialnaban tiblayaa con Dios. Abi' majsi loj xtiidx gajcaman ruza't naj, <sup>40</sup> per ad rēntidi chililadxidi naj din gapidi guialnaban guin.

<sup>41</sup> 'Naj ad raguiltan guilies ree bejn da valoran. <sup>42</sup> Abi' ragbeechaawan guial ad walit rēndi Dios. <sup>43</sup> Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. <sup>44</sup> ¿Xoza chililadxidi naj? Awa mazri naguiejn rüjndi guilies ree bejn xvaloridi luar yaya'ndi zagdxē loj bén naj tijbzi Dios. <sup>45</sup> Ad bal naladxidi naj gabec xguialquiadi loj Dios, din bén cwe'c xguialquiadi naj Moisejs, bén rbēzidi güün lējt yudar. <sup>46</sup> Bal bililadxidi ni rēb Moisejs, nē naj zaliladxidi, din Moisejs bacaa loj xtiidx Dios lod ruza't naj. <sup>47</sup> Per bal id rliadxi ni bacaaman, ¿xoza chililadxidi ni rnin lējt?

## 6

### *Bayaan Jesús gaay mil bejn*

(Mt. 14:13-21; Mr. 6:30-44; Lc. 9:10-17)

<sup>1</sup> Chi gudēd gojc zian, dxel zē Jesús stiblad ro'nijsdoo riga' niz Galilea, nijsdoo la gajc Tiberias. <sup>2</sup> Bénguixiuj binal laaman, guial ruguiaa reeman milagr ree ni rüjnman rayüjnman bēnragxuu ree. <sup>3</sup> Dxel wē'paman tijb ruguia' abi' gurenē ree xbejnman. <sup>4</sup> Dxejzii ree ma zidyob pascw, xlanij ree bēn Israel. <sup>5</sup> Chi gules loj Jesús, abi' baguiaaman zēēd ree bénguixiuj lod za'man, dxel rēbaman loj Felip:

—¿Ban yusii ree ni gaw gra ree bēn guin?

<sup>6</sup> Per rēbzaman zian din guidoon xhie guiēb Felip, din Jesús mal ragbeeman xhie güünman. <sup>7</sup> Dxel badxi' Felipan rēbaman:

—Ni'qui ni rüjn bejn gan loj xhujn bēēw ad zadaant yo' guiadxtil din gaw tijbgaj reeman majsi tibia'dogajzan.

<sup>8</sup> Dxel gunee stijb xbejn Jesús, bēn la Andrejs bijch Simón Bēd, rēbaman:

<sup>9</sup> —Laa tijb xindo ca' gaay guiadxtil con zatio'p bējl za' guie. Per, ¿tē'czi taan ni guin par gra bēn guin?

<sup>10</sup> Dxel rēb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw. <sup>11</sup> Dxel cwa' Jesús guiadxtil guin ree. Chi gulox badēēman quixtēē loj Dios, badēēman laa reen loj ree xbejnman persi gudi's reeman laa reen loj gra ree bēn zobj yagaj. Ziangajc beenman con ree bējl guin, badēēman laa reen zi'ctzi guyēn reeman.

<sup>12</sup> Chi ma bixienladx reeman, dxel rēbaman loj ree xbejnman:

—Gol bato'p gra ree ni laay baya'n, chitēē xhie guizēēb.

<sup>13</sup> Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guiadxtil guin. <sup>14</sup> Chi baguiaa ree bejn milagr narooob ni been Jesús, rēb reeman:

—Walican bēn guin naj bēn rudēē xtiidx Dios loj ree bejn, bēn naj gui't loj guidxliuj.

<sup>15</sup> Per gogbee Jesús guial rēn reeman chinē naguiejn reeman laaman din güün reeman laaman rey, dxel bazaman yagaj, wē'paman mazri ladya guijc guia' guin, lod su xtijbaman.

### *Rza Jesús lonijsdoo*

(Mt. 14:22-27; Mr. 6:45-52)

<sup>16</sup> Chi ma cabej guiaal, biguiajt ree xbejn Jesús ro'nijsdoo, <sup>17</sup> guyu reeman loj tijb barcw, abi' cadēd reeman loj nijs guin din guidxin reeman Capernaum. Ma bicajy, guiáad Jesús gadaman yadxin. <sup>18</sup> Dxel guzuloj cabi' bidoxh abi' wajs xtüjp nijs guin. <sup>19</sup> Chi ma gojc zi'c gaay o xho'p kilometro zē reeman, baguiaa reeman caza Jesús lojnijs guin cabigaman lod zē barcw guin, dád bidxeb reeman. <sup>20</sup> Per rēbaman loj reeman:

—¡Najn, ad rdxebidi!



<sup>21</sup> Dxel guyën reeman niuman loj barcw guin, per hor guin gajc bidxin reeman lod zë reeman.

*Bigdiil ree bën bayaan Jesús laaman*

<sup>22</sup> Chi bareguiaal, bën riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman. <sup>23</sup> Loj hor zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëed Jesús quixtëe loj Dios. <sup>24</sup> Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

*Jesús naj bën rudëed guialnaban*

<sup>25</sup> Chi bidxin reeman Capernaum, badxejl reeman Jesús, abi' gunabdiidx reeman lojman, rëb reeman:

—Mextr, ¿goc bi'til guie?

<sup>26</sup> Badxi' Jesús an rëbaman:

—Ragbeechaawan, raguilidi naj guial gudawidi xt bigdxinlaxidi, ad guial baguiaatidi milagr ree ni rünan. <sup>27</sup> Ad chu'di xgab guialraw rara, gol guyu xgab guialraw runee guialnaban tiblyaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

<sup>28</sup> Dxel gunabdiidx reeman lojman rëb reeman:

—¿Xhie rayal yaguienan din chile' yaguienan ni rën Dios?

<sup>29</sup> Badxi' Jesús laan rëbaman:

—Ni rën Dios güüнди naj guial chililaxidi bën guxhaalaman loj guidxliuj.

<sup>30</sup> Dxel rëb reeman lojman:

—¿Xhie gulüül dunujn din yalidulaxan lüj? ¿Xhietëe ree milagr rüjnl? <sup>31</sup> Dux bégulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëeman guiadxtil biajb xanyabaa loj reeman gudaw reeman.”

<sup>32</sup> Badxi' Jesús laan rëbaman:

—Naj rni lojdi: Ad Moisejst badëed guiadxtil guin, da Dadan naj bën runee quijb guiadxtil za xanyabaa. <sup>33</sup> Guiadxtil runee Dios, laan bi't diizd xanyabaa abi' runeen guialnaban loj béguidxliuj.

<sup>34</sup> Abi' rëb reeman lojman:

—Dad, banee guiadxtil guin du lojn zianczi.

<sup>35</sup> Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc bën chililadx naj, ad yu't dxej che'caman nijs. <sup>36</sup> Per zi'c rnin lojdi, majsi ma baguiaadi naj, ad rliilaxtidi naj. <sup>37</sup> Gra ree bën ma banee da Dadan lon, gui't reeman lon, abi' bën gui't lon, ad zasiejctan laaman. <sup>38</sup> Din naj zial diizd xanyabaa, zidgaguienan zi'c rën da Dadan bën guxhaal naj, ad par güntan zi'c rënan. <sup>39</sup> Da Dadan bën guxhaal naj, ni rënman naj guial gra ree bën baneeman lon ni'qui tijb reeman ad zunijttan, rënman yasbanan laa reeman chi nit guidxliuj. <sup>40</sup> Din rënman guial gra ree bën yayagbee Xi'nman chililadx tëe reeman laaman, gap reeman guialnaban tiblyaa con laaman, guiáad naj yasban laa reeman chi nit guidxliuj.

<sup>41</sup> Dxel guzuloj ree bën Israel caneeguijdx reeman Jesús, guial rëbaman: “Naj naj guiadxtil ni biguiajt diizd xanyabaa.” <sup>42</sup> Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguienbee xdadix con xniaax. Yan, ¿chexc zeel nax xanyabaa biguiajtix?

<sup>43</sup> Dxel rëb Jesús:

—Gol bacwëez rnieeguijdxidi naj loj lasa'di. <sup>44</sup> Dios naj bën guxhaal naj. Achut zile' gui't lon bal id zëedaman por da Dadan, abi' naj yasban laaman chi nit guidxliuj. <sup>45</sup> Loj ree libr ni bacaa ree bën badëe xtiidx Dios loj ree bejn, rëb: “Dios gulüü gra ree bejn.” Zeel gra ree bën rucaagdiajg xtiidxaman, rusiid tëe reeman ni rülüüman laa reeman, laa reeman zëed lon.

<sup>46</sup> 'Achutczi waguiaa da Dadan Dios, tijbzi b́en guxhaalaman loj guidxliuj ma baguiaa laaman. <sup>47</sup> Diidxiczi rnin, b́en rliladx naj rajpaman guialnaban tiblayaa con Dios. <sup>48</sup> Naj naj guiadxtil ni runee guialnaban. <sup>49</sup> Xb́engulalidi gudaw mana loj yujbidx, per ni'czi zian güjt gajc reeman. <sup>50</sup> Per naj canin lojdi xcwent guiadxtil za xanyabaa, b́en gaw laan gapaman guialnaban tiblayaa con Dios. <sup>51</sup> Naj naj guiadxtil naban ni biyajb diidz xanyabaa. B́en gaw guiadxtil guie zajpaman guialnaban tiblayaa con Dios. Guiadxtil ni rudédan, laan naj quijb da cuerpan, gudédanan din gap ree b́enguidxliuj guialnaban.

<sup>52</sup> Dxel guzuloj ree b́en Israel guin cadildiidx reeman, ŕeb reeman:

—¿Xhienaag gunee xin guin xcuerpix yadaaw ree?

<sup>53</sup> Abi' ŕeb Jesús loj reeman:

—Naj rni ĺejt, bal id zajwidi xcuerp B́en guxhaal Dios, bal id źe' t́eedi xrejnman, ad zajptidi guialnaban. <sup>54</sup> Per b́en gaw da cuerpan guié' t́eedman da rejnan, zajpaman guialnaban tiblayaa con Dios, abi' naj yasban laaman chi nit guidxliuj. <sup>55</sup> Din da cuerpan naj quijb guialraw, guiáad da rejnan naj quijb ni guié' bejn. <sup>56</sup> Abi' b́en raw da cuerpan ŕe' t́eedman da rejnan, laaman nabanné naj, guiáad naj nabanné' laaman. <sup>57</sup> Da Dadan b́en guxhaal naj, rajpaman guialnaban, abi' naj naban por laaman. Ziangajc b́en gaw da cuerpan, zajpaman guialnaban tiblayaa con Dios por naj. <sup>58</sup> Naj cani xcwent guiadxtil ni biguiajt xanyabaa. Abi' guiadxtil guie ad najtan zi'c naj mana ni gudaw xb́engulalidi, din laa reeman majsi gudaw reeman mana guin, per güjt gajc reeman. Guiáad b́en gaw guiadxtil guie zajpaman guialnaban tiblayaa con Dios.

<sup>59</sup> Zian balüü Jesús bejn ree ĺen yadoo Capernaum.

#### *Diidx runee guialnaban tiblayaa*

<sup>60</sup> Chi gulox bacaagdiajg reeman ni balüü Jesús laa reeman, zien ree b́en zinal laaman ŕeb:

—Nawéeg da't naj yayignia' ree ni naman. ¿Chu zajc guidxga' laaman?

<sup>61</sup> Chi gogbee Jesús ni canee reeman, gunabdiidxaman loj reeman, ŕebaman:

—¿Rüjnnaa ni rnin ĺejt ya? <sup>62</sup> ¿Xhieza güündi bal guguaadi B́en guxhaal Dios yayé'paman lod guzuman gocli? <sup>63</sup> Tijbzi por xSprijt Dios rajp bejn guialnaban tiblayaa, bejn ad zile't güün laazaman xhienin. Abi' naj por xSprijt Dios źeed ree diidx ni gunen lojdi, por ree diidx guin rajp bejn guialnaban. <sup>64</sup> Per ĺejt yu'di ad waliladxt.

Ŕeb Jesús zian guial ragbeechaawaman diidz yalój chu ree ad rliladxt laaman chu t́ee yayü laaman. <sup>65</sup> Ŕeb t́eedman loj reeman:

—Zeel ma rnin lojdi guial achut zile' gui't lon bal id źeedaman por da Dadan Dios.

<sup>66</sup> Diidz nadxel, zien ree b́en zinal Jesús guro'nldx laaman, abi' ad guzanetri reeman laaman. <sup>67</sup> Dxel ŕeb Jesús loj guidxiptio'p ree xbejnman:

—¿Né ĺejt ŕen yaguiaj ya?

<sup>68</sup> Per badxi' Simón Béd laan, ŕebaman:

—Dad, ¿chu loj yo'n? Awa xtiidxil zidné guialnaban tiblayaa con Dios. <sup>69</sup> Dunujn ma baliduladx rayagbee t́een guial ĺuj naj Cristo, Xi'n Dios naban.

<sup>70</sup> Dxel ŕeb Jesús loj reeman:

—¿Nid naj gule guidxiptio'pidi ya? Abi' yan tijb gajqui ĺejt naj zi'c xindxab.

<sup>71</sup> Ŕeb Jesús zian por Judas Iscariote, xi'n Simón, din Judas guin naj b́en bayü laaman, majsi tijb gajc xbejnman najman.

## 7

#### *Ad rliladxt ree bijch Jesús laaman*

<sup>1</sup> Chi gudéd gojc zian, wej Jesús loj ree guiedx riga' niz Galilea. Ad guyéntaman niejman niz Judea, guial cayguiil ree b́en Judea guin laaman din gugüjt reeman laaman. <sup>2</sup> Per guial ma zidyob lanij ni ŕujn ree b́en Israel, chi rbej reeman ĺen ranch, <sup>3</sup> ŕeb ree bijch Jesús lojman:

—Brii, wej niz Judea, din në ree xbejnł bėn riga' ree niz ni guguaa milagr rüjnl. <sup>4</sup> Din chi chu rėn gagbee bejn ni rüjnman, ad rayalt güünman laan ralan. Yan zi'c rüjnl milagr ree, beenan loj gra ree bejn.

<sup>5</sup> Gunee ree bijch Jesús zian, guial ni'qui laa reeman ad rlıladxt laaman. <sup>6</sup> Dxel rėb Jesús loj reeman:

—Ad wadxint da horan, per par lėjt xhietėez horan naj zagdx. <sup>7</sup> Ad zajct guidxe'ch bėnguidxliuj lėjt, sa'n naj rdxe'ch reeman naj guial rėn loj reeman ad laat naj ni rüjn reeman. <sup>8</sup> Gol wej lanij guin, sa'n naj ad zazaagajtan, din ad wadxint hor ni gazaan.

<sup>9</sup> Chi gulox rėbaman loj reeman zian, baya'nman Galilea.

### *Wej Jesús xlanij ree bėn Israel*

<sup>10</sup> Chi ma zė ree bijch Jesús, dxel nėman zė lanij guin, per ralanzi zėman chitėe chu gagbee. <sup>11</sup> Per yu' ree bėn Israel raguil laaman loj lanij guin, rėb reeman:

—¿Con bėn guin ya'n?

<sup>12</sup> Loj gra ree benzien we lanij guin, zienloj ni rniee reeman Jesús. Yu' reeman rėb: “Benza'can”, yu'za reeman rėb: “Ad benza'ctan, rusquieeman bejn ree.”

<sup>13</sup> Per achutczı ruza't laaman loj gra bejn, guial rdxeb reeman guxtis Israel ree.

<sup>14</sup> Chi gurol xuman ni cayajc lanij guin, guyu Jesús lėn yadooro' Jerusalėn, abi' guzuloj culüüman bejn ree. <sup>15</sup> Guıáad ree bėn Israel badxaloj reeman, rėb reeman:

—¿Chexc ya'n contzi gra ragbeex, awa ni'quid basiidtix?

<sup>16-17</sup> Dxel rėb Jesús loj reeman:

—Ad guictan carii ni culün lėjt, zėėdan por Dios, bėn guxhaal naj. Bal chu rėn güün zi'c rėnman, zıgnia'man bal ni carii guicanan culün lėjt o zėėdan por Dios ya. <sup>18</sup> Bėn rulüü ganaxzi ni rbėėguıjcaman, rüjnman laan din guilies ree bejn xvaloraman. Per bėn rüjn mazri din guilies bejn xvalor Dios, bėn guxhaal laaman, laaman rniee ni diıdxi, ad rusquieetaman bejn.

<sup>19</sup> 'Yan, majsi basa'nnė Moısejs lėjt ley, per ni'qui tijbıdi ad rüjnt zi'c rėb ley guin. ¿Chexquıza zeel rėndı gugüjtıdi naj?

<sup>20</sup> Badxi' ree bėn guinan, rėb reeman:

—Xındxab yu' luxdool. ¿Chuczı rėn gugüjt lüj?

<sup>21</sup> Abi' rėb Jesús loj reeman:

—Por tijbzı milagr ni benan radxalojdi. <sup>22</sup> Abi' lėjt gunabee Moısejs lėjt guial gra ree xınguaaw chu' sen, (majsi ad por Moısejst ru bejn sen guin, mal rüjn ree dux bengol gual ree zian), abi' lėjt rgu'dı bejn ree sen, majsi dxej raziıladx bejn. <sup>23</sup> Yan, bal chitėe gusaglojdi ley ni basa'nnė Moısejs lėjt, rgu'dı sen bejn ree majsi dxej raziıladx bejn. ¿Chexquıza zeel ralendi guial bayünan tijb bėnragxuu dxej raziıladx bejn? <sup>24</sup> Ad rüjndı xgabmal por ni ruguaazıdi rüjn bejn, yaloj xgaj gol gogbee zagdx xhie cayüjnman.

### *Rėb Jesús ban zaman*

<sup>25</sup> Yu' ree bėn Jerusalėn guzuloj rniabdiıdx loj lasa' reeman, rėb reeman:

—¿Nıd bėn guinan cayguıl reeman ya din gugüjt reeman laaman? <sup>26</sup> Abi' yan laaman canee niz loj ree bejn, abi' ni'qui chut xhie rėb lojman. ¿Ni ma bilıladx ree guxtis ya'n guial laaman naj Cristo? <sup>27</sup> Per dunuj ree rayagbeechaaw ban zaman, guıáad chi guı't Cristo, achut gagbee ban saman.

<sup>28</sup> Chi biguıejn Jesús zian, la'tgaj culüüman bejn ree lėn yadooro' Jerusalėn, dxel guneeman rejs rėbaman:

—¿Lėjt rėb nünbeedi naj abi' ragbeedi ban guzaan! Per ad zıaltan por naj gajc, zıalan por quıjb bėn rniabee bėn ad nünbeetıdi. <sup>29</sup> Per naj nünbee laaman guial zıalan diızd lod za'man, laa tėėman guxhaal naj.

<sup>30</sup> Chi biguıejn reeman zian, guyėn reeman nıniaaz reeman laaman, per achut gunaaaz laaman, guial gad hor gal guıniaazaman. <sup>31</sup> Loj ree bėnguıxiuj za' yagaj zien reeman bilıladx laaman, abi' rėb reeman:

—Chi guı't Cristo, ¿wen mazri zien ree milagr güünman guial loj bėn guin ya?

*Guyën reeman niniaaz reeman Jesús*

<sup>32</sup> Biguiejn ree bénfarisew ni rniee ree bejn Jesús. Abi' laa reeman con ree bixhioz rniabee, guxhaal reeman bén rajp ree ro' yadooro' Jerusalén din guiniaaz reeman Jesús.

<sup>33</sup> Dxel rëb Jesús:

—Ad xchejtri gazunë'n lëjt, dxel yaya'n lod za' bén guxhaal naj. <sup>34</sup> Yaguilidi naj, per ad zadxejltidi naj, din ad zile't gui'tidi lod gazun.

<sup>35</sup> Abi' ree bén Israel guin guzuloj rniabdiidx loj lasa' reeman, rëb reeman:

—¿Banczi zajc che bén guin din ad zadxejltaman? ¿Ni zejman lod zobj ree bén Israel loj ree benzit ya, chiglüüman laa reeman në ree bén ad najt bén Israel? <sup>36</sup> ¿Xhie rën guiëb guial naman: “Yaguilidi naj per ad zadxejlant, din ad zile't gui'tidi lod gazun”?

*Nijs runee guialnaban*

<sup>37</sup> Dxej rliox lanij guin naj mazri dxej zobjloj, dxejzii guzuli Jesús gunee man rejs, rëbaman:

—Bal chu lëjt re'c nijs, gol guda lon din guië'dan. <sup>38</sup> Din bén rliidx naj zi'c ca loj xtiidx Dios, lën luxdooman gach nijs runee guialnaban.

<sup>39</sup> Chi gunee Jesús zian, rën guiëb xtiidxaman guial gra ree bén chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

*Gula' lasa' ree bejn*

<sup>40</sup> Yu' ree bén no'ch loj ree benzien guin, chi bacaagdiajg reeman ni gunee Jesús, rëb reeman:

—Walican, bén guin naj gui't guidgadëë xtiidx Dios loj ree bejn.

<sup>41</sup> Yu'za reeman rëb:

—Bén guin naj bén bacaabee Dios.

Per yu' reeman rëb:

—Ad laataman naj Cristo, din ad niz Galileat naj griiman. <sup>42</sup> Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

<sup>43</sup> Zian gojc dxel gula' lasa' reeman por Jesús. <sup>44</sup> Zien reeman guyën niniaaz laaman, per achut bayax niniaaz laaman.

*Ad bililadxt ree guxtis Jesús*

<sup>45</sup> Chi bayejc ree bén rajp ro' yadoo guin lod za' ree bénfarisew guin con ree bixhioz rniabee guin. Rëb reeman loj reeman:

—¿Chexc zeel ad bidnë'tidi laax?

<sup>46</sup> Dxel rëb ree bén rajp ro' yadoo guin:

—¿Ad goct wayu bén guiniee zi'c rnieex!

<sup>47</sup> Abi' rëb ree bénfarisew guin:

—¿Në lëjt ma cwëjb basquieex lëjt ya? <sup>48</sup> ¿Wen yu' ree dux guxtis ree, o bénfarisew ree ma bililadx laax ya? <sup>49</sup> ¿Nid ragbeedi ya guial zien ree bén guin banijt loj Dios guial ad nünbeet reeman ley?

<sup>50</sup> Per bénfarisew la Nicodemo bén bignaj Jesús tijb guxhin, rëbaman loj reeman:

<sup>51</sup> —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

<sup>52</sup> Badxi' reeman laan rëb reeman:

—¿Wen në lüj za'në ree bén Galilea ya? Basiid zagdxe loj xtiidx Dios din gagbeel ad goct warii bén rudëë xtiidx Dios loj ree bejn niz Galilea.

<sup>53</sup> Dxel bare'ch reeman zia lidx lidx reeman.

## 8

*Béngunaa banaaznë xinguaaw ren*

<sup>1</sup> Per Jesús zëman ruguia' Olivos. <sup>2</sup> Chi bareguiaal, rsil badxinman lën yadooro' Jerusalén stijb. Zien ree bejn bido'p lod za'man, dxel gurejman guzuloj culüüman laa

reeman. <sup>3</sup> Abi' mextr rulüü ree ley con ree bénfarisew bidxinnë tijb béngunaa banaaznë tijb xinguaaaw, dxel bazuj reeman laaman galay ree bén guin, <sup>4</sup> zianz rëb reeman loj Jesús:

—Mextr, banaaz béngunaa guie loj mer hor ni yu'nëman xinguaaaw ren. <sup>5</sup> Abi' loj ley basa'nnë Moisejs dunuj ree ca guial lasa' béngunaa guie rayal guiëtaman con guiaj. ¿Laadx lüj xhie nal?

<sup>6</sup> Gunabdiidx reeman zian din guidoon xhie guiëbaman din gac gutedia' reeman laaman. Per con basajb lojman abi' guzulojman cucaaman luyuj con xbacwënman. <sup>7</sup> Per guial laa reeman canabdiidxzi canabdiidx reeman lojman, abi' babejlیمان, rëbaman loj reeman:

—Chutëez Bén ad wayüjnt dol, yaloj laaman gucaaguaiaj béngunaa guie.

<sup>8</sup> Dxel basajb lojman stijb, basnuu bacaaman luyuj guin. <sup>9</sup> Chi biguiejn reeman ni guneeman, guzuloj cayza tijbgaj reeman, diidz mazri bengol xt bara reeman baza. Tijbzi béngunaa guin baya'n con Jesús loj ree Bén riga' yagaj. <sup>10</sup> Dxel babejlیمان, rëbaman loj béngunaa guin:

—¿Con ree Bén bidnë lüj? ¿Ni'qui tijb reeman achut xhie been lüj ya?

<sup>11</sup> Dxel rëb béngunaa guin:

—Dad, ni'qui tijbaman.

Abi' rëb Jesús:

—Ni'qui naj achet günan lüj. Baguiaj yan, ad güünril dol.

#### *Jesús naj bajl par bénguidxliuj*

<sup>12</sup> Dxel guneé Jesús stijb, rëbaman loj ree Bén riga' yagaj:

—Naj naj bajl rusni bénguidxliuj. Abi' Bén guzoob da diidxan, zani xquiarguiejnman xhienaag gapaman guialnaban tiblayaa con Dios, ad yu' tëet dxej guicajy xquiarguiejnman.

<sup>13</sup> Abi' ree Bénfarisew rëb reeman lojman:

—Lüj gajc ruza't lüj, abi' achet lasajc xtiidxil.

<sup>14</sup> Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëe gan, sa'n lëjt ad ragbeetidi ban zialan ban tëe gan. <sup>15</sup> Lëjt rnieedi bejn zi'ctizi naj xixgabidi, sa'n naj achut ruzatan. <sup>16</sup> Abi' bal guzatan bejn, ganen diidxli, din ad zanetan zi'c naj da xgaban, në da Dadan Bén guxhaal naj ragbee guial diidxli naj ni ganen. <sup>17</sup> Abi' loj xleydi ca guial chi yu' tio'p Bén rniee tiblojzi, diidxliqui naj ni rniee reeman. <sup>18</sup> Yan, naj gajc naj tijb Bén rniee por naj, abi' da Dadan Bén guxhaal naj, naj stijb Bén rniee por naj.

<sup>19</sup> Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Lëjt ad nünbeetidi naj, ad nünbee tëetidi da Dadan, din bal nünbeedi naj, ziangajc nünbeedi da Dadan.

<sup>20</sup> Zian guneé Jesús la'tgaj rulüüman bejn ree lën yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

#### *Lod gan ad zile't gui'tidi*

<sup>21</sup> Guneé Jesús stijb, rëbaman:

—Chi ma gan, zaguiilidi naj, per zëjtnë xtolidi, din lod gan ad zile't gui'tidi.

<sup>22</sup> Dxel rëb ree Bén Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

<sup>23</sup> Abi' rëb Jesús loj reeman:

—Lëjt naj Bén ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliujt naj. <sup>24</sup> Zeel rnin, zëjtnë xtolidi. Din bal id zaliladxidi guial naj naj Bén najn, zëjtnë xtolidi.

<sup>25</sup> Dxel gunabdiidx reeman lojman, rëb reeman:

—¿Chuzal lüj?

Badxi'man laan rëbaman:

—Ma rnin lojdi diidz yaloj. <sup>26</sup> Zien ni ra'pan gulün lëjt ni ganenë' tëen lëjt. Per naj, ni canen loj bénguidxliuj naj ni rucagdiagán rniee bën guxhaal naj, abi' ni rnieeman naj diidxli.

<sup>27</sup> Per laa reeman ad gogbeet guial Diosan ruza'taman. <sup>28</sup> Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tēēdi guial achetctzi rünan por da xgabzan, naj rnie ni ma balüü da Dadan naj. <sup>29</sup> Din laaman guxhaal naj, laaman za' con naj, abi' ad yu't dxej cwēēladxaman naj, guial zianczi rünan ni rayuladxaman.

<sup>30</sup> Chi rëb Jesús zian, zien ree bejn bililadx laaman.

### *Bén wali naj xbejn Dios*

<sup>31</sup> Rëb Jesús loj ree bën Israel bililadx laaman:

—Bal gusnuu guzooibidi da diidxan, waliqui najdi da bejnan, <sup>32</sup> abi' züjnbeedi conin naj diidxli, abi' por diidxli guin zalaadi.

<sup>33</sup> Badxi' reeman laan rëb reeman:

—Dunujn zio'p loj xdiaa Abraham, abi' ad yu't dxej wayajcan zi'c bën nado'. ¿Chexquiza zeel nal du lojn, guial por diidxli zalaan?

<sup>34</sup> Dxel rëbaman loj reeman:

—Diidxli rnin lojdi, guial graczi bën rüjn ganaxzi dol, laa reeman naj zi'c bën nado' loj dol. <sup>35</sup> Abi' tijb bën nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan. <sup>36</sup> Zeel bal Xi'nman guslaa lëjt, ad najtridi zi'c bën nado'. <sup>37</sup> Ma qui ragbeen guial loj xdiaa Abraham zēēdidi, per lëjt rën gugüjt naj guial ad rayuladxtidi da diidxan. <sup>38</sup> Naj rni ni ma balüü da Dadan naj, sa'n lëjt rüjndi zi'c na xDadidi güüнди.

<sup>39</sup> Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal nijquidi xi'n Abraham, züjndi zi'c beenman. <sup>40</sup> Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¿Abi' Abraham ad yu't dxej nüjnman zian!

<sup>41</sup> Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunujn achut mazri xi'n nayajcan. Tijbzi Dios naj dux Dadan.

<sup>42</sup> Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bën guxhaal naj. <sup>43</sup> Abi' ad rignia'tidi ni rnin, guial ad rëntidi gucaagdiajguidi da diidxan. <sup>44</sup> XDadidi naj xinxab, abi' rüjndi zi'c rënx güüнди, din diidz yaloj ruladx xinxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tēēx xdad guialrusquiee. <sup>45</sup> Per guial naj rni lëjt ganax diidxli, ad rliladxtidi naj. <sup>46</sup> ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliladxtidi naj? <sup>47</sup> Bén naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

### *Mal yu' Jesús chi gad Abraham gal*

<sup>48</sup> Dxel rëb ree bën Israel guin loj Jesús:

—Waliqui ni ranan guial xinxab yu' luxdool naj tēēl bën Samaria.

<sup>49</sup> Badxi'man laan rëbaman:

—Achut xinxab yu' luxdon, naj cuzob xtiidx da Dadan, per lëjt ganax diidxguijdx rnieedi naj. <sup>50</sup> Naj ad raguiltan guilies ree bejn da valoran, majsi yu' bën rën güün bejn zian, abi' laaman rüjn xguialguxtis. <sup>51</sup> Diidxli rnin lëjt, bën guzoo da diidxan, ad yu't dxej guiëtaman.

<sup>52</sup> Dxel rëb ree bën Israel guin lojman:

—Yanri ma rayagbeechaawan guial xindxabqui yu' luxdool. Abraham në gra ree bën badëë xtiidx Dios loj ree bejn, güjt reeman, guiáad lüj nal: “Bén guzoob da diidxan, ad yu't dxej guiëtaman.” <sup>53</sup> ¿Wen mazri lasajquil ya guial loj dux bégulal ree Abraham? Güjtaman, güjt tëë ree bën badëë xtiidx Dios loj ree bejn. ¿Laadx lüj chu naladxil najl?

<sup>54</sup> Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bën rlies da valoran naj da Dadan, bën nagajquidi naj xDiosidi. <sup>55</sup> Lëjt ad nünbeetidi laaman, sa'n naj nünbeen laaman. Abi' bal ganin ad nünbeetan laaman, nëgajc naj ma naj bën rusquiee zi'cgajc lëjt. Per nünbeen laaman abi' ruzoban xtiidxaman. <sup>56</sup> Xbéngulalidi Abraham, babaaman guial guguiaaman dxej ni guialan. Abi' chi baguiaaman dxej guin, mazri babaaman.

<sup>57</sup> Dxel rëb ree bën Israel guin lojman:

—Ni'qui gadil chu' tü'pchii ijz, ¿guiáad lüj ya nal baguiaal Abraham?

<sup>58</sup> Abi' gunee Jesús rëbaman:

—Diidxli rnin lojdi, mal nabanani chi gad Abraham chu'.

<sup>59</sup> Dxel gules reeman guiaj din nucaa reeman laan Jesús. Per laa guzëëb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

## 9

### *Rayüjn Jesús tijb xin ad ranit loj*

<sup>1</sup> Chi cadëd Jesús tiblajt, baguiaaman tijb xin ad ranit loj diidx chi golix. <sup>2</sup> Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bën guin diidx chi golaman? ¿Por xtol ree xDadaman ya, o por xtol gajcaman?

<sup>3</sup> Badxi' Jesúsán, rëbaman:

—Najman zian ad por xtoltaman ad por xtol tëët ree xDadaman. Gojlanan zian din chi yayajcaman, guguiaa ree bejn xguialrniabee narooob Dios. <sup>4</sup> Yan, la'tgaj yu' tiamp, rüjn naguiejn yaguieen ree ni na bën guxhaal naj, din ma yayaaloj tiamp ni achetri zajc gac. <sup>5</sup> Abi' la'tgaj za'n loj guidxliuj guie, naj naj bajl rusni bénguidxliuj.

<sup>6</sup> Chi gulox guneeaman zian, guxhie' xhiejnman luyuj, abi' beennëman laan bajn, persi gudëëbaman laan guiaaloj xin guin. <sup>7</sup> Abi' rëbaman lojx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx. <sup>8</sup> Dxel bën zojb ree gajxh lod zojbix con ree bën ragbee guial laax rniab carda, rëb reeman:

—¿Nid xin guinan rbej rniab carda ya?

<sup>9</sup> Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

<sup>10</sup> Dxel gunabdiidx reeman lojx, rëb reeman:

—¿Xhieza naag gojc bani lojl?

<sup>11</sup> Badxi'xan, rëbix:

—Bén la Jesús been bajn, gudëëbaman guiaaloni abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

<sup>12</sup> Abi' rëb reeman lojx:

—¿Conzaman yan?

Zeel rëbix:

—Ad ragbeetan.

*Gunabdiidx ree bënfarisew loj xin guin xhienaag guzuloj rani lojx*

<sup>13</sup> Loj hor zii binë reeman xin bayajc guiaalox guin loj ree bñfarisew, <sup>14</sup> din dxej been Jesús bajn persi bayüjnman guiaalox xin guin, dxej guin raziiladx ree bejn. <sup>15</sup> Dxel gunabdiidx ree bñfarisew guin lojx xhienaag guzulox rani lojx. Abi' rëbix loj reeman:

—Jesús gudëeb bajn guiaalon, dxel bitiib lon, yan ma ranin.

<sup>16</sup> Yu' ree bñfarisew guin rëb:

—Bén bayüjn guiaalox ad xbejnt Diosan, din ad rajptaman respejt dxej raziiladx bejn. Per yu'za reeman rëb:

—¿Xhienaag güünman milagr guie ree, bal najman bëndol?

Garent garen rëb reeman. <sup>17</sup> Abi' gunabdiidx reeman loj xin bayajc guin zatijb, rëb reeman:

—¿Laadx lüj xhie nal chu naj bñ bayüjn guiaalox?

Badxi'xan rëbix:

—Naj rni guial laaman naj bñ rudëe xtiidx Dios loj ree bejn.

<sup>18</sup> Per bñ Israel guin ree ad rliladxt reeman, din ad banit lojx abi' yan ma ranin, dxel gurejdx reeman xdadix con xniaax, <sup>19</sup> abi' gunabdiidx reeman loj reeman, rëb reeman:

—¿Xin guien naj xi'ndi ya, xin rëbidi ad ranit loj diizd gojlax? Yan, ¿xhienaag gojc zeel ma ruguiaax?

<sup>20</sup> Badxi' reeman laan rëb reeman:

—Dunujn rayagbee guial du xi'nanan, rayagbee tëen guial diizd chi golix ad ranit lojx. <sup>21</sup> Per ad rayagbeetan xhienaag gojc zeel rani lojx, ad rayagbee tëetan chu bayüjn guiaalox. Gol gunabdiidx lojx, ma najx xingol, ma zajc na laagajquix lojdi xhienaag gojc.

<sup>22</sup> Rëb ree xdadix zian guial rdxeb reeman xguxtis ree bñ Israel, din ma baya'n reeman diidx, chutëez bñ guiëb guial Jesús naj Cristo, ad zatiëjbtri reeman chu'man lën yadoo.

<sup>23</sup> Zianan zeel rëb reeman: “Gol gunabdiidx lojx, ma najx xingol.”

<sup>24</sup> Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunujn rayagbee guial bëndol naj bñ bayüjn lüj.

<sup>25</sup> Badxi'xan rëbix:

—Ad ragbeetan bal bëndolan o ad bëndoltan ya. Tijbzi ni ragbeen naj guial ad banit lon, abi' yan ma ruguian.

<sup>26</sup> Dxel gunabdiidx reeman lojx stijb, rëb reeman:

—¿Xhienaag beennëman lüj? ¿Xhienaag beenman persi rani lojl?

<sup>27</sup> Badxi'xan rëbix:

—Ma rnin lojdi, abi' lëjt ad rliladxtidi naj. ¿Chexc zeel rëndi ganin zatijb xhienaag beenman? ¿Wen në lëjt rën gac xbejnman ya?

<sup>28</sup> Dxel gudilë reeman laax rëb reeman:

—Lüj bal najl xbejnman, sa'n dunujn xbejn Moisejs nayajcan. <sup>29</sup> Din dunujn rayagbee Dios gune Moisejs, per bñ guin ni'quid rayagbeetan ban zaman.

<sup>30</sup> Badxi'xan rëbix:

—¿Xhiechalnin zeel ad ragbeetidi ban zaman! Guiáad naj por laaman ma rani lon.

<sup>31</sup> Dunuj ree rayagbee chaaw guial ad ridxga't Dios xtiidx ree bëndol, ridxga'man xtiidx ree bñ ruzoob xtiidxaman rüjn tëe reeman zi'c rënman. <sup>32</sup> Ad goct wacaagdiajg ree guial chu' bñ yayüjn loj bñ ad ranit loj diizd gojlaman. <sup>33</sup> Yan, bal id por Dios zëed bñ guin, achetczi nile' nüjnman.

<sup>34</sup> Dxel rëb reeman lojx:

—Lüj gojl con dol, ¿wed lüj gulüü dunujn?

Abi' babëe reeman laax yagaj.

### *Bililadx xin bayajc guin Jesús*

<sup>35</sup> Gogbee Jesús ni guzac xin bayüjnman, dxel chi badxaagaman laax, rëbaman lojx:

—¿Rliladxil bñ guxhaal Dios loj guidxliuj ya?

<sup>36</sup> Badxi'xan rëbix:

—Dad, guna chunin, din chililadxan laaman.

<sup>37</sup> Dxel rëbaman lojx:



—Ma baguiaal laaman, laaman naj Bén caneenël.

<sup>38</sup> Abi' bazuxib xin guin lojman, rëbix:

—Rliladxan lüj, Dad.

<sup>39</sup> Zianz rëb Jesús:

—Bialan loj guidxliuj guie din gūnan guialguxtis, din por naj yani loj ree Bén ad ranit loj, guiáad ree Bén rani loj, ad zanit loj reeman.

<sup>40</sup> Yu' ree Bénfarisew za'në laaman. Chi biguiejn reeman rëbaman zian, rëb reeman:

—¿Wen në dunujn ad ranit duloj ya?

<sup>41</sup> Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

## 10

### *Bén rniaj xiil*

<sup>1</sup> Rëb tää Jesús:

—Diidxliczi rnin lojdi, Bén ad rut niz ro' xgurajl ree xiil, Bén ru niz lood ren, laaman naj béngubaan. <sup>2</sup> Per Bén ru niz ro' xgurajl reeb, laaman naj Bén rniaj laa reeb. <sup>3</sup> Abi' rxhial Bén rajp ro' xgurajl reeb persi ru Bén rniaj laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin. <sup>4</sup> Abi' chi ma brii gra reeb, dxel rniedaman loj reeb, guiáad laa reeb rnal laaman, guial nünbee reeb cha'man. <sup>5</sup> Per ad rnalt reeb tijb Bén ad nünbeet reeb, ruxüünl reeb lojman, guial ad nünbeet reeb cha'man.

<sup>6</sup> Chi gulox gunee Jesús zian, ad bignia't ree Bén riga' yagaj xhie rën guiëb ni guneeman.

### *Jesús naj zi'c Bén rniaj xiil ree zagdx*

<sup>7</sup> Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb. <sup>8</sup> Gra ree Bén bi't chi gad naj guial naj reeman zi'c béngubaan, rban reeman rusagzi tää reeman. Per ree Bén naj da bejnan ad bidxga't reeman laa reeman. <sup>9</sup> Naj naj ro' port, abi' Bén ru ro' port guie zajpaman perdon, dxel ma zile' chu'man yarii tääman zi'cgajczi tijb xiil abi' zian rdxejl ni rawib.

<sup>10</sup> Béngubaan ri'tzaman din cwanman, gugüjtaman gunijt tääman, sa'n naj zialan din gapidi guialnaban, gap täädi zro' da'tan. <sup>11</sup> Naj naj zi'c tijb Bén rniaj xiil ree zagdx. Abi' Bén rniaj xiil ree zagdx xt xguialnabanman rudëëman por laa reeb. <sup>12</sup> Per Bén rniaj laa reeb por milia, chi ruguiaaman zëëd cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman Bén rniaj ree xiil, dxel rniaaz cuyojt guin laa reeb abi' rtie'chib laa reeb. <sup>13</sup> Laaman rbëëladx laa reeb, din por miliazi rniajman laa reeb abi' achet naladxaman por laa reeb.

<sup>14-15</sup> 'Naj naj zi'c Bén rniaj xiil ree zagdx. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnabanan gudëdan por laa reeb. <sup>16</sup> Ra'p tää stibcwaa ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwaa reeb gac reeb tijbzi, abi' tijbzi bejn gap laa reeb.

<sup>17</sup> 'Da Dadan Dios rënman naj guial naj gajc rudë naj guiëtan par yabanan stijb. <sup>18</sup> Achut zajc gugüjt naj bal id naj gatiëëb. Naj ra'p guialrniabee par gatiëëban guiëtan në par yabanan stijb, din laan naj guialrniabee ni banee da Dadan lon.

<sup>19</sup> Chi biguiejn ree Bén Israel guin ni rëbaman, gojc reeman tio'p lala' stijb. <sup>20</sup> Zien reeman rëb:

—¿Chexc zeel ridxga'di laaman? Awa xindxab yu' luxdooan rajc tää guijcaman.

<sup>21</sup> Per yu' reeman rëb:

—Ni'qui tijb Bén yu' xindxab luxdoo ad rnieet zian. ¿Wen zajc yaxhal xindxab guiaaloj ree Bén ad ranit loj ya?

### *Jesús con xDadaman Dios naj reeman tijbzi*

<sup>22</sup> Tiamp nayaag, chi cayüjn ree bën Israel lanij ni rüjn reeman gazobijz par yadooro' Jerusalén. <sup>23</sup> Wej Jesús lën yadoo guin. Chi cazaman niz ro' curdur ni rníee reeman xcurdur Salomón. <sup>24</sup> Dxel biyaw ree bën Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

<sup>25</sup> Badxi' Jesúsán rëbaman:

—Ma rnin lojdi, per lëjt ad rliladxtidi naj. Abi' ree ni rünan con xguialrniabee da Dadan Dios, laa reen rulüü chu najn. <sup>26</sup> Per ad rliladxtidi, guial ad najtidi da bejnan. <sup>27</sup> Bën naj ree da bejnan, nünbee reeman cha'n, guiáad naj nünbeen laa reeman, abi' laa reeman rzanal naj. <sup>28</sup> Naj rudë guialnaban tiblyaa loj reeman, ad yu't dxej nit reeman. Abi' achut zajc chiquied laa reeman lon. <sup>29</sup> Din da Dadan, bën banee laa reeman lon, rajpaman mazri guialrniabee guial loj gra. Achut zajc chiquied laa reeman lojman. <sup>30</sup> Da Dadan con naj, nayajcan tijbzi.

<sup>31</sup> Dxel cwa' ree bën Israel guin guiaj din gucaaguij reeman Jesús. <sup>32</sup> Per rëbaman loj reeman:

—Por xguialrniabee da Dadan, zien ni zagdxe ma benan niz lojdi. ¿Con pornin gucaaguijdi naj?

<sup>33</sup> Badxi' reeman laan rëb reeman:

—Ad por ree ni zagdxe ni beentilan yacaaguij lüj, yacaaguij lüj guial ad rajptil Dios respejt, din bénguidxliujzi lüj, abi' rüjn lüj gajc zi'c Dios.

<sup>34</sup> Dxel rëb Jesús:

—Loj xleydi rëb: “Naj rni guial lëjt naj dios.” <sup>35</sup> Dunuj ree rayagbee guial ad ni rusquieet naj ni ca loj xtiidx Dios. Abi' laaman gulëelaj dios bën basa'nnë ree xtiidxaman, bën gojp ree guialrniabee loj ree bën Israel. <sup>36</sup> Yan, bal da Dadan Dios gulëëca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt guial rnin, xi'nman naj? <sup>37</sup> Bal id cayünan zi'c na da Dadan, ad chililadxidi naj. <sup>38</sup> Per bal cayünan zi'c naman, majsi ad zaliladxtidi naj, per gol bililadx guial por laaman zëed ni rünan din gagbeedi guial da Dadan za'në naj, guiáad naj za'në'n laaman.

<sup>39</sup> Dxel guyën reeman niniaaz reeman Jesús, per gulaaman loj reeman.

<sup>40</sup> Abi' zëman zatiblad ro' guiw Jordán, lod baroobnijs Waj bejn ree yaløj, yagaj baya'nman. <sup>41</sup> Abi' zien ree bën bidxin yagaj rëb:

—Walin, majsi achet milagr been Waj, per gra ni gunee man xcwent bën guie naj diidxli.

<sup>42</sup> Dád zien reeman bililadx Jesús yagaj.

## 11

### *Güjt Lazr*

<sup>1</sup> Guyu tijb bënragxuu, brii lajman Lazr. Laaman con re bizanman Li con Mart, naj ladx reeman Betania. <sup>2</sup> Abi' Li bizan Lazr, laam baroob perfum guia' Jesús abi' bacwiidximin con guidxguijquim. <sup>3</sup> Dxel grop bël reem guxhaal ruson loj Jesús, rëb reem:

—Dad, ragxuu xmiwil Lazr.

<sup>4</sup> Chi biguiejn Jesús zian, rëbaman:

—Guialguijdx guin ad zëedtan par gugüjtan, zëedan din gac guguiaa bejn xguialrniabee Dios në par guguiaa reeman xguialrniabee Xi'n Dios.

<sup>5</sup> Majsi rën da't Jesús Mart con Li në Lazr, <sup>6</sup> per chi cwa'man ruson ragxuu Lazr, sta goglaaman zatio'p dxej lod za'man. <sup>7</sup> Dxel rëbaman loj ree xbejnman:

—Yo' ree niz Judea zatijb.

<sup>8</sup> Abi' rëb reeman lojman:

—Mextr, ad wayajct xchej guyën ree bën zojb niz ni nucaaguij reeman lüj. ¿Abi' chel ni zatijb ya?

<sup>9</sup> Dxel rëb Jesús:

—Lëjt ragbee guial chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie. <sup>10</sup> Per bën rza guxin, yu' ni rirejl guia'man, din achet bajl guin rajpaman.

<sup>11</sup> Rëb tëë Jesús loj reeman:

—Ma naga'yëjs dux miw ree Lazr, per chicwëënan laax.

<sup>12</sup> Dxel rëb ree xbejnman:

—Dad, bal naayëjsix, rën guiëban yayajquix.

<sup>13</sup> Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsizix. <sup>14</sup> Dxel bagojn Jesús laa reeman, rëbaman:

—Ma güjt Lazr. <sup>15</sup> Rabaan por lëjt guial ad guzutan ni din chililadxidi naj. Yan, yo' ree yugnaj reex.

<sup>16</sup> Dxel Tumajs, bën rniee reeman cwajch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

### *Jesús naj bën rusban bejn runee tëëman guialnaban*

<sup>17</sup> Chi bidxin Jesús Betania, ma gojc tajp dxej biguie'ch Lazr. <sup>18</sup> Betania guin raya'nan gajxh Jerusalén, zi'ct choon kilometro. <sup>19</sup> Abi' zien ree bën Israel bignaj Mart con Li din yagu' reeman luxdoo reem guial güjt bizan reem. <sup>20</sup> Chi gogbee Mart ma zëed Jesús gajxh, briim bigchaaglojm laaman, guiáad Li baya'nm lënu. <sup>21</sup> Dxel rëb Mart loj Jesús:

—Dad, bal nizujl guie, ad ziant niëjt da zanan. <sup>22</sup> Per naj ragbee guial ni'qui yan zunee Dios ni guiniabil lojman.

<sup>23</sup> Dxel rëb Jesús:

—Naj rni yaban bizanl.

<sup>24</sup> Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

<sup>25</sup> Abi' rëb Jesús:

—Naj naj bën rusban ree bengüt rudë tëën guialnaban loj ree bejn. Bën chililadx naj, majsi guiëtaman, per zajpaman guialnaban loj Dios. <sup>26</sup> Guiáad gra bën naban rliladx tëë naj, zajpaman guialnaban loj Dios. ¿Rliladxil ni canin lüj ya?

<sup>27</sup> Dxel rëbim lojman:

—Rliladxanan Dad. Rliladxan lüj naj Cristo, Xi'n Dios, bën naj gui't loj guidxliuj.

### *Biin Jesús ro' xbaa Lazr*

<sup>28</sup> Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

<sup>29</sup> Biguiejnzi Li zian, laa bisugajquim bigchaaglojm Jesús. <sup>30</sup> Abi' Jesús gadzaman chu' luguiedx guin, sta za'man lod bigchaagloj Mart laaman. <sup>31</sup> Guiáad ree bën Israel zojbnë Li ragu' reeman luxdoo, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguaanm.

<sup>32</sup> Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

<sup>33</sup> Chi baguiaaman roon Li con ree bën Israel nal laam, dád gognaa luxdooman guyu naya tëëman. <sup>34</sup> Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguaal.

<sup>35</sup> Dxel biinman. <sup>36</sup> Abi' rëb ree bën Israel guin:

—Gol baguiaa nial dád guyënman laax.

<sup>37</sup> Per yu' reeman rëb:

—Bën guinan baxhal guiaaloj tijb bën ad ranit loj. Yan, ¿niche niajc nüjnman ya'n chitëë niëjt Lazr?

### *Basban Jesús Lazr*

<sup>38</sup> Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n. <sup>39</sup> Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

<sup>40</sup> Badxi' Jesúsán rëbaman:

—¿Nid rnin ya, bal riladxil, guguaal xgualrniabee Dios?

<sup>41</sup> Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëe lüj guial ma bacaagdiajguil ni rnin. <sup>42</sup> Naj ragbeechaaw guial zianczi rucaagdiajguil ni rnin. Per rnin zian por ree bën riga' guie, din chililadx reeman guial lüj guxhaal naj.

<sup>43</sup> Chi gulox rëbaman zian, dxel guridxa'man rëbaman:

—¿Lazr, barii yagaj!

<sup>44</sup> Dxel barii Lazr lën baa guin nalüüb vend yaax con guia'x, guíaad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguijx.

### *Baya'n reeman diidx xhienaag guiniaaz Jesús*

(Mt. 26:1-5; Mr. 14:1-2; Lc. 22:1-2)

<sup>45</sup> Dád zien ree bën binal Li bililadx Jesús, guial baguiaa reeman milagr beenman. <sup>46</sup> Per yu' reeman bicojn bënfarisew ree ni been Jesús. <sup>47</sup> Dxel bënfarisew ree në ree bixhioz rniabee, bachajj lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr cayüjn xin guin? <sup>48</sup> Bal yadëed ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nacion ree.

<sup>49</sup> Per loj reeman yu' bën la Caifás, bixhioz zobjloj rniabee loj ijzsi, rëbaman loj reeman:

—¿Nid ragbeedi ya, <sup>50</sup> nid rignia' tëedi ya, zagdxe naj guiët tijbzi bejn por gra bën Israel, luar nit dux nacion ree?

<sup>51</sup> Per Caifás guin ad ni naladxtzaman rëbaman. Guial najman bixhioz zobjloj rniabee loj ijzsi, zeel badëed Dios ni guneeaman, guial guiët Jesús por gra ree bën Israel. <sup>52</sup> Abi' ad por laatzi reeman, par gac reeman tijbzi con gra ree xbejn Dios, bën riga' ree guidib guidxliuj. <sup>53</sup> Zeel diidz dxejzii baya'n reeman diidx gugüjt reeman Jesús.

<sup>54</sup> Zianan zeel ad contzi rülüölojtraman loj ree bën Israel, bazaman yagaj ziaman guiedx la Efraín, najn gajxh yujbidx, yagaj guzunë ree xbejnman.

<sup>55</sup> Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c naj xcostumbr reeman par gac reeman naya loj Dios chi gad pascw gal. <sup>56</sup> Dxel raguuil reeman Jesús, abi' rniabdiidx loj lasa' reeman lën yadooro' Jerusalén, rëb reeman:

—¿Xhie nadi? ¿Zi'taman lanij ya o ad zi'ttaman?

<sup>57</sup> Bënfarisew ree con ree bixhioz rniabee, gunabee reeman bal chutëez bën ragbee ban za' Jesús, gugoijnman din chile' guiniaaz reeman laaman.

## 12

### *Baroob Li perfum guia' Jesús*

(Mt. 26:6-13; Mr. 14:3-9)

<sup>1</sup> Za xho'p dxej riaadx gal pascw, chi we Jesús Betania, lod zobj Lazr, xin basbanman. <sup>2</sup> Ni been reeman tijb guialraw par xche ni gudawnë reeman Jesús. Mart gule'c guialraw guin, guíaad Lazr naj tijb bën gurenë laa reeman xan mex. <sup>3</sup> Dxel cwa' Li cost garol lijtr perfum ni lasajc wayëjx, najchaawnën ganax nardo, baroobimin guia' Jesús abi' bacwiidxnë guidxguijquimin. Guidibczi lënu guin baree nejxh. <sup>4</sup> Dxel Judas Iscariote, xin naj tijb ree xbejn Jesús, xin bayü laaman, rëbix:

<sup>5</sup> —¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nüjnan yudar bénprob ree.

<sup>6</sup> Ad guial yu'tix xgab bénprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milia, rbanx ni rudëë reeman rgu'chaawix. <sup>7</sup> Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan.

<sup>8</sup> Din bénprob guin ree zianczi za'në reeman lëjt, per naj ad ziantczi gazunë'n lëjt.

*Baya'n reeman diidx gugüjt reeman Lazr*

<sup>9</sup> Bén guixiuj bén Israel gogbee za' Jesús Betania, abi' wej reeman yagaj, ad par guguaatzi reeman Jesús, në par guguaa reeman Lazr, xin basbanman. <sup>10</sup> Zeel baya'n ree bixhioz rniabee diidx guial në Lazr gugüjt reeman. <sup>11</sup> Din por laax dád zien ree bejn cayrii loj reeman, abi' caliladx reeman Jesús.

*Bagajpdioz ree bejn Jesús zi'c rey*

*(Mt. 21:1-11; Mr. 11:1-11; Lc. 19:28-40)*

<sup>12</sup> Chi bareguiaal, zien da't ree bén zë lanij pascw Jerusalén gogbee guidxin Jesús yagaj, <sup>13</sup> dxel cwa' reeman zijn, brii reeman bigchaagloj reeman laaman, rbidxa' reeman rëb reeman:

—¡Benza'c bendxoon naj Dios! ¡Nüjnle'man Bén guxhaalaman! ¡Nüjnle'man bén naj rey Israel!

<sup>14</sup> Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

<sup>15</sup> Bén Sión, ad rdxebidi.  
Gol baguiaa, laa xreydi zëed,  
dxiibaman tijb burdoo.

<sup>16</sup> Yaloj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

<sup>17</sup> Bén guzu ree con Jesús chi guredxaman Lazr din yariix lën baa, basban tëëman laax loj ree bengüt, rusnuu rü reeman diidx loj ree bejn ni baguiaa reeman. <sup>18</sup> Zeel zien ree bejn brii bigchaagloj laaman, guial gogbee reeman milagr beenman. <sup>19</sup> Dxel rëb loj lasa' ree bénfarisew:

—Gol baguiaa nial graczi bejn zinal laax, achetri zajc yaguieen ree.

*Yu' ree bén grieg raguül Jesús*

<sup>20</sup> Loj gra ree bén we lanij bignajchi' reeman Dios Jerusalén, no'ch bëlzi ree bén grieg, <sup>21</sup> gubig reeman loj Felip, bén za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

<sup>22</sup> Abi' wej Felip biguiedxaman loj Andrejs, dxel wej grop reeman bicojn reeman Jesús.

<sup>23</sup> Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman. <sup>24</sup> Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajcxhiejn. <sup>25</sup> Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bén ru mazri xgab güünman zi'c rën Dios, xhietëëz sacaman, zajpaman guialnaban tiblayaa con laaman. <sup>26</sup> Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

*Rugojn Jesús guial guiëtaman*

<sup>27</sup> Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan zian, din par zian zialan. <sup>28</sup> Dad, balüü xguialrniabeel.

Dxel biguien cha' bejn xanyabaa rëbaman:

—¡Ma balü da guialrniabeen, per gulünan stjib!

<sup>29</sup> Riguiejn ree bén riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

<sup>30</sup> Dxel rëb Jesús:

—Ad por najtan biguien cha' bejn, por lëjtan. <sup>31</sup> Ma bidxin dxej gac guialguxtis loj guidxliuj, yan yarii bën rniabee lojn. <sup>32</sup> Per chi guilies reeman naj ya loj guidxliuj guie, dxel gui't graloj bejn lon.

<sup>33</sup> Zian basignia'man xhienaag guiëtaman. <sup>34</sup> Badxi' ree bën guinan rëb reeman:

—Dunujn rayagbee rëb loj ley, Cristo guiban tiblyaa. ¿Chexc zeel nal, rayal guilies reeman Bén zëed xanyabaa? ¿Chunin naj Bén zëed xanyabaa?

<sup>35</sup> Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din bën rza loj xcay, ad ragbeetaman ban cheman. <sup>36</sup> Gol bililadx bajl guie, la'tgaj za'nëdan, din gaquidi xbejnan.

Chi gulox gunee Jesús zian, dxel baquie'chloyman loj reeman.

#### *Ad bililadxt ree bejn Jesús*

<sup>37</sup> Majsi been Jesús zien da't milagr baguiaa reeman, ad bililadxt reeman. <sup>38</sup> Zian gojcc cumplid ni bacaa Isaías bën badëë xtiidx Dios loj ree bejn, rëban:

Dad, ¿chu ma bililadx ruson radëëdan?

¿Chu loj ma balüü Dios xguialrniabeeman?

<sup>39</sup> Zianan zeel ad gojct nililadx reeman, din në ze bacaa Isaías:

<sup>40</sup> Dios basiaaw guiaal loj reeman,

bascajy tëëman xquiarguejñ reeman,

chitëë guguaa reeman chignia' tëë reeman,

chitëë yadxi' loj reeman lon, abi' ad zayüntan laa reeman.

<sup>41</sup> Rëb Isaías zian guial baguiaaman xbiani Jesús, zeel baza'taman laaman.

<sup>42</sup> Per ni'czi zian, dád zien ree bën zobjloj bililadx Jesús. Per ad rëbt reeman loj ree bejn zian, guial rdxeb reeman yabëë ree bënfarisew laa reeman lod ricaagdiajg reeman xtiidx Dios, <sup>43</sup> din mazri rën reeman guiën ree bejn laa reeman, guial guiën Dios laa reeman.

#### *Rniee Jesús zi'c rniabee xDadaman*

<sup>44</sup> Gunee Jesús rejs rëbaman:

—Bën rliladx naj, ad najtzan rliladxaman, në da Dadan bën guxhaal naj. <sup>45</sup> Bén ruguaa naj, në bën guxhaal naj ruguaaman. <sup>46</sup> Naj naj bajl, bialan loj guidxliuj guie, chitëë yaya'n ree bën rliladx naj loj xcay. <sup>47</sup> Bal chu guien da diidxan abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol.

<sup>48</sup> Bén ad rënt naj ad rucaagdiajg tëëtaman da diidxan, mal yu' ni gudëëd laaman casti: diidx ni rën, laan gudëëd laaman casti chi guidxin dxej. <sup>49</sup> Din ad ni rbëguictan rnien. Da Dadan, Bén guxhaal naj rniabee ni ganen ni gulü tëën, <sup>50</sup> zeel ragbeen, ni rniabee da Dadan runee guialnaban tiblyaa. Zianan zeel ni rnin rulünan zi'c rniabeeman.

## 13

#### *Gudiib Jesús guia' ree xbejnman*

<sup>1</sup> Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguaaj loj xDadaman. Zianczi guyën ree xbejnman, bën riga' ree loj guidxliuj, rënman laa reeman goctëëz. <sup>2-4</sup> Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bën gugüjt laaman. Ragbee Jesús guial badëëd xDadaman gra guialrniabee lojman, laa tëëman guxhaal laaman, zeel yaguaajman lod za'man. La'tgaj cayaw reeman, bisuman xan mex, gulëëman tijb lajd najcwaman luya, dxel cwa'man tijb tuay guxhii xizaman. <sup>5</sup> Abi' badxe'man nijs loj tijb xijg, guzulojman caguuibaman guia' ree xbejnman, cucwiidx tëëman laan con tuay

naxii xizaman. <sup>6</sup> Chi bayal quiibaman guia' Simón, bén rniee reeman Béd, rëbaman loj Jesús:

—Dad, ¿luj quiib guia'n ya?

<sup>7</sup> Badxi'man laan rëbaman:

—Ad rignia'til ni cayünan yan, per qui chignia'rilan.

<sup>8</sup> Zeel rëb Béd lojman:

—Ad zatiëëbtan quiibil guia'n.

Abi' rëb Jesús:

—Bal id zaguiiban guia'l, ad zile'tri gaquil da bejnan.

<sup>9</sup> Zeel rëb Béd lojman:

—Dad, ad bal guia'zan quiibil, gudiib në yan con guican.

<sup>10</sup> Badxi'man laan rëbaman:

Bén goznejz guia'zaman riaadx chëd, din guidibaman naya. Abi' lëjt ma nayadi, majsi ad gratidi.

<sup>11</sup> Ma ragbeeman chu yayü laaman, zeel rëbaman: “Ad gratidi naya.”

<sup>12</sup> Chi gulox gudiibaman guia' reeman, bayajcw xabaman, gurejman xan mex guin zatijb, dxel rëbaman:

—¿Bignia'di ni benan ya? <sup>13</sup> Rnieedi naj Mextr në Dad, waliquidi najn. <sup>14</sup> Bal najn Mextr në Dad, gudiiban guia'di, ziangajc quiib guia' lasa'di. <sup>15</sup> Ma balün lëjt, din güüнди zi'c benan. <sup>16</sup> Diidxiczi ganin, achut mojs naj mazri guial loj bën rniabee laaman, achut bën ri't naj mazri guial loj bën rxhiaal laaman. <sup>17</sup> Bal rignia'di nine güün tëëdan, yabaanë Dios lëjt.

<sup>18</sup> Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rëban: “Bén rawné'n tijbzi, bayejcaman contr naj.” <sup>19</sup> Ma rugojnan lëjt din gagbeedi chi gac zian, din chililadxidi chu najn. <sup>20</sup> Diidxiczi ganin, bën rucaagdiajg ni rëb bën rxhialan, najn rucaagdiajgaman, guiáad bën rucaagdiajg da diidxan, xtiidx bën guxhaal najn rucaagdiajgaman.

### *Bagojn Jesús chu yayü laaman*

(Mt. 26:20-25; Mr. 14:17-21; Lc. 22:21-23)

<sup>21</sup> Chi gulox guneé Jesús zian, dád gyunayaman, dxel rëbaman loj reeman zagdxe:

—Diidxiczi ganin, tijb lëjt yayü naj loj ree bën gugüjt naj.

<sup>22</sup> Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. <sup>23</sup> Tijb bën guyën da'taman zojb cwë'man, hor zii chi cayaw reeman xche, <sup>24</sup> dxel been Béd sen lojman din guiniabdiidxaman chunin ruza't Jesús. <sup>25</sup> Zeel mazri gubigaman cwë' Jesús gunabdiidxaman, rëbaman:

—Dad, ¿chunin?

<sup>26</sup> Badxi' Jesúsán rëbaman:

—Gugajdxan ta'n guiadxtil, din loj xin gudëdanan, laaxan yayü naj.

Dxel bagajdxaman ta'n guiadxtil badëëman laan loj Judas, xi'n Simón Iscariote. <sup>27</sup> Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

<sup>28</sup> Per achutczi ree bën zojb xan mex guin bignia' chexc zeel rëbaman zian. <sup>29</sup> Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'n nan loj ree bën rzagdiaj ya. <sup>30</sup> Chi ma gudawix guiadxtil guin, dxel briix, ma guxhin.

### *Gunabee Jesús tijb nicüb*

<sup>31</sup> Chi ma brii Judas, rëb Jesús loj ree xbejnman:

—Yan guien xguialrniabee Bén guxhaal Dios din gagbee ree bejn xhienaag naj guialrniabee gudëë Dios lojman. <sup>32</sup> Din bal gulüü Bén guxhaal Dios xguialrniabee Dios, ziangajc gulüü Dios xguialrniabeeman, zeel ma gudëëdaman laan. <sup>33</sup> Xi'n, ad zien dxejtri gazunë'n lëjt, yaguiilidi naj, per zi'cgajc rën loj ree bejn, ziangajc ganin lojdi yan: Ad

zajct chedi lod gan. <sup>34</sup> Ganin tijb nicüb ganabeen: Gol guyën lasa'di zi'c rënan lëjt. <sup>35</sup> Bal guiën lasa'di, zian gagbee gra bejn guial najdi da bejnan.

*Guiëb Bëd ad nünbeetaman Jesús*

(Mt. 26:31-35; Mr. 14:27-31; Lc. 22:31-34)

<sup>36</sup> Gunabdiidx Bëd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

<sup>37</sup> Zeel rëb Bëd:

—Dad, ¿chexc zeel ad zajct guidnaalan lüj yan? Xt zajc guiëtan por lüj.

<sup>38</sup> Badxi' Jesús rëbaman:

—¿Walil ya rënl guiëtil por naj? Diidxliczi ganin, chi gad guïd cwidxa', mal rëbil choon volt, ad nünbeetil naj.

## 14

*Jesús naj nejz guidxinnë bejn loj Dios*

<sup>1</sup> Rëb tëë Jesús:

—Ad rudi xgab. Gol bililadx Dios, gol bililadx tëë naj. <sup>2</sup> Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. <sup>3</sup> Chi ma benchaawan luar guin, dxel yaguaian guidgaxin lëjt din sudi lod gazun. <sup>4</sup> Ma nünbeedi nejz zë lod gan.

<sup>5</sup> Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

<sup>6</sup> Badxi'man laan rëbaman:

—Naj naj nejz, najn diidxli, naj tëën guialnaban. Tijbzi naj zajc chinë' bejn ree loj da Dadan. <sup>7</sup> Bal nünbeedi naj, në da Dadan güünbeedi. Per ma nünbeedi laaman diizd yan, din ma baguiaadi laaman.

<sup>8</sup> Dxel rëb Felip:

—Dad, banee mod majsi yaguaiaazan bën naj xDadil.

<sup>9</sup> Badxi'man laan rëbaman:

—Felip, ma gojc xchej za'në'n lëjt. ¿Nid wayünbeel naj ya? Din bën ruguiaa naj, da Dadanan ruguiaaman. ¿Chexc zeel nal gunen mod guguiaal da Dadan? <sup>10</sup> ¿Nid rliladxil ya, naj za'në' da Dadan, guiáad laaman za'në naj? Ni rnin lojdi, ad rbëguictanan. Da Dadan, bën nabannë'n, laaman rüjn dxiin guin. <sup>11</sup> Gol bililadx naj za'në' da Dadan, guiáad laaman za'në naj. Balgui majsi ni rünzan gol bililadx. <sup>12</sup> Diidxliczi ganin: Bën rliladx naj, nëgajcaman güün ni rünan, güünman ni mazri narooob, din naj yaya' lod za' da Dadan. <sup>13</sup> Graczi ni guiniabidi lojman por naj, günanan din gulün xguialrniabeeman. <sup>14</sup> Günan xhietëëz ni guiniabidi.

*Guixhiaal Jesús xSprijtaman*

<sup>15</sup> 'Bal rëndi naj, gucaagdiajguidi ni balün. <sup>16</sup> Din guië loj da Dadan guixhiaalaman Sprijt sunë lëjt, <sup>17</sup> Sprijt gulüü diidxli, din zianczi sunëman lëjt. Bën ad rliladxt ree Dios ad zajct tia' reeman Sprijt guin, din ad ruguiaat reeman ad nünbee tëët reeman laaman. Per lëjt nünbee laaman, din sunëman lëjt yaya'n tëëman luxdoodi tiblyaaa. <sup>18</sup> Ad zusa'ntan xtijbidi, yaguaian stijb guidganan lëjt. <sup>19</sup> Sta'nz riaadx ad zuguaatri ree bénguidxliuj naj, per lëjt guguiaadi naj, guibandí din nabanán. <sup>20</sup> Dxej zii ree, gagbeedi za'në' da Dadan, lëjt za'në naj, guiáad naj za'në'n lëjt zianczi. <sup>21</sup> Bën rucaagdiajg ni rniabeen rüjn tëëman laan, walicaman rënman naj. Guiën da Dadan bën rën naj, në naj guiën laaman din güünbeeman naj.

<sup>22</sup> Gunabdiidx Judas (ad bën bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

<sup>23</sup> Badxi' Jesús rëbaman:



—Bén guiën naj guzoobaman da diidxan, guiën da Dadan laaman, guiáad naj guidnë' da Dadan din yabajnnë'n laaman. <sup>24</sup> Bén ad zënt naj ad zuzoobtaman da diidxan, din diidx cucaagdiajguidi yan ad da diidxanan, xtiidx da Dadanan Bén guxhaal naj.

<sup>25</sup> 'Canin lojdi gra nine, la'tgaj za'në'n lëjt. <sup>26</sup> Per xSprijt Dios, Bén sunë lëjt zianczi, Bén guixhiaal da Dadan por naj, graczi gulüüman lëjt din gusaaladxidi ni canin.

<sup>27</sup> 'Chi yaya'n, yabecdxen luxdoodi, gunen guialnaza'c lojdi, ad zi'c runeet ree bénguidxliujn, ad bal ru nayadi ad rdxeb tēēdi. <sup>28</sup> Ma rnin lojdi, yaya'n, dxel yaguialan zatijb. Bal walidi rēndi naj, chu' luxdoodi zagdxe, guial gagbeedi yaya' loj da Dadan, din mazri zoblojman guial lon. <sup>29</sup> Ma rugojnan lëjt, din chi gac zian, chililadxidi.

<sup>30</sup> 'Ad zro'tri ganenë'n lëjt, din ma zēēd xin rniabee guidxliuj, majsi ad nēt naj rniabeex. <sup>31</sup> Per zian gac din gagbee ree bénguidxliuj, rēnan da Dadan, zeel rünan ni rniabeeman. Gol bisu, yo' ree yan.

## 15

### *Rën Jesús yadxu'në' reeman zianczi*

<sup>1</sup> Basnuu rēb Jesús:

—Naj naj zi'c yag rtia ni nejxh zagdxe, guiáad da Dadan naj zi'c Bén rxübin laan. <sup>2</sup> Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri. <sup>3</sup> Lëjt ma nayadi, guial basia diidx rnin lëjt. <sup>4</sup> Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güüندی ni rën Dios bal id za'nëdi naj.

<sup>5</sup> 'Naj naj zi'c yag rtia ni nejxh, guiáad lëjt naj zi'c xidxan. Bén sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güüندی. <sup>6</sup> Bén ad zazujnēt naj guizēebaman zi'c yagbidx ruto'p reeman, din che'can.

Rēb tēē Jesús:

<sup>7</sup> —Bal za'nëdi naj tijbzi ruzoob tēēdi da diidxan, gol gunab ni rēntzidi, din tia'dan. <sup>8</sup> Bal güüندی ni rën da Dadan, gaquidi quijb da bejnan, din guza't ree bejn laaman zagdxe. <sup>9</sup> Rēnan lëjt zi'c rën da Dadan naj, gol basaaladx rēnan lëjt. <sup>10</sup> Bal guzoobidi da diidxan, gusaaladxidi rēnan lëjt, zi'cgajc ruzoban xtiidx da Dadan, ragbeen rēnman naj.

<sup>11</sup> 'Rnin lojdi zian din chu' luxdoodi zagdxe zi'c yu' luxdon zagdxe, zagdxe da't chu' luxdoodi. <sup>12</sup> Gol guyën lasa'di zi'c rēnan lëjt, laan rniabeen güüندی. <sup>13</sup> Achut rën xmiw mazri guial loj Bén rējt por laa reeman. <sup>14</sup> Lëjt naj da miwan bal güüندی ni rēnan. <sup>15</sup> Ad zanetran lëjt mojs, din mojs ad ragbeetaman xhie rüjn Bén rniabee laaman. Ganen lëjt miw, din balün lëjt graczi ni na da Dadan lon. <sup>16</sup> Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rēnman, din guneeman graczi ni guiniabidi por naj. <sup>17</sup> Rniabeen: Guiën lasa'di.

### *Ralen ree bejn Jesús con ree xbejnman*

<sup>18</sup> Rēb tēē Jesús:

—Bal ralen ree bénguidxliuj lëjt, gol basaaladx, yaløj naj balen reeman. <sup>19</sup> Bal niajquidi bénguidxliuj, niën reeman lëjt zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj. <sup>20</sup> Gol basaaladx ni rnin: “Achut mojs naj mazri guial loj Bén rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da diidxan, ziangajc guzoob reeman xtiidxidi. <sup>21</sup> Graczi nine güünnë reeman lëjt por naj, din ad nünbeet reeman Bén guxhaal naj.

<sup>22</sup> 'Achut xtol reeman niu, bal idan nial ninienë'n laa reeman, per yan yu' xtol reeman. <sup>23</sup> Bén ralen naj, nēgajc da Dadan ralenman. <sup>24</sup> Achet xtol reeman niu, bal idan nün ree ni benan loj reeman ni achutczí wayüjn, per ma baguiaa reeman laa reen, majsi zian ralen gajc reeman naj nē da Dadan. <sup>25</sup> Per rajc zian din gac cumplid ni ca loj xley reeman, rēban: “Achut rünan ralen reeman naj.”

<sup>26</sup> 'Per chi gui't Sprijt gaxhalan din sunëman lëjt gulüü tēēman diidxli, Sprijt zēēd loj da Dadan, laaman gü da diidxan. <sup>27</sup> Nēgajc lëjt gü laan, din diizd yaløj za'nëdi naj.

## 16

<sup>1</sup> 'Rnin zian, din ad zabëjzt chililadxidi naj. <sup>2</sup> Yabëë reeman lëjt lod ricaagdiajg reeman xtiidx Dios, zadxin dxej, chutëëz bën gugüjt lëjt naladx reeman Dios cayüjn reeman wen. <sup>3</sup> Güün reeman zian din ad nünbeet reeman naj ni'qui da Dadan. <sup>4</sup> Per ma rnin lëjt, din chi guidxin dxej guin gusaaladxidi guial ma bagojnan lëjt.

*Ni rüjn xSprijt Dios*

'Ad rnitan lojdi zian diizd yaloj, din naj guzunë' lëjt. <sup>5</sup> Per yan yaya'n loj bën guxhaal naj. Achutzidi rniabdiidx ban gan, <sup>6</sup> aal yu'nayadi guial canin zian. <sup>7</sup> Per diidxliczi rnin: zagdxe najn yaya'n. Din bal idan yaya', ad zi'tt xSprijt Dios sunë lëjt, per bal yaya'n, naj gaxhal laaman. <sup>8</sup> Chi gui'taman, laaman guluü ree bénguidxliuj ni naj dol, ni naj ni zagdxe, në xguialguxtis Dios. <sup>9</sup> Gagbee reeman yu' xtol reeman, guial ad rliladxt reeman naj. <sup>10</sup> Ni zagdxe guin naj guial yaya' loj da Dadan din ad zuguaatrudi naj. <sup>11</sup> Guiáad Dios ma been xguialguxtisaman con xindxab rniabee guidxliuj.

<sup>12</sup> 'Yu'ri ni rënan ganin, per dád zien gacan par lëjt. <sup>13</sup> Chi gui't Sprijt guluü lëjt diidxli, din ad züt xtiidx gajcaman, guinieeman graczi ni guienman, laaman guluü lëjt ni gac. <sup>14</sup> Guza'taman naj zagdxe, din naj gudëd ni guluüman lëjt. <sup>15</sup> Graczi ni rajp da Dadan naj par naj, zeel rnin, Sprijt guin tia' ni gudëdan din guluüman laan lëjt.

*Guguaa ree xbejn Jesús laaman zatijb*

<sup>16</sup> 'Ma guidxin dxej ad zuguaatrudi naj, per ad zajct xchej, guguaadi naj stijb.

<sup>17</sup> Chi rëb Jesús zian, dxel guzuloj ree xbejnman canabdiidx loj lasa' reeman, rëb reeman:

—¿Chexc zeel naman, ma guidxin dxej ad zaguaatri reeman, per ad zajct xchej, yaguaa reeman stijb, din yaguaaj loj xDadaman? <sup>18</sup> ¿Chexc zeel naman: “Ad zajct xchej”? Ad rayignia't ree ni caneeman.

<sup>19</sup> Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zuguaatrudi naj, per ad zajct xchej, guguaadi naj stijb. ¿Ni nen canabdiidxidi ya? <sup>20</sup> Diidxli ganin, goondi chu' tëë luxdoodi naya, guiáad ree bénguidxliuj yabaa reeman. Per majsi chu' luxdoodi naya, guidxin dxej yabaadi. <sup>21</sup> Chi gal xi'n béngunaa, rdëdaman tarbajw, din ma bidxin hor guin. Per chi ma gojl xi'nman, dxel rayanlaxaman tarbajw guin, ru luxdoodi zagdxe, guial ma gojl xi'nman. <sup>22</sup> Ziangajc lëjt cadëdidi tarbajw yan, per chi guguan lëjt zatijb, chu' luxdoodi zagdxe, achutzidi zajc yabëë laan luxdoodi.

<sup>23</sup> 'Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeaman. <sup>24</sup> Guiáad yan achet wanabidi por naj, gol gunaban din tia'dan, din chu' luxdoodi zagdxe tiblayaa.

*Yaguaaj Jesús lod guzaman*

<sup>25</sup> Rëb tëë Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdxe xcwent da Dadan. <sup>26</sup> Dxej zii ree guiniabidi loj da Dadan por naj, ad rüjnt naguiejn ganaaban por lëjt lojman, <sup>27</sup> din rënman lëjt, rënman lëjt guial rëndi naj rliladx tëëdi guial laaman guxhaal naj. <sup>28</sup> Briin lod za' da Dadan persi bialan loj guidxliuj guie, yan gusa'n nan laan din yaya'n lojman.

<sup>29</sup> Dxel rëb ree xbejnman:

—Yanri ma cusignia'l zagdxe. <sup>30</sup> Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxan guxhaal Dios lüj.

<sup>31</sup> Badxi' Jesús laan rëbaman:

—¿Ma rliladxidi yan ya? <sup>32</sup> Gol gogbee, ma bidxin hor yare'chidi, tijb gajdi yaguaaj lidx, gusa'ndi da xtijban. Per ad za't da xtijban, da Dadan za'në naj. <sup>33</sup> Rnin gra nine din cwedi zagdxe guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

## 17

*Gurejdx gunab Jesús xDadaman por ree xbejnman*

<sup>1</sup> Chi gulox rëb Jesús zian loj ree xbejnman, dxel baguiaaman xanyabaa rëbaman:

—Dad, ma bidxin hor, balüü da guialrniabeen din gulün xguialrniabeel. <sup>2</sup> Baneel guialrniabee lon din ganabeen gra bejn gudëd tëen guialnaban tiblayaa loj gra bën baneel. <sup>3</sup> Guiban reeman tiblayaa bal güünbee reeman lüj, tijbzi lüj naj quijb Dios, güünbee tëë reeman najn guxhaalil.

<sup>4</sup> 'Naj bazat lüj zagdxe loj guidxliuj; yan ma gulox benan ni nal. <sup>5</sup> Yan, Dad, yaguialan lojl, din yaneel guialrniabee ca'n gocli, diizd chi gad guidxliuj gacchaaw.

<sup>6</sup> Rëb tëë Jesús:

—Bën gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil. <sup>7</sup> Yan ma gogbee reeman guial gra ni benan gra tëë ni balün naj xieenl. <sup>8</sup> Gunen xtiidxil ni baneel, zeel bacaagdiajg reeman laan, gogbee reeman, walian lojl guzaan, bililadx tëë reeman lüj guxhaal naj.

<sup>9</sup> Rbedx rniaaban lüj por laa reeman, guial naj reeman xbejnl baneel tëë laa reeman lon, ad rbedx rniaabtan por ree bénguidxliuj. <sup>10</sup> Gra ni ca'n naj xieenl, guiáad gra ni ca'l naj da xieenan, ma rguien da guialrniabeen por ree bën baneel.

<sup>11</sup> 'Ad zazutran loj guidxliuj, per laa reeman suri reeman guie, guiáad naj yazaan din yaguialan lod za'l. Dad, lüj naj bën naya nali, gunaj reeman con gra guialrniabee ca'l ni baneel tëë lon, din gac reeman tijbzi zi'c nayajc. <sup>12</sup> Chi guzunë'n laa reeman loj guidxliuj, gunan laa reeman con xguialrniabeel ni baneel. Achut reeman bizëëb, tijbzi xin ma naj diidx bizëëb, din gac cumplid ni ca loj xtiidxil.

<sup>13</sup> 'Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdxe, zi'c yu' luxdon zagdxe. <sup>14</sup> Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj. <sup>15</sup> Ad rniaabtan yabëë laa reeman loj guidxliuj, rënan guinial laa reeman, chitëë güün reeman ni mal. <sup>16</sup> Ad najt reeman bénguidxliuj, zi'cgajc naj. <sup>17</sup> Basia reeman con xtiidxil, din laan naj ni diidxli. <sup>18</sup> Zi'c guxhaalil naj loj ree bénguidxliuj, ziangajc rixhial ree da bejnan loj reeman. <sup>19</sup> Por laa reeman rudëd da guialnabanan din gac reeman xbejnl diidxliczi.

<sup>20</sup> Basnuu Jesús, rëbaman:

—Ad por laatzi reeman rbedx rniaaban lüj, në por ree bën chililadx chi gucaagdiajg reeman ni guinee reeman. <sup>21</sup> Rniaaban lojl din guchajg lasa' reeman din yayajcnë' reeman tijbzi, Dad, zi'c za'në' naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj. <sup>22</sup> Badëdan guialrniabee baneel loj reeman, din gac reeman tijbzi zi'c nayajc, <sup>23</sup> naj za'në' laa reeman, guiáad lüj za'në' naj. Zeel gac reeman tijbzi din gagbee ree bejn, lüj guxhaal naj rën tëë laa reeman zi'c rënl naj.

<sup>24</sup> 'Dad, lüj baneel laa reeman lon, zeel rënan su reeman lod gazun din guguaa reeman biani baneel lon, din guyënl naj diizd chi gad guidxliuj gacchaaw. <sup>25</sup> Dad, lüj rüjn guialguxtis zagdxe. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. <sup>26</sup> Balün laa reeman chu najl, gulüran laa reeman mazri, din gagbee reeman rënl laa reeman zi'c rënl naj, gazunë' tëen laa reeman.

## 18

*Bayü Judas Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Chi gulox gunee Jesús zian, dxel briinë ree xbejnman, zë reeman stiblad ro' guiw la Cedrón, bidxin reeman lod yu' ree yag. <sup>2</sup> Në Judas, xin yayü laaman, nünbee yagaj, guial zien volt binëman laa reeman ni. <sup>3</sup> Zeel bidxinnëx tibcwaa ree suldad në ree bën rajp ro' yadoo, guxhaal quijb ree bixhioz laa reeman në ree bënfarisew, ca' reeman bajl rusni ree, në ree espad con ree lans. <sup>4</sup> Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguiilidi?

<sup>5</sup> Badxi' reeman laan rëb reeman:

—Jesús bén Nazaret.

Abi' rëbaman loj reeman:

—Najn.

Judas xin bayü laaman bidxinnë laa reeman. <sup>6</sup> Chi rëbaman loj reeman: “Najn”, dxel baguiadruxan reeman biajb reeman luyuj. <sup>7</sup> Gunabdiidxaman zatijb rëbaman:

—¿Chu raguiilidi?

Rëb reeman:

—Jesús bén Nazaret.

<sup>8</sup> Zeel rëbaman:

—Ma rnin, najn. Bal naj raguiilidi, gol baslaa ree bén guie yaguiaj reeman.

<sup>9</sup> Zian gojc cumplid ni rëb loj xDadaman: “Achut ree bén baneel lon bizëëb.” <sup>10</sup> Dxel gulëë Bëd espad, gutü'man guidiajg ladbee xin la Malco, najx xmojs quijb bixhioz zojbloj.

<sup>11</sup> Dxel rëb Jesús loj Bëd:

—Bagu'chaaw espad zii. Bal rën da Dadan gazaagdiajn zian, gaza'canan.

#### *Biniaaz Jesús*

(Mt. 26:57-58; Mr. 14:53-54; Lc. 22:54)

<sup>12</sup> Suldad guin ree con xin rniabee laa reex con ree bén rajp ro' yadoo gunaaz reeman Jesús, guxhii reeman laaman. <sup>13</sup> Dxel binë reeman laaman yaloj lidx bén la Anás, din laaman naj xdadsuegr Caifás quijb bixhioz zojbloj loj ijz zii. <sup>14</sup> Laagajcaman rëb loj gabilt, mazri zagdxe guiët tijbzi bejn por gra ree bén Israel.

#### *Rëb Bëd ad najtaman xbejn Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Tio'p ree xbejn Jesús binal laaman. Tijbaman la Simón, bén rniee reeman Bëd, stibaman naj bén nünbee quijb bixhioz zojbloj, zeel gyunëman Jesús lënu guin, <sup>16</sup> guiáad Bëd baya'nman lule'. Zeel barrii bén nünbee bén rniabee ree bixhioz, guneenëman biin rajp ro' port guin, persi guyu Bëd lënu. <sup>17</sup> Gunabdiidxim lojman rëbim:

—¿Nid lüjn naj tijb xbejn bén guin ya?

Badxi'man laan rëbaman:

—Ad najtan.

<sup>18</sup> Per guial dád nayaag, zeel bén naj ree mojs con ree bén rajp ro' yadoo nabe'c reeman guij rucha' reeman. Nëgajc Bëd cucha'në reeman rudëj guin.

#### *Gunabdiidx Anás loj Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Guzuloj bén la Anás canabdiidxaman loj Jesús xcwent ree xbejnman në xcwent ni rulüüman. <sup>20</sup> Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadooro' ree, lod rado'p dugra ree. Achet ni gunen ralan. <sup>21</sup> ¿Chexc zeel rniabdiidxil lon? Gunabdiidx loj ree bén bacaagdiajg ni rën, laa reeman na xhie gunen, laa reeman ragbee.

<sup>22</sup> Chi rëbaman zian, tijb bén rajp ro' yadoo guin wëëz ro'man, rëbaman:

—¿Zian yadxi'l xtiidx bén rniabee guin ya?

<sup>23</sup> Badxi' Jesús laan rëbaman:

—Bal xhie ni mal rën, guna xhienin. Per bal gunen zagdxe, ¿chexc zeel rguinl naj?

<sup>24</sup> Dxel guidib naxiiman guxhaal Anás laaman loj Caifás, bén naj quijb bixhioz zojbloj.

#### *Rëb Bëd stijb ad nünbeetaman Jesús*

(Mt. 26:71-75; Mr. 14:69-72; Lc. 22:58-62)

<sup>25</sup> Per Bëd sta za'man cucha'man rudëj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn bén guin ya?

Badxi' Bëd laan rëbaman:

—A'n, ad xbejntaman naj.

<sup>26</sup> Dxel tijb xmojs bixhioz zobjloj guin, bén naj lasa' bén gutü' Béd guidiajg, rëbaman loj Béd:

—¿Nid lüjn baguian ya za'nël laaman guia' ree yag olivos?

<sup>27</sup> Rëb Béd stijb guial ad nünbeetaman Jesús, loj hor zii gajc guridxa' tijb guid.

*Binë reeman Jesús loj Pilato*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Chi bani luyuj, bazanë reeman Jesús lidx Caifás, zinë reeman laaman lën xpalas gobernador Pilato. Per ree bén Israel guin ad guyut reeman lën palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw. <sup>29</sup> Zeel brii Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

<sup>30</sup> Badxi' reeman laan rëb reeman:

—Bal najman benza'c, ad ziant nudnë'n laaman lojl.

<sup>31</sup> Dxel rëb Pilato:

—Gol bignëx, gol been guialguxtis zi'c naj xleydi.

Abi' rëb reeman:

—Per ad naca'tan guialrniabee yanabeen guiët bejn.

<sup>32</sup> Zian gojc cumplid xtiidx Jesús chi bagojnman xhienaag guiëtaman. <sup>33</sup> Bayu Pilato lën palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree bén Israel ya?

<sup>34</sup> Badxi' Jesúsán rëbaman:

—¿Lüjczy rniabdiidx lon ya o yu' ree ben ren na lojl zian?

<sup>35</sup> Badxi' Pilato laan, rëbaman:

—¿Wen bén Israel naj ya? Bén ladx gajc reel con ree bixhioz rniabee bidnë lüj lon. ¿Xhie beenl?

<sup>36</sup> Badxi' Jesúsán rëbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan bén nidijl ree chitëë niniaaz ree ben Israel naj. Per yan ad lojt guidxliuj guie za da guialrniabeen.

<sup>37</sup> Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bén zinal ni diidxli rucaagdiajg reeman ni rnien.

<sup>38</sup> Dxel rëb Pilato:

—¿Xhiezanin naj diidxli?

*Gunabee reeman guiët Jesús*

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bén Israel ree stijb, rëbaman:

—Achet xguialquia xin guin radxejlan. <sup>39</sup> Per lëjt, xcostumbridi naj guial loj lanij pascw laa tijb bén yu' ladxguiib. Yan, ¿rëndi ya guslaan xreydi?

<sup>40</sup> Dxel gurixdiaj ree bén Israel guin, rëb reeman:

—¿Ad laataman guslaal! ¿Zagdxeli baslaa Barrabás!

Abi'za Barrabás guin béngubaanan.

## 19

<sup>1</sup> Dxel gunabee Pilato gudijn ree suldad Jesús. <sup>2</sup> Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's. <sup>3</sup> Dxel gubig reeman lojman, rëbgaj reeman:

—¿Guibanri xrey ree bén Israel!

Dxel rëzgjaj reeman lojman.

<sup>4</sup> Brii Pilato stijb, abi' rëbaman loj ree bën Israel guin:

—Gol baguiaa, gabën laax din gagbeedi, achet xguialquiax radxejlan.

<sup>5</sup> Dxel brii Jesús, yu' coron guiějch guin guijcaman, najcw tēēman lajd xnia guin. Abi' rëb Pilato:

—Laax guie.

<sup>6</sup> Dxel bixhioz rniabee ree nē ree bën rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtolix radxejlan.

<sup>7</sup> Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

<sup>8</sup> Chi biguienman ni rëb reeman, mazri bidxebaman. <sup>9</sup> Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. <sup>10</sup> Zeel rëb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

<sup>11</sup> Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtol bën bidnë naj guie yu' guial lojl.

<sup>12</sup> Diizd hor zii gajc raguiil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—¡Bal guslaal laax, ad najtil xmiw bën naj César! ¡Din chutëez bën rajc rey rzuj contr César!

<sup>13</sup> Chi biguien Pilato rëb reeman zian, gunabeeman babëe reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj. <sup>14</sup> Chi guixiez gal lanij pascw, cost garol dxej rëb Pilato loj ree bën Israel:

—¡Laa xreydi guie!

<sup>15</sup> Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

<sup>16</sup> Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

*Cwa Jesús loj crüjz*

*(Mt. 27:32-44; Mr. 15:21-32; Lc. 23:26-43)*

<sup>17</sup> Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. <sup>18</sup> Ni bacaa reex laaman loj crüjz con zatio'p ree bejn, tijb gaj reeman ca cwë'man. <sup>19</sup> Gunabee Pilato cwa lejtr guijc crüjz guin, rëban: “Jesús bën Nazaret, xrey ree bën Israel.” <sup>20</sup> Dád zien ree bën Israel biil lejtr guin, guial naj luar zii gajxh loj ciuda, guiaád lejtr guin can con diidx hebreo, diidx latin nē diidx grieg. <sup>21</sup> Rëb ree bixhioz rniabee ree bixhioz loj Pilato:

—Ad rucaal: “Xrey ree bën Israel”, bacaa: “Bën rëb naj xrey ree bën Israel.”

<sup>22</sup> Badxi' Pilato laan rëbaman:

—Ni ma bacan yaya'nan zian.

<sup>23</sup> Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn. Nē stijb xabaman cwa' reex, ad nadiibtan, najcchaaw diizd yějnan xt guia'n, najn tijbzi lajd. <sup>24</sup> Zeel rëb loj lasa' reex:

—Ad zaroxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudxijt tëë reeman suert guijcan.” Zeel been ree xinsuldad guin zian.

<sup>25</sup> Gajxh cwë' crüjz ca Jesús za' xniaaman con xbël xniaaman con Li xbéngunaa Cleofas con Li bën gunee reeman Magdalena. <sup>26</sup> Chi baguiaa Jesús xniaaman, za' tijb ree xbejnman cwë'man, bën rën da'taman, rëb loj xniaaman:

—Na, laa xi'nl yagaj.

<sup>27</sup> Dxel rëb loj xbejnman:

—Laa xniaal yagaj.

Diizd dxej zii bignëman xniaa Jesús lidxaman.

### *Güjt Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

<sup>29</sup> Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. <sup>30</sup> Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

### *Guliiz tijb suldad guiib cwë'lën Jesús*

<sup>31</sup> Ma cayüjn ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüjz dxej raziiladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bën ca loj crüjz din guiët reeman yalet tëë reex laa reeman. <sup>32</sup> Zeel wej reex. Yaloj gudi'ch reex xdxijt bën ca cwë' Jesús, dxel gudi'ch reex xdxijt bën ca stiblad cwë'man. <sup>33</sup> Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

<sup>34</sup> Per tijb suldad guin guxhal ladaman con guiib ca'x, dxel briin rejn con nijs. <sup>35</sup> Bën rü diidx guie baguiaaman, zeel ragbeeman najn diidxli, rüman laan din në lëjt chililadx. <sup>36</sup> Gra nine gojc din gac cumplid ni ca loj xtiidx Dios, rëban: “Ad rayalt gach xdxijt xiildoo.” <sup>37</sup> Stibljajt rëb: “Guguaa reeman bën guxhalnë reeman guiib lad.”

### *Biguie'ch Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Chi gulox gojc zian, wej Xiëb, bën zëed guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Në bën la Xiëb bililadx Jesús, per ralanzi, guial bidxebaman bejn ree. Badëed Pilato diidxbee, zeel wej Xiëb bigxiiman xcuerp Jesús. <sup>39</sup> Në Nicodemo wej, bën bigneenë Jesús tijb guxhin, bidxinnëman cost gajlbichii quil ni la mirra, no'chan aloe, rureen nejxh. <sup>40</sup> Bagajdxnë reeman laan lajd batüüb reeman laaman, zi'c rüjn ree bën Israel chi ruquie'ch reeman bengüt. <sup>41</sup> Lod cwa Jesús loj crüjz naga' tijb guidxliuj lod yu' ree yag. Yagaj naj tijb baa cüb lod achutczi waguie'ch. <sup>42</sup> Yagaj gudixh reeman xcuerpaman, guial najn gajxh, guial ma suloj tëë dxej raziiladx reeman.

## 20

### *Achetri xcuerp Jesús badxejl*

(Mt. 28:1-10; Mr. 16:1-8; Lc. 24:1-12)

<sup>1</sup> Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. <sup>2</sup> Dxel ruxüünman wejman lod za' Simón Bëd con zatijb xbejn Jesús, bën rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

<sup>3</sup> Abi' brii Béd con bèn guin, zè reeman ro' baa guin. <sup>4</sup> Grop reeman ruxüün zè reeman. Per bèn guin mazri ruxüünman guial loj Béd, abi' yaløj laaman bidxin ro' baa guin. <sup>5</sup> Dxel gudixlojman baguiaaman vend bidüüb Jesús, per ad guyutaman. <sup>6</sup> Dxelri bidxin Simón Béd, abi' guyuman lèn baa guin. Nègajcaman baguiaa vend guin <sup>7</sup> Baguiaa tëëman lajd bidüüb guijc Jesús, nadüüban naga'n lood ren, ad naga'tan tijbzi con vend guin. <sup>8</sup> Dxel guyu bèn bidxin ro' baa guin yaløj, baguiaaman ni goc, zianz bililadxaman, <sup>9</sup> guial gocli ad bignia't reeman ni ca loj xtiidx Dios guial yaban Jesús loj ree bengüt. <sup>10</sup> Dxel zia ree xbejn Jesús lidx reeman.

*Balüüloj Jesús loj María Magdalena*  
(Mr. 16:9-11)

<sup>11</sup> Per Li baya'nman ro' baa guin cayoonman. La'tgaj cayoonman gudixlojman lèn baa guin, <sup>12</sup> abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guijcaman, zatijbaman lod go't guia'man. <sup>13</sup> Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

<sup>14</sup> Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. <sup>15</sup> Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguiilil?

Gunaladx Li, bèn rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'nl laaman din chigxin laaman.

<sup>16</sup> Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

<sup>17</sup> Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bèn naj gajc xDadidi, loj da Diosan bèn naj gajc xDiosidi.

<sup>18</sup> Dxel wej María Magdalena bicojnman xbejn ree Dad Jesús guial baguiaaman laaman, bagojn tëëman laa reeman gra ni rëbaman lojman.

*Balüüloj Jesús loj ree xbejnman*  
(Mt. 28:16-20; Mr. 16:14-18; Lc. 24:36-49)

<sup>19</sup> Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

<sup>20</sup> Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa reeman baguiaa reeman Dad Jesús. <sup>21</sup> Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

<sup>22</sup> Dxel balüjbaman guijc reeman, rëbaman:

—Gol gubajnnë xSprijt Dios. <sup>23</sup> Bén güüнди perdon xtol, chiquied xtol reeman, guiáad bèn ad züjntidi perdon xtol, yaya'nnë xtol reeman.

*Baguiaa Tumajs Jesús*

<sup>24</sup> Tumajs, bèn rniee reeman Cwajch, achut laaman za' chi balüüloj Jesús loj ree xbejnman. <sup>25</sup> Chi rëb reeman loj Tumajs:

—Ma baguiaan Dad Jesús.

Dxel rëbaman:

—Bal id zuguian yaaman lod wëz clav, abi' bal id zagu' da bacwënan lod wëz clav guin, bal id zagu' tëë yan cwë'lënman lod bidxeelguijdx, ad zaliladxtan.



<sup>26</sup> Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyu yu' reeman. Per balüüloj Jesús galay reeman, rëbaman loj reeman:

—Yabe'cdxe Dios luxdoodi.

<sup>27</sup> Dxel rëbaman loj Tumajs:

—Badxe' xbacwënl guie, baguiaa ree yan, baneë yaal guie badxe'n cwë' lënan. Ad runawëëgril, bililadx.

<sup>28</sup> Dxel rëb Tumajs lojman:

—¡Da Dadan, da Diosan!

<sup>29</sup> Abi' rëb Jesús lojman:

—Rliladxil guial ma baguiaal naj. Xiquilbaa ree bën rliladx, majs ad waguiaat reeman naj.

### *Chexc zeel cwa gui'ch guie*

<sup>30</sup> Zienri ree milagr been Jesús loj ree xbejnman, ni ad cwat ree loj gui'ch guie. <sup>31</sup> Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblayaa con Dios.

## 21

### *Balüüloj Jesús loj ree xbejnman ro' nijs*

<sup>1</sup> Chi gudëd gojc zian, balüüloj Jesús loj ree xbejnman zatijb, ro' nijs naj gajxh guiedx Tiberias. Ze balüülojman: <sup>2</sup> Chi nadxag lasa' ree Simón Bëd con Tumajs bën rniee reeman Cwajch, në Natanael bën za Caná guiedx riga' niz Galilea, con ree xi'n Zebedeo, nëtëë zatio'p xbejn Jesús, <sup>3</sup> dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadxo.

Abi' wë'p reeman loj barcw zë reeman, per guxhin zii achutdzi bëjl gunaaz reeman.

<sup>4</sup> Chi ma cayreguiaal, bidxin Jesús ro' nijs guin, per ad bayünbeet reeman laaman. <sup>5</sup> Dxel gunabdiidxaman loj reeman rëbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutdzi.

<sup>6</sup> Abi' rëb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn.

<sup>7</sup> Dxel xbejn Jesús, bën rën da'taman, rëbaman loj Bëd:

—¡Dad Jesúsan!

Biguiejnzi Simón Bëd zian, laa got gajc xabaman ni gulëëman, abi' gutiajsaman lojnijs guin. <sup>8</sup> Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. <sup>9</sup> Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj. <sup>10</sup> Dxel rëb Jesús loj reeman:

—Gol tanë tio'p choon bëjl gunaaz nejzidi.

<sup>11</sup> Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan.

<sup>12</sup> Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bënan, guial ragbee reeman Dad Jesús. <sup>13</sup> Dxel gubigaman cwa'man guiadxtil badëëman loj reeman, ziangajc beenman con bëjl guin. <sup>14</sup> Ni ne bayon volt balüüloj Jesús loj ree xbejnman chi babanman loj ree bengüt.

### *Guneenë Jesús Bëd*

<sup>15</sup> Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rēnl naj mazri guial loj ree bēn guie?

Badxi' Bēdan rēbaman:

—Dad, ragbeequil rēnan lūj.

Zeel rēb Jesús:

—Gunaj ree da xiildoon.

<sup>16</sup> Abi' rēb Jesús zatijb:

—Simón, xi'n Waj, ¿walil ya rēnl naj?

Badxi' Bēdan rēbaman:

—Dad, ragbeequil rēnan lūj.

Zeel rēb Jesús:

—Gunaj ree da xiilan.

<sup>17</sup> Bayon volt gunabdiidx Jesús rēbaman:

—Simón, xi'n Waj, ¿rēnl naj ya?

Dád gyunaya Bēd, guial ma gojc choon volt gunabdiidx Jesús bal rēnman laaman.

Zianz rēb Bēd:

—Dad, lūj ragbee graczi, ragbeel rēnan lūj.

Zeel rēb Jesús:

—Gunaj ree da xiilan. <sup>18</sup> Diidxliczi ganin, chi goquil xinguiag, rajcw xabil persi rejł lod rēnl. Per chi ma najł bengol, gusli xu'quil din guscajcw ben ren xabil din chinē reeman lūj lod ad rēntil chel.

<sup>19</sup> Rēb Jesús zian guial basignia'man xhienaag guiēt Bēd, din güünbee ree bejn Dios.

Dxel rēb Jesús:

—Tanal naj.

*Ni ne bacaa xbejn Jesús bēn guyēn da'taman*

<sup>20</sup> Chi badxi' loj Bēd, baguiaaman laa bēn rēn da't Jesús zinal laa reeman. Laaman gure cwē' Jesús chi gudaw reeman xche, gunabdiidx tēēman loj Jesús rēbaman: “Dad, ¿chu yayü lūj?” <sup>21</sup> Chi baguiaa Bēd laaman, gunabdiidxaman loj Jesús rēbaman:

—Dad, laadxza xin guin, ¿xhie saquix?

<sup>22</sup> Badxi' Jesús rēbaman:

—Bal rēnan guibanx xt yaguialan, ¿xhie güünl? Lūj tanal naj.

<sup>23</sup> Zianan zeel bire'ch diidx loj ree xbejnman guial ad zējtt bēn guin. Per ad ziantan rēb Jesús, rēbaman: “Bal rēnan guibanx xt yaguialan, ¿xhie güünl?”

<sup>24</sup> Bēn guin gajcan rü diidx xcwent ree nine, laa tēēman bacaa laan, rayagbee tēē ree rüman diidxli. <sup>25</sup> Dád zien ree ni been Jesús, bal nitia tijb gajn, wed ad zadaant loj guidxliuj niu ree libr ni niajc.

## Ni been ree xi Apóstoles Jesucrist

<sup>1</sup> Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman <sup>2</sup> xt chi ziaman xanyabaa. Chi gadaman yaguiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. <sup>3</sup> Chi mal guzagdiaj da'taman loj xgualgüjtaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xgualrniabee Dios.

<sup>4</sup> Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi. <sup>5</sup> Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c gualrrirobnis par lējt.

### *Zia Jesús xanyabaa*

<sup>6</sup> Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül gualrniabee loj ree bēn Israel ya?

<sup>7</sup> Badxi' Jesúsán rēbaman:

—Ad lējtít rayal gagbee xhie dxejn o xhie horan gac zian. Tijbzi da Dadan ragbee laan din laaman ca' gualrniabee. <sup>8</sup> Per chi ma nabannēdi xSprijt Dios, tia'di gualrniabee. Dxel griidi chiguiedi diidx loj ree bēn Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zijt da't.

<sup>9</sup> Gulox guneeaman, ruguiaa reeman laaman dxejlczi wajsaman ziaman xanyabaa, abi' biguiajt tijb bēj bata'cwan laaman, dxel ad baguiaatri reeman laaman. <sup>10</sup> La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman, <sup>11</sup> abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguiaad stijb, zi'cgajc baguiaadi ziaman.

<sup>12</sup> Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén. <sup>13</sup> Chi badxin reeman, wē'p reeman lēnü ladya lod zobj reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob. <sup>14</sup> Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree bēngunaa ren.

### *Gulej reeman bēn baya'n xluar Judas*

<sup>15</sup> Lēn ree dxej zii bado'p ree bēn rliladx Jesús, naj reeman cost tibgayuu gajl bejn, dxel guzuli Bēd galay reeman, rēbaman loj reeman:

<sup>16</sup> —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bēn gunaaz laaman, <sup>17</sup> gojquix tijb dux compniaran, nē laax been lasa' dxiin raguieenan. <sup>18</sup> Per con milia ni gudix reeman laax por ni mal beenx, bio' guidxliuj lod guididya'x, bazuj guijquix, goxya'x abi' brii gra xziix. <sup>19</sup> Chi gogbee gra ree bēn Jerusalén ni goc, gunee reeman guidxliuj zii Acéldama, rēn guiēban guidxliuj rejn. <sup>20</sup> Din rēb loj libr la Salmos:

Yaya'n dējch lidxix,

achutcziri cwe lēnan.

Rēb tēē lojn:

Yayu ben ren guia'x.

<sup>21</sup> Zeel loj gra ree bēn za'nē dunuj ree guidib tiamp ni guzunē Jesús dunuj ree, <sup>22</sup> diidx chi baroobnijs Waj laaman xt chi ziaman xanyabaa. Loj gra reeman rayal grii tijbaman

din güünman dunuj ree yudar yaguie'ch ree loj ree bejn guial walican babanman loj ree bengüt.

<sup>23</sup> Dxel gulej reeman tio'p reeman: tijb bén la Xiëb (rniee reeman laaman Barsabás, rniee tëë reeman laaman Justo), gulej tëë reeman bén la Matías. <sup>24</sup> Dxel gurejdx gunab reeman Dios, rëb reeman:

—Dad, lüj nünbee luxdoo gra ree bejn. Balüü chu loj grop reeman gulejl <sup>25</sup> din gacaman apóstol luar Judas, din banijtix delant lojl por dol ni beenx abi' ziax luar ni royalix.

<sup>26</sup> Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

## 2

### *Biguiajt xSprijt Dios diizd xanyabaa*

<sup>1</sup> Chi bidxin dxej gojl lanij la Pentecostés, gra ree bén rliladx Jesucrist bado'p tijbzi luar. <sup>2</sup> Dxejlczj gojc naquie' xanyabaa zi'c bidoxh xt bayu bi lënü lod riga' reeman, <sup>3</sup> abi' gulentie zi'c bajl dobëz ree, biguiajt reen guijc tijb gaj reeman. <sup>4</sup> Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

<sup>5</sup> Lën ree dxej zii za' zien ree bén Israel Jerusalén, baza reeman gra ladczi din cwedx guiniab reeman Dios. <sup>6</sup> Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniee gra ree bén rliladx Jesús xtiidx tijb gaj reeman, ad badxejlt xgab nüjn reeman. <sup>7</sup> Dád badxa loj reeman xt ni'quid badxejlt xhie nüjn reeman, abi' gunabdiidx loj lasa' reeman rëb reeman:

—¿Nid bén Galilea gra ree bén canee guin ya? <sup>8</sup> ¿Chexc zeel raguiejn ree rniee reeman dux tiidx ree? <sup>9</sup> Du loj ree no'ch ree bén zëed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, <sup>10</sup> bén zëed tëë ree guiedx riga' ree niz Frigia, Panfilia, Egipto, në ree guiedx nulen Libia ni riga' ree gajxh Cirene, në ree bén zëed Rom, yu' reeman gojl Israel per naban reeman Rom, yu' tëë reeman naj quijb ben Rom per rliladx reeman ni rliladx ree bén Israel. <sup>11</sup> Në ree bén zëed niz Creta nëtëë ree bén zëed guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza'cdxoon rüjn Dios!

<sup>12</sup> Graczi reeman badxa da't loj xt ni'quid badxejlt xgab nüjn reeman, abi' guzuloj canabdiidx loj lasa' reeman rëb reeman:

—¿Xhie rën guiëb gra ni guie?

<sup>13</sup> Per garol reeman baze' laa reeman, rëb reeman:

—Rë' reeman.

### *Ni rëb Bëd loj ree bejn*

<sup>14</sup> Dxel guzulü Bëd con zachibtib ree apóstoles guin, guneeman rejs rëbaman:

—Lëjt bén Judea në graczi ree bén zojb Jerusalén, gol bacaagdiajg gol bignia' tëë ni ganin. <sup>15</sup> Ad rë't ree bén guin zi'c naladxidi, dín qui gojlri raca gaa rsil. <sup>16</sup> Guie cayajc cumplid ni guneë bén brii laj Joel, bén badëë xtiidx Dios loj ree bejn, chi rëbaman:

<sup>17</sup> Na Dios,

guidxin dxej gaxhal da Sprijtan luxdoo gra ree bejn,  
abi' xi'ndi xinguaaw con biingunaa gudëëd reex da diidxan,

zien ree ni gulüüloj loj ree xinguiag,

guiáad ree bengol zien ree ni guinie'xhaal reeman.

<sup>18</sup> Dxej zii ree gaxhal da Sprijtan luxdoo ree bén rüjn da dxiinan,

xinguaaw ree në ree béngunaa,

abi' gudëëd reeman da diidxan.

<sup>19</sup> Gulün sen ree xanyabaa ni yadxa lojdi,

guiáad loj guidxliuj gulün sen ree

zi'c rejn në bajl nëtëë go'xh.

<sup>20</sup> Guicajy loj gubijdx, guiáad bëëw yayajcan zi'c rejn.

Chi ma gojc zian, dxel guidxin quijb dxej guin,  
dxej za'cdxoon gui't Dios b n rniabee,  
dxej guiguien guidib xbianiman.

<sup>21</sup> Abi' graczi ree b n cwedx guiniab laaman  
g nman laa reeman perdon.

<sup>22</sup> R b t e B d loj reeman:

—Yan, gol bacaagdiajg ni ganin l jt b n Israel: L jt ragbee guial Jes s b n Nazaret najman b n guxhaal Dios, been t eman milagr ree n  ree ni radxa loj ree bejn zi'c sen din gagbeedi guial Dios guxhaal laaman. <sup>23</sup> Diizd gocli mal n jn Dios xgab guial zian g nn di Jes s, gunaazidi laaman bay di laaman loj ree benmal, din gug jt reeman laaman loj cr jz. <sup>24</sup> Per basban Dios laaman stijb, bab eman laaman loj guialg jt, din ad gojct nut e guialg jt guin laaman. <sup>25</sup> Chi gunee rey Davi xcwent Jes s, r baman:

Zianczi baguian dux Dad ree Dios za'n man naj.

Za'man da ladbeen, achetczi zajc guchejb naj.

<sup>26</sup> Zeel yu' luxdon nix, ruzat t en Dios zagdxe.

majsi gui tan ad rdxebtan,

<sup>27</sup> din ad zusa'ntil naj l n baa,

ad zati jbtill xhin xcuerp xi'nl b n naya nali.

<sup>28</sup> Bal  l naj nejb runee guialnaban,

chu' t e luxdon zagdxe guial guibann l naj.

<sup>29</sup> Basnuu gunee B d, r baman:

—Ganin loj gradi compniar, diidxiczi dux b ngulal ree Davi g jtaman bigue'ch t eman, abi' laa xbaaman sta raguiiaa ree yan. <sup>30</sup> Per gojcaman b n bad e xtiidx Dios loj ree bejn, abi' gogbeeman been Dios promejs guial loj xdiaaman grii Cristo b n nabee. <sup>31</sup> Rul   ma cuguiaaman gra ni gac, r baman guial yaban Cristo loj ree beng t, ad zaya'ntaman l n baa ad zaxin t et xcuerpaman. <sup>32</sup> Yan ma basban Dios Jes s, dugran nayajc testiw guial walian babanman. <sup>33</sup> Zia t eman xanyabaa zisobaman xladbee Dios, persi bad e xSprijt Dios lojman zi'c ma r baman, yan ma guxhaal Jes s Sprijt guin loj guidxliuj, por laaman cayajc ni cuguiaadi caguiejn t edi. <sup>34</sup> Ad Davitan zia xanyabaa, din laagajcaman r b:

R b dux Dad ree Dios loj b n rniabee naj:

“Gurej da ladbeen,

<sup>35</sup> xt gabecan xin rdxe'ch ree l j guial'.”

<sup>36</sup> 'Gradi b n Israel gol gogbee guial Jes s b n bacaadi loj cr jz, Dios bacaabee laaman din gacaman Dad, b n nabee dunuj ree.

### *Bachajg zien ree bejn b n rliladx ree Jes s*

<sup>37</sup> Chi bigueijn ree b n riga' yagaj ni r b B d, d d guyu naya luxdoo reeman. Abi' gunabdiidx reeman lojman n  loj los demazri ree ap stoles guin, r b reeman:

—Dad, gol guna,  xhie rayal yaguieenan?

<sup>38</sup> Dxel r b B d loj reeman:

—Gol bayagbee xtolidi, gol badxi' t e lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi. <sup>39</sup> Din promejs guin naj par l jt n  par ree xi'ndi n  par gra ree b n riga' zijt, par gra ree b n cwe Dios par laaman.

<sup>40</sup> Con ree diidx guie n  mazri ree diidx ren guneen  B d laa reeman, r baman:

— Gol bariica loj ree b n r jn ni mal!

<sup>41</sup> Zian gojc, graczi b n bazoob diidx ni r baman gurobnijs. Dxej zii gajc bachajg cost choon mil bejn b n rliladx ree Jes s. <sup>42</sup> Graczi reeman binal ni bal   ree xi ap stoles Jes s laa reeman, gubajnn  lasa' reeman zagdxe, gurejdx gunab reeman Dios abi' rado'p reeman persi raw reeman guiadxtill tijbzi zi'c gunabee Jesucrist g n reeman.

### *Ze gubajn ree b n bililadx Jes s yaloj*

<sup>43</sup> Graczi ree bejn radxa da't loj milagr në los demazri ree ni been ree apóstoles guin. <sup>44</sup> Graczi ree bèn bililadx Jesucrist gubajnnë lasa' zagdxë, rgui's tëë ni rajp reeman loj lasa' reeman. <sup>45</sup> Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman. <sup>46</sup> Guixie guixie rado'p reeman lèn yadooro' Jerusalén, dxel raguij reeman lidx xcompniar reeman rtaw reeman, dád nix yu' luxdoo reeman rën tëë lasa' reeman, <sup>47</sup> ruza't reeman Dios zagdxë, guiáad gra bejn guyën laa reeman. Guixie guixie ragnë Dios din gacxhiey mazri bèn rliladx Jesucrist, persi gojc xtol reeman perdon.

### 3

#### *Bayajc tijb bèn ad rajct rza*

<sup>1</sup> Tijb dxëj zë ree Béd con Waj lèn yadooro' Jerusalén raca choon wadxe, hor zii naj hor ni rbejdx rniab reeman Dios. <sup>2</sup> Ro' xport yadoo guin zojb tijb bèn ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bèn ru lèn yadoo guin. <sup>3</sup> Chi baguiaaman Béd con Waj ma chu' reeman lèn yadoo guin, gunabaman carda loj reeman. <sup>4</sup> Baguiaa reeman lojman, dxel rëb Béd lojman:

—Baguiaa du lojn.

<sup>5</sup> Chi biguiejnman rëb Béd zian, dxel baguiaaman loj reeman, naladxaman milia nudëed reeman lojman. <sup>6</sup> Per rëb Béd:

—Ad ra'ptan plajt ni'qui or par gunen lojl, per ni zajc gūnan por lūj gūnanan: Por xguialrniabee Jesucrist bèn Nazaret, guzuli, guza.

<sup>7</sup> Dxel gūnaazaman yaaman ladbee, bazuliman laaman. Loj hor zii gajc guyu ree guia'man gojl, <sup>8</sup> abi' gutiajsaman, guzuliman guzuloj cazaman. Dxel gūyunēman laa reeman lèn yadoo guin, cazaman, catiajsaman cuza't tëēman Dios zagdxë. <sup>9</sup> Graczi ree bèn cūguiaa laaman cazaman cuza't tëēman Dios zagdxë, <sup>10</sup> dád badxa loj reeman bidxeb tëë reeman guial gojc zian guial nūnbee reeman bèn guin, ragbee tëë reeman laaman rbej ro' xport yadoo guin ni la Port Za'cdxoon, rniabaman carda.

#### *Gūnee Béd loj ree bejn lod la xcurdur Salomón*

<sup>11</sup> Ad riro'nladxt bèn bayajc guin Béd con Waj. Dád badxa loj ree bejn, abi' baxūūn reeman wej reeman lod la xcurdur Salomón lod za' ree Béd con Waj. <sup>12</sup> Chi baguiaa Béd zian, rëbaman loj reeman:

—Bèn Israel, ¿chexc zeel radxa lojdi ni goc? Ad naladxidi por dunujn rza bèn guie guial naca'n guialrniabee o guial nayajcan naya delant loj Dios ya. <sup>13</sup> XDios dux bēngulal ree Abraham, Isaac në Jacob, laaman badëë guialrniabee loj Jesús, bèn bayüdi loj guxtis. Abi' chi guyën Pilato nuslaaman laaman, ad cwëjbtidi. <sup>14</sup> Luar niniabidi nuslaa Pilato bèn naya nali, bèn rüjn zi'c rayal, gunabidi baslaaman tijb xin bagüjt bejn. <sup>15</sup> Zian bagüjtidi bèn runee guialnaban. Per basban Dios laaman stijb, abi' dunujn nayajc testiw guial babanman. <sup>16</sup> Bèn guie, bèn ruguiaadi nūnbee tëēdi, guyu gojl guia'man por xguialrniabee Jesucrist, bayajcaman guial baliduladxan, zi'c ruguiaa graczi.

<sup>17</sup> Ganin lëjt compniar, ragbeen guial lëjt con ree bèn rniabee lëjt ni'quid gogbeetidi xhienin beendi chi bagüjtidi Jesús. <sup>18</sup> Per zian been Dios persi gojc cumplid ni rëbaman loj ree bèn badëë xtiidxaman loj ree bejn diizd gocli guial sagdiaj Cristo. <sup>19</sup> Zeel gol bayagbee xtolidi gol badxi' tëë lojdi loj Dios din gūnman xtolidi perdon. Dxel yayaalyuj luxdoodi, <sup>20</sup> guixhiaal tëēman Jesús stijb, bèn naj Cristo diizd gocli par lëjt, <sup>21</sup> majsi yan rayalri suman xanyabaa, xt ma bazuxnejz Dios gra, zi'c rëbaman loj ree bèn badëë xtiidxaman loj ree bejn diizd gocli, bèn gubajn ree naya delant lojman. <sup>22</sup> Abi' rëb Moisejs loj ree dux bēngulal ree: “Loj xdiaadi cwëë Dios tijb bèn gudëë xtiidxaman loj ree bejn zi'c naj, gol bazoob xtiidxaman graczi ni naman lojdi, <sup>23</sup> din graczi ree bèn ad zuzoobt xtiidxaman nit reeman, ad zajc tëëtri reeman cwent zi'c xbejn Dios.”

<sup>24</sup> 'Gra ree b n bad ed xtiidx Dios loj ree bejn, diizd Samuel con los demazri ree b n bad e xtiidx Dios diizd gulal, mal bagojn reeman ni cayajc ree l n ree dxej guie. <sup>25</sup> L jt naj xdiaa reeman, lojdi gac cumplid ni cw b Dios loj ree dux b ngulal ree chi r baman loj Abraham: "Por xdiaal g nle'n gra ree b nguidxliuj." <sup>26</sup> Abi' chi basban Dios xi'nman Jesucrist, yaloz lojdi guxhaalaman laaman din g  nle'man l jt din yab ecaman gradi loj ni mal r jndi.

## 4

*Bazuj reeman B d con Waj loj ree guxtis*

<sup>1</sup> Sta canee ree B d con Waj loj ree bejn, chi bidxin ree xbixhioz ree b n Israel n  suldad rniabee suldad rniaj ree ro' yadooro' Jerusal n, n t e ree b nsaducew. <sup>2</sup> D d ralen reeman guial cul   ree B d con Waj bejn ree, r b reeman guial yaban ree bejn loj ree beng t, din laan ma baguiaa reeman chi baban Jesucrist. <sup>3</sup> Zeel gunaaz reeman laa reeman, per guial ma gudxe, zeel badxe' reeman laa reeman ladxguiib la'tgaj rareguiaal. <sup>4</sup> Per d d zien ree b n bacaagdiajg ni r b ree B d con Waj bililadx xtiidx Dios, gojc reeman cost gaay mil xinguaaw xcwentqui ree b ngunaa.

<sup>5</sup> Chi bareguiaal, guxtis Jerusal n n  ree bengol n  ree mextr ruli  ley, bado'p reeman loj ciuda guin. <sup>6</sup> N  An s bidxin yagaj, b n naj bixhioz mazri zojbloj rniabee graczi ree bixhioz, bidxin t e bixhioz la Caif s n  Waj n  Lejandr, n t e gra ree b n naj lasa' ree bixhioz rniabee guin. <sup>7</sup> Gunabee reeman bica' reeman B d con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, r b reeman:

—  Chu banee diidxbee o chu por r jndi ni guin?

<sup>8</sup> Per guial yu' xSprijt Dios luxdoo B d d d gogn man laaman, zeel r baman:

—Gol bacaagdiajg ni ganin l jt bengol n  l jt guxtis, <sup>9</sup> rniabdiidxidi dunujn xhienaag baguieenan b ngogxuu guin yudar, xhie t e naag gojc zeel bayajcaman. <sup>10</sup> Yanan lojdi din gagbeedi gagbee t e gra b n Israel xhienaag bayajc b n za' lojdi. Bayajcaman por xguialrniabee Jesucrist b n Nazaret, b n bacaadi loj cr jz abi' basban Dios laaman stijb. <sup>11</sup> Beenn di laaman zi'c r jn ree b n r jn yu chi rb e'go'n reeman tijb guiaj, dxel qui ragbeeri reeman guial guiaj guin naj ni mazri lasajc par gacn  yu guin. <sup>12</sup> Achut ben ren r jn dux tol ree perdon, tijbzi Jes s, din achut mazri guxhaal Dios loj guidxliuj din g  nman dunuj ree perdon.

<sup>13</sup> Chi baguiaa ree guxtis guin ad rdxebt ree B d con Waj guial rniee reeman, abi' gogbee reeman ad b n basiidt ree mazran achu t et naj reeman, badxa loj reeman bay nbee t e reeman laa reeman guial b n binal ree Jes san. <sup>14</sup> Abi' yagaj gajc za' b n bayajc guin, zeel ad bile'tri xhie ni jb reeman contr laa reeman. <sup>15</sup> Dxel gunabee ree guxtis guin barii ree B d con Waj din yaya'n laaz reeman din g  reeman diidx. <sup>16</sup> R b reeman:

—  Xhienaag yaguieenn ' ree xin guin ree? Graczi ree b n Jerusal n ma ragbee milagr been reex. Abi' ad zajct yarexuu ree. <sup>17</sup> Per chit e guire'ch xtiidx Jes s, yachejb reex din diizd yan achutziri loj guza't reex laax.

<sup>18</sup> Dxel gurejdx reeman laa reeman gunabee reeman chit e churi loj guza't reeman Jes s, ad guli  t eri reeman xtiidxaman. <sup>19</sup> Per badxi' B d con Waj laan, r b reeman:

—L jt gajc gol been xgab:  Zagdxre naj yazooban xtiidxidi luar yazooban xtiidx Dios ya? <sup>20</sup> Per ad zajct yacw ez yaguie'chan gra ni baguiaan baguiejn t en.

<sup>21</sup> Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nud ed reeman laa reeman casti, din graczi ree bejn ruza't Dios zagdxre por ni goc. <sup>22</sup> Nad d tiuu ijz yu' b n bayajc guin.

*Rbejdx ree b n rliladx Jes s Dios*

<sup>23</sup> Chi baslaa ree guxtis guin B d con Waj, baguiaj reeman lod riga' xcompniar reeman b n rliladx ree Jesucrist, abi' be reeman diidx ni r b ree bixhioz rniabee ree bixhioz n  ree bengol rniabee. <sup>24</sup> Chi gulox bacaagdiajg reeman diidx ni be reeman, graczi reeman guzuloz cabejdx canab Dios, r b reeman:

—Dad lüj rniabee gra, lüj naj bén been xanyabaa në guidxliuj nētēē nijsdoo con gra ni yu' loj reen. <sup>25</sup> Por xSprijt tēēl gunee rey Davi diidx guie ree, chi rēbaman:

¿Chexc zeel ridxe'chnē ree bēnguidxliuj Dios?

¿Chexc zeel rüjn reeman xgab ni ad rüjnt wen?

<sup>26</sup> Bado'p ree rey në gra ree guxtis

din su reeman contr dux Dad ree Dios në contr Cristo.

<sup>27</sup> 'Abi' zian ma gojc, Herodes con Poncio Pilato con ree bén Israel nētēē ree bén ad najt bén Israel, badxajg lasa' reeman luguiedx guie persi guzuj reeman contr xi'nl Jesús, bén naya nali, bén bacaabeel. <sup>28</sup> Zian gojc, been reeman zi'c ma beenl xgab diidx gocli.

<sup>29</sup> Abi' yan Dad, baguiaa yan ruchejb reeman dunujn. Gognē dunujn nayajcan xbejnl din gac yatie'chan xtiidxil sin guialrdxeb, <sup>30</sup> në con xguialrniabeel yasiajcan bēnragxuu ree, yaguieen tēēn milagr ree por xguialrniabee xi'nl Jesús, bén naya nali.

<sup>31</sup> Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

### *Ragnē lasa' ree bén riladx Jesús*

<sup>32</sup> Graczi ree bén riladx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rēbt guial xieenzi reeman naj ni rajp reeman, din najn par gra reeman. <sup>33</sup> Gognē Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. <sup>34</sup> Ni'czi tijb reeman ad biaadxt xhienin, din graczi ree bén rajp guidxliuj o bén rajp yu ya ruto' reeman laan, abi' milia guin <sup>35</sup> rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. <sup>36</sup> Loj reeman no'ch tijb bén brii laj Xiēb, najman xdiaa bén brii laj Leví, zēēdaman yuj la Chipre ni riga' loj nijsdoo. Gunee ree apóstoles guin laaman Bernabé, rēn guiēban Bén ragu' luxdoo ree bejn zagdx. <sup>37</sup> Gojpaman tijb guidxliuj, abi' bato'man laan persi badēēman milia guin loj ree apóstoles guin din qui's reeman laan.

## 5

### *Dol ni been ree Ananías con Safira*

<sup>1</sup> Per guyu stijb bén brii laj Ananías, xbēngunaaman brii laj Safira. Bato' tijb xguidxliuj reeman, <sup>2</sup> per baya'nnē xbēngunaaman diidx persi baya'nnēman ta'n milia guin. Sta'n'an badēēman loj ree apóstoles guin, rēbaman laan naj gran. <sup>3</sup> Abi' rēb Bēd lojman:

—Ananías, ¿chexc zeel cwējbil gunabee xindxab lüj? ¿Chexc zeel guyēnl nusquieel loj xSprijt Dios, din naya'nnēl ta'n milia ni bato' xguidxliujl? <sup>4</sup> ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balabladxil beenl zian? Loj Diosan nuyēnl nusquieel, ad lojt bejnan.

<sup>5</sup> Chi biguiejn Ananías ni rēbaman, biajbaman abi' güjtaman. Graczi ree bén gogbee ni guzacaman dád bidxeb reeman. <sup>6</sup> Dxel bibig bēlzi ree xinguiag, batüüb reex laaman lajd persi biquie'ch reex laaman.

<sup>7</sup> Chi gudēd cost choon hor, dxel bidxin xbēngunaa Ananías, ad ragbeetaman ni goc.

<sup>8</sup> Dxel gunabdiidx Bēd lojman rēbaman:

—Guna, ¿bato' xguidxliujdi zi'c na lacheelil ya?

Abi' rēbaman:

—An, zianqui bato'n'an.

<sup>9</sup> Dxel rēb Bēd lojman:

—¿Chexc zeel baya'ndi diidx persi nuyēndi nusquieedi xSprijt Dios? Laa ree xin biquie'ch lacheelil ziaad ni, yan nēgajc lüj chiquie'ch reex.

<sup>10</sup> Loj hor zii gajc biajb Safira lod za' Bēd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwē' lacheelaman.

<sup>11</sup> Graczi ree bén riladx Jesucrist në gra ree bén gogbee ni goc, dád bidxeb reeman.

### *Zien ree milagr been ree apóstoles*



<sup>12</sup> Zien ree milagr narooob been ree apóstoles guin loj ree bejn. Graczi ree bén riladx Jesucrist radxajg lasa' ro' curdur lod rniee reeman xcurdur Salomón. <sup>13</sup> Zagdxe ruza't ree bén luguiedx guin laa reeman, per ad rayaxt reeman guchajg reeman laa reeman. <sup>14</sup> Abi' guixie guixie cayajcxhieje ree bén riladx Dad Jesús, zi'c xinguaaaw zi'c béngunaa. <sup>15</sup> Xt rbëë reeman bénragxuu ree lunejz, rguijxh reeman laa reeman loj ree loon në loj ree da, din chi téd Béd, majsi xbalazaman téd guijc reeman. <sup>16</sup> Në ree bén zojb guiedx riga' ree gajxh Jerusalén, zien reeman bidxin Jerusalén, bidxinnë reeman bénragxuu ree në ree bén yu' xindxab luxdoo, abi' graczi reeman bayajc.

*Gunaaz ree guxtis Béd con Waj*

<sup>17</sup> Bixhioz mazri zojbloj rniabee graczi ree bixhioz në ree bénsaducew za'në laaman, guyu guialnadédloj luxdoo reeman, <sup>18</sup> abi' gunabee reeman biniaaz ree apóstoles guin persi badxe' reeman laa reeman ladxguiib. <sup>19</sup> Per guxhin zii tijb xi anjl Dios guxhal ro' ree xport ladxguiib guin, abi' babëëman laa reeman, rëbaman:

<sup>20</sup> —Gol chej lën yadooro', gol biguiedx loj ree bejn xhie naag gap reeman guialnaban tiblayaa con Dios.

<sup>21</sup> Chi biguiejn reeman ni rëb anjl guin, bareguiaal rsildoo wej reeman lën yadoo guin, guzuloj culüü reeman bejn ree xtiidx Dios.

Guiáad bixhioz zojbloj guin con ree bén za'në laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lën ladxguiib guin. <sup>22</sup> Per chi bidxin reex ro' ladxguiib guin, achutri ree apóstoles guin ree yu'. Dxel bicojn reex guxtis guin ree, <sup>23</sup> rëb reex:

—Chi badxinan, baguiaan nayaaw ro' ladxguiib guin zagdxe, laa ree suldad rajp ro' ladxguiib guin za', per chi baxhalan, achutdzi yu' lënan.

<sup>24</sup> Dxel bixhioz zojbloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, ¿ban xt guin chigdiplagaa ree ni guie?

<sup>25</sup> Loj hor zii gajc bidxin tijb xin rëb loj reeman:

—Laa ree bén badxe'di ladxguiib yu' lën yadoo culüü reeman bejn ree.

<sup>26</sup> Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguiaj ree bejn laa reex. <sup>27</sup> Chi badxinnë reex laa reeman, bayü reex laa reeman loj guxtis. Dxel rëb bixhioz zojbloj guin loj reeman:

<sup>28</sup> —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bén Jerusalén ma gutie'chidi xtiidxix, nëtëë yan rëndi gudxiibidi du guijcan guial dunujn bagüjt laax.

<sup>29</sup> Abi' badxi' Bëdan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj. <sup>30</sup> XDios dux béngulal ree basban Jesús, bén bacaadi loj crüjz. <sup>31</sup> Abi' nüjn Dios laaman bén zojbloj, nabe'caman laaman xladbeeman, laaman naj bén rniabee rabëë tëëman bejn ree loj xtol reeman, abi' zian guxhalaman nejz par ree bén Israel din cwëeladx xtol reeman yadxi' tëë loj reeman loj Dios din güünman laa reeman perdon. <sup>32</sup> Dunujn në xSprijt Dios bén rudëëman loj ree bén ruzoob xtiidxaman, rayagbeen guial gra ree ni guin naj diidxli.

<sup>33</sup> Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa reeman. <sup>34</sup> Per loj ree guxtis guin no'ch tijb bënfarisew laman Gamaliel, najman mextr rulüü ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. <sup>35</sup> Dxel rëbaman loj ree guxtis guin:

—Bén Israel, gol been xgab xhienin güünnëdi bén guin ree. <sup>36</sup> Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bén binal laax, yagaj gulox gra ni beenx. <sup>37</sup> Abi' tëë lën ree dxej gunabee gobiarn biab ree bejn, guyu tijb xin brii laj Judas, gojqxix xin Galilea, ziangajc dád zien ree bejn binal laax. Per chi bagüjt ree bejn laax, gra ree bén

binal laax bire'ch. <sup>38</sup> Zeel rnin lojdi, ad bal chu'ridi con ree b́en guin, gol baslaa reeman. Din bal b́enguidxliuj rniabee ni ŕijn reeman, zadxin dxej loxan. <sup>39</sup> Per bal por Dios cayüjn reeman ni guin ree, ad zajct gutéedi loj ni cayüjn reeman. Gol gojp cudad ad niad chi gagbeedi contr Diosan za'di.

<sup>40</sup> Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' ŕeb reeman loj reeman ad guitie'chri reeman xtiidx Jesús, dxel baslaa reeman laa reeman zia reeman. <sup>41</sup> Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. <sup>42</sup> Abi' ad rucwézt ruluü reeman rniee t́ee reeman xtiidx Jesús, gra dxejczy ruluü reeman lén yadooro' Jerusalén nēt́ee lidx lidx ree bejn.

## 6

### *Bibee gajdx ree b́en güün yudar*

<sup>1</sup> Lén ree dxej zii chi canuu cayajcxhiey ree b́en rliladx Jesús, guzuloj cabe'c ree b́en rniee diidx grieg xguialquia ree b́en rniee diidx hebreo, ŕeb reeman guial gra dxejczy chi rié's ni raw ree b́engunaa bizéjb, ta'ndoon rtia' ree b́en rniee diidx grieg guial loj ree b́en rniee diidx hebreo.

<sup>2</sup> Dxel guidxibtio'p ree apóstoles guin bato'p reeman graczi ree b́en rliladx Jesucrist, abi' ŕeb reeman:

—Ad zagdxtet naj guial yacwééz yalüün xtiidx Dios par yadi'san ni gaw ree bejn. <sup>3</sup> Zeel yanan léjt compniar raliduladx ree Jesucrist, gol gudiil entr lojdi gajdx ree b́en ragbeedi naban zi'c rayal, b́en yu' xSprijt Dios luxdoo, b́en yu' t́ee ree xquiarguejn, din yazuj reeman güün reeman dxiin guin. <sup>4</sup> Guiáad dunujn yasnuu yarejdx yanaaban Dios, yalüü t́een xtiidxaman.

<sup>5</sup> Graczi reeman cwéjb ni ŕeb reeman, abi' gulej reeman b́en la Esteban, laaman rliladx Jesucrist guidib luxdooan, rniabee t́ee xSprijt Dios luxdooan guidiblagaa. Gulej t́ee reeman Felip, Prócoro, Nicanor, Timón, Parmenas nē Nicolás b́en zéed Antioquía, nēman bililadx ni rliladx ree b́en Israel chi gadaman chililadx Jesucrist. <sup>6</sup> Dxel biné reeman laa reeman loj ree apóstoles guin, persi gurejdx gunab reeman Dios por laa reeman badxiib t́ee yaa reeman guijc reeman.

<sup>7</sup> Canuu care'ch xtiidx Dios, abi' Jerusalén cayajcxhiey ree b́en rliladx Jesucrist, nē zien ree bixhioz Israel bililadx laaman.

### *Biniaaz Esteban*

<sup>8</sup> Dád gogné Dios Esteban badéé t́eēman guialrniabee persi ŕijnman zien loj milagr delant loj ree bejn. <sup>9</sup> Abi' b́elzi ree b́en yadoo ni la Libertados nē ree b́en Cirene con ree b́en Alejandría con ree b́en niz Cilicia nēt́ee ree b́en zéed niz Asia, guzuloj cadildiidxné reeman Esteban, <sup>10</sup> per ad gojct nadxi' reeman xtiidxaman guial cayagné xSprijt Dios laaman. <sup>11</sup> Dxel gudijx reeman b́elzi ree bejn din guiéb reeman, bacaagdiajg reeman rniee Esteban contr Dios nē contr Moisejs. <sup>12</sup> Zian been reeman persi bidxe'ch ree b́en luguiedx guin, nē ree bengol nē ree mextr ruluü ley. Dxel gunaaz reeman Esteban, biné reeman laaman loj guxtis. <sup>13</sup> Gudiil t́ee reeman b́en basquiee ree persi ŕeb reeman loj ree guxtis guin:

—Ad rucwézt rnieeguijdx xin guie xley Moisejs nē xyadoo Dios. <sup>14</sup> Dunujn ma bacaagdiajg ŕebix guial Jesús xin Nazaret guse'nx dux yadooro' ree, guchaa t́eēx costumbr basa'n Moisejs du loj ree.

<sup>15</sup> Abi' guxtis guin ree nē gra ree b́en riga' yagaj, chi baguiaa reeman loj Esteban, baguiaa reeman najn zi'c tijb loj anjl.

## 7

### *Ni ŕeb Esteban loj ree guxtis*

<sup>1</sup> Dxel bixhioz mazri zojbloj rniabee graczi ree bixhioz, gunabdiidxaman loj Esteban, ŕebaman:

—¿Walin ya ŕebil zian?

<sup>2</sup> Badxi' Esteban laan, rëbaman:

—Dad guxtis, në lëjt compniar, gol bacaagdiajg ni ganin. Dios bén yu' xanyabaa balüüloj loj dux béngulal ree Abraham, chi gureman niz Mesopotamia chi gadaman chisob guiedx Harán. <sup>3</sup> Abi' rëb Dios lojman: “Basa'n ladxil në gra ree lasa'l, wej loj yuj ni gulün lüj.” <sup>4</sup> Dxel brii Abraham ladx ree bén Caldea bisobaman Harán. Chi güit xDadaman, dxel bidnë Dios Abraham loj guidxliuj guie lod nadxu' ree yan. <sup>5</sup> Per chi bi't Abraham guie, achetczi guidxliuj badëed Dios lojman, ni'czi tilda'n nan ad badëëtaman. Per beenman promejs loj Abraham guial gudëëman guidxliuj guie lojman, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham. <sup>6</sup> Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz. <sup>7</sup> Per rëb tëë Dios lojman: “Gudëdan gra ree bén gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” <sup>8</sup> Chi guneenë Dios Abraham, baya'n reeman diidx guial rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidxiptio'p ree xi'nman, bén goc ree dux béngulal ree.

<sup>9</sup> Bén goc ree dux béngulal ree gudëdloj reeman Xiëb bén naj bijch reeman, abi' bato' reeman laaman loj ree bén zë Egipto, per ad guro'nldaxt Dios laaman, <sup>10</sup> gognëman laaman loj ni guzagdiajman badëë tëëman xquiarguejnman, gognë tëëman laaman persi biajb rey guin laaman zagdxe, abi' beenman laaman gobernador Egipto, bazuj tëëman laaman din nabeeman gra ni rajp rey guin.

<sup>11</sup> Chi guyu gubijn guidibczi Egipto në niz Canaán, dxel guzagdiaj da't ree dux béngulal ree guial achet ni gaw reeman. <sup>12</sup> Per chi gogbee Jacob guial yu' trigo Egipto, guxhaal ree xi'nman bén naj dux béngulal ree, dxel wej reeman Egipto. <sup>13</sup> Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëëdaman. <sup>14</sup> Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn. <sup>15</sup> Zianan zeel bisob Jacob Egipto, ni güitaman ni gajc güit ree xi'nman, dux béngulal ree. <sup>16</sup> Gojc xchej dxel bignë reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

<sup>17</sup> Chi ma zidyob tiamp gac ni rëb Dios loj Abraham, zien ree bén Israel ma gojcxhie Egipto. <sup>18</sup> Abi' guzuloj gunabee rey ren Egipto, bén ad beenbeet Xiëb. <sup>19</sup> Rey zii basagzi bén du ladx ree, gunabeeman chigsëëb reeman xindo niguiaaw golnejz ree din guiët reex. <sup>20</sup> Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. <sup>21</sup> Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax, persi baslaaman laax zi'c xi'nman. <sup>22</sup> Basiid Moisejs gra ni rajc ree bén Egipto, abi' lasajc ni guneex ni been tëëx.

<sup>23</sup> Chi guyu Moisejs tiuu ijz, bidyajb guijcaman bignaj lasa' bén Israelaman. <sup>24</sup> Abi' chi baguiaaman caguin tijb bén Egipto tijb bén Israel, balajman laaman, bagüjtaman bén Egipto guin. <sup>25</sup> Naladx Moisejs niagbee ree bén Israel guial por laaman yabëë Dios laa reeman loj ree bén Egipto, per ad gogbeet reeman. <sup>26</sup> Chi bareguiaal, bidxaagloj Moisejs tio'p ree bén Israel caga'p reeman, abi' guyënman nabe'cdxeman laa reeman, rëbaman: “¿Chexc zeel rdilidi? Awa bén Israel naj gropidi.” <sup>27</sup> Abi' bén caguin bén zatijb guin bacadxaaman Moisejs, rëbaman: “¿Chu bazuj lüj din nabeel dunujn, din na tëël ni rayal yaguieenan? <sup>28</sup> ¿Wen rënl ya gugüjtil naj zi'c bagüjtil bén Egipto ni nieey?” <sup>29</sup> Chi biguiejn Moisejs ni rëb bén guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

<sup>30</sup> Chi gudëd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí. <sup>31</sup> Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxe, biguiejnman cha' Dios rëbaman lojman: <sup>32</sup> “Naj naj xDios xbéngulal reel, Abraham, Isaac në Jacob.” Dxel guzuloj canij Moisejs guial bidxebaman, ad bayaxtaman nuguaaman bajl guin. <sup>33</sup> Dxel rëb Dios

lojman: “Gulëe xgurëchil, din nagle' lod za'l. <sup>34</sup> Naj cuguia xhienaag cazagdiaj ree da bejnan Egipto, riguejnan roon reeman zeel biguia'tan din yabën laa reeman. Yan, guda din gaxhalan lüj Egipto.”

<sup>35</sup> 'Abi' majsi ad guyënt ree bën Israel nuzoob reeman xtiidx Moisejs yaloj, rëb reeman lojman: “¿Chu bazuj lüj din nabeel dunujn na tëël ni yaguieenan?” Per por anjl balüüloj loj bajl guin, badëed Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c. <sup>36</sup> Moisejs guin naj bën babëe dux béngulal ree Egipto, been tëëman milagr ree niz Egipto, në niz ro' nijsdoo ni la Nijs Xnia, në loj yujbidx lod guzu reeman tiuu ijz. <sup>37</sup> Laagajc tëëman rëb loj ree bën Israel: “Loj gajquidi cwe Dios tijb bën gudëed xtiidxaman loj ree bejn zi'c guleman naj. Gol bazoob xtiidxaman.” <sup>38</sup> Dxel chi guzunë Moisejs dux béngulal ree niz loj yujbidx, laaman naj bën guneenë xi anjl Dios ruguia' la Sinaí, persi badëëman xtiidx Dios loj reeman, abi' diidx guin ree naj ni basa'n reeman duloj ree yan.

<sup>39</sup> 'Per dux béngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczy reeman nayejc reeman Egipto. <sup>40</sup> Dxel rëb reeman loj Aarón: “Been dios ree, din ned reeman du loj ree, din ad rayagbeet ree gonczy Moisejs bën babëe dunuj ree Egipto.” <sup>41</sup> Dxel been reeman tijb go'ndobëz din gaquib xdios reeman. Bagüjt reeman be ree persi badëed reeman laa reeb zi'c gon loj ni been reeman, been reeman lanij guial babaanë reeman ni been gajc reeman. <sup>42</sup> Dxel guro'nladx Dios laa reeman, baslaaman guyën reeman gubijdx con bëw con bajl yu' ree xanyabaa. Din zian ca loj xtiidx Dios ni bacaa ree bën badëed xtiidxaman loj ree bejn, lod rëb:

Bën Israel, loj tiuu ijz ni guzudi loj yujbidx,  
¿wen bagüjtidi be ree ya din guneedi laa reeb lon zi'c gon?

<sup>43</sup> Per mazri guyëndi xdxandi Moloc biao tëëdi lidxan,  
në xbajl dxan Refán, dxan been gajquidi din guzuxibidi loj reen.  
Zeel gaxhalan lëjt mazri zijt guial Babilonia.

<sup>44</sup> 'Abi' chi guzu ree dux béngulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman. <sup>45</sup> Chi güit Moisejs, baya'nnë ree dux béngulal ree yadoo guin. Chi baya'n Josué xluar Moisejs, dxel bidnë reeman yadoo guin chi gudil reeman guijc guidxliuj con ree bën ren, abi' gognë Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt bidxin dxej guzuloj gunabee rey Davi. <sup>46</sup> Guyën Dios rey Davi, abi' laaman guyënman nüjnman tijb yadoo par Dios, bën naj dux Dios ree nayajc ree bën Israel. <sup>47</sup> Per rey Salomón naj bën been laan, <sup>48</sup> majsi Dios bën yu' xanyabaa ad rbejtaman lën yadoo ni rüjn ree bejn, zi'c rëb bën badëed xtiidx Dios loj ree bejn diiz gocli, chi rëbaman:

<sup>49-50</sup> Xanyabaa naj lod zooban par ganabeen,  
guiáad loj guidxliuj naj lod ruzu guia'n.  
¿Xhienaag gac yu güüнди par naj?  
¿O xhienaag naj lod yaziiladxan?  
¿Id naj ben graczi ree ni guie ya?, rëb Dios.

<sup>51</sup> 'Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëëtidi chignia'di, zianczy za'di contr xSprijt Dios, zi'cgajc been ree xbéngulalidi. <sup>52</sup> ¿Chu bën badëed xtiidx Dios loj ree bejn ad beennaat ree xbéngulalidi? Xt bagüjt reeman bën badëed ree xtiidx Dios bën rëb ree guial gui't tijb bën naya nali. Abi' yan ma bi'taman, bayüdi laaman loj ree bën rniabee, gunabee tëëdi güjtaman. <sup>53</sup> Majsi cwa'di xley Dios loj ree xi anjlaman, per ad rüjntidi zi'c rëb loj ley guin.

*Bagüjt reeman Esteban*

<sup>54</sup> Chi biguiejn reeman ni rëb Esteban, xt raw lay reeman tant balen reeman laaman.  
<sup>55</sup> Per guial yu' xSprijt Dios luxdoo Esteban, chi gules lojman xanyabaa, dxel baguiaaman  
 xbiani Dios baguiaa tääman Jesús za'man xladbee Dios. <sup>56</sup> Dxel rëb Esteban:

—¡Gol baguiaa! Ruguian naxal xanyabaa, ruguia tääen Bén guxhaal Dios za'man  
 xladbee Dios.

<sup>57</sup> Per chi biguiejn reeman zian, bata'cw guidiajg reeman, dxel gurixdiaj reeman  
 zignaaz reeman Esteban, <sup>58</sup> babëë reeman laaman loj ciuda guin, bicüjt reeman laaman  
 con guiaj, guiáad xab reeman basa'nsii reeman loj xinguiag la Saulo persi canajxan.

<sup>59</sup> La'tgaj cucaaguaiaj reeman Esteban, rëbaman:

—Dad Jesús, baca' da sprijtan.

<sup>60</sup> Dxel bazuxibaman guridxa'man rejs, rëbaman:

—Dad Jesús, ad güüncwentil dol cayüjn ree bén guin yan.

Naabczi gulox rëbaman zian, laa güt gajcaman.

## 8

### *Guzunal Saulo bén rliadx ree Jesucrist*

<sup>1</sup> Baya'n Saulo conform guial bagüjt reeman Esteban. Abi' dxej zii gajc guzuloj rzunal  
 reeman Bén Jerusalén ree Bén rliadx ree Jesucrist, dxel bire'ch reeman guidib niz Judea  
 ně niz Samaria, Bén najzi ree apóstoles baya'n. <sup>2</sup> Guyu bëlzi ree xinza'c, laa reex biquie'ch  
 Esteban, abi' dád biin reex guijcaman. <sup>3</sup> Guiáad Saulo rzunalaman Bén rliadx ree  
 Jesucrist, ruman yu yu din cwëë naguiejnman laa reeman, zi'c xinguaaaw zi'c béngunaa,  
 persi rgu'man laa reeman ladxguib.

### *Bacaagdiajg ree Bén Samaria xtiidx Dios*

<sup>4</sup> Per Bén brii ree Jerusalén, lod zëtzi reeman rtie'ch reeman xtiidx Dios. <sup>5</sup> Zi'c been  
 Felip, wejman guiedx Samaria, guzuloj caneeman xtiidx Jesucrist loj ree bejn. <sup>6</sup> Dád zien  
 ree bejn rdo'p, graczi reeman rucaagdiajg chaaw ni rëb Felip, ruguiaa tää reeman milagr  
 ree ni rüjnman. <sup>7</sup> Zien ree Bén nějt tib lajt xcuerp bayüjn Felip, ně ree Bén ad rzat zagdxé,  
 bayüjn tääman Bén yu' ree xindxab luxdoo abi' rbixdiaj reex rarii reex. <sup>8</sup> Zianan zeel  
 babaa da't ree Bén luguiedx zii.

<sup>9</sup> Per luguiedx zii guyu tijb Bén brii laj Simón, diizd gocli rüjnman guialbidxaa persi  
 rusquieeman Bén Samaria ree, rüjnman Bén lasajc. <sup>10</sup> Graczi reeman rucaagdiajg chaaw  
 ni rëbaman, diizd mazri ree xinguiag xt mazri ree bengol, abi' rëb reeman:

—Naroob naj xguialrniabee Dios ni rajp Bén guie.

<sup>11</sup> Bidxga' reeman laaman guial ma gojc xchej cusquieeman laa reeman con guial-  
 bidxaa ni rüjnman. <sup>12</sup> Per chi bililadx reeman ni rëb Felip xcwent xguialrniabee Dios  
 ně xcwent Jesucrist, zi'c ree xinguaaaw zi'c ree béngunaa gurobnijs reeman. <sup>13</sup> Xt ně  
 Simón bililadx gurobnijs tääman, abi' ad riro'nladxtaman Felip radxa tää lojman graloj  
 ree milagr ruguiaaman rüjn Felip.

<sup>14</sup> Chi gogbee ree apóstoles riga' Jerusalén guial ma bililadx ree Bén Samaria xtiidx  
 Dios, dxel guxhaal reeman Béd con Waj ni. <sup>15</sup> Chi bidxin reeman, gurejdx gunab reeman  
 Dios por ree Bén Samaria Bén ma rliadx ree xtiidx Dios din chu' xSprijt Dios luxdoo  
 reeman, <sup>16</sup> din ni'qui tijb reeman ad wayut Sprijt guin luxdoo, gurobnijsi reeman por  
 Dad Jesús. <sup>17</sup> Dxel guxhoob yaa ree Béd con Waj guijc reeman, abi' guyu xSprijt Dios  
 luxdoo reeman.

<sup>18</sup> Chi baguiaa Simón cayu xSprijt Dios luxdoo ree Bén guin guial caxhoob yaa ree  
 apóstoles guin guijc reeman, dxel guyënman nudëëman milia loj reeman, <sup>19</sup> rëbaman:

—Në lon gol banee guialrniabee guin din chi gaxhob yan chutëëz guijc Bénan, ně  
 luxdooman chu' xSprijt Dios.

<sup>20</sup> Dxel badxi' Béd xtiidxaman rëbaman:

—Nitol con guidib xmilial, din rüjnl xgab guial zajc siil guialrniabee razaladx Dios.

<sup>21</sup> Ad rayalt ad zajc tääet güünl zi'c raguieenan, din ni'quid zinartil xnejz Dios. <sup>22</sup> Bayüjn  
 xgab por ni mal beenl, gurejdx gunab tää Dios, rupent güünman lüj perdon por ree

xixgabmalil, <sup>23</sup> din ragbeen ganax guialralen yu' luxdool, abi' dol guin naj ni rniabee lüj.

<sup>24</sup> Dxel badxi' Simón xtiidxaman, rëbaman:

—Gol gurejdx gunab Dios por naj, chitëë gaza'can ni'qui tijb ni ma nadi.

<sup>25</sup> Chi gulox gunee ree apóstoles guin xtiidx Dios loj ree bën guin, dxel badxin reeman Jerusalén, abi' graczi ree guiedx riga' niz Samaria lod gudëd reeman gutie'ch reeman xtiidxza'c Jesucrist.

*Felip con bën Etiopía*

<sup>26</sup> Chi ma gudëd gojc zian, gunee tijb xi anjl Dios Felip rëbaman:

—Wej niz sur nejz ni zë Jerusalén xt lod la Gaza, niz lod naj ganax yujbidx.

<sup>27</sup> Dxel brii Felip zëman. Runejz guin banaazaman tijb bën Etiopía, najman bën zobjloj guial laaman rgu'chaaw xmilia Candace, bën naj reina Etiopía. Wejman Jerusalén bignajchi'man Dios, <sup>28</sup> abi' ma bayunejzaman zia ladxaman, zobj lën xcarrejt zagdxeman, roolaman loj gui'ch ni bacaa Isafás, bën badëed xtiidx Dios loj ree bejn. <sup>29</sup> Dxel rëb xSprijt Dios loj Felip:

—Bibig gajxh cwë' carrejt guin.

<sup>30</sup> Chi bibigaman, biguiejnman cayool bën guin loj gui'ch bacaa Isafás. Dxel gunabdiidxaman lojman rëbaman:

—Dad, ¿rignia'l ni cayoolil ya?

<sup>31</sup> Badxi' bën guinan rëbaman:

—¿Xoza chignia'nán? Awa achut gusignia' naj.

Dxel rëbaman loj Felip din chë'paman loj carrejt guin, cweman cwë'man.

<sup>32</sup> Loj xtiidx Dios lod cayool bën guin rëban:

Zi'c rinë reeman tijb xiil,

binë reeman laaman lod gugüjt reeman laaman.

Abi' achet rëbaman,

zi'c tijb xiil ma za' loj ree bën gugaj guidxladib.

<sup>33</sup> Chi beennë reeman laaman zi'ctzi rën reeman, achut been guialguxtis por laaman.

Yan achut guza't xdiaaman,

din ma bisüd reeman laaman loj guidxliuj.

<sup>34</sup> Rëb bën guin loj Felip:

—Guna sii, ¿chu xcwent rníee bën bacaa diidx guie ree? ¿Xcwent gajcaman ya o xcwent ben renan?

<sup>35</sup> Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman. <sup>36</sup> Abi' chi gudëd reeman lod yu' nijs, dxel rëb bën guin loj Felip:

—Guie yu' nijs. ¿Nid zajc garobnijsan guie ya?

<sup>37</sup> Zeel rëb Felip lojman:

—Bal rliladxil guidib luxdool, zajcan.

Badxi' bën guinan rëbaman:

—Rliladxan guial Jesucrist naj Xi'n Dios.

<sup>38</sup> Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. <sup>39</sup> Chi barii reeman lojnijs guin, loj hor zii gajc gunidloj Felip binë xSprijt Dios laaman, abi' ad baguiaatri bën guin laaman, per dád rabaaman zinal xnejzaman. <sup>40</sup> Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxza'c Jesucrist xt bidxinman Cesarea.

<sup>1</sup> Guiáad Saulo ad rucwëézt rdxe'chaman bën rliladx ree Jesucrist, rëbaman gugüjta-man laa reeman. Zeel wejman bigneenëman bixhioz mazri zojbloj rniabee graczi ree bixhioz, <sup>2</sup> din gac tijb gui'ch din gac cheman lën ree yadoo Damasco chigdiilaman bën rliladx ree Jesucrist, zi'c ree xinguaaw zi'c ree béngunaa, din chignëman laa reeman ladxguiib Jerusalén. <sup>3</sup> Per chi ma cadxinman gajxh guiedx Damasco, dxejlci brii tijb guij xanyabaa balaan bacha' lod zëman. <sup>4</sup> Abi' bireeyujman, chi naga'man luyuj guin biguiejnman cha' bën rëb:

—Saulo, Saulo, ¿chexc zeel rzunalil naj?

<sup>5</sup> Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxegua' loj yag ni rulaagnë reeman laab.

<sup>6</sup> Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

<sup>7</sup> Abi' ree bën në Saulo dád bidxeb reeman guial biguiejn reeman cha' bejn, per achutczi baguiaa reeman. <sup>8</sup> Chi bixchewan luyuj guin, baxhal lojman, ad rajctri ruguiaaman. Dxel gunaaz reeman yaaman bignë reeman laaman Damasco. <sup>9</sup> Ni guzuman choon dxej, ad rajct ruguiaaman, achetczi rawaman ache tëetctzi rë'man.

<sup>10</sup> Damasco gure tijb bën rliladx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

<sup>11</sup> Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj, <sup>12</sup> abi' zi'c rulüü cane'xhchaalix, baguiaax guyu tijb bën la Ananías guxhoob yaaman guijquix persi baguiaax stijb.

<sup>13</sup> Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bën rliladx ree lüj Jerusalén. <sup>14</sup> Yan zëëdix guie con xguialrniabee ree bixhioz rniabee ree bixhioz, din guiniaazix gra ree bën rliladx lüj.

<sup>15</sup> Dxel rëb Jesucrist lojman:

—Wej, din naj gule laax din chiguiex da diidxan loj ree bën ad najt bën Israel, në loj ree rey, con nëgajc loj ree bën Israel. <sup>16</sup> Guiën lojx guial sagdiaj da'tix guial najx da bejnan.

<sup>17</sup> Dxel zë Ananías lënu lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús bën balüüloj lojl runejz lod zëëdil, laaman guxhaal naj din yaguaaal, chu' tëë xSprijt Dios luxdool.

<sup>18</sup> Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnijsaman, <sup>19</sup> gudaw tëëman persi bayuman gojl. Dxel guzujman Damasco tio'p choon dxej con ree bën rliladx Jesucrist.

#### *Gunee Saulo xtiidx Dios Damasco*

<sup>20</sup> Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios. <sup>21</sup> Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën rliladx ree Jesucrist Jerusalén ya? ¿Nid laagajcaman zëëd guie ya, din guiniaazaman bën rliladx ree Jesucrist chignë tëëman laa reeman loj ree bixhioz rniabee ree bixhioz?

<sup>22</sup> Per Saulo guixie guixie mazri cariiman guialrdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bën Israel zojb ree Damasco chi rucaagdiajg reeman ni rëbaman.

#### *Baxüün Saulo guiedx Damasco*

<sup>23</sup> Ad xchejt gojc, baya'n ree bën Israel diidx din nugüjt reeman Saulo, <sup>24</sup> per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman. <sup>25</sup> Per ree bën rliladx Jesucrist, guxhin badxe' reeman laaman lën dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

#### *Badxin Saulo Jerusalén*

<sup>26</sup> Chi badxin Saulo Jerusalén, guyënman nuchajgaman bën rliladx ree Jesucrist, per graczi reeman bidxeb laaman guial ad rliladxt reeman nëman ma rliladx Jesucrist. <sup>27</sup> Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneenë tëëman laaman chi zëman Damasco, bagojn tëëman guial Damasco gunee Saulo xtiidx Jesucrist sin guialrdxeb. <sup>28</sup> Zian baya'n Saulo Jerusalén abi' nayuman laa reeman. <sup>29</sup> Ad rdxebtaman ruza'taman Dad Jesús, abi' xt gudijldiidxnëman bën Israel rniee ree diidx grieg, per guyën reeman nugüjt reeman laaman. <sup>30</sup> Chi gogbee ree bën rliladx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

<sup>31</sup> Dxel babedxe luxdoo ree bën rliladx Jesucrist, bën zojb ree niz Judea në niz Galilea nëtëë niz Samaria, chigagaj beenbee reeman mazri xhienaag naj xnejz Dios, bazoob tëë reeman xtiidxaman, abi' cayagnë xSprijt Dios cayajcxhiey reeman.

#### *Bayajc Eneas*

<sup>32</sup> Chi biza Bëd bitixlojman bën rliladx ree Jesucrist, dxel wej gajcaman bitixlojman bën rliladx ree Jesucrist guiedx Lida. <sup>33</sup> Ni bidxaaglojman tijb xinguaaaw la Eneas. Ma gojc xhujn ijz naga'x, ragxuux, ad rajct rzax. <sup>34</sup> Abi' rëb Bëd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. <sup>35</sup> Chi baguiaa gra ree bën zojb guiedx Lida në ree bën zojb niz Sarón guial ma bayajc Eneas, dxel në reeman bililadx Jesucrist.

#### *Baban Dorcas*

<sup>36</sup> Loj tiamp zii guyu tijb béngunaa rliladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tëëman yudar bënprob ree. <sup>37</sup> Lën ree dxej zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lënü ladya. <sup>38</sup> Abi' gajxh guiedx Jope raya'n guiedx Lida lod za' Bëd. Chi gogbee ree bën rliladx Jesucrist guial za'man ni, guxhaal reeman tio'p ree xinguaaaw bisajc reex Bëd liaadx, rëb reex:

—Been wen yo' ree Jope yan gajczi.

<sup>39</sup> Laa zinë gajcaman laa reex. Chi bidxinman, binë reeman laaman lënü lod naga' xcuerp Dorcas. Ni riga' zien ree béngunaa bizëyb roon reeman, abi' bibig reeman loj Bëd culüü reeman gra lajd ni been Dorcas chi sta nabanman. <sup>40</sup> Dxel gunabee Bëd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rëbaman:

—jTabita, bixche!

Laa guxhal gajc lojman. Chi baguiaaman Bëd, gureliman, <sup>41</sup> dxel gunaaz Bëd yaaman persi guzuliman. Abi' gurejdxaman bën rliladx ree Jesucrist con ree bën bizëyb guin, persi baguiaa reeman guial ma baban Dorcas. <sup>42</sup> Guidibczi guiedx Jope gogbee reeman ni goc, abi' zien da't reeman bililadx Jesucrist por zian. <sup>43</sup> Guiáad Bëd baya'nman mazri dxej luguiedx guin, lidx Simón bën rüjnchaaw guid.



<sup>1</sup> Luguiedx Cesarea gurej tijb b́en brii laj Cornel. Laaman goc suldad gunabee tibcwaa ree suldad brii laj Italiano. <sup>2</sup> Gojcaman benza'c, laaman ńe gra ree b́en zojb lidxaman guyen reeman Dios, abi' d́ad beenman yudar b́en Israel ree, b́en naj ree b́enprob, ńe zianczi rbejdx rniabaman Dios. <sup>3</sup> Tijb dxej cost raca choon wadxe, guzajcaman zi'c rulüü cane'xhchaalaman. Zagdxeczi baguiaaman guyu tijb xi anjl Dios lenü lod za'man, abi' rëb anjl guin lojman:

—¡Cornel!

<sup>4</sup> Baguiaaman loj anjl guin, abi' d́ad bidxebaman, rëbaman:

—¿Xhienin, Dad?

Abi' rëb anjl guin:

—Ma biguiejn Dios xtiidxil ma baguiaa t́eëman xhienaag rüjnl yudar b́enprob ree.

<sup>5</sup> Guxhaal ree b́en che luguiedx Jope din chica' reeman Simón, b́en la gajc Béd. <sup>6</sup> Zojbaman lidx tijb b́en la gajc Simón, b́en rüjnchaaw guid, b́en zojb gajxh ro' nijsdoo. Béd guin na ni rayal güünl.

<sup>7</sup> Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians riladx t́eëman Dios. <sup>8</sup> Gulox beman diidx loj reeman ni guzacaman, dxel guxhaalaman laa reeman Jope.

<sup>9</sup> Chi bareguiaal, la'tgaj cadxin reeman gajxh Jope, cost garol dxej wë'p Béd guijc yu lod zojbaman din cwedx guiniabaman Dios. <sup>10</sup> D́ad gulaanman, guyenman niajwaman, per la'tgaj cayüjn reeman ni gawaman guzajcaman zi'c rulüü cane'xhchaalaman.

<sup>11</sup> Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan. <sup>12</sup> Loj lajd guin yu' gra loj ree be yu' tajp guia', ńe ree bëel, nètëë ree be rzuj. <sup>13</sup> Dxel biguiejnman cha' b́en rëb:

—Béd, bisu, bagüijt be gawil.

<sup>14</sup> Per badxi' Béd laan rëbaman:

—Yajqui, Dad. Ad wayawtczan nidxuudx ni ad rayalt gaw bejn.

<sup>15</sup> Abi' rëb cha' b́en guin zatijb:

—Ni ma basia Dios ad rnieelan nidxuudx.

<sup>16</sup> Choon volt gojc zian, dxel bayë'p lajd guin xanyabaa stijb. <sup>17</sup> La'tgaj cayüjn Béd xgab xhie rën guiëb ni baguiaaman, loj hor zii gajc bidxin ree b́en guxhaal Cornel rulidx Simón, guial ma gunabdiidx reeman banguin naj lidxaman. <sup>18</sup> Chi bidxin reeman, gunabdiidx reeman bal ni zojb Simón b́en la gajc Béd.

<sup>19</sup> Guiáad Béd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaaw raguuil lüj. <sup>20</sup> Bisu, biguiajt binë reex, ad chu' luxdool tio'p, din naj guxhal laa reex.

<sup>21</sup> Dxel baguiajt Béd lod za' ree b́en guxhaal Cornel, abi' rëbaman loj reeman:

—Naj naj b́en raguilidi, ¿chexquiza zeel raguilidi naj?

<sup>22</sup> Dxel badxi' reeman laan rëb reeman:

—Guxhaal b́en la Cornel dunujn, b́en rniabee tibcwaa ree suldad, najman benza'c, rdxebaman Dios, abi' graczi ree b́en Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guiëbil.

<sup>23</sup> Dxel badxe' Béd laa reeman lenü, ni gudëd reeman guiaal. Chi bareguiaal, binëman laa reeman. Në bëlzi ree b́en zojb Jope b́en riladx ree Jesucrist binë laaman.

<sup>24</sup> Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man ńe ree xmiwaman, din cwëz reeman guidxin reeman. <sup>25</sup> Chi bidxin Béd lidx Cornel, laa brii gajc Cornel bigchaaglojman laaman, dxel bazuxibaman loj Béd persi gojpaman laaman respejt. <sup>26</sup> Per bazuli Béd laaman, rëbaman:

—Guzuli, din lasa' bejn gajcan lüj.

<sup>27</sup> La'tgaj cadxin reeman ruyu guin cayü reeman diidx. Abi' chi guyu reeman, baguiaa Béd zien da't ree bejn riga' ni. <sup>28</sup> Dxel rëb Béd loj reeman:

—Ma qui ragbeedi xhienaag naj xley ree bén Israel, guial ad zajct go'ch reeman loj ree bén ad najt bén Israel o chu' reeman lidx reeman. Per ma balüü Dios naj guial achutczi rayal ganen bendxuudx, bén nabixhladx. <sup>29</sup> Zeel chi bidca' reeman naj, laa bial gajcan achet guijc badxiban. Yan rënan gagbeen, ¿chexquiza zeel gurejdxidi naj?

<sup>30</sup> Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadxe, cabedx canaaban Dios, loj hor zii balüüloj tijb bejn lon najcwaman lajd nayni. <sup>31</sup> Abi' naman lon: “Cornel, ma biguiejn Dios xtiidxil, yu'guijc tëëman xhienaag rüjnl yudar bénprob ree. <sup>32</sup> Zeel guxhaal ree xin che luguiedx la Jope din chica' reex Simón, bén la gajc Bëd. Zojbaman lidx tijb bén la gajc Simón, bén rüjnchaaw guid, bén zojb gajxh ro'nijsdoo. Bëd guin na ni rayal güünl.” <sup>33</sup> Zianan zeel laa guxhal gajcan xin bidgadiil ree lüj. Zagdxee beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

### *Ni gunee Bëd lidx Cornel*

<sup>34</sup> Dxel guzuloj canee Bëd, rëbaman:

—Ma ragbeen yan guial tiblojzi ruguiaa Dios bejn. <sup>35</sup> Din Dios, chutëëz bénguidxliuj ridxga' laaman rüjn tëëman zi'c rayal, nëgajc Dios ridxga' laaman. <sup>36</sup> Dios ma gunee bén Israel ree, ma bagojnman guial por Jesucrist rabadxe luxdoo bejn, bén naj Dad par gra ree bénguidxliuj. <sup>37</sup> Lëjt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnijs. <sup>38</sup> Ragbee tëëdi guial ma badëë Dios xSprijtaman con xguialrniabeeman loj Jesús bén Nazaret, abi' bizaman biguieenman ni zagdxee, bayüjnman gra ree bén cazagdiaj por xindxab. Gojc beenman zian guial za'në Dios laaman. <sup>39</sup> Abi' dunujn baguiaa gra ni been Jesús guidib niz Judea, në niz Jerusalén. Dxelri bagüjt reeman laaman, bacaa reeman laaman loj crüjz. <sup>40</sup> Per Dios basban laaman ni bayon dxej, abi' cwëjb Dios bidgalüülojman du lojn. <sup>41</sup> Ad balüülojtaman loj gra ree bejn, tijbzi du lojn nayajcan bén gule Dios diizd yaloy din yaguaan graczi ni beenman. Abi' dunujn badaawnë' laaman badü'në' tëen laaman chi babanman stijb. <sup>42</sup> Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadëëd gra ree bejn cwent loj Dios, zi'c ree bén naban zi'c ree bén ma güjt. <sup>43</sup> Nëtëë diizd gocli graczi ree bén badëëd xtiidx Dios loj ree bejn, gunee reeman xcwent Jesús, rëb reeman guial graczi ree bén chililadx laaman, gac xtol reeman perdon.

### *Guyu xSprijt Dios luxdoo ree bén ad najt bén Israel*

<sup>44</sup> Sta canee Bëd, chi guyu xSprijt Dios luxdoo gra ree bén cucaagdiajg ni cayëbaman. <sup>45</sup> Dxel bén Israel rliladx ree Jesucrist, bén binë ree Bëd, dád badxa loj reeman guial në ree bén ad najt ree bén Israel guyu xSprijt Dios luxdoo, <sup>46</sup> guial riguiejn reeman ma rniece ree bén guin graloy ree diidx, abi' ruza't reeman Dios zagdxee. <sup>47</sup> Dxel rëb Bëd loj reeman: —¿Chu zajc gudxoon tiobnijs ree bén guie, bal ma yu' xSprijt Dios luxdoo reeman zi'cgajc dunuj ree?

<sup>48</sup> Abi' gunabeeman tiobnijs reeman por Jesucrist. Dxelri guzajc reeman liaadx loj Bëd din sunëman laa reeman za tio'p choon dxej mazri.

## 11

### *Guyu xSprijt Dios luxdoo ree bén ad najt bén Israel*

<sup>1</sup> Bén naj ree xi apóstoles Jesús con ree bén Judea, bén rliladx ree laaman, gogbee reeman guial në ree bén ad najt bén Israel bililadx xtiidx Dios. <sup>2</sup> Abi' chi badxin Bëd Jerusalén, bén Israel ma rliladx ree Jesucrist, bén sta zinal ree ley, guidilë reeman Bëd.

<sup>3</sup> Rëb reeman lojman:

—¿Chexc zeel bichu'l lidx ree bén ad najt bén Israel abi' gudawnël laa reeman?

<sup>4</sup> Dxel guzuloj cayü Bëd diidx diizd guia'xchej xhienaag gojc zeel wejman lidx ree bén guin abi' rëbaman loj reeman:

<sup>5</sup> —Chi za'n luguiedx Jope, la'tgaj cabedx canaaban Dios, guza'can zi'c rulüü cane'x-hchalan. Baguian zi'c tijb lajd narooob naxii guidap xquinan caguiajtan diizd xanyabaa xt lod za'n. <sup>6</sup> Chi baguian zagdxe xhie yu' loj lajd guin, baguian bedoxh ree në ree be yu' tajp guia' në ree bëël con ree be rzuj. <sup>7</sup> Dxel bigueijnan cha' bejn, naman: “Bëd, guzuli, bagüjt be gawil.” <sup>8</sup> Per badxi'nän rën: “Yajqui, Dad, din ad goctczi wayawan nidxuudx, ni ad rayalt gaw bejn.” <sup>9</sup> Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.” <sup>10</sup> Choon volt gojc zian, dxel bayë'p gra ni guin xanyabaa. <sup>11</sup> Loj hor zii gajc bi't choon ree xinguaaw lod guren, zëed reex diizd Cesarea, cayguiil reex naj. <sup>12</sup> Abi' na xSprijt Dios lon guial chinë'n laa reex, ad chu' luxdon tio'p. Në guixo'p ree bën guie bën naj dux compniar ree binë'n. Abi' dugraczan badxu' lidx bën guin. <sup>13</sup> Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bën che luguiedx Jope din chica' reeman Simón, bën la gajc Bëd, <sup>14</sup> laaman na xhienaag gac ree xtolil perdon, con gra ree bën zobj lidxil.” <sup>15</sup> Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaløj. <sup>16</sup> Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” <sup>17</sup> Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

<sup>18</sup> Chi bigueijn ree bën guin ni rëb Bëd, dxel achetri rëb reeman lojman abi' baza't reeman Dios zagdxe, rëb reeman:

—¡Ma rayagbee ree yan guial në ree bën ad najt bën Israel ma balüü Dios guial rayal yayüjn xgab por xtol reeman yadxi' tëë loj reeman lojman din gap reeman guialnaban tiblayaa delant lojman!

#### *Bililadx ree bën Antioquía Jesucrist*

<sup>19</sup> Chi mal bagüjt ree bejn Esteban, dxel guzuloj rzunal reeman bën rliladx ree Jesucrist persi bire'ch gra ree bën rliladx guin niz Fenicia, niz Chipre në Antioquía. Abi' gutie'ch reeman xtiidxza'c Jesucrist, per ganaxzi loj ree bën Israel. <sup>20</sup> Per loj reeman no'ch bëlzi ree bën Chipre në ree bën Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bën ad najt bën Israel. <sup>21</sup> Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

<sup>22</sup> Chi gogbee ree bën Jerusalén rliladx Jesucrist ni goc, guxhaal reeman Bernabé xt guiedx Antioquía. <sup>23</sup> Chi bidxinman ni, dád babaaman chi baguiaaman xhienaag cayagnë Dios bën guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist. <sup>24</sup> Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdoo. Zeel dád zien ree bejn bililadx Jesucrist.

<sup>25</sup> Dxelri wej Bernabé guiedx Tarso bigdiilaman Saulo. <sup>26</sup> Chi badxejlaman laaman, dxel binëman laaman xt Antioquía. Ni guzunë reeman bën rliladx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëëljaj reeman bën rliladx ree Jesucrist, cristian.

<sup>27</sup> Lën ree dxej zii bëlzi ree bën badëë xtiidx Dios loj ree bejn, guza Jerusalén wej reeman Antioquía. <sup>28</sup> Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. <sup>29</sup> Abi' ree bën rliladx Jesucrist luguiedx Antioquía, baya'n reeman diidx din guido'p reeman zi'ctzi ni galguzuj gudëed tijb gaj reeman, din gagnë lasa' reeman, bën rliladx ree Jesucrist, bën zobj ree niz Judea. <sup>30</sup> Abi' zian been reeman. Dxel guxhaalnë reeman laan Saulo con Bernabé din gudëed reeman laan loj ree bën rniabee ree bën rliladx Jesucrist niz Judea.

<sup>1</sup> Lën ree dxej zii guzuloj rey Herodes cusagziman bëlzi ree bén rlliladx Jesucrist. <sup>2</sup> Abi' gunabeeman bagüjt reeman Jacob bijch Waj, con espad. <sup>3</sup> Chi baguiaaman bayuladx ree bén Israel ni beenman, dxel gunabeeman gunaaz reeman Bëd. Ni ne goc lën ree dxej lanij pascw chi raw reeman guiadxtil ad yu't levadur. <sup>4</sup> Chi gunaaz reeman Bëd, badxe' reeman laaman ladxguiib abi' gunabee rey Herodes tajp cwaa ree suldad din guinia reeman ro' ladxguiib guin, tib cwaa gaj reeman naj tajp suldad. Din beenman xgab nuzujman Bëd loj ree bén guiedx guin chi nidëd pascw. <sup>5</sup> Zian guyu Bëd ladxguiib, gojp da't reeman laaman. Per gra ree bén rlliladx Jesucrist ad rucwëëzt rbejdx rniab reeman Dios por laaman.

### *Babëë Dios Bëd ladxguiib*

<sup>6</sup> Guxhin zii gajc chi yareguiaal cwëë Herodes Bëd loj ree bén guiedx guin, naga'yëjs Bëd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguiib guin. <sup>7</sup> Dxejzci bidxin tijb xi anjl Dios abi' basni tijb guij lën ladxguiib guin, dxel baqui' anjl guin cwë'lën Bëd persi bacwëënman laaman, rëbaman lojman:

—jCari bixche!

Loj hor zii gajc biajb ree caden naxii yaa Bëd, <sup>8</sup> abi' rëb anjl guin lojman:

—Guxhiidxi'ch lënl balëë tëë xgurëchil.

Chi ma been Bëd zian dxel rëb anjl guin:

—jGojt xcajpil, tanal naj!

<sup>9</sup> Laa barii gajc Bëd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'xhchaalzaman. <sup>10</sup> Abi' gudëd reeman loj tibcwaa ree suldad guin, dxel gudëd reeman loj stibcwaa reeman. Chi bidxin reeman ro' portguiib ni rarii runejz guin, dxel xtijbzán bixal abi' barii reeman. Abi' chi bidxin reeman tijb xquin, yagaj basa'n anjl guin Bëd. <sup>11</sup> Dxel gogbee Bëd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëëman naj loj Herodes, con loj gra ni nüjnnë ree bén Israel naj.

<sup>12</sup> Chi bayagbee Bëd ni guzacaman, dxel baguiajman lidx Li, xniaa Waj, bén la gajc Marcw, lod riga' zien ree bejn cabejdx canab reeman Dios. <sup>13</sup> Chi gulajw Bëd ro' port, dxel brii tijb biin la Rode ziquiaam chunin. <sup>14</sup> Per chi bayünbeem cha' Bëd, dád babaam, dxel luar nixhialim ro' port guin, baxüünm bicojnm guial za' Bëd ro' port guin. <sup>15</sup> Abi' rëb reeman lojm:

—jRajc guijquil!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

<sup>16</sup> Per Bëd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. <sup>17</sup> Abi' been Bëd sen loj reeman din yacwëëz ro' reeman, dxel beman diidx xhienaag babëë Dios laaman ladxguiib. Abi' rëbaman loj reeman:

—Gol be ni guie loj Jacob në loj gra ree bén rlliladx Jesucrist.

Dxelri briiman yagaj zëman lood ren.

<sup>18</sup> Chi bareguiaal, ad radxejlt xhie güün ree suldad guin guial ad ragbeet reeman xhienaag barii Bëd ladxguiib guin. <sup>19</sup> Dxel gunabee Herodes chigdiil reeman Bëd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman luguiedx Cesarea.

### *Güjt rey Herodes*

<sup>20</sup> Balen Herodes bén Tiro në ree bén Sidón, per baya'n ree bén guin diidx din chigneenë reeman laaman. Chi been reeman gan guneenë reeman bén brii laj Blasto zagdxe, tijb bén naj xbejn rey Herodes, dxel gunee Blasto por laa reeman loj rey guin din lox til reeman, din guidibzci lod rniabee rey guin zëëd ni raw reeman. <sup>21</sup> Bazuj Herodes xhie dxej guinieenëman laa reeman abi' dxej zii gojt xab zagdxeman, gurej loj

xyagxhilaman lod rniabeeman, zianz guzuloj guneenëman laa reeman. <sup>22</sup> Dxel guzuloj gurixdiaj ree bén guin, rëb reeman:

—¡Ad bejntan canee, tijb diosan!

<sup>23</sup> Loj hor zii gajc badëë tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxe luar nuza't reeman Dios zagdxe.

<sup>24</sup> Per xtiidx Dios care'chzi care'chan gra ladczi abi' gra ladczi cayajcxhiey ree bén rililadx laaman.

<sup>25</sup> Chi ma badëëd ree Bernabé con Saulo ni guxhaal ree bén Antioquía, dxel baza reeman Jerusalén, binë reeman Waj, bén la gajc Marcw.

## 13

### *Guzuloj Bernabé con Saulo bigtie'ch reeman xtiidx Dios*

<sup>1</sup> Loj ree bén rililadx Jesucrist, bén zojb ree Antioquía, no'ch ree bén rudëëd xtiidx Dios loj ree bejn në ree bén rulüü xtiidxaman. La reeman Bernabé, Simón bén rniee reeman Benya's, Lucio bén Cirene, Saulo con Manaén bén guni'snë Herodes tijbzi, bén gunabee Galilea. <sup>2</sup> Tijb dxej chi naba'n reeman, la'tgaj cabejdx canab reeman cuza't tëë reeman Dios zagdxe, rëb xSprijt Dios loj reeman:

—Gol bacaabee Bernabé në Saulo din güün reeman dxiin rënan güün reeman.

<sup>3</sup> Chi gulox guba'n reeman gurejdx tëë reeman Dios, dxel guxhoob yaa reeman guijs Bernabé con Saulo din gagnë Dios laa reeman abi' bazaadiidxnë reeman laa reeman.

### *Bernabé con Saulo wej reeman Chipre*

<sup>4</sup> XSprijt Dios naj bén guxhaal Bernabé con Saulo, zë reeman Seleucia, ni guyu reeman loj barcw, zë reeman yuj la Chipre, ni riga' loj nijsdoo. <sup>5</sup> Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lën ree xyadoo ree bén Israel. Në Waj binë reeman din güünman laa reeman yudar. <sup>6</sup> Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bén Israel laman Barjesús, rajcaman guialbidxaa, rusquieeman bejn ree, rëbaman guial laaman naj bén rudëëd xtiidx Dios loj ree bejn. <sup>7</sup> Barjesús guin rnieenëman Sergio Paulo zagdxe, bén naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiajgaman xtiidx Dios. <sup>8</sup> Per bénbidxaa guin (con diidx grieg laman Elimas) guyënman nudxoonman guial nililadx Sergio Paulo xtiidx Dios. <sup>9</sup> Abi' Saulo, bén la gajc Pab, rniabee xSprijt Dios luxdooman guidiblagaa, baguiaadixjchaman loj bénbidxaa guin, <sup>10</sup> rëbaman:

—¡Xi'n xindxab lüj, ganax rusquieel, ganax niguijdx rüjnl, ad rëntczil ni zagdxe! ¿Xt goc gudëël mod chinal ree bejn xnejz nali Dios? <sup>11</sup> Yan gudëëd Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcajy Elimas abi' ad gojctri nuguaaman, dxel raguiilaman chu guiniaaz yaaman guial ad rajctri ruguaaman. <sup>12</sup> Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

### *Bidxin Pab con Bernabé niz Pisidia*

<sup>13</sup> Chi ma gudëd gojc zian, guyu Pab con ree xcompniaraman loj barcw luguiedx Pafos abi' zë reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén. <sup>14</sup> Dxel barii reeman guiedx Perge, zë reeman luguiedx Antioquía ni riga' niz Pisidia. Abi' dxej raziiladx ree bén Israel, guyu reeman lën xyadoo ree bén Israel zianz gurej reeman. <sup>15</sup> Dxel chi gulox biil bén biil tib lajt loj libr bacaa Moisejs në loj libr bacaa ree bén badëë xtiidx Dios loj ree bejn, gunee ree bén rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bén riga' guie din gudëëdi consejw loj reeman, zajc guiëbidan yan.

<sup>16</sup> Dxel guzuli Pab, beenman sen loj reeman din yacwëëz ro' reeman, dxel rëbaman:

—Bén Israel, në gra ree bén rdxeb Dios, gol bacaagdiajg: <sup>17</sup> Dux Dios ree, nayajc ree bén Israel, gulejman dux béngulal ree abi' laaman been persi gojcxhiey reeman, chi sta zobj reeman zi'c benzit niz Egipto. Dxel con xguialrniabeeman babëëman laa reeman Egipto. <sup>18</sup> Abi' baslejnguicaman laa reeman loj tiuu ijz ni guzu reeman niz lod naj ganax yujbidx, <sup>19</sup> baniyt tëëman gajdx ree nacion ni gure Canaán persi badëëman guidxliuj guin ree loj dux béngulal ree. <sup>20</sup> Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bén badëëd xtiidx Dios loj ree bejn gojc xjuejs bigra reeman. <sup>21</sup> Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bén zëëd loj xdiaa Benjamín persi gunabeeman laa reeman tiuu ijz. <sup>22</sup> Chi bisüd Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isaf, nabanx zi'c rënan, güün tëëx cumplid da diidxan guial güünx gra zi'c rënan.” <sup>23</sup> Abi' yan zi'c gajczi rëb Dios, loj gajc xdiaa rey Davi, brii Jesús bén guxhaalaman din yabëëman bén Israel ree loj dol. <sup>24</sup> Chi gad Jesús gui't, Waj bén baroobnijs bejn ree, bagojnman gra ree bén Israel guial rayal yayüjn reeman xgab por xtol reeman tiobnijs tëë reeman. <sup>25</sup> Chi ma zidyob yadiblagaa xguialnaban Waj, dxel rëbaman: “Ad najtan bén naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

<sup>26</sup> Yan, dugra ree nayajc ree xdiaa Abraham në gra los demazri ree bén rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol. <sup>27</sup> Per ree bén Jerusalén con ree xguxtis reeman ad bayagbeet reeman Jesús. Ad gogbee tëët reeman xhie rën guiëb xtiidx Dios ni bacaa ree bén badëëd ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. <sup>28</sup> Abi' majsi achetczi xtol Jesús guyu, per ni'czi zian rëb gajc reeman loj Pilato guial nabeeman guiëtaman. <sup>29</sup> Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman. <sup>30</sup> Per Dios basban laaman, <sup>31</sup> dxel loj zien dxej balüülojman loj ree bén binë laaman chi briiman niz Galilea zëman Jerusalén, abi' yan laa reeman naj bén rniee por laaman loj ree bejn.

<sup>32</sup> Zeel caygojnman lëjt diidxza'c guin ree, guial promejs been Dios loj ree dux béngulal ree, <sup>33</sup> ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nan abi' diizd yan ma rajpil guialrniabee zi'cgajc naj.” <sup>34</sup> Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj günle' lëjt zi'c benan promejs loj Davi.” <sup>35</sup> Abi' rëb tëë stib lajt loj xtiidxaman: “Ad zatiëjbtil xhin xcuerp xi'nl, bén naya nali.” <sup>36</sup> Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. <sup>37</sup> Per xcuerp Jesús bén basban Dios, ad guxintan. <sup>38</sup> Zeel caygojnman lëjt compniar din gagbeedi guial por laaman ma yu' perdon par dux tol ree. <sup>39</sup> Graczi bén rliladx Jesucrist ma gojc perdon gra xtol reeman ni ad gojct ni ajc perdon por ley badëë Dios loj Moisejs. <sup>40</sup> Zeel gol gojp cudad chitëë saquidi zi'c bacaa ree bén badëë xtiidx Dios loj ree bejn, lod rëb:

<sup>41</sup> Gol bacaagdiajg, lëjt bén ruze' ree da diidxan,

gol badxalojdi gol gunidloj tëë.

Din loj ree dxej nabandi gün reen ni xt ni'quid zaliladxtidi,

majsi chu na laa reen lojdi.

<sup>42</sup> Chi barii Pab con Bernabé lën xyadoo ree bén Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii. <sup>43</sup> Chi barii ree bén guin lën yado guin, zien da't reeman binal Pab con Bernabé, zi'c ree bén Israel zi'c ree bén ad najt bén Israel, bén rën ree Dios zi'cgajc ree bén Israel. Abi' rëb Pab con Bernabé loj reeman din sudxi'ch reeman loj nejj zagdxeguredx Dios laa reeman guial rënman laa reeman.

<sup>44</sup> Chi bidxin dxej ni raziiladx ree bejn, gra b n luguiedx guin bado'p din gucaagdiajg reeman xtiidx Dios. <sup>45</sup> Per chi baguiaa ree b n Israel zien da't ree bejn riga' yagaj, dxel guyu guialnad dloj luxdoo reeman abi' guzuloj caneeguijdx reeman canee t e reeman diidxguijdx loj Pab. <sup>46</sup> Dxel sin guialrdxeb badxi' Paban con Bernab  loj reeman, r b reeman:

—Yaloy l jt rayal yagojnan xtiidxza'c Dios, l jt najdi b n Israel, per yan ad r ntidi gucaagdiajgudi laan, dxel l jt gajc cul u guial ad zajct yayalidi guialnaban tiblayaa con Dios. Yan ma yugtie'chan diidxza'c guin ree loj ree b n ad najt b n Israel. <sup>47</sup> Din zian gunabee dux Dad ree Dios dunujn, chi r baman tib lajt loj xtiidxaman:

Nuzun l j zi'c guij par gra ree nacion,  
din chel guidibchicniaa loj guidxliuj chicojnl  
xhienaag gac ree bejn perdon.

<sup>48</sup> Chi biguejn ree b n ad najt b n Israel zian, dxel babaa reeman, guzuloj r b reeman guial zagdex naj xtiidx Dios, abi' graczi b n ma naj yayal guialnaban tiblayaa con Dios, bililadx reeman xtiidxaman. <sup>49</sup> Zianan zeel bire'ch xtiidxza'c Dios guidib niz ni. <sup>50</sup> Per ree b n Israel batiaalguiiw reeman b ngunaa rej ree laydoo zianczi naj t e reeman b n zobjloj luguiedx zii, n  ree xinguaaw naj gajc xin zobjloj, din sunal reeman Pab con Bernab  xt yab e reeman laa reeman ni. <sup>51</sup> Dxel Pab con Bernab  gudxiyp guxyuj guia' reeman zi'c tijb sen guial ad bazoobt ree b n guin diidx, dxel z  reeman Iconio. <sup>52</sup> Per ree b n bililadx Jes s niz ni, ma rniabee xSprijt Dios luxdoo reeman guidiblagaa abi' d d rabaa reeman.

## 14

### *Bidxin Pab con Bernab  Iconio*

<sup>1</sup> Luguiedx Iconio, Pab con Bernab  guyu reeman l n xyadoo ree b n Israel. Abi' zi'c bal u reeman xtiidxza'c Jesucrist, zien da't reeman bililadx, zi'c ree b n Israel zi'c ree b n ad najt b n Israel. <sup>2</sup> Per ree b n Israel ad bililadxt batiaalguiiw reeman b n ad najt ree b n Israel persi guzuloj been reeman xgab mal por ree b n rliladx Jesucrist. <sup>3</sup> Per ni'czi zian, xchej da't guzuj ree ap stoles guin ni, abi' sin guialrdxeb gunee reeman xtiidx Dios guial rliladx reeman Jesucrist, laaman bad d guialrniabee loj reeman persi been reeman zien da't ree milagr n  mazri ree ni ren, persi bal u Jesucrist guial diidxli naj ni r b reeman xcwent Dios. <sup>4</sup> Per ree b n luguiedx zii gojc reeman tio'p lala', garol reeman guzun  ree b n Israel zagarol reeman guzun  ap stoles guin ree. <sup>5</sup> Dxel zi'c ree b n Israel zi'c ree b n ad najt b n Israel, baya'n reeman diidx con ree guxtis din til  reeman Pab con Bernab  gucaaguij t e reeman laa reeman. <sup>6</sup> Abi' chi gogbee Pab con Bernab  zian, laa zia gajc reeman Listra con Derbe, guiedx riga' ree niz Licaonia, n  gra ree guiedx riga' niz ni, <sup>7</sup> gunee reeman xtiidxza'c Jesucrist.

### *Bacaaguij reeman Pab Listra*

<sup>8</sup> Luguiedx Listra guyu tijb xinguaaw ad rajct rza, ad guzatczix guial naxin guia'x diizd chi golix abi' zobjix <sup>9</sup> cucaagdiajguix ni r b Pab. Chi baguiaa Pab laax, gogbeeman guial rliladxix par yayajquix. <sup>10</sup> Abi' gunee man rejs, r baman:

—jBisu, guzuli zagdex!

Loj hor zii gajc gutiajs xin guin, guzulix abi' guzuloj cazax. <sup>11</sup> Chi baguiaa ree bejn ni been Pab, guzuloj canee reeman rejs diidx Licaonia, r b reeman:

—Dios naj ree zi'c bejn ma biguiajt lod nadxu' ree.

<sup>12</sup> Abi' r b reeman guial Bernab  naj dios J piter, guiad Pab naj dios Mercurio guial laaman naj b n rniee loj reeman. <sup>13</sup> Abi' ro' guiedx guin niz lod ru bejn naj xyadoo J piter, dxel bixhioz yu' l n yadoo guin bin man go'n ree con ree guiaa, abi' laaman con ree b n guin guy n reeman nugijt reeman go'n guin ree din ni n reeman ap stoles guin ree zi'c xdios reeman. <sup>14</sup> Per chi gogbee Pab con Bernab  zian, gudixya' xab reeman, guz b reeman la d ree b n guin, rbixdiaj reeman r b reeman:

<sup>15</sup> —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rüjndi, din achetcki lasajc reen. Mejorli gol binal xnejz Dios naban, bén been xanyabaa në guidxliuj nëtëë nijsdoo con gra ni yu' loj reen. <sup>16</sup> Tiamp gulal Dios baslaa been ree bejn ni guyëntzi reeman. <sup>17</sup> Per ni'czi zian, zianczi balüüman chu najman por ree ni zagdx ni rüjnman. Din laaman naj bén razaladx guia con guialnaza'c abi' razaladxaman ni radaaw ree din chu' du luxdoo ree zagdx. <sup>18</sup> Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bén guin go'n guin ree din niën reeman laa reeman zi'c xdios reeman.

<sup>19</sup> Per bëlzi ree bén Israel zojb Antioquía në Iconio, chi bidxin reeman luguiedx Listra been reeman gan batiaalguiiw reeman bén luguiedx guin ree. Dxel bacaaguij reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin. <sup>20</sup> Per chi bido'p ree bén rliladx Jesucrist gadëd lod naga'man, dxel bixchewan, bayuman luguiedx guin stijb. Chi bareguiaa briinëman Bernabé zë reeman luguiedx Derbe.

<sup>21</sup> Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra në Iconio nëtëë Antioquía. <sup>22</sup> Luguiedx zii ree badxe' reeman luxdoo ree bén rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. <sup>23</sup> Abi' tëë loj tijb gaj ree guiedx guin bacaabee reeman bengol nabee ree loj ree bén rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bén ma bililadx reeman.

#### *Badxin ree Pab con Bernabé Antioquía ni riga' niz Siria*

<sup>24</sup> Chi baza ree Pab con Bernabé niz Pisidia, bidxin reeman niz Panfilia. <sup>25</sup> Abi' gunee reeman xtiidx Dios luguiedx Perge, dxel zë reeman guiedx Atalia. <sup>26</sup> Ni guyu reeman loj barcw zë reeman Antioquía, luguiedx lod basa'n ree los demazri ree bén rliladx Jesucrist laa reeman con Dios din gagnëman Pab con Bernabé din guitie'ch reeman xtiidxaman. Abi' dxiin guin naj ni ma baloox reeman. <sup>27</sup> Dxel chi bidxin reeman Antioquía, bato'p reeman bén rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejz din chililadx ree bén ad najt bén Israel Jesucrist. <sup>28</sup> Ni guzu Pab con Bernabé xchey, guzunë reeman bén Antioquía rliladx ree Jesucrist.

## 15

#### *Guyu gabilt Jerusalén*

<sup>1</sup> Lën ree dxej zii bidxin bëlzi ree bén Judea luguiedx Antioquía. Abi' guzuloj rëb reeman loj ree bén rliladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon. <sup>2</sup> Dxel Pab con Bernabé dád zro' gudijldiidx reeman con ree bén guin. Dxel bacaabee ree bén rliladx Jesús Pab në Bernabé, në ree ben ren din che reeman Jerusalén chigneenë reeman apóstoles guin ree, con ree bengol rniabee loj ree bén rliladx Jesucrist din guguaa reeman xhienaag güün reeman xcwent sen guin.

<sup>3</sup> Abi' badxe'nejz ree bén Antioquía rliladx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bén rliladx ree Jesucrist, bén zojb ree niz ni guial ma rliladx ree bén ad najt ree bén Israel xtiidx Dios. Abi' graczi bén ma rliladx Jesucrist niz ni, dád babaa reeman chi biguiejn reeman zian.

<sup>4</sup> Chi bidxin Pab con Bernabé Jerusalén, dxel baca' ree bén rliladx Jesucrist laa reeman, con ree apóstoles, con ree bengol rniabee loj ree bén rliladx Jesucrist. Abi' be ree Pab diidx con Bernabé gra ni been Dios con laa reeman. <sup>5</sup> Per yu' ree bënfarisew ma rliladx Jesucrist, guzuli reeman abi' rëb reeman:

—Bén ad najt ree bén Israel abi' ma rliladx reeman Jesucrist, rüjn naguiejn chu' reeman sen ru ree bén Israel, gagbee tëë reeman guial rayal chinal reeman xley Moisejs.



<sup>6</sup> Dxel bado'p ree xi apóstoles Jesús con ree bengol rniabee loj ree bén rliladx Jesucrist din guidoon xhienaag güün reeman. <sup>7</sup> Guial tant canee reeman por zian, dxel guzuli Béd, rëbaman loj reeman:

—Gradi compniar raliduladx ree Jesucrist, lëjt ragbee guial diizd gocli gulej Dios naj lojdi din chignen xtiidxza'c Jesucrist loj ree bén ad najt bén Israel din chililadx reeman laaman. <sup>8</sup> Abi' Dios bén nünbee luxdoo graczi ree bejn, balüüman guial naj reeman xbejnman guial ma badëéd xSprijtaman loj reeman zi'cgajc baneeman du loj ree. <sup>9</sup> Zi'c ruguiaa Dios dunuj ree ziangajc ruguiaaman laa reeman, din zi'c basiaman du luxdoo ree ziangajc basiaman luxdoo reeman guial ma rliladx reeman Jesucrist. <sup>10</sup> Yan, ¿chexc zeel ad ridxga'tidi ni ma been Dios abi'za rniabeedi chinal ree bén rliladx Jesucrist ley ni ni'qui dunuj ree ni'qui dux béngulal ree ad gojct naguieen ree zi'c rniabee ley guin? <sup>11</sup> Dunuj ree rayagbee guial por ni zagdx ni been Dad Jesucrist, been Dios dux tol ree perdon zi'cgajc laa reeman.

<sup>12</sup> Dxel bacwëéz ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree bén ad najt bén Israel. <sup>13</sup> Chi gulox gunee reeman, dxel nëgajc Jacob rëb:

—Gradi compniar raliduladx ree Jesucrist, gol bacaagdiajg: <sup>14</sup> Simón Béd be diidx duloj ree xhienaag guzuloj gulej Dios bén ad najt ree bén Israel din gac reeman xbejnman. <sup>15</sup> Gra ni ma gojc naj zi'c ni bacaa ree bén badëë xtiidx Dios loj ree bejn loj xtiidxaman lod rëb:

<sup>16</sup> Chi ma gojc zian,  
yayünxhiey ree da bejnan mazri zi'c goc chi naban Davi,  
gacxhiey reeman por ree bén sta naban,  
zi'c guban ree bejn xtiamp Davi  
abi' por laa reeman yayajcxhiey ree da bejnan.

<sup>17</sup> Din yaguiil ree los demazri ree bejn guial guiën reeman naj,  
gra ree bén nacion ren, yaguiil guial guiën reeman naj,  
bén ma gule reen din gac reeman da bejnan,  
bén guiguiejn ree guza't ree bejn naj.

<sup>18</sup> Zian na Dios, bén cugojn bejn ree gra ree nine diizd tiamp gulal.

<sup>19</sup> 'Zeel naladxan ad rayalt chu güün naguiejn bén ad najt ree bén Israel par chinal reeman ley, laa reeman guial ma basa'n xcostumbr reeman par chinal reeman xnejz Dios. <sup>20</sup> Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëët sunë reeman ben ren bén ad najt lacheel reeman, ad rayalt gaw reeman bëël rberejn ni'qui rejn. <sup>21</sup> Zian yaguie'ch ree loj reeman, din diizd tiamp gulal tijb gaj guiedx yu' bén rulüü laa reeman xhie rën guiëb xley Moisejs ni rool reeman lën ree yadoo dxej raziiladx ree bejn.

<sup>22</sup> Dxel apóstoles guin ree con ree bengol rniabee loj ree bén rliladx Jesucrist, con los demazri ree bén rliladx Jesucrist, rëb reeman gucaabee reeman bén guixhiaalnë reeman Pab con Bernabé din che reeman Antioquía. Abi' bacaabee reeman Judas, bén la gajc Barsabás, në Silas, laa reeman rajp guialrniabee loj ree bén rliladx Jesucrist. <sup>23</sup> Abi' guxhaalnë reeman laa reeman tijb gui'ch ni rëb:

“Dunujn nayajcan xi apóstoles Jesús, con ree bengol rniabee loj ree bén rliladx laaman, në los demazri ree bén rliladx laaman. Ragajpdiozan lëjt bén ad najt ree bén Israel, per nayajc ree compniar raliduladx ree Jesucrist, lëjt zobjidi Antioquía, në los demazri ree bén zobj ree niz Siria nëtëë niz Cilicia. <sup>24</sup> Ma bayagbeen guial yu' ree bén duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güüнди guial na reeman lojdi rayal chu'di sen ni ru ree bén Israel güün tëëdi zi'c rniabee xley Moisejs, per ad dunujtan baxhaal laa reeman. <sup>25</sup> Zeel bado'pan abi' raguie'chan guial zagdx naj yacaabee bëlzi dux compniaran din guidganaj reeman lëjt, guidnë tëë reeman tio'p dux compniaran, Bernabé con Pab, bén rayën da'tan. <sup>26</sup> Zien ree ni guijdx cuchaagloj reeman guial cayüjn reeman sirv loj Dad Jesucrist. <sup>27</sup> Dxel cayxhaalnë'n laa

reeman Judas con Silas, laa reeman na lojdi gra con quijb xtiidx reeman. <sup>28</sup> Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güüнди, ni rayalzi cu'guijquidi naj guial, <sup>29</sup> ad gawidi xbëel ree be ni rbe'c ree bejn loj ni naj xdios reeman, ad gaw tëedi bëel rberejn, ni'qui rejn, ad sunëdi ben ren bën ad najt lacheelidi. Bal gapidi cudad ad züjntidi gra ree nine, zagdxequi güüнди. Gagnë Dios lëjt.”

<sup>30</sup> Zian gojcan, gui'ch guin naj ni guxhaalnë reeman guidap ree bën guin par luguiedx Antioquia. Ni bato'p reeman bën rliladx ree Jesucrist abi' bayü reeman gui'ch guin loj reeman. <sup>31</sup> Chi biil reeman laan, däd nix guyu luxdoo reeman por ree diidx zagdx ni zëed lojn. <sup>32</sup> Abi' Judas con Silas guial nëgajc reeman rajp quiarguiejn par gudëed reeman xtiidx Dios, dxel zien naj ni guneenë reeman bën rliladx ree Jesucrist, bagu' reeman luxdoo reeman con xtiidx reeman. <sup>33</sup> Chi ma gudëd zien dxej za' ree Judas con Silas ni, bazaadiidxnë ree bën rliladx Jesucrist laa reeman din yaguiaj reeman lod za' ree bën guxhaal laa reeman, rëb reeman loj reeman: “Chignë Dios lëjt zagdx.” <sup>34</sup> Per Silas beenman xgab baya'nman ni mazri. <sup>35</sup> Abi' Pab con Bernabë baya'n reeman Antioquia mazri, laa reeman con ree ben ren basnuu balüü reeman gutie'ch tëe reeman xtiidxza'c Jesucrist loj ree bejn ni.

*Ni barojp volt brii Pab biglüüman xtiidx Dios guiedx ren ree*

<sup>36</sup> Chi gudëd tio'p choon dxej, dxel rëb Pab loj Bernabë:

—Yo' stijb yugnaj dux compniar ree bën rliladx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

<sup>37</sup> Bernabë guyën ninë reeman Waj, bën la gajc Marcw. <sup>38</sup> Per Pab ad cwëjbt ninë reeman laaman, din chi we reeman niz Panfilia guro'nladxaman laa reeman, ad binëtraman laa reeman. <sup>39</sup> Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binë Bernabë Marcw, guyu reeman loj barcw zë reeman yuj la Chipre ni riga' loj nijsdoo, <sup>40</sup> dxel gulej Pab Silas din chinëman laaman abi' rëb los demazri ree bën rliladx Jesucrist loj reeman guial chinë Dios laa reeman zagdx. <sup>41</sup> Zianz gudëd reeman niz Siria në niz Cilicia, ragu' reeman luxdoo ree bën rliladx Jesucrist niz ni.

## 16

*Bine ree Pab con Silas Timoteo*

<sup>1</sup> Chi bidxin Pab con Silas guiedx Derbe në guiedx Lистра abi' Lистра bidxaagloj reeman tijb bën rliladx Jesucrist, laman Timoteo, xniaaman naj bën Israel, nëman rliladx Jesucrist guiáad xdadaman naj bën grieg. <sup>2</sup> Graczi ree bën rliladx Jesucrist, bën zojb ree guiedx Lистра në Iconio ruza't laaman zagdx. <sup>3</sup> Dxel rëb Pab chinëman Timoteo, per yaloj badxe'man laaman sen ni ru ree bën Israel, chitëe xhie guiëb ree bën Israel riga' niz ni, din gra reeman ragbee guial naj xDadaman bën grieg. <sup>4</sup> Graczi ree guiedx ni gudëd reeman bagojn reeman bën rliladx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree bën rliladx laaman Jerusalén. <sup>5</sup> Zianan zeel guzudxi'ch ree bën niz ni loj guialrliladx reeman Jesucrist, abi' guixie guixie gojcxhie mazri ree bën rliladx laaman.

*Balüüloj tijb bën Macedonia loj Pab*

<sup>6</sup> Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia <sup>7</sup> abi' bidxin reeman niz Misia. Ni been reeman xgab niej reeman niz Bitinia, per ad cwëjb gajct xSprijt Dios niej reeman niz ni. <sup>8</sup> Dxelri gudëdzinejz reeman niz Misia, bidxin reeman guiedx Troas. <sup>9</sup> Yagaj, guxhinzii guzajc Pab zi'c rulüü cane'xhchaalaman. Baguiaaman tijb xinguaaaw zëed niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

<sup>10</sup> Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bën cabejdx dunujn niz ni par yatie'chan xtiidxza'c Jesucrist.

*Bidxin ree Pab con Silas Filipos*

<sup>11</sup> Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis. <sup>12</sup> Yagaj badxoon bio'n Filipos, guiedx mazri zobjloj niz Macedonia, per Rom rniabee guiedx zii, ni badxu'n bëlzi ree dxej. <sup>13</sup> Abi' tijb dxej raziiladx ree bejn, bariin luguiedx guin bio'n tijb ruguiwro', lod rayagbeen rado'p ree bën Israel par cwedx reeman Dios. Abi' badxu'n baneen xtiidxza'c Jesucrist loj ree búngunaa bado'p yagaj. <sup>14</sup> Tijb ree búngunaa guin la Lidia, najman bën Tiatira, ruto'man lajd zagdxe ni culor murad. Diidxli rdxebaman Dios abi' cucaagdiajgaman. Dios guxhal xquiarguejnman din gucaagdiajgaman zagdxe gra ni rëb Pab. <sup>15</sup> Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliladxidi guial ma rliladxan Jesucrist, gol baya'n lidxan.

Dxel beenman nagueijn baya'nan lidxaman.

<sup>16</sup> Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdoom, abi' por xguialrniabee xindxab guin rnieeya'm guíaad ree bën guzii laam dád zro' milia rüjn reeman gan por dxiin guin. <sup>17</sup> Dxel bidnalim Pab con dunujn, rbidxa'm rëbim:

—Bën guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

<sup>18</sup> Zien dxej da't beenm zian, xt chi balenya' Pab, dxel bayejcaman rëbaman loj xindxab yu' luxdoom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdoom.

<sup>19</sup> Per chi gogbee ree bën guzii laam guial ad zajctri güünm gan milia par laa reeman, dxel gunaaz reeman Pab con Silas, binë reeman laa reeman roylay loj guxtis. <sup>20</sup> Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadjl du ladx ree, <sup>21</sup> abi' rulüü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

<sup>22</sup> Dxel wajs gra ree bën guin contr laa reeman, abi' gunabee ree guxtis guin gulëë xab Pab con Silas din quin reeman laa reeman con var. <sup>23</sup> Chi gulox gudijn da't reeman laa reeman, dxel bilu' reeman laa reeman ladxguiib abi' gunabee reeman bën rajp ro' ladxguiib guin din gapdxi'chaman laa reeman. <sup>24</sup> Chi bigueijn bën rajp ro' ladxguiib guin zian, dxel bilu'man laa reeman xt lën quart bigra yu' lën ladxguiib guin, guxhiiman guia' reeman loj tabl naal con caden.

<sup>25</sup> Per garol guiaal, la'tgaj cabejdx canab Pab con Silas Dios, cayool tëë reeman cant par laaman, dxel cucaagdiajg los demazri ree bën yu' ladxguiib guin. <sup>26</sup> Dxel tijbzi golp guzuloj xudoxh, niz ni niz guie rurliá xcimiant ladxguiib guin. Loj hor zii gajc bixal gra ree xportan abi' baxiec ree caden naxii gra ree bën yu' lënan. <sup>27</sup> Chi baban bën rajp ro' ladxguiib guin abi' baguiaaman zobjyal gra ree xportan, gulëë xi espadaman din nugüjt laagajcaman guial gunaladxaman gra ree bën yu' ladxguiib guin ma baxüün. <sup>28</sup> Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

<sup>29</sup> Laa gunab gajc bën guin tijb guij, dxel ruxüünman guyuman, rnijman guial rdxebaman, bigzuxibaman loj Pab në loj Silas. <sup>30</sup> Dxel babëëman laa reeman, gunabdiidxaman loj reeman, rëbaman:

—Dad, gol guna, ¿xhie rayal günan din güün Dios naj perdon?

<sup>31</sup> Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

<sup>32</sup> Abi' be reeman xtiidx Dios lojman con loj gra ree bën zobj lidxaman. <sup>33</sup> Zianz guxhin zii gajc gudiibaman lod nadxeelguijdx reeman, dxel gurobnijsaman con gra xfamilaman.

<sup>34</sup> Abi' bignëman laa reeman lidxaman, dxel badëëman ni gudaw reeman. Guíaad laaman dád nix yu' luxdooman con gra xfamilaman Guial ma rliladx reeman Dios.

<sup>35</sup> Chi bareguiaal, guxhaal ree guxtis guin suldad ree persi biguiedx reeman loj b́en rajp ro' ladxguiib guin guial guslaaman Pab con Silas. <sup>36</sup> Abi' ŕeb b́en rajp ro' ladxguiib guin loj Pab:

—Ma na ree guxtis guial guslaan ĺejt. Yan ma zajc yaguiajdi ad chu'di xgab.

<sup>37</sup> Per ŕeb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree b́en guiedx, ni'quid baneet reeman mod nad́eédan cwent loj reeman con badxe' reeman dunujn ladxguiib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgaléé reeman dunujn.

<sup>38</sup> Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. <sup>39</sup> Dxel wej reeman bignab reeman perdon loj Pab con Silas babéé téé reeman laa reeman, ŕeb reeman loj reeman din yaza reeman luguiedx guin. <sup>40</sup> Chi barii reeman ladxguiib, wej reeman lidx Lidia. Zianz chi gulox guneené reeman los demazri ree b́en rliladx ree Jesucrist din chu' luxdoo reeman sudxi'ch reeman loj ni rliladx reeman, dxel baza reeman.

## 17

### *Bidxin ree Pab con Silas Tesalónica*

<sup>1</sup> Chi zé Pab con Silas, gudéd reeman niz Anf́ipolis né niz Apolonia zianz bidxin reeman luguiedx Tesalónica lod yu' tijb xyadoo ree b́en Israel. <sup>2</sup> Abi' zi'c goc xcostumbr Pab, wejman lén yadoo guin, choon dxej raziiladx ree bejn. Wejman bigneenéman laa reeman xtiidx Dios. <sup>3</sup> Bagojnman balüü tééman laa reeman loj xtiidx Dios lod ŕeb guial naj sagdiaj Cristo, abi' chi ma güjtaman yabanman stijb. Ŕebaman loj reeman:

—Jesús ruzat gajcan lojdi, laagajcaman naj Cristo din yabééman dunuj ree loj dol.

<sup>4</sup> Yu' ree b́en Israel guin bililadx abi' bachajg reeman Pab con Silas. Né zien ree b́en grieg ŕen Dios bililadx, ńetéé zien ree béngunaa zobjloj bililadx Jesús. <sup>5</sup> Per ree b́en Israel ad bililadxt Jesucrist, gudédloj reeman abi' bato'p reeman benmal ziza ree lunejz persi guléé reeman wadjl luguiedx guin, abi' guyu reeman lidx Jasón, raguiil reeman Pab con Silas din cwéé reeman laa reeman guzuj reeman laa reeman loj ree b́en guiedx guin. <sup>6</sup> Per guial ad badxejlt reeman laa reeman yagaj, dxel guxoobyuj reeman Jasón né ree ben ren b́en rliladx Jesucrist, biné reeman laa reeman loj guxtis, rbixdiaj reeman, ŕeb reeman:

—Tio'p ree xin cabéé wadjl guidib guidxliuj, ma bi't reex guie, <sup>7</sup> abi' lidx Jasón zobj reex. Laa reex con gra ree b́en nuchajg laa reex, ad cayüjnt reex zi'c rniabee xley rey César, din ŕeb reex guial yu' zatijb rey la Jesús.

<sup>8</sup> Chi biguiejn ree guxtis guin zian con ree bejn, gra loj xgab been reeman. <sup>9</sup> Per Jasón con los demazri ree b́en guyu ladxguiib guin gudijx reeman loj ree guxtis guin, dxel baslaa reeman laa reeman.

### *Bidxin Pab con Silas Berea*

<sup>10</sup> Guxhinzii gajc, guxhaal ree b́en rliladx Jesucrist Pab con Silas luguiedx Berea. Chi bidxin reeman ni, wej reeman lén xyadoo ree b́en Israel. <sup>11</sup> Mazri benza'c naj ree b́en Israel guin guial loj ree b́en Israel zobj Tesalónica. Con gan bacaagdiajg reeman ni ŕeb Pab. Abi' guixie guixie rusiid reeman xtiidx Dios, din gagbee reeman waliqui ni ŕeb Pab ya. <sup>12</sup> Zeel dád zien reeman bililadx Jesucrist, ńetéé zien b́en grieg bililadx laaman zi'c ree xinguaaw zi'c ree béngunaa zobjloj niz ni. <sup>13</sup> Chi gogbee ree b́en Israel zobj Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiiw reeman bejn ree din guidxe'ch reeman Pab. <sup>14</sup> Per ree b́en rliladx Jesucrist ad goglaat reeman, laa guxhaal gajc reeman Pab niz ro' nijsdoo. Guiáad Silas con Timoteo baya'n reeman mazri Berea. <sup>15</sup> Abi' ree b́en biglu'nejz Pab, xt Atenas biné reeman laaman. Chi baza reeman ni, bigné reeman xruson Pab din diob che Silas con Timoteo chinal reeman laaman.

### *Bidxin Pab Atenas*

<sup>16</sup> La'tgaj cabéz Pab guidxin Silas con Timoteo luguiedx Atenas, guyunayaman guial baguiaaman zien da't ni rajp ree bejn niz ni zi'c dios. <sup>17</sup> Zeel wejman lén xyadoo ree b́en

Israel bigneenëman laa reeman në los demazri ree bén rën Dios zi'c ree bén Israel, guixie guixie rnieenëman chutëez bén rdxaaglojman niz galay guiedx guin. <sup>18</sup> Guneenë tëëman garol ree bén zinal ni balüü bén brii laj epicureo, në za garol ree bén estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tëë reeman rëb:

—Rulüü xtiidx dios ren ree bén ad naguieenbeet ree catie'chix.

Rëb reeman zian guial caneenë Pab laa reeman xtiidxza'c Jesucrist në xcwent guial babanman stijb. <sup>19</sup> Dxel binë reeman Pab tijb luar la Areópago, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie? <sup>20</sup> Din rül diidx du lojn ni ad rayagbeetan, zeel rayënan yayagbeen xhie rën guiëban.

<sup>21</sup> Graczi ree bén Atenas, con los demazri ree benzit zojb ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

<sup>22</sup> Dxel guzuli Pab galay reeman lod la Areópago, rëbaman:

—Bén Atenas, por graczi ni ma baguian, ma gogbeen guial dád zien ree xdiosidi. <sup>23</sup> Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

<sup>24</sup> 'Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn. <sup>25</sup> Ad riaadx tëëtaman chu güün xhienin par laaman, din laaman naj Bén razaladx bi nabajnnë' ree, laaman razaladx guialnaban duloj ree në ree ni rayaadx ree.

<sup>26</sup> 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tëë cwe reeman. <sup>27</sup> Din yaguiil reeman Dios majsi zi'c chi rgan bejn chi raguuilaman xhienin, zian güün reeman din yadxejlaman. Majsi diidxliczi ad zijtt za'man par gra bejn. <sup>28</sup> Din por Dios nabajn ree, por laaman raniib ree radxoo tëë ree, por laaman nadxu' ree loj guidxliuj. Zi'c rëb tëë ree xbénrignia'di, chi rëb reeman: “Dunuj ree nayajc xi'n Dios.” <sup>29</sup> Zeel bal nayajc ree xi'n Dios, ad rayalt yaguieen ree xgab guial Dios najné or, o plajt, o guiaj ya zi'c naj ni rüjn ree bejn zi'c naj xixgab reeman. <sup>30</sup> Tiamp gulal cwëjb Dios been ree bejn zi'c naladx reeman guial achetcki ragbee reeman, per yan gra ladczi canabeeman gra ree bejn din yayüjn reeman xgab por xtol reeman. <sup>31</sup> Din Dios ma gulej tijb dxej ni yadëéd ree bejn cwent lojman, dxej ni güün xguialguxtisaman. Ma gulej tëëman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

<sup>32</sup> Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—¿Zatijb dxej yasnuu yacaagdiajgan ni canal!

<sup>33</sup> Dxel baza Pab lod za' reeman. <sup>34</sup> Per yu' reeman bachajg laaman, abi' bililadx reeman xtiidx Dios. Loj reeman no'ch tijb Bén zojbloj lën Areópago laman Dionisio, në stijb béngunaa la Dámaris në ree ben ren.

## 18

### *Bidxin Pab Corinto*

<sup>1</sup> Dxel brii Pab Atenas zëman Corinto. <sup>2</sup> Yagaj bidxaaglojman tijb Bén Ponto laman Aquila, zëëdaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree Bén Israel Rom. Dxel wej Pab bitixlojman laa reeman. <sup>3</sup> Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnëman laa reeman persi been reeman dxiin guin. <sup>4</sup> Abi' beegaj dxej raziiladx ree Bén Israel, rej Pab rigneeman xtiidx Dios lën xyadoo ree Bén Israel, zi'c

ree b́en naj ree b́en Israel zi'c ree b́en ad najt b́en Israel raguuilaman mod din chililadx reeman ni ŕebaman.

<sup>5</sup> Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeman loj ree bejn, balúü t́eeman b́en Israel ree guial Jesús naj Cristo b́en cabèz reeman. <sup>6</sup> Per guzuloj bidxe'ch reeman Pab abi' gunee reeman diidxguijdx contr laaman. Dxel gudxijp xabaman zi'c tijb sen guial ad ruzoobt reeman diidx, abi' ŕebaman loj reeman:

—Lèjt gajc rajp dol guial guizèebidi delant loj Dios, ad najt ra'p dol. Diizd yan chiguien xtiidx Dios loj ree b́en ad najt b́en Israel.

<sup>7</sup> Dxel bariiman lèn yadoo guin wejman lidx b́en la Justo, ŕen b́en zii Dios, gajxh gajc yadoo guin naj lidxaman. <sup>8</sup> Abi' Crispo, tijb b́en rniabee lèn xyadoo ree b́en Israel, bililadxaman Dad Jesucrist con gra xfamilaman. Nè zien ree b́en Corinto bililadx chi biguejn reeman xtiidx Jesucrist abi' gurobnijs reeman. <sup>9</sup> Tijb guxhin balúüloj Dios loj Pab, ŕebaman lojman:

—Ad rdxebil, basnuu gunee da diidxan, ad gucwèézil, <sup>10</sup> naj za'nè' lúj, achutczí zajc güün lúj xhienin, din luguiedx guie zien da't bejn naj par naj.

<sup>11</sup> Zianan zeel baya'n Pab Corinto tibijz garol, balúüman b́en guin ree xtiidx Dios.

<sup>12</sup> Per chi goc Galión gobernador Acaya, b́en Israel ree bachajg lasa' reeman persi gunaaz reeman Pab binè reeman laaman loj gobernador guin, <sup>13</sup> ŕeb reeman loj gobernador guin:

—Xin guie ziza cayüjnx gan bejn ree guial guièn reeman Dios zi'c tijb mod ni ad najt loj ley.

<sup>14</sup> Ma niniee Pab, chi gunee Galión ŕebaman loj ree b́en Israel guin:

—Bal niajcan tijb falt o tijb guialquia narooob beenman zeel zidnèdi laaman, züncwentan lèjt. <sup>15</sup> Per najn por ree diidx nè por laj ree bejn nètèè por xleydi, zeel lèjt gajc gol gunaj xhienaag güündi, ad ŕentan günan guialguxtis xcwent ree ni guin.

<sup>16</sup> Abi' laa babèè gajcaman laa reeman roylay guin. <sup>17</sup> Dxel yagaj gajc gunaaz gra reeman Sóstenes, b́en rniabee lèn xyadoo ree b́en Israel abi' gudijn reeman laaman, per ni'quid beencwents gobernador guin laa reeman.

#### *Badxin Pab Antioquía*

<sup>18</sup> Zienri ree dxej baya'n Pab Corinto. Dxel bazaadiidx nëman los demazri ree b́en rliladx Jesucrist, abi' bazanèman Priscila con Aquila, guyu reeman loj barcw zè reeman niz Siria. Per chi gad reeman grii Cencrea bagaj guijc Pab, por tijb promejs ni beenman.

<sup>19</sup> Chi bidxin reeman Éfeso, ni basa'n Pab Priscila con Aquila, abi' wejman lèn xyadoo ree b́en Israel zobj ree ni, bigneenèman b́en Israel rado'p ree lèn yadoo guin. <sup>20</sup> Abi' guyèn reeman niaglaa Pab ni mazri, per ad cwèjbtaman. <sup>21</sup> Ŕebaman loj reeman:

—Ma yaya'n, bal gagnè Dios naj, guidganan lèjt stijb.

Dxel guyuman loj barcw bazaman Éfeso. <sup>22</sup> Chi bidxinman Cesarea, dxel wejman Jerusalén bicajpdiozaman b́en rliladx ree Jesucrist, dxelri zèman Antioquía. <sup>23</sup> Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia nè niz Frigia, ragu'man luxdoo gra ree b́en rliladx Jesucrist.

#### *Gutie'ch Apolos xtiidx Dios Éfeso*

<sup>24</sup> Tiamp zii bidxin tijb b́en Israel luguiedx Éfeso, laman Apolos, gojlaman Alejandría. Dád radxejlaman diidx par guinieeman abi' dád rajcaman xtiidx Dios. <sup>25</sup> Basiidaman xtiidx Dios, dxel con gan balúüman bejn ree, zagdxè t́èè rúman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. <sup>26</sup> Abi' Apolos, sin guialrdxeb guzuloj caneeman xtiidx Dios loj ree b́en Israel lèn xyadoo reeman, zianz chi biguejn Priscila con Aquila ni ŕebaman, dxel bignè reeman laaman lidx reeman. Ni balúü reeman laaman persi basnuu basiidaman mazri xtiidx Dios. <sup>27</sup> Chi been Apolos xgab cheman niz Acaya, gra ree b́en rliladx Jesucrist b́en za'nè laaman, badxe' reeman luxdooman din cheman, abi' guxhaal reeman tijb gui'ch

loj ree b n rliadx Jesucrist b n zojb ree niz Acaya din yaca' reeman laaman zagdx chi guidxinman niz ni. Chi bidxinman niz Acaya d d beenman yudar b n ma rliadx ree Jesucrist guial gogn  Dios laa reeman. <sup>28</sup> Din delant loj gra ree bejn r baman guial ad laat z  ree b n Israel, abi' achutczi gojc nadxi' xtiidxaman guial graczi ni r baman naj diidxli, bal   t eman loj xtiidx Dios gra luar lod r b guial Jes s naj Cristo b n gul z reeman.

## 19

### *Bidxin Pab  feso*

<sup>1</sup> La'tgaj za' Apolos Corinto, wej Pab guiedx riga' ree niz ruguia', abi' bidxinman  feso, yagaj bidxaaglojman b lzi ree b n rliadx Jesucrist. <sup>2</sup> Abi' gunabdiidxaman loj reeman r baman:

—  Guyu xSprijt Dios luxdoodi ya chi bililaxidi?

Badxi' reeman laan r b reeman:

—Ni'quid waguiejntan guial yu' xSprijt Dios.

<sup>3</sup> Dxel r b Pab loj reeman:

—  Xhieza naag gurobnijsidi?

Badxi' reeman laan r b reeman:

—Barobnijsan zi'c bal   Waj bejn ree.

<sup>4</sup> Dxel r b Pab loj reeman:

—Walican baroobnijs Waj bejn, b n bay jn ree xgab por xtol reeman. Per r baman guial rayal chililadx reeman b n z ed xijchaman abi' laaman naj Jes s, b n naj gajc Cristo.

<sup>5</sup> Chi biguiejn reeman zian, dxel gurobnijs reeman por Dad Jes s. <sup>6</sup> Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cud ed reeman xtiidx Dios loj ree bejn. <sup>7</sup> Loj gra reeman naj cost chiptio'p xinguaaw.

<sup>8</sup> Choon b ew wej Pab l n xyadoo ree b n Israel zojb ni. Sin gualrdxeb guneen man laa reeman xtiidx Dios, guneen man laa reeman abi' beenman naguiejn din g  nman gan chililadx reeman xhienaag naj xgualrniabee Dios. <sup>9</sup> Per garol reeman gojc nad ad guy nt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree b n ma rliadx Jesucrist, bin man laa reeman l n tijb xzcuel b n la Tiranno. Ni bal  man laa reeman guixie guixie, <sup>10</sup> loj tio'p ijz beenman zian. Abi' graczi ree b n zojb niz Asia, zi'c ree b n Israel zi'c ree b n ad najt b n Israel, bacaagdiajg reeman xtiidx Dad Jesucrist. <sup>11</sup> Abi' por xgualrniabee Dios been Pab milagr narooob ree, <sup>12</sup> xt ree xbay Pab n  ree lajd rtia lojman zi'c lantar rign  reeman loj ree b nragxuu, abi' rayajc reeman gualguijdx ni rajc reeman, rarii t e ree xindxab yu' luxdoo reeman.

<sup>13</sup> Per guyu b lzi ree b n Israel ziza rab e reeman xindxab luxdoo ree bejn, abi' guy n reeman n jnn  reeman dxiin laj Dad Jesucrist dxel r b reeman loj ree xindxab guin:

—  Por Jes s b n ruza't Pab, rniabeen l jt, gol barii!

<sup>14</sup> Zian naj ni been gajdx ree xi'ngaan tijb b n Israel la Esceva, b n goc tijb bixhioz rniabee ree bixhioz. <sup>15</sup> Per tib volt tijb ree xindxab guin badxi' xtiidx reeman r baman:

—N nbeen Jes s ragbee t en chunin naj Pab, per l jt ni'quid n nbeetan l jt.

<sup>16</sup> Abi' b n yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. D d gudijnman laa reeman abi' bax  n reeman barii reeman l n  guin, ziladzi reeman nadxeelguijdx t e reeman. <sup>17</sup> Graczi ree b n zojb  feso, zi'c ree b n Israel zi'c ree b n ad najt b n Israel, gogbee reeman gojc zian, dxel d d bidxeb reeman abi' baza't reeman Dad Jes s zagdx.

<sup>18</sup> N  zien ree b n rliadx Jesucrist bidxin abi' delant loj gra ree bejn baneero' reeman gra ni mal ma been reeman. <sup>19</sup> N t e zien ree b n been guialbidxaa bidxinn  xlibr reeman abi' baze'c reeman laa reen delant loj gra ree bejn. Chi bab e reeman cwent

plac lasajc ree libr guin dxel cost tü'pchii mil milia plajt lasajc reen. <sup>20</sup> Abi' zian bire'ch xtiidx Jesucrist biguien tää xguialrniabeeman.

<sup>21</sup> Chi ma gudéd gojc zian, been Pab xgab cheman niz Macedonia në niz Acaya xt yadxinman Jerusalén. Rëb tääman guial chi ma wejman Jerusalén dxelri cheman në Rom.

<sup>22</sup> Abi' guxhaalaman tio'p bën rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

### *Gojc nadxeb Éfeso*

<sup>23</sup> Lën ree dxej zii been ree bën Éfeso nadxeb por xtiidx Jesús. <sup>24</sup> Din Demetrio, bën rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bën rüjnnëman dxiin. <sup>25</sup> Dxel bato'paman laa reeman con ree ben ren bën rüjn gajc ree lasa' dxiin guin, abi' rëbaman loj reeman:

—Gol bacaagdiajg, lëjt ragbee guial loj dxiin guie raguieen ree gan milia ro'. <sup>26</sup> Per yan lëjt ruguiaa rigueijn täädi, Pab ziza cayëbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, në guidib niz Asia. <sup>27</sup> Dxel nadxeb yasëeb dux chiin ree, abi' ad tijbtizi dux chiin ree, në xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, bën rën ree bejn guidib niz Asia në guidib loj guidxliuj.

<sup>28</sup> Chi bigueijn reeman zian, bidxe'ch reeman abi' gurixdiaj reeman rëb reeman:

—jBën zobjloj naj Diana, xdios ree bën Éfeso!

<sup>29</sup> Abi' gurixdiaj ree bën guiedx guin wajs reeman, gunaaz reeman tio'p ree bën Macedonia, Gayo në Aristarco, bën rzanë ree Pab. Dxel guxoobyuj reeman laa reeman, binë reeman laa reeman lod rajc xgabilt ree bën guiedx. <sup>30</sup> Guyën Pab niومان yagaj din ninieenëman bejn ree, per ad cwëjbt ree xcompniaraman, bën ma rliladx ree Jesucrist. <sup>31</sup> Nëtëë loj ree guxtis Asia guin no'ch bëlzi ree xmiw Pab, laa reeman guxhaal ruson lojman guial mejorli ad chu'man ni. <sup>32</sup> Zianz gurixdiaj ree bën guin rëb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. <sup>33</sup> Dxel galay ben zien guin babëë ree bën Israel tijb xcompniar reeman bën la Lejandr din guinieenëman bën guin ree. Dxel beenman sen loj ree bën guin din yacwëëz ro' reeman din guinieeman por ree bën Israel delant loj ree bën guiedx guin. <sup>34</sup> Per chi gogbee reeman guial najman bën Israel, tiblazujzi gurixdiaj reeman cost tio'p hor, rëb reeman:

—jBën zobjloj naj Diana, xdios ree bën Éfeso!

<sup>35</sup> Dxel chi been squiarban luguiedx guin gan bacwëëz ro' reeman, dxel rëbaman:

—Bën Éfeso, gra bénguidxliuj ragbee guial luguiedx guie zianci rniaj ree bejn xyadoo dios Diana abi' rën tää ree bejn dios Diana biajb xanyabaa. <sup>36</sup> Lëjt ragbee guial laan naj ni diidxli, zeel ad rayalt güüнди zian, ad gontzi güüнди xhienin sin xgab. <sup>37</sup> Din bën bidnëdi achet ni mal been reeman yadoo guin, ad wanee tää reeman diidxguijdx dux dios ree. <sup>38</sup> Bal Demetrio con ree xcompniaraman bën rüjnnëman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. <sup>39</sup> Per bal xhieri mazri rëndi, chi gac xgabilt bën guiedx dxel gacan reglad. <sup>40</sup> Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, jabi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

<sup>41</sup> Chi gulox rëbaman zian, dxel bare'ch reeman.

## 20

### *Wej Pab Macedonia në Grecia*

<sup>1</sup> Chi babedxe ree bën Éfeso, gurejdx Pab bën rliladx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. <sup>2</sup> Bitixlojman bën rliladx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia <sup>3</sup> lod guzuman choon bëëw. Ma niومان loj barcw



din niejman Siria, chi gogbeeman guial nuyën ree bën Israel nüjn reeman laaman xhienin. Dxel mejorli beenman xgab bayejcaman niz Macedonia. <sup>4</sup> Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nētëë Gayo, bën Derbe, con Timoteo, në Tíquico con Trófimo, bën niz Asia ree. <sup>5</sup> Gra reeman guned abi' gulëjz reeman Pab con naj Lujc guiedx Troas. <sup>6</sup> Guiáad dunujn chi gudëd lanij ni raw ree bën Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

#### *Basban Pab Eutico*

<sup>7</sup> Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenëman bejn ree, <sup>8</sup> guiáad lëñü ladya lod rado'pan dád zien ree guij re'c. <sup>9</sup> Tijb xinguiag zobj ro' ventan lax Eutico. Guial xchej da't guneenë Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax. <sup>10</sup> Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman: —Ad rdxebidi, nabanquix.

<sup>11</sup> Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa reeman xt bareguiaal. Chi bareguiaal bayunejzaman ziaman. <sup>12</sup> Abi' xin gudidya' ro' ventan guin, nabanx zignë reeman laax, dxel dád nix yu' luxdoo reeman.

#### *Wej Pab Mileto*

<sup>13</sup> Dxel dunujn badxu'n loj barcw baneedan bio'n par luguiedx Asón, lod baya'n nan diidx yaca'n Pab, din beenman xgab nej guial'man ni. <sup>14</sup> Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. <sup>15</sup> Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. <sup>16</sup> Been Pab xgab ad zejtaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

#### *Bazaadiidxnë Pab bejn ree Mileto*

<sup>17</sup> Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zobj ree Éfeso. <sup>18</sup> Chi bidxin reeman dxel rëbaman loj reeman:

—Diizd dxej yaloy ni bialan niz Asia xt yan, lëjt ragbee xhienaag cayünan. <sup>19</sup> Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi ma gudëëdan por ni rën ree bën Israel güünnë reeman naj. <sup>20</sup> Per majsi zian ad bacwëëzt rnin lojdi ni naj ni zagdxe par lëjt, tant delant loj ree bejn në lidxidi balün lëjt. <sup>21</sup> Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab por xtol reeman yadxi' tëë loj reeman loj Dios chililadx tëë reeman Dad Jesucrist. <sup>22</sup> Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni. <sup>23</sup> Tijbzi ni ragbeen naj guial guidib lod ran rugojn xSprijt Dios naj guial ladxguiib në zro' da't guialzi naj ni cabëz naj. <sup>24</sup> Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün tëën mandad ni banee Dad Jesús naj guial gatiechan xtiidxza'caman xhienaag rën Dios dunuj ree.

<sup>25</sup> Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatrudi naj. <sup>26</sup> Zeel ganin lojdi yan guial ad achetri dol ra'pan bal id nabandi xnejz. <sup>27</sup> Din ma bagojnan lëjt gra xhienaag naj xixgab Dios achetczi baquiechan. <sup>28</sup> Yan, gol gojp lëjt gajc, gol gojp tëë ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejnman ma gudijxaman por xtol reeman. <sup>29</sup> Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliladx ree Jesucrist. <sup>30</sup> Loj gajquidi grii ree bën gulüü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios. <sup>31</sup> Zeel gol guzujsin, gol gojp cudad, gol basaaladx, loj choon ijz ad bacwëëzt gunenë'n lëjt xt ronan banen lëjt consejw.

<sup>32</sup> 'Yan, compniar raliduladx ree Jesucrist, gusa'nan lëjt con Dios con xtiidxa'caman. Laan rajp guialrniabee par gagnën lëjt, din gusnuu gagbeedi xhienaag rënman guibandi guneë tëëman lojdi ni ma rëbaman gudëëdaman loj ree bën ma naj xbejnman. <sup>33</sup> Achut xmilia achu tëët xab rzëëbladxan. <sup>34</sup> Lëjt ragbee zagdxe guial con quijb yan benan dxiin persi gudawnë'n bën guzu ree con naj. <sup>35</sup> Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: "Mazri nix yu' luxdoo bën razaladx guial loj bën rtia'."

<sup>36</sup> Chi gulox rëb Pab zian, dxel bazuxibaman gurejdx gunabaman Dios con gra reeman. <sup>37</sup> Gra reeman biin, gudiidx reeman Pab abi' gudaw reeman laaman xid. <sup>38</sup> Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

## 21

### *Wej Pab Jerusalén*

<sup>1</sup> Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara. <sup>2</sup> Ni badxaaglojn tijb barcw ni ma che niz Fenicia zianz badxu'n lojn. <sup>3</sup> Chi zio'n dxel dux lad ruvejsan baguiaa lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. <sup>4</sup> Ni badxaaglojn bën rliladx ree Jesucrist abi' badxu'në'n laa reeman gajdx dxej. Bën guin ree por xSprijt Dios rëb reeman loj Pab guial ad bal cheman Jerusalén. <sup>5</sup> Per chi baza' gajdx dxej guin, dxel badxoon luguiedx guin, dxel gra reeman con xbëngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. <sup>6</sup> Dxel bazaadiidxnë'n laa reeman abi' badxë'pan loj barcw guiáad laa reeman zia lidx reeman.

<sup>7</sup> Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tëën bugneenë'n bën zojb ree ni, bën rliladx ree Jesucrist abi' baya'nan con laa reeman tib dxej. <sup>8</sup> Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bën rtie'ch xtiidx Jesucrist. Felip guin naj tijb ree bën gajdx cwabee din qui's reeman ni rayal tia' ree bënprob abi' baya'nan lidxaman. <sup>9</sup> Yu' tajp xi'ndxa'paman biinxtijb ree abi' laa reem rudëëd xtiidx Dios loj ree bejn. <sup>10</sup> Ma gojc zien dxej nadxu'n lidx Felip, chi bi't tijb bën la Agabo nëgajcaman rudëëd xtiidx Dios loj ree bejn, zëëdaman niz Judea. <sup>11</sup> Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bën Israel bën naj xcinch ni guie, abi' yayü reeman laaman loj ree bën ad najt bën Israel.

<sup>12</sup> Chi baguiejnan zian, dunujn con ree bën rliladx Jesucrist luguiedx guin baguieenan naguiejn loj Pab ad cheman Jerusalén. <sup>13</sup> Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiëtan Jerusalén por Dad Jesús.

<sup>14</sup> Chi bayagbeen guial ad zaguieentan gan yadxoonan laaman chitëë cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

<sup>15</sup> Chi gudëd ree dxej guin dxel baguieenan purvinid bio'n Jerusalén. <sup>16</sup> Bunë'n bëlzi ree bën Cesarea rliladx ree Jesucrist, laa reeman binë dunujn lod baya'nan lidx tijb bën Chipre, ma gojc xchej rliladxaman Jesucrist, laman Mnasón.

### *Bignaj Pab Jacob*

<sup>17</sup> Abi' ree bën Jerusalén rliladx Jesucrist dád nix guyu luxdoo reeman baca' reeman dunujn. <sup>18</sup> Chi bareguiaal bunë'n Pab bugnajn Jacob, ni riga' gra ree bën rniabee loj ree bën rliladx Jesucrist. <sup>19</sup> Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bën ad najt bën Israel. <sup>20</sup> Chi biguiejn reeman zian, baza't reeman Dios zagdxe, zianz rëb reeman loj Pab:

—Lüj ragbee guial entr loj ree bén Israel zien da't reeman ma bililadx Jesucrist, abi' gra reeman rëb guial rüjn naguiejn güün bejn zi'c rniabee xley Moisejs. <sup>21</sup> Ma biguiejn tää reeman guial lüj culüü bén Israel ree, bén ad zojbt ree loj nacion Israel guial ad züjncwentt reeman xley Moisejs, rëb tää loj reeman guial ad rüjnt naguiejn chu' xi'n reeman sen ru ree bén Israel ad zinal tää reeman dux costumbr ree. <sup>22</sup> Yan, ¿xhienaag gac? Laa reeman guchajgczi lasa' reeman chi gagbee reeman guial ma bi'til. <sup>23</sup> Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwëb reex loj Dios. <sup>24</sup> Binë reex, gol been zi'c rëb loj ley din gaquidi naya, gudijx tää por laa reex din gac ya guijc reex. Zian gagbee gra bejn guial rüjnquil zi'c rniabee ley, guial ad wali tää ni biguiejn reeman xcwentil. <sup>25</sup> Abi' por ree bén ad najt bén Israel, bén ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tää reeman rejn ni'qui bëel rberejn, ad sunë tää reeman ben ren bén ad najt lacheel reeman.

#### *Gunaaz ree bén Israel Pab*

<sup>26</sup> Dxel binë Pab guidap ree bén guin, abi' chi bareguiaal been reeman zi'c rniabee ley par gac reeman naya. Dxel guyu reeman lën yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinë tijb gaj reeman tijb be guiët zi'c tijb gon par Dios.

<sup>27</sup> Chi ma yayaaloj gajdx dxej ni naj güün reeman zi'c rniabee ley, yu' ree bén Israel zëed niz Asia, baguiaa reeman Pab lën yadooro' Jerusalén abi' gurixdiaj reeman wajs reeman, gunaaz reeman laaman, <sup>28</sup> rëb reeman:

—¡Bén Israel, gol been yudar! Xin guie naj xin ziza gra lad caneeguijdxix bén Israel ree në dux yadoo ree, rëb tää loj ree bejn guial ad güün reeman zi'c rniabee dux ley ree. Abi' ad tijbtzi laan, në ma badxe'x bén ad najt ree bén Israel lën dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

<sup>29</sup> Rëb reeman zian guial baguiaa reeman Pab zizaman ni con tijb bén Éfeso bén la Tróximo, zeel gunaladx reeman binë Pab laaman lën yadooro' Jerusalén.

<sup>30</sup> Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëë reeman laaman lën yadoo guin laa basiaaw gajc reeman port guin ree. <sup>31</sup> Za mer nugüjt reeman laaman, chi bidxin rusion guin loj suldad rniabee ree suldad guial gra ree bén Jerusalén cayüjn nadxeb. <sup>32</sup> Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree bén guin. Chi baguiaa ree bén guin bidxin suldad rniabee guin con ree xsuldadix, dxel bacwëëz gudijn reeman Pab. <sup>33</sup> Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tää beenman. <sup>34</sup> Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bignë reex Pab lod yu' ree suldad. <sup>35</sup> Chi bidxin reex loj ree sclar lod yu' ree suldad guin, gulejn reex Pab guial dád nadohx rüjn ree bén zien nal laa reex, <sup>36</sup> abi' gra reeman rbixdiaj, rëb reeman:

—¡Gol bagüjtix!

#### *Gunee Pab loj ree bejn*

<sup>37</sup> Chi ma chu'në reex Pab lod yu' ree suldad guin, gunabdiidxaman loj suldad rniabee guin, rëbaman:

—¿Zajc ganenë'n lüj ya?

Badxi' suldad guinan rëbix:

—¿Rajc rnieel diidx grieg ya? <sup>38</sup> ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bén bagüjt ree bejn?

<sup>39</sup> Dxel rëb Pab lojx:

—Bén Israel naj. Goolan luguiedx Tarso tijb ree guiedx zojbloj ni riga' niz Cilicia. Baneesii mod ganenë'n bén guie ree.

<sup>40</sup> Dxel cwëjb suldad guin, abi' guzuli Pab loj ree scliar guin beenman sen loj ree bën guin con yaaman din yacwëëz ro' reeman. Chi bacwëëz reeman, dxel guneenëman laa reeman diidx hebreo, rëbaman:

## 22

<sup>1</sup> —Lëjt bengol në los demazridi, gol bacaagdiajg ni ganin por naj.

<sup>2</sup> Chi biguiejn reeman caneenëman laa reeman diidx hebreo, mazri bacwëëz reeman. Abi' basnuuman rëbaman loj reeman:

<sup>3</sup> —Bën Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bën gulal ree. Guiáad naj guidib luxdon benan xgab güünan sirv Dios zi'cgajc lëjt yan. <sup>4</sup> Dxel guzunaalan bën rliladx ree Jesucrist, xt bagüjtan laa reeman abi' zi'c ree béngunaa zi'c ree xinguaaw gunaazan badxe'n ladxguiib. <sup>5</sup> Bixhioz mazri zojbloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bën Israel ree, bën zojb ree luguiedx Damasco din chile' yaguilan bën rliladx ree Jesucrist luguiedx guin, ganaaz tēen laa reeman guidnë'n laa reeman Jerusalén din tēd reeman casti.

### *Be Pab diidx xhienaag bililadxaman Jesucrist*

*(Hch. 9:1-19; 26:12-18)*

<sup>6</sup> Per chi za'n lunejz par Damasco, chi ma cadxinan ni cost garol dxej, dxejczu brieri tijb guij xanyabaa balaan bacha' guidibczu lod cazaan, <sup>7</sup> abi' breeyujn. Dxel biguiejnan cha' bën na: “Saulo, Saulo, ¿chexquiza zeel rzunalil naj?” <sup>8</sup> Abi' gunabdiidxan rën: “¿Chu lüj Dad?” badxi'man laan naman: “Naj naj Jesús, bën Nazaret, bën rzunalil.” <sup>9</sup> Bën zinë' reen baguiaa reeman bacha' guin abi' bidxeb reeman, per ad bignia't reeman ni na cha' bën gunee naj. <sup>10</sup> Dxel gunabdiidxan rën: “¿Xhie rayal günan Dad?” Abi' na Dad Jesucrist lon: “Bixche, basnuu xnejzil wej Damasco. Ni na reeman gra ni rayal güünl.” <sup>11</sup> Abi' guial bascajy bacha' guin lon, dxel bën zinë' reen gunaaz reeman yan, binë reeman naj luguiedx Damasco.

<sup>12</sup> Ni zojb tijb bën la Ananías, rüjnman cumplid gra zi'c rniabee xley Moisejs. Abi' gra ree bën Israel zojb luguiedx Damasco nünbee laaman guial nabanman xnejz. <sup>13</sup> Ananías guin bidganaj naj, chi bi'taman naman lon: “Saulo, ma zajc yaguiaal stijb.” Loj hor guin gajc baguian stijb abi' baguian laaman. <sup>14</sup> Dxel naman lon: “XDios dux béngulal ree ma bacaabee lüj din gagbeel xhie rënman güünl, abi' guguaal Jesucrist guien tēel cha'man, bën rüjn zi'c rayal. <sup>15</sup> Din chigneel xtiidxaman loj gra ree bénguidxliuj, gü tēel diidx loj reeman ni baguiaal ni biguiejn tēel. <sup>16</sup> Yan, ad rbëzil mazri, guzuli gurobnijs tēë gurejdx gaj Dad Jesucrist din chisüdaman xtolil.”

### *Be Pab diidx xhienaag wejman loj ree bën ad najt bën Israel*

<sup>17</sup> Chi baguialan Jerusalén, wan lēn yadooro' persi guredx gunaaban Dios, abi' guza'can zi'c rulüü cane'xhchalan. <sup>18</sup> Baguian Dad Jesús naman: “Baquiejn. Cari barrii Jerusalén, din ad züjncwentt reeman ni guiëbil por naj.” <sup>19</sup> Abi' rën lojman: “Dad, laa reeman ragbee guial naj wa gra lēn ree yadoo gunaazan bën rliladx ree lüj, badxe'n laa reeman ladxguiib gudin tēen laa reeman. <sup>20</sup> Në chi bagüjt reeman Esteban, bën gunee xtiidxil, laagajc naj za' ni rën zagdx naj guiëtaman abi' xt gunan xab ree bën bagüjt laaman.” <sup>21</sup> Per na Dad Jesús lon: “Wej, naj gaxhal lüj zijt loj ree bën ad najt bën Israel.”

### *Badxe' reeman Pab lod yu' ree suldad*

<sup>22</sup> Xt quintzi naga'loj bacaagdiajg reeman ni rëb Pab dxel guzuloj gurixdiaj reeman rëb reeman:

—¡Ad rayalt guiban xin guin! ¡Gol bagüjtix!

<sup>23</sup> Abi' guial cabixdiajz cabixdiaj reeman, ruzaal xab reeman niz ladia ruzaal tēë reeman yuj niz ladia. <sup>24</sup> Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bën

guin zian contr laaman. <sup>25</sup> Per chi guxhii reex Pab din quin reex laaman, rëbaman loj tijb ree suldad rniabee za' ni:

—¿Zajc quindi tijb bën Rom ya, chi gadidi gagbee xhie beenman?

<sup>26</sup> Chi biguiejn suldad rniabee guin zian, dxel bicojnx suldad rniabee ree suldad guin, rëbix lojx:

—Gojp cudad ni güünnël xin guin, din xin Roman.

<sup>27</sup> Dxel wej suldad rniabee guin lod za' Pab, abi' gunabdiidxix lojman rëbix:

—¿Walin ya xin Rom lüj?

Badxi' Paban rëbaman:

—Walican.

<sup>28</sup> Abi' rëb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diizd goolan najn bën Rom.

<sup>29</sup> Chi biguiejn ree suldad niguin Pab, guial bën Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

### *Bazuj reeman Pab loj ree guxtis*

<sup>30</sup> Chi bareguiaal, guyën suldad rniabee guin niagbeecheawix chexc zeel za' ree bën Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz në ree guxtis. Abi' babëex Pab bazujx laaman loj gra reeman.

## 23

<sup>1</sup> Baguiaa Pab loj ree guxtis guin, abi' rëbaman:

—Compniar Israel, loj guidib ni nabanen xt yan, achet naladxan delant loj Dios din naj ragbee xhienaag nabanen.

<sup>2</sup> Dxel Ananías, bixhioz mazri zobjloj rniabee graczi ree bixhioz, gunabeeman bën za' ree gajxh cwë' Pab din ca'p reeman ro'man. <sup>3</sup> Per badxi' Paban rëbaman loj bixhioz guin:

—¿Ziangajc ca'p Dios ro'l, bën rusquiee! ¿Id zobjbil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

<sup>4</sup> Abi' ree bën za' yagaj rëb reeman lojman:

—¿Zian rusaglojl xbixhioz zobjloj Dios ya?

<sup>5</sup> Dxel rëb Pab:

—Gol been perdon, ad gogbeetan guial laaman naj bixhioz mazri zobjloj. Din loj xtiidx Dios rëb: “Ad gusaglojl bën rniabee ladxil.”

<sup>6</sup> Chi gogbee Pab guial garol reeman naj bénsaducew za garol reeman naj bënfarisew, dxel guneeman rejs rëbaman:

—Naj naj bënfarisew, xi'n bënfarisew naj. Abi' guial rliladxan yaban ree bengüt zeel za' ree bejn contr naj.

<sup>7</sup> Chi rëbaman zian, guzuloj cadildiidx ree bënfarisew con ree bénsaducew abi' gojc reeman tio'p lala'. <sup>8</sup> Din bénsaducew ree ad rliladxt reeman guial yaban ree bengüt, ad rliladx tëtë reeman guial yu' ree anjl në ree sprijt, per ree bënfarisew rliladx reeman gra ree ni guin. <sup>9</sup> Abi' been reeman naquie' yagaj. Dxel guzuli bëlzi ree bënfarisew naj mextr rulüü ley, rëb reeman:

—Achet ni mal wayüjn bën guie. Wed tijb sprijt o tijb anjl gune laaman, gol gojp cudad ad niad contr Diosan nadxu' ree.

<sup>10</sup> Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëë reex laaman galay ree bën guin, chinë tëtë reex laaman lod yu' ree suldad stijb.

<sup>11</sup> Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

*Been reeman xgab gugüjt reeman Pab*

<sup>12</sup> Chi bareguiaal, garol ree bën Israel baya'n reeman diidx din gugüjt reeman Pab, rëb tää reeman guial achet gaw reeman achet tää't guië' reeman xt gugüjt reeman laaman.

<sup>13</sup> Nadëd tiuu naj ree bën rëb zian. <sup>14</sup> Abi' wej reeman bigneenë reeman bixhioz ree bën rniabee ree bixhioz në ree xbengol ree bën Israel, rëb reeman loj reeman:

—Dunujn ma raguie'ch guial achet'zi yadaawan xt chi ma bagüjtan Pab. <sup>15</sup> Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

<sup>16</sup> Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. <sup>17</sup> Zianz gunee Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëëx tijb ruson lojman.

<sup>18</sup> Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnë'n xin guie lojl din guneex tijb ruson lojl.

<sup>19</sup> Abi' suldad rniabee guin gunaazix yaa xin guin, binëx laax tiblax, gunabdiidx lojx rëbix:

—¿Xhie rënl nal lon?

<sup>20</sup> Abi' rëb xin guin lojx:

—Bën Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guijc guial rën reeman gagbeechaaw reeman xhienaag naj xcwentaman. <sup>21</sup> Per ad bal chililadxil laa reeman, din nadëd tiuu naj ree bën cwëz laaman guquie'chloj reeman lunejz, abi' ma rëb reeman guial achet gaw reeman ache tää't guië' reeman xt gugüjt reeman laaman. Yan za'sin reeman cabëz reeman ni guiëbil.

<sup>22</sup> Dxel rëb suldad guin loj xin guin:

—Baguiaj. Achu loj guiëbil ni ma nal lon.

*Guxhaal reeman Pab loj gobernador Félix*

<sup>23</sup> Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', në za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxin. <sup>24</sup> Abi' gunabee tääx güün reex porvinid way cwib Pab, rëbix loj reex guial guinia reex Pab din guidxinman zagdx loj gobernador Félix. <sup>25</sup> Abi' guxhaalnëx laa reex tijb gui'ch ni rëb:

<sup>26</sup> “Naj Claudio Lisias, rugajpdiozan lüj gobernador Félix, lüj guial najl bën zojbloj. <sup>27</sup> Bën Israel ree gunaaz xin guie ma nugüjt reeman laax. Per chi gogbeen guial xin Roman, dxel wan con ree da suldadan buglëen laax loj reeman. <sup>28</sup> Abi' guial rënan gagbeen xhie rüjnx zeel rdxe'ch reeman laax, dxel bazun laax loj ree guxtis Israel. <sup>29</sup> Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiëtix ni'qui guial chu'x ladxguiib. <sup>30</sup> Në guial ma gogbeen guial xixgab ree bën Israel naj gugüjt reeman laax, zeel cayxhalan laax lojl. Abi' ma rën loj ree bën rdxe'ch laax guial con lüj güün reeman reglad ni rajp reeman contr laax. Laanan rugojnan lüj.”

<sup>31</sup> Been ree suldad guin zi'c gunabee suldad rniabee guin abi' guxin binë reex Pab luguedx Antípatris. <sup>32</sup> Chi bareguiaal suldad zë ree guia' bayejc reex lod yu' ree suldad, guiáad ree suldad dxiib way zinë ree laaman luguedx Cesarea. <sup>33</sup> Chi bidxin ree Cesarea, badëd ree gui'ch guin loj gobernador guin, bayü tää ree Pab lojman. <sup>34</sup> Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zëedaman, <sup>35</sup> dxel rëbaman lojman:

—Chi gui't ree bën za' ree contr lüj, dxel gucagdiagan ni nal.

Abi' gunabeeman gap reex Pab lën xpalas Herodes.

<sup>1</sup> Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel në tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. <sup>2</sup> Chi bidxinnë reex Pab, guzuloj Tértulo caneeman contr laaman, rëbaman loj gobernador guin:

—Quixtëë lüj dad gobernador, por lüj nadxu'dxen, në por xguialrajquil zien ree ni rüjn sirv cayajc du ladxan. <sup>3</sup> Gra ladczi za' ree bejn conform por gra ni cayüjnl dad gobernador Félix, lüj naj Bén zobjloj, quixtëëczi lüj. <sup>4</sup> Per chitëë günlaan lüj mazri, rniaaban lojl din gucaagdiajguil ni yanan lojl tibrajtoczi. <sup>5</sup> Dunujn bayagbeen xin guie naj zi'c tijb guialguijdx loj ree Bén Israel, guidibczi guidxliuj zizax rustijlix laa reeman abi' laax rniabee loj tib cwaa ree Bén rniee reeman nazaren. <sup>6</sup> Abi' guyën tëëx nüjnx dux yadooro'n zi'c tijb luar ad rüjnt sirv, zeel banaazan laax bayënan naguieenan guialguxtis zi'c naj dux leyan. <sup>7</sup> Per laa bi't gajc suldad Lisias con ree xsuldadix, babëëxuu reex laax du lojn. <sup>8</sup> Abi' rëb suldad rniabee guin guial lojl gui't ree Bén rbe'c xguialquia Pab, yan lüj gajc zajc guiniabdiidx lojx din gagbeel zagdxe guial walican ni ranan xcwentix.

<sup>9</sup> Abi' ree Bén Israel za' ni rëb reeman guial waliqui gra ni guin. <sup>10</sup> Dxel been gobernador guin sen loj Pab din guinieeman, abi' rëb Pab:

—Guial ragbeen diizd gocli rniabeel nacion Israel, zeel ad yu'nawëëgtan yadxi'n ni rudxiib reeman guican. <sup>11</sup> Abi' lüj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios. <sup>12</sup> Abi' achut banaaznë reeman naj cadildiidxnë'n, ni'qui guial gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin. <sup>13</sup> Bén guie ree ad zajct na reeman lojl guial ni diidxli naj ni rudxiib reeman guican. <sup>14</sup> Per ni naj diidxli naj guial rliladxan Jesucrist, nejzcüb guin naj ni zinaalan, cayünan sirv loj xDios dux béngulalan, abi' na ree Bén guie guial ad xnejzt Diosan, per cayünan zian guial rliladxan gra ni zëëd loj ley në ni bacaa ree Bén badëëd xtiidx Dios loj ree bejn. <sup>15</sup> Abi' zi'cgajc rliladx ree Bén guie Dios, ziangajc rliladxan laaman guial yaban ree bengüt stijb, zi'c ree Bén goc benza'c në ree Bén goc benmal. <sup>16</sup> Zeel rünan naguiejn gabajnan zagdxe chitëë xhie ganaladxan delant loj Dios ni'qui delant loj ree bejn.

<sup>17</sup> 'Ma gojc zien ijz nariin, xt yan baye'c ladxan bidganë'n ni baxhaal ree bejn par ree Bénprob, bidganë' tëën gon ni rayal gudëdan loj Dios. <sup>18</sup> Laan naj ni cayünan lën yadooro' Jerusalén chi bi't ree Bén Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëëtan wadijl. <sup>19</sup> Yan, Bén gunaa ree naj, laa reeman naj Bén rayal su guie din na reeman xhie rünan xhie pornin rdxe'ch reeman naj. <sup>20</sup> O balguiza, Bén za' ree guie na reeman xhie da dolan badxejl reeman chi guzun loj gra ree guxtis Israel. <sup>21</sup> Tijbzi ni benan chi za'n galay reeman gurixdiajn rën: “Guial rliladxan yaban ree bengüt, zeel za' ree bejn contr naj yan.”

<sup>22</sup> Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwentidi.

<sup>23</sup> Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tëë reex chignaj ree xmiwaman laaman.

<sup>24</sup> Chi goc tio'p choon dxej, bidxin gobernador Félix stijb con lacheelaman Drusila, laaman naj Bén Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist. <sup>25</sup> Per chi guzuloj cayëbaman guial rayal guiban ree bejn xnejz, gucwëëz tëë xixgab mal reeman, guial guidxin tëë dxej yadëëd ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

<sup>26</sup> Per Félix në milian rbëzaman gudëëd Pab lojman din guslaaman laaman, zeel gurejdxaman laaman zien volt din guinieenëman laaman. <sup>27</sup> Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree Bén Israel, zeel basa'nman Pab ladxguib.

## 25

*Gunee Pab loj Festo*

<sup>1</sup> Chi goc choon dxej ni bidxin Festo Cesarea par chu'man guial gobernador, dxel wejman Jerusalén. <sup>2</sup> Yagaj, bixhioz rniabee ree bixhioz con ree bén Israel mazri zojbloj, wej reeman lojman bile'c reeman xguialquia Pab, <sup>3</sup> abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. <sup>4</sup> Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguijman ni, <sup>5</sup> abi' rëbaman loj reeman:

—Bén rajp ree gualrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

<sup>6</sup> Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab. <sup>7</sup> Chi bidxinnë reex laaman, bén Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. <sup>8</sup> Dxel badxi' Pab xtiidx reeman, rëbaman:

—Naj, achet ni mal wayünan xley ree bén Israel, ni'qui yadooro' Jerusalén, ni'qui rey César.

<sup>9</sup> Per Festo guyënman naya'nman zagdxe loj ree bén Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

<sup>10</sup> Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüj ragbee zagdxe guial achet ni mal wayünan bén Israel ree. <sup>11</sup> Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

<sup>12</sup> Dxel chi gulox guneenë Festo bén naj ree xbejnman, bén rëb ree ni rayal gac, rëbaman loj Pab:

—Lüj na tëdil loj rey César, yan lojman tëdil.

*Za' Pab loj rey Agripa*

<sup>13</sup> Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo. <sup>14</sup> Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib. <sup>15</sup> Chi wan Jerusalén, bixhioz rniabee ree bixhioz con ree bén rniabee loj ree bén Israel gule'c reeman xguialquiax, gunab reeman ganabeen guiëtix. <sup>16</sup> Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bén cabe'c xguialquiaman din guiëbaman walin ya o ad walitan ni rudxiib reeman guijcaman. <sup>17</sup> Zeel chi bi't ree bén Israel guin guie, achet guial niaglaan, bareguiaal gajc gure loj da yagxhilan, abi' gunabeen bidnë reex xin guin. <sup>18</sup> Per ree bén bi't gule'c xguialquiax, achet ni nadxeb na reeman zi'c gunaladxan ninia reeman por laax. <sup>19</sup> Tijbzi xguialquiax ni gule'c reeman naj por xcostumbr reeman në por tijb bén la Jesús, bén ma güjt, per Pab rëb naban Jesús guin. <sup>20</sup> Abi' guial ad ragbeetan xhie günan por zian, dxel gunabdiidxan loj Pab bal rënch chex Jerusalén din gac reglad ni guin ree ni. <sup>21</sup> Per laax gunab tëd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

<sup>22</sup> Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

<sup>23</sup> Chi bareguiaal, dád zagdxe ca' xab rey Agripa con Berenice bidxin reeman con ree bén rniabee suldad con los demazri ree bén zojbloj luguiedx guin, bidxin reeman guyu



reeman lënü lod gucaagdiajg reeman ni guiëb Pab. Dxel gunabee Festo bica' reex Pab.  
<sup>24</sup> Abi' rëb Festo:

—Rey Agripa në los demazridi dad za'nëdi dunujn guie. Bén ruguiaadi guie, gra bén Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix. <sup>25</sup> Naj, achet xfaltix radxejlan guial rayal guiëtix. Guiáad laax gunab téd loj César Augusto lod gac reglad xcwentix, abi' ma benan xgab yaxhalan laax. <sup>26</sup> Per ad radxejltn ni gucan por laax loj gui'ch ni gaxhalan loj rey César, bén rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. <sup>27</sup> Din naj rülüü ad xnejzt naj yaxhalan tijb bén yu' ladxguiib loj rey César abi' ad zëtan xhie beenman.

## 26

### *Ni gunee Pab loj rey Agripa*

<sup>1</sup> Dxel rëb rey Agripa loj Pab:

—Ma zajc guinieel por lüj.

Abi' gules yaa Pab guzuloj rëbaman:

<sup>2</sup> —Dád nix yu' luxdon guial bile' za'n lojl yan rey Agripa, par ganen lojl yadxi' tëen gra ni rudxiib ree bén Israel guican. <sup>3</sup> Din lüj ragbee zagdxé gra xcostumbr ree bén Israel, në conin rüjn persi rdildiidx reeman. Zeel rniababan lojl gapil pasens gucaagdiajguil ni ganin.

### *Zi'c guban Pab gocli*

<sup>4</sup> 'Gra ree bén Israel ragbee xhienaag gubajnan con laa reeman zi'c ladxan zi'c Jerusalén, diizd xindoon. <sup>5</sup> Ragbee tëe reeman abi' zajc na reeman laan bal rën reeman, guial diizd xindoon najn bénfarisew, abi' ree bénfarisew naj bén mazri zinal xley ree bén Israel. <sup>6</sup> Abi' yan za'n guie, badëed reeman naj loj ree guxtis guial rliladxan yasban Dios bengüt ree zi'c beenman promejs loj ree dux béngulal ree. <sup>7</sup> Gra guidxiptio'p cwa' ree bén Israel cabëz dxej güün Dios zian, zeel rën reeman laaman rüjn tëe reeman sirv lojman dxej guiaal. Abi' yan guial rliladxan laan zeel rbe'c ree bén Israel da gualquian, rey Agripa. <sup>8</sup> ¿O naladxidi ya nawëeg yasban Dios bengüt ree?

### *Be Pab diidx xhienaag guzunalaman bén rliladx ree Jesucrist*

<sup>9</sup> 'Guia'xchej benan xgab rayal günan xhienin bén rliladx ree Jesús, bén Nazaret, <sup>10</sup> abi' zian benan Jerusalén. Con xtiidx ree bixhioz rniabee ree bixhioz, zien ree bén rliladx Jesucrist badxe'n ladxguiib. Abi' chi rugüjt reeman laa reeman, në naj rë guiëtri reeman. <sup>11</sup> Zien volt benan laa reeman xhienin din günan naguiejn gusa'n reeman gualrliladx reeman Jesucrist. Zian benan lën gra ree yadoo, abi' guial tant rdxe'chan laa reeman dxel guzunaan laa reeman xt luguiedx ren ree.

### *Be Pab diidx stijb xhienaag bililadxaman Jesucrist (Hch. 9:1-19; 22:6-16)*

<sup>12</sup> 'Abi' par zian za'n Damasco, con quijb xtiidx ree bixhioz rniabee ree bixhioz. <sup>13</sup> Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bén zinë'n. <sup>14</sup> Abi' dugraczan bareeyuj, dxel biguejnan cha' bén gunee naj con diidx hebreo, naman: “Saulo, Saulo, ¿chexc zeel rzunalil naj? Lüj gajc rguuil xguialnaal zi'c go'n rudxegua' loj yag rulaagnë reeman laab.” <sup>15</sup> Dxel rën: “¿Chu lüj Dad?” Badxi'man laan naman: “Naj naj Jesús bén rzunalil. <sup>16</sup> Per bixche, guzuli, din balülon lojl par güünl naj sirv gü tëel diidx ni baguiaal yan në ni gulün lojl. <sup>17</sup> Naj gaxhal lüj loj ree bén Israel në loj ree bén ad najt bén Israel, abi' naj gagnë' lüj chitëe xhie güün reeman lüj. <sup>18</sup> Gaxhalan lüj loj reeman din guixhialil loj reeman gusa'n reeman nejz mal, chinal reeman nejz zagdxé. Ad tiëbri reeman nabee xindxab laa reeman, chinal tëe reeman xnejz Dios. Abi' chililadx reeman naj din gac xtol reeman perdon yayal tëe reeman ni rayal gra ree xbejn Dios, bén ma naya ree delant lojman.”

*Bazoob Pab diidx ni balüüloj lojman*

<sup>19</sup> 'Zian gojc, rey Agripa, bazoban diidx benan ni na Jesucrist lon chi guneeman naj diidx xanyabaa. <sup>20</sup> Yaloj luguiedx Damasco gutiechan xtiidxaman, dxelri Jerusalén në guidib niz Judea në loj ree bén ad najt bén Israel. Rën loj reeman din yayüjn reeman xgab por xtol reeman, yadxi' loj reeman loj Dios güün tëë reeman ni rayal güün reeman din guiguien guial ma bidxaa mod naban reeman. <sup>21</sup> Abi' por zian, gunaaz ree bén Israel naj lën yadooro' Jerusalén, guyën reeman nugüjt reeman naj. <sup>22</sup> Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree bén zobjloj zi'c ree bén ad zobjlojt. Abi' gra ni rën loj reeman naj ganax ni bacaa ree bén badëë xtiidx Dios loj ree bejn në ni bacaa Moisejs xhienaag naj ni gac, <sup>23</sup> guial Cristo naj guial tédaman guialzi, guiëtaman. Per chi ma güjtaman yaloj laaman naj bén yaban loj ree bengüt, abi' gugojnman bén Israel ree në ree bén ad najt bén Israel xhienaag gap reeman perdon.

*Nuyën Pab nililadx Agripa Jesucrist*

<sup>24</sup> Chi cayëb Pab zian, dxel gudidxa' Festo rëbaman:

—¡Rajcguijquil Pab! guial tant rusiidil ma rajc guijquil.

<sup>25</sup> Per badxi' Pab laan rëbaman:

—Ad guictan rajc, gobernador Festo. Ni canin najn xnejz në diidxli. <sup>26</sup> Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbeechaaw guial laaman ragbee gra ni canin, din ad canitan ni goc ralan lod achut zajc gagbee laan. <sup>27</sup> ¿Rliladxil ni rëb ree bén badëëd xtiidx Dios loj ree bejn ya, rey Agripa? Naj ragbee guial rliladxil.

<sup>28</sup> Dxel badxi' rey Agripa laan rëbaman:

—Sta'nczi nüjnl naj gan nililadxan Jesús.

<sup>29</sup> Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, në gra ree bén cucaagdiajg ni canin yan, guidxin dxej chililadxidi Jesús zi'c naj, majsi ad nët ree caden guie.

<sup>30</sup> Dxel bisu rey Agripa con gobernador Festo con Berenice në gra ree bén zobjnë laa reeman ni. <sup>31</sup> Chi bariica reeman tiblax guzuloy cayünë lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguib.

<sup>32</sup> Dxel rëb rey Agripa loj Festo:

—Zile' naslaa reex, balidix niniab tédix loj rey César.

## 27

*Baxhaal reeman Pab Rom*

<sup>1</sup> Chi rëb reeman ma yaxhaal reeman dunujn Italia, dxel bayü reeman Pab con sta'n ree bén yu' ladxguib loj tijb suldad rniabee la Julio, laax rniabee tib cwaa ree suldad la Augusto. <sup>2</sup> Abi' Cesarea badxu'n loj tijb xbarcw ree bén Adramitio, barcw ni ma grii chen guiedx riga' ree niz Asia. Në Aristarco bunë'n, bén Tesalónica, guiedx riga' niz Macedonia. <sup>3</sup> Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëëd reeman ni ryaadxaman. <sup>4</sup> Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëë yachaaglojn zro' bi, din niz du lojn rliaj bi guin. <sup>5</sup> Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

<sup>6</sup> Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn. <sup>7</sup> Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. <sup>8</sup> Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

<sup>9</sup> Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel guneë Pab, <sup>10</sup> rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

<sup>11</sup> Per suldad rniabee guin mazri beencwentix b n rusa barcw guin n  b n naj xbarcw laan, guial loj ni r b Pab. <sup>12</sup> Abi' guial ad zagdx e t t naj yagaj par yad udan tiamp nayaag, dxel mazri zien reeman been xgab zagdxeli naj yariin yagaj, yaguieenan nagueijn yadxinan Fenice, tijb guiedx nulen Creta lod ad rbi' t t bi, ni yad udan tiamp nayaag.

### *Gubi' tijb bidoxh loj nijsdoo*

<sup>13</sup> Dxel guzuloj cabi' tijb bi chaawlax ni z ed lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gad d ro' yuj Creta. <sup>14</sup> Per ad wayajct xchej zio'n chi birii tijb bidoxh la Euroclid n loj nijs guin. <sup>15</sup> Abi' guzuloj bi guin culadxaan barcw guin. N  guial niz du lojn z ed bi guin dxel ad gojctri nusnuu barcw guin niejn niz lod rayal niejn, abi' baslaa reeman bin  barcw guin dunujn niz lod cucadxaa bi guin laan. <sup>16</sup> Dxel bad udan xijch tijb yujdob z la Clauda riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw bal 'panan loj barcw guin. <sup>17</sup> Dxel chi gulox bal 'pan canu guin loj barcw guin, batiejl reeman duu lad barcw guin chit e yaze'nan. Abi' guial rdxeb reeman ch ztiej barcw guin l n  x la Sirte, dxel gulet reeman xlon ree barcw guin din cwentzi chin  barcw guin dunujn niz lod rucadxaa bi guin laan. <sup>18</sup> Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni n u barcw guin loj nijs guin. <sup>19</sup> Ni bayon dxej, cwa' reeman gra ree ni r jnn  barcw guin dxiin bazaal reeman loj nijs guin. <sup>20</sup> Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad nagueientri du luxdoon yalaan loj nijs guin.

<sup>21</sup> Abi' guial ma gojc zien dxej ni achetctzi wadaawan, dxel guzuli Pab galay reeman, r baman:

—Dad, zagdxeli nucaagdiajguidi da diidxan ad nariit ree Creta, zian ad nad udt ree tarbajw guie achet t t nas eb ree. <sup>22</sup> Per achet g unan, ad rdxebidi din ni'qui tijbidi ad z jtt, tijbzi barcw guin yaze'n. <sup>23</sup> Din Dios rniabee naj, b n cay nan sirv guxhaal tijb xi anjlaman bal uloj lon yan guiaal. <sup>24</sup> Abi' na anjl guin lon: “Pab, ad rdxebil, din rayal sul loj rey C sar, abi' por l j ni'qui tijb ree b n z ed loj barcw guie ad zuslaat Dios gui t reeman.” <sup>25</sup> Zeel yan dad, gol badxe' luxdoodi zagdx e, din naj rliladxan Dios, ragbee t en zagdx e guial gac zi'c na anjl guin lon. <sup>26</sup> Per gag barcw guie niz ro' tijb yuj riga' loj nijsdoo.

<sup>27</sup> Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie z  barcw guin loj nijs guin por bi guin. Abi' ree b n nulen barcw guin, guxhinzii zi'ct garol guiaal gogbee reeman guial zamer yadxinan loj yuj. <sup>28</sup> Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit. <sup>29</sup> Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guib loj nijs guin din chile' sudxe barcw guin, abi' ma r n nejzdoo reeman yareguiaal. <sup>30</sup> B n nulen ree barcw guin, been reeman b n sta cuzaal ree ganch guib guin loj nijs guin niz loj barcw guin, naabzi par calet reeman canu chu' reeman par gux un reeman. <sup>31</sup> Per bagojn Pab suldad rniabee con ree xsuldadix, r baman loj reex:

—Bal id ree b n guin yaya'n loj barcw guie, ad zalaatriddi.

<sup>32</sup> Dxel bat ug ree suldad guin ni naxii canu guin persi zin  nijs canu guin. <sup>33</sup> Chi ma cayni luyuj, r b Pab loj reeman din gaw reeman, r baman loj reeman:

—Ma gojc chiin gubijdx ni ad raay stiddi achet t t wayawiddi. <sup>34</sup> Naj rni l jt, gol gudaw din guibandiddi, din gradi ni'qui tijb guidxguijguidi ad zus ebtiddi.

<sup>35</sup> Chi r b Pab zian, cwa'man tijb guiadxtil, abi' bad eman quixt e loj Dios niz loj gra reeman, dxel gula'man guiadxtil guin guzuloj cayawaman. <sup>36</sup> Dxel bayu luxdoo gra reeman, guzuloj n gajc laa reeman cayaw. <sup>37</sup> Tio'pgayuu gayojnchiibixho'p nayajc dugran zio'pan loj barcw guin. <sup>38</sup> Chi gulox gudaw reeman xt bixienlax reeman, dxel bazaal reeman trigo loj nijs guin persi bacha barcw guin.

### *Bize'n barcw loj nijsdoo*

<sup>39</sup> Chi bareguiaal, b n nulen ree barcw guin, ad bay nbeet reeman yuj badxin reeman. Per baguiaa reeman tibda'n nijsdoo guin riga'  x gad ed ro'n, abi' been reeman xgab badxig reeman barcw guin yagaj. <sup>40</sup> Dxel bat ug reeman ni naxiin  ree ganch guiib guin ni r jn yudar par sudxe barcw guin loj nijs, basa'n reeman ganch guin ree loj nijs guin, abi' baxhiee reeman yag ni r jn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. <sup>41</sup> Per w eztiejn loj  x zien lod bigagan. Niz guiican w ez l n  x abi' ni'quid rniibtan, gui ad niz xan guin guzuloj cayze'nan con gojl rliaj nijs guin ladan. <sup>42</sup> Dxel nuy n ree suldad guin nug jt reex b n prejs guin ree, chit e nixoobnijs reeman abi' nux  n reeman. <sup>43</sup> Per suldad rniabee guin ad cw jbtix niajc zian guial ad r ntix ni jt Pab, dxel gunabeex guial b n rajc rxoobnijs ree, yaloj laa reeman chu' loj nijs guin g  n reeman nagueijn yarii reeman ro' nijs guin. <sup>44</sup> Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

## 28

### *Bidxin Pab Malta*

<sup>1</sup> Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. <sup>2</sup> B n naj ree b n ni, d d benza'c gojc reeman con dunujn. Been reeman tijb bajl guial nayaag n t e guial cayal guia, abi' na reeman du lojn din yubiigan cw ' bajl guin. <sup>3</sup> Dxel bato'p Pab ta'n yagbidx, zianz chi cudxe'man laan loj bajl guin briyaal tijb b el l n yag guin por xi xliaa bajl guin, abi' gudawya'b yaa Pab nalb ztib yaaman. <sup>4</sup> Chi baguiaa ree b n Malta guin nalb z b el guin yaa Pab, dxel r b loj lasa' reeman:

—Xin guie bejn bag jtix, zeel majsi gulaax loj nijsdoo, per gui tczix por ni beenx.

<sup>5</sup> Per gudxijp yaa Pab abi' biajb b el guin loj bajl guin, gui ad laaman achet gocaman. <sup>6</sup> Gra reeman cab z saaguij yaaman, o dxejlczi yabaman gui taman. Per chi gojc xchej, chi baguiaa reeman achet gocaman, bachaa xixgab reeman abi' guzuloj r b reeman guial tijb dios najman.

<sup>7</sup> Gajxh lod badxu'n naga' ree xguidxliuj tijb b n zojbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, d d benza'c t e gojcaman con dunujn. <sup>8</sup> Nadxel naga' xdadaman, ragxuuman, yu'man xliaa rajc t eman yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guiycaman abi' bayajcaman. <sup>9</sup> Chi gogbee ree b nragxuu zojb ni ni goc, bi't reeman lod za' Pab persi bay jnman laa reeman. <sup>10</sup> Dxel d d zien ni bazaladx reeman du lojn por zian. Abi' chi badxu'n loj barcw par yadsoon yagaj, banee reeman gra ni rayaadxan lunejz.

### *Bidxin Pab Rom*

<sup>11</sup> Choon b ew badxu'n loj yuj zii, dxelri badxu'n loj tijb barcw Alejandr a, ni bit d ni tiamp nayaag. Niz lucwaj barcw guin ca tio'p ree dxan b n la ree C stor n  P lux. <sup>12</sup> Dxel badxinan tijb guiedx la Siracusa, yagaj badxu'n choon dxej. <sup>13</sup> Abi' yagaj badsoon bio'n gad d ro' nijsdoo xt badxinan guiedx la Regio. Chi bareguiaal, chi badsoon yagaj, brieri tijb bi lad sur dxel ni barojp dxej badxinan luguiedx la Puteoli. <sup>14</sup> Yagaj badxaagan tio'p choon ree b n naj ree b n ni n  reeman rliladx Jesucrist, dxel na reeman du lojn yaya'nn 'n laa reeman abi' baya'nn 'n laa reeman toxman. Zian gojc, dxelri zio'n Rom. <sup>15</sup> Gui ad ree dux compnieran b n rliladx ree Jesucrist, b n zojb ree Rom, ma ragbee reeman guial yadxinan yagaj. Dxel brieri reeman bidgachaagloj reeman dunujn xt lod la Foro de Apio n  luguiedx la Tres Tabernas. Chi baguiaa Pab laa reeman, babaaman abi' bad eman quixt e loj Dios. <sup>16</sup> Chi badxinan Rom, dxel bay  suldad rniabee guin b n prejs guin ree loj tijb ree suldad rniabee ni. Per cw jb reeman gurej Pab stijb yu ren lod gojp tijb suldad laaman.

### *Gunee Pab xtiidx Jesucrist Rom*

<sup>17</sup> Chi goc choon dxej badxinan Rom, gurejdx Pab b n Israel zojbloj ree ni. Chi badxajg lasa' reeman, dxel r baman loj reeman:

—Compniar Israel, achet way nan contr ree b n Israel ni'qui contr xcostumbr ree dux b ngulal ree. Gui ad laa reeman gunaaz reeman naj Jerusal n, bay  reeman naj loj ree guxtis Rom. <sup>18</sup> Abi' ree b n Rom guin chi gulox bad dan cwent loj reeman, dxel nuy n reeman nuslaa reeman naj, guial gogbee reeman achet benan par gui tan. <sup>19</sup> Per ree b n Israel guin badxoon reeman abi' zagdxeli gunaaban gad  dan loj rey C sar, per ad guial ra'ptan xhienin contr ree b n Israel. <sup>20</sup> Zeel guredxan l jt, din guidganajdi naj din ganin lojdi guial por ni rliladxan guial yaban ree beng t zi'cgajc rliladx gra ree du lasa' b n Israel ree, zeel naxiin con ree caden guie.

<sup>21</sup> Dxel r b reeman lojman:

—Dunujn ni'qui tijb xtiidx ree b n Judea ad waca'tan lod na reeman xcwentil, n  ni'qui tijb b n duladx ree b n raza ree Judea achet wana reeman du lojn contr l j. <sup>22</sup> Per ray nan yaguiejn xhienaag naj xixgabil, din dunujn rayagbee guial gra ladczi rniee reeman contr religion c b guin.

<sup>23</sup> Dxel bazuj reeman tijb dxej ni yadxajg lasa' reeman. Chi bidxin dxej guin, d d zien bejn bido'p lod zojb Pab. Abi' diizd rsil xt wadxe guneen man laa reeman xhienaag naj xguialrniabee Dios. Beenman naguiejn chililadx reeman Jes s, baza't t  man lod rniee xcwent Jes s loj xlibr ley Moisejs n  ni bacaa ree b n bad   xtiidx Dios loj ree bejn. <sup>24</sup> Yu' reeman bililadx ni r b Pab, per yu' reeman ad bililadxt. <sup>25</sup> Abi' guial ad rdxaagt g  reeman diidx, guzuloj bare'ch reeman. Dxel r b Pab loj reeman:

—Waliqui ni r b Isa as b n bad  d xtiidx Dios loj ree dux b ngulal ree guial r b xSprijt Dios:

<sup>26</sup> Wej, g jdx loj ree b n guin:

Majsi riguejn reeman, per achetczi chignia' reeman,  
abi' majsi ruguiaa reeman, per rul   ad ruguiaat reeman.

<sup>27</sup> Din been luxdoo reeman gojl,  
abi' r jn reeman zi'c rul   ad ruguiaat reeman,  
ad riguejn t  t reeman, chit   guguiaa reeman,  
abi' guien reeman chignia' t   reeman.

Din ad r nt reeman gui't reeman con naj,  
abi' g nan laa reeman perdon.

<sup>28</sup> Zeel gol gogbee guial diizd yan, loj ree b n ad najt b n Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

<sup>29</sup> Chi gulox r b Pab zian, dxel zia ree b n Israel guin, cadildiidxn  lasa' reeman.

<sup>30</sup> Tio'p ijz gurej Pab ni, yu lod gudixaman. Ni rnieen man gra ree b n rtixloj laaman.

<sup>31</sup> Sin guialrdxeb r baman loj reeman xhienaag naj xguialrniabee Dios, abi' gunee man xtiidx Dad Jesucrist loj reeman sin guial chu nudxoon.

## Gui'ch ni guxhaal San Pabl loj ree b n Rom rlliladx Jesucrist

### *Rxhiaal San Pabl xtiidx Dios*

<sup>1</sup> Naj Pab, cay nan sirv loj Jesucrist, Dios gule naj din gacan xi ap stol Jesucrist, din gatiechan xtiidxza'caman.

<sup>2</sup> Diizd gocli mal r b Dios diidxza'c guin ree, ni z ed loj xtiidxaman zi'c bacaa ree b n bad e xtiidx Dios loj ree bejn, <sup>3</sup> diidx guin ree ruza't, dux Dad ree Jesucrist guial zi'c bi'taman loj guidxliuj zi'c b nguidxliuj, loj xdiaa rey Davi zaman. <sup>4</sup> Per por xSprijt Dios laaman naj Xi'n Dios guial babanman loj ree beng t, abi' guidiblagaa rajpaman guialrniabee. <sup>5</sup> Abi' par yaza't reeman, zeel bacaabeeman naj din gacan ap stol din guidiblagaa guidxliuj chu' b n chililadx laaman, b n guzoob t e xtiidxaman. <sup>6</sup> Abi' n  l jt ma nayab loj ree b n gule Dios din gaquidi xbejn Jesucrist.

<sup>7</sup> Zeel caxhalan gui'ch guie lojdi b n r n ree Dios, b n zojb ree Rom, l jt ma gulej Dios din gaquidi xbejnman. Dux Dad ree Dios n  Dad Jesucrist g  nle' l jt yabe'cdxe t e reeman luxdoodi.

### *R n Pab cheman Rom*

<sup>8</sup> Yalojxgaj por Jesucrist rud n quixt e loj Dios por gradi, guial guidibczi ruza't reeman l jt xhienaag rllilaxidi Jesucrist. <sup>9</sup> Abi' zi'c cay nan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucw ezt rbedx rniaaban laaman por l jt. <sup>10</sup> Ad rucw ez t et rbedx rniaaban Dios din guneeman mod guidganan l jt, zi'c naj da xgaban diizd gocli. <sup>11</sup> Din yu'czan gan guidganan l jt din g nan l jt yudar con xtiidx Dios din sudxi'chidi lojn. <sup>12</sup> Din g  n t edi naj yudar zian yaguieen du lasa' ree yudar loj guialrlliladx ni raya'p ree, din chile' yalu' du luxdoo du lasa' ree.

<sup>13</sup> Compniar raliduladx ree Jesucrist, r nan gagbeedi guial zien volti da't ma benan xgab guidganan l jt, din gacxhiey ree b n chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan l jt. <sup>14</sup> Par naj naladxan da cwentan naj guial gul n chut ez benan xtiidx Dios, bal najman b n ciuda o najman b n guiedxdoo ya, bal rignia'man o ad rignia'taman. <sup>15</sup> Zeel r nnejzdoon guidganan l jt din gatiechan xtiidx Dios Rom.

### *Xguialrniabee xtiidxza'c Dios*

<sup>16</sup> Ad ratun 'tan xtiidxza'c Jesucrist. Din por diidxza'c guin ree z ed xguialrniabee Dios, din gra ree b n chililadx laan laa reeman loj dol, zi'c ree b n Israel zi'c ree b n ad najt b n Israel. <sup>17</sup> Din por xtiidxza'c Jesucrist ragbee ree bejn guial por guialrlliladx reeman laaman ma naj reeman cwent sin dol: achet por stijb ni ren tijbzi por guialrlliladx. Zian ca loj xtiidx Dios lod r b: "B n naban zi'c r n Dios, guidib tiamp ni nabanman rlliladxaman laaman."

### *Dol ni rajp bejn*

<sup>18</sup> Dunuj ree rayagbee guial diizd xanyabaa z ed xcastiro' Dios par ree b n ad ridxga't laaman, b n ad r jnt ree zi'c rayal, abi' zi'c naban reeman ruquie'ch reeman xtiidxli Dios. <sup>19</sup> Din ragbeechaaw reeman guial yu' Dios, abi' laagajcaman bal   bejn ree guial yu'caman. <sup>20</sup> Majs ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa t eman naj Dios. Zeel ad zajct xhie gudxiib bejn guijc guial achet ragbeeman xcwent Dios. <sup>21</sup> Din majs yu' ree bejn ragbee guial yu' Dios, per ad rajpt reeman laaman respejt zi'c rayal, ad rud e t et reeman quixt e lojman, aal xgab ren ree r jn reeman ni ad r jnt sirv abi' gaz ragdx reeman. <sup>22</sup> R b reeman guial rajc da't reeman abi' mazri na tont reeman. <sup>23</sup> Din luar gui n reeman Dios ni ad yu't dxej gui t, r n reeman ni nit ree

yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëël.

<sup>24</sup> Zeel ma gulëeladx Dios laa reeman loj xixgab mal reeman, abi' rüjn reeman ni natu ree con ree ben ren. <sup>25</sup> Luar chinal reeman xdiidxli Dios, zinal reeman ni rusquiee ree. Abi' rën reeman rajp tëë reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amén.

<sup>26</sup> Zeel gulëeladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. <sup>27</sup> Ziangajc zien ree xinguaaw ad nabantri xnejz, rën gajc lasa' xinguaaw reex, xinguaaw con xinguaaw rüjn reex ni dxuudx, ni natu. Abi' laagajc reex rguuil xcasti reex.

<sup>28</sup> Abi' guial ad ridxga't reeman Dios, zeel gulëeladx Dios laa reeman loj xixgab mal reeman, din güün reeman ganax ni ad rayalt güün reeman. <sup>29</sup> Ganax ni ad rayalt güün reeman rüjn reeman, za'në reeman xinguaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëdloj reeman, rugüjt reeman bejn, rguuil reeman wadijl, rusquiee reeman bejn, ganaxczi ni mal yu'guijc reeman abi' rbëë reeman xtiidxguijdx bejn. <sup>30</sup> Rnieeguijdx tëë reeman bejn, ralen reeman Dios, ad rajpt reeman bejn respejt, rlies xvalor gajc reeman, rüjn reeman benro'. Abi' rbëëguijc reeman ni mal ree, ad ruzoob tëët xtiidx xdad xniaa reeman. <sup>31</sup> Dád nad reeman, ad rüjnt cumplid xtiidx reeman, ad rënt lasa' reeman, ad raya tëët lasa' reeman. <sup>32</sup> Ragbeechaaw reeman rëb Dios guial chi guiët ree bejn, dxel gra ree bën rüjn gra ree ni guin yaya casti. Per majsi zian, rusnuu gajc rüjn reeman ni mal guin ree abi' xt rabaa reeman chi rüjn ree ben ren zian.

## 2

### *Xgualguxtis Dios*

<sup>1</sup> Zeel chutëez lüj guial rëbil xhie casti rayal bejn, ad rajptil derejch guiëbil zian, din lüj gajc rayal casti guin guial cayüjnl zi'cgajc rüjn reeman. <sup>2</sup> Per dunuj ree rayagbee guial Dios rüjn gualguxtis zi'c rayal, chi rudëëdaman casti bën rüjn ree ni mal guin. <sup>3</sup> Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios. <sup>4</sup> Ad rëntil gualnaza'c Dios con lüj, ad rëntil guial rdaanman lüj rajp tëëman lüj pacens, ni'quid ragbeetil guial pacens guin rüjn lüj yudar din gapil tiamp par yayüjnl xgab por xtolil. <sup>5</sup> Per guial dád nadil, ad rëntil yayejqul loj Dios, zeel lüj gajc cayüjnxhie xtolil par dxej ni gudëëd Dios casti, dxej ni güünman gualguxtis zi'c rayal. <sup>6</sup> Par gudëëman ni rayal tijbgaj bejn bal gonin beenman. <sup>7</sup> Gudëëdaman gualnaban tiblayaa loj ree bën ad radxagt rüjn naguiejn guiban zagdxe guial rüjn reeman naguiejn yaya reeman gualnaza'c yu' xanyabaa, rüjn tëë reeman naguiejn yaya'n reeman zagdxe loj Dios din gap reeman cuerp ni ad yu't dxej nit. <sup>8</sup> Per ree bën ad ruzoobt diidx, rdxe'ch Dios laa reeman abi' gudëëdaman laa reeman casti, din luar chinal reeman xtiidxliman, zinal reeman nejz mal. <sup>9</sup> Gra ree bën zinal nejz mal, naya sac reeman sagdiaj reeman, yaloj ree bën Israel dxel bën ad najt ree bën Israel. <sup>10</sup> Guiáad ree bën zë loj nejz zagdxe, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bën Israel dxelri bën ad najt ree bën Israel.

<sup>11</sup> Din Dios tiblojzi rüjnman gualguxtis con gra bejn. <sup>12</sup> Gra ree bën cayüjn dol sin guial ad nünbeet reeman ley badëëd Dios loj Moisejs, tëd reeman casti sin ley guin. Guiáad ree bën cayüjn dol majsi ragbee reeman ley guin, laa reeman tëd casti zi'c rniabee ley guin. <sup>13</sup> Din ad guial guientzi bejn ley guin ma nayaman loj Dios, bën rüjn ree zi'c rniabee ley guin laa reeman naj bën naya loj Dios. <sup>14</sup> Per chi ad najt bejn bën Israel, abi' cayüjnman ni zagdxe sin guial güünbeeman ley guin, dxel ma cayüjnman zi'c rniabee ley guin majsi ad nünbeetaman laan, gualzi nünbeeman conin naj ni zagdxe con tëë nin naj ni mal, abi' guijc gajc reeman zëëd xley reeman. <sup>15</sup> Din zi'c naban reeman, rguien guial guijc reeman zëëd conin rayal güün reeman con tëë nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxe o chi ma been reeman ni

mal. <sup>16</sup> Zian gac chi güün Dios guialguxtis por gra ree ni naguie'ch ni rüjn bénguidxliuj. Abi' zi'c culün bejn ree guidibczi, laaman güün guialguxtis por Jesucrist.

*Bén Israel ree në xley Moisejs*

<sup>17</sup> Yan, lüj guial najl bén Israel yu'guijquil guial rajquil ley badëë Dios loj Moisejs, abi' rüjnl nabë guial najl xbejn Dios, <sup>18</sup> rëbil guial ragbeel xhienaag rën Dios guibanl, abi' por xleyaman ragbeel conin naj zagdxe güünl. <sup>19</sup> Abi' naladxil zile' guzuxnejzil bén ad nünbeet ree ley guin në ree bén ad nünbeet xnejz Dios, <sup>20</sup> naladxil zile' gulüül bén ad rajct ree në ree bén rajc ta'nzi, guial por ley guin ragbeel gra, ragbee tëël conin naj diidxli. <sup>21</sup> Per zi'c nabanl, ¿chexc zeel ad rulüüt lüj gajc luar gulüül ben ren? Din lüj rëb guial ad laat cwan bejn, abi', ¿chexquiza zeel rbanl? <sup>22</sup> Rëbil guial ad laat sunë bejn bén ad najt lacheelaman, abi' lüj, ¿chexquiza zeel rüjnl zian? Rëb tëël guial rdxe'chil ni naladx bejn naj dios, abi', ¿chexquiza zeel rbanl lën yadoo lod yu' ree Dios guin? <sup>23</sup> Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin. <sup>24</sup> Ze'cli rëb loj xtiidx Dios: “Bén ad najt ree bén Israel rniee reeman Dios diidxguijdx por lëjt.”

<sup>25</sup> Diidxli rüjnqui sirv guial ru xcuerp bejn sen ni ru ree bén Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin. <sup>26</sup> Per bal tijb bén ad yu't sen guin nabanman zi'cgajc tijb bén rajc xley Dios majsi ad nünbeetaman laan, dxel ma nayabaman zi'c tijb bén yu' sen, majsi ad yu'taman sen guin. <sup>27</sup> Bén rüjn zi'c naj xley Dios, majsi ad nünbeetaman ley ad yu' tëëtaman sen, gusa'nxtu'man lüj guial nünbeel ley guin yu' tëël sen guin, abi' ad rüjntil zi'c rniabee ley guin. <sup>28</sup> Din ad guial rajlt bejn loj nacion Israel, ad guial yu' tëëtaman sen ni ru ree bén Israel ma najman bén Israel loj Dios, <sup>29</sup> bén wali naj bén Israel loj Dios, guidib luxdooman zinalaman xnejz Dios, ad por guial yu'taman sen ru ree bén Israel, ad por xcostumbr tëët reeman, por guial naban reeman con xSprijt Dios. Abi' bén naban zian, Dios rlies xvaloraman sa'n ad bénguidxliujt.

3

<sup>1</sup> Zeel zanadi lon xhieczi gan naj bejn bén Israel o xhieczi gan chu'man sen ru ree bén Israel. <sup>2</sup> Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëëd Dios xtiidxaman. <sup>3</sup> Yan ad naladxidi por guial yu' ree bén ad zinalt xnejz Dios, ad züntraman cumplid ni rëbaman din xo güün Dios ni rëbaman güünman con ree bén zinal xnejzaman. <sup>4</sup> Din laaman ad yu't dxej guchaa xtiidxaman, majsi gra bénguidxliuj naj bén rusquiee, per Dios ad nëtaman rusquiee, zi'c rëb tiblajt loj xtiidxaman lod rëb:

Gra bejn güünbee lüj guial rüjn cumplid xtiidxil, abi' achet zajc gudxiib reeman guijquil.

<sup>5</sup> (Per yu' bejn rüjn xgab) guial bal por dol ni cayguieen ree rulüü guial benza'c naj Dios, ¿chexquiza zeel najman benmal rudëëdaman bejn casti? <sup>6</sup> Per naj rni lojdi guial ad najt Dios benmal, din bal najman benmal xoza güün xguialguxtisaman con bénguidxliuj.

<sup>7</sup> Din bal yaguie'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajctri guiëb Dios naj bejn bëndol. <sup>8</sup> Abi' mazri ma yaguieen ree ni mal din gui't ni zagdxe, zi'c rëb ree bejn culün bejn ree, per Dios gudëëd casti bén rëb ree zian.

*Graczi bejn ma been dol*

<sup>9</sup> Zeel zi'c ma rnin por ree bén Israel, në por ree bén ad najt bén Israel, abi' ma ragbeedi guial ad zajct guiëbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree bëndol. <sup>10</sup> Zi'c ca tiblajt loj xtiidx Dios lod rëb:

Achutczi naj benza'c,  
per ni'qui tijb bejn.

<sup>11</sup> Achutczi rignia'.

Achutczi raguuil Dios.



<sup>12</sup> Gra reeman ma basa'n xnejz Dios.  
Gra reeman ma zinal nejz mal.

Achutczi cayüjn ni zagdxé,  
per ni'czi tijb bejn.

<sup>13</sup> Zi'cgajczi tijb baa ni zojbyal,  
zian ganax ni dxuudx ririi ro' reeman.  
Ganax diidx rusquiee rniee reeman.

Abi' xtiidx reeman naj zi'c xvenen bëël.

<sup>14</sup> Ganax diidx mal ririi ro' reeman,  
diidxguijdx ni rüjnnaa lasa' reeman.

<sup>15</sup> Za'sin reeman din gugüjt reeman bejn.

<sup>16</sup> Bantëez guin zë reeman, rüjn reeman ni dxuudx ree.  
Abi' rusagzi reeman bejn ree.

<sup>17</sup> Ad nünbee tët reeman xhienaag naj guialrbajn bejn zagdxé.

<sup>18</sup> Ad yu'guijct reeman guial rayal guidxeb reeman Dios.

<sup>19</sup> Dunuj ree rayagbee guial gra ni zëed loj xley Dios, naj par ree bën zinal ley guin, chitëë chu guiëb guial achut ragbee xhienin naj dol, laan naj par gagbee bejn guial najman bëndol loj Dios. <sup>20</sup> Din ad guial güünt bejn gra ni rniabee ley guin ma nayaman loj Dios, ley guin rulüü din gagbee bejn guial najman bëndol.

#### *Por guialrliladx ma naya bejn loj Dios*

<sup>21</sup> Per yan Dios ma balüü dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin në por ni bacaa ree bën badëë xtiidx Dios loj ree bejn. <sup>22</sup> Rayagbee ree guial rüjn Dios bejn cwent zi'c bën ad yu't xtol por guialrliladxaman Jesucrist, din par Dios tiblojzi naj bejn. <sup>23</sup> Din gra bejn ma been dol, achutczi naya niz loj Dios. <sup>24</sup> Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bën gudix por dux tol ree chi gütaman loj crüjz. <sup>25</sup> Dios guxhaal Jesucrist, din por xrejman chu' perdon par bénguidxliuj. Abi' perdon guin naj par ree bën rliladx Jesucrist. Zian rguien guial graczi rüjn Dios xnejz, abi' bal guia'xchej ad beent xguialguxtisaman por dol ni been ree bejn, laan naj por pacens ni rajpaman con bejn, <sup>26</sup> guial ma ragbeeman goc güün xguialguxtisaman. Zian rusnuu rulüüman guial graczi rüjnman xnejz, zeel rüjnman perdon xtol ree bën rliladx Jesucrist.

<sup>27</sup> Yan, ¿xhienaag yaguieen ree nabë? Achet yaguieennë' ree nabë, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree Jesucrist. <sup>28</sup> Zeel rayagbee chaaw ree guial Dios rüjn perdon xtol ree bejn guial rliladx reeman Jesucrist, ad guial rüjnt bejn naguiejn güünman gra ni rniabee ley guin.

<sup>29</sup> ¿Wen xDiosi ree bën Israel naj Dios ya, ad nët ree bën ad najt bën Israel naj xDios laaman ya? Naj rni lojdi guial Dios naj par gra bejn, <sup>30</sup> din tijbzi Dios yu', laaman rüjn perdon xtol ree bën rliladx Jesucrist, yu'man o ad yu'taman sen ni rniabee ley chu' ree bën Israel. <sup>31</sup> Ad naladxidi cayguieen ree ley guin tiblax guial raliduladx ree Jesucrist, din ad ziantan, guial raliduladx ree laaman rguien guial nadxu'guijct ree ley guin.

## 4

#### *Xguialrliladx Abraham*

<sup>1</sup> Yan, ¿xhie zajc yaguie'ch ree xcwent dux béngulal ree Abraham? <sup>2</sup> Bal niyab Abraham zi'c tijb bën gad güün dol por ree ni beenman, guyu mod nünman nabë loj ree bejn, per ad lojt Dios. <sup>3</sup> Din rëb loj xtiidx Dios: "Guial bililadx Abraham Dios, zeel been Dios laaman cwent zi'c tijb bën ad beent dol." <sup>4</sup> Chi rüjn bejn dxiin, milia ni rajxaman ad ni razaladxt reeman, rtia'man laan por dxiin ni rüjnman. <sup>5</sup> Per guial gac bejn perdon loj Dios, ad zajct guiëb bejn guial rayalaman perdon guin por ni beenman, din achut naya loj Dios. Perdon guin zëedan guial rliladx bejn Jesucrist, zeel rüjn Dios bejn cwent zi'c bën ad yu't

xtol. <sup>6</sup> Zi'c gunee rey Davi guial xiquilbaa ree b́en been Dios cwent sin dol sin guial güün reeman xhienin par yayal reeman perdon guin. <sup>7</sup> Rēbaman:

Xiquilbaa ree b́en been Dios perdon xtol,  
b́en ma badxi'caman xtol.

<sup>8</sup> Xiquilbaa ree b́en ma been Dios cwent sin dol.

<sup>9</sup> Ad gunee Davi diidx guie ree naabzi par b́en yu' ree sen ni ru ree b́en Israel, gunee man diidx guin ree par gra ree bejn. Din zi'c ma raguie'ch ree, Dios been Abraham cwent zi'c b́en ad yu't xtol guial bililadxaman laaman. <sup>10</sup> Abi' chi biyabaman zi'c b́en ad yu't xtol, ni'qui gadaman chu' sen ni ru ree b́en Israel, chi gad Abraham chu' sen guin mal nūjn Dios laaman cwent zi'c b́en ad yu't xtol. <sup>11</sup> Chi biabaman zi'c b́en ad yu't xtol, dxel guyuman sen guin din sen guin naj guial ma nūjn Dios laaman cwent zi'c b́en ad yu't xtol guial bililadxaman laaman. Zeel naj Abraham dad par ree b́en rliladx Dios, majsi ad yu't reeman sen ni ru ree b́en Israel, per por guialrliladx guin nūjn Dios laa reeman cwent zi'c b́en ad yu't xtol. <sup>12</sup> Naj tēē Abraham dad par ree b́en majsi yu' sen guin per rliladx reeman zi'c bililadx Abraham Dios diidx chi gadaman chu' sen guin.

### *Promejs ni been Dios loj Abraham*

<sup>13</sup> Chi been Dios promejs loj Abraham nē loj ree xdiaaman, guial gudēēdaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb b́en ad yu't xtol. <sup>14</sup> Yan bal ganaxzi ree b́en zinal ley guin tia' ni gudēē Dios, achet cwent naj guialrliladx ree bejn laaman, ache tēēt cwent naj promejs ni been Dios loj Abraham. <sup>15</sup> Din ley guin najn par castizi, per lod ad yu't ley, ad yu't mod chu guiēb guial ad cayūjnt bejn ley guin cumplid.

<sup>16</sup> Zeel chi been Dios promejs loj Abraham guial gudēēdaman ni rēbaman par gra ree xdiaaman, beenman promejs guin lojman guial bililadx Abraham guin laaman, din guiguien guial najman benza'c abi' ad parzi ree b́en zinalt ley guin naj promejs guin, nēgajc par ree b́en rliladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. <sup>17</sup> Zi'c ca loj xtiidx Dios lod rēbaman loj Abraham: “Lūj gac dad par zien ree b́enguidxliuj.” Zian naj promejs ni been Dios loj Abraham, Dios b́en rusban ree bengūt abi' rnieeman xcwent ree ni gad chu' loj guidxliuj guie zi'c rulūū ma yu' reen.

<sup>18</sup> Majsi ragbeechaaw Abraham guial ad zajctaman famil, per chi rēb Dios lojman zian, bililadxaman ni rēb Dios, bililadxaman guial gac gra ni rēbaman lojman. Zianan zeel najman dad par gra ree b́en rliladx Dios zi'cgajc laaman. Zi'c rēb Dios lojman, chi rēbaman: “Zian gaquil famil, dád famil narooob gaquil.” <sup>19</sup> Cost tibgayuu izj ma yu' Abraham nadxel, ragbeeman guial ma naj reeman bengol nē xb́engunaaman Sara guial chu' xi'n reeman, per ad gyunawēēgtaman, bililadxaman ni rēb Dios lojman. <sup>20</sup> Ad yu't dxej ad bililadxtaman ni rēb Dios. Diidxli bililadxaman laaman abi' rudēēman quixtēē lojman, <sup>21</sup> din guidiblagaa bililadxaman guial rajp Dios guialrniabee güünman zi'c ma rēbaman. <sup>22</sup> Zeel been Dios cwent Abraham zi'c tijb b́en ad yu't xtol.

<sup>23</sup> Abi' lod rēb guial been Dios laaman cwent zi'c b́en ad yu't xtol guial bililadxaman laaman, ad tijbtzi Abraham ruza't yagaj, <sup>24</sup> nēgajc dunuj ree din ma raliduladx ree Dios. Abi' nē dunuj ree ma nūjnman cwent zi'c b́en ad yu't xtol, Dios b́en basban Dad Jesucrist loj guialgūjt, <sup>25</sup> Dad Jesucrist b́en gūt por dux tol ree, dxel babanman abi' por laaman ma naya ree loj Dios.

## 5

### *Chi ma naya bejn loj Dios*

<sup>1</sup> Ma nūjn Dios dunuj ree cwent zi'c b́en ad yu't xtol guial raliduladx ree laaman, zeel ma nadxu' ree zagdxe con laaman por xguialgūjt Dad Jesucrist. <sup>2</sup> Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralēēz ree yayal ree xanyabaa lod za'man. <sup>3</sup> Abi' ad

ziantzi, në guial yu' du luxdoo ree zagdxe por gualrzagdiaj ni radiüüd ree, din rayagbee ree por gualrzagdiaj guin yasiid ree yaya'p ree pasens. <sup>4</sup> Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios. <sup>5</sup> Ni ralëez ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bën ma baneeman duloj ree.

<sup>6</sup> Gocli babajn ree ad bile't naguieen ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree béndol. <sup>7</sup> Dunuj ree rayagbee guial nawëeg naj chu' bën tiëb guiët por zatijb bejn. Ni'czi por tijb bën naban xnejz, o wed yu' bën tiëb guiët por tijb benza'c da't. <sup>8</sup> Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree béndol. <sup>9</sup> Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej. <sup>10</sup> Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, bën guxhal nejz par loj Dios. <sup>11</sup> Abi' ad laatzan, në guial yu' du luxdoo ree nix radëed ree quixtëe loj Dios por Dad Jesucrist, din por laaman ma nadxu' ree zagdxe con Dios.

### *Adán në Cristo*

<sup>12</sup> Por tijb xinguaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol. <sup>13</sup> Diizd chi gad ley ni badëed Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol. <sup>14</sup> Per majsi zian, bidxinczi dxej ni güit reeman, diizd xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb bën naj gui't.

<sup>15</sup> Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, në ni mazri zagdxe par zien ree bejn. <sup>16</sup> Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. <sup>17</sup> Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree bën rliladx guial por Cristo ma naj bejn naya guidiblagaa loj Dios, abi' gap reeman guialnaban tiblyaa con laaman.

<sup>18</sup> Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon në guialnaban loj Dios. <sup>19</sup> Din por tijb bën ad bazoobt diidx gra bejn naj béndol. Per ziangajc por tijb bën bazoob diidx ma zajc gap bejn perdon loj Dios.

<sup>20</sup> Abi' Dios badëe ley loj Moisejs, din por ley guin gagbee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par güünman laaman perdon. <sup>21</sup> Guia'xchej gunabee dol bejn ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nüjnman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

## 6

### *Ma bayëjt ree par dol per nabajnnë' ree Jesucrist*

<sup>1</sup> Ad naladxidi canin lojdi guial yaguieen ree dol mazri din guiën Dios dunuj ree mazri. <sup>2</sup> Din ad ziantan, ma bayëjt ree par dol ad rayaltri yaguieenz yaguieen ree dol. <sup>3</sup> Din gol bignia' guial chi barobnijs ree por Jesucrist, laan naj zi'c rulüü guial në dunuj ree ma bayëjt con laaman. <sup>4</sup> Chi barobnijs ree rën guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

<sup>5</sup> Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree. <sup>6</sup> Din dunuj ree rayagbee guial chi güit Jesucrist loj crüjz,

güjtaman por gra ni baguieen ree yaløj chi gad ree yaguieenbee laaman, abi' yagaj gunijt zi'c babajn ree yaløj, din ma naj nawëëg güün dol dunuj ree gan din ad rniabeetri dol guin dunuj ree. <sup>7</sup> Din bën ma güjt por dol, ad rniabeetri dol guin laaman. <sup>8</sup> Abi' guial güjt Jesucrist por dux tol ree, zeel ma bayëjt ree par dol guin, yabajn tëë ree con laaman. <sup>9</sup> Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgüjt laaman. <sup>10</sup> Con tivoltizi güjt Jesucrist por xtol ree bejn, yan ma nabanman par Dios. <sup>11</sup> Ziangajc lëjt gol been cwent guial ma güjtidi par dol, abi' ma nabandi par Dios guial ma najdi tijbzi con Dad Jesucrist.

<sup>12</sup> Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëëdi güün ree xgabdxuudx lëjt gan. <sup>13</sup> Ad cwëëladx lëjt gajc loj dol par güüнди ni mal, zagdxeli gol cwëjb nabee Dios lëjt, zi'c tijb bën ma güjt, abi' yabandi par laaman. Gol cwëjb nabeeman lëjt par güüнди ni zagdx. <sup>14</sup> Zian ad zanabeetri dol lëjt, per ad por guial yu'guijctidi ni rëb ley ad güüнди, ad zanabeetri dol guin lëjt por guial zinalidi guial rën Dios lëjt.

#### *Ma gulaa ree loj dol*

<sup>15</sup> Ad canitan por guial ma zunaal ree guial rën Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. <sup>16</sup> Lëjt ragbee bal yu' chu rniabee dunuj ree, yazoob ree xtiidx bën rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel ma rayalidi perdon. <sup>17</sup> Per quixtëë Dios guial majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi. <sup>18</sup> Abi' yan guial ad rniabeetri dol lëjt, ma nabandi din güüнди zi'c rën Dios. <sup>19</sup> (Canenë'n lëjt con ganax diidx ni zajc chignia'di xhie rën guiëb ni canin, din ragbeen guial nawëëg naj chignia'di ni guin ree.) Zi'c gunabee dol lëjt guia'xchej persi beendi ni dxuudx ree në graløj ree ni mal, ziangajc yan guidiblagaa gol cwëjb nabee Dios lëjt din gac güüнди ni zagdx guiban tëëdi zi'c rënman.

<sup>20</sup> Chi gunabee dol lëjt ni'quid guyutidi xgab nibajndi zi'c rën Dios. <sup>21</sup> Per, ¿xhieza gan beendi por ni mal ni beendi nadxel, ni mal ni ratunëdi yan guial ma ragbeedi por laan zëëd xcasti Dios? <sup>22</sup> Per yan guial ad rniabeetri dol lëjt ma zinalidi xnejz Dios, abi' laan naj ni zagdx din por zian ma zajc guibandi zi'c rën Dios gap tëëdi guialnaban tiblyaa con laaman. <sup>23</sup> Din ni rüjn bejn gan por dol laan naj casti, per ni razaladx Dios naj guialnaban tiblyaa par ree bën ma naj tijbzi con dux Dad ree Jesucrist.

## 7

#### *Ni naj zi'c guialruxhliaa*

<sup>1</sup> Compniar raliduladx ree Jesucrist, lëjt ragbee xhienaag naj tijb ley. Ley guin naj ni rniabee bejn la'tgaj nabanman. <sup>2</sup> Laan naj zi'c chi ruxhliaa bejn, ad zajct guxhliaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliaanëman ben ren. <sup>3</sup> Zeel bal naban lacheelaman abi' guchajgaman ben ren, dolan cayünman. Per bal ma güjt lacheelaman dxel achet ley gudxoon guial guxhliaanëman ben ren ad cayün tëëtaman dol.

<sup>4</sup> Ziangajcan lëjt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bën baban zatijb, abi' zian ma zajc yaguieen ree zi'c rën Dios yaguieen ree. <sup>5</sup> Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti. <sup>6</sup> Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tëë mod ni nabajn ree, ma zajc yaguieen ree zi'c rën Dios por xSprijtaman bën nabajnnë' ree, ad guial nadxu'guijct ree ley guin.

#### *Ley con dol*

<sup>7</sup> Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tëëtan guial dol naj guialrzëëbladx, bal id rëb loj ley guin: "Ad sëëbladxil." <sup>8</sup> Per chi gogbeen guial ni mal naj guialrzëëbladx, mazri gojcxhie j da dolan por gra ni guzëëbladxan. Bal id yu' ley, ad zagbeet bejn xhienin naj dol. <sup>9</sup> Chi

gadan günbee ley guin, par naj zagdxe naban. Per chi benbeen ley guin, gogbeen guial cayünan dol abi' por dol guin rayalan casti. <sup>10</sup> Bi't ley guin din gagbee bejn xhienaag guibanman, per par naj bi'tzan par gudëedan naj casti. <sup>11</sup> Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

<sup>12</sup> Zeel ad ni malt naj ley guin din loj Dios zëedan abi' gra ni zëed loj ley guin loj Dios zëedan, abi' zagdxe xnejz tää naj ni rëb loj ley guin. <sup>13</sup> Ad ley guint rajp dol guial rayalan casti, dol guinan naj ni basquiee naj din günan ni rayal casti. Abi' por ley guin gogbeen guial ni dxuudx da't naj guial güün bejn dol.

<sup>14</sup> Dunuj ree rayagbee guial por Dios zëed ley guin, per guial najn bénguidxliuj zeel zianczi rüjn dol guin naj gan. <sup>15</sup> Ad rignia'tan xhienin rajcan, din ad rüntan ni rënan, aal ni ad rëntan rünan. <sup>16</sup> Abi' chi rünan ni ad rëntan günan, zian ragbeen guial ni zagdxequi naj ley guin, din por ley guin ragbeen xhienin cayünan. <sup>17</sup> Zeel ad najtczi rün guial rünan ni ad rëntan, rünan laan guial najn bëndol, abi' zianczi rüjn dol guin naj gan. <sup>18</sup> Din guial najn bénguidxliuj, ragbeen guial ni'czi ta'n ad najtan benza'c, majsi rënan günan ganax ni zagdxe, per ad rajctan. <sup>19</sup> Ad rüntan ganax ni zagdxe ni rënan günan, aal ganax ni mal rünan ni ad rëntan günan. <sup>20</sup> Yan bal rünan ni ad rëntan günan, ad najtczi rün par günan laan, rünan laan guial najn bëndol abi' zianczi rüjn dol naj gan.

<sup>21</sup> Ragbeen guial majsi rënan günan ganax ni zagdxe, per laa za' gajc dol guin par güünan naj gan. <sup>22</sup> Dád ruladxan gra zi'c rniabee Dios günan, <sup>23</sup> per yu' ni rudxoon günan laan, abi' ni rudxoon guin naj dol, guial sta naban dol guin luxdon abi' zianczi rüjn naj gan.

<sup>24</sup> ¡Prob naj! ¿Chu zajc yabëe naj loj casti rayalan por dol ni rünan guial naj naj bénguidxliuj? <sup>25</sup> Per quixtëe Dios guial por dux Dad ree Jesucrist ma gulaan loj casti guin. Diidxiczi da xgaban naj guial günan ganax ni rniabee Dios, per guial najn bénguidxliuj zeel zianczi rüjn dol guin naj gan.

## 8

### *Guialnaban runee xSprijt Dios*

<sup>1</sup> Gra ree bën rliladx Jesucrist ad rayaltri reeman xcasti Dios, bën ad nabantri ree zi'ctzi rën reeman, laa reeman ma rüjn reeman naguiejn naban reeman zi'c rniabee xSprijt Dios. <sup>2</sup> Din por xguialrniabee xSprijt Dios, bën runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal täätri ree xcasti Dios. <sup>3</sup> Guial nayajc ree bénguidxliuj ad bile't nüjn ley dunuj ree yudar, ley ni badëed Dios loj Moisejs. Per yan ma been Dios ni ad bile't nüjn ley guin. Laaman guxhaal Xi'n loj guidxliuj zi'cgajczi tijb bénguidxliuj persi güjtaman por dux tol ree chitëe nabeeri dol dunuj ree. <sup>4</sup> Laaman been zian, din yaguieen ree zi'c rënman zi'cgajc tijb bën cayüjn zi'c rniabee ley guial ad nabantri ree zi'ctzi rayën ree, ma nabajn ree zi'c rniabee xSprijt Dios.

<sup>5</sup> Bën naban ree zi'ctzi naj xixgab reeman, mazri yu'guijc reeman güün reeman zi'ctzi rën reeman. Per ree bën naban zi'c rniabee xSprijt Dios, mazri yu'guijc reeman güün reeman zi'c rniabee Sprijt guin. <sup>6</sup> Guial yu'guijc bejn güünman zi'ctzi naj xixgabaman zeel zëed casti. Per bën yu'guijc güün zi'c rniabee xSprijt Dios, zajpaman guialnaban con Dios yabe'cdxe tää Dios luxdooman. <sup>7</sup> Bën yu'guijc ree guiban zi'ctzi naj xixgab reeman, rdxe'ch Dios laa reeman din ad rënt reeman guzooob reeman xtiidxaman ad rile' tää güün reeman zi'c rënman. <sup>8</sup> Zeel bën naban ree zi'ctzi naj xixgab reeman, ad ruladxt Dios ni rüjn reeman.

<sup>9</sup> Per lëjt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabannëdi xSprijt Dios. Din bën ad nabannët xSprijt Dios, ad najtaman xbejn Cristo. <sup>10</sup> Per bal ma nabannëdi Cristo, rën guiëban guial ma güjtidi par dol, ma nabannëdi xSprijt Dios din ma nüjn Dios lëjt cwent sin dol. <sup>11</sup> Abi' bal ma nabannëdi xSprijt Dios, bën basban Jesucrist loj ree bengüt. Majsi guiëtidi per zasban Dios lëjt din tia'di zatijb guialnaban por xSprijt Dios bën nabannëdi.

<sup>12</sup> Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. <sup>13</sup> Din bal nabandi zi'ctzi naj xixgabidi, dxel yayalidi casti, per bal por xSprijt Dios b n nabann di ma basa'ndi dol tiblax dxel ma gapidi guialnaban tiblyaaa con Dios.

<sup>14</sup> Gra ree b n rti jb rniabee xSprijt Dios laa reeman, laa reeman naj xi'n Dios. <sup>15</sup> Din ad nabann t reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: " Dad!" <sup>16</sup> Din xSprijt Dios rusni dunuj ree persi rayagbee ree guial ma nayajc ree xi'n Dios. <sup>17</sup> Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

<sup>18</sup> Ma benan xgab guial achet lasajc guialrzagdiaj ni cayd  d ree yan guial loj guialnaza'c ni yaca' ree xanyabaa. <sup>19</sup> Abi' xt gra ree ni badxe' Dios loj guidxliuj, ma r n nejzdoo reen guidxin dxej guiguien chu ree nin naj xi'n Dios. <sup>20</sup> Din guidxliuj ma guxinan, per ad laatan rajp dol, Dios basa'n gac zian. Yan cab si guidxliuj guin <sup>21</sup> yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. <sup>22</sup> Per la'tgaj cab z guidxliuj guin guidxin dxej guin, dunuj ree rayagbee guial d d naya cazagdiajn zi'c rzagdiaj tijb b ngunaa chi ma gal xi'nman. <sup>23</sup> Abi' ad tijbtizi guidxliuj guin cazajc zian, n gajc dunuj ree guial nabajnn ' ree xSprijt Dios zi'c tijb sen por ni gune Dios duloj ree. Abi' cayzaagdiaj ree la'tgaj cayl jz ree guidxin dxej ni guiguien guial nayajc ree xi'n Dios, dxej ni guidxaa dux cuerp ree chi yaya'p ree cuerp c b. <sup>24</sup> Dunuj ree rayagbee guial gac zian, laan naj ni ral jz ree guialraliduladx ree ma nayajc ree perdon. L jt ragbee bal ni ral jz ree ma gojcan, ad zal  ztri reen din ad zajctri cw z bejn ni ma gojc. <sup>25</sup> Per bal gad ni cayl jz ree gac, ad rayalt yadxag ree yal  z ree gacan.

<sup>26</sup> Abi' xSprijt Dios ragn  dunuj ree chi ad rayagbeet ree xhie yaguieen ree, din yu' dxej loj hor guin ad rile't yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiarguejn ree, dxel laaman rbejdx rniab Dios por dunuj ree. <sup>27</sup> Abi' Dios, b n n nbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c r n Dios.

#### *Achet zajc g  n dunuj ree gan*

<sup>28</sup> Dunuj ree rayagbee guial gra ni cayza'c ree loj guidxliuj guie naj ni g  n sirv par dunuj ree guial ray n ree Dios, dunuj ree guial bazoob ree xtiidxaman par yaguieen ree zi'c r nman. <sup>29</sup> Abi' diizd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj b n nabee loj gra ree b n naj Xi'n Dios. <sup>30</sup> Gra ree b n ragbee Dios guial chililadx reeman laaman, rbejdxaman laa reeman din gac reeman xbejnman, r jnman laa reeman cwent sin dol abi' rud  man xanyabaa loj reeman lod zojbaman.

<sup>31</sup> Yan, guial ma rayagbee ree gra ree ni guie, achet g  nan chut  z g  n xcontr dunuj ree, dunuj ree rayagbee guial Dios gagn  dunuj ree. <sup>32</sup> Ad gurexuut Dios nud   Xi'nman din gui taman por dunuj ree. Yan nacli Xi'nman baneeman persi g jtaman por dunuj ree,  diidxgui ree ni ren ree nid zuneeman duloj ree ya? <sup>33</sup>  Chu zajc cwe'c dux guialquia ree nayajc ree b n ma gulej Dios? Din Dios ma n jn dunuj ree cwent sin dol. <sup>34</sup> Achut zajc na guial rayal ree casti, din Jesucrist g jt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. <sup>35</sup> Zi'c r n Cristo dunuj ree, achut zajc yala' dunuj ree con laaman. Ni'qui por guialyu'naya, o por guialzi, o por ni r jn bejn dunuj ree, o por guialrliaan, o por guial ryaadx du xab ree, o por tijb ni nadxeb, o guial yay jt ree, achet zajc yala' dunuj ree con laaman. <sup>36</sup> Zi'c r b loj xtiidx Dios:

Guial nayajcan xbejnl, zianczi nadxu'n loj guialg jt.

R jnn  reeman dunujn zi'c ree xiil ma naj gui t.

<sup>37</sup> Per ni'qui tijb ni guin ad züjnt dunuj ree gan guial ragnë Cristo dunuj ree, bën rën dunuj ree. <sup>38</sup> Ragbeechaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëäd gac, <sup>39</sup> o ni zëäd xanyabaa, o lën liuj, ni'qui tijb ni been Dios, achetczi achut tëät zajc chiquied guialrën Dios dunuj ree por dux Dad ree Jesucrist.

## 9

*Dios gulej bën Israel ree*

<sup>1</sup> Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, <sup>2</sup> guial guixie guixie dád yu'naya luxdoon, xt ni'quid radxejlt xhie günan. <sup>3</sup> Balzianclaa majsi ad zayaltan perdon, majsi güün Cristo naj tibladd, per bal zian chile' günan yudar bën ladx reen chitëë yayal reeman casti. <sup>4</sup> Laa reeman naj bën Israel, abi' laa reeman naj bën gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëänin güün reeman, badëë tëë xleyaman loj reeman. Rëbaman loj reeman xhienaag guiën reeman laaman, been tëëman promejs loj reeman. <sup>5</sup> Zëäd reeman loj xdiaa ree bën been ree sirv loj Dios gulal, loj gajc ree bën zëäd Cristo chi bi'taman loj guidxliuj, laaman naj bën nagle' zianczi rajp tëëman guialrniabee loj gra ni yu'. Amén.

<sup>6</sup> Ad canitan guial ad züjntri Dios xpromejsaman cumplid, ni canin naj guial ad grat ree bën Israel naj xbejn Dios. <sup>7</sup> Ad guial zëäd reeman loj xdiaa Abraham din gac reeman xdiaaman, din rëb Dios loj Abraham: “Diidz xi'n! Isaac suloj xdiaal.” <sup>8</sup> Laan ruliüü dunuj ree guial ad por guial najt bejn bën Israel, ma najman xbejn Dios, xbejn Dios naj ree bën naj cwent loj xdiaa Abraham guial rililadx reeman xtiidx Dios zi'c Abraham. <sup>9</sup> Din Abraham bililadxaman Dios chi rëb Dios lojman: “Zatib ijz tiamp guie gajc guialan abi' dxej zii ree ma ca' Sar tijb xindobëz.”

<sup>10</sup> Abi' ad laatzan. Grop ree xi'n Rebeca gojc xdad reex Isaac, bën goc dux bëngulal ree, <sup>11-13</sup> per chi gad reex gal, chi ad wayüjn tëät reex ni zagdxe ni'qui ni mal, rëb Dios loj Rebeca: “Xin yaløj guin laax güün sirv loj xinguiag guin.” Zi'c rëb loj xtiidx Dios lod rëb: “Guyënan Jacob, per bidxe'chan Esaú.” Zian rguien guial ma ragbee Dios chu rbeman ad por ni rüjnt bejn, laaman ma ragbee chu rucaabeeman.

<sup>14</sup> Yan, ¿por zian yaguie'ch ree ya, ad rüjnt xguialguxtis Dios zi'c rayal? ¿Per ad ziantan! <sup>15</sup> Din Dios rëb loj Moisejs: “Yayan bën rënan yayan abi' bën rayal ree casti, bal rënan ad zudëäd tan laa reeman casti.” <sup>16</sup> Zeel ad zile't yaya Dios bejn por xixgabzaman o por ni rüjnman, laaman mal ragbee chu rënman yayaman. <sup>17</sup> Loj xtiidx Dios rëb guial rëbaman loj rey Egipto: “Naj ben lüj rey din guiguien da guialrniabeen din güünbee gra bënguidxliuj naj.” <sup>18</sup> Zeel rnin lojdi guial ma ragbee Dios chu yayaman chu tëë güünman luxdoo gojl.

<sup>19</sup> Per wed por zian nadi: “Bal zianan, ¿chexquiza zeel rdxe'ch Dios guial nayajc ree zi'c nayajc ree awa ad zajct yadxoon ree zi'c naj xixgabaman?” <sup>20</sup> Per, ¿chu naj bënguidxliuj din guinieeman Dios zian? Wen zajc guiëb tijb guiajs loj bën been laan ya: “¿Chexc zeel beenl naj zian?” <sup>21</sup> ¿Nid bën rüjn guiajs guin rüjnnë bajn guin zi'ctzi rënman ya? Laaman ruguiaa xhie güünnëman bajn guin, bal güünman guiajs güün dxiin guixie guixie o güünman guiajs güün dxiin dxej zobjlojzi ree.

<sup>22</sup> Yan, ziangajc Dios ma ragbeeman chu rayal casti, abi' xt zajc laa nudëäd gajcaman casti din guiguien xguialrniabeeman. Per gudaanman gojp tëëman pacens bën ad ruzoobt ree diidx, bën rayal ree nit. <sup>23</sup> Gudaanman laa reeman din guiguien guial laaman guinia xhienaag güünman, guial laaman naj bën ca' guialrniabee abi' bayaman bën ragbeeman diidz guia'xchej guial yayal reeman xanyabaa. <sup>24</sup> Abi' laa reeman naj dunuj ree bën ma gurejdx Dios, loj ree bën Israel në loj ree bën ad najt bën Israel. <sup>25</sup> Zi'c ca loj libr ni bacaa Oseas bën badëë xtiidx Dios loj ree bejn, lod rëb: Bën ad najt ree da bejnan,

guiën loj reeman guial naj reeman da bejnan,  
abi' ree bën ad yu't bën rën laa reeman,  
naj guiën laa reeman.

<sup>26</sup> Abi' lod rëb Dios loj ree bejn: “Ad da bejntan lëjt”.

Yagaj gac reeman xbejnman, laaman guial najman bën naban.

<sup>27</sup> Guiáad Isafás bën badëë xtiidx Dios loj ree bejn, rëbaman por ree bën Israel: “Majsi zien da't naj ree bën Israel zi'c üx riga' ro' nijsdoo, per ta'nz naj ree bën laa loj casti,  
<sup>28</sup> din Dios nayob güün cumplid xtiidxaman loj guidxliuj guie zi'c ma rëbaman.” <sup>29</sup> Abi' diizd gocli rëb Isafás loj ree bejn:

Bal nitiëjb dux Dad ree Dios

bën rajp gra gualrniabee

ninijt gra ree dux bëngulal ree,

diizd gocli mal gunijt dux diaa ree

zi'c gunit ree bën Sodoma në ree bën Gomorra.

*Bën ad najt ree bën Israel ma naj reeman perdon loj Dios*

<sup>30</sup> Yan, ¿xhie yaguie'ch ree? Bën ad najt ree bën Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rliladx reeman Jesucrist. <sup>31</sup> Abi' ree bën Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojctan. <sup>32</sup> ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn” <sup>33</sup> zi'c ca loj xtiidx Dios lod rëb:

Ma gulen tijb bejn luguiedx Sión, bën gac zi'c tijb guiaj

ni ladx guia' ree bejn abi' gusajban laa reeman.

Abi' bën chililadx laaman ad yu't dxej yaya'nxtuman.

## 10

<sup>1</sup> Compniar raliduladx ree Jesucrist, ni rënan rniaab tëen loj Dios naj guial gac ree bën Israel perdon. <sup>2</sup> Din naj ragbee guial dád cayüjn reeman naguiejn cayüjn reeman sirv loj Dios, per diidxli ad rignia't reeman zagdx xhienaag rën Dios güün reeman. <sup>3</sup> Din ad rtiëjbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rën Dios din gac reeman perdon. <sup>4</sup> Din por Jesucrist bayaaloj zi'c rniabee ley güün bejn, yan bën rliladx ree laaman, ma naya reeman loj Dios.

<sup>5</sup> Bën rën gac naya loj Dios guial zinalaman ley, rëb Moisejs guial bën güün zi'c tal rëb ley, zajpaman gualnaban la'tgaj cayüjnman zi'c rniabee ley guin. <sup>6</sup> Per guial rajc bejn naya loj Dios por guial rliladxaman Jesucrist, naj guial ad züjntaman xgab: “¿Chuczzi zajc chë'p xanyabaa?” (Din rën guiëban guial ad rliladxtaman, abi' rënman guguaaman guiat Cristo loj guidxliuj.) <sup>7</sup> Ad guiëb tëëman: “¿Chu zajc che lod za' ree bengüt?” (Din rën guiëban guial ad rliladxtaman, abi' rënman guguaaman yaban Cristo loj ree bengüt.) <sup>8</sup> Per loj xtiidx Dios rëb: “Gajxh za' xtiidx Dios con lüj, ryaadxzi güünl xgab guiëb tëël bal chililadxil laan.” Din gualrliladx ni ratie'ch ree naj ze. <sup>9</sup> Bal yaneero'l guial Jesús naj Dad par lüj abi' guidib luxdool chililadxil guial basban Dios laaman loj ree bengüt, dxel ma najl perdon. <sup>10</sup> Din chi chililadx bejn Jesucrist con guidib luxdooan, diizd loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

<sup>11</sup> Abi' loj xtiidx Dios rëb: “Gra ree bën chililadx laaman ad yu't dxej yaya'nxtu reeman.” <sup>12</sup> Laan rën guiëb guial loj Dios tiblojzi naj bejn, achet güünan chutëëz najman, bal najman bën Israel o ad najtaman bën Israel. Din tijbzi Dios naj Dad par dugra ree, abi' dád benza'can con gra ree bën rbejdx rniab laaman. <sup>13</sup> Din loj xtiidx Dios rëb: “Gra bën yanab perdon loj Dios, gacaman perdon.” <sup>14</sup> Per, ¿xhieza naag cwedx



guiniab reeman laaman awa ad waliladxt reeman laaman? ¿Abi' xhieza naag chililadx reeman laaman awa ad wacaagdiajgt reeman xcwentaman? ¿Xhienaag guiguiejn reeman xcwentaman awa achut b́en guinee xtiidxaman loj reeman? <sup>15</sup> ¿Xhienaag chu' b́en guitie'ch xtiidxaman awa achut guixhiaal laa reeman? Loj xtiidx Dios ŕeb: “¿Ni za'cdxoon naj chi rdxin b́en ziné rusion zagdxe!”

<sup>16</sup> Per ad grat bejn ridxga' xtiidxza'c Dios. Zi'c ŕeb Isaías: “Dad, ¿chu ma rliladx ni ranen por lúj?” <sup>17</sup> Zeel guialrliladx źeed por ni rigujejn bejn, abi' ni rigujejn bejn naj xtiidxza'c Jesucrist.

<sup>18</sup> ¿Wen nid waguiejn ree bejn laan ya? ¿Per naj rni guial ma bacaagdiajg reeman laan! Din loj xtiidx Dios ŕeb:

Guidib guidxliuj ma bire'ch xtiidx Dios

abi' xt luar bigra lod naguie'ch ma bigujejn reeman xtiidxaman.

<sup>19</sup> Yan ŕunan xgab: ¿Wen id rignia' ree b́en Israel xtiidx Dios ya? Per diizd guia'xchej bacaa Moisejs ni ŕeb Dios por laa reeman chi ŕebaman:

Naj ǵun din tédlojdi por ni ǵunan

con ree b́en ad najt b́en Israel.

Né por ni ǵunan con laa reeman,

majsi ad ragbeet reeman, abi' zadxe'chidi.

<sup>20</sup> Abi' sin guialrdxeb bacaa Isaías ni ŕeb Dios por ree b́en Israel, chi ŕebaman:

B́en naj ree b́en Israel, majsi ad baguiilt reeman naj,

per badxejl reeman naj.

Abi' ma balúlon loj reeman,

majsi ad gunabdiidxt reeman por naj.

<sup>21</sup> Bacaa t́ee Isaías ni ŕeb Dios por ree b́en Israel, chi ŕebaman: “D́echej za'n rbedxan bejn ree abi' ad ŕent reeman guzoob reeman diidx al rusagloj reeman naj.”

## 11

### *Xixgab Dios*

<sup>1</sup> Ad canitan lojdi guial ma guléeladx Dios b́en Israel ree, din ad ziantan. Ĺejt ragbee guial b́en Israel naj abi' loj xdiaa Abraham zialan, guial zialan loj xdiaa Benjamín. <sup>2</sup> Diizd guia'xchej, gulej Dios b́en Israel ree din gac reeman xbejnman, zeel ad rbéeladxtaman laa reeman. ¿Nid rusaaladxidi tiblajt loj xtiidx Dios ya lod źeed chi gule'c Elías b́en badéé xtiidx Dios loj ree bejn xguialquia ree b́en Israel loj Dios? Chi ŕebaman: <sup>3</sup> “Dad, ma bagújt reeman gra ree b́en badéé xtiidxil loj ree bejn ma bachijl t́ee reeman xialtar reel, najzi baya'n abi' négajc naj ŕen reeman gugújt reeman.” <sup>4</sup> Per badxi' Dios xtiidxaman ŕebaman: “Ma gulécan gajdx mil bejn par naj, b́en ad wazuxibtczi ree loj dios la Baal.” <sup>5</sup> Yan ziangajc yu' ta'n b́en Israel, por guial rayaman laa reeman gulejman laa reeman par laaman. <sup>6</sup> Abi' bal guial rayaman laa reeman gulejman laa reeman, ad por ni cayújt reeman, din bal nibejman laa reeman por ni cayújn reeman dxel ad por guial rayatraman laa reeman.

<sup>7</sup> Zian gojc, b́en Israel b́en gule Dios, badxejl reeman laaman guial rliladx reeman laaman. Per ree b́en Israel ren gad reeman yadxejl laaman, din raguiil reeman laaman zi'c naladx reeman, ad raguiilt reeman laaman zi'c ŕenman zeel beenman luxdoo reeman gojl, <sup>8</sup> zi'c ŕeb loj xtiidx Dios lod ŕeb: “Basiaaw Dios xquiargujejn reeman, abi' naj reeman zian xt yandxej, majsi ruguiaa reeman per rulúü ad ruguiaat reeman, abi' majsi rigujejn reeman per rulúü ad rigujejnt reeman.” <sup>9</sup> Ŕeb t́ee Davi:

Xguialraw zagdxe reeman con gra xguialnaza'c reeman

laan gusquiee laa reeman guial zéqui reeman zagdxe.

Laan gusquiee laa reeman din téd reeman casti ni rayal reeman.

<sup>10</sup> Yaya'n reeman zi'c tijb b́en ad ruguiaat, abi' sac reeman zi'c tijb b́en ca b́ew xijch.

*Gac ree bén ad najt bén Israel perdon*

<sup>11</sup> Ad canitan lojdi por guial ad rtiéjbt ree bén Israel güün reeman zi'c rën Dios zeel ma gunijt reeman loj Dios, din ad ziantan. Guzajc reeman zian din chu' mod gac ree bén ad najt ree bén Israel perdon, din chile' sēēbladx ree bén Israel gap reeman perdon guin.

<sup>12</sup> Yan bal guial ad bazoobt ree bén Israel diidx, beenan sirv par din yayal los demazri ree bénguidxliuj xguialnaza'c Dios, bén ad najt ree bén Israel. Yan, ¿rūjndi xgab ya xhienaag güünle' Dios bejn ree chi tiēb ree bén Israel güün reeman zi'c rën Dios?

<sup>13</sup> Yu' ni rēnan ganin lējt bén ad najt ree bén Israel, lējt ragbee guial Dios guxhaal naj din güün xtiidxaman lojdi abi' dád cayūnan naguiejn günan zi'c rayal. <sup>14</sup> Rēnan guial ree bén ladx reen bén Israel ree sēēbladx zi'c rünjdi din güün reeman zian din chile' gac reeman perdon. <sup>15</sup> Walican guial chi ad bazoobt ree bén Israel xtiidx Dios, guyu mod gojc los demazri ree bejn perdon. ¡Per xi nix chi chililadx reeman xtiidx Dios! Laan naj zi'c chi yaban tijb bengüt zatijb. <sup>16</sup> Abi' zi'c chi beenle' Dios bén Israel ree gulal laan naj tijb sen guial güünle'man los demazri ree bén Israel, ziangajc bal güünle' Dios xliuj tijb yag guidib yag guin ma nagle'.

<sup>17</sup> Bén Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lūj guial ad najtil bén Israel najl zi'c tijb xidx yag olivo ni yu' dajn ni rguuid lod biru' xidx yag olivo guin, zeel rajpil guialnaban por xliuj yag guin. <sup>18</sup> Zeel ad naladxil guial mazri zagdxē najl guial loj yag oliv ni rnin naj ree bén Israel. Per bal rūjnl xgab zian, basaaladx guial ad lūjt cudēē guialnaban loj xliuj yag guin, xliuj yag guin cunee guialnaban lojl.

<sup>19</sup> Wed zanal: “Walican, per gurug xidx yag olivo guin persi guyu'n xluaran din gacan tijbzi con yag olivo guin.” <sup>20</sup> Waliquil, per xidx yag olivo ni canin naj ree bén Israel, gurug reen guial ad bililadxt reen abi' lūj guyul xluar reen guial rliladxil. Zeel ad rūjnl nabē, zagdxeli gojp cudad. <sup>21</sup> Din bal bén Israel ni canin naj ree xidx yag guin, ad bayat Dios laa reeman, ziangajc zajc saquil. <sup>22</sup> Gogbee guial benza'c naj Dios, per ziangajc diidxli rūjn xguialguxtisaman. Ma been xguialguxtisaman con ree bén ad bazoobt xtiidxaman, abi' ma beenman ni zagdxē con lūj. Per rayal guibanl zi'c rēnman, bal id zūjnl zian zūjn xguialguxtisaman con lūj. <sup>23</sup> Abi' bal yayejc ree bén Israel con Dios, abi' chililadx reeman perdon ni zēēd por laaman, zūjnman laa reeman cwent con los demazri ree bén Israel rliladx. Din laaman rajp guialrniabee par yayūjnman laa reeman tijbzi con los demazri ree bén Israel. <sup>24</sup> Din lūj guial ad najtil bén Israel, lūj guial canin najl zi'c tijb yag olivo ni yu' dajn, zile' niajqul tijbzi con yag olivo zagdxē ni rnin naj ree bén Israel, ¡diixgui ree bén Israel ni ad ruzoobt ree xtiidx Dios, nid zayajc reeman tijbzi ya con los demazri ree bén Israel bal guzoob reeman xtiidx Dios!

*Gac ree bén Israel perdon*

<sup>25</sup> Compniar raliduladx ree Jesucrist, yu' ni ad ragbeetidi abi' rēnan gagbeedan, chitēē güündi nabē. Bén Israel rūjn ree nad par guzoob reeman xtiidx Dios, cayajc zian xt chi ma bayaaloj bililadx ree bén ad najt ree bén Israel, bén ma naj ree par chililadx xtiidx Dios. <sup>26</sup> Chi ma gojc zian, dxel graczi ree bén Israel ma güünccwent xtiidx Dios. Zian gac reeman perdon, zi'c rēb loj xtiidx Dios lod rēb:

Luguedx Sión za bén gagnē ree bén zēēd loj xdiaa Jacob.

Din yariica reeman loj nejz mal zinal reeman.

<sup>27</sup> Dxel gac cumplid da diidxan,

Zi'c ma rën loj reeman guial günan perdon xtol reeman.

<sup>28</sup> Per yan guial dád nad ree bén Israel par chililadx reeman xtiidxza'c Jesucrist, zian yu' mod persi rliladxidi guial ad najtidi bén Israel. Abi' majsi zian, rën gajc Dios laa reeman zi'c beenman promejs loj ree xbéngulal reeman. <sup>29</sup> Din Dios ad ruhaat xixgabaman, ni ma bazaladxaman loj bejn, ad rquiedtaman laan, ad rbēēladx tēētaman bén ma gulejman par laaman. <sup>30</sup> Gocli ad binaltidi xnejz Dios, per yan por ree bén Israel ad ruzoobt xtiidx Dios, ma balüüman lējt guial rayaman lējt. <sup>31</sup> Abi' bal yan ad ruzoobt

ree b n Israel xtiidx Dios, cayajc zian din yayaman l jt, per chi guidxin dxej ziangajc yayaman laa reeman. <sup>32</sup> Cw jb Dios guial zi'c ree b n Israel n  ree b n ad najt b n Israel ad zuzoobt reeman xtiidxaman, din gac yayaman gra reeman tiblojzi.

<sup>33</sup>  D d zro' naj xguialrignia' Dios, n  xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cay jnman. <sup>34</sup> Zi'c ca loj xtiidxaman lod r b: " Chu zajc gagbeechaaw xhienaag naj xixgab dux Dad ree Dios?  Chu mazri rajc din gui b lojman xhienaag g nman?" <sup>35</sup>  O chu ma bad e xhienin lojman din cw zaman quixaman laaman?" <sup>36</sup> Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Am n.

## 12

### *Guialnaban c b*

<sup>1</sup> Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n l jt loj Dios zi'c tijb gon ni ma nagle' ni yayuladx t eman, din guibandi zi'c r nman, abi' zian gui ndi laaman. <sup>2</sup> Ad guibanridi zi'c naban los demazri ree b n yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag r n Dios guibandi. Zian gagbeedi conin naj zagdxe, conin ruladxaman, con t enin naj xnejz.

<sup>3</sup> Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt g n nab  guial mazri lasajquidi loj ree bejn. Zagdxeli gol been xgab por l jt zi'c rayal, segun naj quiarguejn ni baneer Dios loj tijbgajdi. <sup>4</sup> Din zi'c xcuerp bejn zien la' najn, per ad tijbtzi ni r jnman. <sup>5</sup> Ziangajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

<sup>6</sup> Din tijbgaj dunuj ree garent garen naj quiarguejn ni baca' ree, zi'c naj ni guy n Dios baneeman dunuj ree. Zeel bal ma baneeman quiarguejn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. <sup>7</sup> O bal baneeman quiarguejn par yaguieen ree sirv ben ren ree, rayal yaguieen reen zi'c rayal. B n cwa' quiarguejn par gul man bejn ree xtiidx Dios, rayal gul man bejn ree. <sup>8</sup> O b n cwa' quiarguejn par gud eman consejw loj ree bejn, rayal gud eman consejw. Gui ad b n cwa' quiarguejn par yazaladxaman xhienin loj ree bejn, rayal yazaladxaman con guidib luxdoodman. Abi' b n cwa' quiarguejn par nabeeman, rayal gapaman cudad nabeeman zi'c rayal, o b n cwa' quiarguejn par g nman yudar b n cazagdiaj ree, rayal chu' luxdoodman zagdxe g nman laa reeman yudar.

### *Ni rayal g n ree b n rliladx Jes s*

<sup>9</sup> Gol guy n lasa'di con guidib luxdoodi, gol basa'n ree ni mal tiblax, gol binal ni zagdxe. <sup>10</sup> Gol guy n gra ree bejn zi'c tijb bijchidi, ad r jn l jt gajc benro', gol gojpc respejt lasa'di.

<sup>11</sup> Ad gaquidi b n ploj par g ndi ni rayal g ndi, con guidib luxdoodi gol been sirv loj Dios.

<sup>12</sup> Gol badxe' luxdoodi zagdxe por ni cab zidi tia'di, gol gudaan t e loj ni rzagdiajdi, ad gucw ez cwedx guiniabidi Dios.

<sup>13</sup> Chi xhie ryaadx xcompniaridi, b n rliladx ree Jesucrist, gol been reeman yudar. Gol gojpc benza'c con ree b n ri't lidxidi.

<sup>14</sup> Gol gurejdx Dios por ree b n rzunal l jt par g n reeman l jt ni mal, ad guzaalidi diidxmal guijc reeman, gol gurejdx Dios guial gagn man laa reeman.

<sup>15</sup> Gol badxe' luxdoodi nix con ree b n yu' luxdoo nix, per con ree b n yu' luxdoo naya, gol been naguiejn din gagbee reeman guial za'quidi con laa reeman.

<sup>16</sup> Gol gubajn zagdxe con ree lasa'di, ad g ndi nab , gol gojpc b n naxanlax. Ad nalaxidi mazri rajquidi guial loj ree ben ren.

<sup>17</sup> Ad g ndi ni mal b n r jn l jt ni mal, gol been naguiejn g ndi ni zagdxe loj gra ree bejn. <sup>18</sup> Gol been naguiejn da't din cwen di bejn ree zagdxe. <sup>19</sup> Compniar raliduladx

ree Jesucrist, ad rgu' gualxyajn luxdoodi con ree bén rüjn lëjt xhienin, gol basa'nan loj Dios, laaman güün xgualguxtis, zi'c rëb loj xtiidxaman, lod rëb: “Naj naj bén rayal güün xgualguxtis, gudë tëen ni rayal bejn. Zian rëb dux Dad ree Dios.”<sup>20</sup> Rëb tëeman: “Bal rliaan bén rdxe'ch lüj, badëed ni gawaman, o bal re'caman nijs, badëed ni guië'man, zian guguaal yatuman.”<sup>21</sup> Ad bal tiëbil güün ni mal lüj gan, been ni zagdxe din güünl ni mal guin gan.

## 13

### *Royal yaya'p ree guxtis respejt*

<sup>1</sup> Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëed gualrniabee ni rajp reeman. <sup>2</sup> Zeel bén ad ruzoobt xtiidx ree bén rniabee guin, rën guiëban guial ad rënt reeman güün reeman zi'c rniabee Dios. Abi' ree bén rüjn zian laagajc reeman rguuil xcasti, <sup>3</sup> din bén rajp ree gualrniabee ad za't reeman par guchejb reeman bén rüjn ree ni zagdxe, za' reeman par guchejb reeman bén rüjn ree ni mal. Yan bal rënl guibanl guial ad zadxebtil bén ca' ree gualrniabee, gubajn zagdxe din yaya'nl zagdxe loj reeman. <sup>4</sup> Din laa reeman cayüjn reeman sirv loj Dios din yalaj reeman lüj. Per bal cayüjnl ni mal, zadxebil bén ca' ree gualrniabee, din ad ca' xlia'tzi reeman gualrniabee guin, laa reeman cayüjn sirv loj Dios din gudëed reeman casti bén rüjn ree ni mal. <sup>5</sup> Zeel rayal guzoobidi xtiidx ree bén ca' ree gualrniabee, ad güüendi zian naabzi par ad zayaltidi casti, gol been zian guial ragbeedi zian rayal güüendi. <sup>6</sup> Gol gudijx tëë impuest, din gusnuu nabee ree bén ca' ree gualrniabee, din laan naj mandad bayal reeman par güün reeman sirv loj Dios.

<sup>7</sup> Zeel gol badëed ni rayal gudëedidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx bén rayal guzoobidi xtiidx, gol gojp respejt Bén rayal respejt. <sup>8</sup> Gol been naguiejn gol baguijx ni ralidi loj ree bejn, abi' ad rayalt gucwëez guiëndi bejn ree. Din bén rën bejn ree, ma cayüjnman cumplid gra ni rniabee xley Dios. <sup>9</sup> Xmandamient Dios rëban: “Ad sunël bén ren bén ad najt lacheelil, ad gugüjtil bejn, ad cwanl, ad sëëbladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient rëb: “Guyën ben ren ree zi'c rën lüj gajc.” <sup>10</sup> Din bén rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaaloj rüjnman gra ni rëb loj xley Dios.

<sup>11</sup> Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree xtiidxza'caman. <sup>12</sup> Mazri caydop tiamp guin, abi' mazri cabig dxej gui'taman, zeel rayal yasa'n ree ni rinë dunuj ree loj nejz mal, abi' yaguieen ree naguiejn yaguieen ree ganax ni zagdxe din yunaal ree nejz zagdxe. <sup>13</sup> Rayal yabajn ree zagdxe zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunë bejn ben ren bén ad najt lacheelaman, o guial gapaman graloj vijs, o gualrdil o gualrdëdloj. <sup>14</sup> Gol basa'n lëjt gajc loj dux Dad ree Jesucrist, ad rayalt guibandi zi'ctzi rëndi.

## 14

### *Ad gusa'nxtudi Bén qui rliladxri xtiidx Dios*

<sup>1</sup> Zagdxe gol guneenë Bén qui rliladxri Jesucrist ad gusa'nxtudi laaman guial mazri rajquidi guial lojman. <sup>2</sup> Din yu' ree Bén rliladx Jesucrist naladx reeman zajc gaw reeman xhietëez nin, per yu' ree Bén qui rliladxri naladx reeman guial zagdxeli naj ad zajwt reeman bëel. <sup>3</sup> Bén rüjn xgab guial zajc gawaman xhietëez nin, ad rayalt güünman tibläd Bén naladx yu' ni ad zajct gaw bejn. Guiáad Bén rüjn xgab guial yu' ni ad zajct gaw bejn, ad rayalt guze'man Bén naladx zajc gaw bejn xhietëez nin. Din niz loj Dios tiblojzi ma naj reeman xbejnman. <sup>4</sup> Zeel, ¿chu naj bejn din guze' xcompniaraman Bén rliladx Jesucrist por niguinzi ree? Diosqui ragbee bal cayüjnman ni zagdxe o cayüjnman ni mal. Abi' bal

ad wayignia'taman xhienaag güünman, dxel dux Dad ree Jesucrist rajp guialrniabee par gagnëman laaman güünman zi'c rayal.

<sup>5</sup> Ziangajc yu' ree dux compniar ree bën raliduladxnë' ree Jesucrist naladx reeman guial yu' dxej zobjloj, yu'za ree bën naladx guial tiblojzi naj gra dxej, per achet güünan, tijbgaj bejn con ni naladxaman naj zagdxe par laaman. <sup>6</sup> Din bën rüjn xgab guial yu' dxej zobjloj, rüjnman zian persi rënman Dios. Guiáad bën naladx guial tiblojzi naj gra dxej, rüjnman zian persi rënman Dios. Abi' bën raw graloj, rawaman guial yu'guijcaman guial por Dios zëëdan abi' rudëëman quixtëë lojman. Guiáad bën naladx guial yu' ni ad zajct gaw bejn, rüjnman zian guial naladxaman zian cayajpaman Dios respejt abi' rudëëman quixtëë lojman.

<sup>7</sup> Ni'qui du tijb ree ad nabant ree por dux xgabzi ree, o ad zayëjtt ree por dux xgabzi ree. <sup>8</sup> Bal nabajn ree por dux Dad ree Jesucrist par laa tëëman nabajn ree. Abi' bal yayëjt ree por laaman par laa tëëman yayëjt ree. Zeel bal nabajn ree o yayëjt ree, par dux Dad ree Jesucrist ma nayajc ree. <sup>9</sup> Din par zian güjtaman abi' babanman, din gacaman Dad loj ree bën naban në loj ree bën ma güjt.

<sup>10</sup> ¿Chexquiza din guze' lasa'l bën riladx Jesucrist o güün lasa'l tiblax ya? Awa dugra ree rayal yadxu' loj Dios din yadëëd ree cwent lojman. <sup>11</sup> Zi'c ca loj xtiidxaman lod rëb: Naj naj Dios naban,

abi' diidxli rnin lojdi guial gra ree bejn guzuxib lon.

Abi' gra ree bejn guiëb guial naj naj Dios.

<sup>12</sup> Abi' tijbgaj dunuj ree rayal yadëëd ree cwent loj Dios, per por dunuj gajc ree.

#### *Ad gusajbidi bejn loj dol*

<sup>13</sup> Zeel ad rayalt yaneeguidx du lasa' ree bën riladx ree Jesucrist, zagdxeli yaguieen ree naguiejn yaya'p ree cudad chitëë por dunuj ree güün reeman dol. <sup>14</sup> Naj najn xbejn Jesús, ragbeen guial ad dolt naj gaw bejn xhietëëznin. Per par bën naladx guial ad zajct gawaman xhietëëznin, par laaman dolan cayüjnman bal gawaman xhietëëznin. <sup>15</sup> Yan bal por ni rawil naladx tijb xcompniaril bën riladx Jesucrist guial dolan cayüjnl, abi' bal id ridxga'l laaman rën guiëban guial ad rëntil laaman. Gojp cudad chitëë por ni rawzil güün xcompniaril dol, din nëgajc por laaman güjt Jesucrist loj crüjz. <sup>16</sup> Ad güünl tijb ni guinieeguidx ree xcompniaril lüj, majsi lüj ragbee guial ad ni malt naj ni cayüjnl. <sup>17</sup> Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tëë luxdooman nix por xSprijt Dios. <sup>18</sup> Abi' bën naban zian guial zinalaman Jesucrist, cayüjnman zi'c rën Dios, zi'c ruladx tëë bejn.

<sup>19</sup> Zeel rayal yaguieen ree naguiejn yabajnnë' du lasa' ree zagdxe yabedxe tëë du luxdoo ree, din yasnuu yayagbee ree xhienaag yunaal ree xnejz Dios. <sup>20</sup> Gol gojp cudad chitëë por ni rawzidi gunijtidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayüjnl. <sup>21</sup> Zeel zagdxeli naj guial ad zajwtil bëël ad zë' tëëtil vin o xhie stijb nin bal por laan güün xcompniaril dol. <sup>22</sup> Majsi lüj ragbee guial achet güünan gaw bejn xhietëëznin, per zagdxeli lüjzi con Dios. Naj rni guial, ;xiquilbaa bën ad yu'nawëëgt luxdoo rawaman xhietëëznin! <sup>23</sup> Per bën yu'nawëëg luxdoo par gawaman xhienin, abi' gawaman laan laagajcaman ma cayüjn dol guial ad cayawtraman guidib ladxaman. Bal naladx bejn ad laat naj ni cayüjnman, dxel laagajcaman cayüjn dol.

## 15

#### *Rayal yaguieen ree ni naladx bejn naj zagdxe*

<sup>1</sup> Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar bën ad wazudxi'cht loj guialrliladx Jesucrist luar yaguieen ree ni rayentzi ree, <sup>2</sup> dugra ree rayal yaguieen ree naguiejn din chu' luxdoo dux compniar ree zagdxe con dunuj ree. Abi' rayal yaguieen ree ni naladx reeman naj zagdxe, din chile' gusnuu güünbee reeman xnejz Dios. <sup>3</sup> Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl."

<sup>4</sup> Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në guialragnë chitëë yalenya' ree yalëjz ree ni ralëjz ree yaca' ree. <sup>5</sup> Dios, bën razaladx pacens në guialragnë chitëë yalenya' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist. <sup>6</sup> Din tiblojzi guilies reeman xvalor Dios, xdad dux Dad ree Jesucrist.

*Bire'ch xtiidx Dios loj ree bën ad najt bën Israel.*

<sup>7</sup> Zeel, zi'c baca' Jesucrist lëjt par gaquidi xbejnman, ziangajc gol guneenë ree xcompniaridi zagdxe, bën rliladx ree laaman par guiliesidi xvalor Dios. <sup>8</sup> Gol basaaladx guial bi't Cristo loj guidxliuj par gulüüman bën Israel ree xtiidx Dios, zian bidgaguieenman sirv loj reeman, persi gojc cumplid promisejs ni been Dios loj ree xbéngulal reeman, abi' zian biguieu guial rüjnqui Dios cumplid xtiidxaman. <sup>9</sup> Bi't tëë Cristo loj guidxliuj din por laaman, bën ad najt ree bën Israel guilies reeman xvalor Dios guial rayaman laa reeman, zi'c ca loj xtiidxaman lod rëb:

Xt loj ree bën ad najt bën Israel guzatan lüj  
guial najl benza'c.

Gol tëen cant ree par lüj.

<sup>10</sup> Ziangajc rëb zatibljaj loj xtiidx Dios:

Lëjt bën ad najt ree bën Israel,  
gol babaa zi'c rabaa ree bën Israel.

<sup>11</sup> Zatibljaj loj xtiidx Dios rëb:

Gra ree bën ad najt bën Israel.

Në los demazri ree bejn, gol gules xvalor Dios.

<sup>12</sup> Rëb tëë Isaías:

Loj xdiaa Isaí, grii tijb bën nabee bénguidxliuj ree,  
xt ree bën ad najt bën Israel, chililadx laaman.

<sup>13</sup> Dios bën ragnë dunuj ree ralëjz ree ni caylëjz ree, laaman yagu' luxdoodi zagdxe yabe'cdxe tëëman luxdoodi guial rliladxidi laaman, din cwëz da'tidi ni guneeman por xSprijt Dios.

<sup>14</sup> Compniar raliduladx ree Jesucrist, naj ragbee chaaw guial zagdxe nabandi con ree xcompniaridi, ma ragbee tëëdi zagdxe xhienaag chinalidi xnejz Dios, xt rajc rudëëdidi consejw rülüü tëë xcompniaridi. <sup>15</sup> Per majsi zian, tio'p choon lajt loj gui'ch guie bacan diidx naa, din yasaaladxidi xhienaag guibandi. Rünan zian por guialrniabee ni ma bane Dios naj, <sup>16</sup> din günan sirv loj Jesucrist. Din da dxiinan naj gulün bën ad najt ree bën Israel xtiidxza'c Dios din guiban reeman zi'c rën Dios, din gac reeman naya niz lojman por xSprijtaman. <sup>17</sup> Ra'pan xhie günnë'n nabë, guial ragnë Jesucrist naj por ree dxiin cayünan por Dios. <sup>18</sup> Per achetczi zajc guiën bal id zën guial por Cristo cayünan laan, din laaman cayagnë naj persi cayünan yudar bën ad najt ree bën Israel din gac chililadx reeman guzoob tëë reeman xtiidx Dios. Yan ma rliladx reeman laaman por ni rën loj reeman në por guial ruguiaa reeman xhienaag naban, <sup>19</sup> në guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilírico. <sup>20</sup> Din zian naj da xgaban günan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejntczi reeman xcwent Cristo, <sup>21</sup> zi'c ca loj xtiidx Dios lod rëb:

Bën ad waguiejnt ree xcwentaman,

güünbee reeman laaman.

Guiáad ree bën ad wayagbeet xcwentaman,

gagbee reeman laan.

*Rüjn Pab xgab cheman Roma*

<sup>22</sup> Abi' guial wan guidibczi lod ma rnin lojdi, zeel ad wayajct gan guidganan lëjt, majsi zianczi guyënan nidganan lëjt. <sup>23</sup> Per yan guial ma gulox gutiechan xtiidx Dios guidib niz

guie, abi' guial ma gojc zien ijz ni rënan guidganan lëjt, <sup>24</sup> zeel rünan xgab guidganan lëjt chi gan España. Abi' chi gadëëdan guguian lëjt, chi ma gojc tio'p choon dxej yu' luxdoon zagdxe guial za'n con lëjt, dxe ma güüнди naj yudar din gan España. <sup>25</sup> Per yan yaloj gan Jerusalén chigsa'n nan tijb yudar par ree dux compniar ree bën rlliladx ree Jesucrist. <sup>26</sup> Din bën Macedonia ree con ree bën Acaya bën rlliladx gajc ree Jesucrist, been reeman xgab guto'p reeman yudar guin par ree bënprob zojb ree Jerusalén, bën rlliladx ree Jesucrist. <sup>27</sup> Abi' por xixgab reeman guixhiaal reeman yudar guin, per zagdxe naj ni cayüjn reeman din mal nuzëëb reeman loj reeman. Din por ree bën Israel bidxin xtiidx Dios loj reeman, dxe yan laa reeman guial ad najt reeman bën Israel, zagdxen guial güün reeman yudar bën Israel ree zi'ctzi gac reeman. <sup>28</sup> Zeel chi ma balooxan dxiin guie, chi ma bayün yudar guin, dxe gan España, abi' chi gadëëdan ladxidi dxe guidganan lëjt. <sup>29</sup> Naj ragbee guial chi guidganan lëjt, zien da't ni gunee Dad Jesucrist par ganin lëjt.

<sup>30</sup> Yan por dux Dad ree Jesucrist në guial rën xSprijt Dios dunuj ree, rniaaban lojdi din güüнди naj yudar yarejdx yanaab ree Dios por naj. <sup>31</sup> Gol gurejdx gunab Dios din gagnëman naj loj ree bën Judea, bën ad rlliladxt ree Jesucrist, gol gurejdx tëë Dios por dux compniar ree bën rlliladx ree Jesucrist, bën zojb ree Jerusalén din tiëb reeman tia' reeman yudar ni chigsa'n nan par laa reeman. <sup>32</sup> Dxe bal gagnë Dios ma chu' luxdon zagdxe guidganan lëjt dxe ma zajc yaziiladxan la'tgaj za'n con lëjt. <sup>33</sup> Dux Dad ree Dios bën rabe'cdxe du luxdoo ree, laaman gagnë gradi. Amén.

## 16

### *Rugajpdioz Pab bejn ree*

<sup>1</sup> Yan ni gui't Febe ladxidi, bëgunaa ni naj dux compniar ree guial raliduladx ree Jesucrist, bën cayüjn tëë sirv lën yadoo ni zojb guiedx Cencrea. <sup>2</sup> Gol baca'man zagdxe por Dad Jesucrist, zi'c rayal yaguieennë' ree dux compniar ree bën rlliladx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

<sup>3</sup> Gol bagajpdioz Aquila con xbëgunaaman Priscila, bën cayüjn ree naj yudar cayguieenan sirv loj Jesucrist. <sup>4</sup> Abi' laa reeman xt guzuj reeman loj guialgüjt por naj, zeel rudën quixtëë loj reeman. Abi' ad najtzi rudë quixtëë loj reeman në ree dux compniar ree bën rlliladx ree Jesucrist bën ad najt ree bën Israel rudëë quixtëë loj reeman. <sup>5</sup> Gol bagajpdioz ree bën rlliladx Jesucrist, bën rado'p ree lidx Priscila con Aquila. Gol bagajpdioz da miwan Epeneto, bën goc bën yaloj bililadx xtiidx Jesucrist niz Acaya. <sup>6</sup> Gol bagajpdioz Li, bën ma been da't lëjt yudar. <sup>7</sup> Gol bagajpdioz ree bën ladxan Adrónico con Junias, bën guyu'në' reen ladxguib. Abi' ree xi apóstoles Jesús dád rën reeman laa reeman, abi' yaloj laa reeman bililadx Jesucrist guial lon.

<sup>8</sup> Gol bagajpdioz Amplias, da miwan bën rën da'tan guial nayajcan xbejn Jesucrist. <sup>9</sup> Gol bagajpdioz Urbano, bën cayüjn naj yudar cayguieenan sirv loj Jesucrist. Gol bagajpdioz tëë da miwan Estaquis. <sup>10</sup> Gol bagajpdioz Apeles, bën ma balüü guial diidxliczi rlliladxaman Jesucrist, gol bagajpdioz tëë xfamil Aristóbulo. <sup>11</sup> Gol bagajpdioz tëë Herodión ben ladxan, në ree xfamil Narciso, bën ma rlliladx Jesucrist. <sup>12</sup> Gol bagajpdioz Trifena në Trifosa, bën cayüjn ree sirv loj Jesucrist. Gol bagajpdioz tëë Pérsida, bën naguieenbee ree guial dád cayüjnman sirv loj Jesucrist. <sup>13</sup> Gol bagajpdioz Rufo, bën diidxliczi zinal xnejz Dios, gol bagajpdioz tëë xniaaman, bën rënan zi'c da nan. <sup>14</sup> Gol bagajpdioz Asíncrito, Flegonte, Hermas, Patrobas, Hermes në gra ree bën za' con laa reeman, bën ma rlliladx ree Jesucrist. <sup>15</sup> Gol bagajpdioz Filólogo, Julia, në Nereo con bizanman, në Olimpas con gra ree bën rlliladx Jesucrist bën za' ree con laa reeman.

<sup>16</sup> Gol bagajpdioz lasa'di zi'c rayal. Dux compniar ree bën raliduladx ree Jesucrist bën za' ree guie, rugajpdioz reeman lëjt.

<sup>17</sup> Compniar raliduladx ree Jesucrist, rniaaban lojdi din gapidi cudad con ree bën rlia' lasa' ree bejn, bën rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, <sup>18</sup> din ad lojt Jesucrist cayüjn reeman sirv, rüjn

reeman ni rëntzi reeman, abi' con diidxnagüüdx ne con diidxza'c rüjn reeman gan Bén ad ragbeetczi ree o Bén ad ragbeeza'ct ree xtiidx Dios. <sup>19</sup> Per lëjt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rënan susindi par güündi ni zagdx ad par güüntidi ni mal. <sup>20</sup> Dios, Bén rabe'cdxe luxdoo bejn, laaman gagnë lëjt nayob chitëë güünri xindxab lëjt gan. Dux Dad ree Jesucrist gagnë lëjt.

<sup>21</sup> Rugajpdioz Timoteo lëjt, Bén cayüjn naj yudar con xchiin Dios ni cayünan, në ree Bén ladxan Bén la ree Lucio, Jasón, në Sosípater, rugajpdioz reeman lëjt.

<sup>22</sup> Në Tercio, Bén cayüjn gui'ch guie rugajpdioz lëjt por dux Dad ree Jesucrist.

<sup>23</sup> Nëtëë Gayo rugajpdioz lëjt, lidxaman za'n, runee tëë lidxaman rado'p ree dux compniar ree Bén rlliladx ree Jesucrist. Në Erasto, Bén naj tesorer luguiedx guie në Bén la Cuarto ben rlliladx Jesucrist, rugajpdioz reeman lëjt.

<sup>24</sup> Dux Dad ree Jesucrist güünle' gradi. Amén.

*Diidx bigra bacaa Pab loj gui'ch guie*

<sup>25</sup> Radëen quixtëë loj Dios din laaman zile' gagnë lëjt din gusnuu gagbeedi sudxi'ch tëedi loj xtiidxza'c Jesucrist, zi'c ma balüün lëjt xhienaag din gaquidi perdon. Din zian naj xixgab Dios diizd chi gad guidxliuj gacchaaw, xgab ni ad gogbeet ree bejn diizd guia'xchej.

<sup>26</sup> Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree Bén badëë xtiidx Dios loj ree bejn zi'c gunabee Dios laa reeman, Bén naban goctëëz. Abi' guidibczi care'ch xtiidx Dios din chililadx ree bejn Jesucrist guzoob tëë reeman xtiidxaman.

<sup>27</sup> ¡Tijbzi Dios, Bén rajc gradooczi, rayal yaya'p reeman respejt zianczi por Dad Jesucrist! Amén.



## Gui'ch yaloj ni guxhaal San Pabl loj ree b́en Corinto rliladx Jesucrist

### *Rxhiaal Pab xtiidx Dios*

<sup>1</sup> Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, b́en rliladx Jesucrist. <sup>2</sup> Caxhalan gui'ch guie par lějt najdi b́en rliladx xtiidx Dios luguiedx Corinto, lějt guial ma nayadi delant loj Dios por Jesucrist, abi' ma bacaabee Dios lějt gaquidi xbejnman bacaabee tēeman gra ree b́en gra lad b́en rliladx ree Jesucrist, b́en naj Dad par dunuj ree nē par laa reeman. <sup>3</sup> Dux Dad ree Dios nē Dad Jesucrist gūinle' lějt, yabe'cdxe tēē reeman luxdoodi.

### *Rudēed Pab quixtēē loj Dios*

<sup>4</sup> Gra dxejczy rudēdan quixtēē loj Dios por lějt zi'c ma gognēman lějt guial rliladxidi Jesucrist. <sup>5</sup> Nē guial najdi tijbzi con Jesucrist dád ma gognē Dios lějt, baneeman lějt quiarguiejn din guinieedi chignia' tēedi xtiidxaman. <sup>6</sup> Zian rguien guial diidxli naj ni ma biguiejndi por Cristo diizd chi guzuloj bililadxidi laaman. <sup>7</sup> Abi' zianczi rajpidi xyudar Dios la'tgaj rbēzidi dxej ni gui't Jesucrist zatijb. <sup>8</sup> Abi' Dios gagnē lějt din sudxi'chidi guidiblagaa loj ni rliladxidi laaman, chitēē xhie xtolidi chu' dxej ni gui't dux Dad ree Jesucrist zatijb. <sup>9</sup> Din Dios diidxli rǔjn xtiidxaman cumplid, abi' laaman naj b́en gule lějt din gaquidi tijbzi con dux Dad ree Jesucrist.

### *Ad rayalt la' lasa' ree xbejn Jesucrist*

<sup>10</sup> Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. <sup>11</sup> Rnin lojdi zian compniar raliduladx ree Jesucrist, din ma gogbeen guial yu' wadijl entr lějt, zian bagojn ree xfamil Cloé naj. <sup>12</sup> Guial garent garen rēb ree bejn, yu' reeman rēb: “Naj naj xbejn Pab”, yu' tēē reeman rēb: “Naj naj xbejn Apolos”, yu' reeman rēb: “Naj naj xbejn Bēd”, yu' tēē reeman rēb: “Naj naj xbejn Cristo.” <sup>13</sup> Per naj rni lojdi guial Cristo tijbzi najman, din ad najt güt loj crǔjz por lějt, ad gurobnijs tēētidi par gaquidi da bejn. <sup>14</sup> Quixtēē Dios chi wan ladxidi achut mazri barobnijsan, Crispozi nē Gayo. <sup>15</sup> Chitēē guiēbidi guial gurobnijsidi par gaquidi da bejn. <sup>16</sup> Barobnijs tēēn xfamil Estéfanas, per ad rusaaladxtran chu mazri barobnijsan. <sup>17</sup> Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane tēētan con diidx ni yadxaloj ree bejn naj luar cu'guijc reeman par xhie güjt Cristo loj crǔjz.

### *Xguialrniabee Dios nē xquiarguiejnman*

<sup>18</sup> Gra ni raguie'ch ree guial por xhie güjt Cristo loj crǔjz, achet lasajcan par ree b́en zē loj nejz mal. Per par dunuj ree guial ma raya'p ree perdon, dád lasajc xguialgüjtaman din zian rayagbee ree xhienaag naj xguialrniabee Dios. <sup>19</sup> Abi' loj xtiidx Dios rēb: Guniytan xquiarguiejn ree b́en ni rēb guial rajc da't reeman, abi' guscayjan xquiarguiejn ree b́en ni rēb guial rignia' da't reeman.

<sup>20</sup> Yan, ¿con ree b́en rēb guial rajc da't reeman? ¿Con ree mextr rajc ley? ¿Con ree b́en rēb guial rajc da't reeman xcwent ree ni yu' loj guidxliuj? Par Dios achet lasajc xquiarguiejn b́enguidxliuj. <sup>21</sup> Abi' por xquiarguiejn Dios ragbeechaawaman guial ad zayünbeet b́enguidxliuj laaman por xquiarguiejn reeman, zeel beenman xgab yabēēman bejn loj casti por xtiidxaman ni caylüün bejn ree. Abi' ree b́en yarii loj casti guin laa reeman naj b́en rliladx laaman, majsi par ree ben ren achet lasajc ni canin por Cristo.

<sup>22</sup> Din b́en Israel ree rēn reeman guguaa reeman milagr din chililadx reeman, abi' ree b́en ad najt b́en Israel rēn reeman guien reeman ni mazri nawēēg din chililadx reeman. <sup>23</sup> Per dunujn ni caylüün bejn ree naj par xhie güjt Cristo loj crǔjz, abi' ree b́en Israel rdxe'ch reeman, guiáad par ree b́en ad najt b́en Israel achet sirv rǔjn ni caylüün. <sup>24</sup> Per

par ree b en ma bacaabee Dios, zi'c ree b en Israel zi'c ree b en ad najt b en Israel, por Cristo rguien xguialrniabee Dios n  xquiarguejnman. <sup>25</sup> Din ni rul u achet lasajc guial ni r jn Dios, laan naj ni mazri lasajc loj xguialrajc b nguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee b nguidxliuj. <sup>26</sup> Gol gogbee compniar raliduladx ree Jesucrist guial ta'nzi ree b en rliladx laaman naj b en rignia' zi'c naladx ree b nguidxliuj, ta'nzi ree b en rliladx laaman rajp guialrniabee loj guidxliuj guie, abi' ta'nzi ree b en rliladx laaman naj ree b en za loj ree famil ni naj b en zojbloj. <sup>27</sup> Abi' Dios gulej ree b en ni naladx ree bejn ad rajcza'ct din yaya'nxtu ree b en rajc da't, gulej t eman b en ad ca't ree guialrniabee din yaya'nxtu ree b en ca' guialrniabee. <sup>28</sup> Dios gule ree b en ni naladx ree bejn guial achet sirv laa reeman, b en ni naladx ree bejn guial achet lasajc reeman, b en ni achut naj loj guidxliuj guie din chiquiedaman xguialdxal ree b en naj ree chunin loj guidxliuj guie. <sup>29</sup> Zianan zeel achut zajc g un benro' devant loj Dios. <sup>30</sup> Yan por Dios ma najdi tijbzi con Jesucrist, dxel por laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc t e ree par laaman abi' ma raya'p ree perdon loj Dios. <sup>31</sup> Zianan din gac zi'c r b loj xtiidx Dios lod r b: "Bal yu' b en r n guilies xvalor gajc, luar g undi zian gol gules xvalor dux Dad ree Jesucrist."

## 2

### *Xtiidx Jesucrist b en cwa loj cr jz*

<sup>1</sup> Compniar raliduladx ree Jesucrist l jt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx naw eg par chignia'di. <sup>2</sup> La'tgaj guzun con l jt ad gunetan diidx ren ree lojdi, tijbzi xcwent Jesucrist b en cwa loj cr jz. <sup>3</sup> Abi' chi wan ladxidi zi'c tijb b en ni ad yu't gojl, rnizczan guial rdxeban bialan lojdi. <sup>4</sup> N  chi gunen n l jt, chi gunen xtiidx Dios lojdi, ad gunen tan l jt con ree diidx ni g nan l jt gan por da diidxan, benan gan rliladxidi Jesucrist por xyudar xSprijt Dios n  xguialrniabeeman. <sup>5</sup> Din guiguien guial ni rliladxidi Jesucrist z edan por xguialrniabee Dios ad por xguialrajct b nguidxliuj.

### *Por xSprijt Dios n nbee bejn laaman*

<sup>6</sup> Majs chi ral un b en ni ma rajc ree mazri xtiidx Dios, ral un laa reeman por guialrajc. Per ad por guialrajct ni yu' loj guidxliuj guie, lasa' guialrajc ni rajp ree b en rniabee, guialrajc ni yu' dxej nit. <sup>7</sup> Ral un laa reeman por guialrajc ni z ed por Dios, din yanee ree zi'c naj xixgab Dios, xgab ni goc ni naguie'ch par ree b nguidxliuj, abi' xgab guin naj guial chililadx reeman Jesucrist, diizd chi gad guidxliuj gacchaaw been Dios xgab guin din gac yayal ree xanyabaa. <sup>8</sup> Laan naj tijb ni ad gogbeet ree b en rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj cr jz, b en ca' guialrniabee. <sup>9</sup> Per loj xtiidx Dios r b:  
Achut waguiaa, achu t et waguejn  
abi' ni'quid way jnt b nguidxliuj xgab  
por ni nagu'chaaw Dios par ree b en r n laaman.

<sup>10</sup> Per dunuj ree ma bal u Diosan duloj ree por xSprijtaman b en naban con dunuj ree, din xSprijt Dios gran ragbeeman, xt ni mazri naguie'ch ni z ed por Dios.

<sup>11</sup> Achut ragbee xhie xgab cay jn tijb bejn. Xsprijtsaman ragbee xhie xgab cay jnman. Ziangajc xSprijt Dios tijbzi laaman ragbee xhienaag naj xixgab Dios. <sup>12</sup> Abi' dunuj ree guial ma zunaal ree xnejz Dios, ad nabajnt ree con tijb sprijt ni z ed loj guidxliuj guie, ma nabajn ree con Sprijt z ed loj Dios, din por xSprijt Dios yayagbee ree gra ni ma bazaladx Dios duloj ree guial najman benza'c. <sup>13</sup> Abi' laa reen naj ni cayl un bejn ree, per ad por dux quiarguejntan, xSprijt Dios cul u dunujn xhienaag yanen. Zian ral un xcwent Dios b en ma nabann  xSprijtaman.

<sup>14</sup> Per b en ad nabann t xSprijt Dios ad rliladxtaman ni z ed ree por Dios ni rul u xSprijt Dios dunuj ree, din par laaman najn tijb ni ad r jnt sirv. Zeel ad zajct chignia'man

xcwent Dios din con xSprijtzi Dios zajc chignia' bejn ni rën guiëban. <sup>15</sup> Per bën ma nabannë xSprijt Dios por Sprijt guin rignia'man ni naj xcwent Dios, abi' ni'qui tijb ree bën ad nabannët xSprijt Dios ad rignia't chexc zeel rignia'man ni guin ree. <sup>16</sup> Loj xtiidx Dios rëb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

### 3

#### *Compniar rüjn ree sirv loj Dios*

<sup>1</sup> Compniar raliduladx ree Jesucrist, chi guzun con lëjt ad gunenë'tan lëjt zi'c ree bën ma nabannë xSprijt Dios, gunenë'n lëjt zi'c ree bën ad nabannët xSprijt Dios, zi'c ree bën qui guzulojri rliladx Jesucrist. <sup>2</sup> Diidx ad nawëëgt ree gunenë'n lëjt zi'c rudëë bejn lejch loj tijb xindobëz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bën ma rignia' mazri xtiidx Dios. <sup>3</sup> Din sta nabandi zi'c naban gra ree bénguidxliuj. Nadëdloj lasa'di rdil tëëdi, zian rguien guial sta nabandi zi'c gra ree bénguidxliuj bën ad zinalt ree xnejz Dios. <sup>4</sup> Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayüjndi zi'cgajc chutëëz bénguidxliuj.

<sup>5</sup> Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bën cayüjn sirv loj Dios persi bile' bililadxidi tijb gajc dunuj cayguieen dxiin ni bane Dios dunuj. <sup>6</sup> Yaguie'ch ree guial naj naj zi'c bën rxübin abi' Apolos naj bën rguil, per por Dios cayagbeedi mazri xtiidxaman zi'c rusni'saman tijb cwaandoo. <sup>7</sup> Abi' zi'c bën rxübin zi'c bën caguiil mandadzi cayüjn reeman, Diosan naj bën ni rusni's ni rxübin reeman. <sup>8</sup> Yan ziangajc naj con Apolos tijbzi mandad cayguieenan, rayagbeen guial zune Dios dunuj ni rayalan bal xhienaag yaguieenan mandad ni baneeman yaguieen tijb gajc dunuj. <sup>9</sup> Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod cayguieenan dxiin o lëjt naj zi'c tijb yu ni cayüjn Dios. <sup>10</sup> Abi' naj guial catiechan xtiidxaman najn zi'c tijb albanil bën ni rajp da't cudad din grii xchiinman zagdxe guial bacaabeeman naj günan xcimiant yu guin. Abi' ree bën ni cusnuu culüü xtiidx Dios, laa reeman naj zi'c bën cusnuu cayüjn yu guin. Per rayal gap reeman cudad xhienaag cales reeman yu guin, <sup>11</sup> din achut zajc guchaa cimiant ni ma benan, abi' cimiant guin naj guial rliladx Jesucrist. <sup>12</sup> Abi' ree bën ni cayguie'ch ree naj ree bën ni cusnuu cales yu loj cimiant ni cayguie'ch ree naj guialrliladx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'. <sup>13</sup> Per chi guidxin dxej ni güün Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gajc bejn. <sup>14</sup> Abi' bal rüjn sirv ni beenman zi'c tijb bën ni ruzoob tijb yu ni ad re'ct, zaca'man ni rayalaman por ni beenman. <sup>15</sup> Per bal che'c ni beenman, sacaman zi'c tijb bën ni re'c lidx abi' penz rliaaman loj bajl, din zajcaman perdon per gusëëbaman gra.

<sup>16</sup> Zeel gol gogbee guial lëjt naj zi'c tijb xyadoo Dios guial nabandi con xSprijt Dios. <sup>17</sup> Abi' bal chu bën guitie'chdojn bën rliladx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

<sup>18</sup> Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bënrajc da't. <sup>19</sup> Din delant loj Dios achet lasajc guialrajc bénguidxliuj, tib lajt loj xtiidxaman rëb: “Ad rudëët Dios mod grii zagdxe ni naj xixgab ree bën naladx guial dád nasin reeman par güün reeman tijb ni ad najt xnejz.” <sup>20</sup> Rëb tëë loj xtiidxaman: “Dios ragbeechaaw guial xixgab ree bën rajc da't achet lasajcan.” <sup>21</sup> Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. <sup>22</sup> Ma nulendi dunuj, naj Pab, Apolos në Bëd. Xieendi naj guidxliuj, guialnaban, guialgüjt, ni yu', në ni qui chu'ri, xieendi naj gra. <sup>23</sup> Abi' lëjt ma najdi xbejn Cristo abi' Cristo naj Xi'n Dios.

## 4

*Dxiin ni been ree b n naj ree xi ap stoles Jes s*

<sup>1</sup> Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn. <sup>2</sup> Per l jt ragbee guial tijb mojs naj par g nman gra ni rayal g nman din gap reeman laaman confianz. <sup>3</sup> Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn. <sup>4</sup> Din majsi bal naladxan guial achet ni mal way nan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cay nan. <sup>5</sup> Zeel ad rayalt yadxa lojdi chu cay jn zagdex o chu ad cay jnt zagdex, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

<sup>6</sup> Compniar raliduladx ree Jesucrist, gra ree ni canin l jt wen par l jtan. Abi' Apolos con naj nayajcan tijb ejempl par l jt, din por dunujn gusiididi ad t dlaj guiliesidi xvalor bejn chit   por zian gusa'ndi trajs stijb bejn. <sup>7</sup> Din ni'qui tijb bejn ad lasajct mazri loj stijb bejn.  O xhie rajpidi ni ad baneet Dios lojdi? Abi' bal por laaman rajpidi ni rajpidi,  chexc zeel rlies xvalorgajquidi zi'c rul   ad por Diost rajpidi laan?

<sup>8</sup> L jt naladxidi achet ryaadxidi, guial ma bayaaloj rignia'di abi' ad ryaadxtridi dunujn. Abi' naladxidi najdi zi'c ree rey.  Per xinix niajquidi rey din nanabeen con l jt! <sup>9</sup> Yu' dxej naladxan guial dunujn nayajcan xi ap stoles Jes s, Dios basial dunujn yayajcan zi'c ree b n ad lasajct, zi'c ree benmal ni rayal guialg jt, abi' radxaloj ree anjl n  ree b nguidxliuj dunujn. <sup>10</sup> Abi' la'tgaj nayajcan zi'c ree b n ad yu't xquiarguejn par b nguidxliuj guial ratie'chan xtiidxza'c Cristo, l jt rlies xvaloridi guial rignia' da'tidi guial rliladxidi laaman. Dunujn nayajc zi'c b n ad yu't gojl gui ad l jt naladxidi yu' da'tidi gojl abi' rajp ree bejn l jt respejt gui ad dunujn ad r nt reeman dunujn. <sup>11</sup> Xt yandxej sta cayzaagdianj por guialrlaan, guial re'c nijs n  guial ryaadx du xaban. Zienloj ni r jnn  ree bejn dunujn, achet du lidxan. <sup>12</sup> Abi' d d radxagan raguieenan dxiin din guidxel ni yadaawan. Chi ruzaal ree bejn diidxmal du guijcan radxi'nan con diidxza'c, abi' radaanan ni r jnn tzi reeman dunujn. <sup>13</sup> Abi' chi rnieeguijdx reeman dunujn, raneeza'cn 'n laa reeman. Xt yan nayajcan zi'c tijb guix par b nguidxliuj, nayajcan zi'c tijb ni ad r jnt sirv par laa reeman. <sup>14</sup> Ad cucatan gui'ch guie par gusa'nxtun l jt, cucan laan din gunen l jt consejw zi'cgajc da xi'n reen guial r nan l jt. <sup>15</sup> Din majsi gapidi zi'c chii mil ree b n gusiid l jt, per najzi naj zi'c tijb Dad par l jt. Din por naj guzuloj rliladxidi Jesucrist chi basidan l jt xtiidxza'caman. <sup>16</sup> Zeel rniaaban lojdi din guibandi zi'c naban.

<sup>17</sup> Din par zian rxhialan Timoteo guitixlojman l jt, b n r nan zi'c da xi'nan laaman diidxli rliladxaman Jesucrist. Laaman gusaaladx l jt xhienaag naban guial rliladxan Jesucrist, din zi'c naban naj ni cusidan b n rliladx ree Jesucrist gra lod ran. <sup>18</sup> Yu' ree xcompniaridi naladx guial ad zitixlotran l jt abi' rlies xvalor reeman guial naban reeman zagdex. <sup>19</sup> Per Dios gunee permis din diob guitixlon l jt dxel gagbeen wali reeman ya naban reeman zi'c rniee reeman o rnieez reeman. <sup>20</sup> Din guial guiban zi'c rniabee Dios ad najtan diidxzi, rayal g n bejn zi'c rniabee Dios con xguialrniabeeman. <sup>21</sup> Yan,  conin r ndi g nan chi guitixlon l jt, gadil 'n l jt ya o gui nan l jt ganen 'n l jt diidxza'c?

## 5

*Xhienaag gac con b n r jn tijb dol*

<sup>1</sup> Ma bacagdiagan guial tijb l jt b n rliladx ree Jesucrist nabann  xnarojpidi zi'c lacheelidi, ni'quiza ree b n ad n nbeet Dios ad r jnt lasa' dol guin. <sup>2</sup> Abi' l jt r jndi benro', luar r jndi benro' gol guyunaya gol bab   t   b n guin lojdi. <sup>3</sup> Majsi ad za'tan con l jt, per r nan xgab por l jt zi'cgajc rul   za'n con l jt, abi' ma benchaawan xgab xhie rayal b n r jn dol guin. <sup>4</sup> Zi'c guialrniabee ni baneet Jesucrist naj, naj rni l jt: "Gol bachajg lasa'di." Dxel gol gunaladx guial za'n con l jt abi' por xguialrniabee Dad Jesucrist, <sup>5</sup> gol

been b n guin tibl d, gol basa'nman loj xindxab din gagnaaman o sagdiajman por ni cay jnman din gacaman perdon dxej ni gui't dux Dad ree Jesucrist.

<sup>6</sup> Ad nixtan guial rlies xvalorgajquidi abi' rti jbidi rajc lasa' ree dol guin. Gol gogbee guial zi'c r jn levadur cob par guiadxtil ziangajc con tijb b n g  n dol ma z  gajcan zian con gra ree lasa'di. <sup>7</sup> Zeel gol been naguiejn din gaquidi naya zi'c cob harin ni ad yu't levadur guijc. Din zi'c bag jrt ree bejn tijb xiil lanij pascw din yaya xtol reeman, ziangajc dunuj ree por xguialg jrt Jesucrist ma naya ree loj Dios. <sup>8</sup> Abi' guial yabaa ree por zian naj guial yabajn ree guidib du luxdoo ree zi'c rayal, zi'c guiadxtil ni ad no'cht levadur, luar yabajn ree con ree ni mal n  ree dol zi'c babajn ree yaloj.

<sup>9</sup> Abi' zi'c ma rnin lojdi loj stijb gui'ch ni ma guxhalan lojdi, ad guchajguidi b n naban ree nadxuudx. <sup>10</sup> Ad canen 'tan l jt zian por ree b n ad rliladxt Dios, b n naban ree nadxuudx o rz  bladx reeman ni ruguiaa'tzi reeman o naj reeman gubaan o r n reeman ni ren luar gui n reeman Dios, din bal zianan dxel ryaadx yariidi loj guidxliuj guie. <sup>11</sup> B n ni canin l jt naj ree b n ni r b naj ree xcompniaridi, b n rliladx ree Jesucrist abi' naban reeman nadxuudx, o rz  bladx reeman ni ruguiaatzi reeman, o r n reeman ni ren ree luar gui n reeman Dios, o rb   reeman xtiidx bejn, o naj reeman bengu', o b ngubaan. Xcompniaridi b n naban ree zian ni'quid rayalt gawn di laa reeman. <sup>12-13</sup> Ad da cwenttan naj ganen por ree b n ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj b n g  n guialguxtis con laa reeman, per dux cwent ree naj guial yazuxnejz ree b n naj ree dux compniar ree b n rliladx ree Jesucrist. Zeel gol bab   b n cay jn dol entr lojdi.

## 6

### *Chi yu' wadjl entr ree b n rliladx Jesucrist*

<sup>1</sup> Zi'c chi xhie rzajcn  tijb xcompniaridi b n rliladx Jesucrist,  chexc zeel r jdi loj guxtis din yab  xnejzaman ni rzajquidi luar chedi loj ree xcompniaridi b n rliladx ree Jesucrist? <sup>2</sup>  Id rliladxidi ya guial yu' dxej b n rliladx ree Jesucrist laa reeman naj b n g  n xguialguxtis loj ree b nguidxliuj? Abi' bal yu' dxej g  n xguialguxtis reeman loj b nguidxliuj,  chexquiza zeel ni ad naw  gt ni rzajc ree xcompniaridi ad rajct rab  xnejzidi? <sup>3</sup>  Id ragbeedi ya guial xt loj ree xianjl Dios yu' dxej yaya'p ree guialrniabee?  Abi' xt mazri zile' yal  xnejz ree ni cayza'c ree loj guidxliuj guie! <sup>4</sup> Zeel zi'c chi xhie rzajcn  lasa'di,  chexc zeel z di loj ree b n ad najt xbejn Cristo din yab  xnejz reeman ni rzajquidi? <sup>5</sup> Canin l jt ni guin ree din yatu lojdi.  Wen nid yu'czi tijb l jt zajc yab  xnejz ni rzajc lasa'di ya? <sup>6</sup> Per l jt luar g  ndi zian aal rud  d lasa'di loj ree b n ni ad rliladxt Dios.

<sup>7</sup> Abi' natun guial gud  d xcompniaridi loj guxtis guial cadilidi, mejorli gol gudaan ni r jnn  reeman l jt. Mevorli ti bidi cuan reeman xieendi. <sup>8</sup> Per luar g  ndi zian, l jrtli cay jn ree ni mal guin con ree xcompniaridi b n rliladx ree Jesucrist. Rtia'di xieen reeman abi' r jnn di laa reeman ni ad rayalt g  nn di laa reeman.

<sup>9</sup>  Id ragbeedi ya guial b n naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree b n ni naban ree nadxuudx, n  ree b n r n ree ni ad najt ree Dios, n  ree b n za'n  b n ad najt lacheel reeman, n  ree xinguaaw r jn zi'c b ngunaa n  ree xin r n lasa' xinguaaw zi'c b ngunaa. <sup>10</sup> N  ree b ngubaan, n  ree b n rz  bladx ni ruguiaatzi reeman, n  ree bengu' con ree b n rnieeguidx bejn, n  ree b n raguiil xhienaag chiquied reeman xieen bejn, ad zut reeman loj xguialrniabee Dios. <sup>11</sup> Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb b n ni ad way jnt dol por xguialrniabee Dad Jesucrist n  por xSprijt Dios b n ma nabann di.

### *Dux cuerp ree naj par Dios*

<sup>12</sup> Walican zajc yaguieen ree zi'ctzi ray n ree, per ad gratan naj zagdx par g  n bejn. Zajc g nan zi'ctzi r nan, per ad zati  btan xhie nabee naj. <sup>13</sup> Yu' ree bejn r b: "Guialraw

naj par lën bejn, abi' lën bejn naj par guialraw.” Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bën ad najt lacheelaman. Din dux cuerp ree naj par Dios, abi' laaman rniabee dux cuerp ree. <sup>14</sup> Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

<sup>15</sup> Gol gogbee guial ma najdi tijbzi con Cristo, guial dux cuerp ree ma naj tiblia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunë' ree tijb búngunaa dxuudx? ¿Ad rayalt gac zian! <sup>16</sup> ¿Nid ragbeedi ya guial chi runë bejn tijb bën ni ad najt lacheelaman, dxel ma najman tijbzi con bendxuudx guin? Lëjt ragbee guial loj xtiidx Dios rëb: “Grop reeman ma naj tijbzi.” <sup>17</sup> Per bën ni ma naj tijbzi con dux Dad ree Jesucrist, najman tijbzi con laaman por xSprijt Dios.

<sup>18</sup> Gol gojp da't cudad ad güündi ni dxuudx ree con bën ad najt lacheelidi. Xhietëez dol ren ad ruxhiintan xcuerp bejn zi'c rxin xcuerpaman chi rüjnman ni dxuudx con bën ad najt lacheelaman. <sup>19</sup> Din gol gogbee guial lëjt naj xyadoo xSprijt Dios bën ma baneeman lojdi, dxel zian zi'c ma nabandi con xSprijt Dios ad rniabeetri lëjt gajc. <sup>20</sup> Din par zian gudijx Jesucrist por dunuj ree chi gütaman loj crüjz. Zeel gol beennë xcuerpidi dxiin par güündi Dios bën zojbloj, din laaman naj bën rniabee lëjt.

## 7

### *Consejw xcwent guialruxhliaa*

<sup>1</sup> Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxe naj guial ad zuxhliaat bejn. <sup>2</sup> Per chitëë güün bejn dol con stijb bejn, zagdxen guial tijb gaj xinguaaw chu' lacheel o tijb gaj búngunaa chu' lacheel, <sup>3</sup> din gudëë xinguaaw guin gust lacheelix abi' búngunaa guin gudëëzaman gust lacheelaman. <sup>4</sup> Din chi ma baxhliaa tijb búngunaa ad laatraman rniabee xcuerp, xinguaaw guin naj xin rniabee laan. Ziangajc chi ma baxhliaa xinguaaw, ad rniabeetri xcuerpix, búngunaa guin ma rniabee laan. <sup>5</sup> Zeel xinguaaw në búngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudëd ree dxej guin, gol bachajg lasa'di stijb chitëë güün xinxab lëjt gan con ree xixgabidi.

<sup>6</sup> Ad canitan lojdi guial najczi guxhliaa bejn, per ad ni maltan guial guxhliaadi. <sup>7</sup> Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiarguejnman guial xhienaag guibanman, bal guxhliaaman o bal id zuxhliaaman.

<sup>8</sup> Par ree bën xtijb në par ree búngunaa bizëjb, naj rni guial zagdxeli yaya'n reeman zi'c naj. <sup>9</sup> Per bal id zadaan reeman guial ad zuxhliaat reeman, dxel zagdxeli guxhliaa reeman luar gudëd xcuerp reeman casti guial taan reeman.

<sup>10</sup> Guiáad ree bën ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt búngunaa lacheelaman. <sup>11</sup> Per bal tio'n lacheelaman ad rayalt guxhliaanëman xin ren, zagdxeli naj yachajg lasa' reeman stijb. Ziangajc xinguaaw ad najt yala' lacheelix.

<sup>12</sup> Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaw rliladx Jesucrist abi' lacheelix ad rliladxt, abi' bal par búngunaa guin achet güünan, dxel ad najt yala' lasa' reex. <sup>13</sup> Ziangajc bal rliladx búngunaa guin abi' lacheelaman ad rliladxt, abi' bal par xinguaaw guin achet güünan, dxel ziangajc ad rayalt yala' reeman. <sup>14</sup> Din xinguaaw ni ad rliladxt Jesucrist, züjnle' Dios laax guial rliladx lacheelix. Guiáad búngunaa ni ad rliladxt Jesucrist züjnle' Dios laaman guial rliladx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bën ni ad wayüjnt dol. <sup>15</sup> Per bal xinguaaw o búngunaa ni ad rliladxt Jesucrist rënman yala' lacheelaman guial rliladx lacheelaman Jesucrist, yala'ri reeman. Bën rliladx ad zajct güünman naguiejn guibannë lacheelaman laaman din ad gurejdx Dios dunuj ree par yabajn ree con wadijl. <sup>16</sup> Din búngunaa guin ad ragbeetaman bal

güünman gan chililadx lacheelaman, o bal xinguaaw guin ma rililadx dxel ni'qui laax ad ragbeet bal güünx gan chililadx lacheelix.

<sup>17</sup> Naj rni guial tijbgaj ree bén ni ma rililadx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuloj rililadx reeman Jesucrist. Zianan naj ni cayën loj ree dux compniar ree bén rililadx ree Jesucrist güün reeman. <sup>18</sup> Bal tijb bejn chi guzuloj rililadxaman Jesucrist mal yu'man sen ni ru ree bén Israel, yaya'nraman zian. O bal id yu'man sen guin chi guzuloj bililadxaman Jesucrist, ad najt chu'man sen guin. <sup>19</sup> Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios. <sup>20</sup> Zeel gol baya'n zi'c najdi chi guzuloj bililadxidi Jesucrist. <sup>21</sup> Bal najl zi'c bén nado' chi guzuloj bililadxil laaman, ad najtan ni chu'l xgab xhienaag güünl. Per bal zile' ad zajctril zi'c bén nado', mazri zagdxë barii loj ni najl zi'c bén nado' guin. <sup>22</sup> Bén ni naj zi'c bén nado' chi guzuloj bililadxaman Cristo ma najman zi'cgajc bén ni ad najt zi'c bén nado' par güünman sirv loj Cristo. Abi' bén ni ad najt zi'c bén nado' chi guzuloj bililadxaman Cristo, dxel Cristo ma rniabee laaman. <sup>23</sup> Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree bénguidxliuj lëjt con ree ni rusquiee. <sup>24</sup> Zeel rnin lojdi compniar raliduladx ree Jesucrist, gol baya'n zi'c najdi chi guzuloj bililadxidi Jesucrist.

<sup>25</sup> Yan lëjt bén ad waxhliaat ree, dux Dad ree Jesucrist achet rëbaman por zian. Per naj zajc gunen lëjt consejw xhienaag güündi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan. <sup>26</sup> Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliatidi. <sup>27</sup> Bén ni ma baxhliaa ad najt gusa'n lacheelaman. Guiáad bén ni ad waxhliaat ad rayalt güünman naguiejn guxhliaman. <sup>28</sup> Per bal rüjnl xgab guxhliaal, ad dolt naj guxhliaal. Ziangajc ree biinxdüüb ni rën guxhliaa, ad dolt naj guxhliaa reem. Per rugojnan lëjt guial zienloj naj ni rzajc bén ruxhliaa, abi' laan ad rëntan saquidi.

<sup>29</sup> Ni rënan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel bén ni ma baxhliaa ree gol been sirv Dios xt lod guneetzan lëjt zi'cgajc ree bén ni ad waxhliaat. <sup>30</sup> Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial güün bejn xmandad Dios. <sup>31</sup> Bén ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdëd.

<sup>32</sup> Ni rënan naj guial ad zutidi xgab por ree ni yu' loj guidxliuj guie. Tijb xinguaaw xtijb mazri rüjnx xgab por xmandad Dios, mazri rüjnx naguiejn güünx zi'c ruladx Dios. <sup>33</sup> Per tijb xinguaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn naguiejn yabaanë lacheelix laax. <sup>34</sup> Dxel tio'p ma naj xixgabix, por Cristo në por xbéngunaax. Ziangajc tijb béngunaa ni ad waxhliaat mazri rüjnman xgab por ree xmandad Dios guidiblagaa rüjnman sirv loj Dios par güünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanë lacheelaman laaman.

<sup>35</sup> Gra ni canin lojdi, canin laan par günan lëjt yudar ad par gudxontan guxhliadi, caninan din guibandi zi'c rayal xnejz dxel gol been gol gubajn tëë zi'c rën dux Dad ree Jesucrist sin guial gudxoon xhienin lëjt.

<sup>36</sup> Chutëëz xinguaaw rüjn xgab guxhliaanë biin rnieenëx abi' bal ma yu' biingunaa guin ijz par guxhliam, güünri reex ni naladx reex naj zagdxë par laa reex. Bal guxhliaa reex, guxhliari reex. Ad doltan guial guxhliaa bejn. <sup>37</sup> Ziangajc chutëëz bén ni ad rüjnt xgab guxhliaa, ad rayalt güünman xgab guial rüjn naguiejn guxhliaman bal ma beenman xgab zagdxë guial ad zuxhliataman. Din zagdxë gajcan bal id zuxhliaa bejn. <sup>38</sup> Zeel rnin lojdi zagdxen guial chu guxhliaa, per mazri zagdxë bal id zuxhliaa bejn.

<sup>39</sup> Tijb béngunaa chi ma baxhliaman, ad rayalt sunëman xinguaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin rililadx Jesucrist. <sup>40</sup> Per naladxan guial mazri zagdxë guibanman bal id zuxhliaman stijb. Zian rünan xgab guial nabannë'n xSprijt Dios zi'cgajc lëjt.

## 8

*Guialraw ni rbe'c ree bejn loj ni naladx reeman naj Dios*

<sup>1</sup> Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrën lasa' bejn lasajc mazri din por guial rën lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. <sup>2</sup> Bal yu' bén naladx guial ma bayaaloj rignia'man gra, cusquiee laagajcaman din ryaadx da'tri chignia'man. <sup>3</sup> Per bén ni rën Dios, Dios nünbee laaman.

<sup>4</sup> Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'. <sup>5</sup> Majsi yu' ree bejn naladx guial yu' zien ree dios bén rniabee xanyabaa në loj guidxliuj, <sup>6</sup> per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēeman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēē raya'p ree guialnaban.

<sup>7</sup> Per ad grat ree bejn rüjn xgab zian. Din yu' ree bén ni guyën graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin. <sup>8</sup> Dunuj ree rayagbee guial ad ni rawt bejn rüjn guiban bejn mazri zagdex loj Dios, lasa'gajcanaan bal yadaaw ree o ad zadaawt ree lasa' ree guialraw guin. <sup>9</sup> Per majsi lējt ragbee guial zajc gawidi xhietēēznin, rayal gapidi cudad ad güündi guial ree bén qui rililadxri Jesucrist güün reeman dol. <sup>10</sup> Din bal lüj guial achet naladxil rawil xhietēēznin, zobjil cayawil guialraw ni ma gurej loj ree ni ad najt dios. Dxel guguaiaa tijb ree bén qui rililadxri Jesucrist lüj abi' nēgajcaman sēēbladax gaw guialraw guin majsi lēn luxdooman naladxaman guial ad zagdxet naj ni cayüjnman. <sup>11</sup> Dxel por xguialrajquil cayüjnl guial güünman dol guial ad nixt yu' luxdooman cayawaman ni guin ree, per badxe'guijc guial në por laaman güjt Jesucrist loj crüjz. <sup>12</sup> Zeel bal rüjnl tijb ni naj ni mal par ree bén qui rililadxri ree Jesucrist abi' rüjn reeman dol por lüj, dolan cayüjnl delant loj Cristo. <sup>13</sup> Bal por tijb ni rawan rüjn ree da compniaran dol, mejorli ad zawtran laan chitēē güünman dol por naj.

## 9

*Ni zajc güün tijb apóstol*

<sup>1</sup> Lējt ragbee guial zajc günan ni rēnan por guialrniabee ni ra'pan guial najn apóstol. Ma baguaian dux Dad ree Jesucrist abi' lējt naj ree bén ni ma benan gan par laaman guial ma bililadxidi laaman. <sup>2</sup> Bal yu' ree bén ni ad nünbeet naj zi'c apóstol, per lējt ragbee guial apóstol najn. Din zi'c ma rililadxidi Jesucrist dxel ma rguien guial diidxli najn apóstol.

<sup>3</sup> Abi' par ree bén ad rililadxt guial najn apóstol, ze naj ni rën loj reeman: <sup>4</sup> Ra'pan derejch gunee reeman ni gawan në ni guiē'n. <sup>5</sup> Abi' zajc tēē guxhlian con tijb bēngunaa naj dulasa' raliduladx ree Jesucrist din chinē'n laaman bantēēz guin gan, zi'c rüjn los demazri ree apóstoles con ree bijch Dad Jesucrist në Bēd. <sup>6</sup> ¿O najzi con Bernabé bayal yaguieenan xmandad Dios dux cwentan ya? <sup>7</sup> Per ni'qui tijb suldad ad rejt loj wadijl xcwentaman, yu'czi bén rguijx xgaxtaman. Ziangajc bén rxübin uv, ¿wen id zajc gawaman laan ya? Laadx bén ni rajp vag ree, ¿wen id zajc guiē'man xlejch reeb ya? <sup>8</sup> Abi' ad xixgabtzi bēnguidxliujn canin lojdi, në loj ley ni badēē Dios loj Moisejs rēb zian. <sup>9</sup> Din loj ley guin rēb: "Ad gudxe'di guijxh ro' ree be gui'xh la'tgaj cayüjn reeb dxiin." Ad rēbt Dios zian guialzi yu'man laa reeb xgab, <sup>10</sup> rēbaman zian por dunuj ree. Din zi'c bén rlia' yuj zi'c bén rusia trigo, grop reeman yu'guijc guial yu' ni yaca' reeman. <sup>11</sup> Yan ma balün lējt xhienaag chinalidi xnejz Dios, ¿wen zro' da't yanaaban lojdi ya bal güündi dunujn yudar din gusnuu dux guialnabanan? <sup>12</sup> Bal stijb ree bén ni rusiid lējt rila' rtia' reeman ni rayal gudēēdidi loj reeman, dxel ziangajc dunujn raya'pan mazri derejch güündi dunujn yudar.



Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitëë xhie cwib guijc guial ad zucaagdiajgtri ree bejn xtiidxza'c Jesucrist. <sup>13</sup> Lëjt ragbee guial gra ree bixhioz ni rüjn sirv lën xyadoo Dios, rtia' reeman tibda'n ni rinë ree bën Israel loj Dios persi rile' rbajn reeman. Ziangajc gra ree bixhioz ni rüjn ree sirv lule' yadoo guin lod rinë ree bejn be ree par Dios, në reeman rtia' ta'n ni rinë ree bejn persi rile' rbajn reeman. <sup>14</sup> Yan laagajcan rëb dux Dad ree Jesucrist por ree bën ni rulüü xtiidxza'caman, guial por ree bën ni rulüü reeman rayal guiban reeman. <sup>15</sup> Per naj achet caca'n, ad caxhal tëëtan gui'ch guie lojdi din guneedi xhienin. Din par naj zagdxeli naj guiëtan luar chu' bën chiquied guialrabaa guin luxdon guial cusidan bejn ree xtiidxza'c Jesucrist.

<sup>16</sup> Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin! <sup>17</sup> Zeel bal cayünan mandad guin guial ruladxan günan laan, dxel yu' ni gaca'n. Per ni'qui bal id ruladxan günan mandad guin, laan bayal günan. <sup>18</sup> Abi' ni rünan gan naj guialrabaa ni yu' luxdon majsi ad naxtan, majsi ad caca'tan ni rayal tia' bën ni rulüü xtiidxza'c Jesucrist, per cusnuu culün diidxza'c guin ree bejn ree.

<sup>19</sup> Abi' majsi ad yu't bën rniabee naj por mandad guin, per laa naj guie par gra ree bejn din gac günan sirv xbejn Cristo. <sup>20</sup> Abi' chi za'n con ree bën Israel, rünan naguiejn persi yu'guijc reeman guial nayajcan bën Israel din günan gan gac reeman xbejn Cristo. Chi za'n con ree bën Israel bën rüjn ree naguiejn chinal xley Moisejs dxel rünan zi'c bën zinal ley guin, din günan gan gac reeman xbejn Cristo, majsi ragbeen guial ad rniabeet ley guin naj. <sup>21</sup> Abi' chi za'n con ree bën ad najt bën Israel, bën ad zinalt ree ley guin dxel majsi ragbeen guial Dios naj bën rniabee naj guial nabanani zi'c rniabee Cristo, per rünan naguiejn din guguaa reeman naj zi'cgajc tijb lasa' reeman din gac günan gan gac reeman xbejn Cristo. <sup>22</sup> Chi za'n con ree bën yu'nawëëg par güün reeman o gaw reeman xhienin, dxel rünan naguiejn din su reeman zagdxe con naj din günan laa reeman yudar gac reeman xbejn Cristo. Bantëëz lod ran rünan naguiejn din guguaa reeman naj zi'cgajc tijb lasa' reeman, din günczan gan majsi ta'nzi reeman günan gan gap reeman perdon por Cristo.

<sup>23</sup> Gra ree ni guie cayünan guial rënan xtiidxza'c Jesucrist, din tiblojzi güünle' Dios naj con gra ree bën rililadx diidxza'c guin ree.

<sup>24</sup> Lëjt ragbee guial chi yu' tijb carrer zien bejn ruxüün, per tijbzaman naj bën rtia' prem. Ziangajc lëjt gol been naguiejn tia'di ni gunee Dios. <sup>25</sup> Bën ni ruxüün ree rajp laagajc reeman cudad chitëë xhie gudxoon guxüün reeman. Rüjn reeman zian din güün reeman gan, abi' ni rüjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. <sup>26</sup> Abi' ragbeechaawan xhienin cayünan, ad cayüntan zi'c tijb bën ni ruxüün sin guial gagbeen chexc, ad rüntan zi'c tijb bën ni rga'p sin guial gagbeeman ban ca'paman. <sup>27</sup> Zeel cusagdiaj naj gajc din gac ganabee naj gajc günan zi'c rayal günan, chitëë guial culün bejn ree xtiidxza'c Jesucrist achet yayalan delant loj Dios.

## 10

### *Guial rën ni ad najt ree Dios*

<sup>1</sup> Compniar raliduladx ree Jesucrist, gol basaaladx guial dux bengol gulal ree bën binal ree Moisejs, gra reeman guza xan zäj ni guxhaal Dios abi' gra reeman gudëd loj nijsdoo ni la nijsdoo xnia. <sup>2</sup> Zian biguien guial xbejn Moisejs naj reeman din gra reeman guzanë laaman xan zäj guin, abi' gudëd reeman con laaman loj nijsdoo guin. Zian gurobnijs reeman loj zäj guin në loj nijsdoo guin. <sup>3</sup> Gra tëë reeman gudaw guialraw ni bi't diizd xanyabaa. <sup>4</sup> Gra tëë reeman gu' nijs ni bazaladx Dios loj reeman, nijs brii lad tijb guiaj. Rën guiëban guial diizd nadxel mal naban Cristo con laa reeman lod zëtzi reeman. <sup>5</sup> Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

<sup>6</sup> Gra nine gojc din yayagbee ree guial ad laat yaguieen ree lasa' ree ni mal ni been reeman. <sup>7</sup> Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: "Gurej reeman, gudaw reeman dxel bisu reeman been reeman ni dxuudx ree." <sup>8</sup> Ad rayal tēēt güün bejn ni dxuudx con bën ad najt lacheelaman, zi'c been zien ree dux bengol gulal ree abi' tijb dxej güjt gajlbichoon mil reeman. <sup>9</sup> Ad zaneeguijdx tēēt ree Dios zi'c been zien ree bën guin, abi' gudaw bëël laa reeman persi güjt reeman. <sup>10</sup> Ad rayal tēēt yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

<sup>11</sup> Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been reeman, dunuj ree guial nabajn ree yan guial ma caydop dxej ni yadëed ree bejn cwent loj Dios. <sup>12</sup> Zeel bën ni naladx za'dxi'ch loj xnejz Dios, mejorli gapaman cudad chitëe güün dol laaman gan. <sup>13</sup> Gra ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhienaag laadi loj ni cayajc.

<sup>14</sup> Zeel compniar raliduladx ree Jesucrist, zi'c rënan lëjt rnin lojdi gapidi cudad ad goc guiëndi ni naladx ree bejn naj dios. <sup>15</sup> Naj ragbee guial najdi ganax bën rignia', zeel lëjt gajc gol been xgab bal zagdxe naj ni canin lojdi. <sup>16</sup> Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman. <sup>17</sup> Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

<sup>18</sup> Lëjt ragbee xhienaag rüjn ree bën Israel chi rinë reeman tijb gon par Dios, abi' zi'c raw reeman tibia' gon guin yu'guijc reeman guial ma naj reeman tijbzi con Dios. <sup>19</sup> Ad canitan lojdi por ree ni naladx ree bejn naj dios guial lasajc reen o guial lasajc gualraw ni gurej loj ree dios guin. <sup>20</sup> Din bën rüjn ree zian ad lojt Diosan rbe'c reeman gualraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin. <sup>21</sup> Ad zacjt güündi zian par guiguien guial ma najdi tijbzi con ree xindxab guin, abi' gaw tēedi guiadxtil con vin din guiguien guial ma najdi tijbzi con Cristo. <sup>22</sup> ¿O rëndi ya yache'ch ree Dios? ¿Wen mazri raya'p ree gualrniabee guial lojman ya?

### *Xhie zajc güün ree xbejn Dios*

<sup>23</sup> Graczi zajc güün bejn, per ad gratan naj zagdxe guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios. <sup>24</sup> Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

<sup>25</sup> Zi'c chi rziidi bëël luguia', ad guiniabdiidxidi bal ma gurejn loj xdios reeman, chitëe xhie guinialadxidi chi gawidi laan. <sup>26</sup> Din xieen dux Dad ree Dios naj guidxliuj con gra ni yu' lojn.

<sup>27</sup> Bal tijb bën ad waliladxt xtiidx Dios na lojdi guial chitawidi lidxaman, abi' bal rëndi chedi gol chej. Gol gudaw gra ni gunee reeman lojdi ad xhie guiniabdiidxidi chitëe xhie naladxidi. <sup>28</sup> Per bal yu' xcompniaridi na guial ni cunee bën guin cayawidi ma gurejn loj xdiosaman, ad gawidi laan por bën bagojn lëjt chitëe güünman xgab mal guial ad laat cayüjndi, majsi lëjt ragbee guial xieen dux Dad ree Dios naj guidxliuj në ni yu' loj guidxliuj guin. <sup>29</sup> Ad canitan lëjt xcwent guial xhie naladxidi, ni canin lëjt naj por ree xgab ni zajc güün stijb xcompniaridi por lëjt.

Per wed yu'di rüjn xgab: "Per, ¿chexc zeel ad züntan gra ni ragbeen ad najt ni mal por xixgabzi stijb bejn? <sup>30</sup> Wed rëb tēedi: Naj ragbee guial rudën quixtëe loj Dios por gra ni rawan, ¿chexquiza zeel güün reeman xgab mal por naj?" <sup>31</sup> Per naj rni lojdi gra ree ni guin rayal gudxe'guijquidi din zi'c ni rawidi zi'c ni rë'di në gra ree ni rüjndi rayal güündi laan par güündi Dios bën zojbloj. <sup>32</sup> Gol gojp cudad xhienaag nabandi din zi'c ree bën Israel zi'c ree bën ni ad najt bën Israel con ree xcompniaridi bën rliladx ree Jesucrist ad

zūjnt reeman xgab mal por lējt. <sup>33</sup> Din zian rünan, rünan naguiejn chitëë xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

## 11

<sup>1</sup> Zeel gol binal zi'c rünan, zi'c zinaalan zi'c been Cristo.

*Xhie rayal güün ree bejn chi rbejdx rniab reeman Dios*

<sup>2</sup> Naj dád rabaanë'n lējt guial rusaaladxidi naj, guial yu'guijquidi rüjn tēedi zi'c balün lējt. <sup>3</sup> Rën tēen gusaaladxidi guial Dios rniabee Cristo abi' Cristo rniabee xinguaaaw abi' xinguaaaw rniabee béngunaa. <sup>4</sup> Tijb xinguaaaw chi rgu' xhienin guijquix par cwedx guiniabix Dios o gulüüx xtiidx Dios, natu naj ni cayüjnx. <sup>5</sup> Ziangajc chutëëz béngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb béngunaa ni biaj guijc xt garej. <sup>6</sup> Zeel bal tijb béngunaa ad rëntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman. <sup>7</sup> Per xinguaaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpix Dios. Abi' béngunaa guial rxhioob xhienin guijcaman, zian rulüüman respejt ni rajpaman xinguaaaw. <sup>8</sup> Din ad gojct xinguaaaw con guxtil lad béngunaa, béngunaa guin gojc con guxtil lad xinguaaaw. <sup>9</sup> Ad gojct xinguaaaw par béngunaa, béngunaa guin gojc par xinguaaaw. <sup>10</sup> Zeel béngunaa rayal guixhioob xhienin guijcaman din guiguien guial xinguaaaw rniabee laaman zi'c rulüü ree anjl chu rniabee laa reeman. <sup>11</sup> Majsi delant loj Dios tiblojzi naj bejn, din bal id béngunaa niu achut xinguaaaw niu, abi' bal id chu xinguaaaw niu achut béngunaa niu. <sup>12</sup> Walican, guial con guxtil lad xinguaaaw gojc béngunaa, per yan por béngunaa ri't xinguaaaw loj guidxliuj, zeel zi'c xinguaaaw con béngunaa por Dios yu' reeman loj guidxliuj.

<sup>13</sup> Naj rni lējt, lējt gajc gol been xgab bal zagdxen cwedx guiniab tijb béngunaa Dios abi' achet naxhoob guijcaman. <sup>14</sup> Bejn gajc ragbee guial natun bal id zugaj guijc xinguaaaw. <sup>15</sup> Per par béngunaa mazri zagdxe rguienman bal guyool guidxguijcaman, din rajpaman laan par gusiaawan guijcaman. <sup>16</sup> Bal chu ad za't conform por ni canin lojdi, per naj rugojn lējt guial achet stijb costumbr raya'p ree, zian naj dux costumbr ree con los demazri ree bën rliladx xtiidx Dios.

*Ruxhiin reeman zi'c basa'n Dad Jesucrist gac*

<sup>17</sup> Yan xcwent ni ma ganin lējt, ad zile't ganin guial zagdxe naj ni cayüjndi din chi radxaag lasa'di par cwedx guiniabidi Dios, al ni ad rayalt güündi rüjndi. <sup>18</sup> Yaloj rnin lojdi biguiejnan guial chi radxaag lasa'di par cwedx guiniabidi Dios ad raya'ntidi diidx, abi' tiblad rliladxanan. <sup>19</sup> Din nawëëg najn guial ad zajct zian, abi' zian rguien chu diidxli zinal xnejz Dios. <sup>20</sup> Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. <sup>21</sup> Din tijbgajdi rüjn naguiejn diob gawidi, ad rbějzt xcompniaridi. Abi' la'tgaj yu' ree bejn rliaan, yu'di raw da't abi' xt rzüdxidi guial rë'di zi'ctzi rëndi. <sup>22</sup> ¿Id yu' lidxidi ya lod gawidi guië' tēedi zi'ctzi rëndi?, ¿o ad rëntidi xcompniaridi bën rliladx ree xtiidx Dios ya, zeel rusa'nxtudi bënprob ree bën achet rajp? Yan, ¿rëndi ya chu' luxdon zagdxe con lējt por zian? ¿Per zian zi'c cayüjndi, ad zajct ganin lojdi guial zagdxe naj ni cayüjndi!

*Ni bigra gudaw Jesucrist xche*

(Mt. 26:26-29; Mr. 14:22-25; Lc. 22:14-20)

<sup>23</sup> Abi' ni balün lējt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guiadxtil. <sup>24</sup> Abi' chi gulox badëëman quixtëë loj Dios dxel gula'man guiadxtil guin, rëb gajman: “Guiadxtil guie naj da cuerpan ni ma bayün par guiëtan por lējt. Abi' chi güündi zian, gol beenan guial gusaaladxidi naj.” <sup>25</sup> Ziangajc beennëman cojp ni yu' vin chi gulox gudaw reeman xche, dxel rëbaman: “Vin guie naj da rejnman ni gaxhie'n chi guiëtan par gaxhalan tijb nejz cüb guial xhienaag gac

ree bejn perdon loj Dios. Abi' chi güündi zian, gol been zian guial rusaaladxidi naj.”  
<sup>26</sup> Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtil rë' tēedi vin, zian ruluüdi guial güjtaman por lëjt, gol been zian xt chi gui'taman loj guidxliuj guie zatijb.

#### *Xhienaag rayal gac xche*

<sup>27</sup> Yan bal yu' bën raw guiadxtil rë' tēeman vin xche guin, abi' ad yu' guijctaman ni rën guiëb ni cayünman, dolan cayünman guial ad yu'guijctaman ni rën guiëb xcuerp nē xrejn dux Dad ree Jesucrist. <sup>28</sup> Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guië' tēeman vin xche guin. <sup>29</sup> Din bën raw guiadxtil guin con vin guin abi' ad yu'guijctaman ni rën guiëb xcuerp Jesucrist. Laagajcaman caguiil xcasti. <sup>30</sup> Din guial rüjn ree bejn zian zeel dád ziendi ragxuu, zien tēedi ad yu't gojl abi' zien reeman ma güjt. <sup>31</sup> Per bal yalojxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree. <sup>32</sup> Per ziangajc bal yu' xcasti Dios ni yayal ree, laan naj par guzuxnejzaman dunuj ree chitëe yaguieen ree dol, chitëe yayal ree casti ni rayal ree bën ad rliladxt xtiidxaman.

<sup>33</sup> Zeel compniar raliduladx ree Jesucrist, chi radxaag lasa'di par gawidi, gol gulëjz ree xcompniaridi din gawidi tijbzi. <sup>34</sup> Per bal yu'di ad zajct cwëz guial ma rliaandi, zagdxeli gaw lidxidi chitëe yayalidi xcasti Dios guial ad züjntidi zi'c rayal. Gra ni rayal ganin lojdi, chi guialan guidganan lëjt dxel yanee ree.

## 12

#### *Quiarguiejn ni runee xSprijt Dios*

<sup>1</sup> Yan ganin lëjt, quiarguiejn ni runee Dios loj tijb gaj bejn por xyudar xSprijt Dios, din ad rëntan guibandi sin guial gagbeedi ni guin ree.

<sup>2</sup> Lëjt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen. <sup>3</sup> Zeel gol gogbee, chutëez bën rnieeguijdx Jesucrist, rën guiëban guial ad nabannëtanman xSprijt Dios. Achu tēet bejn zajc guiëb: “Jesucrist naj bën rniabee naj!”, bal id nabanman con xSprijt Dios.

<sup>4</sup> Quiarguiejn rent quiarguiejn ren runee Dios dunuj ree, per Sprijt guin gajc naj bën ragnë dugra ree. <sup>5</sup> Majsni ni rent ni ren naj xmandad Dios ni cayguieen ree, per laagajcaman naj bën ni cayguieen ree sirv. <sup>6</sup> Abi' majsni garent garen cayün tijbgaj bejn, Dios gajc naj bën ni cayün yudar tiblojzi. <sup>7</sup> Tijbgaj dunuj ree ruluü Dios ni rayal yaguieen ree con xyudar xSprijt Dios din yaguieen ree yudar dux compniar ree. <sup>8</sup> Din con xyudar xSprijt Dios yu' ree bën ma ca' quiarguiejn par guiniee reeman, yu' tēe ree bën ma ca' quiarguiejn par chignia' reeman diidxi xcwent Dios. <sup>9</sup> Abi' por xyudar xSprijt Dios yu' ree bën ma cwa' guialrliladx ni guidiblagaa. Yu' tēe ree bën ma cwa' guialrniabee par yayün reeman bënragxuu ree. <sup>10</sup> Yu' tēe ree bën ma cwa' guialrniabee par güün reeman gadxagayaa ree milagr. Yu' ree bën ma ca' quiarguiejn par gudëed reeman xtiidx Dios loj ree bejn. Yu' tēe ree bën ma cwa' ree quiarguiejn par gagbee reeman bal wali o ad walit ni canee bën rëb guial caneeman xtiidx Dios. Yu' tēe reeman ma ca' quiarguiejn par guiniee reeman gadxagayaa ree diidx, abi' yu' reeman ma ca' quiarguiejn par yadëed reeman tijb diidx par stijb diidx. <sup>11</sup> Per por xyudar gajc xSprijt Dios rüjn bejn ni guin ree, laaman ma ragbee conin rudëeman güün tijb gaj bejn ni naladxaman naj zagdx.

#### *Tijbzi cuerp nayajc dugra ree*

<sup>12</sup> Din zi'c dux cuerp ree majsni zien la' najn, per tijbzi nayajc ree. Ziangajc dunuj ree guial raliduladx ree Jesucrist majsni zien nayajc ree per tijbzi nayajc ree con laaman. <sup>13</sup> Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsni nayajc ree bën Israel o ad nayajct ree bën Israel, bal nayajc ree zi'c bën nado' o ad nayajct ree zi'c bën nado', per tijbzi ma nayajc ree din dugra ree tiblojzi nabajn ree con xSprijt Dios.

<sup>14</sup> Lëjt ragbee guial ad tibia'tzi naj xcuerp bejn, zien la' naj xcuerp bejn. <sup>15</sup> Yan bal guiëb guia' bejn: "Ad najtan tibia' xcuerp bejn din ad najtan yaa bejn." Per ad por ziant ad najt guia' bejn tibia'man. <sup>16</sup> Ziangajc majsi guiëb guidiajg bejn: "Ad najtan tibia' xcuerp bejn din ad najtan guiaalojman", ad por ziant ad najtri guidiajgaman tibia' xcuerpaman. <sup>17</sup> Din bal guidib xcuerp bejn niajc guiaalojman, ¿xhieza naag niguiejnman?, o bal guidib xcuerp bejn niajc guidiajgaman, ¿xhieza naag niuxi'man? <sup>18</sup> Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c rënman. <sup>19</sup> Din bal niajc xcuerp bejn tiblojzi, dxel ad najtran cuerp. <sup>20</sup> Per zi'c ma rnin lëjt majsi zien la' naj xcuerp tijb bejn per tijbzi naj guidiban.

<sup>21</sup> Ad zajct guiëb guiaaloj bejn loj yaaman: "Ad ryaadxtan lüj." Ad zajct tëët guiëb guijc bejn loj guia'man: "Ad ryaadxtan lëjt." <sup>22</sup> Din luar lod rulüü ad rüjnza'ct sirv, laa reen naj ni mazri rüjn sirv. <sup>23</sup> Abi' ree luar lod ad rguient zagdxe, raguieen ree naguiejn din guiguien reen zagdxe. Guiáad ree luar naguie'ch, mazri raya'p ree cudad luar guin ree rata'cw reen din guiguien reen zagdxe. <sup>24</sup> Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguien zagdxe dux cuerp ree. Zianan been Dios xcuerp bejn <sup>25</sup> din chitëë yaguieen ree xgab guial yu' lod ad rüjnt sirv, guidib dux cuerp ree rüjn yudar lasa'. <sup>26</sup> Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

<sup>27</sup> Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin. <sup>28</sup> Abi' entr gra dux compniar ree bén rliladx Jesucrist. Dios yaloj bacaabeeman Bén naj ree xi apóstoles Jesús, ni barojp bacaabeeman Bén gudëed ree xtiidxaman loj ree bejn, bayon bacaabeeman Bén gulüü ree xtiidxaman bejn ree, dxel bacaabeeman Bén gap ree gualrniabee par yayüjn reeman Bénragxuu ree. Bacaabee tëëman Bén güün ree gadxagayaa milagr. Bacaabee tëëman Bén ni güün ree yudar bejn ree. Bacaabee tëëman Bén ni nabee ree loj ree Bén rliladx xtiidxaman abi' bacaabeeman Bén ni rníee ree zien ree diidx. <sup>29</sup> Ad grat ree bejn naj apóstoles ad gra tëët ree bejn zajc gudëed xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc güün milagr, <sup>30</sup> ad gra tëët ree bejn zajc yayüjn ree Bénragxuu, abi' ad grat bejn zajc guiniee zienloj diidx ad gra tëët bejn zajc yayüjn tijb diidx zatijb diidx. <sup>31</sup> Per gol been naguiejn din gunee Dios lëjt quiarguiejn zagdxe ree, abi' naj ganin lëjt conin naj nejz mazri zagdxe chinalidi.

## 13

### *Xcwent guial rën bejn ree*

<sup>1</sup> Din bal rajc rnien zienloj diidx ni rníee bénguidxliuj né xtiidx ree anjl yu' xanyabaa, per bal id rënan bejn najzan zi'c tijb guilib rzijdx o zi'c tijb plati ni yu' cha'. <sup>2</sup> O bal nayalan nudëdan xtiidx Dios loj ree bejn, o nia'pan quiarguiejn par niagbeen gra ni zëed por Dios ni gad gagbee bejn, o nia'pan zienloj gualrignia' o nia'pan tijb gualrliladx Dios ni xt zile' guchan xliajt ree guia', per bal id rënan bejn ree achet lasajcan. <sup>3</sup> Ziangajc majsi gagui'san gra ni ra'pan loj ree Bén ni ryaadx laan abi' yayü da cuerpan din che'can, per bal id rënan bejn ree achet lasajc ni cayünan.

<sup>4</sup> Guial rën lasa' naj gap pacens lasa' bejn, gac bejn benza'c con lasa'man, ad zadëdlojt lasa' bejn, ad züjnt bejn nabë, ad züjnt bejn benro' loj lasa'man. <sup>5</sup> Guial rën lasa' naj gap respejt lasa' bejn, ad gac bejn naxhien, ad yalenya'man, ad chu'xyajn tëë lasa' bejn, <sup>6</sup> ad rayalt yabaa bejn por ni mal ni cayüjn bejn o ni cazajcaman, rayal yabaaman chi zë bejn xnejz. <sup>7</sup> Guial rën lasa' naj güün bejn perdon lasa'man ni güünnëtzí reeman laaman, abi' chililadx lasa'man, ad zadxag tëëtaman cwëzaman ni cabëzaman, taan tëëman ni rüjnnëtzí reeman laaman. <sup>8</sup> Guial rën lasa' ad yu't dxej loxan, per gualrajc yu' dxej loxan, ad zu tëëtri Bén ni rudëed ree xtiidx Dios loj ree bejn ni'qui ree Bén rníee zienloj diidx. <sup>9</sup> Din yan bal rayignia' ree, tilda'nzi naj ni rayignia' ree abi' bal radëed ree xtiidx Dios loj

ree bejn, tinda'nzi rayagbee ree xcwentaman. <sup>10</sup> Per chi guidxin dxej yayignia' ree gran, dxel achetri lasajc ni rayagbee ree yan.

<sup>11</sup> Chi gocan xindoo gunen zi'c xindoo, benan xgab zi'c xindoo, go'pan xquiargueijn xindoo. Per chi bidxin dxej gojcan bengol basa'nan gra guial xindoo tiblax. <sup>12</sup> Ziangajc yan ad rayignia't ree gra zi'cgajc chi ad rguient zagdxe loj tijb guiaawajn, per chi guidxin dxej yadxin ree lod zojb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zojb Dios dxel günbeen gra zi'c nünbeeman naj.

<sup>13</sup> Choon naj ree ni ad yu't dxej lox, guialrliladx Dios, guialrbëz ni gunee Dios, në guial rën Dios dunuj ree. Per loj guiyon ree ni guin mazri lasajc guial rën Dios dunuj ree.

## 14

### *Guialrniee stijb diidx*

<sup>1</sup> Gol been naguiejn gol guyën ree bejn, gol gurejdx gunab tëë Dios din gunee man xquiargueijndi din güüнди xmandadaman, per mazri rüjn naguiejn gapidi quiargueijn par gudëëdi xtiidx Dios loj ree bejn. <sup>2</sup> Bén rniee tijb diidx ni ad rignia't gra bejn, güünman cwent guial achut caneenëman. Tijbzi Dios caneenëman guial achut rignia' xtiidxaman, tijbzi laaman ragbee ni canee man per bejn ree ad ragbeet ree man ni rën guiëb ni canee man. <sup>3</sup> Per tijb bén rulüü xtiidx Dios bejn ree cayünman yudar xhienaag chinal bejn xtiidx Dios, cudëëdaman consejw loj ree bejn ragu' tëëman luxdoo ree man. <sup>4</sup> Abi' bén rniee tijb diidx ni ad rignia't gra ree bejn, par tijbzi laaman naj ni canee man, per bén rniee xtiidx Dios cayünman yudar gra ree xbejn Dios din gusnuu chinal ree man xnejzaman.

<sup>5</sup> Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guiniee man zienloj ree diidx, o bajtëë bal zile' guiëbaman loj ree bejn xhie rën guiëb ni rniee man din güün sirv ni rniee man gra ree bejn. <sup>6</sup> Din zi'c naj bal guitixlon lëjt compniar raliduladx ree Jesucrist, abi' ganen lojdi tijb diidx ni ad zignia'tidi, ¿xhieza sirv güünan lëjt bal id canin lojdi zagdxe ni balüü Dios naj o ni ragbeen o bal id canen xtiidx Dios lojdi zagdxe o xhietëëz zatijb ni rayal gusiididi?

<sup>7</sup> Zi'c tijb ni rucwejdx ree man, zi'c tijb bidxa o tijb arp bal id zucwejdx bejn laan zagdxe ad zignia't ree bejn xhienin cucwejdxaman. <sup>8</sup> Ziangajc bal id zucwejdx ree man zagdxe trompejt loj wadijl, ¿xhieza naag chignia' ree man guial ma rayal suchaaw ree man par til ree man con ree bén rayal tilnë ree man? <sup>9</sup> Yan ziangajc bal guiniee nëdi bejn ree con tijb diidx ni ad rignia't ree man, ¿xhieza naag chignia' ree man ni rëbidi! Xlia'zi caneedi achut rignia' ni rnieedi. <sup>10</sup> Lëjt ragbee guial zienloj diidx yu' loj guidxliuj guie, per graczan yu' ni rëban par bén rignia' laan. <sup>11</sup> Per bal chu guiniee në naj con tijb diidx ni ad rignia'tan dxel benzit najman par naj abi' za naj benzit najn par laaman. <sup>12</sup> Zeel zi'c rëndi gapidi quiargueijn por xyudar xSprijt Dios par güüнди xhietëëz ni naj xchiin Dios, gol gunab loj Dios din yazaladxaman quiargueijn lojdi din gac güüнди ni rüjn sirv par gra ree xbejn Cristo.

<sup>13</sup> Zeel bén ni rniee tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman. <sup>14</sup> Din zi'c naj bal gabedx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen. <sup>15</sup> Zeel ni rayal günan naj, gabedx ganaaban loj Dios con da sprijtan abi' gagbeen xhie rën guiëb ni canen. Ziangajc chi rolan cant ree par Dios rayal gagbeen chignia' tëën xhie rën guiëb ni cayolan. <sup>16</sup> Din bal rnieel diidx zagdxe ree loj Dios con diidx ni ad rignia't ni'qui lüj. Dxel bén za' con lüj, ad zajct guiëbaman “Amén” chi ma gulox badëëdil quixtëë loj Dios guial ad rignia'taman ni rnieel. <sup>17</sup> Majsi nix da't badëëdil quixtëë loj Dios, per achetczi yudar beenl bén za' con lüj par gagbeeman xhienaag chinalaman xnejz Dios guial ad bignia'taman ni rëbil. <sup>18</sup> Quixtëë Dios naj mazri rajc zien loj diidx guial loj gradi. <sup>19</sup> Per majsi zian chi za'n lod rado'p ree dux compniar ree bén rliladx ree Jesucrist par ganenë'n laa ree man, par naj mejorli naj ganenë'n laa

reeman con gaay diidx per diidx ni chignia' reeman nē ni güün laa reeman sirv din guluü reeman ben ren ree luar ganenē'n laa reeman con chiimil diidx ni ad rignia't reeman.

<sup>20</sup> Compniar raliduladx ree Jesucrist, ad bal rüjnridi xgab zi'c xindobēz. Gol gojc zi'c xindobēz per guial ad züjntidi ni mal, per par güüнди xgab gol been xgab zi'c bengol. <sup>21</sup> Loj xtiidx Dios rēb: “Gaxhalan bēn rniee ree diidx ren, bēn ad najt ree bēn niz guie din guinieenē reeman bēn guie ree. Per ni'qui zian ad zuzoobt reeman da diidxan, rēb dux Dad ree Dios.” <sup>22</sup> Zeel guial rniee zienloj diidx, najn tijb sen par ree bēn ad rliladxt xtiidx Dios din chililadx reeman. Per guial rulüü bejn ree ni rēn Dios gagbee reeman, laan naj ni güün sirv par ree bēn ma rliladx ad par bēn ad rliladxt. <sup>23</sup> Per ni'qui zian chi radxaag lasa'di par gucaagdiajguidi xtiidx Dios, abi' bal suloj guiniee tijb gajdi gadxagayaa diidx ni achut rignia' abi' chu' ree bēn qui bililadxri xtiidx Dios o bēn ad waliladxt ree xtiidxaman, ¿wen id zanaladx reeman ya guial guijquidi rajc? <sup>24</sup> Per bal chu' bēn qui bililadxri o bēn ad waliladxt abi' caneedi xtiidx Dios, dxel chi guiguiejnman ni caneedi, gagbeeman xhie dol cayüjn reeman, laagajcaman gagbee chu najman. <sup>25</sup> Zian gagbeeman xhienaag nabanman dxel guzuxibaman cwedx guiniabaman Dios, abi' guiēbaman guial diidxli za' Dios con lējt.

### *Gol been gra xnejz*

<sup>26</sup> Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc güün ni chile' güüнди, bēn ni gool cant par Dios, bēn ni guluü ree bejn, bēn gugojn bejn ree conin balüü Dios lojman, bēn guiniee diidx ren ni ad rignia't gra bejn nē bēn gudēēd xtiidxaman loj ree bejn. Per gra ni güüнди güün sirv par güünan yudar los demazri ree xcompniaridi din gusnuu sudxi'ch reeman loj ni rliladx reeman xtiidx Dios. <sup>27</sup> Bal yu' bēn rniee tijb diidx ni ad rnieet gra bejn, tio'pzaman o choonzaman guiniee diidx ni rajcaman, abi' tijb gaj tijb gaj reeman guiniee, chu' tēē bēn ni guiēb loj ree bejn xhie rēn guiēb ni rēb reeman. <sup>28</sup> Per bal id yu' bēn zajc gugojn bejn ree xhienin rēb reeman con diidx ni rajc reeman, mejorli achet guiēb reeman delant loj ree bejn. Zagdxeli laazi reeman cwedx Dios lēn luxdoo reeman. <sup>29</sup> Abi' ree bēn gugojn delant loj gra ree bejn conin balüü Dios laa reeman, tio'pzi reeman o choon reeman guiniee. Abi' los demazri reeman gucaagdiajg bal zagdxequi naj ni canee reeman. <sup>30</sup> Per bal tijb bēn zojb cucaagdiajg loj hor guin guluü Dios laaman xhienin, rayal yacwēēz bēn canee din gac gugojn bēn guin bejn ree xhie nin balüü Dios lojman loj hor guin. <sup>31</sup> Gra ree bēn ni bayal gudēēd xtiidx Dios loj ree bejn, gradi zajc gugojn bejn ree xhienin balüü Dios lējt, per tijb gajdi chi yayalidi din gra ree bēn cucaagdiajg gusiid reeman chu' tēē luxdoo reeman. <sup>32</sup> Gol badxe'guijc guial ree bēn rudēē xtiidx Dios loj ree bejn laagajc reeman rniabee laa reeman din guiniee reeman chi rayal guiniee reeman. <sup>33</sup> Din Dios ad rēntaman tijb ni ad najt xnejz, rēnman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, <sup>34</sup> loj hor ni ma cucaagdiajg reeman xtiidx Dios ad yu't permis guiniee ree bēngunaa rayal guzoob reeman xtiidx xixinguaaw reeman zi'c rēb Dios güün reeman diidx gulal. <sup>35</sup> Bal xhie rēn reeman gagbee reeman, mejorli lidx reeman guiniabdiidx loj lacheel reeman, din natun guiniee tijb bēngunaa loj hor ni cucaagdiajg reeman xtiidx Dios.

<sup>36</sup> Gol basaaladx guial ad lējtij naj bēn yaloj cwa' xtiidx Dios ad tijb tēētzi lējt ragbee xtiidx Dios din güüнди zi'c naj xixgabidi. <sup>37</sup> Bal chu' bēn naladx guial ma cwa'man quiarguejn par gudēēman xtiidx Dios loj ree bejn o por xSprijt Dios ma cwa'man xhie stijb quiarguejn, dxel laa gagbee gajcaman guial ni cucan loj gui'ch guie najn zi'c rniabee dux Dad ree Dios. <sup>38</sup> Per bal id rliladxaman ni canin lojdi loj gui'ch guie, ziangajc ad chililadxidi xtiidxaman.

<sup>39</sup> Yan zi'c ma rnin lojdi compniar raliduladx ree Jesucrist, gol been naguiejn din gapidi quiarguejn din gudēēdi xtiidxaman loj ree bejn, ad bal gudxoondi guiniee tijb

ree xcompniaridi b́en rniee tijb diidx ni ad rignia'tidi. <sup>40</sup> Per gra ni rj́jndi gol beenan xnejz, gol beenan zi'c rayal.

## 15

### *Baban Jesucrist loj ree bengüt*

<sup>1</sup> Compniar raliduladx ree Jesucrist, ŕen t́een gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi. <sup>2</sup> Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

<sup>3</sup> Yalojxgaj balün ĺejt ni basidan yaloj. Rnin lojdi guial Cristo güt por dux tol ree zi'c ŕeb loj xtiidx Dios. <sup>4</sup> Abi' biguie'chaman dxel ni goc choon dxej babanman zi'cgajc ŕeb loj xtiidx Dios. <sup>5</sup> Chi ma babanman, dxel balüülojman loj Béd dxel loj los demazri ree apóstoles. <sup>6</sup> Zianz balüülojman ńe loj ree tijb cwaa ree b́en rliladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban. <sup>7</sup> Balüü loj t́eeman loj Santiaaw dxelri loj ree apóstoles. <sup>8</sup> Ni bigra balüülojman lon, naj najn zi'c tijb xindo ni rajl chi ma gudéd tiamp ni rayal galix. <sup>9</sup> Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin b́en rliladx ree Jesucrist. <sup>10</sup> Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayünan ni cayünan, ńe con xyudar Dios cayünan laan. <sup>11</sup> Zeel achet güünan bal por chunin biguejndi xtiidx Dios bal por naj o por stijb ree xbejn Jesús, ni mazri lasajc naj guial ma biguejndan abi' ma bililadxidan.

### *Yaban ree bengüt*

<sup>12</sup> Yan zi'c ma balüün ĺejt xtiidx Dios guial baban Cristo, ¿chexquiza zeel yu'di ŕeb ad zabant ree bengüt? <sup>13</sup> Bal id zaban ree bengüt, ŕen guiéban guial ad babant Cristo. <sup>14</sup> Abi' bal id baban Cristo dxel achet sirv ni caylüün ĺejt, ache t́eet sirv ni rliladxidi laaman. <sup>15</sup> Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist. <sup>16</sup> Din bal id zaban ree bengüt, dxel ni'qui Jesucrist ad babantri. <sup>17</sup> Abi' bal id babanman, achet sirv guial rliladxidi laaman ache t́eet perdon yu' por xtolidi. <sup>18</sup> Bal naj zian, xt ree b́en ma güjt achet xperdon reeman majsi bililadx reeman Jesucrist. <sup>19</sup> Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree b́en naban mazri naya guial loj chut́eéz b́enan.

<sup>20</sup> Per diidxliczi Jesucrist naj b́en baban, abi' laaman naj quijb b́en yaloj baban. <sup>21</sup> Abi' zi'c bidoonloj gualgüjt loj guidxliuj guie por tijb bejn, ziangajc por tijb bejn yaban ree bengüt. <sup>22</sup> Zi'c bidoonloj gualgüjt par gra ree bejn por Adán, ziangajc yan por Jesucrist ma yu' stijb gualnaban par ree b́en rliladx laaman. <sup>23</sup> Per gra gac zi'c rayal: Yaloj Jesucrist naj b́en baban, dxel chi gui'taman stijb dxel ma yaban ree bengüt b́en bililadx ree laaman. <sup>24</sup> Abi' chi ma beenman gan gunabeeman gra ree b́en rdxe'ch laaman, zi'c ree b́en rajp gualguxtis ńe ree b́en rajp graloy guial rniabee, dxel ma yayü xgualrniabeeman loj dux Dad ree Dios. <sup>25</sup> Din rayal nabee Cristo xt chi ma beeman gan canabeeman gra ree b́en rdxe'ch laaman. <sup>26</sup> Abi' ni chigra gunidlojman naj gualgüjt. <sup>27</sup> Loj xtiidx Dios ŕeb guial Dios badéé gualrniabee loj Jesucrist din nabeeman gra, per ad ŕent guiéban guial ńe Dios rniabeeman din Dios badééd gualrniabee lojman. <sup>28</sup> Abi' dxej ni ma rniabee Jesucrist loj gra dxel yayüman gualrniabee ni badééd Dios lojman din ma nabee tijbzi Dios gra.

<sup>29</sup> Yan bal id zaban ree bengüt, ¿chexquiza zeel yu' ree b́en rirobnis xcwent ree b́en ma güjt, abi'za bal id zaban ree bengüt?

<sup>30</sup> Achet sirv guial nadxu'n loj ni nadxeb gra hor. <sup>31</sup> Din rugojnan ĺejt, gra dxej za'n loj gualgüjt, laan naj ni diidxli ni rnin ĺejt zi'cgajc walin guial dad nix yu' luxdon con ĺejt guial najdi xbejn Cristo. <sup>32</sup> Yan bal naabzi loj guidxliuj guie güün sirv ni cayünan dxel achet sirv ni basajc ree b́en Éfeso naj, naj reeman bendoxh zi'c ree bedoxh. Din bal id



zaban ree bengüt meyorli yaguieen ree zi'c rëb ree bén rëb: “Yadaaw ree yadü' tée ree din guixie ma bayëjt ree.”

<sup>33</sup> Per naj rni lëjt ad tiëbidi gusquiee reeman lëjt. Din guial ridxga' xtiidx ree bén ni ad zët xnejz, najzan par guxhiinan zi'c nabandi. <sup>34</sup> Zeel gol been xgab zi'c rayal ad bal rüjn tëeridi dol din yu'di ni'quid nünbeetidi Dios, zeel canin lojdi zian din yaya'nxtudi.

### *Xhienaag yaban ree bengüt*

<sup>35</sup> Per wed yu'di rüjn xgab: “¿Xhieza naag yaban ree bengüt? ¿Xhienaag naj cuerp ni gap reeman?” <sup>36</sup> Per xgab guin xgab tontzan. Din lëjt ragbee guial chi rxübin bejn tijb xhaj xhienin, chi rliejnan dxel rniyt xhaj ni guxübinman. <sup>37</sup> Ad cwaan ni rliejn guint rxübin bejn, xhajnan rxübinman, zi'c rüjn bejn con trigo o xhietëez stijb xhaj nin. <sup>38</sup> Per chi rliejnan ma najn cwaandoo zi'c rniabee Dios gacan, xhietëez xhaj nin ni rxübin bejn ma yu' cwaando ni guilienan. <sup>39</sup> Zi'c nadxaa xcuerp bejn con xcuerp ree be, nadxaa tée bëjl con xcuerp ree biguijn. <sup>40</sup> Nadxaa tée ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj. <sup>41</sup> Nadxaa xbacha' gubijdx guial loj bëew nadxaa tée xbacha' ree bajl xanyabaa, xt ree bajl xanyabaa garent garen naj xbacha' reen.

<sup>42</sup> Yan ziangajc gac con guial yaban ree bengüt. Cuerp ni rguie'ch rodhan, per cuerp ni gap bejn stijb ad yu't dxej godxan. <sup>43</sup> Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl. <sup>44</sup> Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

<sup>45</sup> Loj xtiidx Dios rëb guial yaloj Adán gojp guialnaban loj guidxliuj guie. Dxel bi't Jesucrist, bén razaladx guialnaban loj ree bejn. <sup>46</sup> Ad yalojt rajp bejn guialnaban ni gapaman xanyabaa, yalojxgaj rajpaman guialnaban loj guidxliuj guie dxel guialnaban xanyabaa. <sup>47</sup> Adán gojcaman con yuj zeel najman bénguidxliuj, per Jesucrist xanyabaa zëédaman. <sup>48</sup> Gra ree bénguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa. <sup>49</sup> Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

<sup>50</sup> Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodx ad zajct chu'n lod yu' ni ad rodxt. <sup>51</sup> Per rënan gagbeedi tijb ni achutczu wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ren. <sup>52</sup> Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'ctzi chi ruchip guiaaloj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan. <sup>53</sup> Din rüjn naguiejn guidxaa cuerp ni rodx por stijb cuerp ni ad yu't dxej godx guidxaa tée cuerp ni rëjt por stijb cuerp ni ad yu't dxej guiët. <sup>54</sup> Abi' chi ma bidxaa cuerp ni rodx por stijb cuerp ni ad yu't dxej godx guidxaa tée cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: “Xt guin ma bayaaloj gojc gan loj guialgüjt.” <sup>55</sup> Nadxel tée ma gojc cumplid zi'c rëb loj xtiidx Dios lod rëb: “Guialgüjt, ¿conza guial rüjnl gan? ¿Conza guial rusagzil bejn?” <sup>56</sup> Guialrusagzi guialgüjt naj por dol, abi' por ley ragbee bejn guial dol guin naj ni rniabee laaman. <sup>57</sup> Per quixtëe dux Dad ree Dios, bén rüjn dunuj ree yudar par yaguieen ree gan por xguialgüjt Dad Jesucrist.

<sup>58</sup> Zeel compniar raliduladx ree Jesucrist zi'c rënan lëjt rnin lojdi, gol guzudxi'ch ad chu' tée luxdoodi tio'p. Guixie guixie gol been naguiejn güündi mazri xmandad Dios, din lëjt ragbee guial ad ni xlia'tzi gra ni cayüjndi par Dad Jesucrist.

## 16

*Milia ni rdo'p par ree xbejn Dios*

<sup>1</sup> Yan por milia ni naj guto'pidi par güüнди yudar stijb ree dux compniar ree bén raliduladx ree Jesucrist, gol been zi'c gunabeen güün ree bén rliladx ree Jesucrist niz Galacia. <sup>2</sup> Gazob dumingw tijb gajdi gol gule'c cintabl zi'ctzi beendi gan lén toxman, din chi guialan ad rüjntri naguiejn guido'pidi milia guin. <sup>3</sup> Abi' chi guialan, bén ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. <sup>4</sup> Abi' bal guguan guial rüjn naguiejn gan dxel chinë'n laa reeman.

*Xhienaag naj xixgab Pab*

<sup>5</sup> Yaloj gadëedan niz Macedonia dxel guialan Corinto guidganan lëjt. <sup>6</sup> Wed xchej gazun con lëjt. Wed guidib tiamp nayaag gazun con lëjt, dxel güüнди naj yudar din gan lod naj gan. <sup>7</sup> Ad rëntan gadëedzi nejzan gaguixlon lëjt, rënan gaglaan con lëjt bal gunee Dios permis. <sup>8</sup> Per yan naj yaya'nan Éfeso xt lanij pentecostés, <sup>9</sup> din guie merczi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

<sup>10</sup> Chi gui't Timoteo, gol been naguiejn din suman zagdx con lëjt, din lasa'gajc xmandad Dios ni cayünan cayünman. <sup>11</sup> Zeel achu lëjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëëzan laaman con los demazri ree dux compniar ree.

<sup>12</sup> Abi' Apolos, naj guza'c laaman liaadx din nidnëman laa reeman nitixloj reeman lëjt, per ad guyëntaman ni'taman yan, per zi'tcaman guitixlojman lëjt chi guneen laaman tiamp.

*Diidx bigra ni bacaa Pab loj gui'ch guie*

<sup>13</sup> Gol guzujsin gol guzujdxi'ch tëë loj ni rlilaxidi Jesucrist. Gol gudaan ni gui'tzi gol guzujdxi'ch tëë. <sup>14</sup> Gra ni güüнди gol beenan guial rëndi bejn ree.

<sup>15</sup> Compniar raliduladx ree Jesucrist, lëjt ragbee guial Estéfanos con xfamilaman laa reeman naj bén yaloj bililadx Jesucrist niz Acaya, ragbee tëëdi xhienaag cayün reeman yudar dux compniar ree bén rliladx ree Jesucrist. Zeel rnin lojdi: <sup>16</sup> Lasa' ree bén guin gol bazoob xtiidx reeman con gra ree bén cayün xmandad Dios në ree bén cayün yudar cayajc mandad guin.

<sup>17</sup> Dád nix guyu luxdon chi baguiaad Estéfanos guie, në Fortunato në Acaico. Din por laa reeman guza'can zi'cgajc chi za'n con gradi. <sup>18</sup> Laa reeman bagu' luxdon niz guie zi'c ragu' reeman luxdoodi, abi' lasa' ree bén guin gol gojp reeman respejt.

<sup>19</sup> Gra ree compniar rliladx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bén rado'p ree lidx reeman, rugajpdioz reeman lëjt, nayajc ree xbejn Cristo. <sup>20</sup> Gra ree dux compniar ree bén rliladx ree Cristo rugajpdioz reeman lëjt, gol bagajpdioz tëë lasa'di zi'c rayal.

<sup>21</sup> Naj Pab, quijb naj cuca lëjtr guie ree par gugajpdiozan lëjt.

<sup>22</sup> Bal yu' bén ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

<sup>23</sup> Abi' dux Dad ree Jesucrist güünle' gradi. <sup>24</sup> Zi'c nayajc ree xbejn Cristo tiblojzi rënan gradi. Amén.

## Gui'ch barojp ni guxhaal San Pabl loj ree bén Corinto rliladx Jesucrist

### *Rugajpdioz Pab bén Corinto rliladx ree Jesucrist*

<sup>1</sup> Naj Pab, Dios bacaabee naj gacan xi apóstol Jesucrist, në dux compniar ree Timoteo za' con naj. Naj cuca gui'ch guie par lëjt guial ma rliladxidi xtiidx Dios luguiedx Corinto në los demazri ree bén riga' niz Acaya. <sup>2</sup> Dux Dad ree Dios con Dad Jesucrist güünle' lëjt yabe'cdxe tëë reeman luxdoodi.

### *Tarbajw ni gudëd Pab*

<sup>3</sup> Quixtëë Dios xDad Dad Jesucrist, bén naj Dad bén raya dunuj ree naj tëëman Dios bén ragu' du luxdoo ree. <sup>4</sup> Laaman ragu' du luxdoo ree loj xhietëëz guialrzagdiaj ni radüüd ree din gac yalu' ree luxdoo ree bén cadëd xhietëëz guialzi, yalu' ree luxdoo reeman zi'c ragu' Dios du luxdoo ree. <sup>5</sup> Din majsi cayzaagdiaj da't ree guial nayajc ree xbejn Cristo, ziangajc dád ragu'man du luxdoo ree. <sup>6</sup> Abi' bal cayzaagdiajn, cayzaagdiajn din yaguieenan lëjt yudar din chu' luxdoodi din laa tëëdi loj dol. Abi' bal cu'man du luxdoon, rgu'man du luxdoon din chu' luxdoodi din gac taandi lasa' ree guialzi ni caydüüdan. <sup>7</sup> Ad yu' nawëëgt du luxdoon con lëjt, din zi'cgajc cazagdiajdi ziangajc cayzaagdiajn dxel ziangajc yagu' Dios luxdoodi zi'cgajc ragu'man du luxdoon.

<sup>8</sup> Compniar raliduladx ree Jesucrist, rayënan gagbeedi guial dád zro' naj ni baza'can niz Asia. Naya baza'can niz ni, par dunujn ad zadaantran, ad naguieentran nejz guial yabajnran mazri, <sup>9</sup> baguieenan xgab guial ma bayëjtan. Per baza'can zian din yadxë'guijcan guial achet zajc yaguieen dunujzan sin xyudar Dios, bén rasban ree bengüt. <sup>10</sup> Laaman babëë dunujn loj guialgüjt guin abi' gagnëman dunujn loj lasa' ree ni nadxeb guin. Dunuj ree rayagbee guial gusnuu güünman dunujn yudar, <sup>11</sup> mazri bal güüнди yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gudëëd quixtëë lojman zi'c cayagnëman dunujn.

### *Chexc ad wejt Pab Corinto*

<sup>12</sup> Abi' ni rabaan rnin lojdi guial achetczi naduladxan guial rayagbeen nabajnan naya delant lojdi në delant loj ree bénguidxliuj, abi' diidxli cayguieenan ni rayal yaguieenan. Per ad cayguieentan zian por dux quiarguejnzan, cayguieenan zian por xyudar Dios. <sup>13</sup> Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi. <sup>14</sup> Zi'cgajc ta'ngaj cayagbeedi guial chi gui't Dad Jesucrist zatijb lëjt yabaadi con dunujn guiáad dunujn yabaan con lëjt.

<sup>15</sup> Laan naj ni yu'guican, zeel yaloj benan xgab nidganan lëjt din nabaadi guial ma barojp volt bidganan lëjt. <sup>16</sup> Benan xgab nidganan lëjt chi nialan niz Macedonia, abi' chi nazaan Macedonia nialan nidganan lëjt stijb, dxel nagu'nejzidi naj par Judea. <sup>17</sup> Ad güüнди xgab guial chi rnin guidganan lëjt rnizan zian. Ad güüнди xgab guial rünan zi'c rüjn gra ree bénguidxliuj, ganin guialan abi' ragbeen guial ad zialtan. <sup>18</sup> Dios ragbee guial ad raguie'chtan yaguieenan ni rayagbeen ad zaguieentan. <sup>19</sup> Din Jesucrist Xi'n Dios, bén ni ma baguien xtiidx lojdi, naj con Silvano con Timoteo, ad najt Jesucrist bén na güünman ni ragbeeman ad züjntaman, laaman ganax diidxli rnieeman. <sup>20</sup> Din por laaman rajc cumplid gra ree xpromejs Dios. Zeel por laaman raguie'ch ree "Amén" chi radëëd ree quixtëë loj Dios. <sup>21</sup> Abi' Dios laaman cayüjn dunuj ree yudar con lëjt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman. <sup>22</sup> Laaman gule dunuj ree par laaman, abi' guxhaal xSprijtaman bén nabajnnë' ree zi'c tijb sen guial yaca' ree ni yaca' ree.

<sup>23</sup> Yan bal gadan ga Corinto zi'c benan xgab, Dios ragbee guial gadan ga guial ad rëntan gadilë'n lëjt, abi' Dios gudëëd naj casti bal id wali ni canin. <sup>24</sup> Ad cayguieentan

naguiejn yanabeen lëjt xhienaag chililadxidi Jesucrist, din dunujn rayagbee guial diidxli za'dxi'chidi loj ni rililadxidi Jesucrist, ni cayguieenan naj guial yaguieenan lëjt yudar din chu' luxdoodi nix guibandi.

## 2

<sup>1</sup> Zeel benan xgab ad zidganatan lëjt yan, chitëë chu'naya luxdoodi. <sup>2</sup> Din bal gagu'nayan luxdoodi, ¿chuza cu' luxdon nix bal ma badxe'nayan luxdoodi lëjt ragu' luxdon? <sup>3</sup> Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxe gradi yu' luxdoo zagdxe por zian. <sup>4</sup> Chi bacan gui'ch guie dád guyun xgab abi' guyunayan xt ronan bacan diidxnaa ni bacan loj gui'ch guie, per ad bacatan gui'ch guin par gagu'nayan lëjt, bacanan par gagbeedi guial rën da'tan lëjt.

### *Yu' perdon par bén badxe' falt*

<sup>5</sup> Bal yu' tijbidi ma badxe'naya naj, per ad najtzi guyunaya nëgajc lëjt guyunaya. Rnin në lëjt chitëë gadëëdlajn guial ganin gracziدي guyunaya por zian. <sup>6</sup> Per naj rni lojdi compniar raliduladx ree Jesucrist, ma gojczy yan con casti ni ma badëëdidi loj bén guin. <sup>7</sup> Yan gol beenman perdon gol bagu' tëë luxdooan chitëë chu'naya luxdooan xt ad zadxejlt xhie güünman. <sup>8</sup> Zeel rniaaban lojdi, gol been naguiejn din gagbeeman guial rëndi laaman zi'cgajc guyëndi laaman guia'xchej. <sup>9</sup> Gui'ch ni guxhalan lojdi gocli, guxhalanan din gagbeen bal ruzoobidi da diidxan guial güündi gra ni ganin lojdi. <sup>10</sup> Yan chutëëz Bén güündi perdon, nëgajc naj gün laaman perdon. Abi' Bén ma benan perdon, bal yu' ni günan perdon, benan laaman perdon delant loj Cristo por lëjt <sup>11</sup> chitëë güün xindxab dunuj ree gan, din dunuj ree rayagbee xhienaag naj xguialrusquiee xindxab.

### *Ad nixt guyu luxdoo Pab guzujman Troas*

<sup>12</sup> Chi bidxinan guiedx Troas par ganen xtiidxza'c Jesucrist, dád gognë Dios naj par günan mandad guin ni. <sup>13</sup> Per ad nixt guza'can guial ad bidxaaglojtan dux compniar ree Tito. Zeel basa'nan Bén guin ree abi' wan Macedonia.

### *Ragnë Jesucrist dunujn zianczi*

<sup>14</sup> Per quixtëë Dios guial por Jesucrist guixie guixie cayagnëman dunujn chitëë xhie güün dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczi. <sup>15</sup> Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree Bén rililadx Jesucrist në loj ree Bén ad rililadxt. <sup>16</sup> Par ree Bén ad rililadxt laaman, dunujn nayajc zi'c tijb go'xh ni rugüjt, per par ree Bén rililadx laaman dunujn nayajc zi'c tijb go'xh ni runee guialnaban. Per, ¿chu zajc güün ree ni guin sin xyudar Dios? <sup>17</sup> Dunujn ad cayguieentan negojs con xtiidx Dios zi'c rüjn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

## 3

### *Nejz cüb ni yu' par yadxin ree loj Dios*

<sup>1</sup> Chi ranan zian, ad naladxidi guial dunujn gajcan cayles dux valoran. Lëjt ragbee guial ad rüjnt naguiejn yalüün tijb gui'ch lojdi par gagbeedi chu dunujn o yanaaban gui'ch lojdi ni güün dunujn yudar par gagbee ree bejn chu nayajcan zi'c rüjn ree ben ren. <sup>2</sup> Din lëjt gajc naj tijb gui'ch par dunujn, gui'ch ni yu' du luxdooan ni rool ree bejn ni nünbee tëë reeman. <sup>3</sup> Zi'c rulüü yaguie'ch ree lëjt naj tijb xtiidx Cristo ni bacaan, per ad bacaatanan con tint, bacaanan con xSprijt Dios Bén naban, tijb ni ad cwat loj tijb guiaj nata', cwan luxdoo ree bejn.

<sup>4</sup> Dunujn raya'p Dios confianz por Jesucrist, <sup>5</sup> abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios. <sup>6</sup> Dios naj Bén razaladx dunujn quiarguiejn par yagojnan bejn ree xcwent nejz cüb ni ma yu' par

yadxin ree loj Dios, nejz cüb ni ad ryaadxt chinal bejn tijb ley ni zëed loj gui'ch, per rüjn naguiejn chinalaman ni zëed por xSprijt Dios. Din ley castizi naj ni zidnën, per xSprijt Dios guialnaban naj ni rudëeman loj ree bejn.

<sup>7</sup> Abi' majsi castizi naj ni zidnë ley ni badëe Dios loj Moisejs loj tijb guiaj nata', per dád bidiin bacha' loj Moisejs chi cwa'man ley guin, xt ad gojct nuguaa ree bën Israel lojman por bacha' guin, bacha' ni ta'ngaj ta'ngaj gunidlojn. <sup>8</sup> Bal chi bi't ley guin gojc zian, yan, jmazri ni za'cdxoon naj guial gucaagdiajg ree bejn xcwent nejz cüb ni rulüü xSprijt Dios ni ma rajp bejn con Dios! <sup>9</sup> Din chi bi't ley ni ridnë casti par ree bejn, con bacha' bi'tan, yan, jmazri ni za'cdxoon naj guial guien ree bejn xhienaag gac reeman naya delant loj Dios! <sup>10</sup> Abi' bal ni za'cdxoon gojc chi bi't xley Dios loj guidxliuj guie, yan achetczi lasajc guialza'cdxoon guin par guialza'cdxoon ni naj por nejz cüb ni ma rajp ree bejn con Dios. <sup>11</sup> Abi' bal ni ad rüjnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

<sup>12</sup> Abi' guial yu'guijc ree zian, zeel sin guialrdxeb caylüünan bejn ree. <sup>13</sup> Ad raguieentan zi'c been Moisejs, basiaaw lajd lojman chitëe gagbee ree bën Israel guial ziquied guialrulaa bacha' lojman, bacha' ni laa gunit gajc. <sup>14</sup> Per ad lojtzi Moisejs biaaw, ne gajc xquiarguejn ree bejn biaaw. Din xt yandxey chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan. <sup>15</sup> Per xt yandxey chi rool reeman ni bacaa Moisejs ad rignia't reeman guial sta nayaaw xquiarguejn reeman. <sup>16</sup> Per bën riladx Jesucrist, laaman rxhial xquiarguejnman. <sup>17</sup> Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman. <sup>18</sup> Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c rënman yayajc ree, abi' guixie guixie cusniman dunuj ree por xSprijtaman.

#### 4

<sup>1</sup> Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin. <sup>2</sup> Dunujn achet raquie'chan, achet ni ad rünjt sirv cayguieenan, ad caysquieetan bejn ree ad caychaa tëetan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios. <sup>3</sup> Per bal yu' bën ni ad rignia't xtiidxza'c Jesucrist ni cayneen, ad rignia'taman laan guial ad zëtaman loj xnejz Dios. <sup>4</sup> Abi' xindxab rniabee loj guidxliuj guie ma bascajyix xquiarguejn reeman, guial ad rënt reeman chililadx reeman, chitëe gusni xtiidxza'c Jesucrist laa reeman abi' ad zajct guguaa reeman xguialrniabeeman, laaman guial najman zi'c gajczi Dios. <sup>5</sup> Ad caytie'chtan dux tiidx gajcan, ni caytie'chan naj xtiidxza'c Jesucrist, bën naj Dad par dunuj ree. Abi' ni ranazan lojdi guial cayguieenan sirv lëjt por guial rayënan Jesucrist. <sup>6</sup> Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiarguejnan, guxhalaman dux quiarguejnan din yayignia'n xhienaag naj xguialrniabeeman, guialrniabee raguaa ree por Jesucrist.

#### *Yabajn ree por guialrliladx*

<sup>7</sup> Gulejman dunujn par yaguieenan ni cayguieenan, majsi nayajczan zi'c guiajs bajn din guiguien guial gra guialrniabee zëed por Dios ad por dunujtan. <sup>8</sup> Majsi graloj guialzi caydüüdan per ad ralenya'tan. Majsi rulüü achetri zajc yaguieenan, per radxejl gajc xhienaag yaguieenan. <sup>9</sup> Majsi xhietëez rüjnnë bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn. <sup>10</sup> Bantëez guin zio'n nadxu'n loj guialgüjt zi'cgajc guzajc Jesucrist, per zian ralüün guial raya'pan xguialnabanman. <sup>11</sup> Dxel la'tgaj naban, guixie guixie nadxu'n loj guialgüjt guial nayajcan xbejn Jesucrist, per zian ralüün guial raya'pan xguialnabanman, majsi guidxin dxej nit dux cuerpan. <sup>12</sup> Nadxu'n loj guialgüjt guial caytie'chan xtiidx Jesucrist, per por zian ma rajpidi guialnaban delant loj Dios.

<sup>13</sup> Loj xtiidx Dios rëb: “Guial bililadxan, zeel gunen ni gunen.” Yan ziangajc guial raliduladxan xtiidx Dios zeel cayneen laan. <sup>14</sup> Din dunujn rayagbee guial Dios, bën basban dux Dad ree Jesucrist loj guialgüjt, ziangajc yasbanman dunuj ree guial ma nayajcan tijbzi con Jesucrist dxel lëjt con dunujn tijbzi chignëman dunuj ree lod zojbaman. <sup>15</sup> Din gra ni cayguieenan në gra ni cayza'can, cayza'can zian din yaguieenan lëjt yudar din gusnuu gacxhiej ni rililaxidi Jesucrist. Zian ma gac ree bejn mazri zien gudëed reeman quixtëe loj Dios, guza't tëe reeman laaman zagdxë.

<sup>16</sup> Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie caycüb Dios laan. <sup>17</sup> Achetczi lasajc ree gualzi ni caydüüdan loj guidxliuj guie din najn ni rdëd, per por gualzi guin ree rayalan xguialnaza'c Dios, gualnaza'c ni lasajc mazri abi' ad yu't dxej nitan. <sup>18</sup> Din dunuj ree ad cayguieent ree naguiejn yaya'p ree ni raguaa ree loj guidxliuj guie, cayguieen ree naguiejn din yaya'p ree ni ad raguaat ree. Din ni raguaa ree loj guidxliuj guie yu' dxej nit reen, per ni ad raguaat ree yan ad yu't dxej nit reen.

## 5

<sup>1</sup> Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por bénguidxliuj zi'c rajc tijb yu, abi' cuerp guin yaya'p ree par tiblayaa. <sup>2</sup> La'tgaj raya'p ree cuerp guie loj guidxliuj ralu' ree gualquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. <sup>3</sup> Din ad ganaxtizi Sprijt yayajc ree xanyabaa, nëgajc cuerp yaya'p ree. <sup>4</sup> La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial rayënan yayëjtan, ni rayënan naj guial yaya'pan cuerp cüb ni yaya'pan par tiblayaa din nit dux cuerpan ni rayal nit. <sup>5</sup> Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

<sup>6</sup> Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zojb dux Dad ree Jesucrist. <sup>7</sup> Per dunuj ree zunaal reeman guial raliduladx ree laaman ad guial raguaat ree xhienaag gac. <sup>8</sup> Zeel raya'p ree confians guin, abi' ma rayën ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. <sup>9</sup> Zeel achet güünan bal loj guidxliuj guie o bal xanyabaa, per ni rayën ree naj guial yaguieen ree zi'c rën Cristo. <sup>10</sup> Din dugra ree rayal yadxin lojman lod güünman gualguxtis din tijbgaj dunuj ree yaca' ni rayal ree, por ni zagdxë o por ni mal ni baguieen ree loj guidxliuj guie.

### *Xhienaag gap bejn nejz par guidxinman loj Dios*

<sup>11</sup> Zeel por respejt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa në lëjt güünbee dunujn guial dunujn cayguieencan xnejz. <sup>12</sup> Ad caylest dux valoran, ni rayënan naj guial yabaadi guial gagbeedi ni naj diidxli por dunujn, din gac yadxi'di diidx loj ree bën rüjn naguiejn yaya'n reeman zagdxë delant loj ree bejn luar güün reeman xgab xhienaag naban reeman delant loj Dios. <sup>13</sup> Yan bal par bejn rajc duguijcan por ni cayguieenan, per cayguieenan laan por Dios. Abi' bal par lëjt nadëdguieenan zeel cayguieenan mandad guie, cayguieenan laan par yaguieenan lëjt yudar. <sup>14</sup> Guial rën Cristo dunujn zeel cayguieenan ni cayguieenan, din dunujn rayagbee guial Cristo güjt par gra bejn abi' gra ree bejn ma naj zi'c bengüt par dol. <sup>15</sup> Abi' Jesucrist güjtaman por gra bejn din bën chililadx ree laaman ad zabajntri reeman zi'ctzi rën reeman, ma guiban reeman zi'c rënman, laaman guial güjtaman por laa reeman abi' babanman stijb. <sup>16</sup> Zeel bal guia'xchej baguieen ree xgab guial naj Cristo tijbzi bénguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn, <sup>17</sup> din chutëez bën ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

<sup>18</sup> Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. <sup>19</sup> Din tijbzi naj Dios con Jesucrist abi' por Jesucrist rüjn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. <sup>20</sup> Zeel dunujn nayajc bén canee por Cristo, caydëedan xtiidx Dios din gagbee ree bejn xhie rniab Dios güün reeman. Abi' por Jesucrist ranaaban lojdi: Gol guzuj zagdxe con Dios. <sup>21</sup> Din Jesucrist achetczi dol beenman, per por dux tol ree baslaa Dios güjtaman zi'c tijb bëndol din por laaman, cuguiaa Dios dunuj ree zi'c tijb bén ni ad wayüjnt dol.

## 6

<sup>1</sup> Zeel zi'c cayguieenan xmandad Dios, dunujn ranaab lojdi: Ad güünbee xlia'di guial rën Dios lëjt. <sup>2</sup> Din loj xtiidxaman rëb:  
Chi bidxin dxej guidxga'n lüj,  
bidxga'n lüj  
abi' chi bidxin dxej gapil perdon  
dxel beenan lüj yudar.

Abi' dunujn rana lojdi guial ma bidxin dxej guin par lëjt, ma bidxin dxej guidxga' Dios lëjt në dxej güünman lëjt perdon.

<sup>3</sup> Dunujn ad cayguieentan tijb ni güün guial ad zaliladxtri ree bejn Jesucrist, ad cayguieentan tijb ni guiëb ree bejn guial ad cayguieentan zi'c balüün bejn ree. <sup>4</sup> Par gra caylüün bejn ree guial dunujn nayajc bén cayüjn sirv Dios caydaan tëen xhietëez ni raza'can, zi'c guialzi, tarbajw, ni naya, <sup>5</sup> në guial naa ni rüjn ree bejn dunujn. Në guial rgu' reeman dunujn ladxguuib, rgu' tëe reeman dunujn loj wadijl, ni radxagan guial tant zien ni raguieenan, ni ralëen bacaal, ne guialrliaan ni radüüdan. <sup>6</sup> Caylüü tëen bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc tëen benza'c con ree bejn, guial nabajnan con xSprijt Dios, guial diidxli rayënan ben ren ree, <sup>7</sup> guial ranen ni naj diidxli, guial cayüjn Dios dunujn yudar, në guial radëen consejw loj ree bejn o radxi'n xtiidx ree bejn con xtiidx Dios. <sup>8</sup> Yu' dxej rajp ree bejn dunujn respejt, yu' tëe dxej rnieeguijdx reeman dunujn. Yu' dxej rniee reeman diidxza'c ree por dunujn, yu' tëe dxej rniee reeman dunujn diidxguijdx. Rüjnnë reeman dunujn zi'c Bén rusquiee majsi diidxli naj ni raneen. <sup>9</sup> Yu' dxej rüjn reeman zi'c Bén ad nünbeet dunujn, majsi nünbee reeman dunujn. Majsi rulüü ma yayëjtan per ad rayëjttan, abi' majsi xhietëez rüjnnë reeman dunujn per ad rugüjtt reeman dunujn. <sup>10</sup> Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi Bénprob dunujn per por dunujn zien ree Bén ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadnan.

<sup>11</sup> Bén Corinto, dunujn ma ranan gra por dunujn, achet ni naguie'ch par dunujn guial diidxli rayënan lëjt. <sup>12</sup> Dunujn ad rlioxr rayënan lëjt, lëjt bal id rënridi dunujn. <sup>13</sup> Per naj rnienë' lëjt zi'c rnieenë tijb dad gra xi'nman: Gol guyën dunujn zi'c rayënan lëjt.

### *Nayajc ree zi'c xyadoo Dios naban*

<sup>14</sup> Gol gojp cudad xhie ree compromis güüandi con ree Bén ad rliladxt Dios, din garen naj xixgab ree Bén ma zinal ree xnejz Dios guial loj xixgab ree Bén contzi naban. Garen naj xixgab ree Bén ridxga' xtiidx Dios guial loj xixgab ree Bén ad ridxga't laan. <sup>15</sup> Lëjt ragbee guial ad zajct gac Cristo tijbzi con xinxgab, ziangajc garen naj Bén rliladx Cristo guial loj Bén ad rliladxt laaman. <sup>16</sup> Garen naj ree Bén rliladx dux Dad ree Dios guial loj ree Bén rliladx ni naladx reeman naj dios. Din dunuj ree guial raliduladx ree Dios naban, dunuj ree nayajc xyadoodan zi'c rëb tiblajt loj xtiidxaman lod rëb:

Naj gabajnnë' laa reeman gazu tëen con laa reeman  
bantëez guin che reeman.  
Naj gac xDios reeman  
abi' laa reeman gac da bejnan.

<sup>17</sup> Rëb tëë loj xtiidx Dios:

Gol barii loj ree ben mal, gol been tibläd.

Ad güüindi ni dxuudx din yaca'n lëjt,

<sup>18</sup> abi' naj gac tijb Dad par lëjt

guiáad lëjt gaquidi da xi'ngaanän në daxi'ndxa'pan.

Zian rëb dux Dad ree Dios bén ca' gra guialrniabee.

## 7

<sup>1</sup> Ni guin ree naj ree promejs ni ma been Dios con dunuj ree nayajc ree bén rlliladx ree Jesucrist. Zeel rayal yaguieen ree naguiejn yabajn ree naya. Yasa'n ree tibläd dol, xgab mal, në gra ree ni dxuudx. Abi' guixie guixie yaguieen ree naguiejn yabajn ree zi'c rën Dios por respejt ni raya'p reeman.

*Rabaa Pab guial bayüjn ree bén Corinto xgab por xtol reeman*

<sup>2</sup> ¡Gol gojc benza'c con dunujn! Dunujn achet waguieenan lëjt, achet ni mal waguieenan lëjt ad wasquiee tëëtan lëjt. <sup>3</sup> Ad naladxidi caneguijdxan lëjt, din zi'c ma rnin lojdi diizd guia'xchej guial dunujn rayënan lëjt, abi' majsi yayëjtan o majsi yabajnan per tijbzi nayajcan con lëjt. <sup>4</sup> Dád ra'pan lëjt confianz abi' dád rabaanë'n lëjt. Majsi xhietëëz guialzi caydüüdan, per zi'c rgu'di du luxdoon nix zeel dád rabaan, majsi xhietëëz cayza'can

<sup>5</sup> Din diizd chi badxinan niz Macedonia achetçi guial yaziiduladxan por gra ni cayza'can, zi'c ni rüjnnë ree bejn dunujn në guialnadxeb ni caydüüdan. <sup>6</sup> Per Dios bén ragu' luxdoo ree bén yu'naya luxdoo, laaman bagu' du luxdoon chi bi't Tito guie. <sup>7</sup> Abi' ad guialzi bi'ttaman bayu du luxdoon nix, në guial bagu'di luxdooman zeel bayu du luxdoon. Naman du lojn guial dád rëndi guguaaadi naj, yu' tëëdi xgab yu'naya tëëdi por naj. Laan naj ni rabaanë'n guial yu'quidi xgab por naj.

<sup>8</sup> Majsi naya guyu luxdoodi por gui'ch ni guxhalan lojdi, per achet naladxan. Majsi dád naya guyu luxdon chi guxhalanan guial ragbeen zunayadi tiblädëd, <sup>9</sup> per yan nix yu' luxdon, ad guial guyu nayatidi, yu' luxdoon nix din por guialguyunaya guin ma bayüjndi xgab zëdi loj xnejz Dios. Guyunayadi abi' gudaandi zi'c rën Dios, abi' achet ni mal baguieenan lëjt. <sup>10</sup> Din chi runaya luxdoo bejn zi'c rën Dios, guialrunaya guin rüjn yudar persi rayüjn bejn xgab por xtolaman, zian rarii bejn loj casti, abi' ad yu't dxej yayüjn bejn xgab guial gulaaman loj casti guin. Per guial runaya luxdoo bejn abi' ad rüjntaman naguiejn chu'man loj xnejz Dios, dxel ad zajct gapaman guialnaban delant loj Dios. <sup>11</sup> Per lëjt gol baguiaa zi'c ma been yudar guial guyunayadi abi' gudaandi zi'c rën Dios. Por guial guyunayadi nayob beendi naguiejn bazuxnejzidi ni ma rnin cayüjn tijb lëjt, abi' balendi bidxeb tëëdi por ni cayüjnx. Dxel ma rënejzdoodi gazun con lëjt, badëë tëëdi laax casti zi'c rayal. Por gra ni beendi zian biguien guial achet dol rajpidi por zian.

<sup>12</sup> Gui'ch ni guxhalan lojdi, ad guxhaltanan guialzi rünan xgab por bén cayüjn dol guin o guial rünan xgab por bén cazagdiaj por xtol bén guin. Guxhalan gui'ch guin lojdi din gulüüdi loj Dios guial yu'guijcquidi dunujn. <sup>13</sup> Laan naj ni rabaanë'n guial beenquidi zian.

Abi' yan mazri rabaan guial raguaan Tito yu' luxdooman zagdxe baguiaadaman guial dád naza'c gojquidi con laaman. <sup>14</sup> Zeel ad basa'nxtutidi naj por gra zi'c bazatan lëjt lojman. Din gra ni rën por lëjt naj diidxli zi'c ragbeedi guial dunujn ganax diidxli raneen, abi' tëë diidxli naj ni raguie'chan loj Tito por lëjt. <sup>15</sup> Yan dad rusaaladxaman lëjt guial rusaaladxaman xhienaag bazoobidi xtiidxaman në gra respejt ni gopidi laaman chi guzuman con lëjt. <sup>16</sup> Dád nix yu' luxdon guial ra'pan lëjt confianz par gra.

## 8

*Guial rudëëd gon con guidib luxdoo*

<sup>1</sup> Yan compniar raliduladx ree Jesucrist, rayënan gagbeedi xhienaag cayagnë Dios bén rlliladx ree Jesucrist niz Macedonia. <sup>2</sup> Majsi xhietëëz cazajc reeman, per ad rucwëëzt rguien guial dád rabaa reeman. Majsi dád bénprob reen, per dad rabaa reeman rudëëd



reeman cintabl par gagnë reeman bejn ree. <sup>3</sup> Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. <sup>4</sup> Dád been reeman naguiejn du lojn din yatiëjban guial në laa reeman güün yudar bën riladx ree Jesucrist, <sup>5</sup> abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rën reeman güün reeman zi'c rën Dios. <sup>6</sup> Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt. <sup>7</sup> Dunujn rayagbee guial par gra zagdxe zëdi: Diidxli riladxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güüندی laaman sirv rën tēēdi dunujn, yan gol been naguiejn din guiguien guial najdi benza'c par güüندی yudar con ni ranan lojdi. <sup>8</sup> Ad rüntan lëjt naguiejn guial gudēēdi ni rdo'p, per rugojnan lëjt zi'c rabaa ree ben ren guial rüjn reeman yudar, din bal rëndi gulüüdi guial diidxli rëndi xcompniaridi. <sup>9</sup> Din lëjt ragbee zi'c naza'c Dad Jesucrist, bën basa'n gra guialnaza'c xanyabaa, abi' bi'taman loj guidxliuj zi'c tijb bën ni achet rajp din por laaman yayal në lëjt xguialnaza'c Dios.

<sup>10</sup> Zeel rnin lojdi guial zagdxen gulooxidi ni guzulojdi gudibijz. Yaloj lëjt been xgabza'c guial güüندی yudar, abi' laa guzuloj gajquidi. <sup>11</sup> Yan zi'cgajc yu' luxdoodi nix guzulojdi, ziangajc gol babaa gusnuudi gudēēdi ni rdo'p zi'ctzi galguzujdi. <sup>12</sup> Din chi diidxli rën bejn güünman yudar, xhietēēz naag zajc güünman yudar. Ad rayalt gudēēdaman xt ni ad rajptaman.

<sup>13</sup> Ad canitan lojdi guial tēdidi tarbajw cwe'quidi xt ni ad rajptidi par güüندی yudar bën ryaadx ree xhienin chitēē xhie guiyaadx reeman, ni rayēnan naj guial tibloj yaguieen dulasa' ree yudar. <sup>14</sup> Yan lëjt zajc güüندی yudar bën ryaadx ree xhienin, dxel despuejs güün reeman lëjt yudar con ni ryaadxidi. Zian tibloj yaguieen du lasa' ree yudar. <sup>15</sup> Loj xtiidx Dios rēb: “Bën bato'p zro' achet been sobr, abi' bën bato'p ta'nzi achet biaadxaman.”

#### *Tito con ree xcompniaraman*

<sup>16</sup> Quixtēē Dios badēēman loj Tito lasa'gajc xgab rünan por lëjt. <sup>17</sup> Yan chi raguie'chan lojman guidganajman lëjt, laa cwēb gajcaman guial ma rēnman guguaaman lëjt, ad beent naguiejn chu niniabee ni'taman.

<sup>18</sup> Abi' con laaman cayxhaalan stijb dux compniaran bën ma nünbee ree dux compniar ree bën riladx ree Jesucrist guidibczi, guial rulüüman bejn ree xtiidxza'c Dios zagdxe. <sup>19</sup> Ma bacaabee tēē ree dux compniar raliduladx ree Jesucrist laaman din saman con dunujn din güünman dunujn yudar yune'n ni cado'p. Abi' yudar guin cado'pan din guiguien guial rayēnan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdxe. <sup>20</sup> Zeel cwabee bën guie din saman con dunujn chitēē xhie guacaquia reeman dunujn por gra yudar ni cado'p ni naca'n par yugsa'nan. <sup>21</sup> Din dunujn rayēnan yaguieenan gra zi'c rayal, ad naabtizi loj Dad Jesucrist, në loj ree bejn.

<sup>22</sup> Yan cayxhaalan Tito con bën guin cayxhaalnē'n laa reeman stijb dux compniaran bën ma balu'been zien volt guial diidxli rēnman güünman yudar, abi' mazri yan guial dád rajpaman lëjt confians. <sup>23</sup> Bal chu guiniabdiidx por Tito, gol güjdx guial da compniaran najman, laaman cayüjn naj yudar par günan lëjt yudar chinalidi xnejz Dios. Guiáad za' tio'p dux compniaran bën zē ree con laaman, dux compniar ree bën riladx ree Jesucrist guxhaal laa reeman, abi' ruza't reeman Jesucrist zagdxe. <sup>24</sup> Yan gol balüü loj reeman guial diidxli rëndi bejn ree, din por laa reeman gagbee ree los demazri ree compniar riladx Jesucrist xcwentidi, din guguaaa tēē reeman guial ni diidxli naj ni ma rën loj reeman xcwentidi.

<sup>1</sup> Yan por yudar ni rayal yale'can par yaguieenan yudar dux compniar ree b n rliadax ree Jesucrist, ad ryaadxt ganin mazri xcwentan, <sup>2</sup> din naj ragbee guial ruladxidi g iindi yudar. Abi' xt nix yu' luxdon r n loj ree b n Macedonia guial l jt b n Acaya diizd gudibijz cay jndi naguiejn cay jndi yudar, abi' gra ree b n Macedonia been naguiejn g iun yudar chi biguiejn reeman zian. <sup>3</sup> Zeel caxhalan Tito con za tio'p ree dux compniar ree din guiguien guial waliqui ni ma gunen por l jt xcwent yudar guin, din g iindi naguiejn g iindi yudar zi'c ma r n por l jt. <sup>4</sup> Din bal guidn 'n tio'p choon ree b n Macedonia ad yadxaaglojn l jt ad za'tidi porvinid, abi' natun par naj chit e ganin natun par l jt por confianz ni ra'pan l jt. <sup>5</sup> Zeel benan xgab r n loj Tito con za tio'p dux compniar ree guial mejorli ned gaj reeman guidganaj reeman l jt, din g iun t e reeman yudar guloox guto'p reeman yudar ni ma nadi din ma najn purvinid chi gualan. Zian guiguien guial diidxli r ndi yazaladxidi ad gualzi canabeetan l jt.

<sup>6</sup> Naj rni lojdi b n rx bin ta'n, ta'n gajc raca'man, gui ad b n rx bin zro', zro' gajc raca'man. <sup>7</sup> Tijbgaj l jt gol bad e zi'c naj xixgabidi gud edi, ad mal gant ad naguiejn t et, din Dios r nman b n razaladx guidib luxdoo. <sup>8</sup> Abi' Dios rajpaman gra gualrniabee par g iunman l jt yudar gapidi gra ni ryaadxidi chit e xhie guiyaadxidi din g iindi yudar zi'c rayal. <sup>9</sup> Loj xtiidx Dios r b:

B n ni rgui's ni rajpaman abi'  
rud eman laan loj ree b nprob,  
ad yu't dxej yayanladx reeman  
ni zagdxe ni r jnman.

<sup>10</sup> Yan Dios b n razaladx bin rx bin bejn, b n razaladx gualraw par ree bejn, laaman gul i l jt xhie g iindi din gapidi gra ni rayal gapidi, din gac g iindi yudar mazri b n ryaadx ree xhienin. <sup>11</sup> Zian mazri naj ni gunee Dios lojdi din gusnuu g iindi yudar yazaladxidi. Abi' por yudar ni guixhiaaln di dunujn par ree compniar rliadax ree Jesucrist, laa reeman gud ed quixt e loj Dios. <sup>12</sup> Abi' yudar guin ad z jntan sirv naabzi par loj ni ryaadx reeman laan, g iunan sirv n  par gud ed reeman mazri quixt e loj Dios. <sup>13</sup> Por yudar guin gagbee reeman guial cuzoobquidi xtiidxza'c Jesucrist zi'c rliadaxidi laan abi' guza't reeman Dios zagdxe por zian, n  guial najdi benza'c rgui'sidi ni rajpidi par laa reeman n  par gra ree b n ryaadx laan. <sup>14</sup> Abi' z n reeman l jt, cwedx t e reeman Dios por l jt por xgab za'c ni banee Dios lojdi guial g iindi yudar. <sup>15</sup> ;Quixt e Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

## 10

### *Guialrniabee ni rajp Pab guial najman xi ap stol Jesucrist*

<sup>1</sup> Naj Pab, yu' ree b n na guial benza'c naj chi za'n con l jt, abi' chi za'n zijt sin guial rdxeb rdiil 'n l jt. Per zi'cgajc ninieen  Cristo l jt con respekt n  con diidxza'c, rniaaban lojdi guial <sup>2</sup> xi nix chi gualan guidganaj l jt ad r jnt naguiejn gadil 'n b n r b ree por da xgabzan cay nan ni cay nan, din ad rdxebtan ganen 'n laa reeman. <sup>3</sup> Walican nayajcan b nguidxliuj, per ad raguieentan naguiejn yaguieenan gan por dux xgabzan zi'c r jn ree b n ad zinalt xnejz Dios. <sup>4</sup> Ad raguieentan naguiejn yaguieenan bejn ree gan por dux xgabzan, dunujn raguieenan gan por xguialrniabee Dios, guialrniabee ni zajc guse'n xhiet e ni mal. <sup>5</sup> Por guialrniabee guin baguieenan gan loj ni rudxiib ree bejn duguijcan, abi' baguieen t en gan loj guial nadxal reeman ni rudxoon g iunbee reeman Dios. Zianan rase'nan xhiet e xgab din chile' gucaagdiajg reeman xtiidx Jesucrist. <sup>6</sup> Abi' l jt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree b n ad wazoobt diidx zagdxe.

<sup>7</sup> L jt mazri ridxga'di zi'c ruguiaadi bejn. Bal yu' b n r jn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman. <sup>8</sup> Abi' majsi ganin lojdi mazri xcwent guialrniabee ni banee Dios lon, ad ratutan din laaman banee guialrniabee par g nan l jt yudar chignia'di mazri xcwent xnejzaman ad par gunijttan l jt. <sup>9</sup> Ad naladxidi guial r nzan gucheban l jt con ree da gui'chan. <sup>10</sup> Din yu'

ree b n ni r b guial diidx naa abi' sin guialrdxeb rnien 'n l jt loj ree da gui'chan, abi' chi za'n con l jt ni'quid rul  t lasajcan par l jt, ni'quid radxat loj ree bejn ni rnien. <sup>11</sup> Per naj rnin lojdi guial b n r b ree zian rayal gagbee reeman guial zi'cgajc raneen 'n l jt loj dux gui'chan chi nadxu'n zijt, ziangajc zajc yaguieenan chi nadxu'n con l jt.

<sup>12</sup> Din dunujn ad raguieentan zi'c r jn ree b n rlies xvalor gajc, per ni'czi ta'n ad raguieentan xgab yaguieenan zian. Din nitontzi r jn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman. <sup>13</sup> Per dunujn ad ralest dux valor gajcan mazri guial loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cw jbaman badxinan ladxidi. <sup>14</sup> Zeel ad g  ndi xgab guial cad dt  caynabeen l jt, din yaloj dunujn bio'p ladxidi par yasiidan l jt xtiidxza'c Jesucrist. <sup>15</sup> Dunujn ad ralest dux valor gajcan por tijb ni been stijb bejn. Per ral  zan guial ni's xguialrliladxidi, din yasnuu yaguieenan l jt yudar gusnuu g  nbeedi ni rayal gagbeedi xhienaag rayal yaguieen ree. <sup>16</sup> Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazuloj chit   yales dux valor gajcan con ni ma been ben ren.

<sup>17</sup> Bal yu' b n r n guilies xvalor gajc, mejorli guiliesaman xvalor dux Dad ree Dios. <sup>18</sup> Din ad b n rliest xvalor gajc naj b n raya'n zagdxo loj Dios, b n raya'n zagdxo naj b n rlies xvalor Dios.

## 11

### *Pab con ree ap stoles b n rusquiee ree*

<sup>1</sup> Yan,  xi nix taandi naj con tio'p choon ree da xgab tontan! Per naj rni lojdi gol gudaan naj. <sup>2</sup> Naj r nan l jt zi'cgajc r n Dios l jt. Zi'cgajc tijb dad rajp xi'ndxa'p biin ni ma naj guxhliaa din chile' guidxinm naya loj xin tia' laam, zian r nan guidxin 'n l jt loj Cristo naya sin dol. <sup>3</sup> Per rdxeban chu' b n gusquiee l jt zi'c basquiee b el Eva, abi' ad z jntridi xgab guidib luxdoodi xcwent Jesucrist. <sup>4</sup> Din chi ri't ben ren r man diidx lojdi xcwent Cristo, per garen guial zi'c ma bal  n l jt, o chi ri't b n ren r man diidx lojdi xcwent Sprijt, per ad lasa't xSprijt Dios b n ma nabann di, o chi ri't ben ren lojdi naman xhienaag din gapidi perdon, per garen guial loj ni ma ranan lojdi, l jt laa ridxga' gajquidi laa reeman. <sup>5</sup> Per naj rul   achet ryaadxan delant loj ree b n r b laa reeman naj quijb xi ap stoles Jes s. <sup>6</sup> Din majsi achet sirv naj par ganen, per ad ryaadxtan gualrignia' abi' l jt ragbee guial diidxlin por gra ni ma baguiaadi baguieenan.

<sup>7</sup> Per,  chuj ni ni malan benan ya guial ad bentan benro' lojdi persi benan gan gojquidi xbejn Cristo, n  guial ad baquijxtan l jt chi basidan l jt xtiidx Dios? <sup>8</sup> Ben renli ree b n naj ree xbejn Cristo cwa'n xmilia reeman persi beenan naj yudar la'tgaj guzun con l jt persi basidan l jt xtiidx Dios. <sup>9</sup> Abi' chi guzun con l jt, chi biaadxan xhienin ad gunaabtan lojdi g  ndi naj yudar, b n Macedonia ree b n rliladx ree Jesucrist laa reeman bidn  ni biaadxan nadxel. Ad goct wanin lojdi guneedi xhienin par naj, ad yu' t et dxej ganin guial r jn naguiejn g  ndi naj yudar. <sup>10</sup> Zi'c najn xbejn Cristo rnin lojdi ni naj diidxli, guial niz Acaya Achutczzi zajc gudxoon guial chu' luxdon zagdxo guial gui n ni benan con l jt. <sup>11</sup> Abi'  chexc zeel benan zian con l jt?  Guial ad r ntan l jt ya? Per Dios ragbee guial d d r nan l jt.

<sup>12</sup> Abi' gusnuu g nan zi'c cay nan xt yandxej guial ad zanaabtczan lojdi g  ndi naj yudar, din chit   xhie guiniee ree b n ruladx guilies xvalor gajc guial naj reeman xbejn Jes s guial zi'cgajc cayguieenan cay jn reeman. <sup>13</sup> Din laa reeman r bzi reeman guial naj reeman xi ap stoles Jes s, rusquieezi reeman bejn ree r jnzi reeman zi'c rul   naj reeman xi ap stoles Jes s. <sup>14</sup> Per xt ni'quid radxat loj bejn por zian, din xt xindxab zile' gul  loj loj bejn zi'c tijb xianjl Dios. <sup>15</sup> Dxel xt ni'quid radxat loj bejn guial b n ni cay jn ree xmandad xindxab r b reeman guial laa reeman cay jn xmandad Dios. Per laa reeman zayal reeman casti ni rayal reeman por ni cay jn reeman.

### *Tarbijw ni gud d Pab guial najman xi ap stol Jesucrist*

<sup>16</sup> Yan canin lëjt stijb: Ad naladxidi guial ad nadëdguientan, per bal rüjndi xgab zian gol basa'n za naj ganen zi'c tijb bën ad nadëdguient din nëgajc naj gales da valoran majsi tilda'nzi. <sup>17</sup> Ad nat Dios guial gales da valoran zi'c cayünan, per gales da valoran zi'c tijb bën ad nadëdguient. <sup>18</sup> Zi'c yu' zien ree bën rlies xvalor gajc por ni rüjn reeman loj guidxliuj guie, yan ziangajc naj gales da valor gajcan. <sup>19</sup> Din guial najdi bën rignia' ad nawëëgt naj taandi bën ad nadëdguient ree. <sup>20</sup> Rdaandi bën rniabee ree lëjt rüjn reeman zi'ctzi rën reeman, rdaandi bën rtia' ree ni rajpidi, bën rusquiee ree lëjt, o rniee reeman lojdi ganax ree diidx nabë abi' xt rtiëjbidi rëéz reeman ro'di. <sup>21</sup> Majsi natu'n par naj, per naj rni lojdi guial ad baya'ptan valor guial naguieennë'n lëjt zian.

Per bal rlies xvalor reeman por xhiedxitzinin, nëgajc naj zajc gales da valoran. Canen lojdi zi'c tijb bën ad nadëdguient, din ad xnejztan. <sup>22</sup> Per bal na reeman guial naj reeman bën Hebreo, nëgajc naj naj bën Hebreo. Bal na reeman guial naj reeman bën Israel, ziangajc naj bën Israel gajc naj. Bal na reeman guial loj xdiaa Abraham zëëd reeman, nëgajc naj zial loj xdiaa Abraham. <sup>23</sup> Abi' bal na reeman guial xmandad Cristo cayüjn reeman, naj mazri cayünan xmandadaman. Majsi zi'c rniee bën ad nadëdguient rnien chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguiib guial loj reeman, mazri ma gudijn ree bejn naj guial loj reeman abi' mazri zien volt ma guzun loj gualgüjt. <sup>24</sup> Gaay volt ma gudijn ree bën Israel naj, abi' beegaj gudijn reeman naj zi'ctiubitap volt rugaz reeman duu ladan. <sup>25</sup> Choon volt gudijn reeman naj con yag, abi' tib volt bacaaguij reeman naj. Choon volt ma wej barcw lod za'n xan nijsdoo, abi' tibdxej tibguiaal baya'n nan loj nijsdoo. <sup>26</sup> Guidibczi lod ma wan, gudëëdan loj ree ni nadxeb chi gudëëdan loj ree guiw, loj ree bëngubaan, loj ree bën ladxan bën Israel ree në loj ree bën ad najt bën Israel. Ma gudëëd tëen loj ree ni nadxeb luguiedx ree, dajn ree, loj nijsdoo, në loj ree bën rusquiee na reeman guial naj reeman xbejn Cristo. <sup>27</sup> Dád ma guzaagdiajn. Dád zien volt ma gulën bacaal, ma gulaanan, ma we'can nijs, abi' ma guyu dxej ni achetczi gudawan. Ma gognajlan, ma biaadx tëë da xaban.

<sup>28</sup> Abi' ad laatzanan ma guza'can, zien ree ni ma guza'can. Abi' guixie guixie rünan xgab por ree xbejn Cristo bën zojb ree niz lod ma wan. <sup>29</sup> Bal xhie cazajc tijb ree bën rliladx Jesucrist, cayünan xgab por laaman. Abi' bal cusquiee reeman tijb ree bën rliladx Jesucrist par güünman dol, dád ralenan yu' tëen laaman xgab. <sup>30</sup> Bal rüjn naguiejn gales da valor gajcan, tijbzi ni ganin por naj, naj por gualrzagdiaj ni ma gudëëdan. <sup>31</sup> Abi' Dios xDad Dad Jesucrist, laaman bën rayal respejt guidib tiamp, laaman ragbee guial diidxli naj ni canen. <sup>32</sup> Tiamp chi canabee rey Aretas, wan luguiedx Damasco dxel gunabee gobernador luguiedx guin biaaw nejz par guiniaaz reeman naj. <sup>33</sup> Per guyu ree bën ni badxe' naj lën tijb dxüm abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

## 12

### *Ni balüüloj lon*

<sup>1</sup> Achet rüjn bejn gan guial guilies xvalor gajcaman, per rayal ganin lojdi por ree ni balüüloj lon në ree ni balüü Dad Jesucrist naj. <sup>2</sup> Naj nünbee tijb xinguaaw rliladx Jesucrist, ma gojc chidaj ijz wejx xanyabaa lod zojb Dios. Ad ragbeetan bal binë xcuerpix o xsprijtzix wej, ad ragbeetan, tijbzi Dios ragbee. <sup>3</sup> Bal binë xcuerpix o xsprijtzix wej, ad ragbeetan, tijbzi Dios ragbee. Per naj ragbee <sup>4</sup> guial wejx lod zojb Dios, lod biguiejnx diidx ni xt ni'quid radxejlt xhienaag ninieex laan guial ad rayalt gagbee gra bejn laan. <sup>5</sup> Bën zii zajc galesan xvalor, per ad rliestan da valor gajcan, ni rnizan por naj por ree gualrzagdiaj ni ma gudëëdan. <sup>6</sup> Abi' majsi gales da valoran, ad cayüntan zi'c tijb bën ad nadëdguient din ganax ni diidxli naj ni ganin. Per ad rüntan zian chitëë yadxalaj bejn naj mazri guial loj ni rayal por ni ruguiaa reeman rünan, o por ni riguiejn reeman rnien.

<sup>7</sup> Në par chitëë gales da valoran zro' por gra ni ma balüü Dios naj, cadëëdan tijb gualzi ni naj zi'cgajc zi'c chi yu' tijb guiëjch tiblajt bejn. Laan naj xchiin xindxab par güünnaax

naj chitëë gales da valoran. <sup>8</sup> Choon volt ma canaaban loj Dios din chiquiedaman guialzi ni cadëëdan, <sup>9</sup> per laaman na lon: “Zi'c rënan lüj achet gac, din mazri rguien da guialrniabeen chi cazagdiaj bejn.” Zeel rabaan por ree guialrzagdiaj ni cadëëdan din guiguien guial naban con xguialrniabee Cristo. <sup>10</sup> Rabaan por xhietëëz guialrzagdiaj ni cadëëdan, o në chi rnieeguijdx bejn naj, o chi ryaadxan xhienin, o chi xhie rüjn bejn naj, në gra ree tarbajw ni cadëëdan, guial cadëëdan laan guial rënan Cristo. Din chi cazaagdiajn dxel mazri ra'pan xyudar Cristo.

*Yu' Pab xgab por ree bën rliladx Cristo luguiedx Corinto*

<sup>11</sup> Gunenë'n lëjt por naj gajc zi'c tijb bën ad nadëdguient, per lëjt rajp dol guial benan zian. Din lëjt naj bën rayal guilies da valoran delant loj ree bën ni rëb guial laa reeman naj quijb xi apóstoles Jesucrist. Din majsi tijbzi bën ad rüjnt sirv naj, per achet ryaadxan delant loj reeman. <sup>12</sup> Chi guzun con lëjt ad balenya'tan guial gūnan milagr ree në gra los demazri ree ni badxaloidi ni benan në graloj ree ni benan ni been sirv zi'c sen guial diidxli najn xi apóstol Jesucrist. <sup>13</sup> Gra zi'c ma benan con gra ree compniar rliladx Jesucrist lod ma wan, ma benan laan con lëjt. Tijbzi ni ad bentan con lëjt naj guial ad rnitān lojdi guial gūūndi naj yudar con gra ni ryaadxan la'tgaj guzun con lëjt, per bal guneguijdxan lëjt por zian ¡Gol been naj perdon!

<sup>14</sup> Yan ma cayūnan xgab guidganān lëjt stijb, laan naj ni yayon volt guidganān lëjt. Abi' ni'qui yan ad zanitan lojdi guial gūūndi naj yudar, ad ni rajptidi rënan, lëjt naj bën rënan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman. <sup>15</sup> Abi' majsi gra ni ra'pan gūnan gaxt, o majsi yadib da cuerpan par gūnan lëjt yudar, per achet gūūnan. Majsi rulūū chi mazri rënan lëjt, ta'nzi rëndi naj.

<sup>16</sup> Walican guial ad gunaabtan lojdi niagnëdi naj nuneedi xhienin, per yu' ree bën rëb guial benan zian din nasinan par gusquien lëjt. <sup>17</sup> ¿Wen basquieen lëjt ya chi guxhalan bën bidganaj ree lëjt? <sup>18</sup> Në chi rën loj Tito guial gui'taman guidganajman lëjt abi' guxhalan laaman con stijb dux compniar ree bën rliladx Jesucrist, ¿wen yu' ni basquiee Tito lojdi ya? ¿Nid zi'c laaman zi'c naj tiblojzi naj xgab raguieenan ya abi' zi'cgajc rūnan rüjnman?

<sup>19</sup> Por gra ni ma ranan lojdi, ad naladxidi guial caylaj dunuj gajcan, din achet waguieenan lëjt. Dios ragbee guial zi'c nayajcan xbejn Cristo cayneenë'n lëjt, abi' gra ni caynan lojdi najn par yaguieenan lëjt yudar chinalidi xnejz Dios guial rayënan lëjt. <sup>20</sup> Din rdxeban guial chi guialan guidganān lëjt ad zadxaaglojtan lëjt zi'c rënan, abi' lëjt ad zuguiatidi naj zi'c rëndi guguiādi naj. Rdxeban gadxaaglojn lëjt con wadijl, guialnadëdloj, guialrdxe'ch, guialrlies xvalor gajc, guialrniee guijdx lasa', guial ruza't bejn, guial rüjn benro' në guial ad nadxagri lasa'di. <sup>21</sup> Rdxeb tēen guial chi guidganān lëjt stijb abi' yaya'nxtun por lëjt delant loj Dios. Abi' dād chu' naya luxdon por zien ree lasa'di bën ad rbëzt ree rüjn dol, bën ad rayüjnt ree xgab zi'c naban reeman. Ad rucwëëzt rzunë reeman bën ad najt lacheel reeman, ad rucwëëz tēet reeman vijs ni rajp reeman o stijb ree ni ad rüjnt sirv ni rüjn reeman.

## 13

*Diidx bigra bacaa Pab loj gui'ch guie*

<sup>1</sup> Yan ni yayon volt guidganān lëjt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi. <sup>2</sup> Abi' zi'c rën loj ree bën ni cayūjn dol chi bialan bidganān lëjt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganān lëjt stijb, achetzi ni tēd zezi par ree bën ni cayūjn dol. <sup>3</sup> Zian gagbeedi ni rëndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par gūūnman zi'c rayal gūūnman con lëjt abi' con lëjt culūū xguialrniabeeman ni rajpaman. <sup>4</sup> Walican güjt Jesucrist loj crüjz zi'c tijb bën ad rajpt guialrniabee, per yan nabanman por xguialrniabee Dios. Abi' zi'c güjtaman zi'c tijb bën ad rajpt guialrniabee ziangajc dunuj ree rulūū ad

raya'pt ree guialrniabee, per zi'c nayajcan xbejn Cristo raya'pan xguialrniabee Dios par yaguieenan ni rayal yaguieenan con lëjt.

<sup>5</sup> Lëjt gajc gol been xgab bal walidi rliladxidi Jesucrist. Lëjt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman. <sup>6</sup> Balzianclaa gagbeedi guial dunujn diidxli raliduladxan laaman. <sup>7</sup> Abi' rarejdxan Dios por lëjt chitëë güüнди ni mal, ad par yaya'ntan zagdxе delant loj ree bejn, cayguieenan zian par güüнди ni naj zagdxе, majsi par ree bejn ad cayguieentan zi'c rayal. <sup>8</sup> Per ad zajct yaguieenan tibladi ni naj diidxli, dunujn caynazan ni naj diidxli. <sup>9</sup> Zeel yu' du luxdooon nix achet güüunan ni cayza'ctzan din chile' sudxi'chidi loj ni rliladxidi. Abi' rarejdxan Dios din gagbeedi guidiblagaa xhienaag guibandi xnejz. <sup>10</sup> Abi' caxhalan gui'ch guie lojdi dxelri guidganan lëjt, din chi guialan guidganan lëjt ad ryaadxt gadilë'n lëjt por guialrniabee ni banee Dad Jesucrist lon, guialrniabee ni baneeman lon par günan lëjt yudar chignia'di mazri zagdxе xnejz Dios, ad par gunijttan lëjt.

<sup>11</sup> Yan compniar raliduladx ree Jesucrist par guloxan gui'ch guie, naj rni lëjt: Gol badxe' luxdoodi zagdxе, gol been naguiejn gol gubajn zi'c rayal, gol bagu' luxdoodi gol gubajn tëë zagdxе, gol babe'cdxe luxdoodi con ree xcompniaridi. Abi' Dios bën rën dunuj ree rabe'cdxe tëëman du luxdoo ree laaman gagnë lëjt. <sup>12</sup> Xhietëëz hor ni radxaag ree xcompniaridi, gol bagajpdioz lasa'di zi'c rayal. <sup>13</sup> Gra ree dux compniar ree bën rliladx ree Jesucrist niz guie rugajpdioz reeman lëjt.

<sup>14</sup> Dad Jesucrist güünle' gradi, guial rën Dios lëjt abi' xSprijtaman gagnë lëjt zianczi. Amén.

## Gui'ch ni guxhaal San Pabl loj ree b́en Galacia rliladx Jesucrist

### *Rugajpdioz San Pabl b́en rliladx ree Jesucrist*

<sup>1</sup> Naj Pab najn apóstol, per ad b́enguidxliujt bacaabee naj ad laa t́eet reeman guxhaal naj, najn apóstol por Jesucrist ńe por dux Dad ree Dios b́en basban laaman loj guialgújt. <sup>2</sup> Gra ree dux compniar ree b́en za' ree guie con naj ragajpdiozan ĺejt najdi b́en rliladx Jesucrist niz Galacia. <sup>3</sup> Dux Dad ree Dios ńe Dad Jesucrist ǵuunle' ĺejt yabe'cdxe t́eet reeman luxdoodi. <sup>4</sup> Jesucrist ǵujt por dux tol ree persi bab́eeman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios. <sup>5</sup> Zeel rayalczi yaya'p reeman respejt zianczi. Aḿen

### *Achetri diidx ren ni zajc yab́e dunuj ree loj dol*

<sup>6</sup> Dád radxalon guial dád cari cab́eéladxidi xtiidx Dios, abi' laaman guial ŕen Jesucrist ĺejt zeel gurejdxaman ĺejt. Per ĺejt diidx ren ma ridxga'di <sup>7</sup> abi' ni'quid xtiidx Diosan. Diidxliczi yu' ree b́en ŕen gagdxadi abi' ŕen reeman guxhaal reeman zi'c naj xtiidx Cristo. <sup>8</sup> Per bal yu' b́en rulúu ĺejt diidx ren ree guial loj ree diidx ni ma balún ĺejt par gaquidi perdon, laaman ma rayal xcasti Dios, majsi chut́eézni majsi naj gajc o majsi tijb xi anjl Dios. <sup>9</sup> Zi'c ma rnin ĺejt abi' yan ma rninan zatijb: Bal chu rulúu ĺejt diidx ren ree guial loj xtiidx Cristo ni ma bililadxidi, laaman ma rayal xcasti Dios.

<sup>10</sup> Ad raguiltan mod guial yaya'nan zagdxre loj ree b́enguidxliuj, ŕunan naguiejn din yaya'nan zagdxre loj Dios. Din bal ǵunan naguiejn yaya'nan zagdxre loj ree b́enguidxliuj dxel ad cuzobtran xtiidx Cristo.

### *Xhienaag gojc zeel gojc Pab apóstol*

<sup>11</sup> Compniar raliduladx ree Jesucrist, ŕenan gagbeedi guial xtiidx Cristo ni ma balún ĺejt ad b́enguidxliujt guléeguijc laan. <sup>12</sup> Abi' ad cwa'tanan ad basid t́eetan laan por b́enguidxliuj, Jesucrist gajc naj b́en balúu laan naj.

<sup>13</sup> Ĺejt ma biguiejn guial chi guyu'n loj xreligion ree b́en Israel, guzunaalan b́en rliladx ree xtiidx Dios din ǵunan laa reeman ni mal abi' benan naguiejn din gusa'n ni rliladx reeman. <sup>14</sup> Abi' naj mazri guzudxi'chan loj religion guin guial loj ree lasa' zidńe'n tijbzi guial benan naguiejn benan gra ree xcostumbr ree dux b́engulalan. <sup>15</sup> Per guial ŕen Dios naj, diidx chi gadan guial loj guidxliuj mal gulejman naj. Dxel chi beenman xgab. <sup>16</sup> Balúuloj xi'nman lon din gatiechan xtiidxza'caman loj ree b́en ad najt b́en Israel. Abi' chi goc zian achut loj bignabdiidxan, <sup>17</sup> ad watan Jerusalén nignan b́en ma naj ree xi apóstoles Jesús gocli diidx chi gadan gac xi apóstol Jesús, laa wa gajcan niz Arabia dxel baye'can niz Damasco stijb.

<sup>18</sup> Chi goc choon iz dxel wan Jerusalén persi benbeen Béd abi' guzun con laaman chiin gubijdx. <sup>19</sup> Per achut apóstol ren baguiaan tijbzi Jacob bijch Dad Jesucrist. <sup>20</sup> Gra ni canin ĺejt naj diidxli abi' Dios ragbeechaaw guial ad rusquieetan.

<sup>21</sup> Dxelri wan niz Siria ńe niz Silicia. <sup>22</sup> Per ree b́en rliladx Cristo, b́en zojb ree niz Judea ad wayúnbeet reeman naj nadxel. <sup>23</sup> Rguiejnzi reeman ŕeb ree bejn: "B́en guzunal dunuj ree yalój par ǵuunman dunuj ree ni mal yan ma catie'chaman xtiidx Jesucrist, majsi yalój beenman naguiejn din yasa'n ree ni raliduladx ree Jesucrist." <sup>24</sup> Abi' rudéet reeman quixt́eet loj Dios guial ńe naj ma rliladx Cristo.

## 2

### *Bachajg Pab b́en naj ree apóstoles*

<sup>1</sup> Chi goc chidaj iz, dxel wan Jerusalén zatijb. Biné'n Bernabé con Tito, <sup>2</sup> din Dios na guial gan ni. Abi' Jerusalén guin badxaag dulasa'n tijb luar con ganax ree b́en rniabee loj ree xbejn Cristo persi bené'n laa reeman diidx por xtiidx Jesucrist ni culún b́en ad

najt ree b en Israel. Benan zian din ad r entan guial ni ma benan o ni cay unan gacan dxiin xlia'. <sup>3</sup> Per ni'qui Tito b en guzu ni con naj, majsi najman b en grieg ad beent reeman laaman naguiejn chu'man sen ni ru ree b en Israel. <sup>4</sup> Din guyu tio'p choon ree b en Israel been reeman zi'c rul  u naj reeman dux compnaran persi gojc bachajg reeman dunujn par gula'ch reeman conin ad raguieentran guial ma raliduladxan Jesucrist din gac nabee reeman dunujn yaguieenan zi'c rniabee ley. <sup>5</sup> Per ni'czi tibda'n ad bati ejbtan n ijn reeman dunujn gan, din ad ray entan cw eladxidi xtiidxli Jesucrist ni ma zinalidi.

<sup>6</sup> Abi' ree b en rniabee loj ree xbejn Jesucrist achetri na reeman lon guial rayal g unan, majsi chut  ez naj reeman din delant loj Dios tiblojzi naj bejn. <sup>7</sup> Luar ninia reeman xhie mazri n unan, laa gogbee gajc reeman guial Dios gulej naj din gatiechan xtiidxza'c Jesucrist loj ree b en ad najt b en Israel, zi'cgajc gulejman B ed din guitie'chaman diidxza'c guin ree loj ree b en Israel. <sup>8</sup> Abi' Dios b en bacaabee gajc B ed din gacaman ap stol loj ree b en Israel, laagajcaman bacaabee naj din gacan ap stol loj ree b en ad najt b en Israel.

<sup>9</sup> Zeel Jacob, B ed con Waj b en rniabee ree mazri loj ree b en rliladx Jesucrist, gogbee gajc reeman guial Dios naj b en banee naj guialrniabee guin. Abi' banee yaa reeman zi'c tijb sen guial ma nayajcan compniar guial ma za' t  e reeman conform guial naj con Bernab e yugl  un b en ad najt ree b en Israel, gui aad laa reeman gul  u reeman b en Israel ree. <sup>10</sup> Ni gunabzi reeman du lojn din yaguieenan yudar b enprob ree, abi' laan naj ni ruladxan g unan.

#### *Gudil e Pab B ed*

<sup>11</sup> Per chi we B ed guiedx Antioqu a, dxel gudil e'n laaman guial ad cay ujntaman zi'c rayal. <sup>12</sup> Guial yaloj gudawn eman b en ad najt ree b en Israel. Per chi bidxin ree b en guxhaal Jacob guiedx Antioqu a, dxel ad bachajgtraman b en ad najt ree b en Israel guial bidxebaman xhie ni ejb ree b en zinal ley. <sup>13</sup> N e los demazri ree b en Israel b en rliladx ree Jesucrist b en zojb ree ni n e reeman been zi'c been B ed abi' xt n e Bernab e been zian. <sup>14</sup> Zeel chi baguian guial ad cay ujnt reeman zi'c r eb loj xtiidxza'c Jesucrist, dxel r en loj B ed delant loj gra reeman: "L uj najl b en Israel abi' ad nabantil zi'c laa reeman,  chexc zeel r ijnl naguiejn guiban ree b en ad najt ree b en Israel zi'c naban ree b en Israel?"

#### *Guialrliladx Jes s rab e bejn loj dol*

<sup>15</sup> 'Dunuj ree nayajc ree b en Israel diizd chi bayajl ree abi' ad yu't dxej babajn ree sin xley Dios zi'c ree b en ad najt b en Israel. <sup>16</sup> Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rliladxaman Jesucrist. Zeel n e dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

<sup>17</sup> 'Yan bal cayguieen ree naguiejn yayajc ree naya delant loj Dios, laan rul  u dunuj ree guial nayajcqui ree b endol,  wen mazri b endol cay ujn Cristo dunuj ree ya?  Dunuj ree rayagbee guial ad ziantan! <sup>18</sup> Din bal ma basa'nan xley Moisejs, abi' yaye'can con ley guin zatijb dxel naj gajc cay un naj b endol. <sup>19</sup> Zeel ma basa'nan ley guin din gabajnan par Dios. <sup>20</sup> Abi' r unan cwent guial n e naj g ijt chi g it Cristo loj cr ujz dxel ad nabantri da xtijban, ma nabann e'n Cristo. Abi' yan zi'c naban, ma naban zi'c rliladxan Xi'n Dios, b en r en naj g ijt t  eman por naj. <sup>21</sup> Abi' ad r ntan tiblax guial r en Dios dunuj ree, din bal nile' niajc bejn naya niz loj Dios guial r ijn bejn zi'c rniabee xley Moisejs dxel achetri lasajc guial g ijt Cristo."

### 3

#### *Guialrliladx Jesucrist rquied dol*

<sup>1</sup>  B en Galacia, chexc zeel ad rad dguientidi!  Chu bascajy xquiarguiejndi? Awa chi bal un l jt, delant loj gradi bagojnan l jt par xhie g ijt Cristo loj cr ujz. <sup>2</sup> Yan r nzan gagbeen:  Nabann edi xSprijt Dios ya guial r jndi zi'c rniabee xley Moisejs o por guial rliladxidi xtiidx Jesucrist ni ma bacaagdiajguidi? <sup>3</sup> Xipxi nadidi zeel awa ma nabann edi



xSprijt Dios abi' yan naladxidi guial din yayaaloy gaquidi zi'c rën Dios rayal chinalidi ley. <sup>4</sup> ¿Wen achet lasajc guialrzagdiaj ni gudëdidi ya, o guzagdiaj xlia'zidi ya? <sup>5</sup> Chi runee Dios xSprijtaman lojdi abi' rünman milagr ree delant lojdi, ¿wen rünman zian ya por guial zinalidi xley Moisejs o por guial ma bililadxidi xtiidx Jesucrist ni ma bacaagdiajguidi?

<sup>6</sup> Gol basaaladx guial Abraham por guial bililadxaman Dios, been Dios laaman cwent zi'c tijb bén ad wayüjnt dol. <sup>7</sup> Zeel gol gogbee guial gra ree bén rliladx Dios, laa reeman naj zi'c xi'n Abraham. <sup>8</sup> Diizd gocli mal ragbee Dios guial majsi loj ree bén ad najt bén Israel yu' ree bén güünman cwent zi'c bén ad wayüjnt dol guial rliladx reeman laaman. Din tiblajt loj xtiidxaman rëb guial rëbaman loj Abraham: “Günle'n gra ree bénguidxliuj por lüj.” <sup>9</sup> Zeel rünle' Dios gra ree bén rliladx laaman zi'cgajc beenle'man Abraham guial bililadxaman laaman.

<sup>10</sup> Gra ree bén zinal xley Moisejs yu' casti par laa reeman din loj gajc libr ley guin rëb: “Bén ad zinalt güün gra zi'cgajczi rëb loj ley guin, yayalaman casti.” <sup>11</sup> Zeel rayagbee ree ad zile't gac bejn naya loj Dios por guial rünman zi'c rniabee ley. Din loj xtiidx Dios rëb: “Bén rliladx Dios rajpaman guialnaban delant lojman guial ma nünman laaman cwent sin dol.” <sup>12</sup> Per ley guin ad rniabtän chililadx bejn laan, loj libr ley guin rëb: “Bén güün zi'c gajczi rniabee ley, zajpaman guialnaban.”

<sup>13</sup> Jesucrist badxi'ca dunuj ree loj xmaldicion ley din laaman bayal casti ni rayal ree por ley guin, din loj libr ley guin rëb: “Ma zë maldicion guijc bén rëjt loj crüjz.” <sup>14</sup> Zian guzag Jesucrist par chile' güünle' Dios bén ad najt ree bén Israel, zi'c beenle'man Abraham. Abi' guial rliladx reeman Jesucrist zeel ma naban reeman con xSprijt Dios zi'c tal rëb Dios diizd guia'xchej.

#### *Xley Moisejs në xpromejs Dios*

<sup>15</sup> Yan compniar raliduladx ree Jesucrist ganin lëjt xhienaag rün ree bénguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa guijc ree diidx ni ca loj gui'ch guin. <sup>16</sup> Ziangajc gol gogbee, chi been Dios promejs guial güünle'man Abraham con xdiaaman, ad rëbt loj xtiidx Dios guial güünle'man “bén zëed ree” loj xdiaa Abraham. Ad rëbtän zien bejn, rëban tijbzi bejn, din laaman rëb günle'n “Bén zëed” loj xdiaaman. Abi' bén zëed loj xdiaaman laaman naj Cristo. <sup>17</sup> Abi' ni canin lëjt naj guial xley Moisejs bi'tän tajpgayuu gajlbichii ijz despuejs ni been Dios promejs con Abraham, zeel ad zajct guse'n ley guin promejs ni ma been Dios. <sup>18</sup> Din bal par yaca' ree ni rëb Dios loj Abraham rayal yaguieen ree zi'c rniabee ley, dxel ad promejstran. Per Dios bazaladx loj Abraham ni rëbaman por promejs ni beenman lojman.

<sup>19</sup> Wed zanabdiidxidi lon, ¿par xhieza rün ley guin sirv? Badëe Dios ley guin din gagbee bejn guial najman béndol, abi' been ley guin sirv xt dxej ni bi't bén zëed loj xdiaa Abraham zi'c tal been Dios promejs con laaman diizd guia'xchej. Bén naj ree xianjl Dios badëe ley guin loj Moisejs, abi' Moisejs badëed laan loj ree bejn. <sup>20</sup> Per chi been Dios promejs con Abraham achutczi badëed xtiidxaman, quijb laaman guneenë Abraham.

#### *Xhie sirv rün ley*

<sup>21</sup> Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalaman ley. Per ad ziantan <sup>22</sup> din loj xtiidx Dios rëb guial dol rniabee gra bejn din gra ree bén chililadx Jesucrist tia' reeman gra ni rëb Dios.

<sup>23</sup> Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn balëez ree guidoonloj guialrliladx Jesucrist. <sup>24</sup> Zeel par dunuj ree ley guin naj ni balüü dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din güünman dunuj ree cwent zi'c tijb bén ni ad wayüjnt dol guial raliduladx ree laaman. <sup>25</sup> Per yan guial ma raliduladx ree Jesucrist ad rüntri naguiejn gulüü ley guin dunuj ree.

<sup>26</sup> Din guial raliduladx ree Jesucrist ma nayajc ree xi'n Dios. <sup>27</sup> Abi' guial barobnijs ree por Jesucrist zeel ma nayajc ree tijbzi con laaman din ma nabajnnë' reeman. <sup>28</sup> Abi'

zi'c bén Israel zi'c bén ad najt bén Israel, zi'c bén naj zi'c bén nado' zi'c bén ad najt zi'c bén nado', zi'c xinguaaw zi'c béngunaa, par Cristo tiblojzi nayajc ree din ma nayajc ree tijbzi con laaman. <sup>29</sup> Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yalay ree ni rëb Dios loj Abraham diizd gulal.

## 4

<sup>1</sup> Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpax, zi'cgajc tijb mojs, majsi xieenx naj gra ni rajp xdadix. <sup>2</sup> Abi' yu' ree bén rajp laax yu' tée ree bén rniabee laax në ree ni rajpax, xt chi guidxin dxej ni rëb xdadix tia'x ni rayalix. <sup>3</sup> Ziangajc dunuj ree, zi'c tijb xindoo bayajc ree yalaj guial bunaaldxi'ch ree gra ree xcostumbr ree bénguidxliuj. <sup>4</sup> Abi' chi bidxin dxej gojc zi'c rëb Dios gac, guxhaal xi'nman Jesucrist loj guidxliuj guie, tijb bénguidxliuj gojc xniaaman. Abi' gubajnman zi'c rniabee ley ni basa'n Moisejs duloj ree <sup>5</sup> persi bile' babëëman dunuj ree loj ley guin bile' tée nayajc ree Xi'n Dios.

<sup>6</sup> Abi' guial nayajc ree xi'n Dios, guxhaalaman xSprijt Jesucrist persi nabajnnë' reeman, abi' por Sprijt guin raguie'ch ree: “jDux Dad ree Dios!” <sup>7</sup> Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

*Yu' Pab xgab por ree bén riladx Jesucrist*

<sup>8</sup> Yalaj chi gadidi güünbee quijb Dios, beendi sirv loj ree ni naladxidi naj Dios, per diidxli ad Diost reen. <sup>9</sup> Per yan guial ma nünbeedi Dios o guial ma nünbeeman lëjt, ¿chexc zeel rëndi yabi'di güüendi gralaj ni ad rüjnt sirv ni beendi yalaj? ¿Chexc zeel rëndi gaquidi zi'c bén nado' loj ree ni guin ree zatijb? <sup>10</sup> Abi' yan guial sta zinëdi cwent xhie dxej o xhie bëëw o xhie tiamp o xhie ijz naj ni zobjloj par lëjt par güüendi xhienin zi'c goc xcostumbridi. <sup>11</sup> Dád rdxeban por lëjt, doolgui basid xlia'zan lëjt.

<sup>12</sup> Zeel rniabaan lojdi compniar raliduladx ree Jesucrist, gol gubajn zi'c nabanen, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj <sup>13</sup> din lëjt ragbee guial yalaj chi basidan lëjt xtiidxza'c Jesucrist, ragxuun nadxel. <sup>14</sup> Per majsi zian, gudaandi naj. Ad beentidi naj tiblax ad gulëëladx tëëtidi naj, bidxga'di naj zi'c tijb xianjl Dios o zi'cgajc Jesucrist. <sup>15</sup> Naj ragbee guial bal zile'n xt guialojdi zajc cwëëdi par guneedan lon. Laadx yan, ¿conzan guial rabaanëdi naj? <sup>16</sup> ¿O al rdxe'chidi naj ya guial rnin ni naj diidxli lojdi?

<sup>17</sup> Rnin lojdi guial ree bén cayüjn naguiejn guial guidxga'di xtiidx reeman, ad zagdxet rën reeman lëjt, xixgab reeman naj din gusa'ndi ni basidan lëjt abi' mazri guidxga'di xtiidx reeman. <sup>18</sup> Ad ni malt naj guial guiën bejn lasa' bejnman, per par ni zagdxet zianczi, ad chi za'tzan con lëjt. <sup>19</sup> Par naj lëjt naj zi'c da xi'nman. Abi' cazaagdiajn por lëjt zatijb, zi'c rzagdiaj tijb béngunaa chi rajl xi'nman. Abi' gusnuu gazaagdiajn xt chi ma zinalidi Jesucrist diidxli zi'c rayal. <sup>20</sup> jBal zianclaa za'n con lëjt din ganenë'n quijb lëjt, per yan ad ragbeetan xhienaag günnë'n lëjt!

*Agar con Sara*

<sup>21</sup> Per gol guna, lëjt bén rën ree guiban zi'c rniabee ley. ¿Wen id wayignia'di ni rëb loj ley ya? <sup>22</sup> Loj ley rëb guial guyu tio'p xi'n Abraham: Guyu xi'nman con tijb béngunaa brii laj Agar bén goc xmojsaman, guyu tée stijb xi'nman con quijb xbéngunaaman bén brii laj Sara. <sup>23</sup> Xi'n Abraham con béngunaa goc xmojsaman, guyux guial bagaal Abraham laaman. Per xi'nman xin guyu con quijb xbéngunaaman guyux ad por guial bagaaltzi Abraham xbéngunaaman, në par gac cumplid promejs ni been Dios lojman. <sup>24</sup> Yan, Sara në Agar laa reeman naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni badëëd Dios loj Moisejs ruguia' Sinaí, abi' bén zinal ree ley guin naj reeman zi'c bén nado' loj ley guin zi'c goc Agar loj Abraham. <sup>25</sup> Lëjt ragbee guial niz Arabia naj guia' Sinaí, abi' ree bén niz ni rniee reeman guia' guin Agar. Per yan Jerusalén naj zi'c guia' guin, din gra ree bén zëëd niz Jerusalén, bén zinal ree ley, laa reeman naj zi'c bén nado' loj ley. <sup>26</sup> Per dunuj ree du ladx ree naj Jerusalén ni yu' xanyabaa abi' Jerusalén

guin ad najtan zi'c ni nado' loj ley guin zi'c ad gojct Sara loj Abraham. <sup>27</sup> Loj xtiidx Dios rëb:

Babaa béngunaa ni ad zajct chu' xi'n.

Babaa da't guial ad nünbeetil guialrzagdiaj  
ni rdëd béngunaa ni rajl xi'n.

Din bén ad rut xi'n, mazri zien xi'nman chu'  
guial loj bén ru xi'n.

<sup>28</sup> Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman. <sup>29</sup> Abi' lën ree dxejzii, xi'n Agar baze'x xi'n quijb xbéngunaa Abraham, ziangajc yan bén zinal ree ley ruze' reeman dunuj ree nabajnnë' ree xSprijt Dios, guial ma nayajc ree xi'n Dios, <sup>30</sup> Per, ¿xhie rëb loj xtiidx Dios? Rëban: “Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xbéngunaa.” <sup>31</sup> Zeel compniar raliduladx ree Jesucrist, dunuj ree ad nayajct ree zi'c xi'n bén naj zi'c bén nado' guin, nayajc ree zi'c xi'n quijb xbéngunaa Abraham guial ad rniabeet ley dunuj ree.

## 5

### *Gol guzujdxi'ch loj ni riladixidi xtiidx Dios*

<sup>1</sup> Cristo naj bén babëë dunuj ree loj ni rniabee ley dunuj ree. Zeel gol guzujdxi'ch, ad bal guibandi zatijb zi'c bén nado' guial güündi zi'c rniabee ley.

<sup>2</sup> Naj Pab rnin lëjt. Bal rudi sen zi'c rniabee ley, achet lasajc guial riladixidi Jesucrist. <sup>3</sup> Abi' rnin lëjt zatijb: Chutëëz bén ru sen guin rayal güünman zi'c tal rniabee ley. <sup>4</sup> Lëjt guial rüjndi xgab guial güündi zi'c rniabee ley ma najdi naya delant loj Dios, laan rën guiëb guial ad najtridi xbejn Cristo ad yu'guijc tëëtridi guial rën Dios lëjt. <sup>5</sup> Per dunuj ree por xSprijt Dios në guial raliduladx ree Jesucrist nadxu'guijc ree guial yadxin ree naya delant loj Dios. <sup>6</sup> Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrililadx guin zajc yabajn ree zagdxë yayën dulasa' ree. <sup>7</sup> Lëjt ma zëdi zagdxë. ¿Chu na lojdi guial ad zidxga'tidi ni naj diidxli? <sup>8</sup> Din xgab guin ad zëëdtan por Dios, bén gule lëjt. <sup>9</sup> Zeel gol gojp cudad “din con ta'nnijt zajc gusquiee reeman gradi.” <sup>10</sup> Per naj ra'pan Cristo confians guial ad zusa'ntidi ni basidan lëjt. Abi' Dios gudëëd casti bén cusquiee ree lëjt, majsi chutëëznin. <sup>11</sup> Bal rën guial rüjn naguiejn chu' ree bejn sen, ad zazunaltri ree bén Israel naj. Ziangajc bal guiën guial rayal chu' ree bejn sen, rën guiëban guial achet lasajc guial güjt Cristo loj crüjz. <sup>12</sup> Balzianclaa gra ree bén ruslen lëjt guial rayal chu'di sen, jmejorli gutüüg laagajc reeman tiblayaa!

<sup>13</sup> Din lëjt ma gulaadi loj ley, per ad guial ad rniabeetri ley lëjt din güündi ni rëntzidi, rayal guiëndi güün tëë yudar lasa'di. <sup>14</sup> Din con tijbzi mandamient ma been bejn gra zi'c rniabee xley Dios. Mandamient guin rëb: “Guyën ben ren zi'c rën lüj gajc.” <sup>15</sup> Per bal rdxe'ch lasa'di abi' rdilidi, gol gojp cudad chitëë zianzi la' lasa'di.

### *Guialnaban ni runee xSprijt Dios*

<sup>16</sup> Zeel rnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi. <sup>17</sup> Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi rënman. <sup>18</sup> Per bal xSprijt Dios naj bén rniabee lëjt dxel ad rniabeetri ley lëjt. <sup>19</sup> Yan laa rguien gajc con ree nin zëëd con xixgabzi ree bejn: Guialrzunë xinguaaaw ren o béngunaa ren, guialrüjn bejn nidxuudx, guialrajp bejn gadxagayaa vijs, <sup>20</sup> guial rën bejn graloy ni naladxaman naj Dios, guial rüjn bejn guialbidxaa, guialrdxe'ch lasa', guialrdil, guialrzëëbladx ni rajp bejn, guialralenya', guialrlies xvalor gajc, guialrlia' lasa' bejn, guial ru loj tibcwaa bejn o stib cwaaman, <sup>21</sup> guialrdëdloj, guialrugüjt bejn, guialrzüdx, guialnala në xhietëëz ni mal lasa' ree ni

guin. Rugojnan lëjt zi'cgajc ma rnin lojdi yaloj, bén cayüjn ree lasa' ree ni guin ad zayalt reeman lod rniabee Dios.

<sup>22</sup> Per ni zëäd por xSprijt Dios naj, guialrën lasa' bejn, guialrabaa, guialrga'dxe luxdoo, guial yu' pacens, guialnaxanladx, guial rajc naza'c, guial rüjn cumplid xtiidx, <sup>23</sup> guial rüjn naya, guialrniabee bejn xixgab mal gajcaman. Abi' ad yu't ley ni rudxoon guial güün bejn ni guin ree. <sup>24</sup> Abi' ree bén ma naj xbejn Cristo ma basa'n reeman gra dol, në gra ree ni mal ni rën reeman güün reeman din ma güjt Cristo por gra dol. <sup>25</sup> Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

<sup>26</sup> Ad yales dux valor gajc ree, ad yache'ch du lasa' ree, ad yadëdloj du lasa' ree.

## 6

### *Yaguieen du lasa' ree yudar*

<sup>1</sup> Compniar raliduladx ree Jesucrist, rnin lëjt, bal chu xcompniaridi rüjn dol gan, lëjt guial ma rajquidi mazri xtiidx Dios gol guneenëman con ganax ree diidxza'c, din rayal cu'guijquidi guial nëgajc lëjt zajc güün dol lëjt gan. <sup>2</sup> Gol gognë lasa'di loj xhietëez guialzi ni rdëdidi, zian ma cayüjndi ni rniabee Cristo güüнди.

<sup>3</sup> Bal yu' bén ni naladx guial rajcaman gra abi' achetci rajcaman, dxel laagajcaman cusquiee laaman. <sup>4</sup> Tijbgaj bejn rayal güün xgab bal nabancaman xnejz. Abi' bal nabanman xnejz, tijbzi laaman rayal yabaa luar güünman xgab guial nabanman zagdxe loj gra ree bejn. <sup>5</sup> Din tijbgaj dunuj ree rayal yaya'p ree xhienaag yabajn ree.

<sup>6</sup> Chutëez bén cusiid xtiidx Dios, rayal güünman yudar bén culüü laaman con ni ryaadxaman.

<sup>7</sup> Ad gusquiee lëjt gajc, din achut zajc guze' Dios. Ni rxübin bejn laagajcan yato'paman. <sup>8</sup> Bal nabanman zi'ctzi naj xixgabaman zadxin dxej yayalaman casti. Per bén naban zi'c rniabee xSprijt Dios, por Sprijt guin yayalaman guialnaban tiblyaa delant loj Dios. <sup>9</sup> Ad rayalt yadxag ree guial yaguieen ree ni zagdxe, din bal id zadxag ree chi guidxin dxej yaca' ree ni yayal ree. <sup>10</sup> Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree bén rliladx ree Jesucrist.

### *Xconsejw Pab*

<sup>11</sup> Gol baguiaa xi narooob ree lejtr ni cucan par lëjt con quijb yan. <sup>12</sup> Bén cayüjn ree naguiejn chu'di sen, rüjn reeman zian par yaya'n reeman zagdxe loj ree bejn luar sagdiaj reeman guial rliladx reeman Jesucrist. <sup>13</sup> Per ni'qui ree bén yu' sen guin ad rüjnt reeman gra zi'c rëb ley guin. Rënzi reeman chu'di sen guin din güün reeman nabë guial ma been reeman gan yu'di sen guin. <sup>14</sup> Per naj achet por ni günan nabë, tijbzi por guialgüjt Dad Jesucrist. Abi' guial güjtaman loj crüjz ma basa'nan gra ree ni mal yu' loj guidxliuj guie abi' ma güjtan par ree ni mal guin. <sup>15</sup> Din chi ma naj bejn tijbzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman. <sup>16</sup> Abi' ree bén ma zinal xnejz Cristo, Dios yaya laa reeman yabe'cdxe tëëman luxdoo reeman në gra ree bén diidxli naj xbejn Dios.

<sup>17</sup> Diizd yan ad rëntran chu guche'ch naj. Din dib ni ca ree ladan laa reen rulüü guial najn xiapóstol Jesucrist.

<sup>18</sup> Compniar raliduladx ree Jesucrist, dux Dad ree Jesucrist güünle' gradi. Amén.

## Gui'ch guxhaal San Pabl loj ree b n  feso rliladx Jesucrist

### *Rugajpdioz San Pabl b n  feso ree*

<sup>1</sup> Naj Pab, najn tijb xi ap stol Jesucrist por xguialrniabee Dios. Cuccan gui'ch guie par l jt guial diidxli zinalidi xtiidx Jesucrist, l jt guial ma najdi xbejn Dios luguiedx  feso. <sup>2</sup> Dux Dad ree Dios n  Dad Jesucrist g inle' l jt yabe'cdxe t e reeman luxdoodi.

### *R jnle' Dios b n rliladx ree Jesucrist*

<sup>3</sup> Quixt e Dios, xdad Dad Jesucrist, d d benza'c najman, guial yan ma nayajc ree tijbzi con Jesucrist, ma beenle'man dunuj ree diidz xanyabaa con graloj guialnaza'c din gac yunaal ree xtiidxaman. <sup>4</sup> Laaman bacaabee dunuj ree por Dad Jesucrist diidz chi gad guidxliuj gacchaaw din yabajn ree naya sin dol lojman. <sup>5</sup> Abi' guial r nman dunuj ree, diidz guia'xchej beenman guial yayajc ree xi'nman por Jesucrist zi'c beenman xgab gac. <sup>6</sup> Zeel ad racw ezt raza't ree Dios zagdx guial d d benza'c najman, ma beenle'man dunuj ree por Xi'nman Jesucrist, b n r nman, <sup>7</sup> b n ma gudijx por dunuj ree chi guxhie' xrejman, abi' ma gojc perdon dux tol ree guial d d r n Dios dunuj ree. <sup>8</sup> Zeel d d zro' guialrajc n  guialrignia' ma bazaladxaman duloj ree, <sup>9</sup> abi' ma bal uuman duloj ree xhienaag naj xixgabaman diidz gocli, zi'cgajczi ma beenman xgab gac. <sup>10</sup> Gui ad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa n  loj guidxliuj.

<sup>11</sup> N t e guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diidz guia'xchej, din laaman r jn gra zi'c r nman gac. <sup>12</sup> Abi' laaman ma been zian, din dunuj ree nayajc ree b n yaloj bililadx Jesucrist, yayajc ree b n guza't laaman zagdx por xguialrniabeeman. <sup>13</sup> N gajc l jt chi biguiejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c r b Dios guial guneman xSprijtaman, dxel yan guial ma nabann di laaman, laaman naj zi'c tijb sen ni rul u guial ma najdi par Dios. <sup>14</sup> Guial ma nabann  xSprijt Dios dunuj ree, yaca' ree ni r b Dios guneman chi ma bara xbejnman za' xanyabaa, din chit e yacw ez yaza't reeman zagdx por xguialrniabeeman.

### *Rniab Pab quiarguejn loj Dios*

<sup>15</sup> Abi' guial ragbeen rliladxidi Dad Jes s r n t edi los demazri ree b n naj xbejn Dios, <sup>16</sup> zeel ad rucw ezt rud n quixt e loj Dios por l jt, beegaj rbedx rniaaban laaman. <sup>17</sup> Laaman naj Dios rniabee diidz xanyabaa, xDad Dad Jesucrist. Rniaaban lojman yazaladxaman quiarguejn lojdi din chignia'di ni gul uuman lojdi gusnuu t e g inbeedi laaman mazri. <sup>18</sup> Rniaaban lojman din guixhialaman xquiarguejndi din chignia'di xhie r n gui b ni rb zidi diidz chi bacaabeeman l jt, chignia' t edi guial ni za'cdxoon narooob t e naj ni nagu'chaaw Dios par ree b n naj xbejnman. <sup>19</sup> Rniaab t en lojman guial gagbeedi guial d d narooob naj xguialrniabeeman ni cayagn  dunuj ree raliduladx reeman. Laagajc guialrniabee narooob guin bal u Dios <sup>20</sup> chi basbanman Jesucrist abi' gule'caman laaman xladbeeman xanyabaa <sup>21</sup> lod bad eman guialrniabee lojman ni mazri lasajc guial loj gra ree guialrniabee, n  loj gra guialguxtis n  loj gra gobiarn. Abi' mazri lasajc guialrniabee guin guial loj gra ree guialrniabee yu', n  ni qui chu'ri ree loj guidxliuj guie. <sup>22</sup> Dxel basa'n Dios gran loj Jesucrist, bacaabeeman laaman din nabeeman gra ree b n rliladx laaman. <sup>23</sup> Gui ad ree b n rliladx laaman, guidiblagaa nabann man laa reeman abi' bant ez guin za'man din laaman guidiblagaa rniabee.

<sup>1</sup> Gocli gojquidi zi'c bengüt loj Dios por ree ni mal në por ree dol <sup>2</sup> ni beendi guial binalidi nejz mal been tëëdi zi'ctzi rën xindxab güüнди, sprijtmal ni nabannë gajc ree bën ad ruzoobt xtiidx Dios. <sup>3</sup> Du gra ree ziangajc babajn ree guia'xchej. Baguieen ree zi'ctzi bayën ree, zi'ctzi goc dux xgab ree, abi' zi'cgajc rayal ree bën ad ruzoobt xtiidx Dios casti, ziangajc nayal ree casti. <sup>4</sup> Per guial raya da't Dios dunuj ree rën tëëman dunuj ree, <sup>5</sup> zeel majsi bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon. <sup>6</sup> Chi basbanman Jesucrist nëgajc dunuj ree basbanman abi' zi'c rulüü ma nadxu'në' ree Jesucrist xanyabaa. <sup>7</sup> Dios been zian din dxej zëëd ree guiguieen guial dád rënman dunuj ree, abi' benza'c tëë najman con dunuj ree por Jesucrist. <sup>8</sup> Guial naj Dios benza'c, zeel ma nayajc ree perdon, ad guial nayajct ree benza'c lojman. Por guial rliladx zëëd xperdon Dios. <sup>9</sup> Ni'quid por ni zagdxe ni ma baguieent ree zëëd perdon guin chitëë chu guilies xvalor gajc. <sup>10</sup> Por Dios nadxu' ree loj guidxliuj guie abi' por Jesucrist bachaaman mod babajn ree yaloj din yaguieen ree ni zagdxe zi'c beenman xgab yaguieen ree diizd gocli.

### *Tijbzi nayajc ree por Jesucrist*

<sup>11</sup> Zeel lëjt bën ad najt ree bën Israel, gol basaaladx xhienaag guzajquidi yaloj. Bën Israel ree gulëelaj lëjt bën ad yu't ree sen guial yu' reeman sen zi'c rniabee ley. <sup>12</sup> Tiamp zii ad beenbeetidi Jesucrist, ad gojctidi cwent loj ree bën Israel ad gojc tëëtidi cwent guial rayalidi ni rëb Dios gudëëman loj ree xbejnman. Contzi gubajndi achet gulëjzidi ad gubajnnë tëëtidi Dios. <sup>13</sup> Per yan guial ma rliladxidi Jesucrist, lëjt guial guzujdi zijt loj Dios, por xrejn Jesucrist ma bibiguidi lojman. <sup>14</sup> Din Jesucrist babe'cdxe du luxdoo ree. Laaman bisüd guialrdxe'ch ni rudxoon gac ree bën Israel tijbzi con ree bën ad najt bën Israel. <sup>15</sup> Abi' por xguialgüjt Jesucrist gulox gra ree costumbr rniabee xley ree bën Israel güün ree bejn, laaman been persi gojc ree bën Israel con ree bën ad najt bën Israel zi'c tijbzi guiedx cüb guial ma nayajc ree tijbzi con laaman. Zian babe'cdxeman luxdoo ree bejn. <sup>16</sup> Din por xguialgüjt Jesucrist loj crüjz ma gulox guialrdxe'ch lasa' ree bën Israel con ree bën ad najt bën Israel, abi' ma nadxu'në' ree Dios zagdxe guial ma nayajc ree tijbzi por Jesucrist. <sup>17</sup> Abi' laaman bidgagojn dugra ree, zi'c ree bën Israel zi'c ree bën ad najt bën Israel xhienaag yadxu'në' ree Dios zagdxe. <sup>18</sup> Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnnë' ree. <sup>19</sup> Zeel ad najtridi zi'c bën zëëd lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman. <sup>20</sup> Lëjt naj zi'c xze' tijb yu ni cayajc, guiáad ree xi apóstoles Jesús con ree bën badëë xtiidx Dios loj ree bejn, naj reeman zi'c xcimiant yu guin, guiáad Jesucrist naj zi'c guiaj zobjloj ni cayajcnë yu guin. <sup>21</sup> Abi' guial yagaj guzuloj cayajs yu guin, dxel cayë'pzi cayë'p ze' guin ni cayguie'ch ree najdi din yayajc ree tijbzi xyadoo Dios con Jesucrist. <sup>22</sup> Në yan guial ma najdi tijbzi con Jesucrist ma naj tëëdi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

## 3

### *Cwabee Pab din chigneeman xtiidxza'c Jesucrist*

<sup>1</sup> Por zianan yu'n ladxguiib, naj Pab guial cayünan sirv loj Jesucrist din günan yudar lëjt bën ad najt ree bën Israel. <sup>2</sup> Lëjt ragbee guial naj Dios benza'c zeel baneeman dxiin guin lon din günan lëjt yudar chignia'di xtiidxaman. <sup>3</sup> Abi' laaman balüü naj xhienaag naj xixgabaman diizd gulal, zi'cgajczi ma rnin lojdi diizd guia'xchej. <sup>4</sup> Chi goolidi laan, gagbeedi guial ma ragbeen xhienaag naj xixgab Dios par Jesucrist. <sup>5</sup> Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balüüman laan loj ree xi apóstoles Jesús në loj ree bën badëë xtiidx Dios loj ree bejn. <sup>6</sup> Abi' ni goc zi'c tijb ni naguie'ch par ree bejn naj guial por xtiidxza'c Jesucrist, në ree bën ad najt bën Israel ma rayal ni gudëë Dios loj ree bën Israel guial ma naj reeman tijbzi, dxel ziangajc ma nayab reeman loj promejs ni been Dios por Jesucrist.

<sup>7</sup> Naj cugojn xtiidxza'c Jesucrist loj ree bejn, ad guial rayalt gūnan dxiin guin. Guial naj Dios benza'c, zeel bazaladxaman guialrniabee lon par gūnan laaman sirv. <sup>8</sup> Naj naj bēn bigra bēn lasajc ta'nz loj gra ree xbejn Dios, per guial naj Dios benza'c, bacaabeeman naj din gūn diidx loj ree bēn ad najt bēn Israel xcwent xguialnaza'c narooob Jesucrist, <sup>9</sup> nē par gugojnan zagdxe gra reeman xhienaag naj xixgab Dios bēn been gra, xgab ni ad balūū gajtaman loj ree bejn. <sup>10</sup> Din yan zi'c naj ree bēn rliladx Jesucrist, gagbee gra ree bēn rajp guialrniabee xanyabaa guial gra lojczy guialrajc rajp Dios. <sup>11</sup> Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. <sup>12</sup> Nē guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman. <sup>13</sup> Zeel rnin lojdi ad runayadi por ree guialzi ni cadēēdan por lējt, din zagdxen par lējt.

#### *Dád rēn Jesucrist dunuj ree*

<sup>14</sup> Zeel ruzuxiban loj dux Dad ree Dios; <sup>15</sup> laaman naj Dad loj gra ni yu' loj guidxliuj nē xanyabaa. <sup>16</sup> Abi' rniaaban lojman por xguialrniabee narooobaman yazaladxaman lējt gojl nē guialrniabee por xSprijtaman dīn yayu luxdoodi, <sup>17</sup> guibannē tēēdi Jesucrist guial rliladxidi laaman. Din zian zi'c diidxli zinalidi zi'c rēn Jesucrist dunuj ree, <sup>18</sup> dxel ma zajc gagbeedi con los demazri ree compniar raliduladx ree laaman guial gudēdlaj abi' xt banczi naaloj zro' rēnman dunuj ree. <sup>19</sup> Zeel rniaaban loj Dios gagbeedi plact rēnman dunuj ree, guial mazri zro' najn guial loj ni raguieen ree xgab, abi' zian guidiblagaa guibannēdi Dios.

<sup>20</sup> Laaman, guial rajpaman guialrniabee par gūūnman mazri guial loj ni raguieen ree xgab o mazri guial loj ni ranaab ree lojman por xSprijtaman bēn nabajnnē' ree, <sup>21</sup> abi' rayal yaza't reeman zagdxe gra dxej nē gra tiamp por Jesucrist, dunuj ree guial raliduladx ree Jesucrist. Amén.

## 4

#### *Nayajc ree tijbzi por xSprijt Dios*

<sup>1</sup> Naj, yu'n ladxguiib guial cayūnan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree bēn ma naj ree xbejnman. <sup>2</sup> Gol gojc benza'c nē bēn naxanladx, gol gojp pacens gol gudaan tēē lasa'di guial rēn lasa'di. <sup>3</sup> Gol been naguiejn gusnuu gaquidi tijbzi con xyudar xSprijt Dios bēn rabe'cdxe du luxdoo ree par yayajc ree tijbzi. <sup>4</sup> Dunuj ree nayajc zi'c tijbzi cuerp, abi' dugra ree nabajnnē' xSprijt Dios, abi' zi'c ma nayajc ree xbejn Dios, ziangajc ralējz ree ni guneeman. <sup>5</sup> Tijbzi Dad, tijbzi guialrliladx nē tijbzi guialrirobnijs raya'p ree. <sup>6</sup> Din tijbzi Dios yu', bēn naj Dad par dugra ree, rniabeeman dugra ree, nabannēman dugra ree rūjn tēēman ujs dugra ree.

<sup>7</sup> Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree.

<sup>8</sup> Zianan zeel rēb loj xtiidx Dios:

Chi bayē'paman xanyabaa,

beenman gan loj gra guialrniabee,

abi' badēēdaman loj ree bejn ni rayal gūūn reeman.

<sup>9</sup> Abi', ¿xhie rēn guiēb lod rēb “bayē'paman”? Rēn guiēban bi'taman loj guidxliuj.

<sup>10</sup> Guiáad Jesucrist bēn bi't loj guidxliuj, laagajcaman naj bēn bayē'p xanyabaa persi canabeeman guidib guidxliuj nē xanyabaa. <sup>11</sup> Abi' ma badēēman loj ree bejn ni rayal gūūn reeman, yu' reeman bayal gac apóstoles, yu'za reeman bayal gac bēn rudēē xtiidx Dios loj ree bejn, yu' reeman bayal guitie'ch xtiidxaman, yu' tēē reeman bayal gudēē consejw gulūū tēē reeman bēn rliladx ree laaman. <sup>12</sup> Zian bacaabee Jesucrist bejn ree din gusiid los demazri ree bēn rliladx laaman, gac tēē gūūn reeman laaman sirv, gusnuu tēē gūūnbee reeman laaman, <sup>13</sup> xt yayaaloj yaliduladx ree yaguieenbee tēē ree Xi'n Dios guidiblagaa, din yayaaloj yayignia' ree xhienaag rayal yunaal ree Jesucrist. <sup>14</sup> Dxel ad zayajctri ree zi'c ree xindoo rliladx xhietēēznin, ad zayajctri ree zi'c tijb ni rnē bi niz ni niz guie por graloj ni rū ree bēn raguuil mod gusquiee ree bejn, <sup>15</sup> rayal yayēn du lasa'

ree, yadü ree diidx yunaal tää ree ni diidxli din gusnuu yayignia' ree yaguieen tää ree zi'c rën Jesucrist bën rniabee dunuj ree. <sup>16</sup> Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayën dulasa' ree por Jesucrist.

#### *Guialnaban cüb con Jesucrist*

<sup>17</sup> Yan por Jesucrist rnin lëjt: Ad bal guibanridi zi'c naban ree ben ad nünbeet Dios, din laa reeman naban zi'ctzi naj xixgab reeman, <sup>18</sup> nacay xquiargueijn reeman, ad rajpt reeman guialnaban rën Dios gap reeman, guial ad rignia't reeman ache tää naladx reeman. <sup>19</sup> Ma been luxdoo reeman gojl, ma gulëladx laagajc reeman abi' cusnuu cayüjn reeman graloj nidxuudx. <sup>20</sup> Per lëjt ad beenbeetidi Jesucrist din guibandi zian, <sup>21</sup> bal walidi ma bigueijndi xcwentaman bal wali täädi ma basiididi diidxli zëed por laaman. <sup>22</sup> Gol basa'n zi'c gubandi yaløj, din ruxhiinzi zi'c gubandi yaløj con xgabmal ni basquiee lëjt guial beendi zi'ctzi guyëndi. <sup>23</sup> Gol been naguieijn guidxaa xixgabidi guidiblagaa <sup>24</sup> din gaquidi zi'c tijb bencüb been Dios zi'c rënman, con tijb guialnaban naya në zi'c rayal por xdiidxliman ni ma bigueijndi. <sup>25</sup> Zeel ad bal rnieeridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist. <sup>26</sup> Bal rdxe'chidi, ad güüнди dol. Ad gudxe' guialrdxe'ch guin luxdoodi dëchej, <sup>27</sup> chitëe tiëbidi güün xindxab lëjt gan. <sup>28</sup> Bén rban, rayal gucwëez cwanman abi' güünman dxiin, din con dxiin zagdxe güünman dxel ma rajpaman con xhie güünman yudar bën ryaadx ree xhienin. <sup>29</sup> Ad rniee täädi diidxguijdx, gol gunee ganax diidxzagdxe ni güün yudar chignia' ree ben ren bën gucaagdiajg ree laan din güünan laa reeman sirv. <sup>30</sup> Ad rgu'nayadi xSprijt Dios, bën ma nabannëdi zi'c tijb sen guial ma najdi xbejnman par dxej ni guidxindi lojman. <sup>31</sup> Gol basa'n tiblad gra guialralenya', guialrdxe'ch, guialralen lasa', guialrguidxa'në lasa', guialrniee diidxguijdx loj lasa' në graloj ni mal. <sup>32</sup> Gol gojc benza'c, gol baya lasa'di gol been tää lasa'di perdon zi'c been Dios lëjt perdon por Jesucrist.

## 5

#### *Zi'c rayal guiban ree Xi'n Dios*

<sup>1</sup> Zi'c ma najdi xi'n Dios bën rënman, gol been naguieijn güüнди zi'c laaman. <sup>2</sup> Gol gubajn zagdxe, gol guyën lasa'di zi'c guyën Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

<sup>3</sup> Yan lëjt guial ma najdi xbejn Dios, ad rayalt guiniee loj lasa'di diidx dxuudx, ni'qui graloj ree ni ad rüjnt sirv ad rzëëbladx täädi gra par lëjt. <sup>4</sup> Ad rnieedi diidxguijdx ree, diidxtont ree, diidx ni ad rayalt guinieedi din ad ni zagdxet reen. Mazri zagdxe gol badëe quixtëe loj Dios. <sup>5</sup> Din lëjt ma ragbee guial ree bën naban nadxuudx në ree bën rüjn ni ad rüjnt sirv, në ree bën rzëëbladx gap gra (mazri yu'guijc reeman ni guin ree luar guiën reeman Dios), dxel ad zile't chu' reeman lod rniabee Jesucrist con Dios. <sup>6</sup> Gol gojp cudad achu gusquiee lëjt con ree diidx ad rüjnt wen, din por ree ni guin zëed xcasti Dios par ree bën ad ruzoobt diidx. <sup>7</sup> Zeel ad güüнди zi'c rüjn reeman.

<sup>8</sup> Gocli gubajndi zi'c tijb bën nayaaw xquiargueijn, per yan guial ma najdi tijbzi con Jesucrist, laaman naj biani par lëjt. Zeel gol gubajn zi'c ree bën ma zinal biani guin, <sup>9</sup> din guial chinal bejn biani guin ma zile' güünman ni zagdxe zi'c rayal, në ni naj diidxli. <sup>10</sup> Gol been naguieijn gol been zi'c ruladx Dios. <sup>11</sup> Ad në lëjt güün ni ad rüjnt ree sirv ni rüjn ree bën nayaaw xquiargueijn, gol guneenë reeman din gagbee reeman ni rüjn reeman. <sup>12</sup> Din xt ratu bejn güman ni rüjn reeman ralan. <sup>13</sup> Per por xtiidx Jesucrist laa gagbee gajc reeman xhienin rüjn reeman. <sup>14</sup> Din zianan zeel rëb loj xtiidx Dios:

Batie'ch xbaaalil, lüj guial zinalil nejz mal.

Bariica loj dol din gusni Jesucrist xquiargueijnl.

<sup>15</sup> Zeel gol gojp cudad xhienaag nabandi, ad gontzi guibandi, gol gubajn zi'c bën yu' xquiargueijn. <sup>16</sup> Gol been naguieijn guibandi zi'c rayal naga yu' tiamp, din lën ree dxej



guie ad xnejztri naban bejn. <sup>17</sup> Zeel ad gontzi nabandi zi'c naj xixgabidi, gol beenli naguiejn chignia'di xhienaag rën Dios guibandi. <sup>18</sup> Ad südxidi, din guialrzüdx guin ruxhiin bejn. Zagdxeli gol cwëjb nabee xSprijt Dios luxdoodi guidiblagaa. <sup>19</sup> Chi rünë lasa'di diidx, gol baza't ni ca loj ree salmos, loj ree himno, në gra loj ree cant ni naj par Dios. Abi' guidib luxdoodi gol biil gol baza't tëë Dios zagdxe. <sup>20</sup> Abi' guixie guixie gol badëed quixtëë loj dux Dad ree Dios por Dad Jesucrist por gra ni rüjnman par dunuj ree.

### *Zi'c rayal guibannë lasa' ree bén rliladx Jesucrist*

<sup>21</sup> Gol bazoob xtiidx lasa'di por respejt ni rajpidi Jesucrist. <sup>22</sup> Në lëjt béngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. <sup>23</sup> Din xinguaaaw ree rniabee lacheel zi'c rniabee Jesucrist bén rliladx ree laaman, bén babëë laa reeman loj dol abi' naj reeman xbejnman. <sup>24</sup> Abi' zi'c ruzoob ree bén rliladx Jesucrist xtiidxaman, ziangajc ree béngunaa rayal guzoob xtiidx lacheel reeman. <sup>25</sup> Négajc lëjt xinguaaaw nuxhliaa ree, gol guyën lacheelidi zi'c rën Jesucrist bén rliladx ree laaman, abi' xt güjtaman por laa reeman <sup>26</sup> persi bisüdaman xtol reeman, basiaman laa reeman por xtiidxaman në por guialrirobnijs, <sup>27</sup> din guidxin reeman lojman nix da't në ni'qui tijb ni mal, sin falt o dol ren ree, guidxin reeman lojman nayadxuj sin dol. <sup>28</sup> Yan ziangajc ree xinguaaaw baxhliaa, rayal guiën lacheel reex zi'c rën laagajc reex. Abi' xin rën lacheel, laa gajquixan rën. <sup>29</sup> Din ni'qui tijb bejn ad rdx'e'cht laagajcaman, ruyaanli laagajcaman rnijachi' tëë laagajcaman zi'c rüjnnë Jesucrist dunuj ree nayajc ree bén rliladx laaman <sup>30</sup> guial nayajc ree tijbzi con laaman. <sup>31</sup> Zeel zi'c rëb loj xtiidx Dios: “Xinguaaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn.” <sup>32</sup> Dád nawëëg naj par chignia' bejn diidx guie ree, per caninan din zian naj Jesucrist con ree xbejnman. <sup>33</sup> Yan, xinguaaaw ree, gol guyën lacheelidi zi'c rën lëjt gajc. Guíaad lëjt béngunaa, gol gojp respejt lacheelidi.

## 6

<sup>1</sup> Në lëjt najdi xi'n, guial zinalidi Jesucrist, gol bazoob xtiidx ree xdadidi, din zian rayal güüнди. <sup>2</sup> Abi' mandamient yaloj ni rëb guial yu' ni yaca' ree bal yaguieen ree ni rëb: “Gojp respejt xdad xniaal, <sup>3</sup> din guibanl zagdxe guiban tëël xchej loj guidxliuj guie.” <sup>4</sup> Négajc lëjt dad na ad gusagdiaj xi'ndi chitëë guidxe'ch reex por zian. Mejorli gol basni's reex zagdxe, gol guneenë reex gol balüü tëë reex zi'c rën Dios. <sup>5</sup> Në lëjt bén rüjn ree xchiin bejn, gol bazoob xtiidx bén naj xpatrondi loj guidxliuj guie. Con guidib luxdoodi gol gojp respejt gol bazoob tëë xtiidx reeman, gol gunaladx xchiin Jesucristan cayüjndi. <sup>6</sup> Gol been reeman sirv ad chi ruguiaatzi reeman lëjt par yaya'ndi zagdxe loj reeman, gol gunaladx guial Jesucristan cayüjndi sirv guial diidxli cayüjndi zi'c rën Dios güüнди. <sup>7</sup> Gol been dxiin con gan, gol gunaladx xchiin Jesucrist cayüjndi, ad xchiint bénguidxliuj. <sup>8</sup> Din lëjt ma ragbee guial tijbgaj bejn majsi bén rüjn xchiin bejn o bén ad rüjnt xchiin bejn, per gudëë Jesucrist ni rayalaman zi'ctzi naj ni zagdxe beenman. <sup>9</sup> Négajc lëjt bén naj ree patron, gol gojc benza'c con ree xmojsidi, ma gojczy rusagzidi laa reeman, din lëjt ragbee guial bén rniabee laa reeman në lëjt yu'man xanyabaa, abi' ad rbetaman loj bejn.

### *Gol guzudxi'ch loj ni rliladxidi*

<sup>10</sup> Rni tëën lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee narooaman. <sup>11</sup> Gol gojp lëjt gajc con xguialrniabee Dios din sudxi'chidi chitëë güün xindxab lëjt gan con ree ni rusquiee. <sup>12</sup> Din ad cayguieent ree naguiejn yaguieen ree gan loj tijb ni naj bëël në dxijt, caydijl ree con gra loj sprijtmal zi'c ree ni rajp guialrniabee, guialguxtis në gra loj xsprijt xindxab ni yu' ni canabee tëë loj guidxliuj guie. <sup>13</sup> Zeel gol gojp lëjt gajc con xguialrniabee Dios din chile' taandi xhietëëz loj guialzi gui't sudxi'ch tëëdi loj xhietëëz ni saquidi.

<sup>14</sup> Gol guzudxi'chcliza por ni diidxli ni ma ragbeedi, gol basnuu tëë zi'c rayal guibandi. <sup>15</sup> Gol guzusun par guinieedi xtiidxza'c Jesucrist din por laan yadxu' ree zagdxe con Dios. <sup>16</sup> Gol badxe'guijc tëë guial guialrliladx ni rajpidi naj ni ragnë lëjt loj gra ni zëed por

xindxab. <sup>17</sup> Nē ni been Dios perdon xtolidi, laan naj ni rutëë lëjt, guiáad xtiidxaman naj zi'c tijb espad ni runee xSprijt Dios lojdi. <sup>18</sup> Ad gucwëëz cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx tēëman por gra ree xbejnman. <sup>19</sup> Gol gurejdx gunab tēëman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidnë perdon. <sup>20</sup> Dios bacaabee naj par ganen xtiidxza'c aman, abi' por zian yu'n ladxguiib. Per gol gurejdx gunab Dios chitëë gadxeban gün xtiidxaman zi'c rayal günan.

*Diidx bigra ca ree loj gui'ch guie*

<sup>21</sup> Tíquico, tijb du lasa' ree bën rayën da't ree, abi' diidxli cayünman dunuj ree yudar cayguieen ree sirv Jesucrist, laaman gugojn lëjt gra xhienaag za'n xhie tēë cayünan, <sup>22</sup> din par zianczi caxhalan laaman din gugojnman lëjt xhienaag nadxu'n niz guie yagu' tēëman luxdoodi. <sup>23</sup> Rniaaban loj Dios guial gra ree bën rliladx Jesucrist, cwe'cdxeman luxdoo reeman guiën tēë lasa' reeman, chililadx tēë reeman laaman nē Dad Jesucrist, <sup>24</sup> güünle' tēëman gra ree bën wali rën Dad Jesucrist.

## Gui'ch guxhaal San Pabl loj ree b n Filipos rliladx Jesucrist

### *Rugajpdioz Pab b n rliladx ree Jesucrist*

<sup>1</sup> Naj Pab con Timoteo, raguieenan sirv loj Jesucrist. Caycaan gui'ch guie par l jt najdi b n rliladx Jesucrist luguiedx Filipos, n  par ree b n rniabee lojdi rul   t   reeman xtiidx Dios n  ree b n r jn yudar b n rliladx ree Jesucrist. <sup>2</sup> Dux Dad ree Dios n  Dad Jesucrist g  nle' l jt, yabe'cdxe t   reeman l jt.

### *Rbejdx rniab Pab Dios por ree b n rliladx Jesucrist*

<sup>3</sup> Zianczi chi rasaaladxan l jt, rud n quixt   loj da Dadan Dios. <sup>4</sup> Abi' zianczi chi rbedx rniaaban laaman d d nix ru luxdon, rbedx rniaaban laaman por gradi. <sup>5</sup> Din diizd dxej ni guzuloj rliladxidi Jesucrist dxe guzuloj raguieen ree tijbzi xgab par guire'ch xtiidxaman xt yan. <sup>6</sup> Ragbeechaawan guial diizd chi guzuloj rliladxidi xtiidx Dios, laaman cusnuu cayagn  l jt din gaquidi zi'c rayal xt dxej gui't Jesucrist stijb. <sup>7</sup> Najczi guial g nan xgab zian por gradi, din rusaaladxan l jt, zi'c chi yu'n ladxguiib ziangajc chi cul n conin naj diidxli xcwent Dios din tibloj cay jnle'man dunuj ree. <sup>8</sup> Dios ragbee guial d d rusaaladxan l jt guial r nan l jt zi'cgajczi r n Jesucrist l jt. <sup>9</sup> Rniaab t  n lojman din mazri gui n lasa'di, abi' guixie guixie gusnuu guixhialaman xquiarguiejndi din gagbeedi ni rayal g  ndi, <sup>10</sup> din chile' cwedi ni naj mazri zagdxe. Abi' zian guibandi naya sin dol niz loj Dios, chit   xhie naman contr l jt dxej ni gui't Dad Jesucrist stijb. <sup>11</sup> Abi' por laaman zajc guibandi zi'c r n Dios zi'c bal   Jesucrist l jt din gap ree bejn Dios mazri respejt guilies t   reeman xvaloraman.

### *Yabajn ree par Cristo*

<sup>12</sup> Compniar raliduladx ree Jesucrist, r nan gagbeedi guial graczi ni guza'can cay jn reen yudar persi care'ch xtiidxza'c Jesucrist. <sup>13</sup> Abi' yan, gra ree b n yu' l n palas n  gra ree b n zojb niz guie ragbee reeman guial yu'n ladxguiib por guial najn xbejn Jesucrist. <sup>14</sup> Abi' chi baguiaa ree compniar raliladxn ' ree Jesucrist guial yu'n ladxguiib, mazri guzudxi'ch reeman abi' zien da't reeman guyu luxdoo guitie'ch reeman xtiidx Jesucrist sin gualrdxeb.

<sup>15</sup> Per diidxliczi yu' reeman rtie'ch xtiidx Jesucrist guial rd dloj reeman naj abi' r n reeman gac reeman mazri b n zojbloj. Per yu' reeman rtie'ch xtiidxaman guial naj xixgab reeman zagdxe. <sup>16</sup> Yu'za reeman guial r n reeman Jesucrist, catie'ch reeman xtiidxaman abi' ragbee reeman guial yu'n ladxguiib guial za'dxi'chn 'n xtiidxaman guial najcan diidxli. <sup>17</sup> Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri l n ladxguiib guie. <sup>18</sup> Per achet g  nan majsi zagdxe naj xixgab reeman o ad zagdxet ya, contzi ma catie'ch reeman xtiidx Jesucrist, laan naj ni rabaan 'n abi' mazri yabaan. <sup>19</sup> Din ragbeen guial yariin loj ni cad  dan guial cabejdx canabidi Dios por naj n  guial cayagn  xSprijt Jesucrist naj. <sup>20</sup> Naj ragbee guial ad yu't dxej guslaa Dios naj yaya'nxtun, sin gualrdxeb gul n bejn ree xhienaag ra'pan respejt Jesucrist majsi nabanen o majsi gui tan. <sup>21</sup> Din par naj la'tgaj nabanen cay nan laaman sirv, abi' bal gui tan mazri zagdxen din ma gazun con laaman. <sup>22</sup> Per bal gabajnran loj guidxliuj guie, gusnuu g nan sirv loj Cristo zi'c rayal, per ad ragbeetan conin naj zagdxe par naj. <sup>23</sup> Din loj grop ree ni guin d d naw  gan par gaben conin g nan, tijb r nan yaca' Dios naj din gazun con Cristo, laan naj mazri zagdxe par naj, <sup>24</sup> per por l jt r jn naguiejn gabajnran. <sup>25</sup> Abi' naj ragbeen guial gabajnran din g nan l jt yudar gusnuu chinalidi xnejz Dios, din chu' luxdoodi gusnuu chililadxidi Jesucrist. <sup>26</sup> Abi' chi guidganan l jt stijb, chu' ni yabaan di gud  t  di quixt   loj Jesucrist por ni beenman por naj.

<sup>27</sup> Per ganin l jt, gol been naguiejn gol gubajn zi'c rayal, zi'c r b loj xtiidx Jesucrist. Din bal guidganan l jt o bal id zialan, per r nan guiguiejnan guial za'dxi'chidi nadxag

tëe lasa'di abi' tiblojz cayüjndi naguiejn catie'chidi xtiidx Jesucrist. <sup>28</sup> Ad guidxebidi bën rdxe'ch lëjt. Zian guiguien guial ma canijt reeman loj Dios, per lëjt zian guiguien guial ma rajpidi perdon zëed loj Dios. <sup>29</sup> Din ad cwabeetidi par chililadxzidi Jesucrist, cwabeedi në par sagdiajdi por laaman. <sup>30</sup> Lëjt con naj tiblojz caydüüd ree tarbajw par yatie'ch ree xtiidx Jesucrist, ma baguiaadi xhienaag rdëedan tarbajw por xtiidxaman abi' yan caguiejndi guial cusnuu cayünan mazran.

## 2

### *Nadxag yadxu' ree por Jesucrist*

<sup>1</sup> Yan, zi'c ma yu' luxdoodi zagdxe por Cristo, zi'c ma yu' luxdoodi nix guial rusnuu rën lasa'di, në zi'c ma nabannëdi xSprijt Dios në zi'c yu' luxdoodi nix con lasa'di, në zi'c raya lasa'di. <sup>2</sup> Gol basnuu gol gubajn zian din yagu'di luxdoon nix. Gol gubajn, gol guyën tëe lasa'di tibloj, gol gojc tijbzi, gol been tëe tijbzi xgab. <sup>3</sup> Ad sëëbladixidi güüнди gan loj ree lasa'di o guilies xvalor lëjt gajc, mazri zagdxe gol been naya, gol been tëe xgab guial stijb lasa'di mazri lasajc guial lojdi. <sup>4</sup> Ad bal chu'di xgab por lëjtzi, gol guyu xgab por stijb lasa'di.

<sup>5</sup> Gol been xgab zi'c been Jesucrist xgab. <sup>6</sup> Din majsi laaman naj Dios, per ad guzudxi'chtaman guial niëjbaman laaman naj Dios. <sup>7</sup> Basa'n xguialrniabeeman persi bi'taman loj guidxliuj guie zi'c tijb mojs abi' gojlaman zi'c tijb bénguidxliuj. <sup>8</sup> Abi' chi gocaman zi'c tijb bénguidxliuj beenman naya abi' bazoob xtiidx xDadaman, xt güjtaman loj crüjz, majsi ni natu naj guial rëjt loj crüjz. <sup>9</sup> Zeel dád guialrniabee naroo badëe Dios lojman, badëe tëeman lojman laj bejn ni mazri lasajc loj gra laj bejn. <sup>10</sup> Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, në gra ree ni yu' loj guidxliuj, nëtëe ree ni yu' lën liuj. <sup>11</sup> Abi' gra bejn guiëb guial Jesucrist naj Dad, zian guilies reeman xvalor dux Dad ree Dios.

### *Xbejn ree Jesucrist naj zi'c tijb guij ni rulaa bacha'*

<sup>12</sup> Zeel compniar raliduladx ree Jesucrist, zi'c rënan lëjt abi' rnin lëjt guial zi'c bazoobidi da diidxan chi guzun con lëjt, ziangajc gol bazoob da diidxan mazri yan guial za'n zijt. Con guialrdxeb në con respejt gol been zi'c rayal güün ree bën ma naj perdon. <sup>13</sup> Din por Dios zëed xgabza'c ni rüjndi, abi' laaman ragnë lëjt din güüнди zi'c rënman.

<sup>14</sup> Gol been gra ni rayal güüнди, achet guial ad zayuladxtidi achet tëët guial tildiidxidi, <sup>15</sup> chitëe xhie guinee bejn lëjt o chitëe xhie xfaltidi yadxelj reeman. Lëjt najdi xi'n Dios gol gubajn naya niz loj ree bën ad zinalt xnejz Dios, bën rüjn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay, <sup>16</sup> guial za'dxi'chnëdi xtiidx Dios ni zidnë guialnaban. Abi' zian yabaan por lëjt dxej ni gui't Jesucrist stijb guial gagbeen ad bentan dxiin xlia' ad bizaa tëëtan xlia'. <sup>17</sup> Din guial rliladxidi Dios laan naj zi'c tijb gon par laaman, abi' nix yu' luxdon majsi guiëtan din yayaaloj gon guin guial rabaanë'n gradi. <sup>18</sup> Yan ziangajc gol babaa, gol babaa zi'c rabaan.

### *Timoteo në Epafrodito*

<sup>19</sup> Dad Jesucrist gagnë naj din diob gaxhalan Timoteo lod zojbidi din xhienladxan chi gagbeen xhienaag riga'di. <sup>20</sup> Din tijbzi Timoteo yu' lëjt xgab zi'c yu'n lëjt xgab. Achut bën ru lëjt xgab zi'c laaman. <sup>21</sup> Graczi reeman ru xgab per por laagajc reeman, ad rut reeman xgab por ni rën Jesucrist güün reeman. <sup>22</sup> Per ma ragbeedi xhienaag naj Timoteo, ma ragbeedi xhienaag cayüjnman naj yudar persi catiechan xtiidx Jesucrist. Cayüjnman naj yudar zi'c rüjn bejn xDadaman yudar. <sup>23</sup> Zeel rënan gaxhalan laaman din guitixlojman lëjt, gagbeezan xhienaag gariican loj cwent guie <sup>24</sup> Dad Jesucrist gagnë naj din diob guidgana quijb naj lëjt.

<sup>25</sup> Abi' rülüü rüjn naguiejn gaxhalan da miwan Epafrodito ladxidi. Lëjt guxhaal laaman din güünman naj yudar loj ree ni ryaadxan. Abi' zian cayüjnman naj yudar, tiblojzi cayzaagdiajn. <sup>26</sup> Dád rënman guidganajman lëjt abi' dád yu'man xgab guial gogbeedi gogxuuman. <sup>27</sup> Abi' walican gogxuuman zamer niëjtaman. Per baya Dios laaman, abi'

ad laatzaman, nĕgajc naj bayaman, chitĕĕ chu'naya luxdon mazri zi'c ma guyu nayan. <sup>28</sup> Zeel diob gaxhal gajcan laaman din yabaadi chi guguaadi laaman stijb chitĕĕ chu'naya tĕĕn mazri. <sup>29</sup> Gol babaa, gol baca'man guial najman tijb du lasa' ree bĕn rliadx Jesucrist. Zian gol guyĕn gra ree bĕn naj zi'c laaman. <sup>30</sup> Din zamer niĕjtaman guial rĕjnman sirv loj Jesucrist, guzujman loj guialgĕjt guial beenman naj yudar loj ni ad bile't nĕjn quijb lĕjt naj yudar.

### 3

#### *Ni mazri lasajc*

<sup>1</sup> Yan, compniar raliduladx ree Jesucrist, gol badxe' luxdoodi zagdx por Dad Jesucrist. Par naj achetan guial ganin lĕjt diidx ni ma rni gajcan tijb, din par lĕjt lasajc ree diidx guin chitĕĕ chu' ni gusquiee lĕjt. <sup>2</sup> Gol gojp cudad con ree bentont, bĕn ad nadĕdguient, benmal, bĕn rĕjn ree naguiejn din chu' ree bejn xsen bĕn Israel. <sup>3</sup> Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman bĕn nabajnnĕ' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. <sup>4</sup> Majsi zajc gales da valoran guial zinaalan gra ree costumbr, per bal yu' bĕn rlies xvalor gajc, nĕgajc naj zajc gĕn zian. <sup>5</sup> Din chi goc toxman goolan, badxe' reeman naj sen ni ru ree bĕn Israel. Abi' bĕn Israel naj, loj xdiaa Benjamĕn zialan, rnien diidx Hebreo din xi'n ree bĕn rniee diidx Hebreo naj. Benan gra ni rniabee ley din bĕnfarisew gojcan. <sup>6</sup> Benan zi'cgajczi rĕjn ree bĕnfarisew, zeel xt guzunaalan bĕn rliadx ree Jesucrist din gĕnan laa reeman ni mal, benan gra zi'c tal rniabee ley abi' achut zajc niĕjb guial ad cayĕntan zi'c rayal. <sup>7</sup> Gra ni benan nadxel, par naj dád lasajcan nadxel, per yan achet lasajcan par naj, din yan Cristo mazri lasajc. <sup>8</sup> Abi' achet ni mazri lasajc guial loj ni nĕnbeen Dad Jesucrist, por laaman gra ni benan nadxel ma basa'nan tiblax, naj reen zi'c tijb guix par naj din nabee Cristo naj guidiblagaa, <sup>9</sup> abi' gacan tijbzi con laaman. Ad naladxtan por guial rĕnan zi'c rniabee ley achet dol ra'pan niz loj Dios, naladxtan por guial rliadxan Jesucrist, din por guialrliadx guin ma naya bejn loj Dios. <sup>10</sup> Zeel rĕnan gĕnbeeaaawan Cristo, gĕnbee tĕĕn guialrniabee ni basban laaman, rĕn tĕĕn gadaanan xhietĕĕz loj guialzagdiaj ni gadĕĕdan zi'c gudaanman, ma guidxin dxej gacan zi'c rayal gacan por xguialgĕjtaman. <sup>11</sup> Din yu'guican guial yabanan zi'c baban Jesucrist.

#### *Ni gunee Dios xanyabaa*

<sup>12</sup> Ad canitan lojdi guial ma bayaaloj benan gra o guial najn benza'c, per cayĕnan naguiejn din gacan zi'c rĕn Cristo gacan diidx chi guzuloj rniabeeman naj. <sup>13</sup> Compniar raliduladx ree Jesucrist, naj rni lĕjt guial ad wayaalojt gĕnan zi'c rayal, per cayĕnan naguiejn din yayanladxtan gra ni benan gocli din gac gusnuun par delant, <sup>14</sup> din yayaaloj gĕnan zi'c rayal din chile' gaca'n ni gunee Dios xanyabaa zi'c gurejdxaman dunuj ree por Jesucrist.

<sup>15</sup> Abi' dunuj ree guial ma rayagbee ree zagdx ni rĕn guiĕb xtiidx Dios, rayal yaguieen ree xgab zian. Per bal garen naj xixgabidi guial loj ni canin lojdi, Dios guluĕ lĕjt conin naj diidxli. <sup>16</sup> Per rĕjn naguiejn yabajn ree zi'c ma rayignia' ree.

<sup>17</sup> Compniar raliduladx ree Jesucrist, gol gubajn zi'c naban, gol baguiaa tĕĕ xhienaag naban ree bĕn naban zi'c naban. <sup>18</sup> Din zien volt ma rnin lojdi abi' yan caydxi'nan zatijb, xt ronan canin lĕjt guial zien ree bejn naban zi'c ree bĕn ad rliadxt guial gĕjt Cristo loj crĕjz por dux xtol ree. <sup>19</sup> Abi' ree bĕn guin castizi naj ni rbĕz laa reeman din mazri ruladx reeman gĕĕn reeman ni dxuudx. Abi' luar yatu reeman por ni rĕjn reeman aal mazri rlies xvalor reeman guial mazri rĕjn reeman xgab por ree ni yu' loj guidxliuj guie. <sup>20</sup> Per dunuj ree ma nayab ree xanyabaa abi' caylĕjz ree guial diidx xanyabaa gui't Dad Jesucrist bĕn gudix por dux tol ree. <sup>21</sup> Laaman naj bĕn guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' gĕĕnman zian con guialrniabee ni rajpaman par nabeeman gra.

## 4

*Gol badxe' luxdoodi zagdxé por Dad Jesucrist*

<sup>1</sup> Zeel compniar raliduladx ree Jesucrist, rënan lëjt rën tëën guidganan lëjt, lëjt rgu' luxdon zagdxé, abi' najdi zi'c tijb prem par naj, gol guzujdxi'ch loj ni rliadxidi Dad Jesucrist.

<sup>2</sup> Yan, rniaaban loj Evodia në loj Síntique din guidxag cwe reeman guial naj reeman compniar loj ni rliadx reeman Dad Jesucrist. <sup>3</sup> Abi' ziangajc lüj compniar ni cayguieen dxiin tijbzi, rniaaban lojl din güünl yudar béngunaa guin ree din laa reeman been naj yudar bire'ch xtiidx Jesucrist në Clemente con ree ben ren, gra reeman ma yu' laj loj libr ni yu' laj ree bën guiban tiblayaa con Dios.

<sup>4</sup> Zianczi gol badxe' luxdoodi zagdxé por Dad Jesucrist. Naj rni lëjt ;Gol badxe' luxdoodi zagdxé! <sup>5</sup> Gol been nagueijn güünbee gra bejn lëjt guial najdi benza'c. Gol badxe'guijc guial zamer gui't Dad Jesucrist zatijb.

<sup>6</sup> Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol badëë tëë quixtëë lojman. <sup>7</sup> Dios yabe'cdxe luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagnë lëjt din yayaalyuj luxdoodi yayaalyuj tëë xquiarguejndi guial ma najdi tijbzi con Jesucrist.

*Gol badxe'guijc ganax ni zagdxé*

<sup>8</sup> Naga gad lox günan gui'ch guie, compniar raliduladx ree Jesucrist, rnin lëjt gol badxe'guijc ganax ni diidxli, ni rayal respejt në ni naj xnejz. Gol badxe'guijc ganax ni rüjn sirv, ni naj zagdxé në ni rayal güün bën zë xnejz. Gol badxe'guijc gra ni naj zagdxé në ni guilies bejn xvalor.

<sup>9</sup> Gol been zi'c basidan lëjt, zi'c ma balün lëjt, gol been zi'c rnin lëjt zi'c ma baguiaadi benan, zian gagnë Dios lëjt bën rabe'cdxe luxdoo ree bejn.

*Ni badëëd ree bën filipos loj Pab*

<sup>10</sup> Dád rabaan por Dad Jesucrist guial ma basaaladxidi naj. Ad canitan bayanladxidi naj, canin zian guial ad gojctri nüjndi naj yudar. <sup>11</sup> Ad canitan zian guial cayaadxan xhienin din ma basidan gadëëdan con ni ra'ptzan. <sup>12</sup> Ragbeen xhienaagan chi naban bejn loj guialprob ragbee tëën xhienaagan chi achet ryaadx bejn, din ma basidan rdaanan ni zëëdtzi, bal rawan o bal id rawan, bal rüjnan naj sobr o bal ryaadxan. <sup>13</sup> Rajc rdaanan ni zëëdtzi con xyudar Jesucrist. <sup>14</sup> Per zagdxé naj ni beendi guial beendi naj yudar loj ni cazaagdiajn.

<sup>15</sup> Ragbee tëëdi guial chi briin niz Macedonia din suloj gatie'chan xtiidxza'c Jesucrist, lëjtzi bazaladx xhienin lon guial loj gra ree guiedx lod ma rliadx reeman xtiidx Jesucrist, zi'c benan lëjt yudar ziangajc beendi naj yudar. <sup>16</sup> Ziangajc chi guzun luguiedx Tesalónica chi biaadxan xhienin, bélczi volt beendi naj yudar. <sup>17</sup> Ad caygultan mod din güündi naj yudar mazri, ni rënan naj guial mazri yaya'ndi zagdxé loj Dios. <sup>18</sup> Ma baca'n gra ni guxhaalidi con Epafrodito, yan xt sobr rüjnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios. <sup>19</sup> Zeel Dios gunee lëjt gra ni ryaadxidi por ree ni za'c ni rajpaman xanyabaa con Dad Jesucrist. <sup>20</sup> ;Abi' por guialrniabee ni rajp dux Dad ree Dios, rayalczi yaya'p reeman respejt goctëëz! Amén.

*Rugajpdioz ree bën rliadx Jesucrist bën Tesalónica ree*

<sup>21</sup> Gol bagajpdioz gra ree bën ma naj xbejn Jesucrist, guiáad gra ree bën rliadx Jesucrist bën za'në' reen guie, rugajpdioz reeman lëjt. <sup>22</sup> Gra ree bën zojb ree guie, bën ma naj ree xbejn Jesucrist, në gra ree bën rüjn sirv loj rey, në reeman rugajpdioz lëjt.

<sup>23</sup> Dux Dad ree Jesucrist güünle' gradi. Amén.

## Gui'ch guxhaal San Pabl loj ree bén Colosas rliladx Jesucrist

### *Rxhial Pab xtiidx Dios*

<sup>1</sup> Naj Pab, najn tijb xi apóstol Jesucrist, din zian rën Dios. Naj con Timoteo nayajcan compniar raliduladxan Jesucrist, <sup>2</sup> caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tēēman luxdoodi.

### *Rbejdx Pab Dios por ree xbejn Jesucrist*

<sup>3</sup> Beegaj chi rarejdxan Dios, xDad Dad Jesucrist, radēēdan quixtēē lojman por lëjt. <sup>4</sup> Din ma baguiejnan xhienaag rliladxidi Jesucrist xhie tēē naag rëndi gra ree bén naj ree xbejnman. <sup>5</sup> Guial cabēzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. <sup>6</sup> Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rënman lëjt. <sup>7</sup> Lëjt gogbee diidxli guin ree chi balüü Epafra laa reen lëjt. Laaman cayüjn dunujn yudar abi' dád rayēnan laaman, din laaman diidxli cayüjn sirv loj Jesucrist delant lojdi. <sup>8</sup> Abi' tēē laaman be diidx du lojn xhienaag rën lasa'di guial yu' xSprijt Dios luxdoodi. <sup>9</sup> Zeel diizd chi baguiejnan xhienaag nabandi, ad racwēēzt rarejdxan Dios por lëjt din chignia'di zagdx xhienaag rënman güündi gunee tēēman lëjt gra loj gualrajc guixhial tēēman xquiarguiejndi por xSprijtaman. <sup>10</sup> Abi' zian guibandi zi'c rayal guiban ree bén rliladx Jesucrist, din güündi zi'c tal ruladxaman abi' gusnuu güündi ganax ree ni zagdx gusnuu tēē güünbeedi Dios mazri. <sup>11</sup> Abi' ranaaban lojman din con xgualrniabee za'cdxoonman gagnēman lëjt din sudxi'chidi, taan tēēdi xhietēēz loj gualzi tēdidi sin guial yalenyadi. <sup>12</sup> Abi' xt nix chu' luxdoodi gudēēdi quixtēē loj dux Dad ree Dios guial basiaman lëjt din yayalidi ni rayal ree xbejnman, bén zinal ree xnejzaman. <sup>13</sup> Laaman babēē dunuj ree loj xgualrniabee xindxab abi' bagu' man dunuj ree loj xgualrniabee xi'nman Jesucrist bén rënman, <sup>14</sup> abi' gudijxaman por dux tol ree, yan ma raya'p ree perdon loj Dios.

### *Por xgualgüjt Jesucrist ma nadxu'nē' ree Dios zagdx*

<sup>15</sup> Achut zajc guguaa Dios, per Jesucrist naj zi'c gajczi naj Dios. Abi' laaman mal rniabeenēman Dios diizd chi gad guidxliuj gacchaaw. <sup>16</sup> Por Jesucrist gojc gra ni yu' xanyabaa nē loj guidxliuj, zi'c ni ruguaa bejn zi'c ni ad ruguaataman. Abi' por laaman yu' graloj gualrniabee nē graloj gualguxtis ni rajp ree ni ad rajct ruguaa ree bejn. Gran gojc por laaman nē par laaman. <sup>17</sup> Mal yu' Jesucrist diizd guia'xchej chi gad guidxliuj gacchaaw, laaman dxiiibguijc gra abi' rniabeeman gra. <sup>18</sup> Abi' laa tēēman rniabee gra ree bén rliladx laaman, bén ma naj ree xbejnman. Laaman naj bén yaloj abi' yaloj laaman baban loj ree bengüt din guiguien guial tijbzi laaman rajp gualrniabee loj gra. <sup>19</sup> Din bayuladx Dios gac Jesucrist zi'c gajczi naj Dios. <sup>20</sup> Abi' por Jesucrist gra bēnguidxliuj ma za' zagdx con Dios, zi'c ni yu' loj guidxliuj zi'c ni yu' xanyabaa. Za' bejn zagdx con Dios por xgualgüjt Jesucrist loj crüjz. <sup>21</sup> Gocli ad gojctidi tijbzi con Dios, gojquidi zi'c bén bidxe'ch laaman guial beendi ganax ni mal. <sup>22</sup> Per yan ma za'di zagdx con Dios por ree gualzi ni gudēd Jesucrist chi gütaman loj crüjz din gac guidxindi lojman naya sin dol chitēē xhie naman lojdi. <sup>23</sup> Per par zian rayal sudxi'chidi loj gualrliladx ni rajpidi, ad gucwēēz chinalidi xtiidxza'c Jesucrist ni ma biguiejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree bén catie'ch diidxza'c guin ree.

### *Bacaabee Dios Pab din güünman sirv loj ree xbejn Dios*

<sup>24</sup> Abi' yan nix yu' luxdon por gualzi ni cadēēdan guial rünan lëjt yudar abi' lasa'gajc gualzi ni gudēd Jesucrist cadēēdan din chile' günan yudar bén rliladx ree laaman bén

ma naj ree xbejnman. <sup>25</sup> Din Dios bacaabee naj par gūnan sirv loj ree xbejnman. Abi' laaman bane dxiin guin naj din gulūn lējt xtiidxaman zi'c tal najn. <sup>26</sup> Diizd tiamp gulal ad bignia't ree bejn zagdxe ni rēn guiēb xtiidx Dios. Per yan ma balūūman ni rēn guiēban loj ree xbejnman. <sup>27</sup> Din gugojn reeman bēn ad najt ree bēn Israel xhienaag naj xguialnaza'c za'cdxoonman. Abi' ni ad balūūt Dios loj ree bejn tiamp gulal naj guial nabannē Jesucrist lējt abi' por laaman ragbeedi zagdxe guial yu' dxej yayalidi xanyabaa. <sup>28</sup> Abi' dunujn batie'ch xtiidx Jesucrist, baneenē'n bejn ree, balūū tēen laa reeman con gra quiargueijn ni runee Dios din chi guidxin reeman lojman por Jesucrist ma naj reeman zi'c rēnman gac reeman. <sup>29</sup> Abi' naj dād cayūnan naguiejn cayūnan dxiin guie con guialrniabee ni baneeman naj.

## 2

<sup>1</sup> Rēnan gagbeedi guial cayūn da'tan naguiejn cayūnan lējt yudar, nē ree bēn zojb guiedx Laodicea nē gra ree bēn ad wayūnbeet naj. <sup>2</sup> Cayūnan naguiejn din yayu luxdoo reeman din gusnuu guiban reeman tijbzi, guiēn lasa' reeman chu' tēē xquiargueijn reeman din chile' gūūnbee reeman ni ad balūūt Dios bejn ree gulal abi' laaman naj Jesucrist, <sup>3</sup> por laaman zēēd gra gualrajc nē gualrignia'. <sup>4</sup> Canin diidx guie ree lojdi chitēē chu gusquiee lējt con ree xtiidx zagdxe reeman. <sup>5</sup> Majsī ad za'tan con lējt, per yu'guican lējt abi' rabaan guial cayūjndi zi'c rayal, za'dxi'ch tēēdi loj guialrliladxidi Jesucrist.

<sup>6</sup> Zeel zi'c ma rliladxidi Dad Jesucrist, ziangajc gol gojc tijbzi con laaman. <sup>7</sup> Gol been naguiejn gol binalaman guidiblagaa, gol guzudxi'ch loj guial rliladxidi laaman zi'c ma basiididi ad gucwēēz tēē gudēēdi quixtēē loj Dios.

### *Guialnaban ni rudēēd Jesucrist*

<sup>8</sup> Gol gojp cudad, ad tiēbidi gūūn ree bēn rēn gusquiee lējt gan con ree ni rulūū reeman o con ree diidx ni ad rūjnt sirv ni zēēd por ree costumbr o por ree guialrniabee yu' loj guidxliuj, dīn ad zēēdt reen por Jesucrist.

<sup>9</sup> Din zi'cgajczi naj Dios, ziangajczi naj Jesucrist. <sup>10</sup> Abi' nabannēdi Dios guidiblagaa guial najdi tijbzi con Jesucrist, din laaman rniabee loj gra guialrniabee nē loj guialguxtis. <sup>11</sup> Abi' tēē guial ma najdi tijbzi con Jesucrist ma yu'di xsenman, per ad lasa't sen ru ree bēn Israel, sen yu'di por laaman najn guial ma basa'ndi dol tiblād. <sup>12</sup> Chi gurobnijsidi, laan rēn guiēb guial gūjtidi con Jesucrist abi' babandi con laaman stijb guial rliladxidi Dios rajp guialrniabee persi basbanman Jesucrist loj guialgūjt. <sup>13</sup> Gocli gojquidi zi'c bengūt delant loj Dios por xtolidi nē por guial ad guyutidi sen ni ru ree bēn Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist. <sup>14</sup> Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi gūt Jesucrist loj crūjz abi' laaman naj bēn gudijx laan por dunuj ree. <sup>15</sup> Abi' zian beenman gan gra loj ree guialguxtis nē loj gra guialrniabee zēēd loj xinxab. Basa'nxtuman laa reeman loj ree bejn, beenman laa reeman gan guial gūjtaman loj crūjz.

### *Gol been xgab ni yu' ree xanyabaa*

<sup>16</sup> Zeel achut rayal gula'ch lējt por ni rawidi nē ni rē'di o por guial ad rūjntidi cwent dxej lanij o dxej ni yu' bēēw cūb o dxej raziiladx ree bejn. <sup>17</sup> Din gra ree ni guin naj zi'c tijb xbala Jesucrist abi' yan laaman naj bēn ma bi't. <sup>18</sup> Ad tiēbidi gutiaalguiiw bēn rēn ree anjl zi'c Dios lējt, par gusa'ndi xnejz Dios, din laa reeman rulūū naj reeman bēn naxanladx, per ad najt reeman laan rēb tēē reeman guial yu' ni rulūūloj loj reeman. Dxel laagajc reeman rlies xvalor por xixgab gajc reeman. <sup>19</sup> Per laa reeman ad nabannēt reeman Jesucrist, bēn rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

<sup>20</sup> Yan bal walidi ma gūjtidi con Jesucrist par ree ni rbēēguijc ree bēnguidxliuj, ¿chexquiza zeel ruzoobidi xtiidx ree bēn rēb: <sup>21</sup> “Ad rayalt gugaalil ni guin, ad gawil ni guin, ad guiniaazil ni guin”? <sup>22</sup> Gra ree mandamient guin yu' dxej nit reen, din



bénguidxliuj gulëëgujic laa reen. <sup>23</sup> Diidxiczi rulüü lasajc da't ree mandamient guin guial tant rüjn ree bejn naguiejn güün reeman laa reen cumplid abi' rüjn reeman Bén naxanladx dxel rusagzi laagajc reeman, per achetczi lasajc ree mandamient guin par gucwëëz reen ni mal rzëëbladx reeman güün reeman.

### 3

<sup>1</sup> Zeel bal ma rajpidi guialnaban cüb con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. <sup>2</sup> Ad güüнди xgab ganax ree ni yu' loj guidxliuj, gol been xgab mazri ni yu' ree xanyabaa. <sup>3</sup> Gol gunaladx ma güjtidi par ree ni yu' loj guidxliuj abi' ma rajpidi guialnaban delant loj Dios por Jesucrist. <sup>4</sup> Abi' chi gui't Jesucrist stijb, Bén runee dunuj ree guialnaban, në lëjt yayal guibannë laaman loj guialrniabee za'cdxoonman.

#### *Zi'c rayal guiban ree Bén riladx Jesucrist*

<sup>5</sup> Yan, gol basa'n gra ree ni mal riga' loj guidxliuj guie. Ad sunëdi Bén ren Bén ad najt lacheelidi. Gol basa'n ni ad rüjnt ree sirv, në ree xgabmal në ree ni mal yu'di gan güüнди. Ad sëëbladx tëëdi gapidi gra loj ni yu' loj guidxliuj din Bén rüjn zian laan rënman mazri luar Dios. <sup>6</sup> Abi' por ree ni guin zëëd xcasti Dios par ree Bén ad ruzoobt xtiidxaman. <sup>7</sup> Lasa' ree ni mal guin beendi chi gadidi güünbee Jesucrist. <sup>8</sup> Per yan gol basa'n gra ree ni mal guin zi'c guialrdxe'ch, guialralen lasa', guialrüjn ni mal lasa', guialrnieeguijdx në guial rniee diidxguijdx. <sup>9</sup> Ad rusquiee loj lasa'di, din ad nabantridi zi'c gubandi gocli chi beendi ni mal ree, <sup>10</sup> din yan ma bidxaa mod nabandi. Ma najdi zi'c bencüb guial chigagaj ma cayajquidi zi'c rën Dios gaquidi din güünbeedi Dios mazri zagdx, Bén runee lëjt guialnaban. <sup>11</sup> Abi' chi ma riladx bejn Jesucrist, achet güünan chutéëz najman, bal najman Bén grieg o Bén Israel, bal yu'man sen ru ree Bén Israel o ad yu'taman laan ya, bal najman benzit o najman Bén zobj dajn, bal najman zi'c Bén nado' o ad najtaman zi'c Bén nado' Per ni mazri lasajc naj guialriladxaman Jesucrist, Bén rniabee za' tëëman con dugra ree.

<sup>12</sup> Abi' Dios rën lëjt, zeel gulejman lëjt din gaquidi xbejnman. Zeel gol baya bejn ree, gol gojc benza'c, gol gojc Bén naxanladx, ad gaquidi bendxal, gol gojp pasens lasa'di. <sup>13</sup> Ad yaleny'a'në lasa'di. Gol been tëë perdon lasa'di bal xhie rüjnnë reeman lëjt. Zi'c been Dad Jesucrist lëjt perdon ziangajc gol been perdon bejn ree. <sup>14</sup> Gol badxe'guijic guialrën lasa' naj ni mazri lasajc. Abi' guialrën lasa' guin rüjn yudar din guidxaag guiban bejn. <sup>15</sup> Gol cwëjb nabee Jesucrist lëjt din yabedxe luxdoodi, din par zian gulej Dios lëjt par gaquidi tijbzi por Jesucrist gol badëë tëë quixtëë lojman por zian.

<sup>16</sup> Gol badxe'guijic da't xtiidx Jesucrist, gol balüü gol guneenë tëë lasa'di zi'c rayal. Gol badëë quixtëë loj Dios con ree cant në ree salmos në los demazri ree cant ni naj par Dios. <sup>17</sup> Xhietëëz ni güüнди ni guiniee tëëdi, yaloj xgaj gol basaaladx Dad Jesús abi' por laaman gol badëëd quixtëë loj dux Dad ree Dios.

#### *Zi'c rayal guiban tijb famil*

<sup>18</sup> Lëjt béngunaa yu' ree lacheel, gol bazoob xtiidx lacheelidi, din zian rayal güün Bén riladx Jesucrist. <sup>19</sup> Abi' ziangajc lëjt xinguaaw yu' ree lacheel, gol guyën lacheelidi ad gusagzi tëëdi laa reeman.

<sup>20</sup> Në lëjt xin naj ree xi'n, gol bazoob gra xtiidx ree xDadidi, din zian ruladx Dios. <sup>21</sup> Abi' ziangajc lëjt dad na, ad gusagdiaj xi'ndi chitëë guidxe'ch reex abi' yaleny'a' reex.

<sup>22</sup> Lëjt Bén rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatz reeman lëjt par yaya'ndi zagdx loj reeman, guidib luxdoodi gol been xchiin reeman por respejt ni rajpidi Dad Jesucrist. <sup>23</sup> Xhietëëz nin güüнди, gol beenan con gan. Gol gunaladx loj Jesucrist cayüjndi sirv, ad lojt bénguidxliuj. <sup>24</sup> Din lëjt ma ragbee guial zian yu' ni tia'di loj Dad Jesucrist guial cayüjndi laaman sirv. <sup>25</sup> Per par ree Bén rüjn ni mal, laa reeman yayal casti por ni mal been reeman, din Dios ad rbetaman loj bejn.

## 4

<sup>1</sup> Négajc lëjt bën naj ree patron, gol been zi'c rayal con ree bën rüjn xchiindi, gol gojc tää benza'c con laa reeman, din lëjt ragbee guial xanyabaa yu' bën rniabee lëjt.

<sup>2</sup> Gol guzusin, gol gurejdx Dios ad bal gucheeladxidi, gol badëë quixtëë lojman. <sup>3</sup> Gol gurejdx tää Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguiib. <sup>4</sup> Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdxe.

<sup>5</sup> Gol gubajn zagdxe delant loj ree bën ad waliladxt Jesucrist gol guneë tää xtiidxaman loj reeman beegaj chi chu' mod. <sup>6</sup> Chi rüdi diidx, gol be diidx xnejz din yayuladx bejn ni rnieedi gagbee täädi xhienaag yadxi'di ni rniabdiidx reeman lojdi.

*Rxhiaal ree xbejn Jesucrist xtiidx Dios*

<sup>7</sup> Tíquico, tijb du lasa' ree, bën rayën ree, bën diidxli cayüjn naj yudar cayünan sirv loj Jesucrist, laaman gugojn lëjt gra xhienaag za'n niz guie. <sup>8</sup> Par zian caxhalan laaman din gugojnman lëjt xhienaag nadxu'n niz guie din yagu' tääman luxdoodi. <sup>9</sup> Abi' con laagajcaman caxhalan Onésimo, tijb du lasa' ree bën rayën gajc ree, bën naban zi'c rayal, bën naj bën ladxidi. Laa reeman gugojn lëjt gra ni cayajc niz guie.

<sup>10</sup> Aristarco, bën yu'në'n ladxguiib, laaman rxhiaal xtiidx Dios lojdi. Négajc Marcw, bijchwin Bernabé rugajpdioz lëjt. Abi' ma bagojnman lëjt chunin naj Marcw, bal gui'taman guidganajman lëjt, gol baca'man zagdxe. <sup>11</sup> Abi' négajc Jesús, bën la gajc Justo, rxhiaal xtiidx Dios lojdi. Loj gra ree bën Israel riladx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bën cagu' luxdon. <sup>12</sup> Në Epafra, bën ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczy rbejdxaman Dios por lëjt din sudxi'chidi chinalidi xnejz Dios güün täädi gra zi'c rënman. <sup>13</sup> Naj ragbee zagdxe guial dád ruman xgab por lëjt, në por ree bën Laodicea, në por ree bën Hierápolis.

<sup>14</sup> Lujc, doctor rayën da't ree, në Demas, në reeman rxhiaal xtiidx Dios lojdi.

<sup>15</sup> Gol bagajpdioz ree dux compniar ree bën riladx ree Jesucrist, bën zojb ree luguiedx Laodicea. Gol bagajpdioz tää Ninfas con los demazri ree xbejn Jesucrist bën rado'p ree lidxaman. <sup>16</sup> Chi ma gulox biilidi gui'ch guie, dxel gol guxhaalan loj ree bën riladx Jesucrist, bën zojb ree luguiedx Laodicea, din në reeman gool laan. Në gui'ch ni guxhalan loj reeman rayal yaxhaal reeman lojdi din négajc lëjt gool laan. <sup>17</sup> Abi' gol güjdx loj Arquipo din güünman cumplid ni ma bacaabee Dad Jesucrist güünman. <sup>18</sup> Naj Pab, quijb naj cuca lejtr guie ree par gugajpdiozan lëjt. Gol basaaladx guial yu'n ladxguiib. Dios güünle' lejt. Amén.

## Gui'ch yaløj guxhaal San Pabl loj ree b́en Tesalónica rliladx Jesucrist

<sup>1</sup> Naj, Pab con Silvan nē Timoteo, cayxhaalan gui'ch guie par lējt najdi b́en rliladx Jesucrist luguiedx Tesalónica, dux Dad ree Dios nē Dad Jesucrist güünle' lējt yabe'cdxe tēē reeman luxdoodi.

### *Rudēē Pab quixtēē loj Dios*

<sup>2</sup> Guixie guixie radēēn quixtēē loj dux Dad ree Dios por gradi, rasaaladx tēēn lējt chi rarejdx ranaaban laaman. <sup>3</sup> Nē zianczi chi rarejdx ranaaban laaman, nadxe'duguijcan ni ma beendi guial rliladxidi laaman, nē guial rēn lasa'di, nadxe'duguijcan tēēn guial cadaandi cabēzidi gui't Dad Jesucrist stijb. <sup>4</sup> Compniar raliduladx ree Jesucrist, dunujn rayagbee guial Dios rēn lējt, gulej tēēman lējt. <sup>5</sup> Din chi baneen xtiidxza'caman lojdi, ad diidxtizi balüün lējt, balüün lējt con xguialrniabee xSprijt Dios abi' rayagbeen guial diidxli naj ni caynan lojdi. Lējt ragbee xhienaag babajnan chi badxu'nē'n lējt, babajnan zian din yaguieenan lējt yudar xhienaag guibandi.

<sup>6</sup> Abi' lējt nabandi zi'c babajnan lojdi nē zi'c balüü Jesucrist, abi' por xSprijt Dios babaadi bililadxidi ni banan lojdi, majsi dád guzagdiajdi. <sup>7</sup> Zian najdi tijb ejempl par gra ree b́en rliladx Jesucrist niz Macedonia nē niz Acaya. <sup>8</sup> Por lējt bire'ch xtiidxaman ad tijbtizi luarzii ree, gra ladczi ruza't reeman xhienaag rliladxidi Dios, xt ni'qui chetri ryaadx yaguie'chan. <sup>9</sup> Din laagajc reeman rü diidx xhienaag baca'di dunujn chi budganajn lējt, xhie tēē naag basa'ndi ni naladxidi naj ree dios persi binalidi quijb Dios naban abi' guzuloj cayüjndi laaman sirv. <sup>10</sup> Rü tēē reeman diidx xhienaag cabēzidi gui't Jesucrist Xi'n Dios diidz xanyabaa, b́en basbanman loj ree bengüt, Jesús b́en rabēē dunuj ree loj casti ni zēēd.

## 2

### *Ni been Pab luguiedx Tesalónica*

<sup>1</sup> Lējt ragbee, compniar raliduladx ree Jesucrist, guial ad budganaj xlia'tzan lējt, <sup>2</sup> majsi lējt ragbee guial luguiedx Filipos guna ree bejn diidxguijdx du lojn nē graloj ree guialzi badēēd reeman dunujn. Per Dios baneen dunujn valor persi badün xtiidxza'caman lojdi, majsi xhietēēz raza'can por ree b́en rdxe'ch dunujn. <sup>3</sup> Din ad baneenē'tan lējt diidx rusquiee, o par yaguieennē'n lējt zi'ctzi rayēnan ya, o par yasquieen lējt, <sup>4</sup> per zi'c bacaabee Dios dunujn din yaneen xtiidxza'caman guial baguiaaman zile' yaguieenan ni rayal yaguieenan, laanan naj ni radün ad par yaya'ntan zagdxe loj ree bejn, par yaya'nan zagdxe loj Dios, b́en ragbee gra ni yu' luxdoo bejn. <sup>5</sup> Lējt ragbee guial ad yu't dxej baneenē'n lējt zagdxe naabzi par guiēndi dunujn, ache tēēt guijc badxiiban din yaca'n xmiliadi. Dios ragbee guial laan naj diidxli. <sup>6</sup> Ad radiiltan guza't ree bejn dunujn zagdxe, ad radiil tēētan guza'tidi dunujn zagdxe, o guza't ree ben ren dunujn zagdxe, <sup>7</sup> majsi guial nayajcan xiapótol Jesucrist, raya'pan derejch yanabeen lējt güündi xhienin par dunujn, per ad raguieentan zian. Lējt ragbee guial benza'c bayajcan chi badxu'nē'n lējt, zi'cgajczi tijb na rusni's rniaj tēē xi'n. <sup>8</sup> Abi' guial tant rayēnan lējt, ad tijbtzi xtiidx Dios baneen lojdi, nē dux guialnabanan bayēnan naneen por lējt, guial tant rayēnan lējt. <sup>9</sup> Abi' lējt ragbee compniar, guial dád baguieenan dxiin. Dxej guiaal baguieenan dxiin, chitēē yalu'n xchiindi guial güündi dunujn yudar yabajnan la'tgaj balüün lējt xtiidxza'c Dios.

<sup>10</sup> Lējt nē Dios ragbeechaaw guial chi badxu'nē'n lējt, babajnan xnejz zi'c rayal, abi' achet chile' gudxiibidi du guijcan, lējt b́en rliladx ree Jesucrist. <sup>11</sup> Lējt ragbee xhienaag baneen lējt consejw, xhie tēē naag balu'n luxdoodi zi'c rüjn tijb dad con ree xi'nman. <sup>12</sup> Ma banan lojdi din guibandi zi'c rayal guiban b́en ma naj ree xbejn Dios, b́en rbejdx lējt din yayalidi xanyabaa lod rniabeeman.

<sup>13</sup> Zeel në dunujn ad racwëzt radëen quixtëe loj Dios, guial chi biguiejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bénguidxliuj. Abi' diidx guin ree naj ni rusni xquiarguiejndi, lëjt guial rliladxidi Jesucrist. <sup>14</sup> Abi' lëjt compniar raliduladx ree laaman, ma guzajquidi zi'c guzac ree xbejn Dios, bën Israel zojb ree niz Judea, bën rliladx ree Jesucrist. Din zi'cgajc basagdiaj ree bën ladxidi lëjt, ziangajc basagdiaj lasa' bën Israel reeman laa reeman. <sup>15</sup> Abi' tëe ree bën Israel bagüjt reeman Dad Jesús, zi'cgajc bagüjt reeman bën badëed ree xtiidx Dios loj ree bejn, balaagdx tëe reeman dunujn, ad rüjnt reeman zi'c rën Dios, abi' contzi gra bejn rdxe'ch reeman. <sup>16</sup> Rudxoon reeman yalüün bën ad najt ree bën Israel xhienaag gac reeman perdon, zian laagajc reeman cutioob guijc xtol reeman, abi' yan ma cadëd reeman xcastiro' Dios.

#### *Guyën Pab niejman Tesalónica stijb*

<sup>17</sup> Compniar raliduladx ree Jesucrist, chi basa'nan lëjt tio'p choondxej, majsi ad raguaatan lëjt, per rasaaduladxan lëjt, abi' rayën nejzdoon yaguaian lëjt stijb. <sup>18</sup> Dád bayënan nudganajn lëjt. Naj Pab, zien volt da't guyënan nidganan lëjt, per badxoon xindxab niajc zian. <sup>19</sup> Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdx. Lëjt naj dux chiinan ni rabaanë'n yubiignë'n loj Dad Jesucrist chi gui'taman stijb. <sup>20</sup> Lëjt naj bën rabaanë'n rlies tëedi dux valoran.

### 3

<sup>1</sup> Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni. <sup>2</sup> Abi' baxhaal dux compniaran Timoteo, bën cayguieennë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rliladxidi, <sup>3</sup> din ni'qui tijbidi ad zalenya't por ree guialzi ni cadëdidi, lëjt ragbee guial zian yaza'c ree. <sup>4</sup> Chi badxu'në'n lëjt, banan guial dád zien loj guialzi yadüüd ree, abi' lëjt ragbee guial laan naj ni ma gojc. <sup>5</sup> Zeel ad gudaantran, abi' guxhalan Timoteo din gagbeen xhienaag zinalidi ni rliladxidi, din rdxeban gusquiee xindxab lëjt, abi' achetri sirv nüjn ni baguieenan por lëjt.

<sup>6</sup> Per yan ni ma baguiaad Timoteo ni bidganajman lëjt, ma bagojnman dunujn guial zinalidi zagdx ni rliladxidi Jesucrist në zi'c rën lasa'di. Laaman na guial zianczi yu' luxdoodi zagdx rasaaladxidi dunujn, abi' dád ma rëndi guguaadi dunujn, zi'cgajc rayënan yaguaian lëjt. <sup>7</sup> Zeel, compniar raliduladx ree Jesucrist, majsi graloj tarbajw në guialzi caydüüdan, per dád nix yu' du luxdoon raguiejnan guial zagdx zinalidi ni rliladxidi. <sup>8</sup> Abi' yan mazri nix ma bayu du luxdoon guial ma bayagbeen za'dxi'chquidi loj ni zinalidi xnejz Dad Jesucrist. <sup>9</sup> Dxel xt ni'quid radxejltn xhienaag yadëen quixtëe loj Dios por lëjt, guial dád nix yu' du luxdoon lojman por lëjt. <sup>10</sup> Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial rliladxidi Jesucrist.

<sup>11</sup> Dux Dad ree Dios në Dad Jesucrist gagnë dunujn din gac yudganajn lëjt. <sup>12</sup> Abi' Dad Jesucrist gagnë lëjt din gusnuu guiën lasa'di mazri, guiën tëedi gra lasa' bejndi zi'c rayënan lëjt. <sup>13</sup> Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

### 4

#### *Zi'c rën Dios guiban ree xbejnman*

<sup>1</sup> Yan, compniar raliduladx ree Jesucrist, raza'can lëjt liaadx, rana tëen lojdi por laaman, guial zi'c nabandi yan zi'c ma balüün lëjt guibandi, din güüdi zi'c rën Dios, gol been naguiejn gol basnuu mazri guibandi zi'c rënman.

<sup>2</sup> Din lëjt ma ragbee gra ni guxhaal Dad Jesús dunujn yanan ni güüdi. <sup>3</sup> Ni rën Dios naj guial guibandi naya lojman, guial ad güüdi nidxuudx ree con ree bën ad najt lacheelidi. <sup>4</sup> Gol gogbee guial tijbgaj lëjt rayal guibannë lacheelidi zagdx zi'c rën Dios con respekt, <sup>5</sup> ad chu' lacheelidi naabzi par grii xgustidi zi'c rüjn ree bën ad nünbeet Dios. <sup>6</sup> Ni'qui tijbidi ad rayalt güünnaladx lasa'di, gusquiee lasa'di güüdi xhie nidxuudx con lacheel

reeman. Din dux Dad ree Dios zudëedaman casti gra ree bén rüjn zian, zi'c ma banan lojdi zi'c ma bagojnan lëjt. <sup>7</sup> Din Dios ad gurejdxaman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya. <sup>8</sup> Zeel bén ad ridxga't ni ma banan lojdi, ad bénguidxliujtan ad ridxga'taman, Diosan ad ridxga'taman, bén razaladx xSprijt duloj ree.

<sup>9</sup> Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, <sup>10</sup> abi' laan naj ni cayüjndi con gra dux compniar ree bén rliladx ree Jesucrist niz Macedonia. Per raza'can lëjt liaadx din gusnuu guiën lasa'di mazri. <sup>11</sup> Gol been tää naguiejn guibannë lasa'di zagdxe, gol guyu xgab xchiindi, zi'c ma ranan lojdi güüнди dxiin, <sup>12</sup> din guibandi zagdxe loj ree bén ad rliladxt Jesucrist në chitëë xhie guiyaadxidi.

### *Ni gac chi gui't Dad Jesucrist*

<sup>13</sup> Yan, compniar raliduladx ree Jesucrist, ad rayëntan guibandi sin guial gagbeedi xcwent ree bengüt, chitëë chu'nayadi zi'c ree bén ad rliladxt Jesucrist. <sup>14</sup> Din bal raliduladx ree guial güjtaman abi' babanman stijb, ziangajc raliduladx ree guial ree bén ma güjt, bén bililadx ree laaman, yasban Dios laa reeman por Jesucrist.

<sup>15</sup> Zeel zi'c ma rayignia'n xtiidxaman, dunujn rana lojdi guial gra ree xbejnman, bén sta naban ree chi gui'taman stijb, ad zanedt reeman loj ree xbejnman bén ma güjt ree. <sup>16</sup> Din dxejzii guiguien cha' bén rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diidz xanyabaa, abi' yalaj ree xbejnman bén ma güjt ree yaban stijb. <sup>17</sup> Guiáad dux compniar ree bén sta naban ree dxejzii, yadxaag ree con ree bén baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'në' reeman tiblayaa. <sup>18</sup> Zeel gol bagu' luxdoo lasa'di con ree diidz guin.

## 5

<sup>1</sup> Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganinan lëjt. <sup>2</sup> Din lëjt ragbeechaaw guial zi'cgajczi ri't tijb béngubaan guxhin, chi achut rbëz laaman, zian guidxin dxej gui't Dad Jesucrist stijb. <sup>3</sup> Chi guiëb ree bejn: “Zagdxe zio' ree, achet gac”, dxel dxejczii gui't guialzi par laa reeman ni ad zariit reeman loj, zi'c chi rdxin hor ragnaa lën béngunaa chi ma gal xi'nman. <sup>4</sup> Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb béngubaan. <sup>5</sup> Din gracziidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay. <sup>6</sup> Zeel ad najt guial yabajn ree zi'c tijb bénnaayëjs, zi'c rüjn los demazri ree bejn, rayal yatie'ch dux bacaal ree, yadxu' ree nadëdguiendxuj. <sup>7</sup> Bén zinal ree nejzmal zi'c tijb bénnaayëjs, zi'c tijb bengu', zian zinal reeman nejz guin. <sup>8</sup> Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj guialrliladx ni ma raya'p ree në loj ni rën Dios dunuj ree, abi' yadxu'dxi'ch tää ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcaswix ni rutëë yaya'p tää reen zi'c tijb ni gutëë dunuj ree loj ni mal <sup>9</sup> Din ad gurejdx Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist, <sup>10</sup> bén güt por dunuj ree, din majsi nabajn ree o ma bayëjt ree chi gui'taman stijb, per yo' ree yuchu'në' reeman. <sup>11</sup> Zeel gol bagu' luxdoo lasa'di gol been tää yudar lasa'di din gagbeedi mazri xtiidz Dios zi'c ma cayüjndi.

### *Ni rayal güün ree bén rliladx Jesucrist*

<sup>12</sup> Compniar raliduladx ree Jesucrist, raza'can lëjt liaadx, gol gojp respejt bén rusiid ree lëjt xtiidz Dios, bén rulüü ree lëjt rnieenë tää reeman lëjt xhienaag chinalidi Jesucrist. <sup>13</sup> Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdxe.

<sup>14</sup> Ranaab tëën lojdi compniar, gol guneenë ree bén ad rënt güün dxiin, gol bagu' luxdoo ree bén ralenya'në xnejz Dios, gol been tëë yudar bén ad za'dxi'cht ree loj xnejzaman, gol gojp pacens gra reeman.

<sup>15</sup> Gol been naguiejn ad güüendi ni mal bén rüjn ree lëjt ni mal, zagdxeli gol gojc benza'c con lasa'di në con gra ree bejn. <sup>16</sup> Gol badxe' luxdoodi zagdxex zianczi. <sup>17</sup> Ad gucwëëz cwedx guiniabidi Dios. <sup>18</sup> Gol badëë quixtëë lojman por gra, din zian rënman güüendi, lëjt najdi xbejn Jesucrist.

<sup>19</sup> Ad rbexuudi nabee xSprijt Dios lëjt. <sup>20</sup> Gol bidxga' ni rnnee ree bén rudëëd xtiidxaman. <sup>21</sup> Yaloj xgaj gol gogbee zagdxex xhietëëznin, dxel gol been ni naj zagdxex.

<sup>22</sup> Gol gubi'ca loj gra ree ni mal.

<sup>23</sup> Dios, bén rabe'cdxex luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidiblagaa di din gaquidi nayadxuj lojman dxex gui't Dad Jesucrist. <sup>24</sup> Abi' Dios güün zian, din laaman, bén rbejdx dunuj ree par güünman dunuj ree xbejnman, rüjn xtiidxaman cumplid.

*Diidx bigra ca ree loj gui'ch guie*

<sup>25</sup> Compniar raliduladx ree Jesucrist, gol gurejdx gunab Dios por dunujn. <sup>26</sup> Gol badëë xtiidx Dios da cwentan loj gra ree compniar rliladx Jesucrist. <sup>27</sup> Abi' por laaman, naj rni lojdi rniabee tëën lëjt: Gol biil gui'ch guie loj gra ree compniar rliladx laaman. <sup>28</sup> Dux Dad ree Jesucrist güünle' lëjt.

## Gui'ch barojp guxhaal San Pabl loj ree b en Tesal nica rliladx Jesucrist

<sup>1</sup> Naj, Pab con Silvan n  Timoteo, cayxhaalan gui'ch guie par l jt rliladxidi Jesucrist luguiedx Tesal nica, l jt najdi xbejn dux Dad ree Dios n  xbejn Dad Jesucrist. <sup>2</sup> Dux Dad ree Dios n  Dad Jesucrist g unle' l jt yabe'cdxe t e reeman luxdoodi.

### *Rud ed Pab quixt e loj Dios*

<sup>3</sup> Guixie guixie rad en quixt e loj Dios por l jt compniar raliduladx ree Jesucrist, din zian rayal yaguieenan guial mazri cusnuu rliladxidi laaman, abi' tijb gajdi mazri ma r n lasa'di. <sup>4</sup> Zeel d d nix yu' du luxdoon raza'tan l jt loj gra ree xbejn Dios, raguie'chan loj reeman pacens ni rajpidi n  guialrliladx ni rajpidi, rdaan t edi gra ree ni r jnn  ree bejn l jt n  gra ree guialzi ni cad didi. <sup>5</sup> Zian rguien xnejz naj xguialguxtis Dios, guial gulejman l jt din yayalidi lod rniabeeman, din por laan cad didi guialzi.

<sup>6</sup> Abi' guial gra ni r jn Dios naj xnejz, zeel gud edaman casti gra ree b en cud ed l jt casti. <sup>7</sup> Gui ad l jt cad didi guialzi yan, guneeman l jt guialraziiladx con dunujn, dxej ni gul uloj Dad Jesucrist diidz xanyabaa galay xbianiman ni naj zi'c bajl, con ree xianjlaman b en ca' ree mazri guialrniabee. <sup>8</sup> Dxel gud edaman casti b en ad bayagbeet ree Dios, b en ad guy ent ree nuzoob xtiidxza'c Dad Jesucrist. <sup>9</sup> Gud edaman laa reeman casti tiblayaa, su reeman zijt par Dios n  par xguialrniabee za'cdxoonman. <sup>10</sup> Zian gac dxej ni gui't Dad Jesucrist, din guza't ree bejn laaman zagdxre por ree xbejnman, yadxa t e loj gra reeman laaman, abi' n  l jt, din ma bililadxidi xtiidxaman ni bad n lojdi.

<sup>11</sup> Zeel ad racw  zt rarejdx ranaaban Dios por l jt din gagn eman l jt guibandi zi'c rayal, zi'c guredxaman l jt guibandi. Ranaab t en lojman guial con xguialrniabeeman gac cumplid gra xixgabzagdxedi n  gra ni r jndi guial rliladxidi laaman. <sup>12</sup> Abi' zian guiliesidi xvalor Dad Jesucrist, gui ad laaman guilies xvaloridi guial laaman con dux Dad ree Dios r n reeman dunuj ree.

## 2

### *Gul uloj b en ca' xguialrniabee xindxab*

<sup>1</sup> Yan, compniar raliduladx ree Dad Jesucrist, xcwent guial gui'taman stijb n  guial yadxaag ree con laaman, raza'can l jt liaadx, <sup>2</sup> ad bal ti bidi tibrajtzi gusquiee ree bejn l jt, b en r b ree ma bidxin dxej gui't Dad Jesucrist. Ad guidxebidi gucaagdiajguidi zian, o na ree bejn guial tijb sprijt r b loj reeman zian, o dunujn baxhaal gui'ch loj reeman lod raguie'chan zian. <sup>3</sup> Ad ti bidi chu gusquiee l jt, din chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' gul uloj tijb b en g un ganax ni r n xindxab, b en ma naj par gabijl. <sup>4</sup> Laagajc laaman guilies xvalor, abi' yalenman gra ni n nbee bejn zi'c Dios n  gra ni rniajchi' bejn zi'c dios, xt cweman l n xyadoo Dios, abi' gui ebaman guial laaman naj Dios.

<sup>5</sup> Gol basaaladx guial zian rnin lojdi chi guzun 'n l jt. <sup>6</sup> Abi' yan l jt ma ragbee chu cut e chit e gul ulojman, la'tgaj guidxin dxej rayal gul ulojman. <sup>7</sup> Ma cayajc ree xgabmal guin, per yu' b en cut e gac reen cumplid. Chi ma bis d b en cut e guin, <sup>8</sup> dxel gul uloj benmal guin, abi' Dad Jesucrist con tijbzi gul ujbaman gug jtaman laaman, dxel con xbianiman ni guidn eman gunidlojman laaman. <sup>9</sup> Benmal guin por xindxab gui'taman, abi' d d gapaman guialrniabee. G unman zien ree ni yadxaloj ree bejn, g un t eman zien ree milagr par gusquieeman. <sup>10</sup> Con graloj ree ni mal gusquieeman b en canijt ree loj Dios, guial ad guy ent reeman ad cw jb t et reeman nililadx reeman ni diidxli zile' nuslaa laa reeman loj dol. <sup>11</sup> Zeel ruslaa Dios gusquiee gra ree ni guin laa reeman, abi' guililadx reeman ni ad najt ni diidxli, <sup>12</sup> din yayal gra reeman casti, guial ad bililadxt reeman ni diidxli guin, din mazri bayuladx reeman been reeman ni mal.

*Sudxi'ch reeman loj ni riladx reeman*

<sup>13</sup> Compniar, rën Dad Jesucrist lëjt. Zianczi rayal yadëen quixtëe loj Dios por lëjt, din diizd guia'xchej ma bacaabeeman lëjt din laadi loj casti, guial ma nayadi por xSprijt Dios në guial ma bililadxidi ni naj diidxli. <sup>14</sup> Par zian gurejdx Dios lëjt gaquidi xbejnman chi badün xtiidxza'c Dad Jesucrist lojdi, din yayalidi xanyabaa lod za'man.

<sup>15</sup> Zeel, compniar raliduladx ree Jesucrist, gol guzujdx'i'ch gol binal tää ni balüün lëjt chi badxu'në'n lëjt, në ni ma banan lojdi loj gui'ch ren. <sup>16</sup> Abi' Dad Jesucrist gajc në dux Dad ree Dios bën rën dunuj ree, bën ragu' du luxdoo ree zianczi, bën banee tää ni ralëjz ree guial najman benza'c, <sup>17</sup> laaman yagu' luxdoodi gagnë tääman lëjt din sudxi'chidi din gra ni guinieedi güün täädi gac zagdxe.

## 3

*Rën Pab cwedx guiniab reeman Dios*

<sup>1</sup> Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdxe zi'cgajc beendi. <sup>2</sup> Gol gurejdx gunab tääman din yabëeman dunujn loj ree benmal, loj ree bendxuudx ad nabant xnejz, din ad grat bejn riladx xtiidx Dad Jesucrist. <sup>3</sup> Per laaman zianczi rüjn xtiidxaman cumplid, abi' laaman gagnë lëjt din sudxi'chidi, guinia tääman lëjt chitëe güündi ni mal. <sup>4</sup> Dunujn rayagbeeaa guial laaman cayagnë lëjt cayüjndi gusnuu tää güündi ni banan lojdi. <sup>5</sup> Gagnëman lëjt din guiëndi bejn ree zi'c rën Dios laa reeman gap täädi pacens zi'c gojp Dad Jesucrist pacens.

*Rüjn naguiejn güün bejn dxiin*

<sup>6</sup> Yan, compniar raliduladx ree Jesucrist, por laaman ranabeen lëjt: Gol bariica loj chutëez compniar gaz za' ad rënt güün dxiin, bën ad naban tää zi'c balüün lëjt. <sup>7</sup> Din lëjt ragbee xhienaag guibandi din guibandi zi'c nabajnan. Dunujn ad badxu'në'tan lëjt sin guial naguieenan dxiin, <sup>8</sup> achu tää banee xlia' ni badaawan. Lëjt ragbee guial dád naguieenan naguiejn naguieenan dxiin, dxej guiaal naguieenan dxiin chitëe yalu'n xchiindi guial güündi dunujn yudar din gac yabajnan. <sup>9</sup> Majsij zajc nanabeen lëjt nüjndi dunujn yudar, per naguieenan dxiin par yalüün xhienaag rayal guibandi güündi zi'c naguieenan. <sup>10</sup> Chi badxu'në'n lëjt, ranan lojdi: Bën ad rënt güün dxiin, ad zajw gajctaman. <sup>11</sup> Per yan naguiejnan guial yu'di gaz za' ad rëntidi güündi dxiin, abi' rudi loj ni ad rayaltidi. <sup>12</sup> Par bën zii ree dunujn rana ranabee tää laa reeman por Dad Jesucrist yabedxe reeman, güün reeman dxiin din guiban reeman.

<sup>13</sup> Guiáad lëjt compniar, ad yalenyadi güündi ni naj zagdxe. <sup>14</sup> Bal yu' tijbidi ad ruzoobt diidx guial güündi ni ranan loj gui'ch guie, gol baguiaa chu benan, ad guchajg täädi laaman din yatu lojman. <sup>15</sup> Per ad guguaadi laaman zi'c tijb bën rdxe'chidi, gol baguiaaman zi'c tijb bijchidi, gol guneenëman din guibanman zagdxe.

*Diidx bigra ca ree loj gui'ch guie*

<sup>16</sup> Dad Jesucrist bën rabe'cdxe luxdoo bejn, laaman yabe'cdxe luxdoodi guixie guixie në loj gra. Laaman sunë lëjt.

<sup>17</sup> Naj, Pab, quijb naj cuca ree lejtr guie par gugajpdiozan lëjt. Zian rünan con gra ree da gui'chan, zian naj ree da lejtran. <sup>18</sup> Dad Jesucrist güünle' gradi.



## Gui'ch yaløj guxhaal San Pabl loj Timoteo

### *Rugajpdioz Pab Timoteo*

<sup>1</sup> Naj Pab, najn tijb xiapó stol Jesucrist por xguialrniabee Dios b́en rýjn perdon dux tol ree ńe por Jesucrist b́en rayagbee ree gui't stíjb. <sup>2</sup> Cúcan gui'ch guie par lýj Timoteo, din par naj lýj naj zi'cgajc da xi'nán guial tiblojzi raliduladx Jesucrist. Dux Dad ree Dios ńe Dad Jesucrist güünle' lýj, yayaman lýj yabe'cdxe t́eeman luxdool.

### *Réb Pab loj Timoteo xcwent ree b́en rusquiee*

<sup>3</sup> Zi'c rnin lojl chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chit́eé rulúü reeman bejn ree ni ad najt diidxli. <sup>4</sup> Ad chililadx reeman ni rb́eéguijc ree bejn, ad guidxga' t́eé reeman ban za reeman, o chu rajc reeman xbengol gulal reeman, din ad ni guint ree gagné laa reeman par gusnuu chililadx reeman xtiidx Dios.

<sup>5</sup> Canabeen lýj din güün reeman zian din guiguien guial diidxli ŕen lasa' reeman, achet naladx reeman din guiguien t́eé guial guidib luxdoo reeman rililadx reeman xtiidx Dios. <sup>6</sup> Din yu' reeman ad rýjntri zian guial ganax ree ni ren ni ad rýjnt ree sirv rý reeman. <sup>7</sup> Ŕen reeman gulúü reeman bejn ree xhienaag naj xley Dios, abi' ni'qui laa reeman ad ragbeet xhie ŕen guiéb ni rníee reeman ni'quid rignia't reeman ni naladx reeman naj zagdxe culúü reeman bejn ree.

<sup>8</sup> Dunuj ree rayagbee guial zagdxe naj ley guin par b́en rignia' xhie sirv rýjnan. <sup>9</sup> Abi' rayagbee ree guial ad baneet Dios ley guin par ree b́en naban xnejz niz lojman, baneeman ley guin par t́ed ree bejn casti, b́en naban ree zi'ctzi naj xixgab reeman, b́en ad ruzoobt ree diidx, b́en ad yu'guijct ree Dios, b́en rýjn ree dol, b́en ad rajpt ree Dios respejt, b́en ad rýjnt ree naguiejn guién reeman Dios, b́en rugýjt xdad xniaa, ńe par gra ree b́en rugýjt bejn, <sup>10</sup> rýjn t́eén sirv par xcasti ree b́en za'né xingúiaaw o b́engunaa ren, par ree xin ruladx lasa' xingúiaaw gajc o b́engunaa ruladx lasa' b́engunaa gajc, ńe par ree b́en rban bejn ree par guto' reeman laa reeman zi'c mojs, ńet́eé par ree b́en rusquiee ńe ree b́en ruza't Dios par sudxi'chné xguialrusquiee reeman ńe par gra ree b́en rýjn xcontr ni naj diidxli. <sup>11</sup> Diidxli guie ree naj ni źeéd ree loj xtiidxza'cdxoon Jesucrist. Dux Dad ree Dios, b́en rayal respejt, laaman naj b́en basa'nné naj diidx guin ree din gatiechan laa reen.

### *Xhienaag baya Dios Pab*

<sup>12</sup> Quixt́eé Dad Jesucrist laaman cayagné naj, rajp t́eeman naj confianz abi' ba-caabeeman naj par gatiechan xtiidxaman, <sup>13</sup> majsi yaløj gunen laaman diidxguijdx abi' guzunaalan b́en rililadx ree laaman din günan laa reeman ni mal abi' dád naya benné'n laa reeman. Per Dios bayaman naj guial ad bignia'tan ni cayünan din gad naj chililadx Jesucrist. <sup>14</sup> Abi' dád benza'c gojcaman con naj, balúüman naj xhienaag chililadxan balúü t́eeman xhienaag guiénan Dad Jesucrist.

<sup>15</sup> Diidxli ni ganin ĺejt, rayal chililadx bejn: guial Jesucrist bi't loj guidxliuj par güünman xtol bejn perdon, abi' loj gra ree bejn naj naj mazri b́endol. <sup>16</sup> Per majsi najn mazri b́endol, baya Dios naj abi' gojp Jesucrist naj pacens din gagbee ree b́en chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblyaaa con Dios. <sup>17</sup> Zeel zianczi rayal yaya'p reeman respejt yaza't t́eé reeman zagdxe guial najman rey b́en ad yu't dxej guiét, abi' rajpaman guialrniabee par tiblyaaa guial tijbzi laaman naj Dios abi' achut rajc rugúiaa laaman. Amén.

<sup>18</sup> Timoteo, par naj lýj naj zi'c da xi'nán zeel rnin lýj been zi'c gunee reeman xcwentil diidz yaløj, abi' zi'c tijb suldad ni rej loj wadíjl ad guidxebil niz loj ree b́en za' ree contr xtiidx Dios. <sup>19</sup> Guzudxi'ch loj ni rililadxil Jesucrist, been t́eé ganaxzi ree xgab zagdxe par güünl zi'c rayal. Din yu' ree bejn guial ad rýjnt reeman zian, yan ma baníjt reeman

ni rliadx reeman Dios. <sup>20</sup> Zian ma guzajc ree Himeneo con Lejandr, zeel ma bayün laa reeman loj satanás din gusiid reeman guial ad rayalt guiniee reeman Dios diidguijdx.

## 2

### *Xhienaag cwedx guiniab bejn Dios*

<sup>1</sup> Yalojdoo ni rnin lojdi naj guial cwedx guiniabidi Dios, cwedx guiniabidi laaman por gra ree bénguidxliuj, gudëäd tēēdi quixtēē lojman. <sup>2</sup> Rayal yarejdx yanaab ree Dios por ree rey nē por gra ree guxtis loj guidxliuj din chile' yabajn ree zagdxe gusnuu tēē yabajn ree zi'c rēn Dios. <sup>3</sup> Din laan naj ni zagdxe ni rayuladx tēē dux Dad ree Dios, bēn rüjn perdon dux tol ree, <sup>4</sup> bēn rēn guial gra bejn gac perdon guidxin tēē dxej gagbee bejn xhie rēn guiēb xtiidxliman. <sup>5</sup> Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bénguidxliuj. <sup>6</sup> Güjtaman loj crüjz persi gudijxaman por xtol gra ree bénguidxliuj, zian naj ni balüü Dios bejn chi bidxin dxej bacaabeeman gac zian. <sup>7</sup> Zeel bacaabeeman naj gacan xi apóstol Jesucrist din gatiechan xtiidxaman, nē par gusidan bēn ad najt ree bēn Israel conin naj diidxli, xhie tēē naag chililadx reeman Jesucrist, walín ad rusquieetan.

<sup>8</sup> Yan rēnan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin guialrdxe'ch nē sin wadijl. <sup>9</sup> Rēn tēēn guial ree béngunaa su reeman zi'c rayal, ad tēdlaj suchaaw reeman con or, nē ree perl nē ree vistid zagdxe o guial tēdlaj güünchaaw guidxguijc reeman. <sup>10</sup> Din mazri zagdxe güün reeman ni naj zagdxe, zi'c rayal güün ree béngunaa ni ma zinal xnejz Dios. <sup>11</sup> Abi' rayal gucaagdiajz reeman ache guiniee reeman chi rulüü ree xinguaaw xtiidx Dios. <sup>12</sup> Din ad zatiēēbtan guial gulüü tijb béngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee béngunaa xinguaaw, rayal gucaagdiajgzaman. <sup>13</sup> Din Dios, yaloj Adán beenchaawaman, dxelri Eva. <sup>14</sup> Din ad Adánt basquiee reeman, yaloj Eva basquiee reeman, abi' por guialrusquiee guin beenman dol. <sup>15</sup> Per zajc gac béngunaa perdon, bal güün xchiinman zagdxe guial najman na, bal gusnuu chililadxaman Dios, guiēnman bejn ree guiban tēēman xnejz.

## 3

### *Xhienaag guiban ree bēn rniabee*

<sup>1</sup> Gol badxe'guijz da diidxan: Bal chu bēn rēn gap guialrniabee loj gra ree bēn rliadx Jesucrist par gulüüman laa reeman xnejz Dios, zagdxequi naj ni rēnman güünman. <sup>2</sup> Per bēn rajp guialrniabee guin rayal güünman zi'c rayal chitēē chu guinieeguijdx laaman. Rayal chu' tijbzi lacheelaman, guibanman zagdxe chu' tēē xquiarguiejnman din gap ree bejn laaman respejt. Gacaman benza'c con ree bēn rdxin lidxaman, gac tēēman tijb bēn rignia' par gulüüman bejn ree. <sup>3</sup> Ad rayalt gacaman bengui', ni'qui bēn rguuil wadijl ad rayal tēēt yaguiilaman mod par tia'man xmilia ree bejn, rayal gacaman benza'c con chutēēz, gac tēēman bēn naxanladx ad zazēēbladx tēētaman milia. <sup>4</sup> Rayal nabee lidxaman zi'c rayal din gulüü ree xi'nman xhienaag gap reex respejt guzoob tēē reex diidx. <sup>5</sup> Din bal id rajc rniabee lidxaman, ¿xhieza naag nabeeman bēn rliadx ree Jesucrist? <sup>6</sup> Zeel tijb bēn qui guzulojri rliadx Jesucrist, ad rayalt nabeeman loj ree bēn ma rliadx chitēē guilies xvalor gajcaman abi' yayalaman lasa' casti ni bayal xindxab. <sup>7</sup> Bēn rajp guialrniabee guin xt ree bēn ad rliadx Jesucrist rayal güünbee laaman guial najcaman benza'c chitēē yaya'nxtuman abi' güün xindxab laaman gan.

### *Ni güün ree bēn rüjn yudar bēn rniabee ree*

<sup>8</sup> Yan ziangajc ree bēn ma cwabee par güün reeman yudar bēn rniabee ree, rayal güün reeman zi'c rayal din gap ree bejn laa reeman respejt, güün cumplid xtiidx reeman, ad guiē' tēē reeman, ad yaguiil tēē reeman mod par tia' reeman xmilia ree bejn. <sup>9</sup> Con xgabza'c chinal reeman ni ma balüü Dios dunuj ree. <sup>10</sup> Zeel yalojxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din güün reeman

yudar b́en rniabee ree. <sup>11</sup> Ziangajc ree b́engunaa ni ma cwabee par ǵuun reeman yudar, rayal ǵuun reeman zi'c rayal din gap bejn laa reeman respekt ad zaneeguidxt reeman bejn, rayal guiban reeman zagdx e abi' ǵuun cumplid xtiidx reeman. <sup>12</sup> Abi' ree xinguaaw cwabee guin par ǵuun reex yudar b́en rniabee loj ree xbejn Cristo, tijbzi lacheel reex rayal chu', nabee t́e lidx reex con xi'n reex zi'c rayal. <sup>13</sup> Din b́en ŕijn ree sirv zi'c rayal ad respektzi rajp bejn laa reeman, sin guialrdxeb ma zile' guiéb reeman xhienaag rliladx reeman Jesucrist.

#### *Naroob naj b́en raliduladx ree*

<sup>14</sup> Gagńe Dios chile' guialan guidganan ĺij. Per cucan gui'ch guie, <sup>15</sup> din bal gaglaan ma ragbeel xhienaag guiban bejn delant loj los demasri ree xbejn Dios, b́en ma naj ree xbejn Dios naban, abi' za'dxi'ch reeman ruluu t́e reeman xtiidxliman. <sup>16</sup> Dunuj ree rayagbee guial dád b́en naroob najman, b́en raliduladx ree:

Bi'taman loj guidxliuj zi'c tijb b́enguidxliuj,  
ŕeb xSprijt Dios guial laaman naj b́en naya  
abi' baguiaa ree anjl laaman bi'taman loj guidxliuj.  
Bre'ch xtiidxaman loj ree b́en ad najt b́en Israel,  
guidibczi bililadx bejn laaman abi'  
baca' Dios laaman xanyabaa.

## 4

#### *B́en rusa'n ree guialrliladx reeman Jesucrist*

<sup>1</sup> Ma bagojnchaaw xSprijt Dios guial źeéd ree dxej ni yu' ree bejn gusa'n guialrliladx reeman Jesucrist, mazri guidxga' reeman xtiidx ree b́enusquiee ńe gra ree ni źeéd por xindxab. <sup>2</sup> Mazri guidxga' reeman b́enusquiee ree, b́en wed ŕijnz ree, b́en achetri ree rzajc guial ŕijn reeman dol din ma naya' reeman zian. <sup>3</sup> Guiéb reeman guial ad najt guial guxhliaa ree bejn ad zajw t́eét reeman graloj. Per Dios badxe' graloj guialraw par gaw ree b́en rliladx laaman, b́en ma ragbee ree conin naj diidxli abi' gud́eéd reeman quixt́e lojman. <sup>4</sup> Din gra ni badxe' Dios naj zagdx e, achet ni rayal cwexuu bejn tia'man bal gud́eeman quixt́e chi cayawaman laan. <sup>5</sup> Din chi rarejdx ranaab ree Dios con xtiidxaman ŕijnle'man guijc ni yadaaw ree.

#### *B́en ŕijn sirv zagdx e loj Jesucrist*

<sup>6</sup> Zeel bal ruluu b́en rliladx ree Jesucrist zi'c ma rnin, dxel cayújnquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrliladx guin ńe ree diidxza'c ni zinalil. <sup>7</sup> Per ad guidxga'l ni rb́eéguijc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c ŕen Dios. <sup>8</sup> Zagdx e naj par ǵuun bejn graloj ejercijs par gacaman gojl, per loj gra xhiet́eéznin mazri lasajc guiban bejn zi'c ŕen Dios. Din ad lojtzi guidxliuj guie ǵuun sirv guial naban bejn zi'c ŕen Dios, ńegajc xanyabaa lod gap bejn guialnaban tiblayaa. <sup>9</sup> Dunuj ree rayagbee guial ni diidxli naj ree diidx guie, abi' rayal chililadx gra bejn laan. <sup>10</sup> Zeel majsi cayza'can ni cayza'can, per cayguieenan ni cayguieenan guial raliduladxan Dios naban, b́en naban par ǵuunman yudar gra ree bejn, per mazri b́en rliladx ree laaman.

<sup>11</sup> Zian rayal gusiidil bejn ree ǵjdx t́e loj reeman din ǵuun reeman zian. <sup>12</sup> Gojp cudad chit́e guiéb ree bejn guial achet sirv ĺij guial ad wayajctil bengol. Mejorli been naguiejn din gaquil tijb ejempl par ree b́en rliladx Jesucrist, zi'c xhienaag ŕil diidx, zi'c nabanl, zi'c ŕenl ben ren ree, zi'c rliladxil Dios ńe t́e por ree xixgabza'quil. <sup>13</sup> La'tgaj guialan, basnuu biil xtiidx Dios loj ree bejn, guneeńe reeman baluu t́e reeman xhie ŕen guiéb xtiidx Dios. <sup>14</sup> Ad yayanladxil ǵuunl zi'c rayal ǵuunl por quiarguejn ni banee Dios lojl chi badxiib yaa ree bengol guijquil chi gogbee reeman guial ĺij naj b́en gule Dios.

<sup>15</sup> Badxe'guijc diidx guie ree din gagbee gra ree bejn guial cusnuu źel delant. <sup>16</sup> Gojp ĺij con ni rusiidil bejn ree. Guzujdx'i'ch loj ni ma ragbeel, zian yab́e ĺij gajc loj casti yab́e t́eél b́en cucaagdiajg ree xtiidxil.

## 5

*Xhienaag güün Timoteo con ree bén rlladx Jesucrist*

<sup>1</sup> Ad tilnël tijb bengol, badëëman consejw zi'cgajc xdadil, abi' xin naj ree xinguiag, badëë reex consejw zi'cgajc bijchil. <sup>2</sup> Ziangajc béngunaa bengol ree badëë reeman consejw zi'cgajc xniaal, abi' biinguiag ree, badëë reem consejw zi'cgajc bizanl con xgabza'c.

<sup>3</sup> Bidxga' ree béngunaa bizëjb ni diidxli achut rajp. <sup>4</sup> Per bal tijb béngunaa bizëjb guin yu' ree xi'n o xiajg, dxel yalaj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdxe, zian tée ruladx Dios. <sup>5</sup> Béngunaa naj diidxli bén bizëjb, bén ad rajptri chunin loj guidxliuj guie, tijbzi Dios naj bén yu'guijcaman güün laaman yudar dxel ad rucwëëzt rbejdx rniabaman laaman dxej guiaal. <sup>6</sup> Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. <sup>7</sup> Bagojn gra ree diidx guie bén ma rlladx ree Jesucrist chitëë chu guinieeguijdx laa reeman. <sup>8</sup> Din bén ad rüjnt yudar xcompniar, abi' ni'qui xfamilaman bén zojb ree lidxaman ad rüjntaman yudar, laaman ma basa'n ni rlladxaman abi' piorli najman guial loj ree bén ad rlladxt Jesucrist.

<sup>9</sup> Ad tia'l laj chutëëz béngunaa bizëjb par gac reeman yudar, naabzi ree béngunaa bizëjb bén ma nadëd ree gayojn ijz abi' ad guzunëtaman ben ren la'tgaj naban lacheelaman. <sup>10</sup> Bal nünbee tée ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badëë lidxaman baya'n ree bejn bal gojcaman benza'c con ree bén rlladx Jesucrist bén bidxin ree lidxaman, bal beenman yudar bén rzagdiaj ree, bal been tëëman naguiejn beenman ganax ni zagdxe.

<sup>11</sup> Per ad tia'l laj ree béngunaa bizëjb benguiag ree, din despuejs rën reeman guxhliaa reeman abi' ad rüjntri reeman ni rayal güün reeman por Cristo guial rën reeman guxhliaa reeman stijb. <sup>12</sup> Dxel rüjn reeman dol guial ad rüjntri reeman ni ma been reeman compromis con Cristo. <sup>13</sup> Abi' tée ree benguiag guin zë reeman yu yu, zianz rajc reeman costumbr achetzi rüjn reeman. Abi' ad laatzan, rzuloj ruza't reeman bejn, ru reeman loj xhietëëznin abi' rniee reeman ni ad rayalt guiniee reeman. <sup>14</sup> Zeel rënan guial bén naj ree béngunaa bizëjb benguiag, mejorli guxhliaa reeman stijb, chu' xi'n reeman nabee tée lidx reeman zi'c rayal, chitëë gudëëd reeman mod guinieeguijdx ree bén ralen ree dunuj ree laa reeman. <sup>15</sup> Din yu' ree béngunaa bizëjb ma guro'nladx reeman xnejz Dios abi' ma zinal reeman xnejz xindxab.

<sup>16</sup> Abi' bal tijb bén rlladx Jesucrist naj xfamilaman tijb bén baya'n bizëjb, dxel laaman rayal güün yudar béngunaa bizëjb guin chitëë gacan mazri carg par ree dux compniar ree bén rlladx ree Jesucrist. Zian güün reeman yudar béngunaa bizëjb diidxli achutri rajp loj guidxliuj guie.

<sup>17</sup> Bén rlladx ree Jesucrist rayal gap reeman respejt bén rniabee laa reeman në ree bén rniee rulüü tée xtiidx Dios zi'c rayal, gudëë tëëdi loj reeman gra ni ryaadx reeman. <sup>18</sup> Din loj xtiidx Dios rëb: “Ad gudxe'di guijxh ro' ree begui'xh la'tgaj cayüjn reeb dxiin”, rëb tée loj xtiidx Dios: “Rayal gax bén rüjn dxiin”.

<sup>19</sup> Ad guidxga'di ni rudxiib ree bejn guijc tijb ree bén rniabee ree bén rlladx Jesucrist, bal id yu' tio'p choon ree bejn rëb guial diidxli naj ni rniee reeman por laaman. <sup>20</sup> Per bal tijb bén ma ca' gualrniabee rusnuu rüjnman dol, rayal guinieenël laaman delant loj gra reeman din guidxeb los demazri reeman.

<sup>21</sup> Yan por Dios, por Jesucrist në por ree anjl ni ma gulejman, naj rni badxe'guijc been tée zi'c ma rnin ad cwel loj ree bejn, tiblojzi been con gra reeman. <sup>22</sup> Gojp cudad cwel tijb bén ni nabee din ad ragbeetil bal yu' ni mal cayüjnman, dxel güün ree bejn xgab guial nëgajc lüj ruladx ni cayüjnman. Gojp cudad graloj ree dol.

<sup>23</sup> Në guial guië't guië't ragxuu lënl guial ad nadaant lënl, ad rë'l nijs lagajzi mejorli gu' tilda'n vin.

<sup>24</sup> Yu' reeman laa rguien gajc xhie dol cayüjn reeman diizd chi gad reeman gudëed cwent loj Dios, per yu' reeman ad rguient xhie dol cayüjn reeman xt chi yadëed reeman cwent loj Dios. <sup>25</sup> Ziangajc yu' ree bén ni laa rguien gajc ni zagdxe ni cayüjn reeman, abi' yu' reeman ni'quid rguient ni zagdxe ni cayüjn reeman, per yu' dxej gagbee ree bejn laan.

## 6

<sup>1</sup> Gra ree mojs rayal gap reeman respejt xpatron reeman chitëe chu guiniee diidxguijdx contr Dios o contr xtiidxaman ni caylüün. <sup>2</sup> Abi' bal rliladx patron guin Jesucrist dxel rayal gap reeman laaman mazri respejt guial nëman rliladx Jesucrist zi'cgajc laa reeman. Abi' tëe rayal güün xchiin reeman zi'c rayal guial cayüjn reeman sirv tijb xcompniar reeman bén rliladx Jesucrist compniar ni rën reeman. Zian balüü ree bejn güjdx tëe loj reeman din güün reeman zian.

### *Guialnaza'c ni naj diidxli*

<sup>3</sup> Bal yu' bén rulüü diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulüütaman bejn ree, <sup>4</sup> najzaman bendxal. Din ruladxaman tildiidxaman abi' ni'quid xnejzt rnieeman, dxel ni zëed guialnadëdloj, guial rdxe'ch, guial rniee diidxguijdx abi' ad rliladxtri lasa' reeman, <sup>5</sup> ad rucwëëzt rdil reeman por ree ni ad rüjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bén naj ree zian, biquied loj reeman. <sup>6</sup> Dad ben rijcw naj bejn chi ma rliladxaman Jesucrist, per bén za' conform con ni rajptzaman. <sup>7</sup> Din achet budnë' ree loj guidxliuj ache tëet zajc yunë' ree chi yayëjt ree. <sup>8</sup> Bal raya'p ree ni yadaaw ree në lajd ni yadojt ree con laan rayal yaya'n ree conform. <sup>9</sup> Per ree bén rzëëbladx gac reeman rijcw loj guidxliuj guie ad rilet' sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rnijt reeman. <sup>10</sup> Din guial rzëëbladx milia laan naj xliuj gra ni mal. Abi' yu' reeman por guialrzëëbladx guin ma basa'n reeman ni rliladx reeman Dios abi' laagajc reeman cusagdiaj laa reeman.

### *Ni rayal güün Timoteo*

<sup>11</sup> Per lüj Timoteo, xbejn Dios, briica loj ree ni mal guin. Been naguiejn guibanl zagdxe, guibanl zi'c rën Dios, bililadxaman, gojc bén naxanladx, gojp pacens guyën tëe ree ben ren. <sup>12</sup> Been da't naguiejn guzudxi'ch loj ni rliladxil xtiidx Jesucrist. Ad gusëebil guialnaban ni naj guialnaban tiblyaaa, din par zian gulejman lüj abi' rëbil delant loj zien ree bejn xhienaag rliladxil Jesucrist. <sup>13</sup> Yan, por Dios bén razaladx guialnaban loj gra ni yu' loj guidxliuj në por Jesucrist bén ni gunee sin guialrdxeb loj Poncio Pilato, naj rniabee lüj <sup>14</sup> din guzoobil diidx güünl ni rnin lojl, sin guial guchaal xhienin chitëe guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb. <sup>15</sup> Gui'taman dxej ni nabee Dios gui'taman, Dios bén rayal respejt bén naj tijbzi Dios rajp tëeman gra guialrniabee, bén naj xrey ree rey naj tëeman xDad ree dad. <sup>16</sup> Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bénguidxliuj ad waguiaat laaman ad zajc tëet guguaa bejn laaman. ¡Par laaman naj respejt në guialrniabee par tiblyaaa! Amén.

<sup>17</sup> Bén naj ree benrijcw loj guidxliuj guie, güjdx loj reeman ad güün reeman benro' ad cu'guijcx tëe reeman guial ni rajp reeman najn par tiblyaaa, din guialnaza'c ni rajp bejn yu' dxej yaran. Mejorli cu'guijcx reeman Dios bén naban din laaman razaladx da't dunuj ree graloj din chu' du luxdoo ree nix. <sup>18</sup> Güjdx loj reeman din güün reeman ni zagdxe, güün reeman zien ree ni rüjn sirv, cu' tëe luxdoo reeman zagdxe güün reeman yudar bénprob ree. <sup>19</sup> Abi' zian guto'p reeman guialnaza'c ni güün laa reeman yudar loj ree dxej ni zëed din yayal reeman guialnaban tiblyaaa xanyabaa.

### *Xconsejw Pab*

<sup>20</sup> Timoteo, badxe'guijc ni rayal güünl, Ad guidxga'l diidxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree bén ni naladx guial rajc da't reeman abi'za ad walit ni rajc reeman. <sup>21</sup> Din yu' ree bén rüjn zian yan, abi' ma basa'n reeman guialrliladx reeman Dios.

Dios güünle' lüj Timoteo. Amén.

## Gui'ch barojp guxhaal San Pabl loj Timoteo

### *Rugajpdioz Pab Timoteo*

<sup>1</sup> Naj Pab, najn tijb xi apóstol Jesucrist, Dios gule naj din gatiechan diidx por promejs ni beenman guial gudëédaman guialnaban tiblyaa loj ree bën rliladx Jesucrist. <sup>2</sup> Naj caxhal gui'ch guie par lüj Timoteo bën rënan zi'c da xi'nan. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

### *Guialrulüü xcwent Jesucrist*

<sup>3</sup> Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bën rünan sirv con guidib luxdon zi'c been ree da bengol gulalan been reeman laaman sirv. <sup>4</sup> Chi rusaaladxan ni biinl, ma rën nejzdoon guguan lüj din yayu luxdon zagdxe. <sup>5</sup> Yu'guican guial lüj diidxli rliladxil Jesucrist, yaloj xnaxüjsil Loida con xniaal Eunice bililadx laaman zian, zeel ragbeechaawan guial ziangajc rliladxil laaman.

<sup>6</sup> Zeel rnin lojl, been naguiejn din guiguien quiarguiejn ni baneë Dios lojl chi badxib yan guijquil. <sup>7</sup> Din ad baneet Dios xSprijtaman duloj ree par yadxeb ree, baneë xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdxe. <sup>8</sup> Zeel ad yatul guinieel xtiidx Dad Jesucrist, ad yatu nëtëël naj yu'n ladxguiib por laaman, con xyudar Dios gudaan guialzi ni rayal tädil guial guitie'chil xtiidxza'c Jesucrist. <sup>9</sup> Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diizd chi gad guidxliuj gacchaaw beenman xgab guial por Jesucrist gulüüman dunuj ree xhienaag rënman dunuj ree. <sup>10</sup> Yan bi't Jesucrist bën güt por dux tol ree, rayagbee ree guial diidxli rën Dios dunuj ree. Abi' Jesucrist naj bën biquied guialrniabee loj guialgüjt abi' zian biguien guial yu' guialnaban, guialnaban tiblyaa par ree bën rliladx xtiidxaman.

<sup>11</sup> Zeel gulej Dios naj din gacan xi apóstol Jesucrist, din ganen xtiidxaman gulü tëën laan bën ad najt ree bën Israel, <sup>12</sup> abi' por zian cadëédan guialzi ni cadëédan. Per ad ratutan por zian, din naj ragbee chu rliladxan, abi' ragbeen guial laaman rajp guialrniabee par cu'chaawaman ni basa'nan lojman xt dxej ni gui'taman stijb.

<sup>13</sup> Badxe'guijc binal tëë ree diidxza'c ni ma balün lüj, tant zi'c rliladxil Dios në zi'c rën ree lasa'l guial ma nayajc ree tijbzi con Jesucrist. <sup>14</sup> Abi' con xyudar xSprijt Dios bën naban con dunuj ree, gojp ni baneë Dios güünl.

<sup>15</sup> Lüj ragbee guial gra ree bën zojb niz Asia ma gulëëladx reeman naj, loj reeman no'ch Figelo con Hermógenes. <sup>16</sup> Dios gagnë ree xfamil Onesíforo, din laaman dád zien volt bagu'man luxdon. Abi' ad batunëtaman naj yu'n ladxguiib, <sup>17</sup> naabzi bi'taman Rom baguuilaman naj xt lodzi badxejlaman naj. <sup>18</sup> Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

## 2

### *Zi'c tijb xsuldad Jesucrist*

<sup>1</sup> Guiáad lüj xi'ngaan, guzujdxi'ch loj yudar ni raya'p ree por Jesucrist. <sup>2</sup> Abi' ni biguiejnl rën delant loj zien ree bejn, balüün loj ree bën diidxli rliladx, bën ni zajc gulüü ree ben ren.

<sup>3</sup> Zi'c tijb suldadza'c, zian gudaan ree guialzi, zi'c najl xbejn Jesucrist. <sup>4</sup> Ni'qui tijb bën naj suldad ad rut loj ni ad najt xcwent ree suldad par chile' yaya'nman zagdxe loj bën rniabee laaman. <sup>5</sup> Ziangajc bën ni rguijt xhie tijb nin, rayal quitaman xnejz din chile' tia'man prem. <sup>6</sup> Abi' bën rüjn dxiin dajn, yaloj xgaj rüjn da'taman dxiin din gac yaca'man guialnaza'c. <sup>7</sup> Been xgab ni canin lojl, abi' Dad Jesucrist gagnë lüj din chignia'l gra. <sup>8</sup> Basaaladx Jesucrist, bën güt abi' babanman, bën zëéd loj xdiaa rey Davi, zian naj xtiidxza'caman ni catiechan. <sup>9</sup> Abi' por zian cadëédan guialzi, xt naxiin lën ladxguiib zi'c

tijb benmal, per xtiidx Dios ad naxiitan. <sup>10</sup> Zianan zeel rdaanan gra par günan yudar bén ni ma naj ree par Dios, din gap reeman perdon por Jesucrist yayal tää reeman guialnaban za'cdxoon ni naj par tiblayaa.

<sup>11</sup> Waliqui ree diidx ni rëb:

Bal ma bayëjt ree con laaman,  
ziangajc yabajn ree con laaman.

<sup>12</sup> Bal radaan ree xhietëöz ni raza'c ree,  
ziangajc yanabee ree con laaman.

Bal raguie'ch ree guial ad naguieenbeet reeman,  
ziangajc guiëbaman guial ad nünbeetaman dunuj ree.

<sup>13</sup> Bal id raguieen ree cumplid dux tiidx ree,  
per laaman rüjn cumplid xtiidxaman  
din ad zajct guidxaa zi'c najman.

### *Tijb bén raya'n zagdx con xchiin*

<sup>14</sup> Güjdx loj ree bejn din gusaaladx reeman ni guie ree, abi' por Dios güjdx loj reeman guial ad rdildiidx reeman por ree ni ad rüjnt yudar, ruxhiinzan bén ni riguijcn ree laan.

<sup>15</sup> Been xt lod chile' güünl din yaya'nl zagdx loj Dios, din chibiguil lojman zi'c tijb bén ni rüjn dxiin abi' achet ni gustu laaman, guial cayüjnl xnejz con xtiidx Dios. <sup>16</sup> Ad gül diidx ni ad rüjnt sirv, ni ad rüjnt yudar bejn ree. Din bén rüjn ree zian zi'cri zinal reeman nejz mal, <sup>17</sup> abi' xtiidx reeman naj zi'c tijb guialgüjdx ni rigaa. Lasa' ree bén guin naj Himeneo con Fileto, <sup>18</sup> din ad zinaltri reeman zi'c naj xtiidx Dios. Rëb reeman guial xcwent guial yaban ree bengüt mal gudëd gojc zian, abi' rüjndxa reeman xguialrliladx tio'p choon ree bejn. <sup>19</sup> Per xtiidx Dios ad zajct guidxaaan zi'c tijb guiaj ni zojbdx'i'ch. Abi' loj xtiidx Dios rëb: "Dios nünbee bén naj ree xbejnman", rëb tää loj xtiidxaman: "Graczi ree bén rëb guial nünbee reeman Dios rayal gusa'n reeman gra ni mal."

<sup>20</sup> Lën tijb yu narooob, ad ganaxt ree ni or yu' o ni plajt, nëgajc ree ni goc con yag në con bajn yu'. Din yu' reen rüjn sirv guixie guixie, yu' tää reen ma naj dxej rüjn reen sirv.

<sup>21</sup> Yan ziangajc bén ni rüjn naguiejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par güünman gra ni naj zagdx.

<sup>22</sup> Zeel basa'n xixgab xinguiag, xgab ni ad rüjnt sirv, gubajn xnejz. Binal guialrliladx, guialrën lasa' në guial yabedxe luxdoo con los demasri ree bén ni con guidib luxdoo rbejdx rniab Dad Jesucrist. <sup>23</sup> Ad tildiidxil por tijb ni ad züjntil gan, o por tijb ni ad lasajct par tildiidxil, din lüj ragbee guial por zian rzuloj wadijl. <sup>24</sup> Abi' tijb bén ni rüjn sirv Dad Jesucrist ad rayalt gacaman bén ruladx wadijl, rayal gacaman benza'c con chutëöz, rayal gacaman tijb bén ni gac gulüü ree bejn, gacaman bén pacens <sup>25</sup> guzuxnejz tääman con ree diidxzagdx Bén ni rüjn ree xcontr ni naj diidxli. Abi' rupent zian güün Dios guial yayüjn reeman xgab din gagbee reeman ni naj diidxli. <sup>26</sup> Par laa reeman loj xtramp xindxab ni rniabee laa reeman güün reeman ni rënman.

## 3

### *Xhienaag gac ree bejn dxej ni bigra ree*

<sup>1</sup> Rayal tää gagbeel Timoteo guial dxej ni bigra ni zëöd ree, dád nawëög gacan par ree bejn guial guiban reeman. <sup>2</sup> Din bejn ree, par laagajc reeman güün reeman xgab, ganaxzi milia güün reeman xgab, abi' güün reeman benro', ganax ree diidxdxal guiniee reeman, guinieegüjdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios, <sup>3</sup> ad zëntri reeman ad zaya täätri reeman bejn ree. Ganax diidx rusquiee guiniee reeman bejn ree, ad zucwëöz güün reeman ni dxuudx ree, dád Bén nayaaladx gac reeman, abi' guidxe'ch reeman ni naj zagdx. <sup>4</sup> Yayü reeman laagajc ree Bén ni rajp laa reeman confians, sin guialrdxeb guiniee reeman xhietëöz ni gui't guijc reeman, dád guilies xvalor



reeman, mazri ma güün reeman ni rëntzi reeman guial loj zi'c rën Dios. <sup>5</sup> Gulüü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bén ni naj ree zian. <sup>6</sup> Din loj reeman no'ch bén ni ru ree lidx ree bejn, abi' rüjn reeman gan béngunaa ni naban ree con gadxagayaa ree dol, con gadxagayaa ree xgab ni ad rüjnt sirv, tibrajtzi rliladx reeman laa reeman <sup>7</sup> béngunaa guin ree zianczi rusiid reeman, per ad ragbeetczi reeman ni diidxli. <sup>8</sup> Gulal bén ni brii ree laj Janes con Jambres been xcontr reeman Moisejs. Yan ziangajc naj ree bén ni za' ree contr ni naj diidxli, laa reeman ma guxin xquiargueijn reeman, ad zinaltri reeman zi'c rayal chililadx reeman. <sup>9</sup> Per ad xchejt güün reeman zian, din gra ree bejn gagbee guial rusquiee reeman zi'c goc con Janes në Jambres.

#### *Rniabee Pab sudxi'ch Timoteo loj ni basiidaman*

<sup>10</sup> Per lüj Timoteo, ragbeel zagdxe xhie rulün bejn ree, xhienaag naban, xhienaag naj da xgaban, xhienaag rliladxan, xhienaag ra'pan pacens, xhienaag rënan bejn ree, xhienaag rdaanan, <sup>11</sup> xhie ma been ree bejn naj, xhie tää ree guialzi ma gudëedan. Lüj ragbee xhienaag guza'can luguiedx Antioquia, Iconio con Listra. Dád ma guzaagdiajn por gra ni ma been ree bejn naj, per Dios babëe naj loj gra ree guialzagdiaj guin. <sup>12</sup> Abi' dunuj ree rayagbee guial gra ree bén ni rën guiban zi'c rën Dios guialrliladx reeman Jesucrist, naj sagdiaj reeman por ni güün ree bejn laa reeman. <sup>13</sup> Per ree ben mal con ree bén rusquiee, zi'cri zinal reeman nejz mal, rusquiee reeman bejn ree rusquiee tää laagajc reeman.

<sup>14</sup> Per lüj basnuu guzudxi'ch loj ni ma basiidil, në loj ni ma rliladxil, din lüj ragbee chu ree nin basiid lüj. <sup>15</sup> Abi' lüj diizd xindool nünbeel xtiidx Dios, diidx ni zile' güün lüj yudar gagbeel xhienaag naj perdon ni zëed por guialrliladx Jesucrist. <sup>16</sup> Gra ni zëed loj xtiidx Dios, por Dios zëedan. Abi' rüjnan sirv par gusiid bejn bejn ree, par gudëe bejn consejw, par guzuxnejz bejn bejn ree, në par gagbee bejn xhienaag rayal guibanman, <sup>17</sup> din gagbee xbejn Dios guidiblagaa din güünman graloj ni naj ni zagdxe.

## 4

<sup>1</sup> Delant loj Dios në delant loj Jesucrist, bén gui't zi'c tijb rey par güünman guialguxtis loj ree bén naban në loj ree bén ma güjt, naj rni lojl, <sup>2</sup> gutie'ch xtiidx Dios. Been naguieijn gunee xtiidxaman ad chi yu'tzi mod. Been naguieijn chililadx ree bejn ni rnieel, gudilë ree bén ad ruzoobt diidx, badëe tää consejw loj ree bejn, balüü reeman sin guial yalenyal. <sup>3</sup> Din zadxin dxej ad zatiëjbt ree bejn gucaagdiajg reeman ni naj diidxli, ma güün reeman zi'ctzi rën reeman, zaguiil reeman zien ree bén gulüü laa reeman ganax ni ruladx reeman gucaagdiajg reeman. <sup>4</sup> Ad zidxga'tri reeman ni naj diidxli, mazri ma guidxga' reeman ni rbëëguijc ree bejn. <sup>5</sup> Per lüj Timoteo, gubajn nadëdguien, gudaan xhietëez guialzagdiaj tädil, gutie'ch xtiidxza'c Jesucrist, been mandad ni banee Dios lojl güünl.

<sup>6</sup> Din naj zamer gugüjt reeman naj, ma zidbig guialgüjt par naj. <sup>7</sup> Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal günan abi' ad basa'ntan ni rliladxan. <sup>8</sup> Yan prem ni rayalan ma cabëzan naj, prem ni gunee Dad Jesucrist lon chi guidxin dxej, bén rüjn guialguxtis zi'c rayal. Abi' ad lotzan gunee man prem guin, në loj gra ree bén yu' luxdoo nix cabëz reeman laaman.

#### *Ni rayal güün Timoteo*

<sup>9</sup> Been naguieijn diob guidganajl naj, <sup>10</sup> din Demas ma guro'nldaxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. <sup>11</sup> Tijbzi Lujc za' con naj. Chi gui'til tanë Marcw din zile' güünx yudar gutie'chix xtiidx Dios. <sup>12</sup> Tíquico ma guxhalan laaman luguiedx Éfeso. <sup>13</sup> Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tää guidnël da gui'ch reen.

<sup>14</sup> Lejandr bén naj herrer, dád zien ree ni mal ma beenman naj, per con Dios yaguijxaman gra ni beenman. <sup>15</sup> Gojp ciudad con laaman, din laaman dád rüjn xcontraman ni ranee ree.

<sup>16</sup> Yaloj chi guzun loj ree guxtis achutczi been naj yudar, graczi reeman guro'nladx naj. Gagnë Dios ad zidxga'taman ni been reeman. <sup>17</sup> Per Dad Jesucrist been naj yudar baneë tääman naj gojl persi baloox gutiechan xtiidxaman, persi biguiejn ree gra ree bén ad najt bén Israel laan. Zian baslaa Dios naj, zi'c rliaa tijb bejn loj beedx. <sup>18</sup> Abi' Dad Jesucrist, laaman yabëë naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianczi! Amén.

*Diidx bigra ca loj gui'ch guie*

<sup>19</sup> Bagajpdioz Prisca në Aquila në ree xfamil Onesíforo. <sup>20</sup> Erasto baya'nman Corinto, guiáad Trófimo ragxuuman basa'nan laaman luguiedx Mileto. <sup>21</sup> Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bén rliladx Jesucrist rugajpdioz reeman lüj.

<sup>22</sup> Dad Jesucrist gagnë lüj, abi' Dios güünle' gradi. Amén.

## Gui'ch guxhaal San Pabl loj Tito

### *Rxhial Pab xtiidx Dios*

<sup>1</sup> Naj Pab cayünan Dios sirv, naj najn xiapó stol Jesucrist par günan yudar bën ma naj ree par Dios xhienaag chililadx reeman laaman din gagbee tää reeman diidxli xhienaag guiban reeman delant loj Dios, <sup>2</sup> din yu'guijc ree guial zian yaya'p ree guialnaban tiblayaa delant loj Dios. Diizd chi gad guidxliuj gacchaaw, rëbaman guial yazaladxaman guialnaban guin, abi' dunuj ree rayagbee ree zagdxe guial ad rnieet Dios diidx rusquiee. <sup>3</sup> Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bën ni rüjn dux tol ree perdon. <sup>4</sup> Cuan gui'ch guie par lüj, Tito, guial najl zi'c da xi'n nan guial tiblojzi raliduladx Jesucrist. Dux Dad ree Dios con Jesucrist bën güt por dux tol ree, yaya reeman lüj, güünle' reeman lüj yabe'cdxe tää reeman luxdool.

### *Dxiin ni been Tito guiedx Creta*

<sup>5</sup> Naj basa'n lüj niz Creta din güünl ni ryaadx günan ni. Abi' tijbgaj luguiedx gucaabeel bën ni nabee ree loj ree xbejn Cristo zi'c ma rnin. <sup>6</sup> Chi gucaabeel laa reeman rayal gucaabeel bën ni naban ree zi'c rayal chitää chu guinieeguijdx laaman, bën ni yu' tijbzi lacheel, rliladx tää ree xi'nman Jesucrist, bën ni nünbee ree bejn guial ad nabant ree xi'nman zi'ctzi rën reex ad najt tää reex xin rusagloj. <sup>7</sup> Din bën rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiëbaman güün sirv, ad rayalt gacaman bënralenya', ad rayalt gacaman bengü', ni'qui ben ruladx wadijl, ad zaguiil täätaman mod xhienaag tia'man xmilia ree bejn. <sup>8</sup> Rayal gacaman bën ni gudää lidx yaya'n ree bejn chi rüjnan naguiejn, bën ruladx güün ganax ni zagdxe, gac tää nabee laagajcaman. Rayal gacaman benza'c, guibanman zi'c rayal delant loj Dios në delant loj ree bejn, ad rayalt guibanman zi'ctzi rënman. <sup>9</sup> Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tääman bën ni rnieeguijdx ree xtiidxli Dios.

<sup>10</sup> Din dád zien ree bën ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bën Israel ni rulüü ley loj reeman no'ch mazri lasa' ree ben guin. <sup>11</sup> Lasa' ree bën guin ad rayaltri yatiëeb ree gulüü reeman bejn ree, din dád zien ree yu ma beendxa reeman gra tijb famil guial rulüü reeman laa reeman ni ad rayalt naabzi par güün reeman gan milia.

<sup>12</sup> Tijb gajc bën ladx reeman bën rëb reeman naj bën badää xtiidx Dios loj ree bejn, laaman rëb guial ree bën Creta ganax diidx rusquiee rniee reeman, dád nadoxh reeman, dád bën nala naj reeman abi' achetczi rën reeman güün reeman. <sup>13</sup> Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal, <sup>14</sup> ad guidxga'ri reeman ni rbëeguijc ree bën Israel, ad güün teë reeman ni rniabee ree bën ni ma guro'nladx ree ni naj diidxli.

<sup>15</sup> Bën naya ree xquiargueijn, achet xgab mal rüjn reeman. Per ree bën rüjn ganax xgabdxuudx, bën ad rliladxt, achetczi xgab zagdxe rüjn reeman guial ad nayat xquiargueijn reeman, ganax ree xgab mal yu' guijc reeman. <sup>16</sup> Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusagloj tää reeman, ni'qui tijb ni rüjn sirv ad rajct rüjn reeman.

## 2

### *Ni rayal gulüü Tito*

<sup>1</sup> Per lüj Tito, balüü ree bejn gra zi'c tal naj xtiidxza'c Dios. <sup>2</sup> Balüü ree bengol din guiban reeman zagdxe, gustëdguien reeman din gap bejn laa reeman respekt, guidib luxdoo reeman chililadx reeman, guiën reeman bejn ree, taan tää reeman xhietääz ni sac

reeman. <sup>3</sup> Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengul'. Rayal gulüü reeman bejn ree xhienaag naj ni zagdxe, <sup>4</sup> rayal gulüü reeman béngunaa guiag ree din guiën lacheel reeman con xi'n reeman, <sup>5</sup> din guiban tää reeman naya delant loj Dios, nadëdguien, guinia lidx reeman, gac reeman benza'c guzoob tää reeman xtiidx lacheel reeman chitëe chu guinieeguijdx xtiidx Dios.

<sup>6</sup> Ziangajc lüj Tito, badëe consejw loj ree xinguaaw guiag din guiban reex nadëdguien. <sup>7</sup> Been naguiejn din güünl gra xnejz din guguaa reex xhienaag güün reex ni naj zagdxe. Chi rulüül laa reex, balüü reex zagdxe zi'c rayal, <sup>8</sup> con ganax ree diidx zagdxe chitëe xhie gudxiib ree bejn guijquil, din yaya'nxtu ree bén ni rdxe'ch dunuj ree guial achet yadxelj gudxiib reeman duguij ree.

<sup>9</sup> Badëe tää consejw loj ree bén naj ree mojs din guzoob gra xtiidx xpatron reeman, gac reeman benza'c ad yadxi'ro' reeman. <sup>10</sup> Ad cwan reeman xhie xieen xpatron reeman, gac reeman bén confians din guguaa gra ree bejn xhienaag naban reeman guial niza'cdxoon naj xtiidx dux Dad ree Dios bén rüjn dux tol ree perdon.

<sup>11</sup> Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon. <sup>12</sup> Guial rënman dunuj ree rayagbee ree guial rayal yasa'n ree ni mal con ree ni ad rünjt sirv ni rayën ree yaguieen ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie <sup>13</sup> la'tgaj caylëz ree dxej za'cdxoon ni gac cumplid xtiidxza'caman zi'c ma naman duloj ree guial gui't dux Dios ree Dad Jesucrist con xguialrniabeeman, bén been perdon dux tol ree. <sup>14</sup> Laaman güit por dunuj ree din yabëeman dunuj ree loj gra dol abi' basiaman dunuj ree din yayajc ree xbejnzaman abi' yaguieen ree naguiejn yaguieen ree ganax ni zagdxe.

<sup>15</sup> Gra ni ma rnin lojl balüün laa reeman sin guialrdxeb badëed reeman consejw, bazuxnejz reeman con guialrniabee ni ca'l. Ad tiëbil gusagloj reeman lüj.

### 3

#### *Ni rayal güün ree bén rliladx Jesucrist*

<sup>1</sup> Basaaladx reeman din güün reeman ni rëb ree bén rniabee laa reeman në ni rëb ree guxtis, gac reeman bén nacaagdiajg susin tää reeman par güün reeman ni naj zagdxe.

<sup>2</sup> Ad guinieeguijdx reeman bejn ree, ad quiil reeman wadijl, gac reeman benza'c në bënchaawladx con chutëez bënan.

<sup>3</sup> Gocli nëgajc dunujn baguieenan zi'ctzi bayënan, ad bazoobtan diidx, badxu'n loj nejz mal, baguieenan ni bayëntzan në zi'ctzi naj dux xgaban. Baguieenan ganax ni ad najt zagdxe, bayajcan bén nadëdloj, bidxe'ch ree bejn dunujn abi' badxe'ch gajcan laa reeman. <sup>4</sup> Per chi bidxin dxej dux Dad ree Dios bén baguijx por dux tol ree, balüüman loj ree bejn guial najman benza'c rën tääman bejn. <sup>5</sup> Laaman been dux tol ree perdon, per ad guial baguieent ree xhie ni rüjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb. <sup>6</sup> Por Dad Jesucrist bén baguijx por dux tol ree, Dios bazaladx dunuj ree zro' da't xSprijtaman. <sup>7</sup> Dxel zi'cgajc laaman ma nulabaman dunuj ree sin dol guial najman benza'c, yalay ree guialnaban tiblayaa ni ralëz ree.

<sup>8</sup> Laan naj diidxli. Zeel rënan gusnuu gugojnl diidx guie ree bén ni rliladx ree Dios din güün reeman naguiejn güün reeman ni naj zagdxe. Abi' nine ree naj ni zobjloj në ni güün sirv par gra ree bejn. <sup>9</sup> Per ad guidxga'l diidx ni ad rünjt ree sirv ni rniee ree bejn, ad guidxga'l xtiidx ree bén ni ru ree xgab mazri chunin naj diidxli xdiaa gulal ree bejn. Ad guidxga'l tää bén ni rdildiidx ree por xley Moisejs, din ad najtan ni zobjloj achet tää lasajc ni rniee reeman, achetci sirv rüjn ree ni guin.

<sup>10</sup> Bal por tijb lëjt rzuloj rlia' lasa' ree xbejn Cristo, guneenëman tib volt o tio'p volt, abi' bal id ruzoobaman xtiidxil mejorli babëëman lojdi. <sup>11</sup> Din lüj ragbee guial lasa' ree bén guie ma guro'nladx reeman ni naj diidxli abi' laagajc reeman cunijt laa reeman por xtol reeman.

*Ni rayal güün Tito*

<sup>12</sup> Chi gaxhalan Artemas o Tíquico lod zobjil, been da't naguiejn tagnaj naj luguiedx Nicópolis, din ni ma benan xgab gadëedan tiamp nayaag. <sup>13</sup> Been tée yudar Apolos në licenciad Zena zi'ctzi gaquil. Badëe gra ni ryaadx reeman din chinal xnejz reeman chitëe xhie guiyaadx reeman. <sup>14</sup> Në ree dux compniar ree rayal gusiid güün ni naj ni zagdx, güün reeman yudar chi rüjn naguiejn güün reeman yudar chitëe guiban xlia'zi reeman.

*Diidx bigra ca ree loj gui'ch guie*

<sup>15</sup> Gra ree bén za' con naj rugajpdioz reeman lüj. Bagajpdioz sii gra ree bén rën dunujn por gualrliladx ni raya'pan. Dux Dad ree Dios güünle' gradi. Amén.

## Gui'ch guxhaal San Pabl loj Filemón

<sup>1</sup> Naj Pab, yu'n ladxguiib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayën da'tan lüj. <sup>2</sup> Raxhaal tëen gui'ch guie par gra ree bën rliladx Jesucrist bën rado'p ree lidxil, në par Apia nētēē par Arquipo, bën naj dux compniar ree caytie'ch ree xtiidx Jesucrist. <sup>3</sup> Dux Dad ree Dios në Dad Jesucrist güünle' lëjt yabe'cdxe tëē reeman luxdoodi.

### *Rudëe Pab quixtëe loj Dios por Filemón*

<sup>4</sup> Beegaj chi rbedx rniaaban Dios rudën quixtëe lojman por lüj, <sup>5</sup> din ma cwa'n ruson guial dád rënrl rliladx tëël Dad Jesús dád rën tëël gra ree bën ma naj xbejn Dios. <sup>6</sup> Rniaab tëen lojman guial lüj cayüjnl dunujn yudar par yatie'ch ree mazri xtiidx Jesucrist, gusnuu gagbeel gra ni zagdx ni raya'p ree guial ma nayajc ree tijbzi con Jesucrist. <sup>7</sup> Dád nix yu' luxdon rabaa tëen guial rënrl dux compniar ree bën rliladx ree Jesucrist, din por lüj bijch ma bayu luxdoo reeman zagdx.

### *Rniee Pab por Onésimo*

<sup>8</sup> Zeel majsi ra'pan guialrniabee par ganin conin rayal güünl guial najn tijb xi apóstol Jesucrist, <sup>9</sup> per guial rayën du lasa', zagdxeli rniaaban lojl, naj Pab, ma najn tijb bengol abi' yan yu'n ladxguiib guial rtiechan xtiidx Jesucrist, <sup>10</sup> rniaaban lojl por Onésimo, bën naj zi'c da xi'nan guial ma bililadxaman xtiidx Jesucrist ni ben lojman lën ladxguiib guie.

<sup>11</sup> Gocli achet sirv been Onésimo lüj, per yan zi'c rüjnman naj sirv ziangajc güünman lüj sirv. <sup>12</sup> Yan caydxi'n laaman lidxil, gunajchi'man zi'c rniaajchi'l naj. <sup>13</sup> Guyënan nizujman con naj din nüjnman naj yudar luar lüj, la'tgaj yu'n ladxguiib guial rtiechan xtiidx Jesucrist. <sup>14</sup> Per ad guyëntan nünan xhienin sin xtiidxbeel din xhietëez favor güünl por naj ad züjntilan naguiejn, güünlan guial guiënl. <sup>15</sup> Bal brii Onésimo lidxil tiblädëd, per gojc zian din chile' sunëman lüj tiblayaa, <sup>16</sup> per ad zi'ctri tijb mojs, mazri zagdx guial loj tijb mojs, zi'c tijb bijchil bën rënrl. Dád rënan laaman, per lüj rayal guiënl laaman mazri ad zi'ctzi tijb bejn, rayal guiënl laaman zi'c tijb bijchil por Jesucrist.

<sup>17</sup> Yan bal walil nayajc ree compniar por Jesucrist, baca' Onésimo gunaladx naj gajcan. <sup>18</sup> Bal yu' xhie beenman lüj, o bal yu' xhie ralaman lojl, naj yaguix laan. <sup>19</sup> Abi' naj Pab, quijb naj cuca diidx guie ree: Naj yaguixan, majsi rulüü ad rüjnt naguiejn ganin lojl din gusaaladxil guial xt xguialnabanl ralil lon. <sup>20</sup> Yan been naj favor guin guial rënrl Jesucrist, zian bagu' luxdon guial nayajc xbejn Jesucrist.

<sup>21</sup> Naj caxhal gui'ch guie lojl abi' ragbeechaawan guial guzoobil da diidxan, ragbee tëen guial mazri naj ni güünl guial loj ni canin lojl. <sup>22</sup> Been tëē porvinid lënu lidxil lod yaya'nan, din zi'c cabejdx canabidi Dios, ragbeen tiëbaman guidganan lëjt.

### *Diidx bigra ca ree loj gui'ch guie*

<sup>23</sup> Epafra, bën yu'në'n ladxguiib guial ratie'chan xtiidx Jesucrist, rugajpdiozaman lüj. <sup>24</sup> Nëgajc Marcw, Aristarco, Demas në Lujc, bën cayüjn gajc ree naj yudar caytie'chan xtiidx Jesucrist në reeman rugajpdioz lüj. <sup>25</sup> Dad Jesucrist güünle' lëjt.

## Gui'ch par ree bén Hebreos

### *Ma gunee Xi'n Dios xtiidx xDadaman*

<sup>1</sup> Tiamp gulal, Dios guneenë ree dux béngulal ree zien volt në gadxagayaa mod por ree bén badëë xtiidx Dios loj ree bejn, <sup>2</sup> per yan ma guneenëman dunuj ree por Xi'nman. Dios been gra ni yu' xanyabaa në loj guidxliuj por Xi'nman. Abi' gra basa'n loj Xi'nman. <sup>3</sup> Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por guialrniabee ni rajpaman.

### *Xi'n Dios naj mazri bén zobjloj guial loj ree anjl*

<sup>4</sup> Zianan zeel laaman naj mazri bén zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios bén rajp gra guialrniabee <sup>5</sup> Din ad yu't dxej rëb Dios loj ree anjl:

Lüj naj da xi'nan,

abi' diizd yan gulün guial lüj naj da xi'nan.

Achut tēët loj anjl rëbaman:

Naj gac Xdadil, abi' lüj gac da xi'nan.

<sup>6</sup> Per chi guxhaal Dios Xi'nman loj guidxliuj, Xi'nman bén rajp guialrniabee zi'cgajc laaman, dxel rëbaman:

Gra ree da anjlan,

gol guyën da Xi'nan, gol gojp tēëman respejt.

<sup>7</sup> Abi' chi gunee Dios por ree anjl, rëbaman:

Naj rün ree da anjlan zi'c bi, rün tēën laa reeman zi'c bajl.

<sup>8</sup> Per por Xi'nman rëbaman:

Dad Dios, xguialrniabeel naj par tiblayaa,

abi' guidib tiamp nabeel zi'c rayal.

<sup>9</sup> Lüj ruladxil ni naj zagdxé

abi' rdxe'chil ni mal.

Zeel Dios bén naj xDiosil

baneeman lüj mazri guial rabaa guial loj gra ree bén za'nël.

<sup>10</sup> Rëb tēëman:

Dad, diizd yaløj lüj been guidxliuj në xanyabaa

con gra ni yu' loj reen.

<sup>11</sup> Gra reen yu' dxej nit reen,

per lüj ma nabanl tiblayaa.

Gra reen yayox zi'c tijb lajd,

<sup>12</sup> gusie'til laa reen zi'c rusie't bejn xabaman,

abi' zuchaal laa reen zi'c ruchaa bejn xabaman,

per lüj ad yu't dxej guidxaa zi'c najl

abi' zianczi gapil guialnaban.

<sup>13</sup> Ad yu't dxej rëb Dios loj tijb ree xianjlaman:

Gurej da ladbeen xt günan gan nabeel bén rdxe'ch ree lüj.

<sup>14</sup> Din gra ree anjl naj sprijt cayüjn ree sirv loj Dios, abi' rxhiaalaman laa reeman din güün reeman yudar bén ni gap ree guialnaban tiblayaa delant loj Dios.

## 2

### *Ad yasa'n ree diidx ni yabëë dunuj ree loj dol*

<sup>1</sup> Zeel rüjn naguiejn yayidxga' ree xtiidx Dios ni ma bacaagdiajg ree chitëë yasa'n ree xnejzaman ni ma zunaal ree. <sup>2</sup> Din zi'c goc cumplid gra xtiidx Dios ni gunee ree anjl diizd gocli, bén ad bazoobt diidx, bén been ree dol, laa reeman bayal casti ni rayal reeman.

<sup>3</sup> ¿Xhieza naag laa ree loj casti bal në dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diizd yaloj, abi' ree bën biguiejn laan, laa reeman bagojn dunuj ree. <sup>4</sup> Yan zi'c ma cwa' bejn guialrignia' rent guialrignia' ren por xSprijt Dios zi'c naj xixgabaman, abi' por ree sen në ree milagr con los demazri ree ni radxaloj bejn, zian ma balüü Dios guial ni diidxli naj ree diidx guin.

*Jesucrist rabëë bejn loj dol*

<sup>5</sup> Dios ad badëëtaman guialrniabee loj ree xianjlaman par nabee reeman lod yaya'p ree guialnaban cüb ni cayza't ree, <sup>6</sup> din yu' tibljaj loj xtiidx Dios lod rëb bejn:

Dios, ¿chu naj bénguidxliuj zeel rusaaladxil laaman?

¿Chu naj xi'n bénguidxliuj zeel rüjnl xgab por laaman?

<sup>7</sup> Guyu tijb tiamp ni baletil xi valoraman guial loj ree anjl.

Per despuejs ma beenl laaman bën zobjloj,

badëël guialrniabee lojman din nabeeman gra ree ni beenchaawil,

<sup>8</sup> abi' gra basa'nl lojman.

Chi badëë Dios guialrniabee lojman par nabeeman gra, achetczi ni baya'n ni ad zanabeetaman majsi dunuj ree sta ad cayguiaat ree guial nabeeman gra. <sup>9</sup> Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man guialrniabee abi' rajp bejn laaman respejt por guialzi ni gudëdaman chi gütaman por gra bejn, abi' zian gojc guial rën Dios dunuj ree.

<sup>10</sup> Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por guialzi ni gudëd Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon. <sup>11</sup> Bën ma naya ree delant loj Dios, por Jesucrist naya reeman. Abi' tant Jesucrist tant ree bën ma naya por laaman, tijbzi Dios naj xdad reeman. Zeel ad ratut Jesucrist rëbaman loj reeman: Da bichan. <sup>12</sup> Zi'c ca tib lajt loj xtiidx Dios lod rëb:

Gün diidx loj ree da bichan xcwentil,

abi' chi yadxaag lasa' reeman golan

cant ree ni guza't lüj zagdx.

<sup>13</sup> Rëb tëëman:

Tijbzi Dios yu'guican gagnë naj;

abi' rëbaman:

Laa naj guie con ree da xi'nman xin bazaladx Dios naj.

<sup>14</sup> Abi' zi'c bénguidxliuj tibloj najman rejn con bëël, ziangajc gojc Jesucrist chi bi'taman loj guidxliuj persi gojc güjtaman, abi' por xguialgüjtaman beenman gan loj guialrniabee ni gop xindxab loj guialgüjt. <sup>15</sup> Zian beenman persi babëëman bejn ree loj guialnadxeb xieen guialgüjt, bën ni guidib tiamp ni naban reeman rdxeb reeman guialgüjt zi'c rdxeb bejn xpatronman. <sup>16</sup> Din laaman ad bi'ttaman loj guidxliuj par gagnëman anjl ree, bi'taman par gagnëman bën naj ree xdiaa Abraham. <sup>17</sup> Zeel gojcaman zi'cgajczi bénguidxliuj, persi bidxin dxej gojcaman tijb bixhioz zobjloj delant loj Dios, bixhioz ni raya bejn, bën rüjn tëë cumplid xtiidx Dios persi gojc gudijxaman por xtol ree bejn. <sup>18</sup> Abi' guial laagajcaman guzagdiaj been tëë xindxab guial ad zuzoobtaman xtiidx Dios, zeel laaman zajc gagnë ree bën ni cayüjn xindxab naguiejn güün reeman dol.

### 3

*Jesús naj mazri bën zobjloj guial loj Moisejs*

<sup>1</sup> Zeel compniar, lëjt guial ma najdi xbejn Dios, lëjt guial ma bacaabeeman lëjt par gaquidi xi'nman, gol badxe'gujic Jesucrist guial laaman naj bixhioz zobjloj, bën raliduladx ree, bën guxhaal Dios loj guidxliuj. <sup>2</sup> Din Jesucrist bazoobaman xtiidx Dios bën bacaabee laaman zi'c bazoob Moisejs xtiidx Dios delant loj ree bën Israel. <sup>3</sup> Per mazri rayal Jesucrist respejt guial loj Moisejs guial mazri zobjlojman, zi'c tijb bën ni rüjn yu mazri ruza't reeman laaman zagdx guial loj yu guin. <sup>4</sup> Gra yu yu'czi tijb bën rüjn laan,



per Dios laaman been gra ni yu'. <sup>5</sup> Abi' Moisejs bazoobaman xtiidx Dios, beenman sirv lojman chi badëädaman xtiidxaman loj ree bën Israel persi bagojnman laa reeman ni rëb Dios. <sup>6</sup> Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yalenya' ree abi' yalëez ree xt dxej bigra.

*Gol guzujdxi'ch loj xnejz Dios*

<sup>7</sup> Zeel, zi'c rëb xSprijt Dios:

Bal rucaagdiajguidi xtiidx Dios yan dxej,

<sup>8</sup> ad cwexuudi zi'c been ree bën ad bacaagdiajgt xtiidxaman chi been reeman laaman prueb chi guzu reeman loj yujbidx.

<sup>9</sup> Abi' yagaj naj lod ad bacaagdiajgt ree xbëngulalidi xtiidx Dios majsi baguiaa reeman milagr ni beenman delant loj reeman loj tiuu ijz niz loj yujbidx.

<sup>10</sup> Zeel bidxe'ch Dios bën guin ree, abi' rëbaman:

“Xgab ren rüjn reeman, ni'quid rüjnt reeman naguiejn din gagbee reeman xhienaag rënan güün reeman.”

<sup>11</sup> Zianan zeel bidxe'ch Dios abi' rëbaman guial ad yu't dxej gap reeman xguialraziiladx Dios.

<sup>12</sup> Zeel gol gojpt cudad compniar raliduladx ree Jesucrist, chitëe chu' tijbidi guial por xixgab malidi ni rudxoon chililadxidi, guibi'cadi loj xnejz Dios bën naban. <sup>13</sup> Mejrli guixie guixie gol guneenë gol badxe' tëe luxdoo ree lasa'di naga yu' tiamp, chitëe ad zuzoobtridi xtiidx Dios guial ma been dol lëjt gan. <sup>14</sup> Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guial'xchej.

<sup>15</sup> Abi' zi'c ma rnin lojdi, loj xtiidx Dios rëb:

Bal rucaagdiajguidi xtiidx Dios yan,

ad bal gaquidi nad zi'c goc ree bën ad bazoobt xtiidx Dios gocli.

<sup>16</sup> Abi', ¿chuza ree nin ad bazoobt xtiidx Dios majsi biguiejn reeman ni guneeaman? ¿Nid bën Israel ni babëe gajc ree Moisejs Egipton ya? <sup>17</sup> Abi', ¿nid laagajc reeman bidxe'ch Dios loj tiuu ijz ya por dol ni been reeman abi' zien reeman güjt loj yujbidx? <sup>18</sup> Abi', ¿nid bën guin gajc reen rëb Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman? <sup>19</sup> Zian rayagbee ree guial ad gojpt reeman guialraziiladx guin guial ad bililadxt reeman ni rëb Dios loj reeman.

#### 4

<sup>1</sup> Zeel yan guial sta raya'p ree promejs ni been Dios guial yaya'p ree xguialraziiladxaman, rayal yaya'p ree cudad chitëe awa raya'p ree promejs guin yaya'n tijb dunuj ree guial ad zaya'pt ree guialraziiladx guin. <sup>2</sup> Din dunuj ree ma bacaagdiajg ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajg reeman diidx guin ree, guial ad bililadxt reeman laan. <sup>3</sup> Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree bën ad bililadxt rëb Dios:

Guial bache'ch reeman naj zeel ma benan xgab

guial ad zajpt reeman da guialraziiladxan.

Diizd chi gule'cchaaw Dios guidxliuj baloox xchiinman, <sup>4</sup> zi'c rëb loj xtiidxaman por dxej ni raziiladx bejn:

Chi gulox been Dios gra xchiinman

dxel ni goc gajdx dxej baziiladxaman.

<sup>5</sup> Per par ree bën ad bazoobt xtiidxaman rëbaman:

Ad yu't dxej gap reeman da guialraziiladxan.

<sup>6</sup> Bën biguiejn ree xtiidx Dios yaløj, ad gojpt reeman guialraziiladx guin guial ad bazoobt reeman xtiidxaman, per sta yu' ree bën ryaadx gap guialraziiladx guin. <sup>7</sup> Zeel chi gudëd

zien iyz, Dios gulëeca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal riguejndi xtiidx Dios yandxej,  
gol bazoob xtiidxaman.

<sup>8</sup> Din bal por Josué niajp ree bén Israel guialraziiladx, ad nuza'tt Dios zatijb dxej. <sup>9</sup> Zeel xt yandxej yu' guialraziiladx guin par ree xbejn Dios. <sup>10</sup> Din bén rajp xguialraziiladx Dios, raziiladxaman xieen gra xchiinman zi'c baziiladx Dios chi gulox been xchiinman. <sup>11</sup> Zeel rayal yaguieen ree naguiejn yaya'p ree guialraziiladx guin, chitëë chu güün zi'c been ree bén ad bazoobt xtiidx Dios.

<sup>12</sup> Din xtiidx Dios nabanen rajp tëen guialrniabee. Mazri rëëzan guial loj tijb espad ni nadoxh grop lad, rëëzan lën luxdoo bejn në lën xsprijtaman. Xt lën dxijt në lën yob rëëzan, abi' por laan ragbee bejn bal ni mal o ni zagdxë naj ni rënman güünman. <sup>13</sup> Achetczi ni been Dios zajc guiguie'ch lojman, din gradooczan ruguiaaman, abi' lojman naj yadëed ree cwent.

#### *Jesús naj bixhioz mazri zobjloj*

<sup>14</sup> Zeel guial ma raya'p ree bixhioz ni mazri zobjloj, abi' laaman naj Jesucrist Xi'n Dios, bén ma zobj xanyabaa, rayal yasnuu yadxu'dxi'ch ree loj ni raliladx ree laaman. <sup>15</sup> Din Jesucrist bén naj dux bixhioz zobjloj ree laaman zajc gagnë dunuj ree chitëë güün dol dunuj ree gan. Din në laaman guzajc graloj zi'cgajc cayza'c ree, per laaman ad yu't dxej beenman dol. <sup>16</sup> Zeel con confianz ma zajc yabiig ree loj Dios yarejdx yanaab reeman, bén rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

## 5

<sup>1</sup> Gra bén rajc bixhioz mazri zobjloj, Dios gulej laaman loj ree bejn persi rbejdx rniabaman Dios por ree bejn. Abi' lojman rudëë bejn gon par Dios në ree be ni guiët por ree xtol ree bejn. <sup>2</sup> Abi' guial bénguidxliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens bén ni ad ragbeet xhienin rüjn, në ree bén ad zinalt xnejz Dios. <sup>3</sup> Abi' guial yu' chi rüjn bixhioz guin dol zeel nëman rugüjt tijb be zi'c gon par Dios por xtolaman, zi'cgajc rüjnman por ree bejn.

<sup>4</sup> Abi' achut zajc guiëb guial gacaman bixhioz zobjloj, Dios naj bén rbe laaman zi'c guleman Aarón. <sup>5</sup> Ziangajc gojc con Jesucrist, ad laataman rëb guial gacaman bixhioz zobjloj par dunuj ree, Dios bacaabee laaman, chi rëbaman:  
Lüj naj da Xi'n'an, abi' diizd yan  
gulün guial lüj naj da Xi'n'an.

<sup>6</sup> Ziangajc rëb zatib lajt loj xtiidx Dios por Jesucrist:  
Lüj naj bixhioz par tiblayaa zi'c goc Melquisedec bixhioz.

<sup>7</sup> Chi guban Jesucrist loj guidxliuj guie dád biinman gurejdx gunabaman Dios bén zajc yabëë laaman loj guialgüjt ni gudëdaman. Dxel bidxga' Dios Jesús badëëman laaman valor guial bazoobaman gra xtiidxaman. <sup>8</sup> Majsi Xi'n Dios najman, per basiidaman bazoobaman diidx majsi guzagdiajman. <sup>9</sup> Abi' guial guidiblagaa beenman gra ni rën Dios güünman, zeel por laaman tiblayaa ma yu' perdon par gra ree bén guzoob xtiidxaman. <sup>10</sup> Abi' Dios naj bén gule laaman par gacaman bixhioz zobjloj zi'c goc Melquisedec bixhioz.

#### *Rayal yasnuu yaguieenbee ree xtiidx Dios*

<sup>11</sup> Dád zien ni yu' ganin lëjt por ree ni guin, per nawëëg najn par ganinan zi'c rënan guial dád nen rignia'di. <sup>12</sup> Ma gojc xchej da't nünbeedi xtiidx Dios, yan bal zajcan, lëjt ma rayal gulüü ben ren ree, per lëjt sta ryaadx chu' bén gulüü lëjt xtiidx Dios stijb ni basiididi guia'xchej. Lëjt naj zi'c tijb xindoo ni rë' ganax lejch luar gawix graloj. <sup>13</sup> Abi' gra ree bén naj zi'c xindoo ad wayajct gaw graloj, ad zile't gagbee reeman conin naj xnejz. <sup>14</sup> Per ree bén ni cusnuu cayignia' xtiidx Dios, laa reeman naj zi'c bén ma raw graloj guial ma rignia' reeman conin naj zagdxë con tëënin naj ni mal.

## 6

<sup>1</sup> Zeel rayal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni baguieen ree yaloj, o xhienaag yaliduladx ree Dios, <sup>2</sup> o xhienaag tiobnijs bejn, o xhienaag yadxiib du yaa ree guijc bejn, o xhienaag yasban Dios bengüt ree, o xhienaag güün Dios xguialguxtisaman chi guidxin dxej yadëed ree cwent lojman, <sup>3</sup> zagdxeli naj guial yasnuu ree yasiid ree xtiidxaman. Abi' Dios gagnë dunuj ree din chile' yaguieen ree zian.

<sup>4</sup> Din bën ma ragbee ree xcwent Dios, bën ma nünbee ree xcwent ree ni yu' xanyabaa, bën ma gubajn ree con xSprijt Dios, <sup>5</sup> abi' bayuladx reeman xtiidxza'c Dios, ma ragbee tëe reeman xhienaag nabee Dios, <sup>6</sup> dxel rusa'n reeman guial chinal reeman xtiidxza'c Jesucrist, par laa reeman dád nawëëg naj chu' reeman loj xnejz Dios, din zi'c rulüü cucaa reeman Jesucrist Xi'n Dios loj crüjz zatijb din guze' ree bejn laaman. <sup>7</sup> Bénguidxliuj ree naj reeman zi'c tibia' guidxliuj ni rë' guibidx guia ni ryajb, abi' bal rajc da't guiniaa guin par bën rüjn dxiin lojn dxel rüjnle' Dios laan. <sup>8</sup> Per bal ganax guiëjch në ree gui'xh mal rliejn lojn, dxel ad rüjntan sirv, abi' mazri zëed gajxh casti par guidxliuj guin abi' casti guin naj guial che'can.

*Ni nuzjdx'i'ch dunuj ree loj xnejz Dios*

<sup>9</sup> Ad caynatan zian por lëjt, din dunujn rayagbee guial zagdxen cayüjndi, guial zinalquidi ni rayal güüüdi din laadi loj xcasti Dios. <sup>10</sup> Abi' laaman rüjn xguialguxtisaman zi'c rayal, abi' ad zayanladxtaman ni zagdxë ni beendi në guial ma balüüdi guial rëndi laaman, abi' beendi yudar cusnuu tëe cayüjndi yudar dux compniar ree bën raliduladx ree Jesucrist. <sup>11</sup> Per dunujn rayënan guial gusnuu güüüdi zian xt dxej chigra, sin guial yalenya'di din yayalidi ni cabëzidi tia'di. <sup>12</sup> Ad gaquidi bën ploj, gol been zi'c been ree bën bililadx Dios sin guialralenya' tia' reeman ni rëb Dios tia' reeman.

<sup>13</sup> Chi been Dios promisejs loj Abraham, baza't laagajcaman din achut bën mazri lasajc guial lojman, <sup>14</sup> abi' rëbaman loj Abraham: “Naj diidxli günle' lüj abi' dád zien ree xdiaal chu'.” <sup>15</sup> Abi' Abraham guyuman pacens ad balenya'taman persi cwa'man ni rëb Dios gudëëman lojman. <sup>16</sup> Chi rüjn bejn jurar, rüjnman jurar por stijb bën mazri lasajc guial lojman din guiguieen guial diidxliqui güünman ni rëbaman. <sup>17</sup> Ziangajc yan, guial rën Dios gulüüman loj ree bën ni tia' ni rëbaman guial ad yu't dxej guchaa xixgabaman por promisejs ni beenman, zeel beenman jurar. <sup>18</sup> Tio'p ni ad zaze'nt been Dios, beenman promisejs been tëëman jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din güünman dunuj ree yudar guial ma raya'p ree confianz guial gac zi'c ma rëbaman. <sup>19</sup> Abi' guial rayagbee ree guial gac zi'c ma rëb Dios, zeel nadxu'dxi'ch ree loj xtiidxaman zi'c nuzjdx'i'ch tijb ganch guiib tijb barcw. Abi' guial nadxu'dxi'ch ree diidz xanyabaa zëëdan, <sup>20</sup> lod ma guyu Jesús par guixhialaman nejz par dunuj ree, bën ma naj bixhioz zojbloj tiblayaa zi'c goc Melquisedec.

## 7

*Jesús naj bixhioz zi'cgajc gojc Melquisedec*

<sup>1</sup> Melquisedec gojc rey Salem gojc tëëman xbixhioz Dios bën yu' xanyabaa. Chi baza Abraham loj wadijl lod beenman gan rey gudilnë ree laaman, dxel bigchaagloj Melquisedec laaman, abi' beenle'man Abraham. <sup>2</sup> Dxel loj gra ree ni been Abraham gan, beenman laan chii lala' abi' badëëman tijban loj Melquisedec. Melquisedec rën guiëban “rey ni rüjn xguialguxtis zi'c rayal”, Abi' guial gojcaman xrey Salem rën guiëban “rey rabe'cdxe luxdoo ree bejn”, din Salem rën guiëb “ni rabe'cdxe luxdoo ree bejn”. <sup>3</sup> Melquisedec guin achut ragbee chu naj xDadaman, o xniaaman o chu ree nin naj xdiaaman. Achut ragbee goc gojlaman goc tëe güjtaman. Laaman goc bixhioz zi'cgajc Jesús Xi'n Dios bën ma naj bixhioz par tiblayaa.

<sup>4</sup> Gol been xgab xi bën lasajc gojc Melquisedec nadxel. Zeel xt dux béngulal ree Abraham badëë tib part loj chii ni beenman gan loj ree rey ni gudilnëman. <sup>5</sup> Loj ley rëb

guial ree bixhioz Israel ni zëed loj xdiaa Leví rajp reeman derejch tia' reeman tib part loj chii ni rajp ree bën Israel, majsi tijbzi loj xdiaa Abraham zëed gra reeman. <sup>6</sup> Melquisedec majsi ad zëedtaman loj xdiaa Leví, per cwa'man tib part loj chii ni been Abraham gan. Dxel beenle'man Abraham bën cwa' xpromejs Dios. <sup>7</sup> Abi' dunuj ree rayagbee guial bën rüjnle' stijb bejn, mazri lasajcaman guial loj bën rüjnle'man. <sup>8</sup> Per gra ree bixhioz ni rtia' tib part loj chii la' ni rajp ree bejn, rëjt gajc reeman zi'cgajc dunuj ree. Sa'n Melquisedec bën cwa' tib lia' ni been Abraham gan, loj xtiidx Dios ruza't laaman zi'c rulüü sta nabanman. <sup>9</sup> Yan zi'c rulüü yaguie'ch ree guial Leví con ree bixhioz ni zëed loj xdiaaman bën ni rtia' ree tib part loj chii ni rajp ree bejn në reeman badëe tib part guin loj Melquisedec loj hor ni bigchaagloj Melquisedec dux béngulal ree Abraham. <sup>10</sup> Din chi bigchaagloj Melquisedec dux béngulal ree Abraham, ad wayut Leví, per loj xdiaa Abraham zëed Leví.

<sup>11</sup> Bal por ree bixhioz Levitas nile' ni ajc bejn naya delant loj Dios por ley ni guyu par ree bën Israel, dxel ad rüjntri naguiejn ni't stijb bixhioz bën naj zi'c Melquisedec ad zi'ct Aarón. <sup>12</sup> Din chi bidxaa bixhioz nëgajc ley bidxaa, <sup>13</sup> din dux Dad ree Jesucrist laaman naj bixhioz guin. Per ad lojt xdiaa ree bixhioz zëedaman, loj diaa ren zëedaman abi' ni'qui tijb ree xdiaaman ad gojct bixhioz. <sup>14</sup> Dunuj ree rayagbee guial loj xdiaa Judá zëed dux Dad ree Jesucrist abi' Moisejs ad baza'ttaman diaa guin chi rëbaman chu reenin gac bixhioz.

<sup>15</sup> Per laa rguien gajc guial Jesucrist naj bixhioz zi'cgajc Melquisedec, <sup>16</sup> guial ad lojt xdiaa Leví zëedaman zi'c rëb loj ley par gac bejn bixhioz, najman bixhioz guial rajpaman guialrniabee guibanman tiblayaa. <sup>17</sup> Din ze rëb loj xtiidx Dios por laaman:

Lüj naj bixhioz par tiblayaa,

lasa' bixhioz ni goc Melquisedec.

<sup>18</sup> Zianan zeel gojc ley guin tiblax guial ad beentan sirv guial nüjn bejn zi'c rniabee ley guin. <sup>19</sup> Ad bile't nüjn ley guin gan nibajn bejn zagdxe delant loj Dios. Per luar ley guin zagdxe naj guialrliladx ni raya'p ree din por guialrliladx guin ma raya'p ree nejj par yadxin ree loj Dios. <sup>20-21</sup> Gulal chi ru bejn rajcaman bixhioz, achet promejs been Dios, per chi bacaabee Dios Jesús gacaman bixhioz, Dios been promejs zi'c ca tiblajt loj xtiidxaman lod rëb:

Dux Dad ree Dios ma been promejs abi' ad zuchaat xixgabaman:

“Lüj naj bixhioz par tiblayaa, lasa' bixhioz ni goc Melquisedec.”

<sup>22</sup> Zeel zian zagdxe naj nejj cüb ni guxhal Jesús par yadxin ree loj Dios. <sup>23</sup> Gulal zien gojc ree bixhioz per guial rdxin dxej rëjt reeman ad bile't ni ajc reeman bixhioz par tiblayaa. <sup>24</sup> Per Jesús ad yu't dxej guiëtaman ad yu' tëet dxej lox guial najman bixhioz.

<sup>25</sup> Zianan zeel rila' rabëeman bejn ree loj xcasti Dios, bën rën ree gap nejj par guidxin reeman loj Dios por laaman, din laaman rajpaman guialnaban par tiblayaa par cwedx guiniabaman Dios por laa reeman. <sup>26</sup> Zeel laaman naj bixhioz zobjloj bën rayaadx ree gagnë dunuj ree. Din laaman naj bën naya nali, achet ni mal rüjnman, nayaman loj Dios, garen najman guial loj bëndol, abi' zobjaman xanyabaa cwë' Dios. <sup>27</sup> Laaman ad ryadxt güünman zi'c rüjn ree bixhioz zobjloj guial guixie guixie rugüjt reeman be gui'xh zi'c gon par Dios. Yaloy por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiëtaman stijb. <sup>28</sup> Por ley bile' gojc ree bejn bixhioz zobjloj majsi ad nayaalojt naya reeman niz loj Dios. Per despuejs rëb Dios guial diidxliczi xi'nman gac bixhioz zobjloj, laaman nayaaloj nayaman niz loj Dios zianczi.

## 8

### *Jesús naj dux bixhioz zobjloj ree*

<sup>1</sup> Loj gra diidx ni caydü ree ni mazri lasajc naj guial Jesucrist naj dux bixhioz zobjloj ree, bën ni ma zobj xanyabaa xladbee Dios bën rniabee. <sup>2</sup> Ni ma rüjnman sirv guialbixhioz, lën yadoo ni bazoob Dios, ad bénguidxliujt. <sup>3</sup> Gra ree bixhioz zobjloj loj guidxliujt guie xchiin reeman naj guial rinë reeman gon rugüjt tëe reeman be ree zi'c gon par Dios. Ziangajc

Jesucrist b en naj dux bixhioz zobjloj ree yu' ni bad eman loj Dios. <sup>4</sup> Abi' bal sta za' Jesucrist loj guidxliuj guie ad niajctaman bixhioz, guial ma yu' ree bixhioz ni rin  ree gon loj Dios zi'c rniabee ley ni basa'nn  Dios Moisejs. <sup>5</sup> Per gra ni r jn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh g  n Moisejs yadoo, dxel r b Dios lojman: "Baguiaa zagdxe din g  n! zi'cgajczi bal n l j ruguia' Sinai." <sup>6</sup> Per mazri zagdxe naj ni r jn Jesucrist, b en bayal naj dux bixhioz zobjloj ree, din mazri zagdxe naj nejj c b ni guxhalaman din chile' yadxin ree loj Dios. Abi' por nejj c b guin mazri zagdxe naj ree xpromejs Dios par bejn.

<sup>7</sup> Bal por ley nile' nibajn bejn zagdxe delant loj Dios, dxel ad r jnt naguiejn niu nejj c b. <sup>8</sup> Per baguiaa Dios guial ad cay jnt ree bejn zi'c rayal zeel r baman:

Naj rni guial guidxin dxej gaxhalan nejj c b par ree b n Israel n  ree b n Jud .

<sup>9</sup> Per nejj c b guin ad najtan zi'c ley ni basa'nan loj xb ngulalidi chi bab n laa reeman Egipto.

Abi' guial ad bazoobt reeman da diidxan zeel gul ladxan laa reeman, zian r b Dios.

<sup>10</sup> R b t eman:

Zian ma baya'n diidx gac con ree bejn chi guidxin dxej

guijc reeman yasa'nan da leyan

abi' l n luxdoo reeman gucanan.

Dxel naj gac xDios reeman, abi' laa reeman gac da bejnan.

<sup>11</sup> Dxejzii ree ad r jntri naguiejn gusiid ree bejn lasa' reeman.

Ni'qui bijch reeman par g  nbee reeman naj,

din gra reeman g  nbee naj,

diizd xindob z xt bengol.

<sup>12</sup> Abi' naj g n perdon gra ree ni mal ni ma been reeman,

abi' ad yu't dxej gusaaladxan xtol reeman.

<sup>13</sup> Chi r b Dios guial guixal nejj c b guin r n gui ban guial achetri sirv r jn nejj gulal guin ni gop ree bejn par guidxin reeman lojman, abi' ni ad r jntri sirv nayob nitan.

## 9

### *Yadoo ni yu' loj guidxliuj n  yadoo ni yu' xanyabaa*

<sup>1</sup> Dunuj ree rayagbee guial chi binal bejn ley ni cayguie'ch ree naj nejj gulal, loj ley guin z ed xhienaag gui n bejn Dios, xhie t e naag rayal g  n reeman tijb yadoo loj guidxliuj guie. <sup>2</sup> L n yadoo guin guz eb tijb lajd persi gojcan tio'p l n. Tijb l nan ni naj niz ro' port, lod brii laj lod nada abi' l n guin guzobj ni ru gandel n  tijb mex ni gudxib ree guiadxtil ma gogle'. <sup>3</sup> Dxel stijb l n guin xijch lajd guin brii laj lod mazczi nada. <sup>4</sup> L n guin guyu tijb altar ni or lod rgu' reeman goxyl n  tijb caj ni brii laj xcaj xpromejs ree Dios. Abi' caj guin nad  ban or zi'c l nan zi'c xijchan. L n caj guin yu'chaaw guiaj ni ca ree guidxii xmandamient Dios n  xvar Aar n ni baga' con stijb re or ni guyuchaaw mana. <sup>5</sup> Dxel guijc caj guin guzobj tio'p xfigur ree anjl b n la ree querubines abi' con xhiil reeman rusiaaw reeman guijc lod ruroob bixhioz zobjloj xrejn ree be por xtol ree bejn. Per por yan ad r jnt naguiejn guzatan mazri ree ni guin lojdi.

<sup>6</sup> Chi gulox been reeman gra zi'c rayal gac l n tijb yadoo loj guidxliuj guie, dxel guixie guixie guyu ree bixhioz l n yadoo guin per naabzi lod brii laj lod nada, lod rguieen reeman ni rayal g  n reeman par Dios. <sup>7</sup> Per stijb l n guin lod la mazcsi nada, tijbzi bixhioz zobjloj ru ni tib volt l n tib ijz. Abi' ad zajct chu'man bal id zin man xrejn ree be din g  n Dios perdon xtolaman n  xtol ree bejn. <sup>8</sup> Por ree ni guin rul   xSprijt Dios dunuj ree guial la'tgaj r jn sirv lod brii laj lod nada ad yu't mod chu' bejn lod la mazcsi nada. <sup>9</sup> Gra ree ni guin najzi reen tijb ejempl par dunuj ree yan, din gon n  ree be ni bin  ree bejn par Dios, ad beent reen sirv par nayaaloj ninialadx reeman guial ma naya

reeman loj Dios. <sup>10</sup> Gra ree costumbr ni gop reeman zi'c ree con ni gudaw reeman, në ree ni gu' reeman në gra ree ni rayal güün reeman din naladx reeman guial ma naj reeman naya, laan naj ni gunabee ley güün ree bejn xt dxej ni bachaa Dios gra.

<sup>11</sup> Din yan ma bi't Jesucrist, bén naj bixhioz zojbloj par dunuj ree, abi' por laaman ma raya'p ree yaya'p tēē ree ni ma rēb Dios yaya'p ree. Abi' mazri zagdxē naj lēn yadoo lod ma guyuman mazri lasajc yadoo guin guial ad zojbtan loj guidxliuj guie ad gojc tēētān por ree bēnguidxliuj guie. <sup>12</sup> Jesucrist ma guyuman lēn yadoo lod nada da't, per ad con xrejnt ree go'n dobēz o xrejn ree dxib, guyuman con quijb xrejnman. Laaman con tib volt guyuman, ad rüjnt naguiejn güünman zian stijb abi' por laaman raya'p ree perdon par tiblayaa. <sup>13</sup> Tiamp gulal xrejn ree dxib o xrejn ree go'n o cobdēj ni we'c ree vagdobēz ruroob bixhioz guijc ree bejn persi naladx reeman ma naya reeman. Yan bal zian naladx reeman guial raya'n reeman naya, <sup>14</sup> diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rēn Dios bén naban. Din por xguialrniabee xSprijt Dios, Jesucrist bén ad beentczi dol, badēē laagajcaman zi'c tijb gon par Dios.

<sup>15</sup> Zeel por Jesucrist ma raya'p ree tijb nejz cüb par yadxin ree loj Dios. Din por xguialgüjt Jesucrist ma yu' perdon par dux tol ree në xtol ree bén ni binal ley, gra ree bén naj xbejn Dios zian yaca' ree ni rēb Dios yaya'p ree par tiblayaa. <sup>16</sup> Din zi'cgajc tijb bén rlies tijb gui'ch guial chu yaya'nnē ree ni rajpaman, ad züjnt gui'ch guin dxiin xt chi ma güjtaman. <sup>17</sup> La'tgaj naban bén guin achet sirv rüjn gui'ch guin, rüjnān sirv xt chi ma güjtaman. <sup>18</sup> Zeel diidz tiamp gulal par guzuloj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulēē reeb rejn. <sup>19</sup> Din chi gulox bagojn Moisejs gra ree bejn gra ni zēēd loj xley Dios dxel cwa'mān guidxlad xiil ni nayē' culor xnia bacaaman laan guijc tib xidx yag ni la hisopo, dxel badxe'mān laan loj nijs ni no'ch xrejn ree go'n dobēz con xrejn ree dxib dxel bacojpaman laan loj libr ley në guijc ree bejn <sup>20</sup> rēbgajman: “Rejn guie naj tijb sen guial ma banee Dios xleyaman lojdi par güündi laan cumplid.” <sup>21</sup> Bacojp tēēman rejn guin lēn yadoo në guijc gra ree ni rüjnnē ree bixhioz dxiin lēn yadoo. <sup>22</sup> Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

### *Xrejn Jesucrist rquied dol*

<sup>23</sup> Zeel par guiguien guial ma naya ree ni beennē ree bixhioz dxiin lēn yadoo guin, gojc naguiejn bagüjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. <sup>24</sup> Abi' Jesucrist ad lēnt yadoo ni been bēnguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. <sup>25</sup> Jesucrist ad biaadxt niējtaman zien volt por dol ree, ad beentaman zi'c been ree bixhioz zojbloj guial gazobijz binē reeman xrejn ree be lēn yadoo lod brii laj lod nada da't. <sup>26</sup> Din bal id zian, zien volt niējtaman diidz chi gocchaaw guidxliuj. Per chi bidxin dxej bi'taman, con tib voltzi badēē laagajcaman par guiētaman din chiquied dux tol ree. <sup>27</sup> Zi'cgajc gra bejn tib voltzi rējt reeman, dxel zēēd ni yadēēd reeman cwent loj Dios. <sup>28</sup> Ziangajc Jesucrist tib voltzi badēē laagajcaman par guiētaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignēman bén cabēz ree laaman.

## 10

### *Ad leyt riquied dol*

<sup>1</sup> Ley ni basa'nnē Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz güjt ree be par Dios zi'c gunabee ley güün bejn, per ad guyut dxej ni naladx reeman guial ma bayaalōj naya reeman loj Dios. <sup>2</sup> Din bal ninialadx reeman guial ma naya reeman con tib volt ni bagüjt reeman be ree par Dios, dxel ad ryaadxtri nüjn reeman zian guial ma ragbee reeman achetri xtol reeman. <sup>3</sup> Per

ad gunaladxt reeman zian, gazobijz rusaaladx xtol reeman chi rugüjt reeman be ree par Dios, <sup>4</sup> din xrejn ree go'n në xrejn ree dxib ad zajct chiquiedan xtol ree bejn.

<sup>5</sup> Zeel chi bi't Jesucrist loj guidxliuj, rëbaman loj Dios:

Ad rëntil xrejn ree be

ni'qui los demazri ree ni ridnë bejn par lüj,

zeel baneel naj cuerp ni ra'pan loj guidxliuj guie.

<sup>6</sup> Ad rëntril guial ruze'c reeman be ree par lüj

ni'qui xrejn ree be ni ridnë reeman por xtol reeman.

<sup>7</sup> Zianan zeel rën:

“Laa naj guie, Dad Dios,

zialan par gūnan zi'c rēnl,

zi'c ca loj libr por naj.”

<sup>8</sup> Jesucrist yaloj rëbaman guial ad rënt Dios xrejn ree be, ni'qui los demazri ree ni rinë bejn par laaman, ni'qui guial ruze'c reeman be ree por xtol reeman zi'c rniabee ley gūün reeman. <sup>9</sup> Chi gulox rëb Jesús zian, dxel rëb tēēman: “Laa naj guie, Dad Dios, zialan par gūnan zi'c rēnl.” Zianan baloox Jesucrist guial rinal ree costumbr ni rëb loj ley abi' guxhalaman tijb nejz cūb par yadxin ree loj Dios. <sup>10</sup> Yan ma nayajc ree naya delant loj Dios guial ma been Jesucrist zi'c rën Dios, badëəd laagajcaman güjtaman por xtol ree bejn, con tib volt par tiblayaa, ad ryaadxt gūünman zian stijb.

<sup>11</sup> Gra ree bixhioz Israel guixie guixie za' reeman cayüjn reeman gra ni rniabee ley gūün reeman, abi' guixie guixie rugüjt reeman be ree par Dios. Abi' majsi zien volt rüjn reeman zian per ad rquiedt guialrugüjt be guin ree xtol ree bejn. <sup>12</sup> Per Jesucrist con tib volt badëəd laagajcaman güjtaman por xtol ree bejn, ad ryaadxt gūünman zian stijb. Dxel gurejman xladbee Dios, <sup>13</sup> lod cabëzaman guidxin dxej nabeeman loj gra ree bën rdxe'ch laaman. <sup>14</sup> Din laaman con tib volt badëe laagajcaman güjtaman por xtol ree bejn dxel tiblayaa ma naya ree bën rlliladx laaman. <sup>15</sup> Abi' dunuj ree rayagbee ree guial walin din por xSprijt Dios zëəd ree diidx ni ca loj xtiidx Dios guial rëb Dios:

<sup>16</sup> Zianan ma baya'n diidx gac

con ree bejn chi guidxin dxej:

Guijc reeman gusa'n da leyan

abi' lën luxdoo reeman gucanan

<sup>17</sup> Abi' rëb tēēman:

Ad yu't dxej gusaaladxan xtol reeman

në graloj ree ni mal ni ma been reeman.

<sup>18</sup> Abi' zi'c ma yu' perdon par dol, ad rüjntri naguiejn guiët ree be por dol.

### *Royal yubiig ree loj Dios*

<sup>19</sup> Zeel compniar raliduladx ree Jesucrist sin gualrdxeb ma zajc yadxin ree lod zojb Dios por xrejn Jesucrist, <sup>20</sup> din chi badëəd xcuerpaman persi güjtaman, guxhalaman tijb nejz cūb ni zidnë guialnaban par dunuj ree. <sup>21</sup> Yan zi'c ma rniabee Jesucrist dunuj ree, bën naj bixhioz zojbloj xanyabaa, <sup>22</sup> con guidib du luxdoo ree ma zajc yubiig ree loj Dios con tijb guialrliladx ni wali ree raliduladx ree laaman, con tijb quiarguiejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. <sup>23</sup> Zeel rayal yadxu'dxi'ch ree loj ni raliduladx ree Dios, din laaman züjn cumplid xtiidxaman zi'c ma rëbaman. <sup>24</sup> Rayal yaguieen ree xgab xhienaag yalu' ree luxdoo ree dux compniar ree yayën tēē du lasa' ree yaguieen tēē ree ni naj zagdxe. <sup>25</sup> Ad rayalt yaguieen ree zi'c rüjn ree bën ad rejtri ree lod radxaag lasa' ree dux compniar ree par chignia' reeman mazri xtiidx Dios, rayal yalu' ree luxdoo du lasa' ree, abi' mazri yan guial ma rayagbee ree guial ma zidyob dxej gui't Jesucrist stijb.

<sup>26</sup> Din bal ma rayagbee ree xtiidxli Jesucrist abi' baguieen ree xgab yaguieen ree mazri dol, dxel ad yu'tri por chu zajc yayajc ree perdon. <sup>27</sup> Ni cabësi dunuj ree naj xguialguxtis doxh Dios, tijb bajl lod yayal ree bën ad ruzoobt xtiidxaman. <sup>28</sup> Chi bal id been tijb bejn zi'c rniabee ley ni basa'nnë Dios Moisejs, abi' yu' tio'p choon testiw guial ad beent bën

guin zi'c rniabee ley guin, dxel ad yu'tri mod laaman loj guialgüjt ni rayalaman. <sup>29</sup> Yan gol been xgab, ꞑxixi mazri castiro' yayal bén rnieeguijdx xSprijt Dios bén ragnë dunuj ree! Bén ni naladx guial achet lasajc Xi'n Dios, abi' rüjnman desprejs xrejnman, rejn ni rulüü guial gac zi'c rëb Dios, rejn ni rusia xtol bejn. <sup>30</sup> Dunuj ree rayagbee guial rëb Dios: "Naj rayal gün guialguxtis, naj gudë ni rayal bejn." Rëb tääman: "Dios naj bén ni yaca' cwent por ni cayüjn bejn." <sup>31</sup> ;Abi' nadxeb yayal bejn xcasti Dios bén naban!

<sup>32</sup> Per lëjt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra guialzi ni gudëdidi. <sup>33</sup> Yu'di zien loj da't guialzi badëed ree bejn lëjt, abi' baze' reeman lëjt delant loj ree bejn, yu' täädi ad gulëladxtidi bén guzac ree zian. <sup>34</sup> Ad gulëladxtidi bén ni guyu ree ladxguiib, abi' chi baca' ree bejn gra ni rajpidi, babaagajquidi guial ma ragbeedi mazri lasajc ni rajpidi xanyabaa, në ree ni rajpidi ni, taan reen tiblayaa. <sup>35</sup> Zeel ad gusa'ndi guialrliladxidi Jesucrist, din por guialrliladx guin dád zagdxë naj ni tia'di. <sup>36</sup> Rüjn naguiejn gapidi pacens din chile' güüнди zi'c rën Dios, zian tia'di ni ma rëbaman guneeman lojdi. <sup>37</sup> Din loj xtiidx Dios rëb:

Nayob, dád nayob gui't bén naj gui't,  
ad zaglaataman.

<sup>38</sup> Abi' bén naban zi'c rënan,  
guidib tiamp ni nabanman rliladxaman naj.  
Per bal gusa'nman ni rliladxaman naj,  
ad zabaanë'tan laaman.

<sup>39</sup> Per dunuj ree ad nayajct ree zi'c ree bén rusa'n ni rliladx reeman Jesucrist abi' rayal reeman casti, dunuj ree nayajc ree bén rliladx Jesucrist diidxli par chitëë yayal ree casti.

## 11

### *Guialrliladx Dios*

<sup>1</sup> Yan, ꞑxhienin naj guialrliladx? Guialrliladx naj guial guidiblagaa yaliduladx ree gac zi'c caylëjz ree gac, në guial waliqui ni raliduladx ree ni ad raguiaat ree. <sup>2</sup> Dux béngulal ree baya'n reeman zagdxë delant loj Dios guial bililadx reeman laaman.

<sup>3</sup> Zi'c raliduladx ree Dios, dunuj ree rayagbee guial con xtiidxaman beenman xanyabaa në guidxliuj në gra ni raguiaa ree, achetczi ni beenman con ree ni raguiaa ree yan.

<sup>4</sup> Guial bililadx Abel Dios, zeel zagdxë naj gon ni badëëman guial loj Caïn, abi' baya'nman zagdxë delant loj Dios abi' cwa' Dios gon ni bazaladx Abel lojman. Zian majsi ma güjt Abel, per sta rguiajt xhienaag bililadxaman Dios.

<sup>5</sup> Guial bililadx Enoc Dios zeel ad güjtaman, guidib nabanman ziaman xanyabaa abi' ad badxejlt ree bejn laaman guial ma zignë Dios laaman. Per chi gadaman chignë laaman, loj xtiidx Dios rëb guial bayuladx Dios zi'c gubanman. <sup>6</sup> Abi' achut zajc güün zi'c rën Dios bal id rliladxaman laaman. Chutëëz bén rën gap nejz par guidxinman loj Dios rayal chililadxaman guial yu' Dios chililadx tääman guial laaman rudëë ni rëbaman gudëëman loj ree bén raguiil laaman.

<sup>7</sup> Guial bililadx Noé Dios dxel chi rëb Dios lojman guial gac ree ni gadaman guguiaa gac bazoobaman xtiidxaman, beenchaawaman tijb barcw din laaman con ree xfamilaman loj ni rëb Dios gac. Dxel por guialrliladx guin biguien guial gra bénguidxliuj rayal casti ni rëb Dios, abi' baya'n Noé zagdxë delant loj Dios guial bililadxaman xtiidxaman.

<sup>8</sup> Ziangajc Abraham guial bililadxaman Dios, bazoobaman xtiidxaman chi rëbaman lojman din grii ladxaman cheman lod tia'man guidxliuj ni gudëed Dios lojman. Abi' brii ladxaman ni'quid ragbeetaman banguin cheman. <sup>9</sup> Guial bililadxaman Dios, gubajnman zi'c benzit loj guidxliuj ni rëb Dios gudëëdaman lojman. Gurejman lën ree carp ni naj në guid, ziangajc Isaac në Jacob në laa reeman rayal guidxliuj guin. <sup>10</sup> Gubajn Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

<sup>11</sup> Ziangajc Sara, por xguialrliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial rüjn Dios cumplid xtiidxaman. <sup>12</sup> Zian gojc majsi bengol da't ma naj Abraham per gojcaman



famil. Dád zien ree xdiaaman guyu zi'c ree bajl xanyabaa, zi'c ree üx ni riga' ro' nijsdoo ni ad zile't guiyab.

<sup>13</sup> Gra ree bén ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promeys ni been Dios loj reeman, per guial rililadx reeman ragbee reeman guial zajc zi'c rëb Dios abi' rabaa reeman. Laa reeman ragbee guial tio'p choon dxejzi zëéd reeman loj guidxliuj guie ad tiblayaat. <sup>14</sup> Abi' ree bén rniee zian, zian rguienchaaw guial sta rguuil reeman lod diidxli gac ladx reeman. <sup>15</sup> Din bal por guidxliuj lod guza reeman cayüjn reeman xgab, dxel zile' nayejc reeman ni stijb. <sup>16</sup> Per laa reeman mazri rüjn reeman xgab por tijb luar lod naj mazri zagdx, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

<sup>17</sup> Guial bililadx Abraham Dios, dxel chi been Dios laaman prueb din gugüjt xi'nman Isaac din gudëédaman laaman zi'c gon par Dios, cwëjb Abraham majsi tijbzi Isaac guin naj xi'nman, majsi ragbee tëéman guial rëb Dios lojman: <sup>18</sup> “Por xi'nl Isaac gacxhieje da't xdiaal.” <sup>19</sup> Per Abraham yu'guijcaman guial rajp Dios guialrniabee xt par yasbanman bengüt ree, abi' zi'c rulüü baban xi'nman stijb chi gudëédaman prueb guin.

<sup>20</sup> Ziangajc Isaac por guialrililadxaman Dios dxel chi beenle' ree xi'nman Jacob con Esaú, rëbaman xhienaag gac con tijbgaj reeman. <sup>21</sup> Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guiëtaman. Dxel cwa' yagrliaadxaman abi' gurejdx gunabaman Dios. <sup>22</sup> Ziangajc Xiëb guial bililadxaman Dios, chi ma guidxin hor guiëtaman, rëbaman guial grii ree bén Israel Egipto, abi' rëbaman loj reeman xhienaag güünnë reeman xdxijtaman.

<sup>23</sup> Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon bëëw guial baguiaa reeman najx xindoza'cdxoon, abi' ad bidxebt reeman guial rëb bén naj rey guial guiët gra ree xindobëz. <sup>24</sup> Abi' chi goc Moisejs guin bengol, guial bililadxaman Dios, gojc xixgabaman cwexuuman niajcaman xi'n xi'ndxa'p rey Egipto. <sup>25</sup> Par laaman zagdxeli naj sagdiajman con ree xbén Israelaman, luar nüjnman dol niro'nldaxaman laa reeman din niajpaman ni rënman, ni ad rdaant ree par tiblaya. <sup>26</sup> Par laaman mazri lasajc sagdiajman zi'c Cristo luar niajpaman gra ree guialnaza'c ni yu' Egipto, din mazri yu'guijcaman guialnaza'c ni yayalaman delant loj Dios. <sup>27</sup> Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rulüü ruguiaaman Dios bén ad zajct guguiaa ree bejn.

<sup>28</sup> Në guial bililadx Moisejs Dios, beenman lanij pascw, abi' gunabeeman baroob ree bén Israel rejn ro' xport lidx reeman, din chi täd xianjl guialgüjt, ad zugüjttaman xi'n yaloj ree bén Israel. <sup>29</sup> Guial bililadx ree bén Israel Dios, gudëd reeman zi'c loj yujbidx lod bixal loj nijsdoo la nijsdoo xnia. Per chi guyën ree bén Egipto nidëd reeman, loj hor guin bayaaw nijs guin dxel gu' reeman nijs abi' güjt reeman.

<sup>30</sup> Guial bililadx ree bén Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin. <sup>31</sup> Abi' Rahab bén goc béngunaa dxuudx luguiedx Jericó, guial bililadxaman ad güjttaman chi güit ree los demazri ree bén ladxaman bén ad bazoobt ree diidx, guial baca'man bén Israel ni we ree bigla'ch luguiedx guin.

<sup>32</sup> Yan, ¿xhie mazri ganin lojdi? Ad zadaant tiamp guin ganin lojdi xcwent Gedeón, Barac, Sansón, Jefté, Davi, Samuel në xcwent ree bén badëë xtiidx Dios loj ree bejn. <sup>33</sup> Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni rëb Dios loj reeman abi' basiaaw reeman ro' ree beedx. <sup>34</sup> Guzuj reeman loj bajl ro' abi' achet goc reeman, gulaa reeman loj guialgüjt con espad, guyu reeman gojl chi rulüüczi ad yu't reeman gojl, guzudxi'ch reeman loj wadijl abi' balaagdxa reeman benzit ni gudilë reeman. <sup>35</sup> Në ree béngunaa ni güit ree xfamil, por guial bililadx reeman Dios baban ree xfamil reeman stijb.

Per yu' ree bejn majsi güjt reeman, per par laa reeman mazri zagdx guzagdiaj reeman loj ree bén bagüjt laa reeman, luar nusa'n reeman guialrililadx reeman Dios par gap reeman stijb guialnaban cüb ni mazri lasajc. <sup>36</sup> Yu' tëë reeman guzagdiaj baze' ree bejn

laa reeman, gudijn ree bejn laa reeman, xt guxhii ree bejn laa reeman con caden abi' guyu reeman ladxguuib. <sup>37</sup> Yu' reeman bagüjt ree bejn con guiaj, yu' tää reeman bagüjt reeman gulëëxhün reeman laa reeman con sierr, güjt tää reeman con espad. Yu' tää reeman biza gra lad najcw reeman guid xab xiil në guid xab dxib, probza laa reeman naya biza reeman, graloj beennë ree bejn laa reeman. <sup>38</sup> Biza reeman niz loj yujbidx, niz ruguia' ree, në graloj lën ree guiajbiliaa. Bén guin ree ad rayal nibajn reeman loj guidxliuj guial dád benza'c gojc reeman. <sup>39</sup> Abi' majsi biguien guial gra reeman diidxli bililadx reeman Dios, per ad cwa't reeman ni rëbaman loj reeman. <sup>40</sup> Din laaman beenman xgab tijb ni mazri zagdx par dunuj ree, abi' ad gojc gajt ni rëbaman loj reeman din tijbzi yaca' ree ni rëbaman con laa reeman.

## 12

### *yunaal ree Jesús*

<sup>1</sup> Zeel, zi'c ma bacaagdiajg ree por zien ree bejn xhienaag bililadx reeman Dios, rayal yasa'n ree tiblax gra dol në gra ree ni rudxoon yaguieen ree zi'c rayal, ad zalenya' tää ree yunaal ree nejz ni ma balüü Dios dunuj ree. <sup>2</sup> Rayal yadxeguij ree Jesucrist din por laaman zëed guialrliladx ni raya'p ree abi' por tijbzi laaman rayaal guialrliladx ni raya'p ree. Gudaanman guialzi ni gudëdaman loj crüjz, ad batutaman güjtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zojbaman xladbee Dios xanyabaa.

<sup>3</sup> Gol been xgab xhienaag guzagdiaj Jesucrist chi basagdiaj ree béndol laaman, chitëe yadxaguidi, ad yalenyadi por ni cazajquidi. <sup>4</sup> Din majsi cusagdiaj ree bejn lëjt guial cayüjndi naguiejn ad cayüjntidi dol, per ad wazujtidi loj guialgüjt por zian. <sup>5</sup> ¿Wen ma bayanladxidi ya xhienaag banee Dios lëjt consejw najdi xi'nman? Loj xtiidxaman rëb: Xi'n, bidxga' zi'c runee dux Dad ree Dios lüj consejw, ad bal yalenyadi chi guzuxnejzaman lüj.

<sup>6</sup> Din rüjnnaaman bén ni naj ree xi'nman, ruzuxnejzaman laa reeman guial rënman laa reeman.

<sup>7</sup> Zeel gol gudaan guialzi, din zagdx najn par lëjt. Rüjnnë Dios lëjt zi'c rüjnnë bejn xi'nman, ¿wen yu' dad ad ruzuxnejz xi'n ya? <sup>8</sup> Yan bal id ruzuxnejz Dios lëjt zi'c rüjnnë gra ree xi'nman, rën guiëban guial ad najtidi xi'nman diidxli, ad najtaman xDadidi. <sup>9</sup> Lëjt ragbee guial chi bayajc ree xindoo, gudijn dux dad ree dunuj ree din yacaagdiajg ree xtiidxaman abi' raya'p reeman respejt. Yan, ¿chexc di ad ree yazoob xtiidx dux Dad ree Dios bén yu' xanyabaa, din yaya'p ree guialnaban con laaman? <sup>10</sup> Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdx. Per Dios ruzuxnejzaman dunuj ree par tijb ni mazri zagdx par dunuj ree, ruzuxnejzaman dunuj ree din yabajn ree naya zi'c laaman. <sup>11</sup> Diidxliczi achet guialnaa naj nix loj hor ni cadëdilan, ragnaalil. Per ree bén ni rusiid ruzoob diidx zian, laa reeman naban zagdx, naalyuj delant loj Dios.

### *Ad cwëëladxidi xtiidx Dios*

<sup>12</sup> Zeel gol bagu' luxdoodi, gol badëed valor lëjt gajc zi'c tijb bén raca'ladx chi ma badxag da'taman. <sup>13</sup> Gol been naguiejn gol gubajn xnejz, din ree bén ragdxa xhie güün reeman, ad gusa'n reeman xnejz Dios, chu' luxdoo reeman zagdx chinal reeman laan.

<sup>14</sup> Gol been naguiejn guibandi zagdx con gra ree bejn, gol gubajn naya delant loj Dios din bén ad nabant naya ad zile't guguaaman dux Dad ree Dios. <sup>15</sup> Gol gojp cudad chitëe chu' tijbidi gusa'n tiblax zi'c rën Dios gagnëman lëjt chitëe chu' tijbidi gac zi'c gui'xh nala ni rüjn guialquia abi' guxhiinan gra xcompniaridi. <sup>16</sup> Ni'qui tijbidi ad rayalt sunëdi bén ad najt lacheelidi, ad cwe'quidi tiblax ni zagdx ni zëed ree por Dios chitëe saquidi zi'c guzac Esaú, por tijb guialraw bato'man guialrniabee ni rayalaman guial najman bén yalaj loj bijchaman. <sup>17</sup> Abi' lëjt ragbee guial chi guyën Esaú nüjnle' xdadaman laaman ad beenle'taman laaman zi'c rayalaman. Majsi dád biinman gunabaman laan, per ad bile't nuchaaman ni beenman.

<sup>18</sup> Lëjt gadidi chibig lod ad najt par gugaalidi zi'c gubig ree bén Israel gulal guijc guia' Sinaí lod baguiaa reeman cayajc bajl guijc guia' guin, baguiaa reeman go'xh ya's ni basiaaw guijc guia' guin abi' rbi' gaj tijb bidoxh yagaj zi'c bidojn. <sup>19</sup> Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman. <sup>20</sup> Din ragbee reeman guial nawëëg naj ni gunabee Dios güün reeman chi rëbaman: “Chutëëz bejn o be gui'xh ni gugaal guijc guia' guie rayal guiëtaman o guiëtib con guiaj o con lans.” <sup>21</sup> Nadxeb naj ni baguiaa reeman xt Moisejs rëb: “Rnijn guial tant rdxeban.”

<sup>22</sup> Per lëjt ma bibiguidi loj Dios, ad guzajctidi zian. Ma yu' nejz par guidxindi ruguia' Sión, xanyabaa lod naj Jerusalén ladx Dios bén naban, lod nadxag lasa' ree zien da't ree anjl, <sup>23</sup> dád nix yu' luxdoo reeman rën reeman laaman lod yadxajg lasa' ree xbejn Dios bén ni ma ca ree laj loj libr xanyabaa. Ni zojb Dios, bén yanab cwent loj gra bejn, ni tää za' xSprijt ree bén guban zi'c rayal laa reeman ma naya reeman por Dios. <sup>24</sup> Ni gajc zojb Jesucrist, bén guxhal nejz cüb ni raya'p ree par yadxin ree loj Dios. Chi güet Abel xrejnman gunab gac guialguxtis, per con Jesucrist ad gojct zian, güjtlaman, guxhie' tää xrejnman par yayajc ree perdon.

<sup>25</sup> Zeel gol gojp cudad gol bidxga' Dios, laaman najman bén rnieenë dunuj ree. Din bal bén ni ad bidxga't ree xtiidx Moisejs bén badëëd xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid zayal ree xcasti Dios ya bal id zayidxga' ree xtiidx Jesucrist, bén guza diizd xanyabaa din guinieenëman dunuj ree. <sup>26</sup> Chi gunee Dios béngulal ree ruguia' Sinaí, binij guidxliuj. Per yan ma rëbaman: “Gunin guidxliuj zatijb, per ad guidxliujtzi, në xanyabaa.” <sup>27</sup> Chi rëb Dios guial güünman zian zatijb, rën guiëban guial gunijman gra ni beenman, din chiquied ni rayal chiquied din yaya'n ni ad rayalt chiquied. <sup>28</sup> Zeel rayal yadëëd ree quixtëë loj Dios guial ma rayal ree lod canabeeman, lod ad yu't dxej nit, abi' con respejt në guialrdxeb yaguieen ree ni ruladxaman. <sup>29</sup> Din dux Dios ree naj zi'c tijb bajl ni ruze'c gra.

## 13

### *Xhienaag güün bejn ni yayuladx Dios*

<sup>1</sup> Ad cwëz guiëndi xcompniaridi bén rliladx ree Jesucrist. <sup>2</sup> Ad yayanladxidi gudëë lidxidi yaya'n ree bén ri't, din zian yu' ree bén baca' ree xianjl Dios sin guial gagbee reeman chunin.

<sup>3</sup> Gol basaaladx bén yu' ree ladxguiib, gol gunaladx guial në lëjt yu' ladxguiib con laa reeman. Gol been tää xgab por ree bén ni cazagdiaj, gol gunaladx guial në lëjt cazagdiaj.

<sup>4</sup> Gol gojp respejt guialruxhliaa, ad gusquiee lacheelidi. Din Dios zudëëdaman casti bén za'në xinguaaw o béngunaa ren, në gra ree bén ni rüjn ree ni dxuudx con ree bén ad najt lacheel reeman.

<sup>5</sup> Ad sëëbladxidi milia, gol baya'n conform con ni rajpidi din Dios ma rëb: “Gra dxej za'n con lüj, abi' ad yu't dxej gabëladxan lüj.” <sup>6</sup> Abi' con confianz zajc yaguie'ch ree:

Da Dadan Dios naj bén ragnë naj

ad rdxebtan majsi xhietëëz güünnë ree bejn naj.

<sup>7</sup> Gol basaaladx ree bén ni gunabee ree lojdi, bén ni balüü ree lëjt xtiidx Dios. Gol been xgab xhienaag gubajn reeman gol binal tää zi'c bililadx reeman Jesucrist.

<sup>8</sup> Abi' Jesucrist laagajcaman nieey, laagajcaman yan në zianczi. <sup>9</sup> Ad tiëbidi gusquiee graloj ni rulüü ree bejn lëjt, din ad najt reen zi'c rayal chinalidi Cristo. Mazri zagdx gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajct gawidi, din costumbr guin ree achet yudar rüjn ree delant loj Dios.

<sup>10</sup> Dunuj ree raya'p ree tijb bén güet por dunuj ree, laaman naj zi'c tijb xgon bejn por xtolaman, gon ni ad zajct gaw ree bixhioz rüjn ree sirv lën yadoo guin. <sup>11</sup> Bixhioz zojbloj guin, laaman rinë xrejn ree be ni rudëëd ree bejn zi'c gon por xtol reeman, rinëman rejn

guin lën yadoo lod rayal chinëman laan. Dxel ree begüt guin re'c reeb ro' guiedx lod achut zobj. <sup>12</sup> Ziangajc gojc con Jesucrist, ro' guiedx Jerusalén güjtaman par gusiaman bejn xtol reeman por xrejnman. <sup>13</sup> Zeel yunaal ree Jesucrist majsi gulëe reeman laaman luguedx Jerusalén, në majsi xhietëez guialxtu o guialrzagdiaj yadüüd ree zi'c laaman. <sup>14</sup> Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylëjz ree lod yabajn ree tiblayaa. <sup>15</sup> Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree guial nayajc ree xbejnman. <sup>16</sup> Ad yayanlaxidi güüнди ni zagdxë güün tëe lasa'di yudar con ni gactzidi, din laa reen naj ni ruladx Dios.

<sup>17</sup> Gol bazoob xtiidx ree bën rniabee lojdi, bën rulüü ree lëjt xtiidx Dios. Gol gojp reeman respejt din laa reeman ruguiaa lëjt din chinalidi xtiidx Dios, guial ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din guial ad ruzoobt diidx achet sirv güünan lëjt.

<sup>18</sup> Gol gurejdx gunab Dios por dunujn. Dunujn rayagbee guial achet ni mal cayguieenan, abi' rayënan guial gra ni yaguieenan, yaguieenan laan xnejz. <sup>19</sup> Rniaaban lojdi din cwedx guiniabidi Dios por naj, din guneeman permis diob guialan din gazun con lëjt zatijb.

*Diidx bigra ni bacan loj gui'ch guie*

<sup>20</sup> Dios bën rabe'cdxe luxdoo ree bejn, bën basban Jesucrist, rajpaman dunuj ree zi'c rajp tijb bejn xiil, por xguialgüjtaman zianczi ma raya'p ree nejz par yadxin ree loj Dios, <sup>21</sup> laaman gagnë lëjt par gra ni naj zagdxë din chile' güüнди zi'c rënman. Laaman gagnë dunuj ree din yayajc ree zi'c rënman guial ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

<sup>22</sup> Compniar raliduladx ree Jesucrist, ad narooft gui'ch guie, per rniaaban lojdi ad yaleny'a'di por ree diidx ni canin lëjt cunen lëjt consejw. <sup>23</sup> Rugojn tëen lëjt guial ma barii dux compniar ree Timoteo ladxguiib abi' bal nayob gui'taman niz guie, dxel du gropan yo'p yudganajn lëjt.

<sup>24</sup> Gol bagajpdioz gra ree bën rniabee lojdi bën ni rulüü ree lëjt, në gra ree dux compniar ree bën rliladx ree Jesucrist. Abi' ree bën Italia rugajpdioz reeman lëjt.

<sup>25</sup> Dios güünle' gradi. Amén

## Gui'ch bacaa Santiaaw

### *Rxhial Santiaaw xtiidx Dios*

<sup>1</sup> Naj naj Santiaaw, cayünan xchiin Dios në xchiin Dad Jesucrist, rugajpdiozan gra ree bën naj xdiaa Israel, nare'chidi guidib guidxliuj.

### *Quiarguejn zëed loj Dios*

<sup>2</sup> Gradi compniar raliduladx ree Jesucrist, rnin lëjt, gol babaa majsi xhietëez loj guialrzagdiaj tédidi. <sup>3</sup> Lëjt ragbee, chi rdédidi gralojn guial riladxidi Dad Jesucrist, zian rusiididi gapidi pasens. <sup>4</sup> Per gol been naguiejn güün pasens guin lëjt yudar din gaquidi zi'c rën Dios, gusnuudi loj xnejzaman, chitëe guiyaadxidi xhienin.

<sup>5</sup> Bal chu lëjt riaadx chu' mazri xquiarguejn, gol gunab xquiarguejndi loj Dios. Laaman gunee gra ni riaadxidi, ad zabexuutaman gunee man laan. <sup>6</sup> Per rayal chililadxidi guial gunee man laan, ad rayalt chu' nawëeguidi, din bën ru nawëeg luxdoo naj zi'c xtüjp nijsdoo ni rinë bi ni guiezi. <sup>7</sup> Bën naj zian ad cwëzidi gunee Dios ni guiniabidi, <sup>8</sup> din bën ru nawëeg, ad rüjntaman tijbzi xgab, ad rinal tëtaman tijbzi nejz.

<sup>9</sup> Lëjt guial najdi bënprob gol babaa, din loj Dios najdi bën zobjloj. <sup>10</sup> Guiáad lëjt benrijcw, gol babaa guial ma ragbeedi achet lasajc guialrijcw loj Dios, din guialrijcw guin najn ni téd zi'c rdéd guiaa rial dajn. <sup>11</sup> Lëjt ragbee chi rbëe loj gubijdx gojl, dxel rucwiidxan gui'xh, rba'y ree xguiaan, dxel ad nixtri rguienan. Ziangajc benrijcw yu' dxej guiëtaman majsi galay gra ree ni rajpaman.

### *Bën rdaan ree rdëd loj guialrzagdiaj*

<sup>12</sup> Chabaa bën rzudxi'ch loj xnejz Dios rdaan tëeman xhietëez rzajcaman guial riladxaman Jesucrist. Chi ma gudaanman loj guialrzagdiaj, tia'man coron rayalaman, laan naj guialnaban tiblyaa ni cwëb Dios yazaladxaman loj ree bën rën laaman.

<sup>13</sup> Bal chu rüjn xgab güün ni mal, ad najtan ni naladxaman guial Dios rudxe' xgab guin guijcaman. Din ad yu't dxej guiën Dios güünman ni mal, ni'quid rgu' tëtaman xgab guijc bejn güünman ni mal. <sup>14</sup> Xixgabmal gajc bejn rudëe laaman gan güünman ni mal. <sup>15</sup> Zeel por xgabmal guin rüjn bejn dol, dxel chi ma rniabee dol guin laaman, stijbzi xcasti Dios rayalaman.

<sup>16</sup> Gradi compniar raliduladx ree Jesucrist, diidxli rënan lëjt, ad gusquiee lëjt gajc. <sup>17</sup> Graczi xgab zagdxë në gra ni za'c zëed loj Dios, bën been gra ree bajl yu' xanyabaa. Ad yu't dxej guidxaaman, zianczi rüjnman ni zagdxë.

<sup>18</sup> Guial guyënman, zeel baneeman guialnaban tiblyaa duloj ree, guial ma raliduladx ree xtiidxaman, din yayajc ree zi'c ree bin yaloy yaca'man loj gra ree ni beenman. <sup>19</sup> Zeel yan ma ragbeedi nine ree.

### *Rayal yasa'n ree gra ni mal riga' loj guidxliuj*

Rënan lëjt, zeel rnin lojdi gradi compniar raliduladx ree Jesucrist: Gol guzujsin din gucaagdiajguidi, ad yoobladxidi guial guinieedi ni'qui guial yalendi, <sup>20</sup> din bën ralen ad zajc güünman ni rën Dios. <sup>21</sup> Zeel gol gulëeladx gra ni ad najt zagdxë në gra ni mal riga' loj guidxliuj guie, gol gojc bënchaawladx, gol bazoob xtiidx Dios ni ma bacaagdiajguidi, din laan yabëe lëjt loj dol. <sup>22</sup> Per gol been zi'c rëb xtiidxaman, ad aal rucaagdiajgzidan, chitëe gusquiee lëjt gajc. <sup>23</sup> Din bën rucaagdiajgzi laan abi' ad rüjntaman zi'c ma bacaagdiajgaman, najman zi'c tijb bën ruguiaa loj guiaawajn, <sup>24</sup> per chi ma ziaman, rayanladxaman xhienaag naj lojman. <sup>25</sup> Per bën ad rayanladxt ni bacaagdiajgaman rüjnman naguiejn chignia'man xtiidx Dios mazri, din laan nayaaloj rabëe tëen dunuj ree loj dol. Rzudxi'chaman loj nejz guin, rüjn tëeman ni rën Dios. Bën güün zian chu' luxdoo man zagdxë por ni cayünman.

<sup>26</sup> Bal chudi naladx zinalidi xnejz Dios zagdxë per ad rajptidi cudad xhienin guinieedi, cusquiee lëjt gajc, dxel achet lasajc guial naladxidi zinalidi xnejz Dios. <sup>27</sup> Din par dux

Dad ree Dios bén zinal xnejzaman zagdxe naj Bén rüjn yudar xindo bizëjb ree në ree béngunaa bizëjb chi rzagdiaj reeman, rajp tëëman cudad chitëë yabaman loj ni mal riga' loj guidxliuj.

## 2

*Ad rayalt yalej ree loj ree bejn*

<sup>1</sup> Gradi compniar raliduladx ree Jesucrist Bén rniabee, ad rayalt cwedi loj ree bejn. <sup>2</sup> Yaguie'ch ree, chu' tijb bejn lod rado'pidi, najcwaman lajd zagdxe yu' tëë guiibnil or yaaman, chu' tëë tijb Bénprob najcwaman lajd senci, <sup>3</sup> abi' mazri güüncwentidi Bén najcw lajd zagdxe guin, guiëbidi lojman: “Gurej guie, laan naj luar zagdxe”, guiáad loj Bénprob guin guiëbidi: “Yagaj guzuli o gurej luyuj zii ya.” <sup>4</sup> Chi rüjndi zian, ¿nid cabedi bejn loj gajquidi ya?, ¿nid rula'chidi ya chi rüjndi gra ree xgabmal guin? <sup>5</sup> Gradi compniar raliduladx ree Jesucrist, rënan lëjt, gol bacaagdiajg nine: Dios gule Bén naj ree Bénprob loj guidxliuj din chililadx da't reeman laaman, din yayal reeman lod rniabeeman zi'c cwëbaman loj ree Bén rën laaman. <sup>6</sup> Guiáad lëjt rusa'n xtudi Bénprob ree. Wen, ¿id benrijcw guin ree rusagzi lëjt ya rudxig tëë reeman lëjt loj guxtis? <sup>7</sup> ¿Id laagajc reeman rnieeguidx Jesucrist ya, Bén naj Bénlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

<sup>8</sup> Bal walidi rüjndi ni ca loj xley Dios, zi'c ca loj xtiidxaman ni rëb: “Guyën bejn ree zi'c rën lüj gajc”, dxel zagdxequi cayüjndi. <sup>9</sup> Per bal mazri rüjncwentidi tijb bejn guial loj stjibaman, dxel ma cayüjndi dol, ma rajpidi dol guial ad rüjntidi cumplid xley Dios. <sup>10</sup> Din bal chutëëz zinal gra ni ca loj ley guin per ad rüjntaman tijb ni rayal güünman, ma cusaglojman guidib ley guin. <sup>11</sup> Dios gajc rëb: “Ad sunël xinguaaaw ren o béngunaa ren”, rëb tëëman: “Ad gugüjtil bejn.” Per bal id za'nël xinguaaaw o béngunaa ren ya per rugüjtil, dxel ma cusaglojl xley Dios. <sup>12</sup> Zeel gol gunee gol been tëë zi'c ree Bén yadëed cwent diidxli loj Dios por xtiidxaman ni rabëë dunuj ree loj dol. <sup>13</sup> Din Bén ad rayat ree lasa', ad zayat Dios laa reeman dxej güün xgualguxtisaman. Per Bén raya ree lasa' ad najtan ni guidxeb reeman dxej guin.

*Rayal yaguieen ree ni rën Dios*

<sup>14</sup> Zeel rnin lëjt, ¿xhie sirv güün bal chu guiëb, rliladxan Dios, abi' ad rüjntaman ni rënman? ¿Wen, guialzi rliladxaman ya gacaman perdon? <sup>15</sup> Yaguie'ch ree, tijb dux compniar ree, Bén rliladx Jesucrist, najman xinguaaaw o béngunaa ya, guiyaadx xabaman con ni gawaman, <sup>16</sup> abi' guiëb tijb lëjt loj reeman: “Yaguiajdi zagdxe, gawidi zagdxe ad gagnajl tëëdi.” Per bal id rudëëdi ni riaadx reeman, ¿xhieczi gan guiëbidi zian? <sup>17</sup> Ziangajc rzajc Bén rëb rliladx Dios abi' ad rüjntaman ni rënman, achet lasajc guial rëbaman rliladxaman laaman.

<sup>18</sup> Xt zajc chu na lojl: “Lüj na rliladxil Dios, guiáad naj rünan ni rënman.” Yan balüü naj guial rliladxil laaman guial ad rüjntil ni rënman, guiáad naj gulün guial rliladxan guial rünan zi'c rënman. <sup>19</sup> Zagdxe rüjnl bal rliladxil yu' tijbzi Dios, per në ree xindxab rliladx zian, abi' xt rnij reex guial rdxeb reex. <sup>20</sup> Zeel ad bal natontil, bignia' achet lasajc guial chililadx bejn Dios bal id rüjnman ni rënman. <sup>21</sup> Basaaladx, dux béngulal ree Abraham, bayagbee Dios laaman zi'c Bén ad beent dol, guial beenman ni guyën Dios, chi rëbaman lojman din nugüjt xi'nman Isaac nudëë tëëman laax zi'c gon lojman. <sup>22</sup> Ma qui ruguiaal, guial bililadxaman, zeel beenman ni guyën Dios. Guial beenman zian, zeel biguien guial diidxli bililadxaman laaman. <sup>23</sup> Zian gojc cumplid ni ca loj xtiidx Dios, lod rëb: “Bililadx Abraham Dios, zeel bayagbeeman laaman zi'c Bén ad beent dol”, bayagbee tëë ree bejn laaman zi'c tijb xmiw Dios.

<sup>24</sup> ¿Ma bignia'di yan ya? Rayagbee Dios bejn zi'c tijb Bén ad wayüjnt dol guial rüjnman ni rënman, ad guialzi rëbtaman rliladxaman laaman. <sup>25</sup> Ziangajc gojc con tijb Bén brii laj Rahab, Bén goc béngunaa dxuudx, bayagbee Dios laaman zi'c Bén ad beent dol guial beenman ni rën Dios, chi badëed lidxaman baquie'chloj tio'p ree Bén Israel we ladxaman

biquiaa reeman xhienaag chu' ree xsuldad reeman, been tēeman laa reeman yudar persi zia reeman nejz ren. <sup>26</sup> Din bēn achet xsprijt ad zajct guibanman. Ziangajc rzajc tijb bēn rililadx Dios: bal id zūjnman zi'c rēnman, achet lasajc guial rēbaman rililadxaman laaman.

### 3

#### *Du lüdx ree naj zi'c tijb luar lod guidxa ni mal*

<sup>1</sup> Gradi compniar raliduladx ree Jesucrist, rnin lējt: Ad bal ziendi guiēn gac mextr gulüü xtiidx Dios, din ma ragbeedi, dunujn guial ralüün xtiidxaman, mazri zro' naj guialguxtis ni güün Dios con dunujn bal id zaguieenan zi'c rayal. <sup>2</sup> Du graczi ree rüjn xhietēēz dolan gan yu' dxej, per bal chu lējt ad rüjnt dol ni'qui tijb diidxguijdx ad ririi tēēt ro'di, najdi bēn naya delant loj Dios, rajc tēē rniabee lējt gajc. <sup>3</sup> Lējt ragbee, chi ralu' ree fren ro' ree way din che reeb lod rayēn ree, zian raguieen ree gan ranabee reeb. <sup>4</sup> Ziangajc ree barcw, majsi narooob reen, majsi por mazt rucadxaa bidoxh laa reen, per con tijb guiibdobēz ni la timón, con laan ma zajc chinē bejn laan lod rēntzaman. <sup>5</sup> Ziangajc naj du lüdx ree, najn ni dobēz, per narooob guialquia rüjnan. Najn zi'c tijb guij dobēz, per majsi najn ni dobēz, rüjnan guialquia narooob ruze'can dajn narooob. <sup>6</sup> Du lüdx ree naj zi'c tijb guij, zajc yanee nē' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczi grii diidx zēēd loj xindxab du ro' ree. <sup>7</sup> Rayagbee ree guial graloz ree bedoxh zajc gagnadoo, xt nē ree be rzuj nē ree bēēl nētēē ree be yu' loj nijs, yan ma gognadoo reeb por ree bēnguidxliuj. <sup>8</sup> Per lüdx bejn achut wayūjn gan nabee laan, najn zi'c tijb ni ad zajct gagnadoo, zi'c tijb ni guidxa venen rugūjt. <sup>9</sup> Con du lüdx ree ranee ree diidx zagdxe par dux Dad ree Dios, abi' con laagajcan raneeguijdx ree bejn, bēn been gajc Dios zi'c najman. <sup>10</sup> Gradi compniar raliduladx ree Jesucrist, du ro' ree ririi diidx zagdxe nē diidxguijdx, per ad rayalt gacan zian. <sup>11</sup> Lējt ragbee, lod rajch nijs zagdxe ad zajct grii nijs naxij, <sup>12</sup> ad zajc tēēt tia aceitunas loj yag higo, ad za zajct tia higo loj yag uv, ad zajc tēēt grii nijs zagdxe lod ririi nijs naxij.

#### *Ni rüjn bēn ca' quiarguejn rudēē Dios*

<sup>13</sup> Bal chu lējt naladx rajc rignia' tēē gra xtiidx Dios, rayal gacaman bēnchaawladx guiban tēēman zi'c rayal, zian guiguien guial yu' xquiarguejnman. <sup>14</sup> Per bal guidxa guialnadēdloj luxdoodi rēn tēēdi gra par lējt gajc din gaquidi mazri bēn zojbloj, ad güüнди benro' guial rajquidi xtiidx Dios, cusquieezidi guial rüjndi zian. <sup>15</sup> Lasa' quiarguejn guin ad Diost rudēē laan, xquiarguejn gajc bēn riga' loj guidxliuj guien, zēēd tēēn loj xindxab. <sup>16</sup> Din lod yu' guialnadēdloj lod yu' tēē bēn rēn gra par laagajcaman, ni yu' wadijl nē gra loj ni mal. <sup>17</sup> Per bēn rajp quiarguejn runee Dios, yaloz rüjnman naguiejn guibanman zagdxe lojman, gac tēēman bēn ad rüjnt nabē, nē benza'c, gap tēēman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tēēman cumplid ni guinieeman. <sup>18</sup> Bēn rüjn ree naguiejn ribajn sin wadijl, raguiil reeman mod guinieenē reeman bejn zagdxe, zian rbajn reeman zi'c rēn Dios.

### 4

<sup>1</sup> ¿Ban zēēd guial ralen lasa'di nē guial rdilidi? ¿Id zēēdan por xgabmal ni rüjndi ya? <sup>2</sup> Rzēēbladxidi gapidi ni ad rajptidi, zeel xt rugūjt lasa'di din tia'di ni rēndi, rdēdloj tēēdi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rēndi, din ad rniabtidan loj Dios. <sup>3</sup> Abi' bal rniabidan, ad runeetaman laan, din ad rniabtidan par güüнди ni zagdxe, rēnzidan din guibandi zi'ctzi rēndi. <sup>4</sup> ¿Bēn rusquiee! ¿Id ragbeedi ya guial chu rinal ni mal yu' loj guidxliuj ad zajct gaquidi xmiw Dios? Zeel bal chu rēn chinal ni mal guin, laagajcaman za' contr Dios. <sup>5</sup> Ad ca xlia'tzi loj xtiidxaman lod rēb: “Badxe' xSprijt Dios du luxdoo ree, rēnman Sprijt guin, xt neelozman laaman.” <sup>6</sup> Dád zro' naj yudar rüjn Dios dunuj ree, zi'c ca loj xtiidxaman lod rēb: “Dád naza'c Dios con ree bēn rüjn naya lojman, per ad rüjn cwenttaman bēn rüjn ree benro'.” <sup>7</sup> Zeel gol bazoob xtiidx Dios, ad gudēēdi mod güün xindxab lējt gan, zian chiquiedix loj xnejzidi. <sup>8</sup> Gol gubig loj dux Dad ree Dios din güün cwentaman lējt, guiáad lējt bēndol, gol

bariica loj dol, guiáad ree b́en yu' nawëëg luxdoo guial chinalidi xnejz Dios, con guidib luxdoodi gol binalaman. <sup>9</sup> Gol guyu xgab, gol guyu naya gol biin tēë por xtolidi, luar guxijdxidi gol biin, luar chu' luxdoodi nix gol guyu naya, <sup>10</sup> gol been naya loj Dios, din guiliesaman xvaloridi.

*Ad rayalt yala'ch du lasa' ree*

<sup>11</sup> Gradi compniar raliduladx ree Jesucrist, ad bal rnieeguijdx lasa'di, din b́en rnieeguijdx o b́en rula'ch lasa', ma caneeguijdxaman cula'ch tēëman xley Dios. Bal rula'chidan, ad cayüntridi zi'c rniabeen, lëjtli ma canabee laan. <sup>12</sup> Per tijbzi Dios basa'n ley guin rüjn tēëman guialguxtis, laaman ca' guialrniabee guial yabëëman nē guial gunijtaman. Per lüj, ¿chu najl zeel rula'chil bejn?

*Dux guialnaban ree naj ni tibrajtzi*

<sup>13</sup> Yan gol bacaagdiajg nine lëjt b́en rēb ree: “Yan o guixie ya yo'n loj tijb ciuda, ni yadxu'n tib ijz, yaguieenan negojs lod yaguieenan gan zro' da't milia.” <sup>14</sup> Ni'quid ragbeetidi xhie gac guixie, din dux guialnaban ree naj zi'c tijb bēj rguien tibrajt, stibrajt ma gunidlojn. <sup>15</sup> Zagdxeli naj guiëbidi: “Bal gunee Dios dunujn guialnaban, yaguieenan nine o ni ni ya.” <sup>16</sup> Per lëjt mazri zinalidi xtiidx dxalidi, abi' laa reen naj ni mal. <sup>17</sup> Zeel b́en ragbee xhienaag güünman ni zagdx e abi' ad rüjntaman laan, ma cayünman dol.

5

*Ni rüjn ree benrijcw*

<sup>1</sup> ¿Lëjt, najdi benrijcw! Gol bacaagdiajg nine, gol biin gol gurixdiaj tēë, din ma zēëd lod sagdiajdi, <sup>2</sup> tant zien ni rajpidi xt rxin reen, guiáad xabidi xt raw be laa reen. <sup>3</sup> Gra or nē plajt ni rajpidi xt rzobēj reen, laagajc reen rulüü ni mal rüjndi, laagajc reen gac zi'c tijb bajl gustib lëjt. Ma zidyob güün Dios xguialguxtisaman, guiáad lëjt gule'cchaaw ni lasajc ree loj guidxliuj guie. <sup>4</sup> Gol baguiaa, laa ree b́en been xchiindi canab din quixidi laa reeman, xt Dios b́en ca' gra guialrniabee ma biguiejn guial caygu' reeman guialquia. <sup>5</sup> Nabandi zi'ct rëndi, per cusni'szidi ni ad züjnt lëjt sirv chi guidxin dxej güün xguialguxtis Dios. <sup>6</sup> Din xt baguulidi mod persi bagüjtidi b́en ad beent ree xhienin, abi' achet gojc nüjn reeman chitēë niëjt reeman.

*Royal yarejdx ree Dios yaya'p tēë ree pasens*

<sup>7</sup> Gradi compniar raliduladx ree Jesucrist, gol gojp pasens xt dxej gui't dux Dad ree Jesucrist stijb, zi'c rdaan tijb b́en rüjn dxiin dajn, rbëzaman guia yaloj xt guia bigra din yalesaman ni guxübinman. <sup>8</sup> Ziangajc lëjt gol gojp pasens, ad yalenya'di, din ma zidyob dxej gui't dux Dad ree Jesucrist.

<sup>9</sup> Rni tēën lëjt, ad yalenya' nē lasa'di, chitēë xhie casti yayalidi, din ma zidyob dxej güün xguialguxtis Dios. <sup>10</sup> Gol binal zi'c been ree b́en badëë xtiidx Dios loj ree bejn, gojp reeman pasens gudaan tēë reeman graloz guialrzagdiaj gudëd reeman. <sup>11</sup> Rayagbee ree guial xiquilbaa ree b́en rdaan loj guialrzagdiaj. Ma biguiejndi xcwent b́en brii laj Job, xhienaag gudaanman chi guzagdiajman, ragbee tēëdi xhienaag beennē Dios laaman, chi gulox gudëdaman loj gra guialrzagdiaj guin, din Dios dád naza'caman raya tēëman bejn ree.

<sup>12</sup> Gol gojp cudad chi rüjndi xhie compromisan loj bejn, ad guza'tidi Dios o xhie stijbnin ya, chitēë gudëëd Dios lëjt casti, zagdxeli naj guinieedi diidxli güün tēë xtiidxidi cumplid.

<sup>13</sup> Bal chu lëjt cazagdiaj, gol gurejdx Dios, o bal yu' luxdoodi zagdx e, gol biil par laaman. <sup>14</sup> Guiáad bal ragxuu tijb lëjt, royal guinieedi b́en rniabee ree lëjt guial najdi b́en rliidx Jesucrist, din cwedx reeman Dios por laaman quiëëb tēë reeman laaman sejt por laj Jesucrist. <sup>15</sup> Bal cwedx reeman Dios con guidib luxdoo reeman, zayajc b́enragxuu guin, yales Dios laaman, abi' bal xhie dolan ma beenman, güünman laan perdon. <sup>16</sup> Zeel gol baxhoobdol loj lasa'di gol gurejdx tēë Dios por lasa'di din yayajquidi, din tijb b́en zinal xnejz Dios, chi rbejdxaman laaman, rüjn cwentaman laaman. <sup>17</sup> Zi'c b́en brii laj Elías b́en badëë xtiidx Dios loj ree bejn, gojcaman b́enguidxliuj zi'cgajc dunuj ree, abi' chi



gudi'n gunabaman loj Dios guial ad zalt guia, dxel ad golt guia choon ijz garol. <sup>18</sup> Chi guredxaman Dios zatijb, zianz bazuloj gol guia, dxel bayu guialnaza'c loj guidxliuj.

<sup>19</sup> Gradi compniar raliduladx ree Jesucrist, bal chu lëjt rarii loj xnejz Dios abi' por stijb bejn yajejquidi, <sup>20</sup> gol gogbee guial chutëez bén rasiejc tijb bëndol loj nejz zagdxe chitëë chinalaman ni mal, laaman rabëë bëndol guin loj casti, abi' majsi ma beenman zien dol, gran gac perdon.

## Gui'ch yaloj bacaa San Pedr

### *Rxhial Béd xtiidx Dios loj ree bejn*

<sup>1</sup> Naj Béd, najn tijb xi apóstol Jesucrist, laaman guxhaal naj, cucan gui'ch guie par lèjt najdi bèn bire'ch gra lad abi' zojbidi guiedx riga' ree niz Ponto, Galacia, Capadocia, Asia Menor në Bitinia. <sup>2</sup> Ma gulej dux Dad ree Dios lèjt diizd gocli, zi'c goc xixgabaman. xSprijtaman gulëeca lèjt din guzoobidi diidx gac tée luxdoodi naya delant lojman por xrejn Jesucrist. Zro' güünle' Dios lèjt yabe'cdxe téeëman luxdoodi.

### *Ni ralëjz ree gunee Dios*

<sup>3</sup> Quixtëë Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios. <sup>4</sup> Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' téeët dxej nitan. <sup>5</sup> Guial rliladxidi Dios, laaman rnijaj lèjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lèjt perdon.

<sup>6</sup> Zeel rabaa da'tidi majsi tédidi graloj guialrzagdiaj tiblädëd, <sup>7</sup> din por guialrzagdiaj guin guiguien chu diidxli rliladx Dios, zi'c rüjnnë reeman or, rudëëd reeman laan loj bajl din gagbee reeman bal najn ganax or. Or guin najn ni rnidloj, zeel mazri lasajc guialrliladx laaman, bal chu taan xhietëëz loj guialrzagdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, guiaad ree bejn në ree anjl guza't reeman laaman zagdxë gap tée reeman laaman respejt guial rusnuu rliladxidi laaman.

<sup>8</sup> Ad waguiaatidi Jesucrist per rëndi laaman, abi' yan rliladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi, <sup>9</sup> din lèjt ragbee, guial rliladxidi, ma nüjn Dios lèjt cwent zi'c ree bèn achet xtol.

<sup>10</sup> Diizd gocli, bèn badëë ree xtiidx Dios loj ree bejn basiid reeman been tée reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lèjt guial najman benza'c. <sup>11</sup> Por xSprijt Jesucrist gogbee reeman diizd gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tée gac zian. <sup>12</sup> Per balüü Dios laa reeman guial ni gunee reeman ad najtan par laagajc reeman, najn par lèjt, abi' yan lèjt ma rignia'di ni guin ree por ree bèn catie'ch xtiidxza'c Jesucrist por xguialrniabee Sprijt zëëd xanyabaa. Në ree anjl ma rën nejzdoo gagbee nine ree.

### *Ze rayal guiban ree xi'n Dios*

<sup>13</sup> Zeel gol guzusin gol bastëdguien tée, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb. <sup>14</sup> Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman. <sup>15</sup> Laaman gule lèjt, zeel gol been naguiejn guibandi naya delant lojman, din laaman naj bèn naya nali. <sup>16</sup> Zi'c rëb loj xtiidxaman: “Gol gubajn naya delant lon, din naj naj bèn naya nali.” <sup>17</sup> Yan bal rnieedi Dios “Dad”, bèn rüjn xguialguxtis tibloj, bal conin rüjn tijb gaj bejn, rayal gapidi laaman respejt guidib tiamp guibandi loj guidxliuj guie. <sup>18</sup> Din lèjt ragbee guial babëëman lèjt loj costumbr ni basa'nnë ree xbéngulalidi lèjt, costumbr ni ad rüjnt ree sirv, abi' lèjt ragbee guial gojx din yariidi loj reen, per ad gojxt con ree ni rnijt, zi'c or o plajt ya, <sup>19</sup> gojx con xrejn za'cdxoon Jesucrist ni guxhie'man loj crüjz chi gütaman zi'c tijb xiil zagdxë be ad naxint, be rugüjt reeman par Dios por xtol ree bejn. <sup>20</sup> Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rënman lèjt. <sup>21</sup> Zeel por laaman rliladxidi Dios bèn basban laaman badëë téeëman guialrniabee lojman, yan con guidib luxdoodi ma rliladxidi Dios rbëz téeëdi ni guneeëman.

<sup>22</sup> Yan, guial ma ruzoobidi xtiidxaman ni naj diidxli, ma naya luxdoodi delant lojman din guiën lasa'di zi'c rayal, zeel gol guyën lasa'di con guidib luxdoodi. <sup>23</sup> Din ma bidxaa mod nabandi, zi'c ruluü gojlidi stijb, abi' guialnaban zinalidi ad zëëdtan por tijb bén nit, zëëdan por xtiidx Dios, diidx naban, diidx ni ad zanijt, <sup>24</sup> din loj xtiidxaman rëb:

Gra bénguidxliuj naj zi'c gui'xh dajn,  
 guiáad ni rajp reeman naj zi'c xguiaa gui'xh guin.  
 Rbidx gui'xh guin, abi' riajb xguiaan,  
<sup>25</sup> per xtiidx Dios ad yu't dxej nitan.  
 Abi' laan naj xtiidxza'c Jesucrist ni ma biguejndi.

## 2

<sup>1</sup> Zeel gol basa'n gra ni mal, gra ni rusquiee, ad bal rüjnzidi, gol basa'n guialnadëdloj në guial rnieeguidx lasa'di. <sup>2</sup> Zi'c re'c ree xindo quigojlnejzri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengüt con gra ree bén nuchajg Jesucrist chi gui'taman stijb, <sup>3</sup> bal walidi ma ragbeedi guial naj Dios benza'c.

### *Jesucrist naj zi'c guiaj naban*

<sup>4</sup> Gol bibig loj Jesucrist, laaman naj zi'c guiaj naban. Been ree bénguidxliuj laaman tiblad, per par Dios najman bén lasajc, laaman gule laaman. <sup>5</sup> Ziangajc lëjt, guial ma rliladxidi Jesucrist, najdi zi'c ree guiaj naban ni cayajcnë xyadoo Dios. Najdi bixhioz naya luxdoo rüjn sirv lojman, din nabandi zi'c ruladx Dios, laan naj ni rudëëdi lojman zi'c gon por Jesucrist. <sup>6</sup> Rëb loj xtiidx Dios:

Gol baguiaa, guzoban tijb guiaj zagdxe luguiedx Jerusalén.  
 Laan naj guiaj nabee, guiaj zobjloj, nilasajc tää.  
 Bal chu chililadx laan,  
 ad yu't dxej yaya'nxtuman.

<sup>7</sup> Par lëjt, guial rliladxidi Jesucrist, laaman naj zi'c guiaj lasajc da't. Per par ree bén ad rliladxt rajc cumplid ni rëb loj xtiidx Dios, lod rëb:

Guiaj ni gulëëgo'n ree bén rüjn yu,  
 yan laan naj guiaj zobjloj.

<sup>8</sup> Rajc tää cumplid ni rëb stib lajt loj xtiidxaman, rëban:

Laaman naj guiaj rirejl guia' ree bejn,  
 abi' rureeyujn laa reeman.

Rzajc reeman zian, guial ad ruzoobt reeman xtiidx Dios, zian rajc ni rëbaman xcwent reeman.

<sup>9</sup> Per lëjt naj bén guleman, najdi bixhioz rüjn ree sirv lojman, guial najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdxe rüjnman. Laaman babëë lëjt loj nejz mal, persi bagu'man lëjt loj xnejz za'cdxoonman. <sup>10</sup> Gocli achutczni najdi, per yan ma najdi xbejn Dios. Gocli ad ragbeetidi guial raya Dios lëjt, per yan ma ragbeedi.

### *Zi'c rayal guiban ben rliladx Dios*

<sup>11</sup> Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiëbidi güün ree xgab mal lëjt gan, din xgab mal guin ree rüjn naguiejn zianczi din gusa'n ree bejn xnejz Dios. <sup>12</sup> Gol gubajn zagdxe loj ree bén ad nünbeet laaman, zian majsi rnieeguidx reeman lëjt yan, rëb reeman najdi benmal, per chi guguiaa reeman guial zagdxe naj ni cayüjndi, dxel guza't reeman laaman zagdxe, dxej ni yadëëd reeman cwent lojman.

<sup>13</sup> Guial rliladxidi Dad Jesucrist, gol bazoob xtiidx gra ree bén rniabee loj guidxliuj guie. Gol bazoob xtiidx pristent rniabee xnaciondi <sup>14</sup> në xtiidx gobernador bén rxhiaalaman din gudëëdaman casti bén rüjn ree ni mal guilies tääman xvalor ree bén rüjn ni zagdxe.

<sup>15</sup> Din rën Dios güündi ni zagdxe ree din gucwëëzidi ro' ree bentont ad rignia't abi' rnieeguidx reeman lëjt.

<sup>16</sup> Zajc güüнди zi'c rëndi, per ad por ziantzi güüнди ni naj ni mal, gol been zi'c rayal güün ree xbejn Dios. <sup>17</sup> Gol gojp respejt gra bejn zi'c rayal, gol guyën ree bën rliladx Jesucrist, gol bidxeb Dios, gol gojp tää respejt pristent rniabee xnaciondi.

### *Gol gudaan loj guialrzagdiaj*

<sup>18</sup> Lëjt bën naj ree mojs, gol bazoob xtiidx ree xpatrondi, gol gojp tää reeman respejt, ad bën najtzi ree benza'c raya tää reeman lëjt, në ree bën naj bendxuudx. <sup>19</sup> Din zagdxe naj guial chu rdaan loj guialrzagdiaj, majsi ad rayaltaman laan, rdaanman laan guial rënman güünman ni ruladx Dios. <sup>20</sup> Bal chu lëjt rzagdiaj por ni mal rüjndi, achet lasajcan, per bal rzagdiajdi por ni zagdxe rüjndi abi' rdaandi loj guialrzagdiaj guin, laan lasajc delant loj Dios, <sup>21</sup> din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman. <sup>22</sup> Ad yu'tczi dxej beenman dol abi' ni'qui tijb diidx rusquiee ad briit ro'man. <sup>23</sup> Chi rëb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rëbtaman loj reeman guial yaguijx reeman ni cayüjnnë reeman laaman, graczan basa'nman loj Dios bën rüjn xguialguxtis zi'c rayal. <sup>24</sup> Guzagdiaj Jesucrist loj crüjz por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelguijdxaman ma bayüjnman du luxdoo ree naya. <sup>25</sup> Gocli gubajndi zi'c xiil rzëëb, per yan ma najdi xbejn Jesucrist bën rën lëjt rajp tääman lëjt zi'c tijb bën rajp xiil.

## 3

### *Zi'c rayal guiban ree bën ca' lasa'*

<sup>1</sup> Në lëjt béngunaa ma yu' ree lacheel, gol bazoob xtiidx lacheelidi, din bal chu lacheelidi ad rliladxt xtiidx Dios, per chi guguaa reex zi'c nabandi, dxel guililadx reex. Ad rüjnt naguiejn xhie guiëbidi loj reex, <sup>2</sup> chililadx reex guial guguaa reex nabandi zi'c rayal rajp täädi laa reex respejt. <sup>3</sup> Chi rzujchaawidi, ad bal rdëdlaj rüjnchaaw guidxguijquidi ni'qui guial güüнди ujs ganax ni or o gacwidi ganax lajd lasajc. <sup>4</sup> Mazri zagdxe naj guial güüнди naguiejn gac luxdoodi naya delant loj Dios, gol gojc benza'c në bën chaawladx, din laan ad yu't dxej nitan, abi' laan mazri lasajc delant lojman. <sup>5</sup> Din zian gubajn ree béngunaa binal ree xnejzaman goc da't, bililadx reeman laaman bazoob tää reeman xtiidx lacheel reeman. <sup>6</sup> Zian been Sara, bazoob xtiidx lacheelaman Abraham, abi' guneeman laaman "Dad". Gaquidi zi'c xi'n Sara, bal rüjndi ni zagdxe sin guialrdxeb.

<sup>7</sup> Ziangajc lëjt xinguaaw, gol gubajnnë lacheelidi zagdxe, gol gojp reeman respejt ad guialzi najt reeman bën nada, rayal güüнди zian guial në reeman rayal guialnaban tiblayaa razaladx Dios, guial najman benza'c. Zian gol gubajn, chitëë xhie gudxe' nawëëg lëjt chi cwedx guiniabidi laaman.

### *Xhie rayal güüнди chi xhie güün në reeman lëjt*

<sup>8</sup> Zeel rnin loj gradi: Gol gubajnnë lasa'di zagdxe, gol bachajg lasa'di, gol been xgab tijbzi, gol guyën lasa'di zi'c rayal, gol gojc benza'c në bën chaawladx. <sup>9</sup> Ad yadxi'di ni mal rüjn ree bejn lëjt, ad yadxi'di diidxguijdx ni na reeman lojdi, gol gurejdx Dios din gagnëman laa reeman, din Dios gulej lëjt par gagnëman lëjt. <sup>10</sup> Din rëb loj xtiidxaman: Bën rën guiban zagdxe chu' tää luxdooan zagdxe, rayal gapaman cudad ad guinieeman diidxguijdx ad guinee tääman diidx rusquiee.

<sup>11</sup> Cwëëladxaman ni mal, güünman ni zagdxe güün tääman naguiejn guibannë ree lasa'man zagdxe, zian rayal guibanman zianczi.

<sup>12</sup> Din dux Dad ree Dios rniaj bën rüjn ree ni rënman rüjncwent tääman xtiidx reeman chi rbejdx reeman laaman, per ralenman bën rüjn ree ni mal.

<sup>13</sup> Achut güün lëjt ni mal, bal cayüjndi naguiejn güüнди ni zagdxe. <sup>14</sup> Per xiquilbaadi bal cusagdiaj bejn lëjt guial cayüjndi ni zagdxe. Ad chu'di xgab ad guidxeb täädi por zian, <sup>15</sup> gol gojp respejt gol badxe'guijdx tää dux Dad ree Jesucrist. Gol guzujsin din yadxi'di xtiidx ree bën guiniabdiidx lojdi xcwent ni rliladxidi, per gol badxi' xtiidx reeman zagdxe con diidx zagdxe ree. <sup>16</sup> Gol gubajn zagdxe din guiguien guial achet ni

mal yu'guijquidi din yaya'nxtu ree b n rnieeguijdx l jt, guial r jndi ni zagdxe rililadx t edi Jesucrist. <sup>17</sup> Mazri zagdxe naj sagdiaj bejn guial g  nman ni zagdxe, bal zian r n Dios, luar sagdiajman guial g  nman ni mal.

<sup>18</sup> Din xt Jesucrist guzagdiaj, g jtaman tib voltzi por dux tol ree majsi ad beentaman dol, per g jtaman duxcwent ree nayajc ree b ndol, zian guxhalaman nejz din gac yadxin ree loj Dios, g jtaman zi'c b nguidxliuj per babanman por xSprijtaman. <sup>19</sup> Chi gadaman yaban, wej xSprijtaman bigneen man xsprijt ree beng t lod nayaaw reeman. <sup>20</sup> Sprijt guin ree naj xsprijt ree b n ad bazoobt diidx tiamp gulal, chi guban No  loj guidxliuj guie, chi gop Dios laa reeman pasens la'tgaj cay jn No  barcw, abi' xhujnzi bejn gulaa loj nijs banijt guidxliuj tiamp zii. <sup>21</sup> Nijs guin naj zi'c guialrirobnijs ni rul u guial ma nayajc ree perdon. Guialrirobnijs guin ad r nt gui ban guial najn par gusian dux cuerp ree, rul un guial caynaab ree loj Dios din yaya dux quiarguejn ree, guial ma raya'p ree guialnaban c b guial baban Jesucrist loj ree beng t, <sup>22</sup> b n bay 'p xanyabaa abi' za'man xladbee Dios lod canabeeman anjl ree n  ree sprijt ca' guialrniabee.

#### 4

##### *Gol beenn  quiarguejn ni banee Dios dxiin*

<sup>1</sup> Zeel zi'c gud d Jesucrist loj guialrzagdiaj, n  l jt rayal taan lojn. Din por guialrzagdiaj guin r jn bejn dol tiblax, <sup>2</sup> din g  nman zi'c r n Dios guidib xguialnabanman luar g  nman zi'c naj xixgabaman. <sup>3</sup> Xchej da't gubajndi zi'c naban ree b n ad n nbeet Dios, gubajndi zi'ctzi guy ndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guz dx da'tidi, guy n t edi ni ad najt ree Dios, laan naj ni rbijxhladx Dios. <sup>4</sup> Per yan guial ad zinaltridi zi'c naban ree b n naban zian, zeel radxa loj reeman, rnieeguijdx t e reeman l jt. <sup>5</sup> Per rayal yad ed reeman cwent loj Dios b n za' par g  n xguialguxtisaman con ree b n naban n  ree b n ma g jt. <sup>6</sup> Din n  ree b n ma g jt biguejn xtiidx Dios chi guban reeman loj guidxliuj guie, din guiban reeman loj Dios majsi par ree b nguidxliuj ma g jt reeman.

<sup>7</sup> Ma zidyob dxej nit guidxliuj, zeel gol bast dguien gol guzujsin t e din cwedx guiniabidi Dios con guidib luxdoodi. <sup>8</sup> Ad yayanlaxidi guial gui n lasa'di zi'c rayal, din b n r n lasa' r jnman perdon majsi xhiet z r jnn  reeman laaman. <sup>9</sup> Bal yu' tijb xcompniaridi rniab luar lidxidi din yaya'nman, gol bad edsii lidxidi con guidib luxdoodi ad yalenya'di. <sup>10</sup> Loj tijb gajdi ma banee Dios quiarguejn din g  ndi ni rayal g  ndi. Zeel gol been lasa'di yudar con ni rajc r jndi, din guiguien guial cay jndi zi'c rayal con quiarguejn ni bazaladxaman lojdi. <sup>11</sup> Bal chu l jt ca' quiarguejn par gul u xcompniaridi, rayal guinieedi ni naj diidxli zi'c tal r b loj xtiidx Dios, ziangajc b n ca' quiarguejn par g  nman yudar dux compniar ree, rayal g  nman laan con gojl razaladx Dios lojman. Gra ni cay jndi, gol beenan din guza't ree bejn Dios zagdxe por Jesucrist, b n rayal respejt n  guialrniabee zianczi. Am n.

##### *Gol gudaan gra guialrzagdiaj*

<sup>12</sup> Gradi compniar raliduladx ree Jesucrist, r nan l jt, zeel rnin lojdi, ad ru naw eguidi guial zro' naj loj guialrzagdiaj cad didi, din laan naj zi'c prueb par l jt. Ad rudi xgab chexc zeel cazajquidi zian. <sup>13</sup> Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxej gui'taman stijb. <sup>14</sup> Xiquilbaadi bal chu na diidxguijdx lojdi guial zinalidi Jesucrist, din gra dxejci za'n  xSprijt Dios l jt, b n ca' guialrniabee. <sup>15</sup> Achet lasajc bal cazagdiajdi guial bag jtidi bejn, o por guialgubaan, o por guial r jndi ni mal o guial rudi lod ad rayaltidi. <sup>16</sup> Per bal chu cazagdiaj guial zinalaman xnejz Jesucrist, ad rayalt yatuman, rayal gud eman quixt e loj Dios guial ma najman xbejn Jesucrist.

<sup>17</sup> Gol gogbee, guial rti jb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczi naag sac ree b n ad r nt guzoob xtiidxza'caman. <sup>18</sup> Nacli ree b n zinal xnejz Dios naw eg naj guial yaguij reeman

xanyabaa, piorli ree béndol bèn ad nünbeet ree Dios, xhieczi naag naj luar lod yayal reeman. <sup>19</sup> Zeel bèn cazagdiaj ree zi'c naj xixgab Dios, rayal gusnuu güün reeman ni zagdxe gusa'n tää reeman gran loj Dios, laaman gagnë laa reeman. Laaman bazaladx guialnaban rüjn tääman zi'c rayal.

## 5

*Consejw par ree bèn rliladx Jesucrist*

<sup>1</sup> Yan rënan gudëdan consejw loj ree bèn rniabee ree lojdi, naj guial ca'n guialrniabee zi'cgajc laa reeman, naj tää testiw xcwent ni guzagdiaj Jesucrist, zi'cgajc laa reeman guguian xbianiman dxej gui'taman stijb, zeel rënan guiën nine ree loj reeman. <sup>2</sup> Rnin lojdi, gol gunaj ree xbejn Jesucrist, bèn rayal ree gulüüdi din gusnuu chinal reeman xnejz Dios. Ad güüнди dxiin guin guialzi ragbeedi rayal güüнди laan, gol beenan guial yu'di gan güüнди laan, con guidib luxdoodi gol beenan, ad bal güüнди laan guialzi rzëëbladxidi milia. <sup>3</sup> Ad guial ca'tidi guialrniabee din nabeedi zi'c tal rëndi, rayal guibandi zagdxe din guguaa ree bèn rliladx Jesucrist din guiban reeman zian, <sup>4</sup> din chi gui't bèn rniabee dunuj ree stijb, dxel guneeman tijb niza'cdxoon ni ad yu't dxej nit.

<sup>5</sup> Ziangajc lëjt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tää xtiidx ree xcompniaridi, din:  
Ralen da't Dios bèn rüjn ree benro',  
per dád benza'can con ree bèn rüjn naya.

<sup>6</sup> Zeel gol been naya loj Dios, bèn ca' gra guialrniabee, din guiliesaman xvaloridi chi guidxin dxej. <sup>7</sup> Gol basa'n gra xgab yu'di loj Dios, din laaman rniaj lëjt.

<sup>8</sup> Gol guzujsin, gol gojp cudad, din xindxab xin ralen da't lëjt, za'x zi'c tijb beedx rliaan, rguuilix chu güünx gan. <sup>9</sup> Zeel ad tiëbidi güünx lëjt gan, gol guzujdxi'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bèn rliladx Jesucrist guidib guidxliuj. <sup>10</sup> Per chi ma gudëdidi ta'n loj guialrzagdiaj, dxel gagnë Dios din gusnuu güüнди nagueijn guibandi zi'c rënman, su täädi rejs, sudxi'chidi, gap täädi segur guial zinalidi xnejzaman. Laagajcaman naj Dios cayüjn dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabeeman guial nachajg ree Jesucrist. <sup>11</sup> Laaman rayal respejt, din tijbzi laaman ca' guialrniabee zianczi. Amén.

*Diidx bigra ca ree loj gui'ch guie*

<sup>12</sup> Silvan, tijb dux compniar ree, bèn ragbeen naban zi'c rën Dios, laaman been gui'ch guie din ganin lojdi tio'p choon diidx, par gunen lëjt consejw nētëë par gugojnan lëjt guial diidxli rën Dios lëjt, zeel gol basnuu gol guyënman gol guyën tää lasa'di. <sup>13</sup> Bèn rliladx ree Jesucrist, bèn ma gulej Dios zi'cgajc lëjt, bèn zojb ree Babilonia, rugajpdioz reeman lëjt. Në Marcw xin nünan zi'c da xi'nän rugajpdioz lëjt. <sup>14</sup> Guial rën lasa'di, gol bagajpdioz lasa'di xhietëëz horan radxaaglojdi. Yabe'cdxe Dios luxdoodi guial ma nuchajguidi Jesucrist.

## Gui'ch barojp bacaa San Pedr

### *Rxhial Béd xtiidx Dios loj ree bejn*

<sup>1</sup> Naj, Simón Béd, najn tijb xi apóstol Jesucrist rün tēen sirv lojman, cucan gui'ch guie par lējt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bēn rabēē bejn ree loj dol. <sup>2</sup> Güünle' Dios lējt mazri, yabe'cdxe tēēman luxdoodi guial ma nünbeedi laaman nē dux Dad ree Jesucrist.

### *Zi'c rayal gac ree xbejn Jesucrist*

<sup>3</sup> Por xguialrniabee Dios ma baneeman gra ni rayaadx ree, din yaya'p ree guialnaban tiblayaa, yabajn tēē ree naya delant lojman, din ma naguieenbee ree Dios bēn gule dunuj ree guial ca'man guialrniabee naj tēēman benza'c. <sup>4</sup> Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tēēdi tiblax gra ree ni ad rüjnt sirv nē ree ni mal riga' loj guidxliuj guie. <sup>5</sup> Zeel gol been naguiejn por guialrliladx ni rajpidi gol gubajn zagdxe, din guial guibandi zagdxe, dxel mazri ma gagbeedi xhienaag guibandi. <sup>6</sup> Abi' guial gagbeedi xhienaag guibandi, ma zajc gucwēēz xixgabmalidi, abi' guial gucwēēzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, <sup>7</sup> dxel guial guibandi naya delant lojman, ma zajc guiēn lasa'di, abi' guial guiēn lasa'di, ma zajc guiēndi gra ree bejn.

<sup>8</sup> Bal yu'guijquidi nine ree cusnuu tēē cayüjndi naguiejn guibandi zian, dxel ad naban xlia'tzidi, ad beenbee xlia' tēētidi dux Dad ree Jesucrist. <sup>9</sup> Per bēn ad rüjnt naguiejn guiban zian, laaman naj zi'c tijb bēnlutia'p o zi'c tijb bēn ad ruguiaat zijt, ma bayanlaxaman guial biquied Dios xtolaman ni beenman guia'xchej. <sup>10</sup> Zeel rnin lojdi, compniar raliduladx ree Jesucrist, zi'c ma bacaabee Dios lējt ma gulej tēēman lējt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol. <sup>11</sup> Zian gapidi nejz nali din chu'di lod rniabee dux Dad ree Jesucrist tiblayaa, bēn babēē dunuj ree loj dol.

<sup>12</sup> Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tēēdi ni diidxli ni ma bacaagdiajguidi. <sup>13</sup> La'tgaj naban loj guidxliuj guie, naladxan rayal gunen consejw lojdi con ree diidx guin. <sup>14</sup> Din por dux Dad ree Jesucrist ma gogbeen guial ma zidyob dxex yazaan loj guidxliuj guie.

<sup>15</sup> Zeel cayün da'tan naguiejn rnienē'n lējt, din gusaaladxidi da diidxan majsi ma güjtan.

### *Bén baguiaa ree xguialrniabee Jesucrist*

<sup>16</sup> Chi ranan lojdi xhienaag naj xguialrniabee Jesucrist xhie tēē naag gui'taman stijb, ad balēēguijctan ni banan lojdi. Din con quijb du lojn baguiaan xbianiman <sup>17</sup> chi biguien cha' Dios diidz xanyabaa, gulesaman xvaloraman baza't tēēman laaman zagdxe, rēbaman: “Xin guie naj da xi'nān, rēnan laax rabaanē' tēēn laax.” <sup>18</sup> Abi' dunujn nayajc bēn biguien cha' Dios diidz xanyabaa chi nadxu'nē'n Jesús ruguia' zii, lod biguien xbianiman.

<sup>19</sup> Zianan zeel mazri raliduladxan ni rēb ree bēn badēēd xtiidx Dios loj ree bejn, zeel zagdxe naj bal yu'guijquidi ni rēb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lējt chaawlax cusnuu cayagbeedi xcwent Dios xt chi gui't Jesucrist stijb, bēn naj bajl rusni par dunuj ree, dxel ma gagbeedi graczan zi'c tal najn. <sup>20</sup> Per gol gogbee guial ni'qui tijb xtiidx Dios ad zajct chignia' bejn por xixgabzaman. <sup>21</sup> Din bēn badēēd ree xtiidx Dios loj ree bejn, ad guneeet reeman xtiidxaman zi'c goczi xixgab reeman, gunee reeman ni basajb xSprijt Dios guijc reeman.

## 2

*Bén rulüü ree diidx rusquiee  
(Judas 4-13)*

<sup>1</sup> Zian zi'c guyu ree b́en rusquiee loj ree b́en Israel tiamp gulal ŕeb reeman rud́eéd reeman xtiidx Dios loj ree bejn, ziangajc chu' ree b́en rusquiee gulúú ĺejt ni rusquiee ree, yaguiil reeman mod din gulúú reeman ĺejt ni ad najt diidxli par gagdxadi. Ad zatiéjbt reeman nabee Jesucrist laa reeman, majsi baguijxaman xtol reeman, zeel ad zaglaat gunijt Dios laa reeman. <sup>2</sup> Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. <sup>3</sup> Abi' guial rzéébladx reeman milia, yaguiil reeman xhie ni rusquiee gulúú reeman ĺejt din tia' reeman xmiliadi, per ziangajc ad zalaat reeman loj xcasti Dios ni cabéz laa reeman, din diizd gocli mal yu' casti ni yayal ree b́en ŕujn zian.

<sup>4</sup> Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabéz reeman dxej gúün xguialguxtisaman. <sup>5</sup> Ad been téétaman perdon benmal guyu ree tiamp gulal, banijtaman laa reeman con nijs. Tijbzi Noé b́en balúú xhienaag chinal ree bejn xnejz Dios, laazaman naj b́en gulaa con zagajdx ree bejn. <sup>6</sup> Ziangajc chi been xguialguxtis Dios con ree guiedx Sodoma né Gomorra, baze'caman laa reen xt bayajc reen cobd́ej, abi' laan naj ejempl par ree b́en guiban nadxuudx zi'c ree b́en guiedx zii ree. <sup>7</sup> Per baslaa Dios b́en brii laj Lot, b́en guban zi'c ŕen Dios guyu tééman xgab guial baguiaaman zi'c guban ree benmal guin. <sup>8</sup> Abi' guial gubajnman zagdx, zeel guixie guixie guyunaya da'taman por ree nidxuudx biguiejnman baguiaa tééman been ree b́en guin. <sup>9</sup> Rajc ŕujn Dios yudar b́en ruzoob ree xtiidxaman xhietééz loj prueb cadéd reeman, abi' ma naj xhie gúünnéman benmal ree dxej gúün xguialguxtisaman.

<sup>10</sup> Laan naj ni yayal ree b́en naban zi'ctzi ŕen reeman, ad ŕent reeman nabee Jesucrist laa reeman, dád nad reeman, ad ratut reeman, ad rdxeb téét reeman rnieeguijdx reeman b́en naj ree xianjl Dios. <sup>11</sup> Abi' ni'qui ree xianjl Dios, majsi rajp reeman mazri gojl né guialrniabee, per achet diidxguijdx ŕeb reeman lojman contr laa reeman.

<sup>12</sup> Lasa' ree b́en guin naban reeman zi'c ree be, ad yu't xquiarguiejn reeman abi' rnieeguijdx reeman ni ad rignia't reeman, guidiblagaa ŕujn reeman ni ŕentzi reeman sin xgab. Zi'c ree be zéédzi reeb loj guidxliuj guie par guiniaaz reeb din guiét reeb, ziangajc laa reeman por nidxuudx ŕujn reeman ma cusééb laagajc reeman, <sup>13</sup> abi' yaguijx reeman gra ni ŕujnné reeman bejn ree.

Rabaa da't reeman guial ŕujn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij ŕujndi chi rawidi tijbzi, abi' rabaa da't reeman guial rusquiee reeman ĺejt.

<sup>14</sup> Ad zajct guguaa reeman tijb b́engunaa sin guial ad zújnt reeman xgabdxuudx, ad rucwéézt ŕujn reeman dol rusquiee téé reeman b́en ad rignia'za'ct ree xtiidx Dios din gúün reeman dol, abi' dád nasin reeman par gúün reeman gan ni rzéébladx reeman, laa reeman ma naj par yayal reeman xcasti Dios. <sup>15</sup> Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam b́en badééd xtiidx Dios loj ree bejn, xi'n b́en brii laj Beor, chi guyénman núnman gan milia por ni mal núnman. <sup>16</sup> Per chi zééman ziguieenman ni mal guin, bacwééz Dios laaman, basneeman xburaman zi'c tijb bejn, zian bacwééz Dios xixgabtontaman.

<sup>17</sup> Yan b́en rusquiee cuzat reen lojdi naj reeman zi'c bizé ni ad yu't nijs, zi'c zaj ni ad nét guia, zeel rayal reeman lod nacay da't lod ad yu' téét dxej yarii reeman. <sup>18</sup> Ganax ree diidx nabé rú reeman, diidx ad ŕujnt ree sirv, ŕeb reeman guial achet gúünan guiban bejn zi'ctzi ŕenman, abi' zian rusquiee reeman b́en qui cusa'nri ree nejzmal. <sup>19</sup> Ŕeb reeman guial achut rayal nabee bejn, per ad rignia't reeman guial nidxuudx ŕujn reeman rniabee laa reeman, din graczi ni ad rajct rucwééz ŕujn ree bejn, laan naj ni rniabee laa reeman. <sup>20</sup> Chi ma beenbee ree bejn dux Dad ree Jesucrist guial laaman naj b́en babéé dunuj ree loj dol ma basa'n téé reeman nidxuudx yu' ree loj guidxliuj guie, abi' rtiéjb reeman rniabeen laa reeman stijb, dxel piorli guiban reeman guial chi gad reeman gúünbee laaman. <sup>21</sup> Zagdxeli naj ad núnbeet reeman xnejzaman, guial beenbee reeman laan abi' basa'n reeman xtiidxza'caman ni ma biguiejn reeman. <sup>22</sup> Con laa reeman rajc cumplid



diidx ni rëb: “Rayaw bë'cw ni bayëbib, guiáad cüch qui gojzri con nijs naya rayub loj nizbajn.”

### 3

#### *Ni gac chi gui't Jesucrist stijb*

<sup>1</sup> Gradi compniar raliduladx ree Jesucrist, rën da'tan lëjt, nine naj gui'ch rarojp rxhialan par lëjt. Loj grop gui'ch guie cayünan naguiejn ganenë'n lëjt din güüнди xgab zi'c rayal. <sup>2</sup> Gol basaaladx ni rëb ree bën badëed xtiidx Dios loj ree bejn tiamp gulal, gol basaaladx tëe xtiidx dux Dad ree Jesucrist, bën babëe dunuj ree loj dol, xtiidxaman ni balüü ree apóstoles lëjt.

<sup>3</sup> Gol badxe'guijc, chi ma zidyob nit guidxliuj, chu' ree bën guze' lëjt abi' guiban reeman zi'ctzi rën reeman. <sup>4</sup> Abi' na reeman lojdi: “¿Gon promejs been Jesucrist guial gui'taman stijb? Ma güjt gra ree dux béngulal ree, abi' graczi ni yu' loj guidxliuj guie sta naj gajc diizd chi gocchaaw guidxliuj.” <sup>5</sup> Na reeman zian, guial ad rënt reeman yayagbee reeman guial diizd tiamp gulal mal yu' xanyabaa në guidxliuj abi' por xguialrniabee Dios bii guidxliuj guin loj nijs. <sup>6</sup> Gojc xchej, dxel con nijs gajc baniijt Dios bën gocli ree. <sup>7</sup> Per xanyabaa në guidxliuj ragüiaa ree yan, ma naj guial gunijt Dios laa reen con bajl por xguialrniabeeman dxej ni güün xguialguxtisaman con ree bën ad ruzoobt xtiidxaman.

<sup>8</sup> Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej.

<sup>9</sup> Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

<sup>10</sup> Zi'c tal ri't tijb béngubaa achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

<sup>11</sup> Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios. <sup>12</sup> Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii.

<sup>13</sup> Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

<sup>14</sup> Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaagloj Dios lëjt naya sin dol, riga'dxenë tëe lasa'di. <sup>15</sup> Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bën rayën da't ree, ziangajc naman lojdi loj ree xtiidxaman, zi'ctzi naj quiarguiejn ni bazaladx Dios lojman.

<sup>16</sup> Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëëg guial chignia' bejn, dxel bën ad rajctczi ree në ree bën ad zinalt xtiidx Dios con guidib luxdoo, ruchaa reeman ni rën guiëb xtiidx Pab, zi'cgajc rüjnnë reeman ni zëed ree loj xtiidx Dios, zeel laagajc reeman cusëëb laa reeman.

<sup>17</sup> Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëe güün ree bën rën ree gusquiee lëjt gan, chitëe gucwëëz sudxi'chidi loj xnejz Dios. <sup>18</sup> Zagdxeli gol been naguiejn güünbeedi mazri dux Dad ree Jesucrist, bën baguijx dux tol ree, gol been tëe naguiejn gagbeedi mazri guial rën da'taman dunuj ree. Laaman rayal respejt gra tiampczi.

## Gui'ch yaløj bacaa San Juan

### *Jesucrist runee guialnaban tiblayaa*

<sup>1</sup> Gui'ch guie naj par gugojnan lëjt xcwent Jesucrist, bën mal yu' gocli diizd chi gad guidxliuj gacchaaw. Ma bacaagdiajgan, ma baguiaan ni beenman, baguiaan laaman zagdxe, ma baqui' tēen laaman con quijb du yaan. Laaman naj bën runee guialnaban, <sup>2</sup> ma bi'taman loj guidxliuj, ma baguiaan laaman, dunujn nayajc testiw ragojn tēen lëjt xcwentaman. Laaman naj bën runee guialnaban tiblayaa, najman bën guzunē Dios diizd gocli bi't tēeman loj guidxliuj. <sup>3</sup> Zeel ragojnan lëjt ni ma baguiaan ni ma baguiejn tēen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist. <sup>4</sup> Ragojnan lëjt nine ree loj gui'ch guie din chu' luxdoodi zagdxe, zi'c yu' du luxdoon zagdxe.

### *Royal yanaab ree loj Dios din güünman dux tol ree perdon*

<sup>5</sup> Ni ne naj ni balüü Jesucrist dunujn, yan ragojnan lëjt guial naj Dios biani, achetczi dol nabannēman. <sup>6</sup> Bal yaguie'ch ree nadxu'nē' reeman abi' zunaal gajc ree nejz mal rasquiee ree ad zunaalt ree diidxli.

<sup>7</sup> Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejn xi'nman Jesucrist chiquied gra dux tol ree.

<sup>8</sup> Bal yaguie'ch ree achet dux tol ree yu', rasquiee dunuj gajc ree, ad cayguie'ch tēet ree diidxli. <sup>9</sup> Per bal yaxhoobdol ree loj Dios, rayagbee ree zagdxe guial güünman ni naman, güünman perdon dux tol ree, chiquied tēeman gra ni mal yu' du luxdoo ree. <sup>10</sup> Per bal yaguie'ch ree ad waguieent ree dol, raguieen reeman zi'c bēnrusquiee, ad raliduladx tēet ree xtiidxaman.

## 2

### *Bén rēn Dios rayal guzoobaman xtiidxaman*

<sup>1</sup> Xi'n, rucan nine ree par lëjt chitēē güündi dol. Per bal chu lëjt rüjn dol, raya'p ree bën guiniee por dunuj ree loj Dios, laaman naj Jesucrist bën ad wayüjntczi dol. <sup>2</sup> Por xguialgüjtaman naj dux tol ree perdon, abi' ad dux toltzi ree, nē gra xtol ree bēnguidxliuj.

<sup>3</sup> Bal razoob ree xtiidx Dios, zian raya'p ree segur guial ma nagueienbee reeman zagdxe. <sup>4</sup> Per bal chu rēb: "Nünbeen Dios", abi' ad ruzoobtaman xtiidxaman, rusquieeman, din ad walit ni rēbaman. <sup>5</sup> Per bēnruzoob xtiidxaman, diidxli rēnman laaman con guidib luxdooan, zian rayagbee ree guial ma nabajnnē' reeman. <sup>6</sup> Bén rēb nabannēman Dios, rayal guibanman zi'c guban Jesucrist.

### *Bén zinal ree xnejz Dios rēn lasa' reeman*

<sup>7</sup> Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma biguiejndi diizd yaløj, laagajcanan canin lojdi yan. <sup>8</sup> Per canin laa reen zi'c rulüü diidx cüb reen, din por Jesucrist nē por lëjt ma rguien guial ma cusa'ndi ni mal abi' zinalidi ni zagdxe.

<sup>9</sup> Bal chu rēb zinal xnejz Dios abi' ralen lasa'man, sta zinalaman nejz mal. <sup>10</sup> Bén rēn lasa' zinalaman xnejz Dios, abi' ma naj nawēēg guial güün dol laaman gan. <sup>11</sup> Per bēn ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bēnlutia'p.

<sup>12</sup> Xi'n, rucan gui'ch guie par lëjt, din ma gojc xtolidi perdon por xguialrniabee Jesucrist. <sup>13</sup> Cucan nine ree par lëjt guial najdi bën ma rignia' mazri chunin naj Jesucrist. Bén ma yu' gocli diizd chi gad guidxliuj gacchaaw, cucan ni ne ree par lëjt bën ma rignia' ta'n chunin naj Jesucrist din ma beendi gan ad züjntidi ni zēed loj xindxab, cuca tēen nine ree par lëjt bën qui guzuløjri ree cayignia' chunin naj Jesucrist din ma nünbeedi dux Dad ree Dios.

<sup>14</sup> Bacan nine ree par lëjt guial ma rignia'di mazri chunin naj Jesucrist bën ma yu' gocli diizd chi gad guidxliuj gacchaaw, baca tēen nine ree par lëjt guial ma rignia'di ta'n chunin naj Jesucrist, din za'dxi'chidi zinal tēedi diidxli xnejz Dios con guidib luxdoodi, ma been tēedi gan ad zūjntidi ni zēed loj xindxab.

<sup>15</sup> Ad sēēbladixidi ni ad najt zagdxē ni rūjn ree bejn loj guidxliuj, bal chu rēn mazri ni riga' loj guidxliuj guie, ad rēntaman dux Dad ree Dios, <sup>16</sup> din achetdzi ni mal yu' loj guidxliuj guie zēed loj Dios, ni rajc gajc loj guidxliuj guien, rūjn reeman zi'c naj xixgab dxuudx reeman, rzēēbladx reeman gap reeman gra ni ruguiaa reeman, rūjn tēē reeman benro' por gra ni rajp reeman. <sup>17</sup> Per guidxliuj guie yu' dxej nitan con guidib ni mal yu' lojn, per bēn naban zi'c rēn Dios rajpaman guialnaban tiblyaa con laaman.

### *Yunaal ree ni naj diidxli*

<sup>18</sup> Xi'n, rnin lojdi ma zidyob dxej nit guidxliuj, din ma biguiejndi guial rayal gui't tijb bēn su contr Jesucrist guiēb tēēman laaman naj Jesucrist. Yan zien ree bēn ralen laaman ma balüüloj, zeel rayagbee ree guial ma zidyob dxej nit guidxliuj. <sup>19</sup> Bēn ralen ree Jesucrist, duloj gajc ree brii reeman nayajc ree bēn rlliladx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duloj ree guial raliladx ree Jesucrist, per gojc nine din guiguien guial ad grat reeman naj dux bejn ree. <sup>20</sup> Jesucrist banee xSprijt Dios lojdi, abi' por laaman gradi ma ragbee ni naj diidxli. <sup>21</sup> Cucan nine par lëjt, ad guial ad ragbeetidi conin naj ni diidxli, cucanan guial ma ragbeedan, abi' lëjt ragbee guial ni'qui tijb ni rusquiee ad zajct gui't loj ni diidxli guin. <sup>22</sup> Yan, ¿chu naj bēn rusquiee? Bēn rusquiee naj bēn rēb guial ad Jesúst naj bēn guxhaal Dios loj guidxliuj. Bēn rēb zian naj zi'cgajc naj bēn za' contr Jesucrist guial ad rlliladxtaman Dios ni'qui xi'nman Jesucrist. <sup>23</sup> Din chutēēz bēn rēb guial ad najt Jesucrist Xi'n Dios, laaman ad nūnbeet dux Dad ree Dios, per bēn rēb Jesucrist naj Xi'n Dios nē dux Dad ree Dios nūnbeeman.

<sup>24</sup> Zeel gol binal diidx ma biguiejndi diizd guia'xchej chi bililadxidi Jesucrist. Bal chinalidi diidx guin ree, dxel ziz nabannēquidi dux Dad ree Dios con xi'nman Jesucrist.

<sup>25</sup> Abi' ni ma rēb Jesucrist guneeaman naj guialnaban tiblyaa.

<sup>26</sup> Cucan diidx guie ree par lëjt por ree bēn rēn gusquiee lëjt. <sup>27</sup> Per nabannēdi xSprijt Dios, bēn banee Jesucrist, ad riaadxtidi bēn gulüü lëjt, din Sprijt guin gajc rulüü lëjt gra, abi' ganax diidxli ad ni rusquieet, zeel gol gubajn zi'c rniabeeman din gusnuu gaquidi tijbzi con Jesucrist.

<sup>28</sup> Yan rnin lojdi xi'n, gol binal xnejz Jesucrist, chitēē yadxeb ree chi gulüülojman, ad zaya'nxtu tēēt ree lojman chi gui'taman. <sup>29</sup> Lëjt ragbee guial rūjn Dios zi'c rayal, ragbee tēedi guial graczi ree bēn rūjn zi'c rayal, laa reeman naj xi'n Dios.

## 3

### *Bēn naj ree xi'n Dios*

<sup>1</sup> Gol been xgab, plact rēn dux Dad ree Dios dunuj ree, zeel balēē dulaj ree xi'n Dios, abi' waliczān nayajc ree xi'nman. Per bēn ad zinalt ree xnejz Dios ad nūnbeet reeman dunuj ree zi'c xi'nman, din ad nūnbeet reeman laaman. <sup>2</sup> Gradi compniar raliduladx ree Jesucrist, rēnan lëjt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stijb, per raya'p ree segur guial yayajc ree zi'c najman, din xt nadxel yaguaa ree diidxliczi xhienaag najman. <sup>3</sup> Graczi ree bēn rlliladx guial gac zian, rūjn reeman naguiejn guiban reeman naya delant loj Dios zi'c laaman, guial achet xtolaman.

<sup>4</sup> Per graczi ree bēn ad zinalt ni rniabee Dios, cayūjn reeman dol, din dol naj guial ad rūjnt reeman ni rniabeeman. <sup>5</sup> Lëjt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutdzi dxej ad yu' tēēt dxej nūjnman dol. <sup>6</sup> Zeel bēn naj ree tijbzi con laaman rūjn reeman naguiejn ad rūjnt reeman dol, per graczi bēn rūjn dol zianczi ad wayignia't reeman chu najman, ad wayūnbee tēēt reeman laaman. <sup>7</sup> Xi'n, ganin lëjt, ad bal tiēbidi chu gusquiee lëjt, din bēn cayūjn ni rēn Dios,

laaman naya delant lojman zi'c naya Jesucrist delant lojman. <sup>8</sup> Per b n yu' loj dol xbejn xindxaban, din xindxab r jn dol diizd yaloz, abi' Jes s Xi'n Dios bi'taman loj guidxliuj par zianczi din g unman gan loj xguialrniabee xindxab.

<sup>9</sup> Zeel ni'qui tijb ree b n ma zinal xnejz Dios ad rusnuutri r jn dol, din ma nabann man Dios, ad rayal t etri g unman dol din ma najman xi'nman. <sup>10</sup> Laa rguien gajc chu reenin naj xi'n Dios chut e reenin naj xi'n xindxab, din chut ez ad r jnt ni r n Dios ad r n t et lasa'man, dxel ad najtaman xi'n Dios.

#### *Rayal yay n du lasa' ree*

<sup>11</sup> Abi' l jt ma biguejndi xtiidx Dios diizd guia'xchej guial rayal yay n dulasa' ree. <sup>12</sup> Ad rayalt yaguieen ree zi'c been Ca n, cw jbaman gunabee xindxab laaman, zeel bag jt bijchaman. Ca n been zian, din beenman ganax ni mal, gui ad bijchaman been ni zagdxe.

<sup>13</sup> Zeel gradi compniar raliduladx ree Jesucrist, ad gagdxadi bal yalen ree b nguidxliuj l jt guial ma zinalidi xnejz Dios. <sup>14</sup> Dunuj ree rayagbee guial ad nayajct ree zi'c beng t par laaman, ma raya'p ree guialnaban delant lojman, guial ray n du lasa' ree. Per b n ad r nt lasa', sta najman zi'c beng t par Dios. <sup>15</sup> Graczi b n ralen lasa' najman zi'c b n rug jt bejn, abi' l jt ragbee, tijb b n rug jt bejn ad rajptaman guialnaban tiblyaa delant loj Dios. <sup>16</sup> Ma rayagbee ree conin naj guial r n lasa', guial g jt Jesucrist por dunuj ree, yan ziangajc dunuj ree rayal yay n dulasa' ree xt yay jt ree por laa reeman. <sup>17</sup> Per bal chu tijb dunuj ree ad riaadxt xhienin loj guidxliuj guie abi' ruguiaaman tijb b n cayaadx laan abi' ad r jntaman laaman yudar, dxel,  xhienaag gui baman guial r nman Dios? <sup>18</sup> Xi'n, ganin l jt, ad con diidxtizi yaguie'ch ree guial ray n dulasa' ree, rayal guiguien guial ray n dulasa' ree por ni raguieen ree.

#### *Raya'p ree segur guial za' n  Dios dunuj ree*

<sup>19</sup> Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman. <sup>20</sup> Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duloj ree, abi' laaman ragbee gra. <sup>21</sup> Zeel zi'c r nan l jt rnin lojdi, bal ragbee du luxdoo ree guial cayguieen ree ni zagdxe, dxel raya'p ree segur guial cayguieen ree ni zagdxe delant loj Dios. <sup>22</sup> Laaman gunee graczi ni yanaab ree lojman guial razoob ree xtiidxaman ni rniabeeman, abi' raguieen ree naguiejn raguieen ree ni ruladxaman. <sup>23</sup> Ni ne naj ni rniabeeman yaguieen ree guial yaliduladx ree Jesucrist naj xi'nman yay n t e dulasa' ree zi'c gunabeeman dunuj ree. <sup>24</sup> B n r jn ree ni rniabee Dios, laa reeman nabann  Dios abi' Dios nabann  laa reeman, rayagbee t e ree guial za'man con dunuj ree por xSprijtaman b n baneeman duloj ree.

## 4

#### *B n ad rliladxt Jesucrist ad yu't xSprijt Dios luxdoo man*

<sup>1</sup> Gradi compniar raliduladx ree Jesucrist, r nan l jt, rni t en lojdi: ad rliladxidi chut ez b n r b rnieeman xtiidx Dios. Yaloz xgaj gol gogbee zagdxe bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree b n rusquiee, r b reeman rniee reeman xtiidxaman. <sup>2</sup> Yan din gagbeedi chu reenin rniee xtiidx Dios: Laa reeman naj b n rliladx guial Jesucrist bi't zi'c b nguidxliuj. B n rliladx ree zian yu' xSprijt Dios luxdoo reeman. <sup>3</sup> Per b n ad rliladxt ree zian ad yu't xSprijtaman luxdoo reeman, laa reeman naj b n ralen Jesucrist. Ma biguejndi guial rayal gui't tijb b n su contr laaman. Abi' diizd yan ma za' sprijt guin guidxliuj, zeel zien ree b n ralen Jesucrist ma yu' loj guidxliuj guie.

<sup>4</sup> Per l jt xi'n ma najdi xi'n Dios, gui ad ree b n ralen Jesucrist ad zajct g un reeman l jt gan, din mazri narooob guialrniabee ca' b n nabann  l jt guial loj b n nabann  b n zinal ree nejz mal loj guidxliuj guie. <sup>5</sup> B n za' ree contr Jesucrist r jn reeman xgab tijbzi ni riga' loj guidxliuj guie rniee reeman, gui ad ree b n ad rliladxt Jesucrist r jncwent reeman ni r b reeman. <sup>6</sup> Per dunuj ree ma nayajc ree xbejn Dios, abi' b n ma n nbee ree

Dios rucaagdiajg reeman ni ranee ree, guiáad ree b́en ad núnbeet Dios ni'quid rüjncwentt reeman ni ranee ree, zian rayagbee ree chu nabannë xSprijt Dios b́en rulüü dunuj ree diidxli chutëenin nabannë sprijt ni rulüü ganax ni rusquiee.

### *Rën Dios dunuj ree*

<sup>7</sup> Rënan lëjt, rnin lojdi rayal yayën dulasa' ree, din guialrën lasa' zëed loj Dios. Gra b́en rën lasa' naj xi'n Dios núnbee tää reeman laaman. <sup>8</sup> Abi' b́en ad rënt lasa' ad wayünbeetaman Dios, din guialrën lasa' zëed loj Dios. <sup>9</sup> Balüü Dios guial rënman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree guialnaban delant loj Dios por laaman. <sup>10</sup> Rën Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree. <sup>11</sup> Rënan lëjt, zeel rnin lojdi, zi'c rën Dios dunuj ree, ziangajc rayal yayën dulasa' ree. <sup>12</sup> Majsi achut waguiaa laaman, per bal rayën dulasa' ree, nabannë'qui ree Dios, abi' diidxli rayën reeman.

<sup>13</sup> Dunuj ree rayagbee guial nabannë' reeman abi' laaman za' con dunuj ree, din ma baneë xSprijtaman duloj ree. <sup>14</sup> Abi' dunuj gajcan baguiaa ragojn tää guial guxhaal Xi'n Dios loj guidxliuj guie persi güjtaman por xtol gra ree bejn. <sup>15</sup> Chutëez rëb guial Jesucrist naj Xi'n Dios nabannëman Dios, abi' Dios nabannë laaman. <sup>16</sup> Dunuj ree rayagbee raliladx tää ree guial rën Dios dunuj ree. Por laaman zëed guial rayën dulasa' ree. Abi' b́en rën lasa' nabannëman Dios, guiáad Dios nabannë laaman.

<sup>17</sup> Bal wali rayën ree Dios zi'c rënman, ad najtan ni yadxeb ree dxej güün xguial-guxtisaman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannë' reeman loj guidxliuj guie. <sup>18</sup> B́en rën Dios, ad rdxebtaman, din b́en rën laaman diidxli, ad rdxebtraman, per b́en ad rënt laaman rdxebaman, din rüjnman xgab casti ni yayalaman, zeel bal chu rdxeb, ad walitaman rënman laaman. <sup>19</sup> Dunuj ree rayën Dios, din yaløj laaman guyën dunuj ree. <sup>20</sup> Bal yu' b́en rëb: "Rënan Dios", abi' ralen lasa'man, rusquieeman. Din bal id rën lasa'man b́en ruguiaaman, ¿xhienaag guiënman Dios b́en ad waguiaataman? <sup>21</sup> Laagajcaman na: B́en rën Dios rayal guiën lasa'man.

## 5

### *Guial raliduladx ree Jesucrist zeel raguieen ree gan loj ni mal*

<sup>1</sup> Gra ree b́en rliladx guial Jesús naj b́en guxhaal Dios, laa reeman naj xi'nman. Bal chu rën dux Dad ree Dios, në gra ree xi'nman rënman. <sup>2</sup> Chi rayën ree Dios raguieen tää ree ni rniabeeman, dxel rayagbee ree guial rayën ree gra ree xi'nman. <sup>3</sup> Guial guiën bejn Dios naj guial güünman ni rniabeeman. Abi' ad nawëegt naj guial güünman ni rniabeeman, <sup>4</sup> din gra b́en naj xi'nman ma rüjn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin. <sup>5</sup> B́en rliladx guial Jesús naj Xi'n Dios, tijbzi laaman zajc güün gan loj ree ni mal yu' loj guidxliuj.

### *Ni rulüü Dios dunuj ree xcwent Jesucrist*

<sup>6</sup> Jesucrist bi't loj guidxliuj, gurobnijsaman guxhie' tää xrejnman loj crüjz. Ad gurobnijsztaman, në guxhie' xrejnman. XSprijt Dios naj testiw, laaman rü diidxli xcwent ree nine.

<sup>7</sup> Choon testiw yu' xanyabaa: xDadaman Dios, Jesucrist në xSprijt Dios, guiyon reeman naj tijbzi Dios.

<sup>8</sup> Yu' tää choon testiw loj guidxliuj: XSprijt Dios, në guial gurobnijs Jesucrist con ni guxhie' xrejnman loj crüjz, guiyon reen rü diidx tijbzi.

<sup>9</sup> Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, din xtiidxaman mazri lasajcan. <sup>10</sup> B́en rliladx Xi'n Dios, laaman rliladx ni rëb Dios xcwentaman. Per b́en ad rliladxt laaman, rüjnman Dios zi'c b́en rusquiee, din ad rliladxtaman ni rëbaman xcwent Xi'nman. <sup>11</sup> Abi' ni rëbaman naj guial ma baneeman guialnaban tiblyaa duloj ree, guialnaban guin zëed por xi'nman. <sup>12</sup> B́en za'në Xi'n Dios

tijbzi, laaman naban tiblayaa delant loj Dios, per b n ad za'n t laaman tijbzi, laaman ad ca't guialnaban guin.

*Ni bigra ca loj gui'ch guie*

<sup>13</sup> Cucan nine ree par l jt najdi b n riladx Jesucrist Xi'n Dios din gagbeedi guial ma ca'di guialnaban tiblayaa delant loj Dios.

<sup>14</sup> Rayagbee ree zagdxe: chi yanaab ree xhienin lojman, r jncwentaman dunuj ree, bal yanaab ree zi'c r nman. <sup>15</sup> Bal rayagbee ree r jncwentaman dunuj ree chi ranaab ree xhienin, ziangajc rayagbee ree zagdxe guial guneman ni ranaab ree.

<sup>16</sup> Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gud e Dios guialnaban tiblayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por b n r jn dol guin. <sup>17</sup> Graczi ni mal naj dol, per yu' dol ni zajc gac perdon.

<sup>18</sup> Rayagbee ree guial b n ma naj ree xi'n Dios ad rusnuutri r jn reeman dol, din Jesucrist Xi'n Dios naj b n rniaj laa reeman, abi' xindxab ad zajctri nabeex laa reeman.

<sup>19</sup> Rayagbee ree guial nayajc ree xbejn Dios, per ree b nguidxliuj, b n ad najt ree xbejn Dios, xindxab rniabee laa reeman. <sup>20</sup> Rayagbee t e ree guial Jesucrist Xi'n Dios ma bi'taman loj guidxliuj guie, guxhalaman dux quiarguejn ree, persi baguieenbee ree b n naj quijb Dios. Yan nadxu'n ' reeman tijbzi por Xi'nman Jesucrist. Tijbzi laaman naj Dios, por laa t eman yu' guialnaban tiblayaa. <sup>21</sup> Xi'n, gol gojp cudad chit e chinalidi ni naladx ree bejn naj Dios.

## Gui'ch barojp bacaa San Juan

### *Rxhial Waj xtiidx Dios loj ree bejn*

<sup>1</sup> Naj, b n rniabee loj ree b n rliladx Jesucrist, rxhialan gui'ch guie lojdi najdi b n gulej Dios rliladx t edi Jesucrist, diidxli r nan l jt, abi' ad tijbtizi naj, n  gra ree b n zinal xtiidx Dios. <sup>2</sup> R nan l jt guial ma nabann ' ree xtiidx Dios abi' laan nabann  dunuj ree zianczi. <sup>3</sup> Dux Dad ree Dios con Xi'nman Jesucrist g  nle' l jt, yaya reeman l jt, yabe'cdxe t e reeman luxdoodi guial zinalidi xtiidxaman r n t e lasa'di.

### *Rniabee Dios yay n du lasa' ree*

<sup>4</sup> D d nix guyu luxdon chi gogbeen yu' ree xcompniaridi, diidxli zinal xtiidx Dios naban t e reeman zi'c rniabee dux Dad ree Dios. <sup>5</sup> Yan, zi'c r nan l jt najdi dux compniar ree, gol been wen gol guy n lasa'di. Ni canin lojdi ad nic btan, diidx ni bacaagdiajg gajquidi diizd guia'xchejn. <sup>6</sup> Guial r n Dios naj guial guiban bejn zi'c rniabee Dios, abi' ni rniabeeman ni bacaagdiajgudi diizd guia'xchej naj guial rayal guiban bejn, gui n lasa'man.

### *B n rusquiee ree bejn*

<sup>7</sup> Rnin zian, din gra ladczi guidxliuj ziza zien ree b n rusquiee ree bejn, guial ad rliladxt reeman bi't Jesucrist loj guidxliuj zi'c bejn, b n r jn zian rusquieeman abi' za'man contr Jesucrist. <sup>8</sup> Gol gojp cudad chit e gus ebidi ni rayalidi por ni cay jn, din tia'di gra ni rayalidi delant loj Dios.

<sup>9</sup> Chut ez b n racaa guijc zi'c bal u Jesucrist bejn ree ad nabann taman Dios, per b n zinal xtiidx Jesucrist zi'c bal uuman bejn ree, laaman nabann  Dios con Xi'nman. <sup>10</sup> Bal chu gui't lidxidi abi' ad rul utaman xtiidx Dios zi'c bal u Jesucrist, ad cu'di laaman l n , ad g  ncwent t edi ni rnieeman. <sup>11</sup> Din b n r jncwent xtiidxaman, r n gui ban guial ma za'man conform con ni rusquiee b n guin.

### *Diidx bigra ca ree loj gui'ch guie*

<sup>12</sup> Zien ree ni r nan ganin l jt, per ad r ntan gucanan loj gui'ch, din wed ad zaglaat guialan guidganan l jt din ganen ' quijb naj l jt din chu' du luxdoo ree zagdxe tijbzi. <sup>13</sup> B n naj ree b n ma gulej Dios, dux compniar raliduladx ree Jesucrist b n zojb ree niz guie, rugajpdioz reeman l jt.

## Gui'ch bayon bacaa San Juan

### *Rugajpdioz Waj Gayo*

<sup>1</sup> Naj, b́en rniabee loj ree b́en rliadx Jesucrist, rxhialan gui'ch guie par luj Gayo najl da miwan diidxli ŕenan luj.

<sup>2</sup> Zi'c ŕenan luj rniaaban loj Dios zi'c źel zagdxex loj xnejzaman ziangajc grii zagdxex gra ni cayujnl gunee t́eeman luj gualnadaan. <sup>3</sup> Dád nix guyu luxdon chi guna garol dux compniar ree gual diidxli nabanl zi'c ŕeb loj xtiidx Dios. <sup>4</sup> Achet mazri ni rgu' luxdon zagdxex zi'c chi rigujenjan gual diidxli naban ree da compniaran zi'c ŕeb loj xtiidx Dios.

<sup>5</sup> Zi'c ŕenan luj Gayo, rnin lojl gual zagdxex da't naj ni cayujnl con dux compniar ree b́en rliadx Jesucrist abi' mazci zagdxex naj ni rujnl con ree b́en źeéd lood ren. <sup>6</sup> Din laa reeman na delant loj gra ree b́en rliadx Jesucrist, b́en rado'pné' reen guie, gual gunajchi'l laa reeman, zeel zagdxex gúunl gual gúunl laa reeman yudar con ni ryaadx reeman gual cayujn reeman sirv loj Dios din gusnuu xnejz reeman. <sup>7</sup> Din brii reeman zigtie'ch reeman xtiidx Jesucrist abi' ad rtiéjbt reeman tia' reeman ni rudéé ree b́en ad rliadx laaman. <sup>8</sup> Zeel dunuj ree b́en raliadlax ree Jesucrist, rayal yaguieen ree yudar b́en catie'ch ree xtiidxaman, zian yaguieen ree yudar guire'ch ni naj diidxli.

### *Ad ruzoobt Diótrefes diidx*

<sup>9</sup> Ma guxhalan tijb gui'ch loj ree dux compniar ree b́en rliadx ree Jesucrist, per Diótrefes gual ruladxaman nabeeman ad rujncwenttaman dux tiidxan. <sup>10</sup> Zeel bal guidganan léjt dxel ganené'n laaman xcwent gual rnieeguijdxaman rniee t́eeman diidx rusquiee contr dunujn abi' ad tijbtzi laan rujnman né ad rudéét lidxaman yaya'n dux bejn ree b́en źeéd ree lood ren, ad rtiéjb t́eetaman gudééd lidx ree ben ren yaya'n reeman, abi' ree b́en rudééd lidx ad rtiéjbtaman chu' reeman lén yadoo.

<sup>11</sup> Zi'c ŕenan luj Gayo rnin lojl ad chinalil nejz mal, been ni naj ni zagdxex din b́en rujn ni zagdxex laaman naj xbejn Dios per b́en zinal ni mal ad núnbeetaman Dios.

<sup>12</sup> Graczi reeman ruza't Demetrio zagdxex gual binalaman zi'c rayal, laa nen gajc xhienaag nabanman xt dunujn raza't laaman zagdxex abi' luj ragbee gual diidxli naj ni ragui'chan.

### *Diidx bigra ca ree loj gui'ch guie*

<sup>13</sup> Zien ni ŕenan ganin lojl per ad réntan gucanan loj gui'ch, <sup>14</sup> din wed ad zaglaat gualan guidganan luj, dxel ganené' quijb naj luj.

<sup>15</sup> Yabe'cdxex Dios luxdool, dux miw ree b́en riga' ree guie rugajpdioz luj, bagajpdioz t́eé gra dux miw ree.



## Gui'ch bacaa San Judas

### *Rugajpdioz Judas bén naj ree bén gule Dios*

<sup>1</sup> Naj, Judas bijch Santiaaw, cayünan sirv Jesucrist, cucan gui'ch guie par lëjt najdi bén ma gulej dux Dad ree Dios guial rënman lëjt, abi' dux Dad ree Jesucrist canaj lëjt. <sup>2</sup> Gusnuu yaya Dios lëjt, yabe'cdxeman luxdoodi guiën täädi laaman.

### *Bén ad rnieet ree diidxli (2Pe. 2:1-17)*

<sup>3</sup> Gradi compniar raliduladx ree Jesucrist, rënan lëjt, diizd gocli guyënan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej rüjn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloj, guial nayajc ree xbejn Jesucrist. <sup>4</sup> Din yu' ree bén rüjn bén rlliladx naabzi par go'ch reeman lojdi. Bén guin ree diizd gocli ma ragbee Dios guial rayal reeman casti, din ad rdxebt reeman laaman, rudxiib reeman gui'c naj Dios benza'c, abi' naban reeman zi'ctzi rën reeman. Ad rtiëjbt reeman nabee Jesucrist laa reeman, laaman naj tijbzi dux Dad ree bén rniabee dunuj ree.

<sup>5</sup> Majsi ma ragbeedi ni ganin lëjt, per ganinan din gusaaladxidi guial majsi babëë Dios bén Israel ree Egipto, per despuejs baniytaman bén ad bililadxt ree laaman. <sup>6</sup> Në ree anjl ad bazoobt xtiidx Dios niniabee reeman lod badëëman loj reeman, basiaawaman laa reeman lod nacay da't xt dxej güün xguialguxtisaman. <sup>7</sup> Nëtëë ree bén Sodoma con ree bén Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guyën reeman, zeel basagzi Dios laa reeman, baniytaman baze'c tääman laa reeman, laan naj ni rayal yaguaiaa ree chitëë yaguieen ree zian.

<sup>8</sup> Per ni'czi zian, yan ziangajc rüjn ree bén raguiil mod par go'chzi reeman lojdi, rüjn reeman xgab guial zajc güün reeman zi'ctzi rën reeman, ruxhiin laagajc reeman, ad rtiëjb tää reeman nabee Jesucrist laa reeman, rnieeguijdx tää reeman bén naj ree xianjl Dios. <sup>9</sup> Per chi gudildiidx ree arcangel Miguel con xindxab gui'c xcuerp Moisejs, ni'quid bayaxt anjl guin niëjbaman diidxguijdx loj xindxab guin, tijbzi ni rëbaman naj: "Ladxa Dios gusa'nän lüj." <sup>10</sup> Abi' yan bén raguiil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx rüjn reeman, ad rüjnt reeman laan xgab, contzi rüjn reeman laan zi'c ree be guial ad rüjnt reeb xgab. Zian cusëëb laagajc reeman delant loj Dios.

<sup>11</sup> ¡Prob laa reeman!, guial zinal reeman ni mal zi'c been Caín, mazri zinal reeman milia zi'c been Balaam, guiët tää reeman zi'c güit Coré chi guyënman niniabeeman luar Moisejs. <sup>12</sup> Laagajc reeman ruxhiin lanij rüjndi chi rado'pidi din gawidi tijbzi, guidiblagaa ad ratut reeman raw reeman ad rüjn tää reeman xgab por ree bejn, rüjnz reeman xgab par cha lën reeman. Naj reeman zi'c zaj ni ad nët guia ni rinë bi, zi'c ree yag rbidx abi' ria'xh reen guial ad rtiat reen. <sup>13</sup> Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu rüjn reeman nidxuudx ree, naj tää reeman zi'c ree bajl xanyabaa ni basëëb xnejz, dxel tiblayaa ma rayal reeman lod nacay da't.

<sup>14</sup> Abi' bén brii laj Enoc, laaman gojc gajdx loj ree xdiaa Adán, guneeman xcwent ree bén guin chi rëbaman: "Naj baguiaa dux Dad Dios zidnë zien da't ree xianjlaman <sup>15</sup> zidgaguieen xguialguxtisaman con gra ree bejn, din guiëbaman xhie casti rayal ree benmal por gra ni mal been reeman në por diidxguijdx ni gunee reeman laaman guial naj reeman bëndol." <sup>16</sup> Lasa' ree bén guin achetctzi ruladx reeman, abi' graczi rnieeguijdx reeman. Zianczi rüjn reeman zi'ctzi rën reeman, abi' zianczi ruza't laagajc reeman zagdx ruza't tää reeman bejn ree zagdx din cwentzi güün ree bén guin ni rën reeman.

### *Mod rayal guiban ree xbejn Dios*

<sup>17</sup> Per lëjt compniar raliduladx ree Jesucrist, rën da'tan lëjt, gol basaaladx guial bën goc ree xi apóstoles Dad Jesucrist <sup>18</sup> rëb reeman: “Chi ma zidyob nit guidxliuj, chu' ree bën guze' gra ni zëéd loj Dios güün tée reeman zi'ctzi naj xixgabdxuudx reeman.” <sup>19</sup> Lasa' ree bën guin naj bën rlia' lasa' ree bën ma zinal xnejz Dios, abi' naban reeman zi'ctzi rën reeman, ad yu't xSprijt Dios luxdoo reeman.

<sup>20</sup> Per lëjt compniar raliduladx ree Jesucrist, gol guzudxi'ch loj ni riladxidi, din guialrliladx guin zëéd loj Dios. Gol gurejdx gunab Dios con xyudar xSprijtaman. <sup>21</sup> Gol basnuu gol binal guial rën Dios la'tgaj cabëzidi guidxin dxej gunee Jesucrist guialnaban tiblayaa duloj ree guial rayaman dunuj ree.

<sup>22</sup> Gol been yudar bën sta yu' nawëëg ree luxdoo. <sup>23</sup> Gol been yudar bën zë ree loj nejzmal, zi'c rüjn tijb bën rüjn yudar bën cayajb loj bajl, gol guyën reeman per ad chu'ladxidi zi'c rüjn reeman, gol gojp cudad chitëë yabidi loj xtol reeman.

*Diidx bigra ca ree loj gui'ch guie*

<sup>24</sup> Yu' tijbzi Dios ca' guialrniabee par guiniaman lëjt, chitëë yabidi loj dol, din chu' luxdoodi zagdxe sin dol chi guidxindi xanyabaa lod za'man. <sup>25</sup> Laaman naj tijbzi Dios bën babëë dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con gualguxtis diizd gocli, yan con gra tiampczi. Amén.

## Ni balüü Jesucrist loj San Juan

<sup>1</sup> Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xianjlaman din gulüüman ni guin ree lon, naj Waj xbejn Jesucrist, bën cayüjn laaman sirv. <sup>2</sup> Abi' canin ni diidxi xcwent xtiidx Dios, xcwent Jesucrist në xcwent gra ree ni baguian.

<sup>3</sup> Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

### *Rxhial San Juan gui'ch loj guigajdx ree yadoo*

<sup>4</sup> Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguiedx Asia. Dux Dad ree Dios, bën gui't bën naj Dios diidz gocli në yan, në guigajdx ree sprijt za' lod canabeeman, në Jesucrist, laa reeman güünle' lëjt yabe'cdxe tēē reeman luxdoodi. <sup>5</sup> Jesucrist been gra ni naj güünman, laa tēēman goc bën yalob baban loj ree bengüt abi' laaman rniabee gra ree bën rniabee loj guidxliuj. Laaman rën dunuj ree abi' con xrejnman basiaman dux tol ree <sup>6</sup> abi' beenman dunuj ree zi'c bën rniabee, been tēēman dunuj ree bixhioz rüjn sirv xDadaman Dios. Zeel Jesucrist rayalaman respejt në guialrniabee zianczi. Amén.

<sup>7</sup> ¡Gol gogbee guial gui'taman loj zaj! Gra ree bejn guguaa laaman xt ree bën ni guliiz lans cwé'lénman, abi' gra ree bénguidxliuj goon da't chi guguaa reeman laaman. Laan naj diidxi. Zian gac.

<sup>8</sup> Dux Dad ree Dios bën rajp gra guialrniabee. Laaman gui't, laaman naj Dios diidz guia'xchej, në yan, laaman rëb por laagajcaman: “Naj naj zi'c lejtr A con Z, lejtr ni rzuloj në ni rlioxné alfabeto, naj ca' gra guialrniabee.”

### *Baguiaa San Juan xguialrniabee Cristo*

<sup>9</sup> Naj Waj tijb ree lasa'di bën rliladx Jesucrist. Tijbzi nadxu' ree loj xguialrniabeeman, tijbzi cayzaagdiaj ree abi' caydaan ree por laaman. Naj guyu'n ladxguuib loj yuj riga' loj nijsdoo lod la Patmos guial rtiechan xtiidx Dios në gra ree ni ragbeen xcwent Jesucrist. <sup>10</sup> Chi yu'n ladxguuib loj yuj riga' loj nijsdoo guin, guyu' tijb dumingw chi guza'can zi'c bën rnie'xhchaal por xguialrniabee xSprijt Dios, abi' xichan biguiejnan zi'c cha' trompejt abi' biguien rejs da't cha' tijb <sup>11</sup> bën ni rëb:

—Naj naj zi'c lejtr A con Z, lejtr ni rzuloj në ni rlioxné alfabeto, din tijbzi naj naj bën rniabee. Bacaa loj gui'ch gra ni cuguiaal dxel guixhiaalil gui'ch guin loj guigajdx cwa ree da bejnan bën zojb ree niz Asia, luguiedx Éfeso, Esmirna, Pérgamo, Tiatira, Sardis, Filadelfia në Laodicea.

<sup>12</sup> Dxel chi badxi' lon par guguan chunin rnieenē naj dxel baguian gajdx ree candeler or. <sup>13</sup> Abi' galay ree candeler guin baguian tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdooan. <sup>14</sup> Naquichbëj guijcaman zi'c naj guidxlad xiil, zi'c naj guiajnayaag naquich naj guidxguijcaman abi' zi'c bajl re'criani guiaalojman. <sup>15</sup> Abi' guia'man rdiinan bacha' zi'c guuib ni la bronze chi yu'n loj guij, abi' cha'man naj rejs zi'c rüjn nijs naquie' chi rguiajtan. <sup>16</sup> Guiáad yaaman ladbee ca'man gajdx bajl xanyabaa. Abi' ro'man ririi tijb Espad ni nadoxh da't grop lad, guiáad lojman rulaa bacha' zi'c chi rusni gubijdx gojl da't.

<sup>17</sup> Dxel chi baguian laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxebil, naj naj bën rniabee diidz guia'xchej abi' par tiblayaa. <sup>18</sup> Ma güjtan, per yan ma babanan, abi' ma nabanen tiblayaa, abi' naj rniabee guialgüjt në gabijl. <sup>19</sup> Yan baca ni ma baguiaal në ni cuguiaal në ni qui gacri. <sup>20</sup> Ni në rën guiëb guigajdx ree bajl xanyabaa ni baguiaal yan ladbee, në guigajdx ree candeler or. Guigajdx ree bajl

xanyabaa guin rën guiëban gajdx ree bën rniabee guigajdx cwaa ree da bejnan niz Asia, abi' guigajdx candeler or guin rën guiëban guigajdx cwaa ree da bejnan.

## 2

### *Diidx par ree bën Éfeso*

<sup>1</sup> Yan bacaa ni guixhiaalil loj bën rniabee ree da bejnan luguiedx Éfeso. Bacaa: “Bén ni ziza galay ree candeler or, bën ni ca' gajdx ree bajl xanyabaa con yaa ladbeeman, laaman na lojdi: <sup>2</sup> Naj ragbee xhie cayüjndi. Naj ragbee xhie tarbajw cadëdidi, ragbee tëen guial ad ralenya'tidi. Naj ragbee guial ad rdaantidi bën mal ree, abi' ma beendi prueb bën na ree naj xi apóstoles Jesucrist majsí achut naj reeman abi' ma gogbeedi guial ganax diidx rusquiee rniee reeman. <sup>3</sup> Naj ragbee guial rajpídi pacens abi' ma guzagdiajdi guial rëndi naj sin guial yalenya'di. <sup>4</sup> Per yu' ni ad ruladxtan rüjndi: guial ad rëntrídi naj zi'c guia'xchej. <sup>5</sup> Gol basaaladx xhienaag guyëndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lëjt abi' ad zajtrídi biani par los demazri ree bejn, bal id zayüjndi xgab. <sup>6</sup> Per yu' ni cayüjndi zi'c rayal, guial rdx'e'chídi ni rüjn ree ben nicolaítas, zi'cgajc rdx'e'chan por ni rüjn reeman. <sup>7</sup> Bén rën ree gucaagdiajg, gol bacaagdiajg ni rniee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runee guialnaban ni zojb xanyabaa lod zojb Dios.”

### *Diidx par ree bën Esmirna*

<sup>8</sup> Yan bacaa ni guixhiaalil loj bën ni rniabee ree da bejnan luguiedx Esmirna. Bacaa: “Bén rniabee diidx guia'xchej në par tiblyaa, bën ni güt abi' babanman stijb, laaman na lojdi: <sup>9</sup> Naj ragbee xhienaag cadëdidi tarbajw por ni rüjn bejn lëjt, ragbee tëen loj guialprob ni nabandi majsí diidxli najdi benrijcw guial ma zinalídi xtiidx Dios, abi' ragbeen xhienaag rnieeguijdx bejn lëjt, bën ni na ree naj reeman bën Israel xbejn Dios majsí laa reeman naj xbejn xindxab. <sup>10</sup> Ad rdxebtídi guialzi ni tédídi din xindxab güünx gan din cu' ree bejn tio'p choondi ladxguib par guiguien guial diidxli zinalídi xnejz Dios. Chii dxej tédídi guialzi guin ree, per gol guzujdx'i'ch xt dxej guiëtídi, abi' naj yazaladx lëjt guialnaban tiblyaa. <sup>11</sup> Bén rën ree gucaagdiajg gol bacaagdiajg ni na xSprijt Dios par ree da bejnan: Bén güün gan loj dol, achetri güün guialgüjt ni rarojp laaman.”

### *Diidx par ree bën Pérgamo*

<sup>12</sup> Yan bacaa ni guixhiaalil loj bën rniabee ree da bejnan luguiedx Pérgamo. Bacaa: “Bén ca' espad ni nadoxh grop lad ro', laaman na lojdi: <sup>13</sup> Naj ragbee guial luguiedx zojbídi xindxab rniabee ni. Per majsí zian lëjt za'dxi'chídi con naj ad rucwëézt rliladxídi naj ni'qui lën ree dxej ni bagüjt reeman Antipas, tijb ree xcompniarídi bën ad bacwëézt bililadx naj, bën bagüjt reeman ladxídi lod rniabee xindxab. <sup>14</sup> Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bën ad rusa'nt ni basiid Balaam bejn ree, bën rëb loj Balac xhienaag guzaalguiiwaman bën Israel ree din gaw reeman guialraw ni ma gurej loj ree xdios Balac guin, në par been reeman gralój ree nidxuudx con ree bën ad najt lacheel reeman. <sup>15</sup> Stijb ni ad ruladxtan naj guial lojdi no'ch ree bën ad rucwëézt rüjn zi'c rüjn ree bën nicolaítas. <sup>16</sup> Zeel gol bayüjn xgab por ni rüjndi, bal id züjndi zian nayob gaxhalan casti din günan guialguxtis con laa reeman con espad ni ririi ro'n. <sup>17</sup> Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë tëen tijb guiaj naquichdoo lod ca laj cübaman ni achutczí ragbee, tijbzi bën tia' guiaj guin gabee.”

### *Diidx par ree bën Tiatira*

<sup>18</sup> Yan bacaa ni guixhiaalil loj bën rniabee ree da bejnan luguiedx Tiatira. Bacaa: “Xi'n Dios, bën re'criani guiaalój zi'c bajl, bën rdiin bacha' guia' zi'c guib ni la bronce, laaman na lojdi: <sup>19</sup> Naj ragbee ni cayüjndi, ragbeen xhienaag rëndi naj, xhienaag rliladxídi naj,

xhie cayüjndi por naj abi' ad ralenya'tidi. Naj ragbee guial mazri zagdxe cayüjndi yan guial loj guia'xchej, <sup>20</sup> Per yu' ni ad ruladxtan cayüjndi: Rdaandi Jezabel, béngunaa ni na rudëed xtiidx Dios. Abi' rtiëjbidi rulüüman da bejn reen dxel ruzaalguiiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdios ree bénguidxliuj. <sup>21</sup> Ma badën tiamp din yayüjnman xgab, din gusa'n xguialdxuudxaman, per ad réntaman. <sup>22</sup> Zeel yan gaxhalan guialguijdx par laaman, gaaman gagxuuman. Abi' bén rüjn ree zi'c rüjnman, bal id reeman guchaa mod ni naban reeman ziangajc zro' naj guialzi ni téd reeman, <sup>23</sup> gugüjtan gra ree bén ma been xgab guiban zi'c naban béngunaa guin. Zian gagbee ree da bejnan guial naj ragbee xhie yu' guijc bejn xhie tée yu' luxdooman, xhie xgab rüjnman. Naj gune lëjt ni rayalidi bal gonin rüjndi. <sup>24</sup> Par gra ree da bejnan bén zojb ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt guial na reeman ad ragbeetidi xt ni bigra xcwent xindxab guial ad ridxga'tidi laa reeman, achetri ni ganin lojdi, <sup>25</sup> tijbzi ni rnin lojdi: Gol guzujdx'i'ch loj ni ma ragbeedi xt chi guialan stijb. <sup>26</sup> Bén güün gan loj dol, abi' gusnuu güünman zi'c rénan guidib tiamp ni guibanman, naj gudë guialrniabee lojman dín nabeeman loj ree nacion. <sup>27</sup> Nabeeman loj ree nacion guin zi'c tijb bén ni ca' tijb var guiib, zi'czi rlia' bejn tijb guiajs zian güünnëman bén ni ad rént ree guzoob diidx. Gudën guialrniabee guin lojman zi'c banee da Dadanan lon, <sup>28</sup> gudë téeen lojman bajl xanyabaa ni rliejn rsildoo. <sup>29</sup> Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

### 3

#### *Diidx par ree bén Sardis*

<sup>1</sup> Yan bacaa ni guixhiaalil loj bén rniabee ree da bejnan luguiedx Sardis. Bacaa: “Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüjndi ragbee téeen guial ma güjtidi, majsi par ree bejn nabandi. <sup>2</sup> Zeel gol batie'ch xbaaalidi, gol been naguiejn chitëë nit ni sta cayüjndi, din naj ruguian guial ad cayüjntidi xnejz delant loj da Dadan Dios. <sup>3</sup> Gol basaaladx ni ma biguiejndi në ni ma basiididi, abi' gol been zian, gol bayüjn xgab zi'c ni cayüjndi. Din bal id zatie'ch xbaaalidi zi'c cayüjndi, dxel zi'c ri't tijb béngubaan ziangajc chi gagbeedi ma bi't casti par lëjt. <sup>4</sup> Per luguiedx Sardis, yu' tio'p choon ree bejn sta naya, laa reeman naj bén gacw lajd naquich abi' sa reeman con naj, din rayal reeman laan. <sup>5</sup> Bén güün gan loj dol, chi guidxin hor, zian gacwaman lajd naquich abi' ad zuse'n téeetan lajman loj xlibr guialnaban. Abi' delant loj Dios në loj ree anjl guien guial laaman naj da bejnan. <sup>6</sup> Bén rën ree gucaagdiajg, gol bacaadiajg ni rëb xSprijt Dios par ree da bejnan.”

#### *Diidx par ree bén Filadelfia*

<sup>7</sup> Yan bacaa ni guixhiaalil loj bén rniabee ree da bejnan luguiedx Filadelfia. Bacaa: “Bén naya nali, bén naj diidxli, bén rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejb ni achut zajc gusiaaw o gusiaawaman tijb nejb ni achut zajc guixhial, laaman na lojdi: <sup>8</sup> Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejb din guitie'chidi da diidxan sin guial chu gutëë lojdi, din zinalquidi da diidxan abi' ad goct rëbidi guial ad najtidi da bejnan. <sup>9</sup> Lëjt guguaa ni günan con ree xbejn xindxab bén rëb ree naj reeman bén Israel xbejn Dios, abi' rusquieezi reeman. Guguaadi ni günan laa reeman, guidgazuxib reeman lojdi, gagbee tée reeman xhienaag rénan lëjt. <sup>10</sup> Abi' zi'c ma bazoobidi diidx gapidi pacens guial chinalidi da diidxan, ziangajc ganan lëjt chi guidxin dxej gui't guialzi loj guidib guidxliuj, zi'c tijb prueb par gra ree bénguidxliuj. <sup>11</sup> Nayob guialan loj guidxliuj stijb. Gol guzujdx'i'ch loj ni ma ragbeedi chitëë tia' ben ren ni rayalidi. <sup>12</sup> Bén güün gan loj dol, naj gudë lojman tijb luar zojb loj lën yadoo zojb xanyabaa lod naban da Dadan Dios, ni guibanman tiblayaa. Dxel tiblajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa

lod zobjaman. <sup>13</sup> Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

*Diidx par ree bén Laodicea*

<sup>14</sup> 'Yan bacaa ni guixhiaalil loj bén rniabee ree da bejnan luguiedx Laodicea. Bacaa: “Bén ni rüjn cumplid xtiidx, bén ni been gra ni rayal güünman, bén naj diidxli, bén rniabeenë Dios diizd gocli chi gad guidxliuj gacchaaw, laaman na lojdi: <sup>15</sup> Naj ragbee gra ni cayüjndi. Ad najtidi zi'c nijs nayaag o zi'c nijs laa. ¡Balzianclaa tiblyaa niajquidi zi'c nijs nayaag o zi'c nijs laa! <sup>16</sup> Per lëjt najdi zi'c nijs nayool, ni'qui nadxa' ni'quidza nayaagt, dxel zi'c laa rabëë gajc ro' bejn nijs nayool guin, zian ma rënan gabëladxan lëjt. <sup>17</sup> Lëjt rëb guial najdi benrijcw, rajpidi gra abi' achet ryaadxidi. Per ad ragbeetidi guial achet rajpidi, najdi bénprob, bén zibëël, achet sirv lëjt, najdi bénlutia'p niz lon guial ad nabantidi xnejz. <sup>18</sup> Zeel rnin lojdi, zi'c rzii bejn ganax or, zian gol been naguiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayüjn xgab din guiguie'ch xguialxtudi abi' guiguiendi naya delant lon. Në chi rzii bejn tijb rumed par guiaaloz bejn din guguaaman zagdxe, zian gol been naguiejn din gapidi da guial rignia'n din guguaadi zagdxe. <sup>19</sup> Rdilnë'n abi' ruzuxnejzan gra ree bén rënan. Zeel gol bagu' luxdoodi gol bayüjn tëë xgab xhienaag nabandi. <sup>20</sup> Gol gogbee guial naj cabedx lëjt, zi'c chi rniee tijb bejn rulidx stijb bejn. Cabëësan chu guidxga' naj, zi'c chi rgu' bejn stijb bejn din gaw reeman tijbzi. Abi' bén guidxga' naj ma nabannë'n laaman abi' laaman nabannëman naj. <sup>21</sup> Bén güün gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman. <sup>22</sup> Bén rën ree gucaagdiajg, gol bacaagdiajg ni na xSprijt Dios par ree da bejnan.”

4

*Rlies reeman xvalor Dios xanyabaa*

<sup>1</sup> Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bén guneenë gajc naj diizd guia'xchej bén naj cha' zi'c trompejt, laaman na lon:

—Wë'p guie din gulün lüj ni gac ree chi ma gojc ree ni rnin lojl.

<sup>2</sup> Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdxe zi'c xi yagxhil tijb rey, lojn zobj tijb bejn. <sup>3</sup> Abi' bén zobj loj yagxhil guin rulaaman bacha' zi'c ree guiaj zagdxe ni lasajc wayëjx, ni la jaspe në cornalina. Abi' guijc yagxhil guin ca tijb guidgij ni rulaa bacha' zi'c guiaj zagdxe ni la esmeralda. <sup>4</sup> Abi' gadëd ro' yagxhil guin baguian zagajlbitap ree yagxhil zagdxe abi' loj ree yagxhil guin zobj ree gajlbitap ree bengol najcw reeman lajd naquich yu' coron or guijc reeman. <sup>5</sup> Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. <sup>6</sup> Baguia tëën delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaloz reeb. <sup>7</sup> Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj. <sup>8</sup> Tijb gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guiaaloz reeb. Abi' dxej guiaal ad rucwëëzt rëb reeb:

Naya nalil, naya nalil naya nalil najl dux Dadan Dios,

lüj guial ca'l gra guialrniabee,

lüj guial najl Dios diizd guia'xchej në yan abi' gui'til.

<sup>9</sup> Beegaj chi rlies ree be guin xvalor bén ni zobj loj yagxhil guin, bén naban tiblyaa, beegaj ruza't reeb laaman zagdxe rudëëd reeb quixtëë lojman, <sup>10</sup> guigajlbitap ree bengol

zobj yagaj, bazuxib reeman lojman, bén ni zobj loj yagxhil abi' nabanman tiblayaa, abi' ruzuxib reeman lojman rudxiib xcoron reeman niz lojman, rëbgaj reeman:

<sup>11</sup> Dux Dad ree Dios, lüj rayal guiya'p respejt, diidxa'c në guialrniabee.

Din lüj beenchaaw gra ni yu' abi' lüj rëb guial chu' gra ni yu', abi' yu' reen.

## 5

### *Tijb gui'ch ni nadiüüb con bén naj zi'c xi xiil Dios*

<sup>1</sup> Dxel baguian guial bén zobj loj yagxhil zagdxe ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadiüüban, abi' naguiidan con gajdx se chitëë chu guixhial laan. <sup>2</sup> Loj hor guin baguian tijb anjl bén gojl da't, rbidxa'man rejs rëbaman:

—¿Chu rayal chiquied ree se guie abi' guixhial loj gui'ch guie?

<sup>3</sup> Per ni'qui xanyabaa, ni'qui loj guidxliuj, ni'qui lën liuj ad bidxejlt Bén ni rayal guixhial gui'ch guin, ni'qui par guguaaman ni ca loj gui'ch guin. <sup>4</sup> Abi' naj dád binan chi baguian guial achut rdxejl guixhial loj gui'ch guin në par guguaaman ni ca loj gui'ch guin. <sup>5</sup> Dxel na tijb ree bengol guin lon:

—Ad roonl, baguiaa nial ma yu' tijb Bén ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman Bén naj zi'c tijb beedx loj xdiaa Judá por guialrniabee ni rajpaman, laaman za loj xdiaa rey Davi.

<sup>6</sup> Abi' chi baguian, dxel baguian guial galay lod za' yagxhil zagdxe ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb Bén naj zi'c xi xiil Dios rguien xsen lod bidxeelguijdxaman chi gütaman. Abi' yu' gajdx xcajchaman con gajdx guiaalojman, guigajdx guiaalojman naj guigajdx xSprijt Dios Bén rxhiaalaman guidib guidxliuj. <sup>7</sup> Bibig Bén naj zi'c xiil guin cwa'man gui'ch guin ladxaa Bén zobj loj yagxhil guin. <sup>8</sup> Chi cwa'man gui'ch guin, guidap ree be za' gajxh cwë' yagxhil guin në gra guigajlbitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tëë reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios. <sup>9</sup> Bengol guin ree rool reeman tijb cant cüb ni rëb:

Lüj rayal tia' gui'ch guin

abi' guixhialil se ni naguiidnën.

Din lüj güjtil

abi' con xrejnl ni guxhie'l gudijxil

por graloj bejn din gac reeman xbejn Dios,

achet güünan xhietëëz diidx rniee reeman,

o xhie loj diaa, o xhie guiedx o xhie nacion zëëd reeman.

<sup>10</sup> Beenl laa reeman rey

been tëël laa reeman bixhioz par dux Dad ree Dios,

abi' laa reeman nabee loj guidxliuj.

<sup>11</sup> Baguia tëën biguiejn tëën cha' zien ree anjl gadëd ro' yagxhil zagdxe guin con guidap ree be guin në ree bengol guin. Abi' bénguixiujczi naj reeman por mil naj reeman. <sup>12</sup> Abi' dád rejs rniee reeman rëb reeman:

Bén naj zi'c xi xiil Dios, Bén güt,

laaman rayal tia' guialrniabee,

laaman rayal gap guialnaza'c,

quiarguiejn, në gojl,

respejt, guza't reeman laaman zagdxe,

guilies tëë reeman xvaloraman.

<sup>13</sup> Dxel biguejnan cha' gra ree ni been Dios, zi'c ni yu' ree xanyabaa, loj guidxliuj në ni yu' ree lën liuj në ree ni yu' loj nijsdoo, rëb reen:

Bén zojb loj xyagxhil guialrniabee në bén naj zi'c xi xiilaman,  
par laa reeman naj  
respejt, diidxza'c, guialrniabee,  
abi' guilies reeman xvalor reeman  
zianczi në par tiblyaaa.

<sup>14</sup> Chi gulox rëb reen zian, dxel guidap ree be za' yagaj rëb reeb:

—Amén.

Abi' guigajlbitap ree bengol za' yagaj bazuxib par gap reeman laaman respetj, bén ni naban zianczi në par tiblyaaa.

## 6

### *Guigajdx ree se*

<sup>1</sup> Dxel baguian biquied bén naj zi'c xi xiil Dios se yaløj guin, abi' zi'c chi rbidxa' guziaaw zian biguejnan gunee tijb ree be guin, rëbib:

—jGuda!

<sup>2</sup> Dxel baguian gulentie tijb way naquich, abi' bén dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi zigüeenman gan mazri.

<sup>3</sup> Chi biquied bén naj zi'c xi xiil Dios se barøjp guin biguejnan rëb be barøjp guin:

—jGuda!

<sup>4</sup> Dxel gulentie tijb way xnia, abi' bén dxiib laab ca'man tijb espad narooob në guialrniabee par gustjlamen bejn ree loj guidxliuj din gugüjt lasa' reeman.

<sup>5</sup> Chi biquied bén naj zi'c xi xiil Dios se bayon, biguejnan rëb be bayon guin:

—jGuda!

Dxel baguian gulentie tijb way ya's, abi' bén dxiib laab ca'man tijb xijglibr. <sup>6</sup> Abi' galay guidap ree be guin biguejnan cha' tijb bén rëb:

—Tib quil trigo lasajcan tib dxej dxiin abi' choon quil cebada lasajcan tibdxej dxiin, per ache güünl sejt në vin.

<sup>7</sup> Chi biquied bén naj zi'c xi xiil Dios se badajp guin, biguejnan rëb be badajp guin:

—jGuda!

<sup>8</sup> Dxel baguian gulentie tijb way nagüiech, abi' bén dxiib laab laman guialgüjt, abi' zinal gabijl laaman. Cwa' reeman guialrniabee par gugüjt reeman tib part loj tajp lala' ree bénguidxliuj. Yu' reeman guiët por wadijl, o por guialrliaan, o por guialguijdx, o por ree be doxh yu' loj guidxliuj.

<sup>9</sup> Chi biquied bén naj zi'c xi xiil Dios se bagaay guin, baguian xan altar za' ree xsprijt ree bén bagüjt reeman guial bililadx reeman guzujdx'i'ch téë reeman loj xtiidx Dios. <sup>10</sup> Abi' rbidxa' reeman rejs rëb reeman:

—Dios, Dad bén rniabee, lüj naj bén naya nali abi' rüjnl zi'c rayal, ¿za plact gaglaal par güün xguialguxtisil con ree bén ni bagüjt dunujn loj guidxliuj din yaguijx reeman ni been reeman?

<sup>11</sup> Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güjt reeman, bén ni cayüjn gajc ree sirv Dios.

<sup>12</sup> Chi baguian biquied bén naj zi'c xi xiil Dios se baxo'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëw gojcan naxnia zi'c rejn, <sup>13</sup> abi' ree bajl xanyabaa biajb reen loj guidxliuj zi'c ryajb ree higo ni ya' loj yag higo chi rbi' bidoxh.

<sup>14</sup> Dxel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. <sup>15</sup> Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén



nado', në ree bén ad najt zi'c bén nado', gra reeman baquie'chloj lën guiajbiliaa në lën ree yalaj. <sup>16</sup> Abi' rëb reeman loj ree guia' në loj ree yalaj:

—Gol biajb du guijcan, gol baquie'ch tëë dunujn loj bén zojb loj xyagxhil guialrniabee në loj xcasti bén naj zi'c xi xiil Dios, <sup>17</sup> din ma bidxin dxej doxh ni gudëed reeman casti, abi', ¿chu zajc taan casti guin?

## 7

*Tibgayuu tiuubitap mil ree bén Israel*

<sup>1</sup> Chi gulox baguian ni guin ree, baguian tajp ree anjl za' reeman guidap xquin guidxliuj par gucwëez reeman bi ni zëed guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag. <sup>2</sup> Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs guneenëman guidap ree anjl guin, bén ni ca' ree guialrniabee par güün reeman ni güün reeman con guidxliuj në con nijsdoo, <sup>3</sup> rëbaman loj reeman:

—Ad xhie güüindi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

<sup>4</sup> Dxel biguiejnan bël reeman cwa se guin lucwaj. Por gra ree bén Israel, tibgayuutiubita bitap mil reeman cwa se guin lucwaj. <sup>5</sup> Din chiptio'p mil ree bén zëed loj xdiaa Judá cwa se guin, në chiptio'p mil ree bén zëed loj xdiaa Rubén në chiptio'p mil ree bén zëed loj xdiaa Gad. <sup>6</sup> Në chiptio'p mil ree bén zëed loj xdiaa Aser, në chiptio'p mil ree bén zëed loj xdiaa Neftalí, në chiptio'p mil ree bén zëed loj xdiaa Manasés, <sup>7</sup> con chiptio'p mil ree bén zëed loj xdiaa Simeón, chiptio'p mil ree bén zëed loj xdiaa Leví, në chiptio'p mil ree bén zëed loj xdiaa Isacar, <sup>8</sup> chiptio'p mil ree bén zëed loj xdiaa Zabulón, chiptio'p mil ree bén zëed loj xdiaa José, chiptio'p mil ree bén zëed loj xdiaa Benjamín cwa se guin lucwaj reeman.

*bénguixiuj najcw lajd naquich*

<sup>9</sup> Dxel baguian bénguixiuj ree, per bénguixiuj ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rniee ree gadxagayaa diidx bén za ree gra lad në gadxagayaa nacion. Za' reeman delant loj xyagxhil bénrniabee në delant loj bén naj zi'c xi xiilaman. Najcw reeman lajd naquich ca' tëë reeman zijn. <sup>10</sup> Abi' rëb reeman rejs da't:

Dunujn raya'pan perdon por dux Dadan Dios  
bén zojb loj xyagxhil guialrniabee  
në por bén naj zi'c xi xiilaman.

<sup>11</sup> Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guijc reeman liuj par gap reeman laaman respejt, <sup>12</sup> rëb reeman:

¡Amén! guialrniabee, gojl,  
guialrajc, respejt, diidxza'c,  
guialrlies xvaloraman në quixtëë,  
naj reen par dux Dad ree Dios zianczi në par tiblayaa. Amén.

<sup>13</sup> Loj hor zii tijb ree bengol guin gunabdiidx lon:

—¿Chu ree bén ni najcw lajd naquich guin, ban tëë ree bénan?

<sup>14</sup> Badxi'nán rën:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't abi' naquich xab reeman guial ma naya reeman ma biquied xtol reeman con xrejn bén naj zi'c xi xiil Dios. <sup>15</sup> Zeel za' reeman delant xi yagxhil Dios, abi' dxej guiaal cayüjn reeman sirv lod zojbaman. Abi' bén zojb loj yagxhil guin ma za'man con laa reeman, abi' laaman gap laa reeman. <sup>16</sup> Ad yu'tri dxej guiliaan reeman, ad ze'c tëët reeman nijs, ad zudxüü tëët gubijdx laa reeman, ad zagnalaa tëët reeman. <sup>17</sup> Din bén naj zi'c xi xiil Dios bén za' galay lod za' xi yagxhil Dios, laaman gap

laa reeman zi'c tijb b́en rajp ree xiil abi' chinēman laa reeman lod rajch nijs ni runee guialnaban. Dxel Dios laaman gutiaa loj reeman gra ree nijs b́rii loj reeman chi biin reeman.

## 8

### *Guigajdx se*

<sup>1</sup> Chi biquied b́en naj zi'c xi xiil Dios se ni goc gajdx guin, bayajcdxe xanyabaa cost garol hor. <sup>2</sup> Dxel baguian gajdx ree anjl za' reeman delant loj Dios, cwa' reeman gajdx trompejt. <sup>3</sup> Dxel bi't stijb anjl con tijb chaabacwi ni or, guzuliman delant lo altar guin abi' yu' b́en badēēd zien yaal din cu'man goxyaal guin loj altar or ni za' delant loj yagxhil zagdxe ni naj zi'c xyagxhil tijb rey, din tijbzi chē'pnē goxyaal guin xtiidx gra ree xbejn Dios, diidx ni rnīee reeman chi rbejdx rniab reeman laaman. <sup>4</sup> Dxel diīzd ladxaa anjl guin b́rii goxyaal guin con ree xtiidx ree xbejn Dios, diidx ni rnīee reeman chi cabejdx canab reeman laaman, abi' wē'p reen niz loj Dios. <sup>5</sup> Dxel bacha anjl guin chaabacwi guin guij ni yu' loj altar guin abi' bazurlojman laan loj guidxliuj. Abi' dád rejs guridxa' guziaaw, gojc naquie', wē'p nijs, abi' bi't xudoxh.

### *Trompejt ree*

<sup>6</sup> Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

<sup>7</sup> Chi bacwejdx anjl yaloy guin trompejt ni ca'man, biajb guiajyabaa loj guidxliuj no'chan bajl nē rejn. Dxel cost gurol guidxliuj we'c con ree yag nē ree gui'xh naga' yu' lojn.

<sup>8</sup> Chi bacwejdx anjl barojp guin trompejt ni ca'man, dxel zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejn loj hor guin. <sup>9</sup> Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo gunidloj.

<sup>10</sup> Chi bacwejdx anjl bayon guin trompejt ni ca'man, dxel biajb bajl xanyabaa ni narooob ni cacaguij zi'c chi rtiaguij guied, loj cost garol guiw ni yu' nē cost garol ree lod rajch nijs biajban. <sup>11</sup> Bajl xanyabaa ni biajb lan Ajenjo, abi' cost garol nijs guin ree gojc nala abi' dád zien ree bejn güjt guial bayajc ree nijs guin nala.

<sup>12</sup> Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bēēw nē cost garol ree bajl xanyabaa bicajy. Abi' guial bicajy reen, dxel cost garol dxej nē guiaal ad basnit.

<sup>13</sup> La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rēbaman:

—jProb, per prob, per probza ree b́en ni yu' loj guidxliuj por zachoos trompejt ni ryaadx gucwejdx za choon ree anjl!

## 9

<sup>1</sup> Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizē ni ad yu't lod rliox. <sup>2</sup> Chi guxhalan ro' bizē guin tijb go'xh yo'xhchab b́rii lēn bizēē guin zi'c chi ririi go'xh lēn tijb horn narooob, xt bascajy go'xh guin gubijdx nē bi. <sup>3</sup> Abi' lēn go'xh guin b́rii ree bi'tsu abi' bire'ch reeb loj guidxliuj, abi' cwa' reeb guialrniabee par gac reeb bedoxh zi'cgajc nixüb. <sup>4</sup> Per gunabee reeman laa reeb chitēē xhie güün reeb guixya' ree, ni'qui ree yag, ni'qui ree gui'xh naga'. Naabzi ree b́en ni ad yu't ree xse Dios lucwaj. <sup>5</sup> Per ad par gugüjtt reeb bejn, naabzi par sagdiaj reeman gaay bēēw. Abi' lod rudidxa' reeb riyajnan zi'c ryajn lod rudidxa' nixüb. <sup>6</sup> Lēn ree dxejzii quuil ree bejn guialgüjt, per ad zadxejlt reeman laan. Guiēn reeman guiēt reeman per ad zējtt reeman.

<sup>7</sup> Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn. <sup>8</sup> Abi' guidxguijc reeb naj zi'c guidxguijc b́engunaa, guiáad dxidlay reeb naj zi'c dxidlay beedx. <sup>9</sup> Guidib luxdoo reeb nada'cwan zi'c guuib, abi' xhiil reeb rüjnan naquie' zi'c rajc naquie' chi ruxüünnē ree way carrejt loj

wadijl. <sup>10</sup> Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëëw. <sup>11</sup> Anjl ni rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb reen bën ruloox.

<sup>12</sup> Zian rliox guialzi yaloj, dxel gui't zatio'p guialzi.

<sup>13</sup> Chi bacwejdx anjl baxo'p trompejt ni ca'man, dxel biguiejnan tijb cha' bejn briin galay ree cajch ni za' guidap xquin altar or ni za' delant loj Dios. <sup>14</sup> Cha' bën biguiejnan rëbaman loj anjl baxo'p bën ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

<sup>15</sup> Zian bidxin or, bidxin dxej, bidxin bëëw në ijz ni naj par laa guidap ree anjl guin din gugüjt reeman garol ree bénguidxliuj. <sup>16</sup> Abi' biguiejnan bël naj xsuldad reeman bën dxiib ree way. Naj reeman tio'pgayuu millon. <sup>17</sup> Ze baguian way guin ree con ree bën dxiib laa reeb: Bën dxiib ree way guin, guidib luxdoo reeman nada'cw guiib culor xnia, ni sul në ni naguiëch. Abi' guijc ree way guin naj reen zi'c guijc ree beedx, abi' ro' reeb ririi bajl, go'xh në azufre. <sup>18</sup> Abi' garol ree bénguidxliuj güjt por bajl guin, go'xh guin në azufre guin ni ririi ro' reeb. <sup>19</sup> Con ro' ree way guin rugüjt reeb bejn ree, abi' con xbaan reeb rucheelguijdx reeb din lupunt xbaan reeb najn zi'c guijc bëël.

<sup>20</sup> Per los demasri ree bën ni ad güjtt por ree guialzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct rigueijn ad rajc tëët rza reeman. <sup>21</sup> Ad bacwëëz tëët rugüjt reeman bejn ree, ad basa'n tëët reeman guialbidxaa, ad basa'n tëët reeman ni dxuudx ni rüjn reeman con bën ad najt lacheel reeman, ad basa'n tëët reeman guialgubaan.

## 10

### *Tijb anjl ca' gui'ch*

<sup>1</sup> Dxel baguian stijb anjl bën gojl da't, zidguiajtaman xanyabaa lën tijb zaj abi' guijcaman dxiib tijb guidgij. Lojman naj zi'c gubijdx, abi' guia'man naj zi'c tio'p bajl ziool. <sup>2</sup> Dxel ca'man tijb librdo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. <sup>3</sup> Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw. <sup>4</sup> Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguiejnan cha' tijb bën na lon diizd xanyabaa:

—Ad gucaal ni gunee guigajdx ree guziaaw guin, din ad rayalt gagbee ree bejn laan.

<sup>5</sup> Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, <sup>6</sup> abi' badëë xtiidxaman por bën naban tiblyaa, bën been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac. <sup>7</sup> Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree bën badëë xtiidx Dios loj ree bejn bën ni rüjn ree sirv lojman.

<sup>8</sup> Dxel zatijb gaj gunee bën ni guneenë naj diizd xanyabaa, naman:

—Wej bica' librdo ni zojbyal loj ladxaa anjl ni za' loj nijsdoo në loj guidxliuj.

<sup>9</sup> Dxel wan lod za' anjl guin, rën lojman din guneeaman librdo guin lon, dxel naman lon: —Cwa'n gudawan. Ro'l guiatan nejxh zi'c dxijn, per lënl nala yaban.

<sup>10</sup> Dxel cwa'n librdo guin ladxaa anjl guin, abi' gudawanan. Ro'n biguiajtan nejxh zi'c dxijn, per chi gulox gudawanan nala biguiajtan lënan. <sup>11</sup> Dxel bagojn reeman naj guial gusnuu gugojnan bejn ree ni na Dios gac con zien ree nacion, rey ree në ree guidedx, xhietëëz diidx rniee reeman.

## 11

### *Tio'p ree testiw*

<sup>1</sup> Abi' baneeman tijb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil bén cayajp ree Dios respetj lèn yadoo guin. <sup>2</sup> Per ad tia'beel lule' yadoo guin din lule' guin ma badëë Diosan loj ree bén ad najt ree bén Israel, laa reeman naj bén gusagdiaj ree bén Jerusalén loj choon ijz garol. <sup>3</sup> Abi' naj gaxhalan tio'p ree da bejnan din guza't reeman naj. Grop reeman gacw lajd ya's, abi' laa reeman guiniee da diidxan choon ijz garol.

<sup>4</sup> Grop ree bén guin naj grop ree yag olivo në grop ree candeler ni za' loj dux Dad ree Dios bén rniabee loj guidxliuj. <sup>5</sup> Bal chu bén rën güünnë laa reeman xhienin, ro' reeman grii bajl din gugüjt reeman bén rdxe'ch ree laa reeman. Zian guiët ree bén rën güün laa reeman xhienin. <sup>6</sup> Grop ree bén guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guiniee reeman da diidxan. Rajp tëë reeman guialrniabee par guchaa reeman nijs gacan rejn, abi' zajc guiniab reeman din gui't graloj guialzi loj guidxliuj bëltëëz volt rën reeman. <sup>7</sup> Per chi ma bayaaloj tiamp ni guiniee reeman da diidxan, dxel tijb monstuo, tijb be doxh grii lèn bizë ni ad rliox, be guin ca'pnë laa reeman abi' güünb laa reeman gan abi' gugüjtib laa reeman. <sup>8</sup> Dxel gaa xcuerp reeman lunejz luguiedx Jerusalén lod güt xdad reeman Jesucrist loj crüjz, luguiedx ni naj yan zi'cgajc Sodoma në Egipto. <sup>9</sup> Dxel graloj ree bejn bén rniee ree gadxagayaa diidx, bén gralad ree, bén za graloj ree nacion zuguaa reeman gaa xcuerp ree bén guin lunejz choon dxej garol, per ad zatiëjbt reeman guiguie'ch ree bén guin. <sup>10</sup> Abi' ree bén naban loj guidxliuj dád yabaa reeman guial ma güjt ree bén guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bén guin laa reeman. <sup>11</sup> Per chi ma bayaaloj choon dxej garol guin, yasban Dios bén guin ree dxel chixche reeman abi' gra ree bén guguaa dád guidxeb reeman. <sup>12</sup> Dxel dád rejs biguien cha' tijb bén ni gunee xanyabaa, rëbaman loj grop ree bén guin: —Gol wë'p guie.

Abi' wë'p reeman xanyabaa lèn tijb zaj delant loj gra ree bén rdxe'ch laa reeman. <sup>13</sup> Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guiaad gra ree bén ad güjtt dád bidxeb reeman abi' gules reeman xvalor Dios bén yu' xanyabaa. <sup>14</sup> Zian rliox guialzi rarojp, dxel laa zëëd gajc guialzi ni rayon.

### *Trompejt ni goc gajdx*

<sup>15</sup> Chi bacwejdx anjl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xguialrniabee  
guidxliuj loj dux Dad ree Dios

në loj Jesucrist abi' nabee reeman zianczi në tiblayaa.

<sup>16</sup> Guigajlbitap ree bengol zobj loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respetj, <sup>17</sup> rëb reeman:

Dux Dadan Dios, lüj rajp gra guialrniabee  
abi' najl Dios yan në diizd gocli abi' gui'til.

Quixtëë lüj guial ma culüü xguialrniabee naroo bil ni rajpil  
abi' ma guzulojl canabeel.

<sup>18</sup> Bénguidxliuj ree bidxe'ch reeman,  
per ma bidxin dxej gulüü xguialrdxe'chil.

Ma bidxin dxej güün xguialguxtisil con ree bengüt  
par gudëël ni rayal tia' ree xbejnl

bén badëëd ree xtiidxil, në ree bén bililadx lüj.

Në ree bén rajp lüj respetj.

Ma bidxin dxej zi'c ree benzobjloj në ree bén ad zobjlojt tia' reeman ni rayal reeman,  
dxel guidlojl bén ruxhiin ree loj guidxliuj.

<sup>19</sup> Chi gulox rëb reeman zian, bixal xyadoo Dios xanyabaa dxel biguien xcaj promejs ni been Dios diizd gocli. Dxel guzuloj rë'p nijs, rajc naquie', rëëz guziaaw, bi't xudo'xh abi' dád zro' bjajb guiajyabaa.

## 12

*Tijb béngunaa ně tijb dragon*

<sup>1</sup> Dxel gojc tijb sen ro' xanyabaa. Balüüloj tijb béngunaa nadüübaman gubijdx, abi' nuzuj guia'man loj bëëw abi' guijcaman yu' coron ni gocchaaw con chiptio'p bajl xanyabaa. <sup>2</sup> Yu' xi'n béngunaa guin abi' rbixdiajman ragnaa lénman guial ma gal xi'nman. <sup>3</sup> Per gojc stijb sen xanyabaa. Balüüloj tijb dragon ro', tijb bedoxh najb culor xnia. Yu' gajdx guijquib, chii xcajchib yu' tée tijb coron tijb gaj guijquib. <sup>4</sup> Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix. <sup>5</sup> Gojl xi'n béngunaa guin tijb xindo niguiaaw, abi' laax nabee loj guidxliuj con tijb var guiib. Dxel biquied reeman laax loj xniaax, bidxinx lod zobj Dios lod canabeeman. <sup>6</sup> Abi' béngunaa guin baxüünman par niz lod naj ganax yujbidx, lod ma beenchaaw Dios par laaman, lod gudëed reeman ni gawaman choon ijz garol.

<sup>7</sup> Dxel guyu wadijl xanyabaa, anjl ni la Miguel con ree xi anjlaman gudijlnë reeman dragon guin con ree xi anjlib. <sup>8</sup> Per ad beent be guin gan con ree xi anjlib loj anjl Miguel con ree xi anjlaman, dxel ad gojctri nibajn be guin xanyabaa con ree xi anjlib. <sup>9</sup> Zianan zeel bazaal reeman dragon guin loj guidxliuj con ree xi anjlib. Dragon guin naj bëël gulal ni la xindxab ně satanás xin rusquiee gra ree bénguidxliuj.

<sup>10</sup> Dxel biguien cha' tijb bejn rejs da't diizd xanyabaa rëbaman:

—Ma bidxin dxej baslaa Dios dunuj ree, ma bidxin xguialrniabeeman chi nabeenëman Jesucrist, din ma biquied bén rbe'c xguialquia ree dux compniar ree, bén rdxinnë ree guialquia guin loj dux Dad ree Dios dxej guiaal. <sup>11</sup> Abi' dux compniar ree been reeman gan por rejn ni guxhie' bén naj zi'c xi xiil Dios ně por ni rëb reeman xhienaag rliadx reeman xtiidx Dios, ad bidxebt reeman majsi niëjt reeman. <sup>12</sup> Zeel gol badxe' luxdoodi nix gra ree bén zobj xanyabaa per, ¿probza lëjt bén zobj ree loj guidxliuj ně ree be yu' loj nijsdoo! Din ma biguiajt xindxab lod zobjidi, dád rdxe'chix guial ragbeex sta'nz dxej raya'n par laax.

<sup>13</sup> Chi baguiaa dragon guin guial ma biajbib guidxliuj, dxel briinalib béngunaa naj xniaa xindo guin. <sup>14</sup> Dxel badëe reeman tio'p xiil béngunaa guin zi'c xiil bisiaro' din gac suman loj bëël guin xt lod naj ganax yujbidx, lod gudëed reeman ni gawaman choon ijz garol. <sup>15</sup> Abi' gulëe ro' dragon guin tijb guiiw nijs din chinën béngunaa guin. <sup>16</sup> Per bixal loj guidxliuj persi gu'n guibidx nijs gulëe ro' dragon guin. Zian been guidxliuj béngunaa guin yudar. <sup>17</sup> Dxel dád bidxe'ch dragon guin béngunaa guin, abi' zitilnëb sta'n ree bén ni za loj xdiaaman, bén ruzoob ree xtiidx Dios zinal tée reeman xtiidx Jesucrist.

## 13

*Tio'p ree bedoxh*

<sup>1</sup> Wej dragon guin bisub ro' nijsdoo. Abi' naj baguia guial brii tijb monstruo loj nijsdoo, tijb bedoxh be yu' gajdx guijc, chii xcajchib abi' loj tijb gaj cajch guin yu' tijb gaj coron, abi' loj guigajdx guijquib ca tijb diidx ni rnieeguijdx Dios. <sup>2</sup> Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëedib loj monstruo guin xluarib lod rniabeeb abi' guialrniabeero' ca'b par nabeeb. <sup>3</sup> Tijb guijc monstruo guin baguian tijb lod nadxeelguijdx ni rulüü ad zusbajnt laab, per bayajc lod nadxeelguijdx guin abi' gra ree bénguidxliuj badxalój abi' binal reeman monstruo guin. <sup>4</sup> Dxel gojp da't reeman respejt dragon guin guial badëedib guialrniabee loj monstruo guin gojp da't tée reeman respejt monstruo guin, rëb reeman:

—¿Chu naj zi'c monstruo guin abi' chu zajc til con laab?

<sup>5</sup> Monstruo guin gojcchaaw ro'b par guilies xvalor gajquib, abi' guinieeguijdxib Dios, gojpib guialrniabee par güünb zian loj choon ijz garol. <sup>6</sup> Abi' guneeguijdxib Dios, guneeb diidxmal ree por laaman, por xyadooman ně por gra ree bén zobj xanyabaa. <sup>7</sup> Gojp monstruo guin permis par sub contr ree xbejn Dios abi' güünb laa reeman gan. Abi' gojpib guialrniabee par nabeeb gralój ree bejn, bén ni rniee ree gadxagayaa diidx, bén

gra lad ree, gra ree nacion. <sup>8</sup> Gra ree bén ad cat laj loj xlibr guialnaban diizd chi gad guidxliuj gacchaaw, loj xlibr bén naj zi'c xi xiil Dios bén güt por ree bejn, gra reeman gap da't respejt monstroo guin. <sup>9</sup> Bén rën ree gucaagdiajg, gol bacaagdiajg. <sup>10</sup> Bén naj che ladxguiib, cheman ladxguiib. Bén naj guiët con espad, con espad guiëtaman. Zeel bén naj ree xbejn Dios ad yadxaguïdi ad gucwëëz tëë chililadxidi Dios.

<sup>11</sup> Dxel baguian stijb monstroo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon. <sup>12</sup> Abi' lasa'gajc guialrniabee ca' monstroo ni brii loj nijsdoo lasa'gajcan ca'b abi' por laab gojp da't ree bejn respejt monstroo ni brii loj nijsdoo, monstroo ni bayajc lod nadxeelguijdx ni rulüüczü gugüjt laab. <sup>13</sup> Abi' monstroo ni brii loj guidxliuj në gajquib rüjn milagr narooob ree, xt rajc rniabeeb rguiajt bajl diizd xanyabaa xt loj guidxliuj delant loj ree bejn. <sup>14</sup> Zian rusquieeb bénguidxliuj ree por ree milagr ni rüjnb delant loj monstroo ni brii loj nijsdoo, abi' rniabeeb rüjn ree bénguidxliuj tijb xfigur monstroo ni brii loj nijsdoo, monstroo ni bidxeelguijdx con espad abi' gubajnb. <sup>15</sup> Abi' monstroo ni brii loj guidxliuj xt gojpiib guialrniabee par gudëëdib guialnaban loj xfigur monstroo ni brii loj nijsdoo, par guiniee figur guin në par gugüjtib gra ree bén ni ad rajpt respejt figur guin. <sup>16</sup> Gunabee tëë monstroo ni brii loj guidxliuj gra ree bejn, zi'c ree bengol zi'c ree xindoo, benrijcw ree në ree bénprob, bén naj ree zi'c bén nado' në ree bén ad najt zi'c bén nado', din chu' sen yaa reeman ladbee o lucwaj reeman. <sup>17</sup> Abi' achut zajc sii o guto' ya bal id ca reeman sen guin, abi' sen guin naj laj monstroo guin o xinumbrib.

<sup>18</sup> Guie ryaadx guialrignia'. Bén rajp guialrignia' cwëë xcwentaman con xnumbr monstroo guin, abi' numbr guin naj xho'pgayuu gayojnbixho'p. Con numbr guin ririi laj tijb bénguidxliuj.

## 14

### *Cant ni biil tibgayuu tiuubitap mil ree bejn*

<sup>1</sup> Baguia tëën guial za' bén naj zi'c xi xiil Dios guijc dajn ni la Siön. Bén naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bén naj zi'c xi xiil Dios në laj xDadaman. <sup>2</sup> Abi' biguiejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp. <sup>3</sup> Dxel rool reeman tijb cant cüb delant loj yagxhil lod zojb bén rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bén tibgayuu tiuubitap mil guin, laa reeman naj bén gulaa loj ree bénguidxliuj. <sup>4</sup> Abi' laa reeman naj ree xinguaaw ni ad bagaalt béngunaa, gojc reeman naya abi' zinal reeman bén naj zi'c xi xiil Dios bantëëz guin rejman. Laa reeman naj ree bén gulaa loj ree bénguidxliuj abi' zi'c guialnaza'c yaloj ni rinë bejn loj Dios zian naj reeman delant loj Dios në delant loj bén naj zi'c xi xiil Dios. <sup>5</sup> Ad goct basquiee reeman, nayadxuj reeman delant loj Dios.

### *Ruson ni badëë guiyon ree anjl*

<sup>6</sup> Dxel baguian tijb anjl rzujman xanyabaa con tijb ruson ni naj par tiblayaa par gugojnman gra ree bén naban loj guidxliuj, xhietëëz diidx rniee reeman, o xhietëëz loj diaa zëëd reeman, o xhietëëz ciuda o nacion zëëd reeman. <sup>7</sup> Dxel dád rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëëd ree bejn cwent lojman. Gol gojp da't respejt bén been xanyabaa, guidxliuj në nijsdoo në lod rajch nijs.

<sup>8</sup> Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooob guin gra ree bénguidxliuj guial güün reeman graloj ree nidxuudx, graloj ree dol ro'.

<sup>9</sup> Dxel rejs da't gunee anjl bayon guin rëbaman:

—Bal chu gap da't monstroo guin respejt con xfigurib abi' tiëbaman tia xsenb lucwajman o yaaman, <sup>10</sup> bén zii yayal xcasti narooob Dios, zro' da't gudëëdaman laaman casti. Abi' sagdiajman loj bajl ni caye'c azufre delant loj ree xianjl Dios në delant loj

bén naj zi'c xi xiil Dios. <sup>11</sup> Ad yu' tēēt dxej yayü' bajl guin. Ni'qui radxe ni'qui guiaal achet guialraziiladx par ree bén rajp da't respejt monstuo guin con xfigurib, o bén ca ree xsenb. <sup>12</sup> Zeel bén naj ree xbejn Dios bén ruzoob ree xtiidxaman abi' rliladx reeman Jesucrist, ad rayalt yaleny'a' reeman.

<sup>13</sup> Biguiejn tēēn cha' bén ni na lon diizd xanyabaa:

—Bacaa ni ganin lojl: “Diizd yan xiquilbaa ree bén rējt con guialrliladx Jesucrist.”

Dxel rēb xSprijt Dios: “Walican din ma yaziiladx reeman xcwent ree guialzi ni gudēd reeman abi' chinē reeman guialbenza'c reeman.”

### *Guialnaza'c ni runee guidxliuj*

<sup>14</sup> Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'. <sup>15</sup> Dxel brieri stijb anjl lēn yadoo abi' rejs da't guneeman bén ni zojb loj zaj guin rēbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

<sup>16</sup> Abi' bén zojb loj zaj guin badēēd xi hosaman loj guidxliuj abi' bato'paman guialnaza'c loj guidxliuj.

<sup>17</sup> Dxel brieri stijb anjl lēn yadoo ni naj xanyabaa, ca' gajcaman tijb hoz ni nadoxh ro'.

<sup>18</sup> Dxel niz loj altar brieri stijb anjl bén rajp guialrniabee par bajl, abi' dād rejs guneenēman bén ca' hoz ni nadoxh ro' guin, rēbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

<sup>19</sup> Dxel badēēd anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rēn guiēb lod yu' xcasti Dios.

<sup>20</sup> Dxel xijch ciuda guin bixii ree uv guin abi' lēn lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wē'pan zi'ct xt niz ro' ree way.

## 15

### *Bén naj ree xi anjl Dios con guigajdx ree guialzi*

<sup>1</sup> Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx guialzi. Guialzi guin ree naj gajdx ni chigra gac din con guialzi guin ree gusiaalox Dios xcastiman.

<sup>2</sup> Baguia tēēn zi'c nijsdoo, per najn zi'c tijb vidr xcutor bajl. Dxel lojn za' ree bén been ree gan loj monstuo, loj figur con loj xnumbrib, ca' reeman arp ni badēēd Dios loj reeman. <sup>3</sup> Abi' cayool reeman xcant Moisejs xbejn Dios nē xcant bén ni naj zi'c xi xiil Dios, rēb cant guin:

Naroob nē ni diidxli radxaloj bejn

naj ree ni rüjnl, dux Dadan Dios Bén rajp gra guialrniabee.

Xnejz da't nē zi'c rayal rüjnl,

lüt guial rniabeel gra ree bénguidxliuj.

<sup>4</sup> ¿Chu ad zadxebt lüt?

¿Chu ad zuza'tt lüt zagdxe, dux Dadan Dios?

Tijbzi lüt naj bén naya nali

abi' bénguidxliuj gui't gap da't reeman lüt respejt

guial ma balüül bejn ree guial xnejz rüjnl.

<sup>5</sup> Chi gulox baguian ni guin ree, dxel baguian bixal luar lod mazri nagle' lēn xyadoo Dios xanyabaa. <sup>6</sup> Abi' lēn yadoo guin brieri gajdx ree anjl bén ca' ree gajdx ree guialzi, najcw reeman lajd naquich ni rdiin bacha', abi' naxii tijb cinch or luxdoo reeman. <sup>7</sup> Abi' tijb guidap ree be ni za' lod za' Dios, badēēb loj tijbgaj ree anjl guin tijb cojp or ni guidax xcasti Dios bén naban guidib tiamp nē par tiblayaa. <sup>8</sup> Abi' lēn yadoo guin gudxan xgo'xh xbacha' Dios nē xguialrniabeeman. Achut gojc niu lēn yadoo guin xt chi ma gulox guigajdx ree guialzi ni zidnē ree anjl guin.

## 16

*Cojp ni guidxa ree xcasti Dios*

<sup>1</sup> Dxel biguejnan cha' bejn rejs da't guneeman diizd lën yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

<sup>2</sup> Dxel wej anjl yaløj guin, bala'taman ni yu' loj xcojpaman loj guidxliuj. Abi' gra ree bën ni yu' xsen montruo guin bën gop da't ree respejt xfigurib, briei guiadxyoodx lad reeman, ni rdoob da't.

<sup>3</sup> Abi' anjl baroyp guin bala'taman ni yu' loj xcojpaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

<sup>4</sup> Anjl bayon guin bala'taman ni yu' loj xcojpaman loj ree guiiw në lod rajch ree nijs abi' nijs guin ree bayajc reen rejn. <sup>5</sup> Abi' biguejnan rëb anjl ni rniabee ree nijs guin:

—Xnejz naj ni cayüjn në zi'c cayüjn xguialguxtisil, Dad Dios, lüj naj bën naya nali, najl Dios yan në diizd gocli. <sup>6</sup> Din bénguidxliuj ree guxhie' reeman rejn bagüjt reeman xbejn reel në ree bën badëed ree xtiidxil. Zeel ma badëedil rejn guië' reeman, abi' zian rayal reeman.

<sup>7</sup> Abi' niz loj altar biguejnan cha' stijb bën rëb:

—Walican, Dad Dios bën rajp gra guialrniabee. Xnejz në zi'c rayal cayüjn xguialguxtisil.

<sup>8</sup> Abi' anjl badajp guin bala't ni yu' loj xcojpaman loj gubijdx din guze'can bejn ree zi'c bajl. <sup>9</sup> Gra reeman we'c por xguialnalaa da't gubijdx guin. Per ni'qui zian ad bayüjnt reeman xgab por xtol reeman, ad baza'tt reeman Dios zagdxe guneeguijdxli reeman laaman, laaman guial najman bën rniabee ree guialzi guin.

<sup>10</sup> Anjl bagaay guin bala'taman ni yu' loj xcojpaman lod rbej montruo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadëd reeman. <sup>11</sup> Per ni'czi zian ad basa'nt reeman ni mal ni rüjn reeman, al mazri been reeman por guialzi ni gudëd reeman në por guiadx ni gudxib lad reeman, guneeguijdx reeman Dios bën zojb xanyabaa.

<sup>12</sup> Anjl baxo'p guin bala't ni yu' loj xcojpaman loj guiiwro' la Eufrates abi' gubidx nijs loj guiiw guin. Zian bixal nejz din täd ree rey bën zëed ree lad lod rliejn gubijdx. <sup>13</sup> Dxel baguian ro' dragon guin, con ro' montruo guin në ro' bën rusquiee rëb rudëe xtiidx Dios loj ree bejn briei choon ree sprijt mal ni naj zi'c bidx. <sup>14</sup> Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman din til reeman con Dios bën rajp gra guialrniabee, dxej ni gui'taman guidguieenman gan loj gra reeman.

<sup>15</sup> Rëb Jesucrist:

—Gol badxe'guijc guial dxejczi guialan zi'c chi ri't tijb xingubaan tijbzi golp. Xiquilbaa ree bën rbëz naj, bën za'sin ree chi guialan din chitëe yaya'nxtu reeman zi'c chi rniaaz bën za' zibëel.

<sup>16</sup> Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

<sup>17</sup> Abi' anjl bagajdx guin bala't ni yu' loj xcojpaman loj bi, abi' diizd lën yadoo ni yu' xanyabaa niz lod za' xyagxhil bën rniabee, biguien rejs da't cha' bën rëb:

—Ma bayaaloj gojc ni rayal gac.

<sup>18</sup> Abi' guzuloj rë'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diizd guzuloj yu' bejn loj guidxliuj, din xu guin naj ni mazczi ni doxh. <sup>19</sup> Abi' gula' ciuda narooob guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëe xcasti ro'man loj ciuda narooob guin. <sup>20</sup> Abi' gunijt ree gra yuj riga' loj nijsdoo në ree guia'. <sup>21</sup> Biajb tée guiajyabaa guijc ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guneeguijdx reeman Dios, por ree guialzi guin, guial dád ni doxh gojc chi biajb ree guiajyabaa guin.



## 17

*Guialguxtis ni güün Dios con béngunaa dxuudx*

<sup>1</sup> Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro', <sup>2</sup> laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguiiwaman bejn ree loj guidxliuj con ree ni ad rüjnt sirv ni rüjnman.

<sup>3</sup> Abi' por xSprijt Dios binē anjl guin naj lod naj ganax yujbidx. Ni baguian tijb béngunaa dxiibaman tijb monstuo xnia, abi' guidib ladib ca diidxguijdx par Dios, yu' gajdx guijquib con chii xcajchib. <sup>4</sup> Abi' béngunaa guin najcwaman lajd murad nē ni xnia, najcchaawnēn ganax or nē ree guiaj zagdxe nē ree perl. Abi' ca'man tijb cojp or guidxa ree ni nabixhladx lojn nē ree ni dxuudx ni rüjnman. <sup>5</sup> Abi' lucwajman ca tijb letrer ni achutczi rignia' ni rēn guiēban, rēb loj letrer guin: “Babilonia, ciuda naroo ni naj xniaa ree béngunaa dxuudx nē xniaa ree ni dxuudx ni rajc loj guidxliuj,” <sup>6</sup> Dxel gogbeen guial rzüdx béngunaa guin con xrejn ree xbejn Dios, con xrejn ree bēn ni güt guial gune reeman xtiidx Jesús. Abi' dād badxalon chi baguian zian. <sup>7</sup> Dxel na anjl guin lon:

—¿Chexc zeel dād radxalojl? Naj gusignia' lüj ni rēn guiēb béngunaa ni baguiaal nē monstuo ni dxiibaman, be ni yu' gajdx guijc con chii xcajch. <sup>8</sup> Monstuo ni baguiaal, laab naj be guban gocli, per yan ad nabantrib. Per guliülojb lēn bizē ni ad yu't lod rliox dxelri nidlojb tiblyaa. Abi' ree bēn naban loj guidxliuj, bēn ni ad cat ree laj loj xlibr guialnaban diidz gocli chi gad guidxliuj gacchaaw, laa reeman yadxaloj chi guguaa reeman monstuo ni guban gocli, be ad nabant yan per gui'tib.

<sup>9</sup> 'Guie ryaadx quiarguejn. Guigajdx guijc monstuo guin rēn guiēban gajdx guia' lod zojb béngunaa guin <sup>10</sup> rēn tēē guiēban gajdx ree rey. Gaay ree rey guin ma gudēēd xguialrniabee, abi' bēn baxo'p guin naj bēn canabee yan. Dxelri nabee bēn bagajdx guin, per ad xchejt nabeeman. <sup>11</sup> Abi' monstuo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxel yayalib lod rayalib casti par tiblyaa.

<sup>12</sup> 'Guidxii cajch ni baguiaal rēn guiēb chii ree rey ni ad wazulojt nabee. Per chi tia' reeman guialrniabee, ad xchejt nabee reeman con monstuo guin. <sup>13</sup> Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstuo guin, <sup>14</sup> abi' til reeman con bēn naj zi'c xi xiil Dios. Per güün bēn naj zi'c xiil guin laa reeman gan din laaman naj Dad loj gra ree dad, naj tēēman rey loj gra ree rey. Abi' bēn za' ree con bēn naj zi'c xi xiil Dios, laa reeman naj bēn bazoob xtiidx Dios, bēn ma naj ree par laaman abi' diidxli zinal reeman xnejz Dios.

<sup>15</sup> Na tēē anjl guin lon:

—Nijs ni baguiaal lod zojb béngunaa dxuudx guin laan rēn guiēb graloj ree bēn rniee graloj ree diidx, bēn gra lad ree, bēn zēēd ree gra loj ree nacion. <sup>16</sup> Abi' monstuo guin con guidxii xcajchib ni baguiaal, guidxe'ch reeman béngunaa dxuudx guin, tio'nldax reeman laaman, gusa'n reeman zibēēlaman, gaw reeman xbēēlaman abi' guze'c reeman laaman. <sup>17</sup> Dios yazaladx loj guidxii ree rey guin quiarguejn din güün reeman zi'c rēnman. Yaya'n reeman diidx din yayü xguialrniabee reeman loj monstuo guin, xt gac cumplid ni rēb Dios gac. <sup>18</sup> Abi' béngunaa ni baguiaal, laaman naj ciuda naroo ni rniabee ree rey yu' loj guidxliuj.

## 18

*Biajb quiedx Babilonia*

<sup>1</sup> Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj, <sup>2</sup> abi' rnieeman rejs da't rēbaman:

—Ma biajb, ma biajb Babilonia ma naj ciuda naroo guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rbijxhladx ree bejn. <sup>3</sup> Din zi'c chi rusüdx bejn stijb bejn, zian ma batiaalguiiw ciudaro' guin gra ree

bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bén rüjn negojs loj guidxliuj ma naj reeman rijcw por graczi ree ni dxuudx rajc ni.

<sup>4</sup> Dxel biguiejnan cha' stijb bén gunee diizd xanyabaa rëbaman:

—Gol brii loj ciuda guin, da bejn reen, chitëë go'chidi loj ree dol ni rajc ni chitëë tädidi guialzi ni gac ree loj ciuda guin. <sup>5</sup> Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree. <sup>6</sup> Gol beennë ciuda guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdiajn tio'p volt mazri guial loj ni basagdiajn ben ren ree. <sup>7</sup> Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bén rniabee, ad najtan bén bizëjb ad yu' tëët dxej chu'nayan.” <sup>8</sup> Zeel tijbzi dxej guidxajg lasa' ree guialzi par ciuda guin, zi'c guialgüjt, guialrunaya, guialrliaan, dxel che'can con bajl. Din narooob xguialrniabee dux Dad ree Dios bén gudëed casti ciuda guin.

<sup>9</sup> Abi' ree rey ni yu' loj guidxliuj, bén babaa ree guial been reeman ni dxuudx con ciuda guin, zoon reeman, naya sagdiaj reeman chi guguaa reeman go'xh ni caye'can. <sup>10</sup> Abi' zijt su reeman chi guguaa reeman casti ni cadëdan, dxel guiëb reeman:

—¡Probza lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

<sup>11</sup> Abi' ree bén rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman, <sup>12</sup> zi'c or, plajt, guiaj zagdxe ree, perl, lajd zagdxe ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdxe, bronce, guuib con marmol në marfil. <sup>13</sup> Ad zajc tëetri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdxe, trigo, go'n, xiil, way, carrejt, ad zajc tëetri ree guto' reeman bejn ree. <sup>14</sup> Abi' guiëb reeman loj ciuda guin:

—¡Ad rajptril guialnaza'c ni bayuladx da'til, tiblyayaa ma banijtil zi'c gubanl con gra ree ni za'c ni gopil!

<sup>15</sup> Gra ree bén been negojs, bén gojc ree rijcw por ciuda guin, zijt su reeman guialrdxeb reeman casti ni cadëd ciuda guin. Zoon reeman, zazagdiaj reeman, zunaya reeman. <sup>16</sup> Abi' guiëb reeman:

—¡Probza, probza ciuda narooob guin! Laan guial guzujchaawan con ree lajd zagdxe, lajd culor murad con ni xnia, laan guial guzujchaawan con or, con perl në con guiaj zagdxe <sup>17</sup> din, ¡tibrajtzi gunidloj gra ree guialnaza'c guin!

Gra ree bén zë lën barcw, zi'cgajc xcapitan ree barcw, gra ree mariner në los demazri ree bén rüjn dxiin lën barcw, guzudxe reeman zijt <sup>18</sup> chi baguiaa reeman go'xh ni cayë'c ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

<sup>19</sup> Abi' barooob yuj guijc reeman, roon reeman abi' guyunaya luxdoo reeman rëb reeman:

—¡Probza!, probza ciuda narooob guin por xguialnaza'can gra ree bén been negojs Bén rajp ree barcw gojc reeman rijcw, din tibrajtzi gunidlojn.

<sup>20</sup> Dxel biguien cha' bén na:

—Per lëjt Bén zojb ree xanyabaa, lëjt najdi xi apóstoles Jesucrist, lëjt Bén rudëed ree xtiidx Dios në los demazri ree Bén naj xbejn Dios, gol babaa por ni cazajc ciuda guin din zian cayüjn Dios xguialguxtisaman por ni beennë ciuda guin lëjt.

<sup>21</sup> Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguaa Babilonia guin stijb. <sup>22</sup> Ad zaguietri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguietri loj ciuda guin. Achutri bejn güün dxiin ni, ni'qui xnaquie' mulin ad zaguietri ni. <sup>23</sup> Achetri guij che'c

loj ciuda guin, achutri guxhliaa. Gra ree b́en been negojs loj ciuda guin ganax b́en zobjloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

<sup>24</sup> Abi' loj ciuda guin bagüjt reeman b́en badëed ree xtiidx Dios, nê ree b́en riladx Dios, abi' por ciuda guin bagüjt reeman los demasri ree b́en ma güjt loj guidxliuj.

## 19

<sup>1</sup> Chi gulox baguian biguiejn t́een zian, dxel dád rejs biguiejnan cha' zien da't ree b́en canee xanyabaa rëb reeman:

¡Quixtëe Dios! Por dux Dad ree Dios

zëed perdon, respejt nê guialrniabee,

<sup>2</sup> din laaman waliman abi' xnejz rüjn xguialguxtisaman,

ma badëedaman casti béngunaa dxuudx ni bazaalguiiw

bénguidxliuj ree con ree xni malaman,

ma been Dios guialguxtis con laaman persi baguijxaman ni bagüjtaman xbejnman.

<sup>3</sup> Abi' biguiejnan rëb reeman stijb:

—¡Quixtëe Dios! Ad yu't dxej yayü' go'xh ni caye'c ciuda guin.

<sup>4</sup> Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëe Dios! ¡Diidxza'c guin ree naj par laaman!

<sup>5</sup> Abi' niz lod za' yagxhil guin biguiejnan cha' b́en rëb:

Gradi zi'c bengol zi'c xindoo

gol gules xvalor dux Dad ree Dios,

lëjt rüjndi laaman sirv abi' rajpidi laaman respejt.

### *Xguialruxhliaa b́en naj zi'c xi xiil Dios*

<sup>6</sup> Biguiejn t́een zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:

¡Quixtëe Dios! Din ma canabee dux Dad ree Dios,

b́en ca' gra guialrniabee.

<sup>7</sup> Yan yadxë' du luxdoo ree zagdxë, yabaa ree yales t́ee ree xvaloraman.

Din ma bidxin dxej guxhliaa b́en naj zi'c xi xiilaman

abi' b́en gac lacheelaman ma za'chaawaman.

<sup>8</sup> Najcwaman lajd zagdxë, ni naquich, naya rulaa t́een bacha'.

Din lajd naquich guin rën guiëban ni zagdxë ni been ree xbejn Dios.

<sup>9</sup> Abi' na anjl guin lon:

—Bacaa: “Xiquilbaa ree b́en naj gui't loj xguialruxhliaa b́en naj zi'c xi xiil Dios.”

Na t́ee anjl guin:

—Ni guie ree naj xtiidxli Dios.

<sup>10</sup> Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l b́en wali ree rüjncwent xtiidx Jesucrist. Gojp da't respejt Dios.

Din por Jesús zëed ni rníee ree b́en rudëed xtiidx Dios.

### *B́en dxiib tijb way naquich*

<sup>11</sup> Dxel baguian zobjyal xanyabaa baguia t́een tijb way naquich. B́en dxiib laab laman: B́en ruzoob xtiidxaman nê b́en wali, din xnejz rüjn xguialguxtisaman nê xwadijlaman,

<sup>12</sup> guiaaalojman rulaan bacha' zi'c bajl abi' zien ree coron yu' guijcaman, tib lajtaman ca laj tijb bejn ni achut rignia', tijbzi laaman ragbee xhie rën guiëban, <sup>13</sup> guidib rejnzi xabaman, abi' laman Xtiidx Dios.

<sup>14</sup> Abi' ree xsuldadaman b́en yu' xanyabaa zinal reeman laaman dxiib reeman way naquich, najcw reeman lajd zagdxë ni naquich ni naya t́ee. <sup>15</sup> Ro'man ririi tijb espad ni nadoxh ro', con espad guin gudëedaman casti bénguidxliuj, nê con var guiib nabeeman laa reeman. Zi'c rë'p bejn guijc uv par guixiin, zian gudëedaman loj reeman casti narooob

ni zëed por Dios bën rajp gra guialrniabee. <sup>16</sup> Loj xcajpaman con cüdaman ca ree diidx ni rëb: “Rey bën rniabee loj ree rey në Dad bën rniabee loj ree dad.”

<sup>17</sup> Dxel baguian tijb anjl za'liman loj gubijdx, dád rejs rbidxa'man, rbejdxaman gra ree be ni rzuj xanyabaa, rëbaman:

—Gol guda, gol bachajg lasa'di lod gunee Dios ni gawidi zro' da't, <sup>18</sup> zi'c xbëel ree rey, xbëel ree capitan, xbëel ree bën achut rüjn gan, zi'c xbëel ree way, xbëel ree bën rbib laa reeb, xbëel gra ree bejn, zi'c xbëel ree bën naj zi'c bën nado' në xbëel ree bën ad najt zi'c bën nado', zi'c xi bëel ree bengol në ree xindoo.

<sup>19</sup> Dxel baguian monstroo con ree rey yu' loj guidxliuj në ree xsuldad reeman, nadxag lasa' reeman par til reeman con bën dxiib way naquich guin con ree xsuldadaman. <sup>20</sup> Per laa reeman gunaaz reeman monstroo guin con bën rusquiee rëb rudëe xtiidx Dios loj ree bejn, bën rüjn milagr niz loj monstroo guin. Abi' por ree milagr guin basquieeman bën guyu ree xsen monstroo guin gojp tëe reeman respekt xfigurib. Abi' monstroo guin con bën rusquiee ni rëb rudëe xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre. <sup>21</sup> Abi' los demazri ree xbejn monstroo guin güjt reeman con espad ni ririi ro' bën dxiib way naquich guin, abi' gudaw ree be ni rzuj xanyabaa laa reeman, xt gudxa lën reeb gudaw ree xbëel reeman.

## 20

### *Ti mil ijz*

<sup>1</sup> Dxel baguian zidguiajt tijb anjl xanyabaa, ca'man xguiibliaw bizë ni ad yu't lod rliox, ca' tëeman tijb caden narooob. <sup>2</sup> Abi' gunaazaman dragon, bëel gulal ni la xindxab në satanás, guxhiiman laab con caden guin por timil ijz. <sup>3</sup> Dxel bazaalaman laab lën bizë ni ad yu't lod rliox abi' basiaawdx'i'chaman bizë guin chitëe gusquieeri reeb bejn ree loj guidxliuj xt chi ma bayaaloj timil ijz dxel yariib lën bizë guin tiblädëd.

<sup>4</sup> Dxel baguian yagxhil zagdxë ree lasa' xyagxhil ree rey, lojn zojb ree bën ni ma cwa' guialrniabee par güün reeman guialguxtis. Baguia tëen xsprijt ree bën ni biru' yëjn guial gutie'ch reeman xtiidx Dios në gra ni ragbee reeman por Jesús. Laa reeman ad gojpt respekt monstroo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz. <sup>5</sup> Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz. <sup>6</sup> ¡Xiquilbaa ree bën yaban yaloj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

<sup>7</sup> Chi ma bayaaloj timil ijz guin, dxel yarii xindxab guin lod nayaawix <sup>8</sup> Par gusquieex bejn ree guidib guidxliuj. Gusquieex Gog në Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo. <sup>9</sup> Gra lad gui't reeman, guido'p reeman gadëd lod za' ree xbejn Dios në gadëd ro' guiedx lod rënman. Per laaman diidz xanyabaa guixhiaalaman bajl ni guze'c bën guin ree xt yadëj reeman. <sup>10</sup> Abi' xindxab ni basquiee laa reeman laax chu' loj bajl lod caye'c azufre, lod ma za' monstroo con bën rusquiee rëb rudëe xtiidx Dios loj ree bejn, lod ad yu't dxej yarii reeman lod sagdiaj tëe reeman dxej guiaal.

### *Yadëed ree bejn cwent loj Dios*

<sup>11</sup> Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj në xanyabaa, gunidloj reen tiblyaa. <sup>12</sup> Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman. <sup>13</sup> Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxej ni yadëed reeman cwent loj Dios, bibig reeman yagaj din güün xguialguxtis Dios con laa reeman bal conin been reeman. <sup>14</sup> Dxel guialgüjt con

lod guzu ree bengüt gulëjz reeman guidxin dxej yadëed reeman cwent loj Dios, grop reen bazaal reeman loj bajl, bajl guin naj guialgüjt barojp. <sup>15</sup> Abi' loj gajc bajl guin bayal ree bën ad cat laj loj xlibr guialnaban.

## 21

### *Xanyabaa cüb con guidxliuj cüb*

<sup>1</sup> Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaløj ma gunijt reen, ziangajc nijsdoo. <sup>2</sup> Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za'chaawan zi'c rzujchaaw tijb biingunaa chi ma guxhlaam con xin gac lacheelim. <sup>3</sup> Abi' dád rejs biguiejnan cha' bën gunee lod za' xyagxhil Dios, rëbaman:

—Ma za' Dios con ree bejn, guibannëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. <sup>4</sup> Laaman gutiaa loj reeman nijs biin reeman, dxel achetri guialgüjt chu', guialroon, guialrunaya në guialzi, din gra ree ni guyu gocli ma gudëd reen.

<sup>5</sup> Abi' bën zojb loj yagxhil guin, naman:

—Gra cayünan nicüb.

Na tëëman:

—Bacaa ree diidx guie, din laa reen naj diidxli ni rayal chililadx bejn.

<sup>6</sup> Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diizd guia'xchej në par tiblyaaa. Bën re'c nijs, naj yazaladx nijs lojman nijs ni ririi lod rajch nijs ni runee guialnaban.

<sup>7</sup> Bën ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nän. <sup>8</sup> Per ree bën rdxeb sudxi'ch loj ni rliladx reeman naj, bën ad rliladxt ree naj, bën ruladx ree güün ganax ni mal, bën rugüjt ree bejn, bën rüjn ree nidxuudx con ree bën ad najt lacheel reeman, bën rüjn ree guialbidxaa, bën rën ree ni naladx reeman naj ree Dios, në gra ree bën rusquiee, laa reeman rayal loj bajl lod caye'c azufre, bajl guin naj guialgüjt rarojp.

### *Jerusalén cüb*

<sup>9</sup> Dxel tijb guigajdx ree anjl bën ca' ree guigajdx ree cojp ni guidxa guigajdx ree guialzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bën naj zi'c xi xiil Dios.

<sup>10</sup> Abi' por Sprijt binë anjl guin naj guijc tijb guia' narooob, guijc tijb guia' ya. Ni balüüman naj Jerusalén, xciuda narooob Dios zidguiajtan xi xanyabaa Dios. <sup>11</sup> Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdx ni la Jaspe, nayni zi'c tijb vidr. <sup>12</sup> Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaa ree bën Israel, tijb gaj lad port guin ca zi'c la tibcwaa gaj reeman. <sup>13</sup> Choon ree port guin naj niz lod rliejn gubijdx, abi' choon reen naj niz lod rëëz gubijdx, za choon ree port guin naj niz lad norte, za choonan naj niz lad sur. <sup>14</sup> Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bën naj zi'c xi xiil Dios.

<sup>15</sup> Anjl ni guneenë naj ca'man tijb var or din tia'beenëman ciuda guin con ree port guin con ze' guin.

<sup>16</sup> Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. <sup>17</sup> Dxel cwa'man midid ze' guin, abi' ze' guin najn gayojnbitap mejtr zi'c naj xmidid bénguidxliuj zi'c bare'xh anjl guinan.

<sup>18</sup> Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni. <sup>19</sup> Xguiaj cimiant ze' guin najcchaawnën gadxagayaa ree guiaj zagdx. Guiaj yaløj guin najcchaawnën con guiaj ni la Jaspe, guiaj barojp guin najcchaawnën guiaj ni la

zafiro, guiaj bayon guin najcchaawnën guiaj ni la ágata, guiaj badajp guin najcchaawnën guiaj ni la esmeralda, <sup>20</sup> guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa, guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amatista. <sup>21</sup> Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijbgaj port. Abi' nejj narooob ni naa galay ciuda guin najn ganax or, zi'c tal naj tijb vidr ni rdëd biani grop xijch.

<sup>22</sup> Ni'qui tijb yadoo ad baguiatan loj ciuda guin din dux Dad ree Dios bën ca' gra guialrniabee con bën naj zi'c xi xiilaman, laa reeman naj xyadoo ciuda guin. <sup>23</sup> Abi' loj ciuda guin ad rüjnt naguiejn gusni gubijdx ni'qui bëëw, din xbacha' Dios rusni ni abi' bën naj zi'c xi xiilaman laaman naj bajl ni. <sup>24</sup> Bén zëëd ree lod rent lod ren sa reeman loj bacha' guin, bën ma naj ree perdon. Abi' ree rey loj guidxliuj guie guidnë xguialza'cdxoon reeman loj ciuda guin. <sup>25</sup> Xport ciuda guin ad yu't dxej yaaw reen radxe, abi' ni ad zut guiaal. <sup>26</sup> Gra xguialza'cdxoon con gra xguialzagdxe ree bën zëëd lood rent lood ren, guidxin reen loj ciuda guin. <sup>27</sup> Per ad yu't dxej chu' ni dxuudx loj ciuda guin, ni'qui ree bën rüjn ni dxuudx ni'qui ree bën rusquiee, bën cazi ree laj loj xlibr guialnaban ni ca' bën naj zi'c xi xiil Dios, laaz reeman chu' loj ciuda guin.

## 22

<sup>1</sup> Balüü tää anjl guin lon tijb guiiw naya ni razaladx guialnaban, naynidxuj zi'c tijb guiaawajn. Ririi nijs guin lod za' xyagxhil Dios con bën naj zi'c xi xiilaman, <sup>2</sup> abi' zën galay loj nejj narooob ni naa galay ciuda guin. Galay nejj guin naa guiiw guin, abi' grop lad guiiw guin zobj yag ni runee guialnaban ni rtia chiptio'p loj ninejxh, gazobëëw ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. <sup>3</sup> Achetri ni mal chu' ni, abi' Dios con bën naj zi'c xi xiilaman cwe loj xi yagxhil reeman guiáad ree xbejn reeman gap da't laa reeman respejt. <sup>4</sup> Abi' ni guguaaloj reeman Dios, bën ni ca ree lajman lucwaj. <sup>5</sup> Achetri guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblayaa con laaman.

### *Ma zidyob gui't Jesucrist*

<sup>6</sup> Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bën razaladx diidx loj ree bën rudëëd xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. <sup>7</sup> Dad Jesucrist rëb guial nayob gui'taman.

¡Xiquilbaa ree bën ridxga' ni ca loj libr guie ni rugojn ni gac!

<sup>8</sup> Naj Waj, baguian biguiejn tääni ni guin ree. Abi' chi gulox baguian biguiejn tääni ni guin ree, dxel bazuxiban par ga'p da'tan respejt anjl ni balüü ree ni guin lon. <sup>9</sup> Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril bën rudëëd ree xtiidx Dios, në ree bën ridxga' ree ni ca loj libr guie. Zeel Dios gojp da't respejt.

<sup>10</sup> Na tääman lon:

—Ad guquie'chil diidx ni zëëd ree loj libr guie, diidx ni rugojn ree ni gac, din ma zidyob gac reen. <sup>11</sup> Gol basa'n ree ben mal con xni mal reeman, abi' ree bën naban nadxuudx zu naban reeman nadxuudx bal zian ruladx reeman. Per bën rüjn ree zi'c rayal gusnuu güün reeman zi'c rayal abi' ree bën naban zi'c rën Dios gusnuu guiban reeman zi'c rën Dios.

<sup>12</sup> Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been tijbgajman. <sup>13</sup> Naj naj zi'c lejtr A con lejtr Z, lejtr ni rzulojnë ni rlioxnë tää alfabeto, din tijbzi naj rniabee diidx guia'xchej në par tiblayaa.

<sup>14</sup> Xiquilbaa ree b́en ni naj zi'c ree b́en ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap t́e'e reeman derejch gaw reeman ni nejxh ni rtia loj yag runee guialnaban. <sup>15</sup> Abi' xijch ciuda guin yaya'n ree benguijdx, b́en ŕijn ree guialbidxaa, b́en ŕijn ree ni dxuudx con ree b́en ad najt lacheel reeman, b́en ruǵijt ree bejn, b́en ni rajp ree respejt ni naladx reeman naj dios, ńe ree b́en ruladx cẃe'e'gujic ni rusquiee rníee t́e'e reeman diidx rusquiee ree. <sup>16</sup> —Naj Jesús ma guxhal da anjlan din gugojnman ĺejt gra ree ni guie din gui'e'bidi laan loj gra ree b́en rliladx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildoo.

<sup>17</sup> XSprijt Dios con biinxdüb ni gac lacheel b́en naj zi'c xi xiil Dios ŕeb reeman:

—Guda.

Abi' b́en rigúiejn rníee reeman zian, ŕeb gajcaman:

—Guda.

Chut́e'e'z b́en re'c nijs, gol guda, abi' b́en ŕen zajc gui'e'man nijs runee guialnaban lagajzi.

<sup>18</sup> Gra ree b́en rigúiejn ree diidx ni źe'e'd loj libr guie ni gac, naj rni lojdi bal chu b́en gucaa gujic ni źe'e'd loj libr guie, ziangajc zusro' Dios guialzi ni źe'e'd loj libr guie par laaman. <sup>19</sup> Ziangajc bal chu chiquied xhie diidx gujic ree diidx ni źe'e'd loj libr guie ni gac ziangajc chiquied Dios gujic ni rayalaman loj yag runee guialnaban ni ruza't libr guie ad zayu t́e'e'taman loj xciuda Dios ni ruza't libr guie.

<sup>20</sup> B́en ragbee guial diidxli naj gra ree ni guie, ŕebaman:

—Walin, nayob guialan.

Zian gacan Dad Jesús, ¡Guda!

<sup>21</sup> Dad Jesús güünle' gradi. Amén.